

Xtiidx Dios



New Testament in Zapotec, Santo Domingo Albarradas
(MX:zas:Zapotec, Santo Domingo Albarradas)

Xtiidx Dios
New Testament in Zapotec, Santo Domingo Albarradas
(MX:zas:Zapotec, Santo Domingo Albarradas)

copyright © 2010 Wycliffe Bible Translators, Inc.

Language: Zapotec, Santo Domingo Albarradas

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Santo Domingo Albarradas

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022
fb4ebcb8-e1f4-5bfc-b08c-f590e137d86d

Contents

San Matew	1
San Marcw	56
San Lujc	91
San Juan	148
Ni been ree apóstoles	189
Gui'ch par ree bén Rom	241
Gui'ch yaloj par ree bén Corinto	264
Gui'ch barojp par ree bén Corinto	286
Gui'ch par ree bén Galacia	300
Gui'ch par ree bén Éfeso	308
Gui'ch par ree bén Filipos	315
Gui'ch par ree bén Colosas	320
1 Ts	325
2 Ts	330
Gui'ch yaloj par Timoteo	333
Gui'ch barojp par Timoteo	340
Gui'ch par Tito	344
Gui'ch par Filemón	347
Gui'ch par ree bén Hebreos	349
Gui'ch bacaa Santiaaw	366
Gui'ch yaloj bacaa San Pedr	372
Gui'ch barojp bacaa San Pedr	378
Gui'ch yaloj bacaa San Juan	382
Gui'ch barojp bacaa San Juan	388
Gui'ch bayon bacaa San Juan	389
Gui'ch bacaa San Judas	390
Ni balüü Jesucrist loj San Juan	392

Xtiidxza'c Jesucrist ni bacaa San Matew

Xdiaagual Jesucrist
(Lc. 3:23-38)

¹ Guie zëed laj ree bën naj xdiaagual Jesucrist, bën zëed ree loj xdiaa rey Davi në loj xdiaa Abraham.

² Abraham brii laj xdad Isaac, abi' Isaac gojc xdad Jacob, guiáad Jacob gojc xdad Judá con ree bijchaman. ³ Dxel Judá cwa'man Tamar, abi' guyu xi'n reeman brii laj reeman Fares con Zara. Fares gojc xdad Esrom, Esrom gojc xdad Aram. ⁴ Aram gojc xdad Aminadab, Aminadab gojc xdad Naasón, Naasón gojc xdad Salmón. ⁵ Salmón gojc xdad Booz, guiáad xniaa Booz brii laj Rahab. Booz cwa'man Rut, abi' xi'n reeman brii laj Obed. Obed gojc xdad Isaí, ⁶ Isaí gojc xdad rey Davi. Dxel rey Davi con bën goc lacheel Urías guyu xi'n reeman brii lajman Salomón.

⁷ Dxel Salomón gojc xdad Roboam, Roboam gojc xdad Abías, Abías gojc xdad Asa. ⁸ Asa gojc xdad Josafat, Josafat gojc xdad Joram, Joram gojc xdad Uzías. ⁹ Uzías gojc xdad Jotam, Jotam gojc xdad Acáz, Acáz gojc xdad Ezequías. ¹⁰ Ezequías gojc xdad Mainán, Mainán gojc xdad Amón, Amón gojc xdad Josías. ¹¹ Dxel Josías gojc xdad Jeconías con ree bijchaman, tiamp ni guzu ree bën Israel Babilonia zi'c bën yu' ladxguuib.

¹² Chi ma barii reeman Babilonia lod guzu reeman zi'c bën yu' ladxguuib, gojl Salatiel, xdadaman gojc Jeconías. Dxel Salatiel gojc xdad Zorobabel. ¹³ Zorobabel gojc xdad Abiud, Abiud gojc xdad Eliaquim. Eliaquim gojc xdad Azor, ¹⁴ Azor gojc xdad Sadoc, Sadoc gojc xdad Aquim. Aquim gojc xdad Eliud, ¹⁵ Eliud gojc xdad Eleazar. Eleazar gojc xdad Matán, Matán gojc xdad Jacob. ¹⁶ Jacob gojc xdad Xiëb lacheel Li. Dxel Li gojc xniaa Jesús, bën la gajc Cristo.

¹⁷ Zian gojc, diizd xtiamp Abraham xt xtiamp rey Davi, guyu chidaj generacion, dxel chidaj generacion guyu diizd xtiamp rey Davi xt tiamp ni guzu ree bën Israel Babilonia zi'c bën yu' ladxguuib, abi' zachidaj generacion guyu diizd tiamp ni barii ree bën Israel Babilonia xt chi bidxin dxej gojl Jesucrist loj guidxliuj.

Gojl Jesucrist
(Lc. 2:1-7)

¹⁸ Ze gojc gojl Jesucrist: Li, xniaaman, ma naj tia' Xiëb laaman. Per chi gad reeman tia' lasa', guyu xi'n Li por xSprijt Dios. ¹⁹ Abi' Xiëb guial najman benza'c, ad guyëntaman nusa'nxtuman Li. Beenman xgab niro'nldaxaman laaman ralanzi. ²⁰ Per la'tgaj cayünman xgab zian, balüüloj tijb xianjl Dios lojman loj baaal, rëb anjl guin lojman:

—Xiëb, xdiaa Davi, ad bal rdxebil tia'l Li, din xindo nüüm por xSprijt Dios zëëdix. ²¹ Tijb xindoniguiaaw gac xi'n Li, yagu'l lajx “Jesús”, din por laax gra ree xbejnx gac perdon xtol.

²² Gra ree ni guie gojc persi guzobj xtiidx Dios zi'c gunee bën badëe xtiidxaman loj ree bejn, chi rëbaman:

²³ Tijb biinxdüb chu' xi'n,
abi' chi galix grii lajx Emanuel,
rën guiëban: Dios za'në dunuj ree.

²⁴ Chi baban Xiëb, dxel beenman zi'c gunabee xianjl Dios laaman, cwa'man Li, ²⁵per ad bagaalt Xiëb laaman xt chi bidxin dxej gojl xi'nman. Dxel bagu' Xiëb laj xindobëz guin JESÚS.

2

Bignaj ree bén rajc Jesús

¹ Jesús gojlaman Belén tijb guiedx naaz Judea, tiamp gunabee rey Herodes. Dxel bidxin ree bén rajc, Jerusalén, laa reeman naj magos, za reeman niz oriente. ² Abi' gunabdiidx reeman, rëb reeman:

—¿Con xrey ree bén Israel, bén ma gojl? Din dunujn diizd duladxan baguiaan xbajlaman xanyabaa, zeel zio'pan din yazuxiban lojman.

³ Chi biguien rey Herodes zian, dád gyunawëëgaman, nëgajc gra ree bén Jerusalén gyunawëëg. ⁴ Zeel gurejdx Herodes gra ree bixhioz rniabee ree bixhioz, në ree mextr rajc ley, persi gunabdiidxaman loj reeman banguin naj gal Cristo. ⁵ Dxel rëb reeman:

—Belén naj galaman, tijb guiedx naaz Judea, din ze bacaa bén badëë xtiidx Dios loj ree bejn:

⁶ Lüy Belén, tijb guiedx naaz Judea, majsi guiedx dobëz najl loj gra ree guiedxro' naaz Judea. Per lasajquil din luguiedx Belén guin grii tijb bén nabee guiniaj tëëman da bén Israel reen.

⁷ Dxel ralanzi gurejdx rey Herodes bén rajc guin ree, persi gunabdiidxaman goc balüüloj bajl xanyabaa guin loj reeman. ⁸ Abi' guxhaalaman laa reeman Belén, rëbaman loj reeman:

—Gol wej, gol bignabdiidxchaaw graczi xcwent xindobëz guin. Abi' chi yadxejlidi laax, laa gol bagojn gajc naj, din në naj chigzuxib lojx.

⁹ Chi gulox rëb Herodes loj reeman zian, dxel zë reeman. Abi' bajl xanyabaa baguiaa reeman diizd ladx reeman, nedan loj reeman, xt lod yu' xindobëz guin guzudxen. ¹⁰ Chi baguiaa reeman bajl guin, dád babaa reeman. ¹¹ Abi' chi guyu reeman lënü guin, baguiaa reeman xindo guin con xniaax Li. Abi' bazuxib reeman gojp reeman laax respejt. Dxel guxhal ro' xcaj reeman, abi' bazaladx reeman or, në yaal, nëtëë mirra par xindo guin. ¹² Chi ma guidxin dxej yaza reeman, dxel bagojn Dios laa reeman loj bacaal chitëë yayejc reeman niz lod za' Herodes, zianan zeel bayejc reeman niz lood ren.

Zë reeman Egipto

¹³ Chi ma zia ree bén rajc guin ladx reeman, dxel balüüloj tijb xianjl Dios loj Xiëb loj bacaal, rëbaman:

—Bixche, cwa' xindo guin con xniaax, gol chej niz Egipto. Ni gol guzuj xt chi ganin lëjt, din zaguuil Herodes laax din gugüjtaman laax.

¹⁴ Dxel bixche Xiëb, cwa'man xindobëz guin con xniaax, abi' guxhin guin brii reeman zë reeman niz Egipto. ¹⁵ Ni guzu reeman xt güjt rey Herodes. Zian guzobj xtiidx Dios ni gunee bén badëë xtiidxaman loj ree bejn, chi rëbaman: “Babedx da xi'nan Egipto.”

Gunabee Herodes guiët ree xindobëz

¹⁶ Chi gogbee Herodes guial basquiee ree bén rajc guin laaman, dád bidxe'chaman. Dxel gunabeeman guiët gra ree xindoniguaaw diizd ree xindo qui gojlri ree xt ree xindo ma yu' ree guia' tio'p ijz, xindo yu' ree Belén në gra ree guiedx riga' niz ni, guial yu'guijcaman ni rëb ree bén

rajc guin guial ma gojc tio'p ijz ni baguiaa reeman bajl guin. ¹⁷ Zian gojc cumplid ni bacaa Jeremías, bén badëë xtiidx Dios loj ree bejn, chi rëbaman:

¹⁸ Biguien cha' tijb bejn guiedx Ramá,

yu' guialroon në guialrbixdiaj,

Raquelan cayoon por ree xi'nman,

abi' ad rilet' chu gusquiejn laaman guial güjt ree xi'nman.

¹⁹ Per chi güt Herodes, dxel balüüloj tijb xianjl Dios loj Xiëb loj bacaa lod zojb reeman, Egipto, abi' rëbaman lojman:

²⁰ —Bixche, cwa' xindobëz guin con xniaax. Gol baguij niz Israel, din ma güjt ree bén guyën nugüjt laax.

²¹ Dxel bixche Xiëb cwa'man xindobëz guin con xniaax, bayejc reeman niz Israel. ²² Per chi gogbee Xiëb guial Arquelao, xi'n Herodes, naj bén canabee niz Judea, bidxebaman naguij reeman niz ni. Dxel bagojn Dios laaman loj bacaa din che reeman niz Galilea, dxel zë reeman. ²³ Chi bidxin reeman ni, gurej reeman guiedx Nazaret. Zian gojc persi guzobj diidx ni guneë ree bén badëë xtiidx Dios loj ree bejn, guial grii laj Jesús bén Nazaret.

3

Diidx guneë Waj bén baroobnijs bejn ree

(Mr. 1:1-8; Lc. 3:1-9, 15-17; Jn. 1:19-28)

¹ Lën ree dxej ni bidxin Waj, bén baroobnijs bejn ree, loj yujbidx niz Judea catie'chaman xtiidx Dios. ² Rëbaman:

—Gol bayüjn xgab por xtolidi din ma zidyob xguialrniabee Dios.

³ Xcwent Waj guinan bacaa Isaías, bén badëë xtiidx Dios loj ree bejn, chi rëbaman:

Rguien cha' tijb bén rbidxa' niz loj yujbidx, rëbaman:

“Gol beenchaaw xnejz dux Dad ree Dios,

gol guxhal tijb nejz nali.”

⁴ Con guidxlad camell gojcnë xab Waj, abi' lënman bixii tijb guid. Gudaw tëëman bi'tsu con dxijn yu' dajn. ⁵ Dxel bén Jerusalén ree në los demazri ree bén Judea nëtëë gra ree bén zojb gadëd ro' guiiw Jordán, brii reeman bicaagdiajg reeman ni rnieë Waj. ⁶ Dxel guxhoobdol reeman, abi' baroobnijs Waj laa reeman loj guiiw Jordán guin.

⁷ Per chi baguiaa Waj zien ree bénfarisew në ree bénsaducew bidxin din tiobnijs reeman, rëbaman loj reeman:

—¡Xi'n xindxab! ¿Chu bagojn lëjt din laadi loj castiro' ni zëëd? ⁸ Gol gubajn zagdxe din guiguien guial waliquidi ma bayüjndi xgab por xtolidi, ⁹ abi' ad bal rlies xvalorgajquidi, rëbidi: “Dunujn zio'p loj xdiaa Abraham”, din naj rni lëjt xt guiaj guie ree zile' yayüjn Dios xdiaa Abraham.

¹⁰ Abi' ree bén ad zinalt xnejz Dios zi'c rayal, ma zidyob dxej ni güünnë Dios laa reeman zi'c rüjnnë bejn tijb yag chi ad rtiatan, rutüügaman laan din che'can. ¹¹ Naj rni lojdi, curobnijsan lëjt con nijs zi'c tijb sen guial ma bayüjndi xgab por xtolidi. Per bén zidnal naj, laaman guroobnijs lëjt con xSprijt Dios con në bajl, din laaman mazri rajp guialrniabee guial lon, abi' ni'qui xgurëchaman ad rayalt gaxhiecan. ¹² Abi' zi'c raya trigo zian güünnëman bejn. Din bén zinal ree xnejz Dios chinëman laa reeman lod rniabeeman, guiaád ree bén ad zinalt xnejz Dios guixhiaalaman laa reeman loj bajl ni ad yu't dxej yayü'.

*Gurobnijs Jesús**(Mr. 1:9-11; Lc. 3:21-22)*

¹³ Lèn ree dxej zii guza Jesús niz Galilea wejman ro' guiiw Jordán lod za' Waj, din guroobnijs Waj guin laaman. ¹⁴ Per ad nuyëntaman nuroobnijsaman Jesús, rëbaman lojman:

—Lüj rayal guroobnijs naj, ad najt rayal guroobnijs lüj.

¹⁵ Dxel rëb Jesús lojman:

—Yo guna gac zian, din mazri zagdxe yaguieen gra zi'c rniabee Dios.

Dxel cwëjb Waj baroobnijsaman laaman. ¹⁶ Chi gulox guroobnijsaman, naabzi bariiman loj nijs guin, dxejczy bixal xanyabaa, abi' baguiaaman zidguiajt xSprijt Dios zi'c tijb palom xt guijcaman. ¹⁷ Dxel biguien cha' tijb bejn xanyabaa, rëbaman:

—Bén guie naj da Xi'n'an, bén rën da'tan bén rabaanë' tëen.

4*Gojc Jesús prueb**(Mr. 1:12-13; Lc. 4:1-13)*

¹ Dxel binë xSprijt Dios Jesús niz loj yujbidx, din güün xinxab laaman prueb.

² Ni guzuman tiuu dxej tiuu guiaal sin guialraw, dxel gulaanman. ³ Abi' bidxin xinxab beenx laaman prueb, rëbix:

—Bal wali najl xi'n Dios, gunabee yayajc guiaj guie ree guiadxtil.

⁴ Per badxi' Jesúsán rëbaman:

—Loj xtiidx Dios rëb: “Ad ganaxtizi guiadxtil guiban bejn, nëgajc gra diidx rniee Dios.”

⁵ Dxel binë xinxab guin laaman Jerusalén, abi' gulë'pix laaman guijc yadooro' zobj luguiedxzi, ⁶ abi' rëbix lojman:

—Bal wali najl xi'n Dios, gudidya' diizd guie, din loj xtiidx Dios rëb:

Dios guixhiaal ree xianjlaman din guinia reeman lüj.

Guiniaaz reeman lüj con yaa reeman chitëe ladx ni'czy tijb guiaj guia'l.

⁷ Badxi' Jesúsán, rëbaman:

—Rëb gajc loj xtiidx Dios: “Ad güünl prueb xDadil Dios.”

⁸ Dxel binë xinxab guin laaman tijb guijc guia' ya da't, lod balüüx laaman gra ree guiedx riga' loj guidxliuj në ree guialnaza'c yu' loj reen.

⁹ Abi' rebix lojman:

—Naj gune gra ree ni guie lojl, bal guzuxibil lon guiniajchi' tëël naj.

¹⁰ Badxi' Jesúsán, rëbaman:

—Biquied, xinxab, din loj gajc xtiidx Dios rëb: “Gunajchi' xDadil Dios, tijbzi lojman been sirv.”

¹¹ Dxel biquied xinxab guin lojman, abi' bi't tio'p choon ree xianjl Dios persi been reeman laaman sirv.

*Rzuloj Jesús rtie'chaman xtiidx Dios niz Galilea**(Mr. 1:14-15; Lc. 4:14-15)*

¹² Chi gogbee Jesús guial yu' Waj ladxguuib, bayejcaman Galilea. ¹³ Per ad gurejtraman guiedx Nazaret, wejman bisobaman guiedx Capernaum, tijb guiedx riga' gajxh ro' nijs Galilea niz lod goc ree xdajn Zabulón në Neftalí. ¹⁴ Zian gojc persi gojc cumplid ni bacaa Isaiás, bén badëë xtiidx Dios loj ree bejn, chi rëbaman:

¹⁵ Bén Zabulón con ree bén Neftalí,

në ree bén zojb gajxh ro' nijsdoo, nètëë ree bén zojb xijch guiiw Jordán
con gra ree bén zojb niz Galilea,
lod zojb ree bén ad najt bén Israel,

¹⁶ gra reeman gubajn loj xcaj.

Yan ma brii tijb biani par laa reeman,

abi' biani guin guxhal xquiarguejn ree bén ad nabant xnejz loj Dios.

¹⁷ Diizd dxejzii guzuloj gutie'ch Jesús xtiidx Dios, rëbaman:

—Gol bayüjn xgab por xtolidi din ma zëed gajxh xguialrniabee Dios.

Rbejdx Jesús tajp ree bén gac xbejnman

(Mr. 1:16-20; Lc. 5:1-11)

¹⁸ La'tgaj caza Jesús gajxh ro' nijsdoo Galilea, baguiaaman Simón bén la gajc Béd con bijchaman Andrejs. Cuzaal reeman guijxh loj nijs din guiniaaz reeman bëjl. Guial laan naj xchiin reeman. ¹⁹ Dxel rëb Jesús loj reeman:

—Gol tanal naj, din gulün lëjt xhienaag güündi din guto'pidi bejn par Dios luar guiniaazidi bëjl.

²⁰ Loj hor guin gajc basa'n xguijxh reeman abi' zinal reeman laaman.

²¹ Guzaman zatibda'n dxel baguiaaman zatio'p ree bejn, Jacob con bijchaman Waj, xi'ngaan ree Zebedeo. Yu' reeman loj tijb barcw con xdad reeman cayüjnchaaw xguijxh reeman. Dxel gurejdx Jesús laa reeman, ²² abi' basa'n reeman barcw guin con xdad reeman, dxel laa zinal gajc reeman laaman.

Rülüü Jesús zien ree bejn

(Lc. 6:17-19)

²³ Wej Jesús guidibczi niz Galilea, abi' tijbgaj ree guiedx wejman lën ree yadoo persi balüüman bejn ree. Balüüman laa reeman xtiidx Dios, rëbaman loj reeman xhienaag naj xguialrniabee Dios, abi' bayüjnman bén rdoob ree në gra ree bén rajc xhietëz guialguijdxan. ²⁴ Guidibczi niz Siria bire'ch xtiidx Jesús, abi' bidnë reeman bén cusagdiaj ree gadxagayaa ni mal në graløj ree guialguijdx, bén yu' ree xindxah luxdoo, në ree bén rëjtja', nètëë ree bén ad rilet' suli, abi' bayüjn Jesús laa reeman. ²⁵ Dád zien ree bejn binal laaman, bén Galilea ree, bén zëed ree Decápolis, bén Jerusalén ree, bén zëed ree niz Judea në ree bén zëed stiblad ro' guiiw Jordán.

5

Ni balüü Jesús tijb guijc guia'

¹ Chi baguiaa Jesús bén guixiuj ree, wë'paman tijb guijc guia' abi' gurejman, dxel gubig ree xbejnman lojman. ² Abi' guzuløj culüüman laa reeman, rëbaman:

Xiquilbaa ree bejn

(Lc. 6:20-23)

³—Xiquilbaa ree bén ragbee guial ryaadx gagnë Dios laa reeman, din por zian yayal reeman lod rniabeeman.

⁴ Xiquilbaa ree bén yu'naya, din Dios yagu' luxdoo reeman zagdxe.

⁵ Xiquilbaa ree bén naj bén chaawladx, din laa reeman tia' guidxliuj ni rëb Dios gudëedaman loj reeman.

⁶ 'Xiquilbaa ree bèn rzajc zi'c chi rliaan bejn o chi re'caman nijs zian rën da't reeman güün reeman zi'c rniabee Dios, din Dios gagnë laa reeman din güün reeman zi'c ruladxaman.

⁷ 'Xiquilbaa ree bèn raya lasa', din zian yaya Dios laa reeman.

⁸ 'Xiquilbaa ree bèn naya loj Dios, din laa reeman guguaa laaman.

⁹ 'Xiquilbaa ree bèn rüjn naguiejn cwedxenë lasa', din laa reeman grii laj xi'n Dios.

¹⁰ 'Xiquilbaa ree bèn cadëd loj guialzi por graloj ni rujnnë bejn laa reeman guial cayüjn reeman zi'c rniabee Dios, din laa reeman yayal lod rniabeeman.

¹¹ 'Xiquilbaadi, chi rüjnnë reeman lëjt xhiernarajc në chi rnieeguijdx reeman lëjt nëtëë chi rudxiib reeman guijquidi graczi, guial najdi da bejnan. ¹² Gol badxe' luxdoodi nix, gol babaa tëë din narooob naj ni gunee Dios lojdi xanyabaa. Abi' lëjt ragbee guial ziangajc basagzi reeman bën badëë ree xtiidx Dios loj ree bejn gocli chi gadidi gui't loj guidxliuj.

Lëjt naj zi'c zëd në zi'c bajl

(Mr. 9:50; Lc. 14:34-35)

¹³ 'Lëjt naj zi'c zëd loj guidxliuj guie. Per bal id naxijran, ¿xhieza naag yayajcan naxij zatijb? Achetri dxiin güünan, gaz guire'chan abi' chë'p ree bejn guijcan.

¹⁴ 'Lëjt naj zi'c tijb biani loj guidxliuj guie, naj tëëdi zi'c tijb guiedx ni riga' tijb guijc guia' abi' ad zajct guiguie'chan. ¹⁵ Ad ritiaguuj tëët tijb guij par guida'cwan lën tijb yagalm, rtiaguujn persi rzojban ya din gusnin loj gra ree bèn yu' lënu. ¹⁶ Ziangajc lëjt, gol gojc zi'c biani loj ree bejn, din chi guguaa reeman ni zagdxë cayüjndi guza't reeman xDadidi Dios zagdxë bèn yu' xanyabaa.

Rulüü Jesús xcwent ley

¹⁷ 'Ad naladxidi zialan par günan ley tiblax, ley ni badëë Dios loj Moisejs o ni balüü ree bën badëë xtiidx Dios loj ree bejn, zialan par günanan cumplid. ¹⁸ Din naj rni lojdi, la'tgaj yu' xanyabaa në guidxliuj, ad ziquiedt tijb punt o tijb lejtr loj ley xt chi gac gra ni naj gac. ¹⁹ Zianan zeel bën ad ruzoobt tijb mandamient ni zëëd loj ley guin majsi nidobëz naj mandamient guin, bal rulüü tëëman bejn ree güün reeman zian, laaman lasajc ta'nzi lod rniabee Dios. Per bën ruzoob gra ree mandamient ni zëëd loj ley guin, rulüü tëëman bejn ree guzoob reeman laan, laaman naj mazri bën lasajc lod rniabee Dios. ²⁰ Zeel naj rni lojdi, bal id zabajndi mazri zagdxë guial loj ree mextr rajc ley në ree bënfarisew, ad zayaltidi lod rniabee Dios.

Rulüü Jesús xcwent guialrdxe'ch lasa'

(Lc. 12:57-59)

²¹ 'Lëjt ragbee guial rëb Dios loj ree xbéngulaxidi: "Ad gugüjtil bejn, din bën gugüjt bejn yayalaman casti." ²² Per naj rni lojdi, chutëëz bën rdxe'chnë lasa', yayalaman casti, në bën rniee diidxguijdx lasa' xt loj guxtis zajc cheman, guiáad bën rëb loj lasa' achet sirv lüj, laaman yayal loj bajl yu' gabijl.

²³ 'Zeel bal zinël gon lën yadoo abi' yagaj rusaaladxil guial yu' bën rdxe'chil, ²⁴ basa'nsii xgonl yagaj, yalojxgaj babenë bën rdxe'chil zagdxë, dxel ma zile' yayejquül din gusa'n xgonl.

25 'Bal chu bën rudëed lüj loj guxtis, baya'nnëman diidx zagdxë la'tgaj yu' tiamp, chitëë yayüman lüj loj guxtis, abi' guxtis guin nabee chu'l ladxguuib. 26 Naj rni lüj, ad zariitil ladxguuib guin xtczi quixil gra ni na guxtis guin.

Rulüü Jesús xcwent guialrznë lacheel ben ren

27 'Lëjt ragbee guial loj ley rëb: "Ad sunël lacheel ben ren." 28 Per naj rni lëjt, chutëëz bën rüjn xgabmal chi ruguiaaman tijb béngunaa, con laan ma beenman dol lën luxdooman por béngunaa guin.

29 'Bal laagajc guiaaloj ladbeel rüjn din güünl dol, mazri zagdxë naj gulëën bazaalan zijt. Din mazri zagdxë naj nit tiblax guiaalojl luar che guidibil gabijl. 30 Abi' bal laagajc yaa ladbeel rüjn din güünl dol, gutü'n bazaalan zijt. Din mazri zagdxë naj nit tiblax yaal luar che guidibil gabijl.

Rulüü Jesús xcwent guial rala' lasa' bejn

(Mt. 19:9; Mr. 10:11-12; Lc. 16:18)

31 'Ma bacaagdiajg tëedi: "Chutëëz bën rala' lacheel, rayal gudëédaman gui'ch lojman guial ma bala' lasa' reeman." 32 Per naj rni lëjt: Xinguaaaw rala' xbéngunaa, abi' ad za'nët béngunaa guin xin ren, laagajc laax cayüjn din sunë xbéngunaax xin ren. Abi' xin tia' béngunaa guin dolan cayüjnx.

Ad rayalt guza't xlia' bejn Dios

33 'Rëb tëë Dios loj ree xbéngulalidi: "Ad guza't xlia'di Dios, rayal güündi cumplid ni rëbidi gudëédidi lojman." 34 Per naj rni lojdi: Ad rayaltczi guza'tidi Dios, ni'qui xanyabaa par chililadx reeman lëjt din ni zojb Dios, 35 ni'qui guidxliuj din loj guidxliuj naj lod ruzuj guia'man, ni'qui Jerusalén din laan naj ladx rey mazri rniabee. 36 Ad guza't tëë guijquidi par chililadx reeman lëjt, din ni'qui tijb guidxguijquidi ad zajct güündi ni ya's o ni naquich ya. 37 Zagdxeli con gol güjdx "an" o "a'n", din los demazri ree ni guinieedi loj xindxab zan.

Ad yadxi'di ni mal por ni mal

(Lc. 6:29-30)

38 'Lëjt ragbee guial loj ley rëb: "Bën cwëë guiaalojl, gulëë gajc guiaalojman. Guiáad bën cwëë layil, gulëë gajc layaman." 39 Per naj rni lëjt: Ad yadxi'di ni mal por ni mal, bal chu chëëz xhajn ladbeedi, gol badëë stibladan chëëzaman. 40 Bal chu bën tilë lüj din cwëëxuuman xmanguil, badëë në xchamarril tia'man. 41 Abi' bal rüjn reeman lüj naguiejn güül tijb yuu din sanëlan tib kilometro, guzanën tio'p kilometro. 42 Chutëëz bën rniab xhienin lojl, badëëdan, bal chu tëë rgui'n xhienin lojl ad bal cwexuul gudëëdilan.

Guyën bën rdxe'ch lüj

(Lc. 6:27-28, 32-36)

43 'Ragbee tëedi rëb ree bejn: "Guyën bën rën lüj, bidxe'ch tëë bën rdxe'ch lüj." 44 Per naj rni lojdi: Gol guyën bën rdxe'ch lëjt, gol gurejdx tëë Dios por ree bën rzunal lëjt, din güün reeman lëjt ni mal. 45 Din zian gaquidi xi'n xDadidi Dios bën yu' xanyabaa, din laaman ruslejn xgubijdxaman par ree benza'c në par ree benmal, rusal tëëman guia par ree bën naban zic'c rayal në par ree bën ad nabant zic'c rayal. 46 Din bal rëndi ganaxzi bën rën lëjt, ¿xhieza tia'di loj Dios zian? Din xt bëndol ree rüjn zian. 47 Abi' bal ganaxzi bën rëndi rugajpdiozidi, ¿xhieza ni zagdxë

cayüjndi? Din xt bén ad nünbeet ree Dios rüjn zian. ⁴⁸ Zeel gol gojc benza'c, zi'c naj xDadidi Dios bén yu' xanyabaa.

6

Xhienaag gagnë lasa' bejn

¹ Ad güündi ni zagdxe niz loj ree bejn naabzi par yadxaløj reeman lëjt. Din bal güündi zian, xDadidi Dios bén yu' xanyabaa achet gunee man lojdi. ² Zeel chi güünl yudar bén ryaadx xhienin, ad gutie'chil diidx par gagbee bejn xhie cayüjnl zi'c rüjn ree bén rusquiee, lën ree yadoo në ree lunejz, din guilies bejn xvalor reeman naj reeman benza'c. Per diidxliczi rnin lojdi, laazan naj ni rayal reeman. ³ Zeel chi güünl yudar bén ryaadx xhienin, ni'czi loj xmiwda'til ad gül diidx ni cayüjnl. ⁴ Mazri zagdxe lüjzi gagbee ni cayüjnl, abi' xDadil Dios laaman cuguiaa ni cayüjn lüjzi, laaman gunee ni rayalil.

Xcwent xhienaag cwedx guiniab bejn Dios

(Lc. 11:2-4)

⁵ Chi cwedx guiniabidi Dios, ad güündi zi'c rüjn ree bén rusquiee, bén ruladx ree rzuli par cwedx guiniab reeman Dios lën ree yadoo në ree xquin nejz, din yadxaløj bejn laa reeman. Din naj rni lojdi, laazan naj ni rayal reeman. ⁶ Per lüj chi cwedx guiniabil Dios, bayu lënü lidxil, basiaaw ro' port, dxel gurejdx gunab Dios bén za'në lüj. Abi' laaman cuguiaa ni cayüjn lüjzi, laaman gunee ni rayalil.

⁷ Chi rbejdx rniabidi Dios, ad radxi'di diidx guin guië'tzi guië't naabzi par gacxhie jxtiidxidi, zi'c rüjn ree bén ad nünbeet Dios. Din laa reeman naladx guial zien ni rniee reeman mazri guidxga' Dios laa reeman. ⁸ Ad güündi zi'c rüjn reeman, din xDadidi Dios ma ragbeeman xhie ryaadxidi chi gadidi guiniab laan. ⁹ Zeel chi cwedx guiniabidi Dios, gol güjdx:

Dad, lüj yu' xanyabaa,
rayal yaya'p da'tan lajl respejt.

¹⁰ Gac zi'c rniabeel.

Gac zi'c rën l loj guidxliuj zi'c rajc xanyabaa.

¹¹ Bane ni yadaawan guixie guixie.

¹² Been dunujn perdon gra ree ni mal ma baguieenan zi'c raguieenan perdon bén rüjn ree dunujn ni mal.

¹³ Ad guslaal dunujn yaguieenan dol,
babëe dunujn loj gra ni mal.

¹⁴ Din bal güündi perdon bén rüjn lëjt ni mal, ziangajc xDadidi Dios bén yu' xanyabaa züjn gajcaman perdon xtolidi. ¹⁵ Per bal id züjndi perdon bén rüjn ree lëjt ni mal, ziangajc xDadidi Dios ad züjntaman lëjt perdon.

Xcwent guialrba'n

¹⁶ Chi rba'ndi ad güün lojdi naya, zi'c rüjn ree bén rusquiee din guguiaa bejn guial naba'n reeman. Naj rni lojdi, guial laazan naj ni rayal reeman. ¹⁷ Per lüj, chi rba'nl, gudiib lojl gudüjn tée guijquil ¹⁸ chitëe gagbee ree bejn guial naba'nl. Tijbzi xDadil Dios bén za'në lüj naj bén gagbee laan, abi' laaman gunee lüj ni rayal tia'l.

Guialnaza'c yu' xanyabaa

(Lc. 12:33-34)

¹⁹ Ad guto'pidi guialnaza'c loj guidxliuj guie lod zajc tiabe reen o xhin reen o chu' xingubaan cwan laa reen. ²⁰ Zagdxeli gol been naguiejn gol

been gan guialnaza'c yu' xanyabaa lod ad zacabet reen, lod ad zaxint reen, lod ad zu tēet xingubaan cwan laa reen. ²¹ Lod gapil guialnaza'c guin yagaj su luxdool.

Guiaaloy bejn naj zi'c biani

(Lc. 11:34-36)

²² 'Guiaaloy bejn naj zi'c tijb biani par xcuerpaman. Zeel bal cayüjnl ni zagdxe, guidib xcuerpil rajp biani. ²³ Per bal cayüjnl ni mal, guidib xcuerpil naj zi'c lod nacay, zi'c naj lod nacaybuu.

Dios ya o milia

(Lc. 16:13)

²⁴ 'Ad zile't chu güün sirv loj tio'p patron, din zadxe'chaman tijbaman abi' guiënman stijbaman, o gacaman benza'c con tijbaman abi' ad zëntaman stijbaman. Zeel ad zile't güündi sirv loj Dios në loj milia.

Achetdzi rayal chu' bejn xgab

(Lc. 12:22-31)

²⁵ 'Naj rni lējt: Ad chu'di xgab por ni gawidi në por ni gui'edi din guibandi, ni'qui por lajd ni gacwidi. Guialnaban mazri lasajc guial loj guialraw, abi' xcuerp bejn mazri lasajc guial loj xabaman. ²⁶ Gol baguiaa ree be rzuj xanyabaa, ad rxübint reeb, ad rato'p tēet reeb guialnaza'c, ad naj tēet lod cu'chaaw reeb guialnaza'c guin. Per xDadidi Dios bēn yu' xanyabaa rudēed ni raw reeb. Abi' mazri lasajquidi guial loj reeb. ²⁷ Abi' tēē, ζwen guial ru da'tidi xgab ma güün lējt mazri ziool ya?

²⁸ 'ζChexquiza zeel dād rudi xgab por xabidi? Gol baguiaa xhienaag rni's ree guiaa dajn. Achet dxiin rüjn reen ad rguib tēet reen, ²⁹ per ni'qui rey Salomón ad guzujchaawt zi'c za'chaaw ree guiaa majsi mast guzujchaawaman. ³⁰ Abi' bal gui'xh dajn ruzujchaaw Dios yan, majsi guixiezi che'can. Diidxgui lējt bēn ad rliiladxza'ct ree laaman, nid zuneeman ni gacwidi ya. ³¹ Zeel ad rudi xgab xhie gawidi, o xhie gui'edi, o xhie gacwidi. ³² Din bēn ad nünbeet ree Dios rüjn zian, laa reeman ru xgab por gra ree ni guin. Per lējt yu' xDadidi xanyabaa, abi' laaman ragbeechaaw xhienin ryaadxidi. ³³ Per yalojxgaj gol baguüil güündi zi'c rniabee Dios, gol been tēē zi'c rēnman, dxel laaman gunee gra ree ni ryaadxidi. ³⁴ Ad chu'di xgab por ni gac guixie, gol basa'nan par guixie, zagdxeli gol guyu xgab tib dxejgaj.

7

Xcwent guialrula'ch

(Lc. 6:37-38, 41-42)

¹ 'Ad gula'chidi bejn chitēē saquidi zian. ² Din bal rula'chidi bejn ziangajc saquidi, zi'c rüjnnēdi bejn ziangajc güünnē reeman lējt. ³ Ad gula'chidi bēn ren por falt dobēz ni rajpaman, zagdxeli gol guyu xgab por falt narooob ni rajpidi. ⁴ Abi' bal mazri falt narooob rajpidi, ζxoza guiēbidi loj stijb bejn: "Ad laat naj ni rüjnl"? ⁵ ¡Bēn rusquiee! Yalojxgaj gol been zi'c rayal, chi ma rüjndi zian dxel ma zile' guiēbidi loj stijb bejn: "Ad laat naj ni rüjnl."

⁶ 'Ad güündi naguiejn güüncwent ree bēn ad rēnt güüncwent xtiidx Dios, chitēē xhie güünnē reeman lējt. Din bal güündi zian, laan naj zi'c chi ruzaal bejn tijb ni nagle' loj bē'cw, o chi ruzaal bejn tijb ni lasajc loj cüch abi' chē'pzib guijcan.

*Ni guiniabidi zaca'dan**(Lc. 11:9-13; 6:31)*

⁷ 'Naj rni lëjt: Gol gunab loj Dios, abi' laaman gunee ni rni-abidi. Gol baguillaman, zadxejlidi laaman. Gol gurejdx gunabaman, züjncwentaman lëjt. ⁸ Din bén rniab, zaca'man. Abi' bén rguuil, zadxejlam, guiáad bén rbejdx rniab laaman, züjncwentaman laaman.

⁹ 'Lëjt najdi dad, ¿wen zudëedi tijb guiaj loj xi'ndi ya chi guiniabix guiadxtil?, ¹⁰ ¿o zudëedi tijb bëel ya chi guiniabix bëjl? ¹¹ Nacli lëjt najdi béndol rajc rudëedi ni rën xi'ndi. ¡Diidxgui xDadidi bén yu' xanyabaa, nid zudëedaman ni zagdx loj ree bén rniab laan ya!

¹² 'Gol beennë ree bejn zi'c rëndi güünnë reeman lëjt. Din zian rniabee xley Dios në ni bacaa ree bén badëë xtiidxaman loj ree bejn.

*Port nadëë**(Lc. 13:24)*

¹³ 'Gol been naguiejn din chu'di niz ro' port nadëë. Din port gulajg në nejz gulajg, laa reen naj ni zinë bejn loj nejz mal, abi' zien bejn zë loj nejz guin. ¹⁴ Per port nadëë guin në nejz nadëë guin laa reen naj ni rnë bejn lod yu' guialnaban tiblyaaa, abi' ta'nzi ree bejn zë loj nejz guin.

*Por ni rüjndi zayünbee ree bejn lëjt**(Lc. 6:43-44)*

¹⁵ 'Gol gojp cudad con ree bén rusquiee rëb rudëed reeman xtiidx Dios. Din rulüü dád bén chaawladx reen, per rüjnzi reeman par gusquiee reeman bejn. ¹⁶ Per zayünbeedi laa reeman por ni rüjn reeman, din ad rtiat uv loj yaquiëjch ad rtia tëët higo loj gui'xh guiëjch. ¹⁷ Zeel gra yag zagdx rtia ni zagdx lojn. Guiáad gra yag guiidx rtia ni guiidx lojn. ¹⁸ Ad rtiat ni guiidx loj yag zagdx, ad rtia tëët ni zagdx loj yag guiidx. ¹⁹ Gra yag ad rtiat ni zagdx, rirugan dxel re'can. ²⁰ Ziangajc lëjt zayünbeedi laa reeman por ni rüjn reeman.

*Ad grat bejn chu' lod rniabee Dios**(Lc. 13:25-27)*

²¹ 'Ad grat ree bén na lon: "Dad, Dad," chu' lod rniabee Dios, ganaxzi ree bén rüjn zi'c rën da Dadan, bén yu' xanyabaa. ²² Dxejzii, zien ree bén na lon: "Dad, Dad, por lüj batie'chan xtiidxil, abi' guial baza'tan lajl balëën xindxab ree luxdoo ree bejn, baguieen tëën zien ree milagr guial baza'tan lajl." ²³ Dxel guiën loj reeman: "Ad benbeetczan lëjt, gol gubi'ca lon béndol."

*Tio'p loj cimiant**(Lc. 6:47-49; Mr. 1:22)*

²⁴ 'Chutëëz bén rucaagdiajg da diidxan abi' rüjnman ni rën, laaman naj zi'c tijb Bén nasin gules xcimiant lidx loj guiaj. ²⁵ Abi' gol guia, dxel biguiajt nijs ro' gubi' tëë bidoxh, gulaj reen lad yu guin, per ad gulenxantan guial naj xcimiantan loj guiaj. ²⁶ Per Bén rigueijn da diidxan abi' ad rüjntaman ni rën, laaman naj zi'c tijb Bén ad nasint bazoob lidx loj üx. ²⁷ Abi' chi gol guia biguiajt nijs narooob, gubi' tëë bidoxh. Abi' gulaj reen lad yu guin zianz gulenxanan, ni'qui tibda'nän ad baya'nt.

²⁸ Chi gulox guneenë Jesús Bén guin ree, graczi reeman badxa da't loj zi'c balüüman laa reeman, ²⁹ guial rulüüman laa reeman zi'c Bén rajp guialrniabee, ad zi'c rulüüt ree mextr rajc ley.

8

Rayüjn Jesús tijb bén rajc gualguijdx la lepra

(Mr. 1:40-45; Lc. 5:12-16)

¹ Chi baza Jesús ruguia' guin, dád zien bejn nal laaman. ² Dxel gubig tijb bejn lojman rajcaman gualguijdx la lepra, abi' bazuxibaman lojman, rëbaman:

—Dad, bal tiëbil, zile' yayüjnl naj.

³ Dxel basli yaa Jesús baqui'man laaman, rëbaman:

—Rënan. Bayajc.

Chi rëb Jesús zian, loj hor ziigajc biquied gualguijdx guin abi' baya-man. ⁴ Dxel rëb Jesús lojman:

—Bacaagdiajg ni ganin lüj. Achu loj guiëbil guial ma bayajquil. Lojzi bixhioz wej din guguaaman lüj, binë gon ni rayal chinël zi'c gunabee Moisejs, din gagbee gra ree bejn guial ma bayajquil.

Bayajc xmojs tijb bén suldad rniabee ree suldad

(Lc. 7:1-10)

⁵ Chi guyu Jesús luguijdx Capernaum, tijb suldad Rom rniabee ree suldad bibig lojman, guzajcaman laaman liaadx, ⁶ rëbaman:

—Dad, laa da mojsan naga' lidxan ragxuux. Ad rile't chixchex, dád cusagzi gualguijdx guin laax.

⁷ Dxel rëb Jesús lojman:

—Gan din yayünan laax.

⁸ Badxi' bén rniabee ree suldad guinan, rëbaman:

—Dad, ad rayaltan chu'l lidxan, per guneë diizd guie din yayajc da mojsan. ⁹ Din zi'c naj yu' ree bén rniabee naj, ziangajc naj yu' ree da suldadan xin rniabeen. Chi rën loj tijb reex: “Wej”, rejx, chi rën loj stijbix: “Guda,” ri'tix. Abi' chi rë loj da mojsan: “Been ni guin”, rüjnxan.

¹⁰ Chi biguiejn Jesús zian, dád badxalojman abi' rëbaman loj ree bén zinal laaman:

—Naj rni lojdi, ni'qui Israel ad wadxaaglojtan tijb bén rililadx Dios zi'c rililadx bén guin Dios. ¹¹ Naj rni lëjt, dád zien ree bén gralad yayal gawnë Abraham, në Isaac, në Jacob lod rniabee Dios. ¹² Guiáad ree bén rayal niu lod rniabee Dios, laa reeman yayal lod nacay da't lod goon reeman lod gaw tëë lay reeman.

¹³ Dxel rëb Jesús loj suldad rniabee guin:

—Baguijdx lidxil, gac tëë zi'c ma bililadxil.

Abi' loj hor guin gajc bayajc xmojs Bén guin.

Rayüjn Jesús xnasuegr Bëd

(Mr. 1:29-31; Lc. 4:38-39)

¹⁴ Chi we Jesús lidx Bëd, baguiaaman xnasuegr Bëd naga'man yu'man xliaa. ¹⁵ Dxel gunaazaman yaaman, abi' bariiman xliaa guin, dxel bixcheman guzuloj cyaanman laa reeman.

Rayüjn Jesús zien ree bénragxu

(Mr. 1:32-34; Lc. 4:40-41)

¹⁶ Chi ma caxhin, binë ree bejn zien ree Bén yu' xindxab luxdoo loj Jesús. Abi' con tijb diidx ni guneeman babëëman xindxab guin luxdoo reeman, bayüjn tëëman gra ree Bénragxu. ¹⁷ Zian gojc persi gojc cumplid ni rëb Isaias, Bén badëë xtiidx Dios loj ree bejn, chi rëbaman: “Laaman zignë dux gualguijdx ree, laa tëëman zignë dux gualzi ree.”

*Bén rën chinal Jesús**(Lc. 9:57-62)*

¹⁸ Chi baguiaa Jesús bénguixiuj nayaw laaman, gunabeeman tédaman stiblad ro' nijs naj yagaj. ¹⁹ Dxel gubig tijb mextr rajc ley loj Jesús, rëbaman:

—Mextr, rënan guidnaalan lüj bantëez guin chel.

²⁰ Abi' rëb Jesús lojman:

—Bëz ree yu' xbilaa reeb, abi' ree biguijn yu' xguixbitia's reeb. Per Bén guxhaal Dios ni'qui lod quixh guijcaman ad yu't.

²¹ Dxel rëb stijb ree bén zinal laaman:

—Dad, baslaa naj gabenë' da dadan xt chi guiëtaman.

²² Per rëb Jesús lojman:

—Tanal naj, basa'nman con ree bén ad rënt guidnal naj, laa reeman guquie'ch laaman chi guiëtaman.

*Racwëez Jesús bidoxh**(Mr. 4:35-41; Lc. 8:22-25)*

²³ Guyu Jesús loj barcw con ree xbejnman, ²⁴ abi' la'tgaj zë reeman loj nijs guin dxejlczu gubi' tijb bidoxh, ma cazëëbczi barcw guin xan nijs. Per Jesús naga'yëjsaman. ²⁵ Dxel bicwëen ree xbejnman laaman, rëb reeman:

—¡Dad, gunaj dunujn! ¡Ma cayzëëban xan nijs!

²⁶ Badxi'man laan rëbaman:

—¿Chexc zeel dád rdxebidi? ¿Chexc zeel ad rliladxza'ctidi naj?

Dxel bixchewan abi' gunabeeman bacwëez bi guin në nijs guin. Loj hor ziigajc babedxe reen. ²⁷ Abi' ree xbejnman badxa da't loj reeman, zianz gunabdiidx loj lasa' reeman, rëb reeman:

—¿Chu bén guin, zeel xt bi në nijs ruzoob xtiidxaman?

*Tio'p ree bén yu' xindxab luxdoo**(Mr. 5:1-20; Lc. 8:26-39)*

²⁸ Chi bidxin Jesús stiblad ro' nijs guin, loj xguidxliuj ree bén Gadara, dxel tio'p ree xinguaaw yu' xindxab luxdoo brii reex lad ree baa abi' wej reex loj Jesús. Dád nadoxh reex, zeel ad rilet' chu téd lunejz guin. ²⁹ Chi baguiaa reex Jesús, gurixdiaj reex rëb reex:

—¿Xhie rënl con dunujn, Jesús, Xi'n Dios? ¿Zëëdil guie ya din gusagzil dunujn chi gadli dxej guidxin?

³⁰ Per gajxh yagaj za' zien ree cüch, cayaw reeb, ³¹ abi' guzajc ree xindxab guin liaadx loj Jesús, rëb reex:

—Bal yabëel dunujn, banee mod yadxu'n lën ree cüch guin.

³² Dxel rëb Jesús:

—Gol wej.

Dxel barii ree xindxab guin luxdoo ree bén guin bayu reex lën ree cüch guin. Abi' gra reeb guzuloj cuxüün zianz bitidia' reeb ro' tijb bala' xt loj nijs, lod gu' reeb nijs abi' güjt reeb.

³³ Abi' ree bén cayajp cüch guin ree, baxüün reeman. Dxel chi badxin reeman luguiedx guin, be reeman diidx gra ni goc në gra ni guzac ree bén yu' ree xindxab guin luxdoo. ³⁴ Dxel gra ree bén guiedx guin brii wej lod za' Jesús, abi' chi baguiaa reeman laaman, guzajc reeman laaman liaadx, din yazaman ladx reeman.

9

Bayüjn Jesús bén nëjt xcuerp
(Mr. 2:1-12; Lc. 5:17-26)

¹ Dxel bayu Jesús loj tijb barcw, badëdaman stiblad ro' nijs guin abi' badxin ladxaman. ² Yagaj binë ree bejn tijb xin nëjt xcuerp, naga'x loj da. Chi baguiaa Jesús guial rliladx reeman laaman, rëbaman loj xin ragxuu guin:

—Bagu' luxdool zagdx, xi'n. Ma benan perdon xtolil.

³ Dxel tio'p choon ree mextr rajc ley been reeman xgab: “Diosan rüjnx tiblax guial rnieex zian.” ⁴ Per guial gogbee gajc Jesús xhie xgaben cayüjn reeman, dxel rëbaman loj reeman:

—¿Chexc zeel rüjndi xgabmal? ⁵ ¿Conin mazri nawëëg gac? ¿Guial guiën ya: “Ma benan perdon xtolil” o guiën: “Bixche, guza”? ⁶ Per yan, gulün lëjt guial naj, Bén guxhaal Dios ra'pan guialrniabee loj guidxliuj guie par gūnan perdon dol ree.

Dxel rëb Jesús loj xin ragxuu guin:

—Bixche. Baca' ni go'til loj. Baguiaj lidxil.

⁷ Laa bixchegajquix zia lidxix. ⁸ Chi baguiaa ree bén guin zian, bidxeb reeman, abi' baza't reeman Dios zagdx por guialrniabee ni badëëman loj ree bejn.

Rbejdx Jesús Matew
(Mr. 2:13-17; Lc. 5:27-32)

⁹ Chi baza Jesús yagaj ziaman, baguiaaman tijb xin la Matew. Zojbix lod ruquijxix impuest, abi' rëbaman lojx:

—Tanal naj.

Dxel bisu Matew zinalix laaman.

¹⁰ Tijb dxej chi cayaw Jesús lidx Matew con zien ree bén ruquijx impuest në ree bén zëëb xtiidx ad nabant xnejz, gra reeman zojbnë Jesús xan mex con ree xbejnman. ¹¹ Chi baguiaa ree bénfarisew zian, gunabdiidx reeman loj ree xbejn Jesús rëb reeman:

—¿Chexc zeel cayawnë xmextridi bén ruquijx ree impuest në ree béndol?

¹² Chi biguiejn Jesús ni rëb reeman, dxel rëbaman:

—Bënnadaan ree ad ryaadxt reeman doctor, bénragxuu ree laa reeman ryaadx doctor. ¹³ Gol chej, gol basiid xhie rën guiëb loj xtiidx Dios lod rëb: “Ni mazri rënan naj guial yaya lasa'di luar guidnëdi gon lon.” Yan, naj ad zialtan par ree benza'c, zialan par ree béndol, din yayüjn reeman xgab por xtol reeman.

Rniabdiidx reeman loj Jesús xcwent guialrba'n
(Mr. 2:18-22; Lc. 5:33-39)

¹⁴ Dxel ree xbejn Waj, bén baroobnijs bejn ree, bibig reeman loj Jesús, zianz gunabdiidx reeman lojman, rëb reeman:

—¿Chexc zeel dunujn con ree bénfarisew dád zienvolt raba'nan, guiáad ree xbejnl ad rba'nt reeman?

¹⁵ Badxi' Jesúsán rëbaman:

—Lod yu' guialruxhliia, ¿wen runaya ree biooz ya chi za'në xin cuxhliia guin laa reeman? Per guidxin dxej chiquiedix, dxel guiba'n reeman.

¹⁶ Achut rata' lajd cüb loj lajd yojx ðin zaxü'n lajd cüb guin, abi' mazri quixya'n lajd yojx guin. ¹⁷ Ad rgu' tëët reeman vin cüb lën anfr yojx ðin

zaxya' anfr yojx guin, abi' zi'c anfr guin zi'c vin guin zaxin reen. Zeel naj guial chu' vin cüb lën anfr cüb, din ni'qui tijb reen ad zaxint.

Bayajc xi'n Jairo në béngunaa bagaal xab Jesús

(Mr. 5:21-43; Lc. 8:40-56)

¹⁸ La'tgaj canee Jesús zian, bidxin tijb bën rniabee lën xyadoo ree bën Israel, abi' bazuxibaman loj Jesús, rëbaman:

—Yangajczi güjt da xi'ndxa'pan, per bal gui'til guixhioob yaal guijquim zabanm.

¹⁹ Dxel zinë Jesús laaman con ree xbejn Jesús. ²⁰ Abi' tijb béngunaa ragxuu ma gojc chiptio'p ijz ad rbëzt ryajbaman rejn, gubigaman niz xijch Jesús abi' bagaalaman guia' xabaman, ²¹ guial gunaladxaman: “Bal gugaalaman majsi xabzaman, zayajcaman.” ²² Per badxi' loj Jesús, abi' baguiaadxijchaman béngunaa guin, dxel rëbaman lojman:

—Zagdxe bagu' luxdool, xi'n. Ma bayajquil guial bililadxil naj.

Abi' loj hor ziigajc bayajc bën guin.

²³ Chi bidxin Jesús lidx bën rniabee guin, baguiaaman ma riga' ree xinrucwejdx din chique'ch reex xi'nman, abi' ree bejn roon rbixdiaj reeman guijquim. ²⁴ Dxel rëb Jesús loj reeman:

—Gol barii guie, din ad güjtt bindo guin, naga'yëjszim.

Abi' baxijdxnë reeman laaman. ²⁵ Chi ma barii reeman, zianz guyuman. Gunaazaman yaa bindo guin dxel bixchem. ²⁶ Abi' guidib niz yagaj bire'ch diidx ni goc.

Rayüjn Jesús tio'p bénlutia'p

²⁷ Chi baza Jesús yagaj, binal tio'p bénlutia'p laaman, rbixdiaj reeman, rëb reeman:

—Jesús, xdiaa Davi, baya dunujn!

²⁸ Chi badxin Jesús lod zojbaman, dxel bibig ree bën guin lojman, abi' gunabdiidxaman loj reeman, rëbaman:

—¿Rliladxidi ya guial zile' yayünan lëjt?

Badxi' reeman laan rëb reeman:

—Raliduladxan, Dad.

²⁹ Dxel bagaal Jesús guiaaloj reeman, rëbaman:

—Gac zi'c rliladxidi.

³⁰ Abi' bayajc guiaaloj reeman, dxel rëb Jesús loj reeman:

—Ad bal chu loj guiëbidi guial bayajc guiaalojdi.

³¹ Per naabzi baza reeman yagaj, guzuloj catie'ch reeman diidx guidib niz yagaj ni been Jesús.

Rayüjn Jesús tijb bengop

³² Chi baza ree bën bayüjn Jesús guiaaloj, dxel bidxinnë ree bejn tijb bengop, yu' xindxab luxdooan. ³³ Abi' guloxzi babëë Jesús xindxab guin luxdoo bengop guin, laa guzuloj gajc caneeman. Abi' dád badxaloj ree bejn, rëb reeman:

—Ad goct waguiaa ree lasa' milagr guie niz Israel.

³⁴ Per ree bénfarisew rëb reeman:

—Bën guin rabëë xindxab luxdoo ree bejn por xguialrniabee gajc xindxab rniabee ree xindxab.

Raya Jesús bejn ree

³⁵ Wej Jesús gra ree ciuda në ree guiedx ni riga' niz yagaj, abi' beegaj lod rejman ruman lën ree yadoo persi rulüüman bejn ree xtiidx Dios, rëbaman loj reeman xhienaag rniabee Dios, rayüjn tëëman graloj guialrdoob në

graloj gualguijdx ni rajc ree bejn. ³⁶ Chi baguiaa Jesús benzien guin ree, bayaman laa reeman, gual dád naya riga' reeman, riga' reeman zi'c xiil ad rya'pt. ³⁷ Dxel rëbaman loj ree xbejnman:

—Walican zien bejn rën gucaagdiajg xtiidx Dios, per ad zient bën gulüü laa reeman yu'. ³⁸ Zeel gol gunab loj Dios din guixhiaalman mazri ree bën gulüü laa reeman.

10

Gulej Jesús chiptio'p ree apóstoles

(Mr. 3:13-19; Lc. 6:12-16)

¹ Gurejdx Jesús chiptio'p ree xbejnman, abi' badëëman gualrniabee loj reeman din yabëë reeman xinxab luxdoo ree bejn din yayüjn tëë reeman bejn ree graloj gualrdoob në graloj gualguijdx.

² Bën guie ree naj guidxiptio'p ree xi apóstoles Jesús: Simón bën gulëëljajman Bëd, con bijchaman Andrejs, në Jacob con Waj, bën naj ree xi'n Zebedeo. ³ Në Felip, Tol, Tumajs con Matew bën baquijx impuest, nëtëë Jacob xi'n Alfeo con Lebeo bën la gajc Tadeo ⁴ në Simón bën bi'ch loj ree bën Cananistas con Judas Iscariote bën yayü Jesús.

Rxhial Jesús gra ree xbejnman chigliüü reeman xtiidx Dios

(Mr. 6:7-13; Lc. 9:1-6)

⁵ Chi guxhaal Jesús guidxiptio'p ree xbejnman, rëbaman loj reeman:

—Ad chedi niz lod zojb ree bën ad najt bën Israel, ni'qui ree guiedx riga' niz Samaria, ⁶ gol chejli niz lod zojb ree bën Israel bën ad zinalt ree xnejz Dios. ⁷ Gol güjdx loj reeman gual ma zëëd gajxh xgualrniabee Dios. ⁸ Gol bayüjn bënragxuu ree, gol basban bën ma güjt ree, gol bayüjn bën rajc ree gualguijdx la lepra, gol babëë tëë xinxab luxdoo ree bejn. Zi'cgajc cwa' lagajdi gualrniabee, ziangajc yayüjndi bejn lagajzi.

⁹ Ad chinëdi or, ni'qui plajt, ni'qui cobr, ¹⁰ ni'qui guijxh. Ad bal chinë stib nejj xabidi, ni'qui stib nejj xgurëchidi, ni'qui yagriadxidi, din bën rüjn dxiin rayal gudëëd ree bejn ni gawaman.

¹¹ Chi guidxindi tijb guiedx o tijb ciuda, gol gule'c ruson chu bën naj benza'c yaya'ndi lidx, yagaj gol baya'n xt chi yazadi luguiedx guin. ¹² Abi' chi chu'di lënü guin, gol güjdx loj ree bën zojb yagaj: “Yabe'cdxe Dios luxdoodi.” ¹³ Bal rayal reeman gualnaza'c guin, zaya'nän con laa reeman guiáad bal id rayal reeman laan zayejcan con lëjt. ¹⁴ Guiáad bal yu' guiedx o yu ya lod ad raca't reeman lëjt o bal id rën reeman gucaagdiajg reeman ni guiëbidi, gol baza yagaj, gol gudxijp guxyuj guia'di zi'c tijb sen gual ad bazoobt reeman xtiidxidi. ¹⁵ Naj rni lëjt gual dxej ni yadëëd ree bejn cwent loj Dios, mazri casti narooob yayal reeman gual loj ree bën Sodoma në Gomorra.

Gualzi ni zëëd

¹⁶ Rëb tëë Jesús loj ree xbejnman:

—Gol bacaagdiajg ni rnin, naj rxhial lëjt zi'c ree xiil loj ree cuyojt. Zeel gol gojc nasin zi'c bëël, gol gojc tëë nadoo zi'c palom. ¹⁷ Gol gojp cudad din zayü ree bejn lëjt loj ree guxtis, zaguijn reeman lëjt lën ree yadoo. ¹⁸ Abi' xt chinë reeman lëjt loj ree gobernador në loj ree rey gual rliadxidi naj, zian güdi da diidxan loj reeman në loj ree bën ad zinalt xnejz Dios. ¹⁹ Per chi chinë reeman lëjt loj guxtis, ad chu'di xgab xhie guinieedi xhie tëë naag guinieedan, din chi guidxin hor guinieedi, Dios yazaladx lëjt diidx

ni guinieedi. ²⁰ Din ad lëjttan guiniee, xSprijt xDadidi Diosan guiniee por lëjt.

²¹ 'Zadxin dxej yayü ree bejn laagajc bijch reeman par guiët reeman. Guiáad ree dad yayü laagajc xi'n reeman, abi' ree bejn zadxe'ch xdad reeman në xniaa reeman abi' yayü reeman laa reeman par guiët reeman. ²² Gra bénguidxliuj guidxe'ch lëjt guial najdi da bejnan, per bën sudxi'ch loj guial rliadxaman naj xt dxej chigra guibanman, laaman yayal xanyabaa. ²³ Chi sunal reeman lëjt tijb luguiedx par güün reeman lëjt xhienin, gol chej stijb guiedx, din naj rni lojdi, ad warat xguiedx Israel chedi chi gui't Bén guxhaal Dios.

²⁴ 'Tijb bejn ad mast lasajc loj xmextraman, ni'qui tijb mojs ad mast lasajquix loj xpatronx. ²⁵ Bén cusiid rayal xhienladxaman chi ma rajcaman zi'c rajc xmextraman guiáad tijb mojs rayal xhienladxix chi ma najx zi'c xpatronx. Nacli naj rniabeen lojdi, gulëälaj ree bejn naj Beelzebú, diidxgui lëjt najdi da bejnan.

Chu rayal guidxeb bejn

(Lc. 12:2-9)

²⁶ 'Ad guidxebidi bejn ree, din achet ni ralan yu' ni ad zaguiet, ni'qui tijb ni naguie'ch ad yu't ni ad zagbeet bejn. ²⁷ Ni canin lëjt naguie'ch, gol güjdxan loj ree bejn, guiáad ni canin lëjt ralan, gol güjdxan loj gra ree bejn. ²⁸ Ad rdxebidi bën rën ree gugüjt lëjt. Din zile' gugüjt reeman xcuerpidi, per xsprijtidi ad zile't gugüjt reeman laan. Gol bidxebli Dios din laaman zile' gunijt xcuerpidi abi' guixhiaalaman xsprijtidi gabijl.

²⁹ 'Lëjt ragbee guial biguijndoo ree ad lasajct reeb wayëjx, per ni'qui tijb reeb ad zëjtt sin xpermis xDadidi Dios. ³⁰ Guiáad lëjt xt guidxguijquidi graczan nayab loj Dios. ³¹ Zeel ad rdxebidi din mazri lasajquidi guial loj zien da't ree biguijndoo.

Bén rëb loj ree bejn guial najman xbejn Jesucrist

(Lc. 12:8-9)

³² 'Bén guiëb niz loj ree bejn guial da bejnanan, ziangajc naj guië loj da Dadan Dios bën yu' xanyabaa guial da bejnanan. ³³ Per bën guiëb niz loj ree bejn guial ad da bejntanan, ziangajc guië loj da Dadan Dios bën yu' xanyabaa guial ad da bejntanan.

Por Jesús rlia' lasa' ree bejn

(Lc. 12:51-53; 14:26-27)

³⁴ Rëb tëë Jesús:

—Ad zialtan par yabecdxcen luxdoo bejn, zialan din guial chililadx reeman naj chu' wadijl. ³⁵ Din guial chililadx bejn naj, zadxe'ch xinguaaaw xdadix, guiáad biingunaa zadxe'ch xniaam, abi' biinwalidx zadxe'ch xnasuegrim. ³⁶ Abi' laagajc bën zobj ree lënüldixidi guidxe'ch lëjt.

³⁷ 'Bén rën xdad o xniaa mazczi guial lon, ad zajct gacaman da bejnan. Ziangajc bën rën xi'ngaan o xi'ndxa'p mazczi guial lon, ad zajct gacaman da bejnan. ³⁸ Bén rën guidnal naj, abi' ad rëntaman sagdiajman por naj, ad zile't gacaman da bejnan. ³⁹ Bén rniajchi' gualnaban rajpaman loj guidxliuj guie, zadxin dxej gunijtaman laan, per bën guiët por naj, zajpaman gualnaban tiblayaa con Dios.

Ni tia' ree bejn

(Mr. 9:41)

40 'Bén ridxga' lëjt, najn ridxga'man, guiáad bén ridxga' naj, bén guxhaal najn ridxga'man. 41 Bén ridxga' tijb bén rudëë xtiidx Dios loj ree bejn, guial zëédaman por Dios, zaca'man lasa' ni rayal tia' bén guin loj Dios. Ziangajc bén ridxga' tijb bén naban zi'c rën Dios, zaca'man lasa' ni rayal tia' bén guin loj Dios. 42 Abi' chutëëz bén gudëëd majsi tib xijgzi nijs naalyuj loj bejn guial najman da bejnan, naj rni lojdi guial yu' ni gudëëd Dios tia' reeman.

11

Bigneenë ree xbejn Waj Jesús

(Lc. 7:18-35)

1 Chi gulox rëb Jesús loj guidxiptio'p ree xbejnman con ree nin chiguiëen reeman, dxel bazaman yagaj ziglüüman bejn ree xtiidx Dios loj ree guiedx riga' niz yagaj.

2 Abi' Waj, la'tgaj yu'man ladxguuib, cwa'man ruson gra ree ni cayünj Jesús. Dxel guxhaal tio'p choon ree xbejnman, 3 bignabdiidx reeman lojman, rëb reeman:

—¿Lüj naj Cristo ya bén naj gui't, o yalëjzan ben ren ya?

4 Dxel rëb Jesús loj reeman:

—Gol chej gol güjdx loj Waj ni cuguiaadi në ni cucaagdiajguidi. 5 Gol güjdx lojman guial ma ruguiaa ree bénluta'p, ma rajc rza ree bencoj, ma bayajc tëë ree bén rajc guialguijdx la lepra, ma riguiëjn ree bén nacwa't guiáad ree bengüt ma baban reeman, abi' ree bénprob ma caguiejn reeman xtiidx Dios. 6 Xiquilbaa ree bén ad zucwëëzt chililadx naj.

7 Chi baza ree bén guxhaal Waj, dxel guzuloj Jesús caneeman loj ree bejn xcwent Waj, rëbaman:

—¿Chu naladxidi naj bén biquiaadi loj yujbidx? ¿Naladxidi ya najman zi'c tijb biqiu ni runiib bi? 8 ¿O xhienaag naj bén biquiaadi? ¿Najman tijb bén najcw lajd zagdxe ya? Lëjt ragbee guial bén rajcw ree lajd zagdxe lën palas zobj reeman. 9 ¿Chuzá biquiaadi? ¿Tijb bén rudëë xtiidx Dios loj ree bejn ya? Per naj rni lojdi guial biquiaadi tijb bén mazri zobjloj guial loj bén rudëëd xtiidx Dios loj ree bejn. 10 Wajn din laaman naj ben ruza't loj xtiidx Dios lod rëb:

Naj rxhial tijb bén ned lojl,
ben güünchaaw xnejzil.

11 Naj rni lëjt, loj graczi ree bénguidxliuj, ad wayut bén mazri zobjloj guial loj Waj. Per majsi zian, bén ad zobjlojt loj xguialrniabee Dios, laaman mazri zobjloj guial loj Waj.

12 'Diizd chi bi't Waj xt yan, zien bejn rünj da't naguiejn chu' lod rniabee Dios. Abi' ree bén rünj da't naguiejn laa reeman chu' lod rniabeeman. 13 Diizd ley badëë Dios loj Moisejs con loj ree bén badëë xtiidx Dios loj ree bejn, xt Waj, laa reeman gunee xcwent xguialrniabee Dios. 14 Abi' bal chililadxidi ni ganin lëjt, naj rni guial Wajn naj Elías bén badëë xtiidx Dios loj ree bejn. 15 Bén rën ree gucaagdiajg, gol bacaagdiajg.

16 '¿Xhienaag ganin lëjt naj ree bén riga' loj guidxliuj guie yan? Laa reeman naj zi'c ree xindoo rguijt niz galay luguiedx, abi' rbixdiaj reex rëb loj lasa' reex: 17 "Bacwejdخان bidxa, per ad baya'tidi, badoolan ni naya ree per ad biintidi." 18 Din bi't Waj bén baroobnijs bejn ree, ad rawtaman ad rë' tëtëetaman vin, abi' rëbidi xindxab yu' luxdooman. 19 Yan, bi't Bén guxhaal Dios, rawaman rë' tëëman vin abi' rëbidi nalaman ruladx tëëman

guië'man, ruchajg tëëman bëndol ree con ree bën ruquijx impuest. Per ree bën ma ca' xguialrniabee Dios, por laa reeman rguien guial gra ni rüjn Dios naj zagdxe.

*Bén ad bazoobt ree xtiidx Dios
(Lc. 10:13-15)*

²⁰ Dxel guzuloj Jesús cadilëman bën zojb ree guiedx lod beenman mazri zien ree milagr. Din bën guin ree ad bayüjnt reeman xgab por xtol reeman, abi' rëbaman loj reeman:

²¹ —¡Probza lëjt bën Corazín! ¡Probza lëjt bën Betsaida! Din bal luguiedx Tiro në luguiedx Sidón niajc ree milagr ni goc ladxidi, diidz gocli nayüjn reeman xgab por xtol reeman, niajcw reeman lajd ya's nuroob tëë cobdëj guijc reeman zi'c tijb sen guial ma bayüjn reeman xgab por xtol reeman. ²² Per rnin lëjt guial dxej yadëed ree bejn cwent loj Dios, mazri casti narooob yayalidi guial loj ree bën Tiro në ree bën Sidón. ²³ Guiáad lëjt bën Capernaum, ad naladxidi yayalidi xanyabaa, lëjt yayal gabijl. Din bal luguiedx Sodoma niajc ree milagr goc ladxidi, xt yan sta yu' guiedx guin. ²⁴ Per rnin lojdi guial dxej yadëed ree bejn cwent loj Dios, mazri casti narooob yayalidi guial loj ree bën Sodoma.

*Gol guda lon din yaziiladxidi
(Lc. 10:21-22)*

²⁵ Lën ree dxejzii rëb Jesús:

—Dad, ruzatan lüj zagdxe, din ni baquie'chil loj ree bën rajc në loj ree bën rignia', laan ma balüül loj ree bën ad rajct. ²⁶ Zian gojc Dad, din zian guyën.

²⁷ 'Da Dadan banee gra lon. Abi' achut nünbee Jesucrist xi'n Dios, tijbzi Dios, achu tëët nünbee Dios, tijbzi Jesucrist xi'nman, con ree bën rënman güünbee Dios. ²⁸ Gradi, bën ma badxag rüjn xhienin din yaya'ndi zagdxe loj Dios, ma badxag tëëdi nüü xtolidi. Gol guda lon, naj gune guialraziiladx lojdi. ²⁹ Gol bazoob da diidxan, gol basiid tëë gaquidi benza'c në bën chaawlaxd zi'c naj, din yabedxe luxdoodi loj Dios. ³⁰ Din ad nawëëgt guial guzoobidi da diidxan, ad nawëëg tëët guial güündi zi'c rënan.

12

*Rgui'ch ree xbejn Jesús trigo dxej raziiladx ree bën Israel
(Mr. 2:23-28; Lc. 6:1-5)*

¹ Tijb dxej raziiladx ree bejn, chi cadëd Jesús con ree xbejnman loj tijb guiniaa lod yu' trigo, dxel calaan ree xbejnman abi' guzuloj cagui'ch reeman trigo persi cayaw reeman laan. ² Abi' chi baguiaa ree bënfarisew ni cayüjn reeman, rëb reeman loj Jesús:

—Baguiaa ree xbejnl nial cayüjn reeman ni ad rayalt güün reeman dxej raziiladx ree bejn.

³ Dxel rëb Jesús loj reeman:

—¿Gadidi gool loj xtiidx Dios ya ni been Davi chi gulaanman con ree xcompniaraman? ⁴ Guyu Davi lën xyadoo Dios abi' cwa'man guiadxtil ma nagle' ree gudawaman con ree xcompniaraman, ni ad rayalt niajw reeman bixhiosi ree rayal gaw laa reen. ⁵ ¿O gadidi gool loj xley Moisejs ya guial achet dol rüjn ree bixhioz chi rüjn reeman dxin lën yadoo majsi ad raziiladxt reeman dxej raziiladx ree bejn? ⁶ Abi' naj rni lëjt guial naj, bën za'në lëjt mazri lasajcan guial loj yadoo. ⁷ Bal rignia' di xhie rën guiëb

loj xtiidx Dios lod rëb: “Ni rënan naj guial yaya lasa'di, ad guial guneetidi gon lon.” Bal rignia'di diidx guin ree ad zudxiibtidi guijc ree bën ad rajpt dol. ⁸ Abi' Bén guxhaal Dios rajpaman guialrniabee dxej raziiladx ree bejn.

Rayajc tijb bën nëjt tibladyaa

(Mr. 3:1-6; Lc. 6:6-11)

⁹ Chi gudëd gojc zian, dxel baza Jesús abi' guyuman lën tijb yadoo naj niz yagaj. ¹⁰ Lën yadoo guin za' tijb bën nëjt tibladyaa. Abi' guial ree bënfarisew raguuil reeman mod xhie gudxiib reeman guijc Jesús, dxel gunabdiidx reeman lojman, rëb reeman:

—¿Zile' yayüjn bejn tijb bënragxuu dxej raziiladx bejn ya?

¹¹ Badxi' Jesúsán rëbaman:

—Bal tijb lëjt rajp tijb xiil, abi' yabib lën bala' dxej raziiladx bejn. ¿Nid zabëedi laab dxej guin ya? ¹² ¿Wen id mazri lasajc tijb bejn guial loj tijb xiil ya? Zeel achet güünan zajc güün bejn ni naj zagdx dxej raziiladx bejn.

¹³ Dxel rëb Jesús loj bënragxuu yaa guin:

—Basli yaal.

Abi' basli yaa bën guin, loj hor ziigajc bayajc yaaman zi'c naj stibladan. ¹⁴ Per chi barii ree bënfarisew guin lën yadoo guin, guzuloj cayü reeman diidx xhienaag güün reeman din gugüjt reeman Jesús.

Bën gule Dios

¹⁵ Chi gogbee Jesús zian, laa zia gajcaman, abi' zien ree bejn binal laaman. Dxel bayüjnman gra ree bënragxuu, ¹⁶ abi' gunabeeman laa reeman chitëë guitie'ch reeman diidx chu bayüjn laa reeman. ¹⁷ Zian guzobj xtiidx Isaías, bën badëë xtiidx Dios loj ree bejn, chi rëbaman:

¹⁸ Gol baguiaa, bën guie naj bën gulen

din güünman naj sirv,

laaman naj bën rën da'tan,

rabaanë' tëën laaman.

Gudë da Sprijtan lojman

abi' guiëbaman loj ree bénguidxliuj

xhienaag naj da guialrniabeen.

¹⁹ Achut tilnëman,

ad zabixdiaj tëëtaman

achut tëët guien cha'man niz lunejz.

²⁰ Ad zudëedtaman casti bën ad za'dxi'cht ree loj da nejzan, në ree bën ad ridxga'za'ct naj,

xt chi ma beenman gan gac guialguxtis.

²¹ Abi' xt ree bën ad najt bën Israel

cwëz reeman yabëëman laa reeman loj dol.

Rëb ree bejn ca' Jesús xguialrniabee Beelzebú

(Mr. 3:19-30; Lc. 11:14-23; 12:10)

²² Binë ree bejn tijb xinguaaw lod za' Jesús, yu' xindxab luxdoox, natia'p lojx naj tëëx gop. Dxel bayüjn Jesús laax abi' guzuloj rnieex ruguiaa tëëx. ²³ Graczi ree bejn dád badxaløj reeman, abi' rëb reeman:

—¿Id bën guinan zëëd loj xdiaa Davi ya?

²⁴ Chi biguiejn ree bënfarisew zian, dxel rëb reeman:

—Bén guin rabëë xindxab luxdoo ree bejn por xgualrniabee Beelzebú xin rniabee ree xindxab.

²⁵ Per Jesús gogbee gajcaman xgab cayüjn reeman, abi' rëbaman:

—Gra nacion o ciuda bal id nadxag riga' bejn, rlia' lasa' reeman, zian-gajc tijb famil bal id nadxag riga' reeman, rlia' lasa' reeman. ²⁶ Ziangajc bal xindxab su contr laagajquix, nayob nitix. ²⁷ Lëjt na guial naj rabë xindxab luxdoo ree bejn por xgualrniabee Beelzebú, per bal zianan, ¿chuzá rudëë gualrniabee loj xbejndi din yabëë reeman xindxab? Zeel laagajc reeman rulüü guial ad laat rnieedi. ²⁸ Per naj, bal por xSprijt Dios rabën xindxab luxdoo ree bejn, rën guiëban guial ma za'në xgualrniabee Dios lëjt.

²⁹ 'Din ¿xhieza naag chu' tijb bejn lidx tijb bén gojl par cwanman ni rajpaman, bal id zaxhiixgajman laaman? Zian güünman din chile' cwanman ni rajpaman.

³⁰ Bén ad za't con naj, za'man contr naj. Guiáad bén ad ruto'pt bejn par naj, rtie'chaman laa reeman.

³¹ 'Zeel rnin lëjt: Züjn Dios perdon xhietëez dolan, në ree diidxguijdx ni rnieetzi ree bejn, per ad züjntaman perdon bén rnieeguijdx ree xSprijt Dios. ³² Chutëez bén guinieeguijdx Bén guxhaal Dios, zajcaman perdon, per bén guinieeguijdx xSprijt Dios ad zajctaman perdon yan, ni'qui chi yagualan.

Nünbee bejn tijb yag por ni rtia lojn

(Lc. 6:43-45)

³³ 'Lëjt ragbee, bal tijb bejn ruzuj tijb yag zagdxe, rtia ni zagdxe lojn, per bal guzujman tijb yag guijdx, rtia ni guijdx lojn. Din tijb gaj yag nünbee bejnan por ni rtia lojn. ³⁴ ¡Xi'n xindxab! ¿Xoza guinieedi diidx zagdxe ree awa benmal lëjt? Din ni yu' luxdoo bejn laan rnieeman. ³⁵ Benza'c rnieeman diidxza'c, din laan yu' luxdooan. Guiáad benmal rnieeman diidxmal din laan yu' luxdooan. ³⁶ Per naj rni lëjt guial dxej ni güün xgualguxtis Dios, gra ree bejn yadëed cwent lojman por gra ree diidxguijdx ni rniee reeman. ³⁷ Din por xtiidx gajc bejn guiguien bal rayalaman xcasti Dios o ad rayaltaman laan ya.

Rniab ree bénfarisew tijb milagr

(Mr. 8:12; Lc. 11:29-32)

³⁸ Yu' ree bénfarisew con ree mextr ni rajc ley, rëb loj Jesús:

—Mextr, rayënan yaguaan güünl tijb milagr.

³⁹ Badxi' Jesúsán rëbaman:

—Lëjt benmal, bén ad rüjnt ni rën Dios abi' rëndi günan tijb milagr. Per achetri guguaadi, tijbzi zi'c guzac Jonás bén badëë xtiidx Dios loj ree bejn. ⁴⁰ Din zi'c guyu Jonás lën bëjl narooob choon dxej choon guiaal, ziangajc Bén guxhaal Dios, choon dxej choon guiaal chu'man lën baa. ⁴¹ Abi' chi yadëed ree bejn cwent loj Dios, bén guban ree Nínive zaban reeman abi' guiëb reeman guial ree bén riga' yan, yayal reeman xcasti Dios. Din bén Nínive ree bayejc reeman loj Dios chi bacaagdiajg reeman xtiidx Dios ni gunee Jonás. Abi' yan, bén za'në lëjt mazri lasajcaman guial loj Jonás. ⁴² Ziangajc bén goc reina niz sur, zabanman chi yadëed ree bejn cwent loj Dios, dxel guiëbaman guial ree bén riga' yan, yayal reeman xcasti Dios. Din laaman dád zijt guzaman persi bicaagdiajgaman

xguialrajc rey Salomón. Abi' yan, bén za'në lëjt mazri lasajcan guial loj Salomón.

Xindxab ni rayejc

(Lc. 11:24-26)

⁴³ Chi rarii tijb xindxab luxdoo tijb bejn, abi' rzax niz loj yujbidx rguuilix lod yaziiladxix. Abi' chi ad rdxejlt lod yaziiladxix, dxel rüjnx xgab naladxix: ⁴⁴ “Zagdxeli yaye'can lod guzaan.” Abi' chi rayejquix ruguiaax luxdoo bén guin najn zi'c tijb lënü lod achut zobj, lod bilioob lod najcchaaw tëë. ⁴⁵ Dxel rica'x za gajdx xindxab naj ree mazri xinmal guial lojx. Abi' ru gra reex luxdoo bén guin. Dxel mazri benmal gacaman guial loj ni gocaman yaloj. Ziangaic sac ree benmal riga' loj guidxliuj yan.

Xniaa Jesús con ree bijchaman

(Mr. 3:31-35; Lc. 8:19-21)

⁴⁶ Sta canee Jesús loj ree bejn, bidxin xniaaman con ree bijchaman, za' reeman lule', rën reeman guinieenë reeman laaman. ⁴⁷ Abi' yu' tijb Bén rëb lojman:

—Laa xniaal con ree bijchil za' lule' guin, rën reeman guinieenë reeman lüj.

⁴⁸ Per Jesús badxi'man xtiidx Bén guin rëbaman:

—¿Chu naj da nan chu tëë ree nin naj da bichan?

⁴⁹ Dxel con yaaman balüü ree xbejnman rëbaman:

—Bén guie ree naj da nan në ree da bichan. ⁵⁰ Din chutëëz Bén rüjn zi'c rën da Dadan Bén yu' xanyabaa, laaman naj da bichan, da zanan, në da nan.

13

Xcwent Bén rtie'ch bin

(Mr. 4:1-9; Lc. 8:4-8)

¹ Dxejzii brii Jesús yu lod zobjaman, bisobaman ro' nijs Galilea. ² Abi' guial dád zien ree bejn bido'p yagaj, beenan naguiejn wë'p Jesús loj tijb barcw dxel gurejman lojn, guiáad ree Bén guin za' reeman ro' nijs guin. ³ Zien ree ni guzuloj culüüman laa reeman, per con ganax zi'c cwent ree, rëbaman loj reeman:

—Tijb bejn, briiman bigtie'chaman bin loj xguiniaaman. ⁴ Chi catie'chaman bin guin, ta'n nan biajb loj nejz, abi' bi't ree biguijn gudaw reeb laan. ⁵ Sta'n nan biajb loj ree guiaj lod ad riga't zien yuj, cari gulejnan guial ad zient yuj riga'. ⁶ Per chi brii gubijdx, baze'can laan, abi' guial ad yu't liujn gubidxan. ⁷ Dxel sta'n nan biajb loj ree yaquiëjch, chi guni's ree yaquiëjch guin banidloj reen laan. ⁸ Per sta'n nan biajb loj yuj za'c, abi' dád gojcan. Yu'n cwa tibgayuu bin loj, yu'n cwa gayojn yu' tëën cwa gajlbichü. ⁹ Bén rën gucaagdiajg, gol bacaagdiajg.

Chexc zeel rülüü Jesús con ni naj ree zi'c cwent

(Mr. 4:10-12; Lc. 8:9-10)

¹⁰ Dxel gubig ree xbejn Jesús lojman rëb reeman:

—¿Chexquiza zeel rülüü bejn ree con ganax zi'c cwent ree?

¹¹ Badxi' Jesús laan rëbaman:

—Lëjt, Dios ma basa'n lëjt din chignia'di xhienaag naj xguialrniabee-man, per Bén guin ree ad basa'nt Dios laa reeman chignia' reeman laan. ¹² Din Bén ma rignia', gusnuu chignia'man mazri, abi' zignia' da'taman. Per Bén ad rignia'za'ct ad rüjn tëëtaman naguiejn chignia'man mazri,

xt ta'n ni rignia'man zayanladxaman. ¹³ Zeel rnienè'n laa reeman con ganaxzi zi'c cwent ree. Din majsi rani loj reeman per rüjn reeman zi'c bèn ad ruguiaat, abi' majsi rigujejn reeman per rüjn reeman zi'c bèn ad rigujejnt, bèn ad rignia' tēēt. ¹⁴ Zian rzojb xtiidx Isaías, bèn badēē xtiidx Dios loj ree bejn, chi rēbaman:

Majsi rigujejn reeman, per achetczi chignia' reeman.

Abi' majsi rani loj reeman, per ad ruguiaat reeman.

¹⁵ Din ma been luxdoo reeman gojl,

nayaaw guidiajg reeman,

nayaaw tēē guiaaloj reeman.

Chitēē guguaa reeman,

guiguiejn reeman,

chignia' tēē reeman.

Din ad rēnt reeman gui't reeman lon din gūnan laa reeman perdon.

¹⁶ 'Per xiquilbaadi cuguaadi caguiejn tēēdi. ¹⁷ Din naj rni lojdi guial dád zien ree bèn badēē xtiidx Dios loj ree bejn, nē ree bèn guban zi'c rayal, guyēn reeman nuguaa reeman ni cuguaadi per ad baguiaat reeman laan. Guyēn reeman niguiejn reeman ni caguiejndi per ad bigujejnt reeman laan.

Rusignia' Jesús xcwent bèn rtie'ch bin

(Mr. 4:13-20; Lc. 8:11-15)

¹⁸ 'Yan gol bacaagdiajg xhie rēn guiēb ni rnin lojdi xcwent bèn bigtie'ch bin. ¹⁹ Bèn rigujejn xtiidx Dios abi' ad rignia'taman laan, laaman naj zi'c bin biajb loj nejz, guial laa ri't gajc xindxab rquiedix ni bacaagdiajgaman. ²⁰ Guiáad bin biajb loj ree guiaj naj zi'c bèn rigujejn xtiidx Dios, abi' dád nix ru luxdooan rigujejnman laan, ²¹ per guial najman zi'c cwaan ni ad yu't xliuj, ad rzudxi'chtaman. Chi rzagdiajman o rdxe'ch ree bejn laaman por xtiidx Dios, laa rusa'n gajcaman ni rliladxaman. ²² Abi' bin biajb loj ree yaquiējch naj zi'c bèn rigujejn xtiidx Dios, per guial mazri ruman xgab por ni yu' loj guidxliuj guie, rusquiee guialnaza'c riga' loj guidxliuj guie laaman, abi' zianzi rucwēēz rucaagdiajgaman xtiidx Dios achet sirv been ni bacaagdiajgaman. ²³ Per bin biajb loj yuj za'c naj zi'c bèn rigujejn xtiidx Dios abi' rignia'man laan rüjn tēēman zi'c rēn Dios, zi'c ni cwa tibgayuu bin loj o zi'c ni cwa gayojn o ni cwa gajlbichii.

Trigo con gui'xhguijdx

²⁴ Be Jesús stijb ni naj zi'c cwent loj reeman, rēbaman:

—Xguialrniabee Dios naj zi'c tijb bèn badxe' ganax bin zagdxe loj xguiniaa. ²⁵ Per la'tgaj naga'yējs gra reeman, bidxin bèn rdxe'ch laaman guxūbinman gui'xhguijdx ree loj trigo guin dxel ziaman. ²⁶ Abi' chi gulen trigo guin brii tēē dojn lojn nē ree gui'xh guin ma yu' lojn. ²⁷ Dxel bicojn ree xmojs bèn naj xguiniaa laan laaman, rēb reeman: “Dad ¿nid ganax bin zagdxe badxe' loj xguiniaal ya? yan, ¿banza guza gui'xh yu' lojn?” ²⁸ Badxi'man laan rēbaman: “Wed tijb bèn rdxe'ch naj bidgadxe' laan.” Dxel gunabdiix ree mojs guin lojman rēb reeman: “¿Xhie nal zudojxhan gui'xh guin ree ya?” ²⁹ Dxel rēbaman loj reeman: “Yajqui, chitēē guial gaxhidi gui'xh guin gaxhidi nē trigo guin. ³⁰ Zagdxeli gol basa'nan din ni'snēn trigo guin xt chi ma gojcan. Abi' chi guidxin dxej yado'p trigo guin guiēn loj ree bèn guto'p laan din yalojxgaj gui'xh guin yato'p reeman

din guixhii reeman lēnan zianz che'can. Dxelri yato'p reeman trigo guin din cu'chaaw reeman laa reen lod ruchaaw reen.”

Xcwent xhaj moxtajs

(Mr. 4:30-32; Lc. 13:18-19)

³¹ Be Jesús stijb ni naj zi'c cwent loj reeman, rēbaman:

—Xgualrniabee Dios naj zi'c xhaj moxtajs, ni rudxe' tijb bejn loj xguiniaaman. ³² Abi' bin guin naj mazri ni wit loj gra ree bin, per chi rni'san laan rajc mazri ni narooob loj gra ree cwaan. Abi' guial narooob da't rajcan, xt rüjn xguixbitia's ree biguijn xidxan.

Xcwent levadur

(Lc. 13:20-21)

³³ Be tēē Jesús stijb ni naj zi'c cwent loj reeman, rēbaman:

—Xgualrniabee Dios naj zi'c levadur ni rugo'ch tijb bēngunaa choon midid harin, abi' laan rusaaguij gra cob guin.

Chexc zeel ruluü Jesús con ni naj ree zi'c cwent

(Mr. 4:33-34)

³⁴ Gra ree ni balüü Jesús bejn ree, balüüman laa reeman con ganax ree ni naj zi'c cwent, achet balüüman laa reeman con ni ad najt ree zi'c cwent.

³⁵ Zian gojc persi guzobj xtiidx bēn badēē xtiidx Dios loj ree bejn, chi rēbaman:

Con ganaxzi ni naj ree zi'c cwent gulün bejn ree,

guiēn loj reeman ni gad reeman gagbee diizd chi gocchaaw guidxliuj.

Rusignia' Jesús xcwent gui'xhguijdx

³⁶ Chi ma bazaadiidxnē Jesús benzien guin ree, dxel bayuman lēnü con ree xbejnman, abi' gunabdiidx reeman lojman, rēb reeman:

—Bassignia' dunujn xcwent gui'xhguijdx ni gulen loj guiniaa guin.

³⁷ Badxi' Jesús an rēbaman:

—Bēn rudxe' bin zagdx ree naj Bēn guxhaal Dios, ³⁸ abi' guiniaa guin naj guidxliuj. Guiáad bin zagdx ree naj ree bēn naj par loj xgualrniabee Dios. Abi' ree gui'xh guin naj bēn naj ree par xindxab.

³⁹ Guiáad bēn rdxe'ch, bēn guxübin trigo guin naj xindxab. Abi' guial rado'p guialnaza'c guin rēn guiēb chi nit guidxliuj, guiáad ree bēn yato'p guialnaza'c guin naj ree xianjl Dios. ⁴⁰ Zian zi'c rado'p ree gui'xhguijdx guin par che'c reen, zian gac chi nit guidxliuj. ⁴¹ Bēn guxhaal Dios guixhiaal ree xianjlaman dīn yabēē reeman bēn rayal ree yarii loj xgualrniabeeman, bēn ruzaalguiiw bejn ree dīn güün reeman dol nē gra ree bēn cayüjn dol. ⁴² Abi' guzaal reeman laa reeman loj bajl lod goon reeman xt gaw lay reeman. ⁴³ Dxel bēn naban ree zi'c rēn Dios, guidiin reeman bacha' loj xgualrniabee xDad reeman Dios, zi'c rdiin gubijdx bacha'. Bēn rēn gucaagdiajg, gol bacaagdiajg.

Xcwent ni lasajc

⁴⁴ 'Xgualrniabee Dios naj zi'c tijb ni lasajc da't, ni naguie'ch loj tijb guidxliuj. Abi' rdxejl tijb bejn laan zianz ruquie'chaman laan stijb, lod gulēēman laan. Abi' dād rabaaman ruto' gra ni rajpaman persi rsiiman guidxliuj guin.

Xcwent perl

⁴⁵ 'Rni tëën lëjt: Xgualrniabee Dios naj zi'c tijb bën rguuil perl zagdxe din siiman laan. ⁴⁶ Chi rdxejlaman tijb perl lasajc, ruto' gra ni rajpaman abi' rsiiman laan.

Xcwent guijxh rniaaz bëjl

⁴⁷ 'Abi' tëë xgualrniabee Dios naj zi'c tijb guijxh ni ruzaal reeman loj nijs abi' rniaazan graloj bëjl. ⁴⁸ Dxel chi ma gudxa guijxh guin rabëë reeman laan ro' nijs guin, abi' rbej reeman rabe reeman loj bëjl guin, dxel ragu' reeman be zagdxe lën dxüm guiáad be ad najt zagdxe rusëëb reeman. ⁴⁹ Zian gac dxej nit guidxliuj, gui't ree xianjl Dios yabe reeman benmal loj ree benza'c. ⁵⁰ Abi' guzaal reeman benmal guin ree loj bajl lod goon reeman abi' xt gaw lay reeman.

Bén rbe nicüb në ni yojx

⁵¹ Dxel gunabdiidx Jesús loj ree xbejnman, rëbaman:

—¿Rignia'di gra ni canin lëjt ya?

Badxi' reeman laan rëb reeman:

—Rayignia'n'an, Dad.

⁵² Dxel rëb Jesús loj reeman:

—Gra ree mextr ni rajc ley, abi' cusiid reeman xhienaag naj xgualrniabee Dios, laa reeman naj zi'c tijb bën rbe nicüb në ni yojx loj gra ni rajpaman.

Badxin Jesús Nazaret

(Mr. 6:1-6; Lc. 4:16-30)

⁵³ Chi gulox gunee Jesús loj reeman zian, zianz bazaman. ⁵⁴ Dxel badxin ladxaman, ni guzuloj culüüman bejn ree lën xyadoo reeman. Abi' dád badxaloj ree bën guin, rëb reeman:

—¿Ban guin basiidaman gra ree ni rajcaman? ¿Chexquiza zeel rajc rüjnman milagr ree? ⁵⁵ ¿Nid laaman naj xi'n carpinter ya, abi' xniaaman naj Li, guiáad ree bijchaman naj Jacob, Xiëb, Simón, në Judas? ⁵⁶ ¿Nid luguiedx guie zojb ree bizanman ya? ¿Banza guin basiidaman gra ree ni rajcaman?

⁵⁷ Abi' ad bidxga't reeman Jesús. Per rëbaman loj reeman:

—Bantëëz guin rajp ree bejn respejt tijb bën rudëë xtiidx Dios loj ree bejn, per ladxaman achut rajp laaman respejt ni'qui lidxaman.

⁵⁸ Abi' ad zient milagr beenman yagaj guial ad bililadxt reeman laaman.

14

Güjt Waj Bén baroobnijs bejn ree

(Mr. 6:14-29; Lc. 9:7-9)

¹ Tiampzii Herodes bën canabee niz Galilea, biguiejnman ni cayüjn Jesús. ² Abi' rëbaman loj ree xbejnman:

—Waj bën baroobnijs bejn ree, laaman baban zatijb, zeel rajpaman guialrniabee rüjnman milagr ree.

³ Rëb Herodes zian guial laaman gunabee biniaaz Waj, abi' bixiiman con caden dxel badxe' reeman laaman ladxguiib. Been Herodes guin zian por Herodías lacheel bijchaman bën la Felip, ⁴ guial rëb Waj guin loj Herodes:

—Ad laat guial zojbnël laagajc lacheel bijchil.

⁵ Guyën Herodes nugÿjtaman Waj, per bidxebaman xhie nÿjn ree bejn laaman guial graczi reeman rëb Waj naj tijb bën rudëed xtiidx Dios loj ree bejn. ⁶ Per chi baza' Herodes ijz, brii xi'n Herodías baya'm loj ree xbioozaman. Abi' dád bayuladx Herodes zi'c baya'm, ⁷ dxel rëb Herodes gudëëdaman xhietëez ni guiniabim. ⁸ Abi' xniaam rëb lojm xhie guiniabim, dxel rëbim loj Herodes:

—Banee guijc Waj bën ruuroobnijs bejn ree, baneen loj tijb pliajt.

⁹ Dád gyunaya rey Herodes, per guial mal baya'n reeman diidx niz loj gra ree xbioozaman, gunabeeman xsuldadaman gudëed reeman ni gunabim. ¹⁰ Dxel gunabeeman guitü' reeman guijc Waj lën ladxguiib guin, ¹¹ abi' bidxinnë reeman laan loj tijb pliajt badëed reeman laan lojm, dxel bayümin loj xniaam.

¹² Zianz bidxin ree xbejn Waj baca' reeman xcuerpaman persi biquie'ch reeman laaman. Dxel bicojn reeman Jesús.

Ruyaan Jesús gaay mil bejn

(Mr. 6:30-44; Lc. 9:10-17; Jn. 6:1-14)

¹³ Chi gogbee Jesús zian, guyuman loj tijb barcw zëman niz lod achutdzi zojb din su laazaman. Chi gogbee ree bejn, dxel brii ladx reeman zë guia'zi reeman lod guidxinman. ¹⁴ Chi barii Jesús loj barcw guin baguiaa-man bën guixiuj ree riga' yagaj, bayaman laa reeman abi' bayÿjnman bënragxuu zinë reeman. ¹⁵ Chi ma gudxe, gubig ree xbejnman lojman rëb reeman:

—Ma gudxe yan, abi' achut bejn zojb niz guie. Gÿjdx loj ree bën guin ma gojl yaguiaj reeman, din che reeman guiedx lod sii ni gaw reeman.

¹⁶ Per badxi' Jesúsán rëbaman:

—Ad rÿjnt naguiejn yaguiaj reeman, lëjt gol badëë ni gaw reeman.

¹⁷ Badxi' reeman laan rëb reeman:

—Per gaayzi guiadxtil naca'n con zatio'p bëjl.

¹⁸ Dxel rëb Jesús loj reeman:

—Gol tanë reen guie.

¹⁹ Dxel gunabeeman gurej gra ree bën guin loj guixya'. Abi' cwa'man guigaay guiadxtil guin con grop bëjl guin. Dxel gules lojman xanyabaa badëëman quixtëë loj Dios, abi' gula'man guiadxtil guin badëëman laan loj ree xbejnman persi gudi's reeman laan loj gra ree bën guin. ²⁰ Gra reeman gudaw xt bigdxinladx reeman, abi' staczi bacha reeman za chiptio'p dxüm ni baya'n. ²¹ Bën gudaw guin ree naj reeman cost gaay mil xinguaaaw garenqui ree béngunaa con ree xindoo.

Riza Jesús loj nijs

(Mr. 6:45-52; Jn. 6:16-21)

²² Dxel gunabee Jesús xbejnman guyu reeman loj barcw din ned reeman téd gaj reeman stiblad ro' nijs guin, la'tgaj cuzaadiidx nëman benzien guin ree. ²³ Chi ma gulox bazaadiidx nëman laa reeman, dxel zë xtiybaman guijc tijb guia' din cwedx guiniabaman Dios. Chi gure guiaal xtiybzaman za' guijc guia' guin. ²⁴ Guiáad barcw guin zijt ma zën loj nijs, dád rliaro' xtÿjp nijs guin laan guial rliaj bi niz loj barcw guin. ²⁵ Chi ma cayreguiaal, zibig Jesús loj ree xbejnman rzaman loj nijs guin. ²⁶ Dxel baguiaa ree xbejnman laaman rzaman loj nijs guin, dád bidxeb reeman abi' gurixdiaj reeman rëb reeman:

—¡Tijb anman!

²⁷ Per guneenë Jesús laa reeman rëbaman:

—¡Gol bagu' luxdoodi! ¡Najn, ad rdxebidi!

²⁸ Badxi' Bëdan rëbaman:

—Dad, bal lüjn, gunabee gazan loj nijs guin guialan lojl.

²⁹ Abi' rëb Jesús lojman:

—Guda.

Dxel baguiajt Bëd loj barcw guin, rzaman loj nijs guin zëman loj Jesús. ³⁰ Per chi baguiaaman bidoxhan cabi' dxel bidxebaman, abi' guial guzuloj cazëëbaman xan nijs guin guridxa'man rëbaman:

—¡Gognë naj, Dad!

³¹ Loj hor ziigajc basli yaa Jesús gunaazaman yaa Bëd, rëbaman lojman:

—¿Chexc zeel ad rliladxza'ctil, chexc zeel yu' nawëëguil?

³² Abi' chi bayë'p reeman loj barcw guin, laa bacwëëz gajc bi guin.

³³ Guiáad ree bën yu' loj barcw guin bazuxib reeman loj Jesús, rëb reeman:

—Diidxliczi lüjn naj xi'n Dios.

Rayüjn Jesús bënragxuu ree Genesaret

(Mr. 6:53-56)

³⁴ Chi gudëd reeman loj nijs guin dxel bidxin reeman xyuj ree bën Genesaret. ³⁵ Abi' ree bën niz ni bayünbee reeman Jesús, abi' guidibczi niz yagaj gutie'ch reeman diidx guial za'man ni. Dxel binë ree bejn bënragxuu ree lojman, ³⁶ guzajc reeman liaadx lojman din tiëbaman gugaal reeman majsi guia'zi xabaman. Abi' gra ree bën bagaal xabaman bayajc.

15

Ni rüjn persi rajc bejn bëndol

(Mr. 7:1-23)

¹ Bénfarisew ree con ree mextr rajc ley, bën za ree Jerusalén, gubig reeman loj Jesús abi' gunabdiidx reeman lojman, rëb reeman

²—¿Chexc zeel ad zinalt ree xbejn costumbr ni basa'n dux béngulal ree? ¿Chexc zeel ad zinalt reeman costumbr zi'c rayal gunaa reeman chi gad reeman gaw?

³ Dxel rëb Jesús loj reeman:

—Laadx lëjt, ¿chexc zeel rüjndi xtiidx Dios tiblax persi zinal xcostumbridi? ⁴ Din Dios rëb: “Gojp respejt xDadil con xnial”, abi’ “Bën rnnee diidxguijdx loj xdadaman o xnialaman ya, rayal guiëtaman.” ⁵ Per lëjt rëb zile' guiëb bejn loj xdadaman o xnialaman: “Ad zile't günan lüj yudar, din gra ni ra'pan naj par Dios.” ⁶ Rëbidi guial bën guinee zian, ad zile't güün yudar xdadaman con xnialaman, abi' zian rbëëladxidi xtiidx Dios persi zinal xcostumbridi. ⁷ ¡Bën rusquiee! ¡Rüjnzidi guial nabandi xnejz! Waliqni ni gunee Isaías, bën badëë xtiidx Dios loj ree bejn, chi rëbaman:

⁸ Bën guie ree rëbzi reeman rnajchi' reeman naj, per ad rënt reeman naj con guidib luxdoo reeman.

⁹ Xlia'czi rnajchi' reeman naj,

abi' rulüü reeman bejn ree ganaxzi ni rbëëguijc ree bénguidxliuj.

¹⁰ Dxel gurejdx Jesús ben zien riga' ree yagaj, abi' rëbaman loj reeman:

—Gol bacaagdiajg, gol bignia' tëë ni ganin lojdi. ¹¹ Ad ni rawt bejn rüjn laaman bëndol, ni riri ro'man laan rüjn laaman bëndol.

¹² Dxel gubig ree xbejn Jesús lojman, rëb reeman:

—¿Gogbeel ya bidxe'ch ree bénfarisew chi biguiejn reeman ni guneel?

13 Badxi' Jesús laan rëbaman:

—Gra ni ad zëedt por da Dadan Dios bén yu' xanyabaa, yu' dxej nitan. 14 Zeel gol basa'n reeman din laa reeman naj zi'c tijb bénlutia'p rulüü stijb bénlutia'p ban niz cheman. Abi' bal tijb bénlutia'p gulüü stijb bénlutia'p guin, zayajb grop reeman ro' bala'.

15 Dxel rëb Bëd loj Jesús:

—¿Basignia' dunujn xhie rën guiëb ni guneel?

16 Badxi' Jesús san rëbaman:

—¿Wen, ni'qui lëjt ad rignia'tan ya? 17 ¿Id rignia'di ya guial gra ni raw bejn rej lënman abi' rariin? 18 Per diidx ririi ro' bejn, luxdooman zan, abi' laan rüjn laaman bëndol. 19 Din luxdoo bejn za graloj ree xgabmal, guialrugüjt bejn, guial rüjn nidxuudx, guialrzunë lacheel ben ren, guialrban, guialrusquiee në guialrniee diidxguijdx loj lasa'. 20 Gra ree ni guie naj ni rüjn bejn bëndol. Per guial ad zunaat bejn zi'c naj costumbr ni rayal güün bejn chi gadaman gaw, ad laatan naj ni rüjn laaman bëndol.

Tijb béngunaa Canaán bililadx Jesús

(Mr. 7:24-30)

21 Chi baza Jesús yagaj zëman niz Tiro në niz Sidón. 22 Abi' yagaj zojb tijb béngunaa za niz Canaán, briiman, rbixdiajman rëbaman loj Jesús:

—¡Dad, xdiaa Davi, baya naj! Da xi'ndxa'pan yu' bendxab luxdoo, dád rusagziman laam.

23 Abi' Jesús ad badxi'taman xtiidx béngunaa guin. Dxel gubig ree xbejnman lojman, rëb reeman:

—Bidxga' béngunaa guin, din yaguaajman, din rbixdiajman nalaman dunuj ree.

24 Dxel rëb Jesús:

—Dios guxhaal naj din günan yudar ganaxzi ree bén Israel zë loj nejz mal.

25 Per béngunaa guin bigzuxibaman loj Jesús, rëbaman:

—¡Dad, gognë naj!

26 Badxi' Jesús san, rëbaman:

—Ad zagdxet naj chiquied bejn guidatajtil loj xi'nman din gudëëdaman laan loj ree bë'cw.

27 Badxi' béngunaa guinan, rëbaman:

—Waliquil, Dad, per në ree bë'cw ruto'p guidatajtil laay ni ryajb xan xmex Bén naj xbë'cw laa reeb.

28 Dxel rëb Jesús lojman:

—¡Na, waliquil riladxil con guidib luxdool! Gac zi'c rën.

Loj hor guin gajc bayajc xi'n Bén guin.

Rayün Jesús zien ree bénraxuu

29 Baza Jesús yagaj, bidxinman ro' nijs Galilea, dxel wë'paman guijc tijb guia' abi' gurejman yagaj. 30 Dád zien bejn bido'p lod za'man. Binë reeman bencoj ree, në ree bénlutia'p, në ree Bén ad rüjnt xu'c dxiin, con ree bengop në zien ree bénraxuu ren ree, badxig reeman laa reeman loj Jesús, abi' bayünman laa reeman. 31 Dád badxa loj ree bejn chi baguiaa reeman ma rniee ree bengop, ma bayajc xu'c ree Bén ad rüjnt dxiin xu'c, guiaad ree bencoj ma rza reeman abi' ree bénlutia'p ruguiaa reeman. Zianz guzuloj cuza't reeman zagdxë xDios ree Bén Israel.

*Ruya'an Jesús tajp mil bejn**(Mr. 8:1-10)*³² Abi' gurejdx Jesús bén naj ree xbejnman, rëbaman loj reeman:

—Rayan bén guin ree, din ma gojc choon dxej za' reeman con naj, abi' achet ni gaw reeman. Ad rëntan yagu'nejzan laa reeman sin guialraw ad nial yadaj reeman niz lunejz.

³³ Dxel rëb ree xbejnman lojman:

—Per ¿ban guin yuca'n ni gaw ree benzien guin, zi'c naj guie lod achutci bejn zojb?

³⁴ Gunabdiidx Jesús loj reeman, rëbaman:

—¿Bël guiadxtil ca'di?

Badxi' reeman laan rëb reeman:

—Gajdx guiadxtil con zatio'p choon bëjl.

³⁵ Dxel gunabee Jesús gurej gra ree bén guin luyuj. ³⁶ Abi' cwa'man guigajdx ree guiadxtil guin con ree bëjl guin, badëëman quixtëë loj Dios. Dxel gula'man laa reen, badëëman laa reen loj ree xbejnman persi gudi's reeman laa reen loj gra ree bén guin. ³⁷ Gra reeman gudaw xt bigdxinlaxd reeman. Abi' staczi bacha reeman gajdx dxüm ni baya'n. ³⁸ Bén gudaw ree naj reeman tajp mil xinguaaw, garenqui ree béngunaa con ree xindoo. ³⁹ Dxel bazaadiidxnë Jesús laa reeman, abi' guyuman loj barcw ziaman niz Magadán.**16***Rniab reeman güün Jesús tijb milagr**(Mr. 8:11-13; Lc. 12:54-56)*¹ Bénfarisew ree con ree bénsaducew bidxin reeman lod za' Jesús, abi' par güün reeman laaman prueb gunab reeman lojman din güünman tijb milagr din guiguien guial Dios guxhaal laaman. ² Per badxi' Jesús laan rëbaman:—Wadxé ree chi ruguaadi naxnia xanyabaa, rëbidi: “Zagdxé gac guixié din naxnia xanyabaa.” ³ Guíaad rsil chi naxnia xanyabaa yu' tée zaj, rëbidi: “Ad laat gac yandxej.” ¿Bén rusquiee!, bal ragbeedi xhie rën guiëb sen yu' xanyabaa, ¿chexc ad rignia'tidi xhie rën guiëb gra ni cuguaadi yan? ⁴ Bén mal, ad rliadxtidi abi' rniabidi günan tijb milagr, per achet guguiaadi, tijbzi zi'c guzac Jonás.

Dxel basa'n Jesús laa reeman, ziataman.

*Xlevadur ree bénfarisew**(Mr. 8:14-21)*⁵ Dxel gudëdnë ree xbejnman stiblad ro' nijs guin, per bayanlaxd ree xbejnman ninë reeman guiadxtil. ⁶ Abi' rëb Jesús loj reeman:

—Gol gojp cudad con xlevadur ree bénfarisew në ree bénsaducew.

⁷ Dxel guzuloj rëb loj lasa' reeman:

—Naman duloj ree zian guial ad naca't ree guiadxtil.

⁸ Gogbee Jesús ni canee reeman abi' rëbaman loj reeman:

—¿Chexc zeel rëbidi guial ad ca'tidi guiadxtil? Ta'nnijt rliadxidi naj.

⁹ ¿Staczi ad rignia'tidi ya? ¿Nid rusaaladxidi ya chi gudi'san gaay guiadxtil loj gaay mil bejn, abi' zabël dxüm ni baya'n bato'pidi? ¹⁰ ¿Nid zalaxd tée di ya chi gudi'san gajdx guiadxtil loj tajp mil bejn, abi' zabël dxüman bato'pidi? ¹¹ ¿Chexc zeel ad rignia'tidi guial ad guiadxtiltan cuzatan

lojdi, chi rnin lojdi gapidi cudad con xlevadur ree bénfarisew në ree bénsadusew?

¹² Dxel bignia' ree xbejnman guial ad xlevadurt guidxtilan cuza'taman loj reeman, rëbaman zian din gap reeman cudad con ni ruluü ree bénfarisew në ree bénsaducew.

Rëb Bëd guial Jesús naj Cristo

(Mr 8:27-30; Lc 9:18-21)

¹³ Chi bidxin Jesús niz Cesarea de Filipino, gunabdiidxaman loj ree xbejnman, rëbaman:

—¿Chu rëb ree bejn, naj Bén guxhaal Dios?

¹⁴ Badxi' reeman laan, rëb reeman:

—Yu' reeman rëb guial Wajn, bén baroobnijs bejn ree. Yu'za reeman rëb guial Elíasan, bén badëë xtiidx Dios loj ree bejn, yu' tëë reeman rëb guial Jeremíasan, bén badëëd xtiidx Dios loj ree bejn o stijb ben ren ya, bén badëëd xtiidx Dios loj ree bejn.

¹⁵ Dxel rëbaman loj reeman:

—Laadx lëjt, ¿xhie nadi, chu naj?

¹⁶ Badxi' Simón Bëdan, rëbaman:

—Lüjn naj Cristo. Lüjn naj Xi'n Dios naban.

¹⁷ Dxel rëb Jesús lojman:

—Xiquilbaal, Simón, xi'n Jonás, din ad bénguidxliujt guna lojl ni guinieel, da Dadan bén yu' xanyabaa laaman naj bén guna lojl. ¹⁸ Abi' naj rni lojl, Bëd, (rën guiëban “guiaj”) lüj naj zi'c tijb guiaj ni gacnë lidxan, din por lüj grii ree bén gac da bejnan abi' ni'qui gualgüjt ad zunijtt laa reeman. ¹⁹ Naj gune lüj gualrniabee ni za xanyabaa, abi' gra ni tiëbil gac loj guidxliuj guie ma naj gacan xanyabaa, guiáad ni ad zatiëjbtal gac loj guidxliuj guie ad najt gacan xanyabaa.

²⁰ Dxel gunabee Jesús loj gra ree xbejnman guial achu loj guiëb reeman guial laaman naj Cristo.

Rugojn Jesús guiëtaman

(Mr 8:31-9:1; Lc 9:22-27)

²¹ Diizd nadxel guzuloj Jesús bagojn ree xbejnman guial naj cheman Jerusalén, abi' ree guxtis Israel con ree bixhioz rniabee ree bixhioz në ree mextr rajc ley, laa reeman naj bén gusagzi laaman, gugüjt reeman laaman, per ni yayon dxej yabanman. ²² Dxel gulëëcaan Bëd laaman, rëbaman lojman:

—¡Dios ad zabëëladxt lüj, Dad! ¡Laaman ad zatiëjbt saquil zian!

²³ Per badxi' loj Jesús, rëbaman:

—¡Basa'n naj, xindxab!, ad rüjn nawëëguil lon. Din ad por Diost zëëd ree xgab ni rüjnl, xixgab bénguidxliujn rüjnl.

²⁴ Dxel rëb Jesús loj ree xbejnman:

—Bal yu' bén rën gac da bejnan ad zajct güünman zi'c naj xixgabaman, siibnejzaman guialzi ni tëdzaman abi' guidnalaman naj. ²⁵ Din bén mazri rën xgualnaban ni rajpaman loj guidxliuj guie zadxin dxej gunijtaman laan. Per bén guiët por naj, zajpaman gualnaban tiblyaaa con Dios. ²⁶ Xhieci gan gap bejn gra ni yu' loj guidxliuj, abi' nitaman loj Dios. Din ad zile't sii bejn xgualnabanman xanyabaa. ²⁷ Abi' Bén guxhaal Dios, gui'taman con xgualrniabee xDadaman Dios në ree xianjl Dios din gudëëman ni rayal tijbgaj bejn, bal gonin been bejn. ²⁸ Diidxliczi rnin

lojdi guial yu' ree bën riga' guie ad zëjtt reeman chi gad reeman guguaia Bén guxhaal Dios, gui'taman con xguialrniabeeman din nabeeman.

17

Bidxaa Jesús loj choon ree xbejnman

(Mr. 9:2-13; Lc. 9:28-36)

¹ Chi gudëd xho'p dxej, binë Jesús Bëd, në Jacob con Waj bijch Jacob, binëman laa reeman guiyc tijb guia' ya. ² Ni bidxaa Jesús niz loj reeman. Dád balaa bacha' lojman zi'c rulaa gubijdx bacha', guiáad xabaman bayajcan naquich, balaa tëën bacha' zi'c guiij. ³ Abi' loj hor guin baguiaa reeman Moisejs con Elías cayünë reeman Jesús diidx. ⁴ Dxel rëb Bëd loj Jesús:

—Dad, jzagdxe naj nadxu' ree guie! Bal rën, günan choon ranch, tijban par lüj, tijban par Moisejs, stijban par Elías.

⁵ La'tgaj canee Bëd zian, biguiajt tijb zäj xt guiyc reeman ridiinan bacha', loj zäj guin brii cha' bejn rëbaman:

—Bën guie naj da Xi'nän, bën rën da'tan, bën rabaanë' tëën, gol bacagdiajg xtiidxaman.

⁶ Chi biguiejn ree xbejn Jesús diidx guin ree, bazuxib reeman basajb loj reeman xt luyuj, dád bidxeb reeman. ⁷ Dxel gubig Jesús lod za' reeman, baqui'man laa reeman, rëbaman:

—Gol guzuli, ad ridxebidi.

⁸ Abi' chi gules loj reeman achutri baguiaa reeman, tijbzi Jesús za' yagaj.

⁹ La'tgaj cayguiajt reeman ruguia' guin, rëb Jesús loj reeman:

—Achuczi loj guiëbidi ni baguiaadi, xt chi yaban Bén guxhaal Dios.

¹⁰ Dxel gunabdiidx ree xbejnman lojman, rëb reeman:

—¿Chexquiza zeel rëb ree mextr rajc ley guial yaloj Elías gui't?

¹¹ Badxi' Jesúsän, rëbaman:

—Walican guial yaloj Elías gui't, laaman guzuxnejz gra. ¹² Per naj rni lëjt guial mal bi't Elías, abi' ad bayagbeet ree bejn laaman, beennë reeman laaman ni guyëntzi reeman. Abi' ziangajc gusagzi reeman Bén guxhaal Dios.

¹³ Dxel gogbee ree xbejnman guial Wajn bën baroobnijs bejn ree cuza'taman.

Rayüjn Jesús tijb xin rëjtya'

(Mr. 9:14-29; Lc. 9:37-43)

¹⁴ Chi badxin Jesús con guiyon ree xbejnman, lod cabëz ree ben zien laaman bibig tijb xinguaiaaw lojman, bazuxibix lojman rëbix:

¹⁵ —Dad, baya da xi'nän, din dád rzagdiajx rëjtya'x. Bëlczí volt riyajbix lojguij o lojnijs ya. ¹⁶ Bidnë'n laax loj ree xbejn, per ad rajct rayüjn reeman laax.

¹⁷ Badxi' Jesúsän, rëbaman:

—¿Benguijdx, bën ad rliladxt! ¿Xt goc gazunë'n lëjt? ¿Xt goc gadaanan lëjt? Gol tanë xinzii guie.

¹⁸ Dxel gudilë Jesús xindxab guin, babëëman laax luxdoo xin guin. Loj hor guin gajc bayajquix.

¹⁹ Abi' gunabdiidx ree xbejn Jesús lojman lood ren, rëb reeman:

—¿Chexc zeel ad gojct nalëën xindxab guin luxdoo xin guin?

²⁰ Dxel rëb Jesús loj reeman:

—Guial ta'nzi riladixidi. Naj rni lojdi bal naj xgualriladixidi majsi zi'ctzi naj xhaj moxhtajs, zile' guiëbidi loj guia' guin: “Bisüd guie, bisob lood ren”, zucaagdiajgan xtiidixidi. Achetctzi gac nawëëg par lëjt. ²¹ Per par yarii lasa' ree xindxab guie ryaadx chu cwedx guiniab Dios guiba'n tëë.

Rugojn Jesús zatijb guial guiëtaman

(Mr. 9:30-32; Lc. 9:43-45)

²² La'tgaj za' Jesús niz Galilea con ree xbejnman, rëbaman loj reeman guial yayü reeman Bén guxhaal Dios loj ree bejn, ²³ abi' gugüjt reeman laaman, per ni yayon dxej yabanman. Chi biguiejn ree xbejnman zian, dád guyu naya reeman.

Ni rajx par yadoo

²⁴ Chi badxin Jesús con ree xbejnman guiedx Capernaum, bén ruquijx ree impuest par yadoo wej reeman loj Béd bignabdiidx reeman, rëb reeman:

—¿Rguijx xmextril impuest par yadoo ya?

²⁵ Badxi' Bëdan, rëbaman:

—Rguijxcaman laan.

Dxel chi bayu Béd lënü lod za' Jesús, yalojli Jesús gunabdiidx lojman, rëbaman:

—¿Xhie naladxil, Simón? ¿Chu rguijx impuest loj ree rey yu' loj guidxliuj guie? ¿Xi'n reeman ya o benzit ree?

²⁶ Badxi' Béd laan rëbaman:

—Benzit ree.

Dxel rëb Jesús:

—Abi' ree bén ladx reeman ad rguijxt reeman laan. ²⁷ Per chitëë guidxe'ch reeman, wej ro' nijs, bazaal xiansuelil, dxel bëjl yaloj ni guiniaazil babëëb. Ro' bëjl guin guidxelil tijb cintabl, con laan bitijx dux impuest.

18

¿Chu mazri zojbloj?

(Mr. 9:33-37; Lc. 9:46-48)

¹ Lën ree dxejzii bidxin ree xbejn Jesús lod za'man, abi' gunabdiidx reeman lojman, rëb reeman:

—¿Chu mazri zojbloj lod rniabee Dios?

² Dxel gurejdx Jesús tijb xindoo, bazujman laax galay reeman, ³ abi' rëbaman:

—Diidxliczi rnin lojdi bal id zayüjndi xgab por xtolidi, bal id zajc tëëdi zi'c tijb xindoo, ad zutidi lod rniabee Dios. ⁴ Bén güün naya loj Dios, gac tëëman zi'c xindo guie, laaman gac bén mazri zojbloj lod rniabee Dios. ⁵ Abi' bén yaca' tijb xindoo, por naj, najn raca'man.

Bén rüjn persi ryajb ree bejn loj dol

(Mr. 9:42-48; Lc. 17:1-2)

⁶ 'Bal chu gusajb tijb Bén qui riladxri naj loj dol, zagdxeli guixhii reeman tijb guiajro' yëjnman guzaal reeman laaman xt xan nijs. ⁷ ¡Probza bénguidxliuj guial yu' da't ni rusajb laaman loj dol! Zianctzi yu' ni mal guin loj guidxliuj, per ¡probza Bén gusajb bejn ree loj dol!

⁸ 'Zeel, bal laagajc yaal o guia'l rusajb lüj loj dol, zagdxeli gutü'n bazaalan zijt, din zagdxeli chu'l xanyabaa con tiblodzi yaal o con tiblodzi

guia'l, luar chu'l con groplad yaal o groplad guia'l loj bajl ni ad yu't dxej yayü'. ⁹ Abi' bal laagajc guiaalojl rusajb lüj loj dol, gulëen bazaalan zijt, zagdxeli chu'l con tiblodzi guiaalojl xanyabaa, luar chu'l con gropladan loj bajl yu' gabijl.

Xcwent xiil gunit

(Lc. 15:3-7)

¹⁰ 'Ad guiniajgaadi loj ree bén qui riladxri naj. Din diidxliczi rnin lëjt guial xanyabaa yu' ree anjl rniaj laa reeman zianczi za' reeman loj da Dadan Dios bén yu' xanyabaa. ¹¹ Guiáad Bén guxhaal Dios zëédaman par ree bén ad zinalt xnejz Dios din laa reeman loj dol.

¹² '¿Xhie naladxidi? Bal tijb bejn rajp tibgayuu xiil, abi' rizëeb tijbib, ¿nid zusa'nman zatajpagjlchiinbitapib dajn ya din chigdiilaman be bizëeb guin? ¹³ Abi' bal yadxejlaman laab, diidxliczi rnin mazri yabaanëman laab guial loj tajpagjlchiinbitap be ad bizëeb guint. ¹⁴ Ziangajc dux Dad ree Dios bén yu' xanyabaa ad rëntaman nit ni'czi tijb ree bén qui riladxri laaman.

Xhienaag yaguieen perdon du lasa' ree

(Lc. 17:3)

¹⁵ 'Bal xhie tijb ni mal güün lasa'l lüj, guneenëman lüjzi din gagbeeman xhie falt badxe'man. Bal guidxga'man xtiidxil, ma beenl gan yaneenël laaman zagdxé. ¹⁶ Bal id ridxga'man lüj, binë zatijb o zatio'p bejn, din chigneenëdi laaman din con xtiidx tio'p o choon bejn guiguien guial ma bigneenël laaman. ¹⁷ Dxel bal ni'qui xtiidx reeman ad ridxga'taman, bagojn ree bén zinal xnejz Dios, abi' bal ni'qui xtiidx reeman ad ridxga'taman, dxel ma guguaadi laaman zi'c tijb bén ad riladxdt Dios o zi'c tijb bén ruquijx impuest par Rom.

¹⁸ 'Diidxliczi rnin, gra ni ad zatiëjbtidi gac loj guidxliuj guie ad rajctan xanyabaa, guiáad ni tiëbidi gac loj guidxliuj guie mal rajctan xanyabaa.

¹⁹ 'Rni tëen lëjt: Bal yaya'n tio'pidi diidx loj guidxliuj guie, par guini-abidi xhienin loj da Dadan bén yu' xanyabaa, laaman gunee laan. ²⁰ Din lod rado'p tio'p o choon bejn por naj, laa naj za' galay reeman.

²¹ Dxel gubig Bëd gunabdiidxaman loj Jesús, rëbaman:

—Dad, ¿bël volt rayal günan perdon lasa'n, bal güünman naj xhienin? ¿Xt gajdx volt ya?

²² Badxi' Jesúsán rëbaman:

—Ad gajdx voltizi rayal güün lasa'l perdon, rayal güünl perdon gajdx volt gayojnchii.

Xcwent bén ad rüjnt perdon lasa'

²³ 'Xguialrniabee Dios naj zi'c tijb rey ni been xgab guial ma gojl yaguijx ree xmojsaman lojman. ²⁴ Chi guzulojman caybëëman cwent guin, bidxin tijb xmojsaman lojman bén ral zro' da't. ²⁵ Abi' guial achet rajp bén guin din yaguixaman ni ralaman, gunabee rey guin to'man loj ree bejn në lacheelaman con ree xi'nman nëtëë gra ni rajpaman din chile' yaguixaman di'n guin. ²⁶ Dxel bazuxibaman loj rey guin, beenman naya rëbaman: “Dad, gojp naj pacens zaguixcan graczi ni ralan lojl.” ²⁷ Zianz baya rey guin laaman, beenman laaman perdon gra ni ralaman, abi' baslaaman laaman ziaman. ²⁸ Per chi barii mojs guin yagaj, badxajgaman tijb bén rüjnnëman dxiin, ralaman ta'nzi milia lojman. Dxel gunaazaman laaman guzuloj caguiajman yëjnman, rëbaman:

“¡Baguijx ni ralil lon!” ²⁹ Dxel bazuxib b́en guin lojman beenman naya ŕebaman: “Gojx naj pacens zaguixcan graczi ni ralan lojl.” ³⁰ Per ad guyěnt b́en guin, badxe'man laaman ladxguiib xt lodzi yaguijxaman di'n guin. ³¹ Chi baguiaa ree los demazri ree xmojs rey guin, dád gognaa luxdoo reeman, abi' wej reeman biguiedx reeman lojman gra ni goc. ³² Dxel gurejdx rey guin mojs guin, zianz ŕebaman lojman: “¡Mojs guiidx! Benan perdon gra ni ralil lon guial beenl naya. ³³ ¿Nid nęgajc lųj rayal naya xcompniaril ya, zi'cgajc bayan lųj?” ³⁴ Abi' guial tant balen rey guin, gunabeeman badxe' reeman laaman ladxguiib xt lodzi baguijx gra ni ralaman.

³⁵ Basnuu Jesús ŕebaman:

—Ziangajc güünně da Dadan lęjt, b́en yu' xanyabaa, bal id zųjn perdon lasa'di con guidib luxdoodi ni rųjnně reeman lęjt.

19

Ruliüü Jesús xcwent guial rala' lasa'

(Mr. 10:1-12; Lc. 16:18)

¹ Chi gulox gunees Jesús zian, bazaman niz Galilea, zěman niz Judea, niz stiblad ro' guiiw Jordán. ² Zien ree bejn binal laaman, yagaj bayųjnman b́enragxuu ree.

³ Abi' tio'p choon ree b́enfarisew bibig loj Jesús, dxel par güün reeman laaman prueb, gunabdiidx reeman lojman ŕeb reeman:

—¿Zile' yala' bejn lacheelaman por xhiedxitzinin ya?

⁴ Badxi' Jesúsán ŕebaman:

—¿Nid wayoolidi loj xtiidx Dios ya, guial diizd guia'xchej Dios “been xinguaaw nę bęgunaa”? ⁵ Rěb těěman: “Zeel xinguaaw gusa'n xdad xniaax din guibanně lacheelix, dxel grop reex ma gac zi'c tijbzi bejn.” ⁶ Zianan zeel ad najtri reex tio'p, ma naj reex tijbzi. Zeel bęnguidxliuj ad rayalt yala'man lasa' ni ma bachajg Dios.

⁷ Dxel ŕeb ree b́enfarisew guin loj Jesús:

—¿Chexquiza zeel ŕeb Moisejs guial zile' yala' lacheel bejn, con guděedaman gui'ch guial ma bala' lasa' reeman?

⁸ Badxi' Jesúsán, ŕebaman:

—Cwějb Moisejs gojx zian guial ad rěntidi guzoobidi diidx, per ad ziant gojx diizd guia'xchej. ⁹ Naj rni lojdi. Xin yala' lacheel, bal id za'ně lacheelix xin ren, abi' tia'x ben ren dolan cayųjnx. Ziangajc xin tia' b́en qui bala'ri lasa' guin dolan cayųjnx.

¹⁰ Dxel ŕeb ree xbejn Jesús lojman:

—Bal zian naj xcwent guial ru lacheel, zagdxeli ad zut lacheel bejn

¹¹ Badxi' Jesúsán ŕebaman:

—Ad grat bejn zile' chignia' ni canin, b́en ca'zi ree quiarguejn par chignia' reeman laan. ¹² Yu' bejn diizd rajlaman ad zěědtaman loj guidxliuj par guxhliaaman, yu'za reeman, bejn rųjn laa reeman zian. Abi' yu' reeman rųjn xgab guial zagdxeli guitie'ch reeman xtiidx Dios luar guxhliaa reeman. B́en rěn chignia', gol bignia'.

Rųjnle' Jesús xindoo ree

(Mr. 10:13-16; Lc. 18:15-17)

¹³ Bině ree bejn xindoo ree lod za' Jesús, din guixhioob yaaman guijc reex cwedx guiniab těěman Dios por laa reex, per ree xbejnman guzuloj cadilě reeman b́en zině ree laa reex. ¹⁴ Dxel ŕeb Jesús loj reeman:

—Gol baslaa gui't reex lon, ad bal rudxoondi, din lod rniabee Dios naj par ree bén naj zi'c laa reex.

¹⁵ Abi' guxhoob yaa Jesús guijc ree xindo guin, dxel ziaman.

Tijb xinrijcw

(Mr. 10:17-31; Lc. 18:18-30)

¹⁶ Bidxin tijb xin guin loj Jesús, abi' gunabdiidxix lojman, rëbix:

—Mextr, ¿xhie ni zagdxe günan din ga'pan guialnaban tiblyaaa con Dios?

¹⁷ Dxel rëb Jesús lojx:

—¿Chexc zeel rniabdiidxil lon conin naj ni zagdxe? Achut naj benza'c, tijbzi Dios. Per bal rënl gapil guialnaban tiblyaaa con Dios, been zi'c rëb ree mandamient.

¹⁸ Dxel gunabdiidxix loj Jesús rëbix:

—¿Con ree mandamientan?

Badxi' Jesúsán, rëbaman:

—Ad gugüjtil bejn, ad sunël lacheel ben ren, ad cwanl, ad cwëël xtiidx bejn, ¹⁹ gojp respejt xdad xniaal, guyën tëe ree lasa'l zi'c rën lüj gajc.

²⁰ Dxel rëbix:

—Gra ree ni guin cayünan diizd najn xindoo, ¿xhieri ryaadx günan yan?

²¹ Badxi' Jesúsán, rëbaman:

—Bal rënl gaquil benza'c loj Dios, bigto' gra ni rajpil dxel gudëel milia guin loj ree bénprob. Zian gapil guialnaza'c xanyabaa. Zianz guidnalil naj.

²² Chi biguiejn xin guin zian, dád guyu nayax ziax, guial dád xinri-jcwan.

²³ Dxel rëb Jesús loj ree xbejnman:

—Diidxliczi rnin lojdi: Dád nawëëg chu' benrijcw lod rniabee Dios.

²⁴ Naj rni lëjt. Adli nawëëgt téd tijb camell xan gagux, guial chu' tijb benrijcw lod rniabee Dios.

²⁵ Chi biguiejn ree xbejn Jesús zian, dád badxaloj reeman, abi' rëb reeman:

—¿Chuza zajc gac perdon loj Dios?

²⁶ Dxel baguiaa Jesús loj reeman, rëbaman:

—Nawëëg gac zian par bénguidxliuj, per par Dios achet ni nawëëg yu'.

²⁷ Abi' rëb Bëd lojman:

—Ma basa'nán graczi ni raya'pan, persi zudnaalan lüj. Abi' ¿xhieza yayalan?

²⁸ Badxi' Jesúsán, rëbaman:

—Diidxliczi rnin lojdi chi guidxin dxej yacüb gra, guidxin tëe dxej cwe Bén guxhaal Dios luar lod nabeeman, në lëjt, guial zidnalidi naj, cwedi loj chiptio'p ree luar lod nabeedi, din güün xguialguxtisidi loj guidxiptio'p ree xdiaa Israel. ²⁹ Abi' gra ree bén basa'n lidx, bijch, bizan, xdad, xniaa, xi'n, o guidxliuj ree por naj, zaca' reeman tibgayuu volt mazri guial loj ni basa'n reeman, zajp tëe reeman guialnaban tiblyaaa con Dios. ³⁰ Per zien ree bén naj bén yaloj, gac reeman bén bigra, abi' zienza ree bén naj bén bigra, gac reeman bén yaloj.

20

Xcwent ree bén rüjn dxin

¹ Rëb tëe Jesús:

—Xguialrniabee Dios naj zi'c tijb Bén rajp tijb guiniaaro', rsildoo briiman zitiilaman mojs güün dxiin loj xguiniaaman. ² Baya'nnëman laa reeman diidx plac quixaman tijb gaj reeman tibdxej, dxel guxhaalaman laa reeman loj xguiniaaman. ³ Dxel briiman stijb cost raca gaa rsil, abi' baguiaaman ben ren ree za' reeman galay luguiedx, achet xchiin reeman. ⁴ Zianz rëbaman loj reeman: “Gol biguieen dxiin loj da guiniaan, naj gaguix lëjt zi'c rayal.” Dxel zë reeman. ⁵ Cost garol dxej briiman stijb, abi' briei gajman cost raca choon wadxe ziangajc rëbaman loj ree Bén riga' yagaj, Bén achet xchiin. ⁶ Cost raca gaay wadxe wejman galay luguiedx guin stijb, abi' bidxaaglojman ben ren ree, Bén achet ree xchiin, gunabdiidxaman loj reeman, rëbaman: “¿Chexc zeel za'di guin gudëdchej ad cayüjntidi dxiin?” ⁷ Badxi' reeman laan rëb reeman: “Achut wanee dxiin yaguieenan.” Dxel rëbaman loj reeman: “Në lëjt gol biguieen dxiin loj da guiniaan naj gaguix lëjt zi'c rayal.” ⁸ Chi ma gurej guiaal, rëb Bén naj xguiniaan loj Bén naaz dxiin guin: “Gurejdx ree mojs guin din quixil laa reeman, per yalojxgaj gudijx ree Bén bigra guyu, zianz quixil Bén guyu ree yaloj.” ⁹ Chi bidxin ree Bén guyu loj dxiin guin raca gaay wadxe, gojx tijbgaj reeman xieen tibdxej. ¹⁰ Dxel chi bidxin ree Bén guyu loj dxiin diizd rsil, gunaladx reeman niajx reeman mazri, per nëgajc reeman gojx xieen tibdxej. ¹¹ Abi' chi cayajx reeman, guzuloj cadxe'ch reeman Bén naj xguiniaa laan, ¹² rëb reeman lojman: “Bén bigra guyu ree, been reeman dxiin tib horzi abi' zi'cgajc caguijxil dunujn gudijxil laa reeman, abi' dunujn badaanan baguieenan dxiin dëchej loj guialnalaa.” ¹³ Per rëb Bén guin loj tijb reeman: “Achet ni mal cayünan lüj. ¿Nid baya'n diidx ya plac gunen tia'l tibdxej?” ¹⁴ Cwa' ni bayalil baguij. Din naj rënan gaguixan Bén bigratë guyu zi'c gudixan lüj, ¹⁵ zajc günnë' da milian ni rëntzan. ¿O nadëdloj ya guial najn benza'c?” ¹⁶ Zianan zeel Bén naj ree Bén bigra gac reeman Bén yaloj, guiaad ree Bén yaloj gac reeman Bén bigra.

Bayon volt bagojn Jesús guial guiëtaman

(Mr. 10:32-34; Lc. 18:31-34)

¹⁷ Chi zë Jesús Jerusalén, gurejdx guidxiptio'p ree xbejnman tiblax, rëbaman loj reeman:

¹⁸ —Ganin lëjt, ziyo' ree Jerusalén, lod yayü reeman Bén guxhaal Dios, loj ree bixhioz rniabee ree bixhioz në loj ree mextr rajc ley, abi' laa reeman nabee guiëtaman, ¹⁹ yayü reeman laaman loj ree benzit, din guze' reeman laaman quïn tëë reeman laaman, abi' gucaa reeman laaman loj crüzj, per yayon dxej yabanman.

Ni gunab xniala Jacob con Waj

(Mr. 10:35-45)

²⁰ Gubig lacheel Zebedeo loj Jesús con grop ree xi'nman, bazuxibaman lojman din guiniabaman ni rënman. ²¹ Gunabdiidx Jesús lojman, rëbaman:

—¿Xhie rën!

Badxi' Bén guinan, rëbaman:

—Rënan nabeel cwe tijb da xi'nax xladbeel, stijbim xladruvejsil, chi ma canabeel.

²² Dxel rëb Jesús:

—Ad ragbeetidi ni rniabidi. ¿Wen zajc tädidi guialzi zi'c naj ni gadëëdan ya?

Badxi' reeman laan, rëb reeman:

—Zayajcan.

²³ Abi' rëbaman:

—Diidxiczi rnin zajc tēdidi gualzi zi'c naj ni gadēedan, per gual cwedi da ladbeen o da ladruvejsan ya ad najt rayal ganabee, din ma najn par ree bēn bacaabee da Dadan.

²⁴ Chi biguiejn zachii ree xbejn Jesús zian dād balen reeman grop bijch reeman. ²⁵ Per gurejdx Jesús laa reeman, rëbaman:

—Lējt ragbee, bēn rniabee ree loj guidxliuj, rniabee reeman bejn ree zi'ctzi rēn reeman, guiáad ree bēn zojbloj rüjnnē reeman bejn ree zi'ctzi rēn reeman por gualrniabee ni rajp reeman. ²⁶ Per con lējt ad rayalt gac zian. Bal chu rēn gac bēn rniabee lojdi, rayal güünman sirv lojdi.

²⁷ Ziangajc bēn rēn gac bēn zojbloj lojdi, rayal güünman sirv lojdi zi'c bēn nado'. ²⁸ Zi'c Bēn guxhaal Dios ad bi'ttaman par güün reeman sirv lojman, bi'ttaman par güünman sirv gudēē tēē xguialnabanman din laa zien bejn loj dol.

Rayujn Jesús tio'p ree bēnlutia'p

(Mr. 10:46-52; Lc. 18:35-43)

²⁹ Chi bazaman luguiedx Jericó con ree xbejnman, dād zien ree bejn binal laaman. ³⁰ Dxel tio'p ree bēnlutia'p zojb cwē' nejj chi biguiejn reeman cadēd Jesús niz yagaj, gurixdiaj reeman rëb reeman:

—jDad, xdiaa Davi, baya dunujn!

³¹ Abi' rdilē ree ben guin laa reeman din yacwēēz ro' reeman, per mazri ribixdiaj reeman rëb reeman:

—jDad, xdiaa Davi, baya dunujn!

³² Dxel guzudxe Jesús, gurejdxaman laa reeman, gunabdiidxaman loj reeman, rëbaman:

—¿Xhie rēndi günan por lējt?

³³ Badxi' reeman laan, rëb reeman:

—Dad, rayēnan yaxal du lojn.

³⁴ Dxel baya Jesús laa reeman, abi' baqui'man loj reeman. Loj hor zii baxal loj reeman, dxel binal reeman Jesús.

21

Ru Jesús Jerusalén

(Mr 11:1-11; Lc. 19:28-40; Jn.12 :12-19)

¹ Chi ma cadxin Jesús con ree xbejnman Jerusalén, niz guiedx la Betfagé, gajxh ruguia' Olivos, guxhaal Jesús tio'p ree xbejnman, ² rëbaman loj reeman:

—Golchej guiedx riga' lad ni, ni guidxaaglojdi tijb bur, caduunē xi'nb. Gol guxhiec reeb gol tanē reeb guie. ³ Abi' bal chu xhie na lojdi, gol güjdx gual Dad Jesús cayaadx laa reeb, gandoo yaxhaalaman laa reeb.

⁴ Zian gojc persi gojc cumplid ni gunee bēn badēē xtiidx Dios loj ree bejn, chi rëbaman:

⁵ Gol güjdx loj ree bēn Sión:

“Gol baguiaa laa xreydi zēēd lojdi, ad zēēdtaman nabē, dxiibaman tijb bur, tijb burdoo xi'n tijb be rüü.”

⁶ Dxel wej ree xbejn Jesús abi' been reeman zi'c rëbaman loj reeman, ⁷ binē reeman bur guin con xi'nb, abi' badxiib xab reeman xijch reeb

zianz gudxib Jesús burdo guin. ⁸ Abi' guial zien ree bejn, yu' reeman rguijxh xab lunejz, zien tëë reeman ritü' xidx ree yag persi rguijxh reeman laa reen lod cadëdaman. ⁹ Abi' zi'c ree bën ned zi'c ree bën zidnal laaman, rbixdiaj reeman, rëb reeman:

—¡Benza'c bendxoon naj xdiaa rey Davi! ¡Nüjnle' Dios bën guxhaalaman! ¡Benza'c bendxoon naj Dios bën yu' xanyabaa!

¹⁰ Chi guyu Jesús luguiedx Jerusalén, gra ree bën luguiedx guin badxalaj, abi' riniabdiidx loj lasa' reeman, rëb reeman:

—¿Chu bën guin?

¹¹ Dxel rëb ree benzien guin:

—Laaman naj Jesús, bën rudëë xtiidx Dios loj ree bejn, bën Nazaret guiedx riga' niz Galilea.

Rabëë Jesús bën ruto' ree lën yadoo Jerusalén

(Mr. 11:15-19; Lc. 19:45-48; Jn. 2:13-22)

¹² Chi bidxin Jesús ro' yadooro' Jerusalén, guzuloj caybëëman bën cuto' ree në ree bën cazii. Barexguiataman xmex ree bën cuchaa milia në xmex ree bën cuto' palom. ¹³ Dxel rëb Jesús loj reeman:

—Loj xtiidx Dios rëb: “Lidxan grii laj yu lod rbejdx rniab bejn Dios.” Per lëjt nüjndan zi'c lidx ree xingubaan.

¹⁴ Dxel bénlutia'p ree con ree bencoj bibig reeman loj Jesús lën yadoo guin abi' bayünman laa reeman. ¹⁵ Per chi baguiaa ree bixhioz rniabee ree bixhioz con ree mextr rajc ley milagr cayün Jesús, biguejn tëë reeman rëb ree xindoo lën yadoo guin: “Benza'c bendxoon naj xdiaa rey Davi”, dxel dád bidxe'ch reeman. ¹⁶ Abi' rëb reeman loj Jesús:

—¿Rguiejnl ni canee ree xindo guin ya?

Badxi' Jesúsán, rëbaman:

—Rguiejncan. Per ¿gadidi gool loj xtiidx Dios ya? Lod rëb:

Lüj badëëd ni gool ree xindoo në ree xindobëz sta rë' dud, din guilies reex xvaloril.

¹⁷ Dxel basa'n Jesús laa reeman, zëman Betania ni baya'nman guxhin guin.

Tijb yag higo ni gubidx

(Mr. 11:12-14, 20-26)

¹⁸ Chi bareguiaal rsil la'tgaj zë Jesús Jerusalén stijb, guzuloj gulaanman. ¹⁹ Abi' baguiaaman zobj tijb yag higo cwë' nejz, dxel gubigaman cwë'n, per ganaxzi balag ca lojn. Zianz rëbaman loj yag higo guin:

—¡Ad yu'tri dxej tial higo!

Loj hor guin gajc gubidx yag guin. ²⁰ Chi baguiaa ree xbejnman zian, dád badxalaj reeman abi' gunabdiidx reeman loj Jesús, rëb reeman:

—¿Xhienaag gojc zeel laa gubidx gajc yag higo guin?

²¹ Badxi' Jesúsán, rëbaman:

—Naj rni lojdi, bal rliladxidi Dios abi' ad zunawëëgtidi, ad ni bentzan con yag higo guin zajc güüнди, zajc guiëbidi loj guia' guie: “Biquied guie, bisob loj nijsdoo”, abi' zajc gajc zian. ²² Gra ni guiniabidi loj Dios, bal rliladxidi laaman, zuneeman laan.

Xguialrniabee Jesús

(Mr. 11:27-33; Lc. 20:1-8)

²³ Chi guyu Jesús lèn yadooro' Jerusalén, la'tgaj culüüman bejn ree. Bixhioz rniabee ree bixhioz con ree guxtis Israel, gubig reeman loj Jesús, abi' gunabdiidx reeman, rëb reeman:

—¿Chu na güünl ni guin ree? ¿Chu banee guialrniabee lojl?

²⁴ Badxi' Jesúsán, rëbaman:

—Ziangajc naj yu' tijb ni ganabdiidxan lojdi, bal yadxi'dan dxel ganin lëjt chu banee guialrniabee günan ni guin ree. ²⁵ ¿Chu guxhaal Waj chigroobnijsaman bejn ree, Dios ya o bénguidxliuj?

Dxel guzuloj cayü reeman diidx, rëb reeman:

—Bal yaguie'ch ree, “Dios guxhaal laaman”, zanaman: “¿Chexza zeel ad bililadxtidi laaman?” ²⁶ Abi'za bal yaguie'ch ree: “bénguidxliuj guxhaal laaman”, radxeb ree yalen ree bejn din gra reeman riladx guial Waj naj bën badëéd xtiidx Dios loj ree bejn.

²⁷ Dxel rëb reeman loj Jesús:

—Ad rayagbeetan.

Badxi' Jesúsán, rëbaman:

—Ni'qui naj ad zanitan lojdi chu banee guialrniabee günan ni guin ree.

Tijb bën guyu tio'p xi'n

²⁸ Basnuu Jesús rëbaman loj ree bixhioz rniabee ree bixhioz në loj ree guxtis Israel.

—¿Xhie nadi ni ganin lëjt? Tijb bejn guyu tio'p xi'nman, dxel rëbaman loj tijbix: “Xi'n, wej yandxej biguieen dxiin loj guiniaa yu' uv.” ²⁹ Badxi'xan, rëbix: “Ad zatan.” Per dxelri bayüjnx xgab zianz wejx. ³⁰ Abi' rëbaman loj stijb xi'nman din chex, badxi'xan, rëbix: “Yo dad, gazacan.” Per ad wejtix. ³¹ Yan, ¿chu loj grop reex been ni rën xdad reex?

Badxi' reeman laan, rëb reeman:

—Xin rëbaman loj yaloj guin.

Dxel rëb Jesús loj reeman:

—Diidxliczi rnin, bën ruquijx ree impuest con ree béngunaa naban nadxuudx, yalojl laa reeman chu' lod rniabee Dios guial lojdi. ³² Din bi't Waj, bën baroobnijs bejn ree par gulüüman lëjt xhienaag guibandi, per ad bililadxtidi xtiidxaman. Guiáad ree bën ruquijx impuest con ree béngunaa naban nadxuudx, bililadx reeman xtiidxaman. Per lëjt majsi baguiaadi gra ree ni guin, ad bayüjntidi xgab por xtolidi din nililadxiidi laaman.

Xcwent ree mojs guiidx

(Mr. 12:1-12; Lc. 20:9-19)

³³ Rëb tée Jesús loj reeman:

—Yan, gol bacaagdiaj ganin lëjt stijb ni naj zi'c cwent. Guyu tijb bejn guxübinman uv ree loj xguiniaaman, dxel beenman gurajl gadëd ro'n, beenchaaw tëëman tijb luar lod grii xnijs uv guin, abi' bazoobaman tijb yu ya da't din guiya'p guidib guiniaa guin.

'Zianz badëëdaman laan garol loj ree bën güün dxiin lojn, zëtaman zijt. ³⁴ Chi bidxin dxej yaru' ree uv guin, guxhaalaman tio'p choon ree xmojsaman chigxii reeman ni rayalaman. ³⁵ Per ree bën rüjn dxiin loj guiniaa guin gunaaz reeman mojs guin ree. Tijbaman gudijn reeman, stijbaman bagüjt reeman, stijbaman bacaaguaaj reeman. ³⁶ Dxel bën naj xguiniaan guxhaalaman mazri ree mojs guial loj ree bën we yaloj, per ziangajc beennë ree bën guin laa reeman.

³⁷ 'Ni bigra, guxhaal xi'nman guial gunaladxaman: "Zajpqui reeman da xi'nan respejt." ³⁸ Per chi baguiaa ree bèn guin xi'nman, rëb loj lasa' reeman: "Xin guinan naj xin tia' guidxliuj guin, yagüjt reex din gacan du xieen ree." ³⁹ Abi' gunaaz reeman laax, babëë reeman laax loj guiniaa guin dxel bagüjt reeman laax.

⁴⁰ Dxel gunabdiidx Jesús loj ree bèn caneenëman, rëbaman:

—Chi yadxin bèn naj xguidxliuj laan, ¿xhie naladxidi güünnëman bèn guin ree?

⁴¹ Abi' rëb reeman loj Jesús:

—Ad zayataman gugüjtaman bèn guin ree, dxel gudëëman guidxliuj guin garol loj ree ben ren, bèn yayü ni rayalaman chi guidxin dxej yaru' ree uv guin.

⁴² Dxel rëb Jesús loj reeman:

—¿Id wayolczidi loj xtiidx Dios ya? Lod rëb:

Guiaj ni gulëëgo'n ree bèn rüjn yu.

Laan goc ni mazri been sirv gojcnë yu guin.

Laan naj ni been Dios,

abi' dád radxa du loj ree.

⁴³ Zeel rnin lojdi, zarijadi loj xguialrniabee Dios abi' ben ren ree yayu xluaridi, bèn wali ree güün zi'c rënman. ⁴⁴ Abi' chutëöz bèn yab guiyc guiäj guin, zarooxaman, guiáad bal yab guiäj guin guiycaman zanidlojman.

⁴⁵ Chi biguiejn ree bixhioz rniabee ree bixhioz con ree bënfarisew guin ni cayü Jesús zi'c cwent, dxel gogbee reeman guial laa reeman cuza'taman. ⁴⁶ Abi' guyën reeman niniaaz reeman laaman, per bidxeb reeman bejn ree guial riladx reeman laaman naj bèn rudëed xtiidx Dios loj ree bejn.

22

Xcwent guialruxhliaa

¹ Basnuu Jesús beman zi'c cwent loj reeman rëbaman:

² —Xguialrniabee Dios naj zi'c tijb rey bèn been lanijro' chi baxhliaa xi'nman. ³ Abi' guxhaalaman mojs ree bignee reeman biooz ree, per biooz guin ree ad guyënt reeman niej reeman. ⁴ Dxel guxhaalaman mojs ren ree, rëbaman loj reeman: "Gol güjdx loj ree biooz guin ma naj guialraw, ma gunabeen güjt ree da go'nan në ree beren, bero' ree. Ma najcchaaw graczi, gol güjdx loj reeman din gui't reeman loj guialruxhliaa guin." ⁵ Per biooz guin ree ad bidxga't reeman xtiidx rey guin, yu' reeman zë loj xguiniaa, yu' reeman zë xmandad, ⁶ yu' tëë reeman gunaaz mojs guin ree gudijn reeman laa reeman abi' bagüjt reeman laa reeman. ⁷ Chi gogbee rey guin zian, dád bidxe'chaman. Guxhaalaman bèn naj ree xsuldadaman persi bagüjt reeman bèn guin ree baze'c tëë reeman lidx reeman. ⁸ Dxel rëbaman loj ree xmojsaman: "Graczi ma najcchaaw par loj guialruxhliaa guin, per ree bèn gunen ad najt guial ni't reeman. ⁹ Yan, gol wej lod radxaag lasa' ree nejz, gol güjdx loj ree bèn guidxaalojtzidi din gui't reeman loj guialruxhliaa guin." ¹⁰ Abi' brii ree mojs guin wej reeman lunejz guin ree, bato'p reeman gra ree bèn bidxaalojtzidi reeman, zi'c ree benmal zi'c ree benza'c, zian gudxa ree biooz lidx rey guin.

¹¹ 'Per chi guyu rey guin din guguaaman biooz guin ree, baguiaaman tijb bèn ad najcwt xab ni rayal gacwaman loj guialruxhliaa guin. ¹² Abi' rëb rey guin lojman: "Laadx lüj, ¿xhienaag beenl guyul guie abi' ad najcwt

xabil ni rayal gacwil loj guialruxhliaa?" Dxel achet badxejl niëjb bén guin. ¹³Zianz rëb rey guin loj ree bén cagui's guialraw: "Gol guxhii guia'x në yaax, gol bazaal tēëx xchu lod nacay da't lod goonx gaw tēë layix." ¹⁴Din zien ree bejn rdxejl, per ad grataman chu'.

¿Rayal gax impuest ya?

(Mr. 12:13-17; Lc. 20:19-26)

¹⁵Dxel baza ree bénfarisew yagaj, abi' baya'n reeman diidx xhie guiniabdiidx reeman loj Jesús din guidoon xhie guiëbaman, zian chile' gutedia' reeman laaman. ¹⁶Abi' guxhaal ree xbejn reeman con ree xbejn Herodes, rëb reeman lojman:

—Mextr, dunujn rayagbee guial lüj rniece diidxli, abi' walil rulüül guial xhienaag rën Dios guiban bejn, ad ridxga' tēëtli chu naj bejn. Din lojl tiblojzi naj bejn. ¹⁷Guna du lojn: ¿Zagdxen ya yadijxan impuest loj César o ad zagdxetan ya?

¹⁸Per gogbee gajc Jesús xgabmal ni cayüjn reeman, abi' rëbaman loj reeman:

—Bén rusquiee, ¿chexc zeel raguillidi mod xhienaag gutidia'di naj? ¹⁹Gol balüü tijb cintabl lon ni rguijxnëdi impuest.

Dxel badëed reeman tijban lojman, ²⁰abi' gunabdiidx Jesús loj reeman, rëbaman:

—¿Chu loj ca lojn chu tēë laj ca lojn?

²¹Badxi' reeman laan, rëb reeman:

—Laj César në lojman.

Dxel rëbaman:

—Gol badëed loj César ni naj xieen César, guiáad loj Dios gol badëed ni naj xieen Dios.

²²Chi biguiejn reeman zian, dád badxaløj reeman, dxel basa'n reeman laaman, zianz zia reeman.

Gunabdiidx reeman xcwent guial yaban ree bengüt

(Mr. 12:18-27; Lc. 20:27-40)

²³Dxejzii gajc tio'p choon ree bénsadusew wej reeman bignaj reeman Jesús, bénsadusew guin ree ad riladxt reeman guial yaban ree bengüt, zeel rëb reeman loj Jesús:

²⁴—Mextr, Moisejs rëb guial bal guiët tijb xinguaaaw abi' achut xi'n reex guyu con lacheelix, bijch xingüt guin guxhliaanë béngunaa bizëjb guin din chu' xi'n reex luar bijchix. ²⁵Du lojn guyu tijb famil lod gojc reex gajdx bijch. Baxhliaa xin yaløj guin, per güjtix abi' guial ad guyut xi'nx, dxel bijch barojpax baxhliaanë béngunaa guin. ²⁶Per ziangajc guzajc xin barojp guin abi' ziangajc guzajc xin bayon guin, xt bagajdx reex guzajc zian. ²⁷Chi bara reex güjt dxel güjt béngunaa guin. ²⁸Yan, chi yaban ree bengüt, loj guigajdx reex, ¿chu gac xbéngunaa laaman guial gra reex baxhliaanë laaman?

²⁹Badxi' Jesús, rëbaman:

—¡Ragdxadi guial ad nünbeetidi xtiidx Dios ad nünbee tēëtidi xhienaag naj xguialrniabeeman! ³⁰Din chi yaban ree bengüt, ad zuxhliatri reeman ad zudëed tēëtri xi'n reeman guxhliaa, ma gac reeman zi'c ree anjl yu' xanyabaa. ³¹Abi' xcwent ni yaban ree bengüt, ¿gadidi gool ya lod ca guial Dios gajc rëb: ³²"Naj naj xDios Abraham, xDios Isaac në xDios Jacob"? Abi' Dios ad najtaman xDios ree bengüt, najman xDios ree Bén naban.

³³ Chi biguiejn ree bejn zian, dád badxaloy reeman zi'c rulüüman laa reeman.

Mandamient mazri zobjloy

(Mr. 12:28-34)

³⁴ Chi gogbee ree bénfarisew guial achet badxejl niëjb ree bénsadusew loj Jesús, dxel baya'n reeman diidx badxaag lasa' reeman. ³⁵ Abi' tijb ree bénfarisew guin, bén naj mextr rajc ley, gunabdiidxaman loj Jesús din guidoon xhie guiëbaman, rëbaman:

³⁶ —Mextr, ¿con mandamientan mazri zobjloy loj gra ree mandamient ni zëed loj ley?

³⁷ Badxi' Jesúsán rëbaman:

—“Guyën xDadil Dios guidiblagaa guidib guijc guidib ladxil.” ³⁸ Laan naj mandamient mazri zobjloy. ³⁹ Ziangajc naj mandamient rarojp ni rëb: “Guyën ree bejn zi'c rën lüj gajc.” ⁴⁰ Con grop ree mandamient guie, ma cayüjn bejn cumplid gra ley bacaa Moisejs në ree ni bacaa ree bén badëe xtiidx Dios loj ree bejn.

Chu loj xdiaa za Cristo

(Mr. 12:35-37; Lc. 20:41-44)

⁴¹ La'tgaj nadxag lasa' ree bénfarisew guin, gunabdiidx Jesús loj reeman, rëbaman:

⁴² —¿Xhie xgab rüjndi por Cristo? ¿Chu loj xdiaa zaman?

Badxi' reeman laan rëb reeman:

—Loj xdiaa Davi.

⁴³ Dxel rëb Jesús loj reeman:

—Per, ¿chexquiza zeel por xSprijt Dios rëb Davi lojman, Dad? Din Davi rëb:

⁴⁴ Dios rëb loj bén rniabee naj:

“Gurej da ladbeen, xt gabecan xin rdxe'ch ree lüj guia'l.”

⁴⁵ Yan, bal xi'n Davi naj Cristo, ¿chexquiza zeel rëb Davi lojman Dad?

⁴⁶ Achutdzi gojc nadxi' xtiidx Jesús, ni'czi tijb diidx. Abi' diizd dxejzii achutdzi bayax niniabdiidx xhienin lojman.

23

Ni rüjn ree mextr rajc ley në ree bénfarisew

(Mr. 12:38-40; Lc. 11:37-54; 20:45-47)

¹ Rëb Jesús loj ree bejn në loj ree xbejnman:

² —Mextr rajc ree ley con ree bénfarisew rulüü reeman xhie rën guiëb ni ca loj xley Moisejs. ³ Zeel gol bazoob xtiidx reeman, gol been tëë gra ni na reeman lojdi, per ad güündi zi'c rüjn reeman, din laa reeman ni ren na reeman abi' ni ren rüjn reeman. ⁴ Rniabee reeman güün bejn ni nawëëg da't, per rniabeezi reeman güün bejn zian, guiáad laa reeman ni'qui ta'n ad rüjnt reeman bejn yudar din güün reeman zi'c rën reeman. ⁵ Gra ni rüjn reeman, rüjn reeman laan din yadxaloy bejn laa reeman. Ruladx reeman guixhii lucwaj reeman në xu'c reeman tijb cint ni ca xtiidx Dios loj, ruladx tëë reeman gacw reeman lajd zagdxe. ⁶ Ruladx reeman cwe reeman lod rayal rbej ree bén zobjloy, loj tijb guialraw, abi' ziangajc rüjn reeman lën ree yadoo. ⁷ Ruladx tëë reeman gugajpdioz bejn laa reeman zagdxe niz lunejz guiëb tëë reeman loj reeman mextr.

8' Per lëjt ad sëëbladxidi guiniee bejn lëjt mextr, din tijbzi naj gradi, tijbzi mextr rajpidi abi' laaman naj Cristo. 9 Ni'qui tijb loj bénguidxliuj, bën ad najt xdadidi, ad guiëbidi dad, din tijbzi xdadidi yu', laaman yu' xanyabaa. 10 Ad güün tëëdi naguiejn yayagbee ree bejn lëjt zi'c bën rniabee, din tijbzi bën rniabee yu', laaman naj Cristo. 11 Bën mazri zojbloj lojdi, laaman rayal güün sirv lojdi. 12 Din bën rlies xvalor gajc achet lasajcaman. Guiáad bën rüjn naya, zajs xvaloraman.

13' ¡Probza lëjt mextr rajc ley në lëjt bënfarisew, bën rusquiee!, ad rtiëjbtidi gagbee ree bejn xhienaag din gac reeman xbejn Dios, ni'quiza lëjt ad rüjntidi naguiejn gaquidi xbejn Dios, abi' rudxoondi gac xbejn Dios bën rën ree gac xbejnman.

14' ¡Probza lëjt mextr rajc ley në lëjt bënfarisew, bën rusquiee!, din raca'di lidx ree béngunaa bizëjb, abi' din guiëb bejn guial benza'c lëjt dáad xchej rbejdx rniabidi Dios. Zeel mazri castiro' yayalidi.

15' ¡Probza lëjt mextr rajc ley në lëjt bënfarisew, bën rusquiee!, zizadi guidibdoo rguilidi bën gac ree xbejn, abi' chi ma beendi gan tijbaman al mazri xi'n xindxab rüjndi laaman guial lojdi.

16' ¡Probza lëjt, bénlutia'p!, rëbidi: “Achet güünan bal id züjn bejn ni guneeman, majsi ma baza'taman yadooro' Jerusalén, per bal guza'taman ni or yu' ree lën yadoo guin, dxel ma rüjn naguiejn güünman ni guneeman.” 17 ¡Natontidi, wed natia'p lojdi! ¿Conin mazri lasajc: Or guin ya o yadoo beenle' or guin? 18 Rëb tëëdi: “Achet güünan bal id züjn bejn ni guneeman majsi ma baza'taman xialtar yadoo guin, per bal guza'taman gon dxiib loj altar guin, rüjn naguiejn güünman ni guneeman.” 19 ¡Bénlutia'p! ¿Conin mazri lasajc par lëjt: Gon guin ya o altar beenle' gon guin? 20 Bën ruza't altar guin ad altar guintzan ruza'taman, nëgajc gra ni dxiib lojn ruza'taman. 21 Guiáad bën ruza't yadoo guin, ad yadoo guintzan ruza'taman, Diosan ruza'taman din lidxaman naj yadoo guin. 22 Abi' bën ruza't xanyabaa, Diosan ruza'taman në lod zojbaman.

23' ¡Probza lëjt mextr rajc ley në lëjt bënfarisew, bën rusquiee!, rbëëcadi bidxtil, anís nëtëë comin ni rayal gudëëdi loj Dios, abi' ad ruzoobtidi xley Moisejs ni mazri zojbloj, ad rüjntidi zi'c rayal, ad rayat lasa'di, ad za'dxi'ch tëëtidi loj xnejz Dios. Laa reen rayal güündi, per ad cwëëladxidi gudëëdi ni rayal loj Dios. 24 ¡Bénlutia'p, rajpidi cudad chitëë guiëbidi tijb bizëdlajs, abi' rguiejbidi tijb camell!

25' ¡Probza lëjt mextr rajc ley në lëjt bënfarisew, bën rusquiee!, rusiadi xijch ree vajs në xijch ree pliajt naj nadxuudx, guiáad luxdoodi guidxa ni dxuudx, në guialgubaaan nëtëë guialrdxe'ch lasa'. 26 ¡Bënfarisew lutia'p: Yalojxgaj gol basia, zian guiguien waliquidi nayadi loj Dios!

27' ¡Probza lëjt mextr rajc ley në lëjt bënfarisew, bën rusquiee!, najdi zi'c baa nayë' culor naquich, guijcan rguien nix da't, per lënan guidxa ree xdxijt bengüt në graloj ree ni dxuudx. 28 Zian najdi, niz loj ree bejn, rulüüdi benza'c, per luxdoodi guidxa guialrusquiee në guialnaladx.

29' ¡Probza lëjt mextr rajc ley në lëjt bënfarisew, bën rusquiee!, rüjndi xbaa ree bën badëë xtiidx Dios loj ree bejn, abi' rüjnchaawidi xbaa ree bën goc benza'c, 30 dxel rëbidi: “Bal nabajnan xtiamp ree dux béngulalan, ad nët dunujn nagüjt bën badëë ree xtiidx Dios loj ree bejn.” 31 Abi' con ni guin ree, rayünbeegajquidi guial loj xdiaa bën bagüjt ree bën badëë xtiidx Dios loj ree bejn zëëdidi. 32 ¡Gol baloozza ni guzuloj been xbéngulalidi!

³³ ¡Béndol, xi'n xindxab! ¿Xhienaag laadi loj castiro' ni yu' gabijl? ³⁴ Zeel gaxhalan lojdi b́en gudēē ree xtiidx Dios, b́en rajc ree nē ree mextr. Per yu' reeman gugūjtidi, yu' reeman gucaadi loj crūjz, yu' tēē reeman quindi lēn ree xyadoodi abi' sunalidi laa reeman guiedx por guiedx din gūūndi laa reeman xhienin. ³⁵ Zianan zeel guijquidi yab xtol gra ree b́en bagūjt b́en goc ree benza'c diizd Abel b́en guban xnejz loj Dios xt Zacarías xi'n Berequías, b́en bagūjt reeman lule' yadooro' Jerusalén. ³⁶ Diidxliczi rnin lējt, xcasti gra ree ni guin yab guijc ree b́en riga' loj guidxliuj yan.

Roon Jesús por Jerusalén

(Lc. 13:34-35)

³⁷ Rēb tēē Jesús:

— ¡B́en Jerusalén, b́en Jerusalén, rugūjtidi b́en rudēē ree xtiidx Dios loj ree bejn abi' rucaaguiajdi b́en rxhiaal Dios lojdi! ¡B́elczi volt guyēnan nuchagan lasa'di, zi'c rūjn tijb guid ruchajg lasa' ree xi'nb lēn xhiilib, per ad gutiējbtidi! ³⁸ Zianan zeel yaya'n ladxidi zi'c tijb guiedx lod achut zojb. ³⁹ Abi' rnin lējt diizd yan ad zuguaatrudi naj, xt chi guidxin dxej guiēbidi: “¡Nūjnle' Dios b́en guxhaalaman!”

24

Rēb Jesús guial yaze'n yadooro'

(Mr. 13:1-2; Lc. 21:5-6)

¹ Chi barii Jesús lēn yadooro' Jerusalén, ziaman, bibig ree xbejnman lojman balūū reeman gra ree xyu yadoo guin lojman. ² Abi' rēb Jesús loj reeman:

— Diidxliczi rnin, gra ni cuguiaadi yu' dxej ni'qui tijb guiaj guin ad zaya'nt guijc stijban, gran yaze'n.

Ni gac chi gad guidxliuj nit

(Mr. 13:3-23; Lc. 21:7-24; 17:22-24)

³ La'tgaj zojb Jesús guijc guia' la Olivos, gubig ree xbejnman lojman, rēb reeman:

— Rayēnan nal goc gac zian. ¿Xhie ree sen gac chi ma zidyob gui'til stijb, nē chi ma zidyob nit guidxliuj?

⁴ Dxel rēb Jesús loj reeman:

— Gol gojp cudad achu gusquiee lējt. ⁵ Din zien ree bejn gui't guiēb reeman guial por naj zēēd reeman, guiēb tēē reeman: “Naj naj Cristo”, abi' zien bejn gusquiee reeman. ⁶ Per lējt chi guiguiejndi cayajc wadijl o zēēb diidx guial gac wadijl, ad guidxebidi din zian naj gac. Per ad wadxint dxej nit guidxliuj. ⁷ Din til nacion con stijb nacion, nē b́en rajp guialrniabee con stijb b́en rajp guialrniabee. Abi' gui't xudoxh nē gubijn niz ni niz guie. ⁸ Gra ree nine ree gac chi ma suloj gualzi guin.

⁹ Dxel yayū ree bejn lējt loj ree b́en gusagzi lējt, gugūjt reeman lējt, abi' gra ree b́enguidxliuj guidxe'ch lējt guial najdi da bejnan. ¹⁰ Chi gac zian zien ree bejn gusa'n guialrliladx reeman naj, guidxe'ch lasa' reeman abi' yayū lasa' reeman loj ree b́en ralen laa reeman. ¹¹ Gui't tēē zien ree b́en gusquiee, guiēb reeman guial rudēēd reeman xtiidx Dios, abi' zien bejn gusquiee reeman. ¹² Abi' guial dád zien ni mal gac, zien da't b́en ad zēntri ree lasa'. ¹³ Per b́en sudxi'ch loj guialrliladxaman naj, xt dxej chigra guibanman, laaman yayal xanyabaa. ¹⁴ Abi' xtiidx Dios ni canin lējt yan guire'chan guidibczi guidxliuj din gagbee gra bejnan, dxelri nit guidxliuj.

15 'Zianan zeel chi guguaadi zobj tijb ni dxuudx, ni ad rüjnt sirv lën yadooro' Jerusalén, zi'c gunee Daniel bën badëë xtiidx Dios loj ree bejn (bën gool gui'ch guie ree, gol bignia'), 16 guial bën zobj ree Judea rayal guxüün reeman che reeman dajn. 17 Guiáad ree bën yé'p guijc yulidx dxejzii, ad yayu lënülix reeman par tia' xhie xieen reeman. 18 Abi' ree bën za' dajn, ad yayejc reeman chigxii xab reeman. 19 ¡Proba ree béngunaa nüü xi'n o bën ca' ree xindobëz lën ree dxejzii! 20 Gol gurejdx gunab Dios chitëë gac zian tiamp nayaag o dxej raziiladx ree bejn ya. 21 Din nadxel dád gualziro' chu', zi'c ad wayajctczi diizd guia'xchej chi gad guidxliuj gacchaaw ad yu' tēët dxej gac zian. 22 Abi' bal id Dios gucwēëz gualzi chu' lën ree dxej guin, ni'qui tijb bejn ad zalaat, per gucwēëzaman laa reen por ree bën guleman.

23 'Lën ree dxejzii bal chu na lojdi: “Gol baguiaa, laa Cristo za' guie”, o “Gol baguiaa laaman za' ni”, ad bal chililadxidi. 24 Din zi't zien ree bën gusquiee na guial laa reeman naj bën guxhaal Dios o na reeman guial laa reeman naj bën rudëëd xtiidx Dios. Abi' züjn reeman milagr ree në graloj ni yadxaloj bejn din gusquiee reeman laa reeman, abi' bal zile'n xt në ree bën gulej Dios gusquiee reeman. 25 Ma rni xgajn lojdi ni gac. 26 Zeel bal chu na lojdi: “Laa Cristo yu' lënü ni”, ad bal chililadxidi. 27 Din zi'c chi rë'p nijs, abi' rulaan bacha' niz lod rliejn gubijdx xt lod rëëzan, ziangajc gac dxej gui't Bën guxhaal Dios stijb. 28 Bën rliiladx ree naj gui't reeman lon, zi'c chi rado'p ree golbich lod naga' tijb begüt.

Gui't Bën guxhaal Dios stijb

(Mr. 13:24-37; Lc. 21:25-33; 17:26-30, 34-36)

29 'Chi ma gudëd ree dxej ni gac ree gualzi guin, guicajy loj gubijdx, ad zusnit bëëw, guiyajb ree bajl xanyabaa abi' gra ree ni yu' xanyabaa guiniib. 30 Dxel guiguien tijb sen xanyabaa guial ma gui't Bën guxhaal Dios. Abi' gra ree bénguidxliuj goon da't chi guguaa reeman Bën guxhaal Dios, rdiinman bacha' zëëdaman loj zaj con xgualrniabeeman. 31 Dxel guixhiaal ree xianjlanan, abi' rejs da't gucwejdx reeman trompejt, din yadxajg lasa' ree bën guleman, bën za' ree gralad guidiblagaa guidxliuj.

32 'Yan, gol baguiaa xhienaag rajc con tijb yag higo. Chi ma naquie'n xidxan, chi ma caydxib ree xbalagan, lëjt ragbee guial ma zëëd tiamp nalaa. 33 Ziangajc chi guguaadi ma cayajc ree ni guin, gagbeedi guial ma zidyob gac zi'c rnin lëjt. 34 Diidxliczi rnin lëjt guial gra ree ni guin gac chi gad ree bën naban yan guiët. 35 Guidxliuj në xanyabaa zanijt reen, per da diidxan ad zanijtтан.

36 'Per achut ragbee xhie dxejn në xhie horan gac zian, ni'qui ree anjl yu' xanyabaa, ni'qui Xi'n Dios ad ragbeet. Tijbzi da Dadan Dios ragbee.

37 'Zi'c goc gulal chi guban Noé, zian gac chi yaguaad Bën guxhaal Dios. 38 Din chi gad Dios guixhiaal guiadoxh loj guidxliuj, bejn ree, raw reeman, rë' reeman, ruxhliaa reeman, rudëë tēë xi'n reeman ruxhliaa, xt chi bidxin dxej guyu Noé lën barcwro' ni beenman. 39 Abi' ad bidxgatczi reeman, dxejlczi gol guiadoxh abi' zinë nijs laa reeman, ziangajc gac chi yaguaad Bën guxhaal Dios. 40 Dxej guin, lod za' tio'p ree xinguaaw dajn, tijbix yaza, stijbix yaya'n. 41 Guiáad lod cayojt tio'p ree béngunaa, tijbaman yaza, stijbaman yaya'n.

⁴² 'Zeel gol guzujsin din ad ragbeetidi xhie dxej yaguaaad xDadidi. ⁴³ Gol been xgab, bal tijb bejn ragbee xhie guxhin xhie tëë horan chu' xingubaan lidxaman cwanx, zabejnaaman abi' ad zatiëjbtaman chu' xingubaan guin lidxaman. ⁴⁴ Zianan zeel gol guzujsin, din ad ragbeetidi dxejlczi yaguaaad Bén guxhaal Dios.

Mojs za'c në mojs guiidx
(Lc. 12:41-48)

⁴⁵ 'Çhu lëjt naj zi'c tijb mojs rusa'n xpatronx lidxaman din gulenx gra ree mojs, gudëë tëëx ni gaw reeman chi gal hor? ⁴⁶ Xiquilbaa mojs cayün dxiin zi'c rayal chi yadxin xpatronx. ⁴⁷ Din diidxliczi rnin lëjt, patron guin zusa'n gra xieenman loj mojs guin. ⁴⁸ Per bal naj mojs guin mojs dxuudx, naladix: "Zaglaari da patronan." ⁴⁹ Zianz suloj gusagzix los demazri ree mojs guin, suloj gawix, guië'në tëëx xingu' ree. ⁵⁰ Abi' yadxin xpatronx tijb dxej ni ad ragbeetix ad rbëz tëëtix laaman. ⁵¹ Dxel dád castiro' gudëed patron guin laax, guixhiaal tëëman laax lod rayal ree bén rusquiee, lod goonx gaw tëë layix.

25

Xcwent chii biinxdüb

¹ Basnuu Jesús rëbaman:

—Loj xguialrniabee Dios gac zi'c guzac ree chii biinxdüb we loj tijb guialruxhliaa cwa' tijbgaj xguij reem bilëz reem xin cuxhliaa guin. ² Gaay reem been xgab xhie güün reem, per za gaay reem ad beent xgab. ³ Biin ad beent ree xgab guin binë xguij reem per ad binët reem mazri sejt ni che'cnë ree guij guin. ⁴ Guiáad ree biin been xgab guin xhie güün reem, binë reem za tib lumejtgaj sejt con xguij reem. ⁵ Abi' guial goglaa badxin xinruxhliaa guin, bi't bacaal loj gra reem, abi' goodyëjs reem. ⁶ Cost garol guiaal, biguien cha' tijb bejn rëbaman: "iLaa xinruxhliaa guin ma ziaad, gol tagchaaglojx!" ⁷ Dxel bixche gra ree biinxdüb guin, abi' beenchaaw xguij reem. ⁸ Abi' gaay ree biin ad beent xgab guin xhie güün reem, rëb reem loj za gaay biin been xgab guin: "Gol baneesii tibda'n xsejtidi, din dux guiyn ma cayü' reen." ⁹ Per badxi' reemin rëb reem: "Yajqui, din dool ad zadaantan par lëjt ni'qui par dunujn. Zagdxeli gol wëj lod rdo'n din siidan par lëjt gajc." ¹⁰ Abi' la'tgaj zë reem zisii reem sejt, bidxin xinruxhliaa guin, abi' za gaay ree biin been xgab guin guyunë reem laax loj guialruxhliaa guin dxel bida'cw ro' port. ¹¹ Dxel chi badxin za gaay biin bisii ree sejt guin, rëb reem: "iDad, dad, guxhal din yadxu'n!" ¹² Per badxi'xan rëbix: "Diidxliczi rnin, ad nünbeetan lëjt."

¹³ Dxel basnuu Jesús rëbaman:

—Zeel gol guzusin din ad ragbeetidi goc yaguaaad Bén guxhaal Dios.

Xcwent bén badëed milia

¹⁴ Dxel rëb tëë Jesús:

—Xguialrniabee Dios naj zi'c tijb Bén ma grii cheman zijt, abi' gurejdx ree xmojsaman, basa'n xmiliaman loj reeman. ¹⁵ 'Loj tijbaman badëeman gaay mil cintabl, loj zatijbaman badëeman zatio'p milan, guiáad loj zatijbaman badëeman za timilan. Loj tijbgaj reeman badëedaman ni naladxaman zajc güünnë reeman dxiin, dxel briitaman zëman zijt. ¹⁶ Abi' mojs cwa' gaay mil cintabl guin beennëman laan dxiin abi' beenman gan za ziant gajcan. ¹⁷ Ziangajc been mojs cwa'

tio'p milan, beenman gan za tio'p mil gajcan. ¹⁸ Per mojs cwa' timil cintabl guin bitëenman luyuj persi baquie'chaman cintabl guin ni badëed xpatronman.

¹⁹ 'Gojc xchej da't dxel badxin patron guin abi' babëeman cwent con la reeman. ²⁰ Yaløj bidxin mojs cwa' gaay mil cintabl guin abi' bayüman zagaay milan, rëbaman: "Dad, lüj baneë gaay milan lon, yan, laa za gaay milan guie ni benan gan." ²¹ Dxel rëb patron guin lojman: "Zagdxen, mojsza'c, zagdxe beenl, guial zagdxe beenl con tibda'n ni banen, yan, gunen mazri guial loj ni banen. Guyu, babaa con naj." ²² Zianz bidxin mojs cwa' zatio'p mil cintabl guin rëbaman: "Dad, lüj baneë tio'p milan lon, yan, laa zatio'p milan guie ni benan gan." ²³ Dxel rëb patron guin lojman: "Zagdxen, mojsza'c, zagdxe beenl, guial zagdxe beenl con tibda'n ni banen, yan, gunen mazri guial loj ni banen. Guyu, babaa con naj."

²⁴ 'Per chi bidxin mojs cwa' timil cintabl guin, rëb loj xpatronman: "Dad, naj ragbee guial ad rayatil bejn, rabëel guialnaza'c lod ad rgu'til bin, rato'p tëel guialnaza'c lod ad rtie'chtil bin. ²⁵ Zeel bidxeban abi' biquiechan xmilial lën liuj, yan, laa xmilial guie." ²⁶ Badxi' patron guinan, rëbaman: "Mojs mal, mojs ploj, bal ragbeel rabën guialnaza'c lod ad rgu'tan bin, ratop tëen guialnaza'c lod ad rtiechtan bin. ²⁷ Adil nilu' da milian lën bancw, din chi nagualan naca'nan con xi'nan ni beenan gan." ²⁸ Dxel rëb patron guin loj ree bën za' yagaj: "Gol biquied timil cintabl guin lojx, gol badëedan loj xin rajp chii milan. ²⁹ Din bën rajp zaca'man mazri, abi' gapaman zro' da't, per bën rajp ta'nzi, xt ni rajpaman chiquied lojman. ³⁰ Abi' mojs ad rünjt sirv guin gol bazaalix xchuni lod nacay, lod goonx, lod gaw tée layix."

Xguialguxtis Jesús

³¹ 'Chi gui't Bén guxhaal Dios, gui'taman con xguialrniabeeman, në con gra ree xianjlanan din cweman lod nabeeman. ³² Dxel gra ree bénguidxliuj yado'p lojman, abi' cweman laa reeman zi'c rünj tijb bën rajp xiil chi rabëecaman xiil ree loj ree dxib. ³³ Abi' guzujman bën naj ree xbejnman xladbeeman, gui'ad ree bën ad najt xbejnman guzujman xladruvejsaman. ³⁴ Dxel gui'eb rey guin loj ree bën za' xladbeeman: "Gol guda bën ma nünle' da Dadan. Gol guyu loj guialrniabee najcchaaw par lëjt, diizd chi go'tchaaw guidxliuj. ³⁵ Din chi gulaanan, baneedi ni gudawan, chi we'can nijs, baneedi ni gu'n, chi bizaan zi'c tijb benzit, baneedi lod baya'nan. ³⁶ Chi byaadx da xaban, lëjt baneë ni go'tan, chi gogxuun, bidgatixlojdi naj, abi' chi guyu'n ladxguiib, bidganajdi naj." ³⁷ Dxel gui'eb ree bën za' ladbee guin: "Dad, ¿goc baguiaan lüj rliiaanl, abi' baneen ni gudawil?, ¿o goc baguiaan lüj we'quil nijs, abi' baneen nijs gu'l? ³⁸ ¿Goc baguiaan lüj zizal zi'c tijb benzit, abi' baneen lod baya'nl, o goc biyaadx xabil, abi' baneen ni gotil? ³⁹ ¿Abi' goc baguiaan lüj ragxuul, o guyul ladxguiib, abi' budganajn lüj?" ⁴⁰ Dxel gui'eb rey guin loj reeman: "Diidxliczi rnin lojdi, gra yudar beendi da bejn reen majsi ad najt reeman bën lasajc, najn beendi yudar."

⁴¹ 'Dxel gui'ebaman loj ree bën za' xladruvejsaman: "Gol biquied lon, benmal gol chej loj bajl ni ad yu't dxej yayü' ni ma naj par xindxab në ree xbejnx. ⁴² Din chi gulaanan, ad baneetidi ni niawan, chi we'can nijs, ad baneetidi ni nië'n. ⁴³ Chi bizaan zi'c benzit, ad baneetidi lod

naya'nan, chi biyaadx da xaban, ad baneetidi ni nia'cwan. Abi' chi gogxuun në chi guyu'n ladxguiib, ad bidganajtidi naj.”⁴⁴ Dxel guiëb reeman lojman: “Dad, ¿goc baguiaan lüj rliaanl o re'quil nijs, o zizal zi'c tijb benzit, o goc baguiaan lüj ryaadx xabil, o ragxuul, o yu'l ladxguiib, abi' ad bayidxga'tan lüj?”⁴⁵ Abi' yadxi'man laan guiëbaman: “Diidxliczi rnin lëjt, gra ni ad beentidi din nünjdi yudar da bejn reen majsi ad najt reeman bën lasajc, najn ad beentidi yudar.”⁴⁶ Laa reeman yayal loj casti tiblayaa, guiáad ree bën been zi'c rayal, laa reeman rayal guialnaban tiblayaa con Dios.

26

Baya'n reeman diidx xhienaag guiniaaz reeman Jesús

(Mr. 14:1-2; Lc. 22:1-2; Jn. 11 :45-53)

¹ Chi gulox guneé Jesús diidx guin ree, dxel rëb loj ree xbejnman:

² —Lëjt ragbee guial ryaadx zatio'p dxejzi guial guidxin lanij pascw, abi' Bén guxhaal Dios yayü ree bejn laaman din tiaman loj crüjz.

³ Lën ree dxejzii badxaag lasa' ree bixhioz rniabee ree bixhioz, con xguxtis ree bën Israel, lidx Caifás quijb bixhioz zojbloj. ⁴ Ni baya'n reeman diidx xhienaag gusquiee reeman Jesús din guiniaaz reeman laaman, abi' gugüjnt reeman laaman. ⁵ Per rëb reeman:

—Ad zaguieñt ree zian loj lanij guin chitëë gac naquie' luguiedx guin.

Ruroob tijb béngunaa perfum guijc Jesús

(Mr. 14:3-9; Jn. 12 :1-8)

⁶ Chi za' Jesús luguiedx Betania lidx Simón, bën rniee reeman Leproso, ⁷bidxin tijb béngunaa ca'man tijb lumejt guidxan perfum ni lasajc wayëjx. Abi' la'tgaj zojb Jesús xan mex, baroobaman perfum guin guijc Jesús. ⁸ Chi baguiaa ree xbejn Jesús ni been béngunaa guin, dád bidxe'ch reeman, abi' rëb reeman:

—¿Chexc zeel bixie' perfum guin? ⁹ Zile' nido'n zro' da't din nünjan yudar bënprob ree.

¹⁰ Chi biguiejn Jesús ni canee reeman, rëbaman loj reeman:

—¿Chexc zeel rdxe'chidi béngunaa guin? Zagdxe naj ni beenman naj.

¹¹ Din bënprob guin ree zianczi za'në reeman lëjt, sa'n naj ad ziantczi gazunë'n lëjt. ¹² Abi' ni baroobaman perfum guin guican, rën guiëban guial ma beenchaaw xgajman naj par chi guiguie'chan. ¹³ Diidxliczi rnin, bantëéz guin guire'ch xtiidxza'c Dios loj guidxliuj, zü ree bejn gra ni been béngunaa guin por naj, din gusaaladx reeman laaman.

Rayü Judas Jesús

(Mr. 14:10-11; Lc. 22:3-6)

¹⁴ Loj guidxiptio'p ree xbejn Jesús, bën la Judas Iscariote, bigneenëman bixhioz rniabee ree bixhioz, ¹⁵rëbaman loj reeman:

—¿Plac guneedi din yanen Jesús lojdi?

Abi' badëëd reeman gajlbichii milia plajt lojman. ¹⁶ Diizd dxejzii guzulojman raguuilaman mod xhienaag yayüman Jesús.

Gudawnë ree xbejn Jesús xche

(Mr. 14:12-25; Lc. 22:7-23; Jn. 13 :21-30; 1Co. 11 :23-26)

¹⁷ Dxej ni guzuloj lanij ni raw ree bejn guidxtil ni ad yu't levadur, gubig ree xbejn Jesús lojman, rëb reeman:

—¿Ban guin rënl yaguieenchaawan ni yadaaw ree guxhin lanij pascw?

¹⁸ Badxi' Jesúsán rëbaman:

—Gol chej Jerusalén lidx bën guin, gol biguiedx lojman: “Na Mextr: Ma bidxin xihoraman abi' rënman tédaman pascw lidxil con ree xbejnman.”

¹⁹ Dxel heran ree xbejnman zi'c rëbaman, been tée reeman ni gaw reeman guxhin lanij pascw.

²⁰ Chi gure guiaal, zobj Jesús xan mex con guidxiptio'p ree xbejnman.

²¹ Abi' la'tgaj cayaw reeman, rëbaman loj reeman:

—Diidxliczi rnin, tijb gajc lëjt yayü naj.

²² Abi' dád gyunaya reeman, zianz guzuloj rniabdiidx tijbgaj reeman loj Jesús, rëb reeman:

—¿Najn ya, Dad?

²³ Badxi' Jesúsán, rëbaman:

—Bën cayaw loj pliajt ni cayaw gajcan, laaman yayü naj. ²⁴ Walican, Bën guxhaal Dios naj guial sacaman zi'c rëb loj xtiidx Dios. Per i'probza bën yayü laaman!, zagdxeli naj par laaman ad niutaman loj guidxliuj.

²⁵ Dxel Judas bën yayü Jesús, gunabdiidxaman rëbaman:

—Mextr, ¿wen najn ya?

Badxi' Jesúsán, rëbaman:

—Lüjn.

²⁶ La'tgaj cayaw reeman, cwa' Jesús guiadxtil, badëédaman quixtëe loj Dios. Dxel gula'man guiadxtil guin gudi'saman laan loj ree xbejnman, rëbgajman:

—Gol gudaw guiadxtil guie, laan naj da cuerpan.

²⁷ Dxel cwa'man tib cojp vin, chi gulox badëédaman quixtëe loj Dios, badëédaman cojp guin loj reeman, rëbgajman:

—Gol gu' gradi loj cojp guie. ²⁸ Din laan naj da rejnan ni gaxhie'n chi guiëtan por zien ree bénguidxliuj. Din por da gualgüjtan guixal tijb nejz cüb xhienaag gap ree bejn perdon loj Dios por xtol reeman. ²⁹ Abi' diidxliczi rnin lëjt ad yu'tri dxej guië'n vin rajcchaawnë uv, xt chi guidxin dxej guië'në'n lëjt vin cüb lod rniabee da Dadan.

Rëb Jesús guial guiëb Bëd ad nünbeetaman laaman

(Mr. 14:26-31; Lc. 22:31-34; Jn.13 :36-38)

³⁰ Chi gulox biil reeman tijb cant par Dios, dxel zë reeman guijc guia' Olivos. ³¹ Abi' rëb Jesús loj reeman:

—Gradi zabëëladx naj yan guxhin, zi'c ca loj xtiidx Dios lod rëb: “Gugüjtan bën rajp ree xiil, dxel guire'ch ree xiil guin.” ³² Per chi yabanan, yaloj naj ganeed ga gajn Galilea dxelri gui'tidi.

³³ Dxel rëb Bëd lojman:

—Majsi gra reeman cwëëladx lüj per naj ad yu't dxej gabëladxan lüj.

³⁴ Per rëb Jesús lojman:

—Diidxliczi rnin lojl, yan guxhin gajc chi gad gujd cwidxa', mal rëbil choon volt guial ad nünbeetil naj.

³⁵ Abi' rëb Bëd lojman:

—Majsi guiëtnë'n lüj, per ad yu't dxej guiën guial ad nünbeetan lüj.

Abi' gra ree xbejn Jesús ziangajc rëb reeman.

Gurejdx gunab Jesús Dios lod la Getsemaní

(Mr. 14:32-42; Lc. 22:39-46)

³⁶ Chi bidxin Jesús con ree xbejnman tijb luar la Getsemaní, rëbaman loj reeman:

—Gol gurejsii guie, la'tgaj gan ni din gabledx ganaaban Dios.

³⁷ Dxel zinëman Béd con grop ree xi'n Zebedeo, zianz guzuloj cayunayaman abi' ad nixtri yu' luxdooman. ³⁸ Zianz rëbaman loj reeman:

—Dád yu'naya luxdoon, ruluü ma gugüjt gualyu'naya guin naj. Gol baya'n guie ad gaayëjsidi.

³⁹ Dxel zë Jesús mazri delant abi' gurerulojman gurejdx gunabaman Dios, rëbaman:

—Dad, bal zile' yabëël naj loj gualzi ni gadëëdan, per ad gac zi'c rënan, gac zi'c rënl.

⁴⁰ Dxel baguiajman lod za' ree xbejnman, abi' baguiaaman naga'yëjs reeman, zianz rëbaman loj Béd:

—¿Wen ni'qui tib hor ad bile't natie'ch xbaaalidi ya, din sunëdi naj? ⁴¹ Gol batie'ch xbaaalidi gol gurejdx gunab tëë Dios, chitëë güün xindxab lëjt gan, din rënquidi güündi zi'c rayal, per xcuerpidi ad rtiëjbtan.

⁴² Ni barojp volt wejman gurejdx gunabaman Dios, rëbaman:

—Dad, bal id zile' téd gualzi ni naj gadëëdan, bal rüjn naguiejn gadëëdanan gacri zi'c rënl.

⁴³ Chi badxinman lod za' ree xbejnman stijb, laa reeman naayëjs gual dád guidxa bacaal loj reeman. ⁴⁴ Dxel basa'nman laa reeman stijb, zëman, bayon volt cabejdx canabaman Dios con diidx guin gajc ree. ⁴⁵ Chi badxinman lod za' ree xbejnman, rëbaman loj reeman:

—¿Sta naga'yëjsidi ya, cayziiladx tëëdi? Guiáad Bén guxhaal Dios ma bidxin hor yayü reeman laaman loj ree bëndol. ⁴⁶ Gol bixche, yo' ree, gol baguiaa laa bën yayü naj ma zëëd gajxh.

Gunaaz reeman Jesús

(Mr. 14:43-50; Lc. 22:47-53; Jn. 18 :2-11)

⁴⁷ Sta caneenë Jesús bën naj ree xbejnman, chi bidxin Judas bën naj gajc tijb xbejn Jesús. Bidxinnëman zien ree bejn, ca' reeman espad në yag. Guxhaal ree bixhioz rniabee ree bixhioz con ree xguxtis ree bën Israel laa reeman. ⁴⁸ Abi' Judas bën bayü laaman mal rëbxgajman loj ree bën guin: “Bén gawan xid xhajg, laaman raguillidi, gol gunaazaman.” ⁴⁹ Chi bidxin Judas bibigaman loj Jesús, dxel rëbaman:

—¡Xchan, Mextr!

Laa gudaw gajcaman xid xhajgaman.

⁵⁰ Abi' rëb Jesús lojman:

—Judas, been ni zidguieenl.

Dxel gubig ree bën guin, gunaaz reeman Jesús persi zinë reeman laaman.

⁵¹ Per tijb ree bën za'në Jesús yagaj, gulëë xiespadaman dxel gutü'man guidaajg xmojs quijb bixhioz zojbloj. ⁵² Dxel rëb Jesús lojman:

—Bagu'chaaw xiespadil xluaran. Din bën rdil con espad, con espad rëjtaman. ⁵³ ¿Wen, id ragbeel ya gual zajc gabledx ganaab da Dadan, abi' laa guixhiaal gajcaman por mil ree xianjlaman din gagnë reeman naj?

⁵⁴ Per ¿xoxa gac cumplid zi'c ca loj xtiidx Dios ni rëb gual rüjn naguiejn gac ree ni cayajc?

⁵⁵ Loj hor guin gajc rëb Jesús loj ree benzien guin:

—¿Chexc zeel zëëdidi con espad në con yag din guiniaazidi naj zi'c tijb xingubaan? Guixie guixie guzunë'n lëjt lën yadooro' Jerusalén balün lëjt xtiidx Dios, abi' ad gunaaztidi naj. ⁵⁶ Per gra ree ni guie cayajc din gac cumplid ni bacaa ree bën badëë xtiidx Dios loj ree bejn.

Loj hor guin gajc baxüün ree xbejn Jesús, guro'nladx reeman laaman.

Za' Jesús loj ree guxtis Israel

(Mr. 14:53-65; Lc. 22:54-55, 63-71; Jn.18 :12-14, 19-24)

⁵⁷ Bén gunaaz ree Jesús binë reeman laaman lidx Caifás, quijb bixhioz zobjloj, yagaj badxaag lasa' ree mextr rajc ley con ree xguxtis ree Bén Israel. ⁵⁸ Abi' Béd zijt zijt nalaman Jesús, xt lule' lidx bixhioz guin. Dxel guyuman abi' gurejnëman Bén rajp ree lidx bixhioz guin, din guguaa-man xhie güünnë ree Bén guin Jesús.

⁵⁹ Guiáad ree bixhioz rniabee ree bixhioz con gra ree guxtis guin raguiil reeman xhie gusquiee reeman din gutedia' reeman Jesús din nabee reeman guiëtaman. ⁶⁰ Per ad radxejlt xhienaag gutedia' reeman laaman majsi zien ree Bén basquiee. Dxel bibig zatio'p reeman, ⁶¹ rëb reeman:

—Bén guie rëb: “Zile' yase'nan xyadoo Dios abi' loj choon dxejzi yayünanan.”

⁶² Dxel guzuli quijb bixhioz zobjloj guin, rëbaman loj Jesús:

—¿Nid zadxi'lan ya? ¿Waliqui ni canee ree Bén guin contr lüj ya?

⁶³ Per achet rëb Jesús. Dxel rëb bixhioz guin lojman:

—Por Dios Bén naban, rniabeen lüj guna diidxli. Guna bal lüjn naj Cristo, Xi'n Dios.

⁶⁴ Badxi' Jesúsán rëbaman:

—Waliquil. Rni tëën lëjt, zuguaadi Bén guxhaal Dios zobjaman xladbee Dios Bén rajp gualrniabee abi' zuguaa tëëdi gui'taman loj zaj xanyabaa.

⁶⁵ Chi bigueijn bixhioz guin zian, gudixya' xabaman, rëbaman:

—Diosan canee guijdx Bén guin. ¿Xhie mazri rüjn naguiejn yadiil ree testiw? Lëjt gajc ma bigueijn gual rniee guijdxaman Dios. ⁶⁶ Yan, ¿xhie nadi?

Badxi' ree Bén guinan rëb reeman:

—Rayal guiëtix.

⁶⁷ Dxel bacojp xhiejn reeman lojman, gudijn reeman laaman, yu' tëë reeman wëëz ro'man, ⁶⁸ rëb reeman lojman:

—Bal lüjn naj Cristo, guneeya' chu gudin lüj.

Rëb Béd ad nünbeetaman Jesús

(Mr. 14:66-72; Lc. 22:56-62; Jn.18 :15-18, 25-27)

⁶⁹ La'tgaj zobj Béd lule' lidx bixhioz guin, gubig tijb biin rüjn dxiin yagaj, rëbim lojman:

—Në lüj nal Jesús, Bén Galilea.

⁷⁰ Per Béd gurexuuman, rëbaman niz loj gra reeman:

—Ad ragbeetan xhienin rnieel.

⁷¹ Chi zëman niz ro' port baguaa stijb biin rüjn dxiin yagaj laaman, abi' rëbim loj ree Bén riga' yagaj:

—Në Bén guin nal Jesús Bén Nazaret.

⁷² Per Béd gurexuuman stijb, xt baza'taman Dios, rëbaman:

—Ad nünbeetan Bén guin.

⁷³ Dxel ad gojct xchej, gubig ree Bén riga' yagaj loj Béd, rëb reeman lojman:

—Laa rguien gajc në lüj naj xbejn reeman, din zi'cgajc rniee reeman rñjeel.

⁷⁴ Per Béd baza'taman Dios, rëbaman loj reeman:

—Dios gudëed naj casti bal rusquieen, per ad nünbeetan bén guin.
 Hor guin gajc guridxa' tijb guid. ⁷⁵ Abi' basaaladxaman guial rëb Jesús lojman: “Chi gad guid cwidxa', mal rëbil choon volt ad nünbeetil naj.”
 Dxel barii Bëd yagaj abi' dád naya biinman.

27

Binë reeman Jesús loj Pilato

(Mr. 15:1; Lc. 23:1-2; Jn. 18 :28-32)

¹ Chi bani luyuj, gra ree bixhioz rniabee ree bixhioz con ree guxtis Israel baya'n reeman diidx xhienaag güün reeman din guiët Jesús. ² Dxel guxhii reeman laaman abi' binë reeman laaman loj gobernador Pilato.

Güjt Judas

³ Dxel Judas, bén bayü Jesús, chi baguiaaman guial ma naj guiët Jesús, guyunayaman, abi' bayüman gajlbichii milia plajt guin loj ree bixhioz rniabee con loj ree guxtis Israel, ⁴ rëbaman loj reeman:

—Ma benan dol guial banen tijb bén achet dol rajp.

Badxi' reeman laan rëb reeman:

—Xhieczi yaguieenan, jlüj gunaj!

⁵ Abi' bazaal Judas milia guin lën yadooro' Jerusalén zianz bariiman wejman bigxhii yëjnman.

⁶ Dxel bato'p ree bixhioz rniabee guin milia guin, abi' rëb reeman:

—Ad rayalt yadxe' ree milia guin lën lod ru gon, din con laan bio' bén guiët.

⁷ Dxel be reeman diidx, abi' con milia guin guzii reeman xguidxliuj bén rüjn trast bajn ree, din gacan lod guiguie'ch ree benzit. ⁸ Zeel xt yan la guidxliuj guin Yuj Rejn. ⁹ Zian gojc cumplid ni gunee Jeremías, bén badëë xtiidx Dios loj ree bejn, chi rëbaman: “Cwa' reeman gajlbichii milia plajt, prejs ni rëb ree bén Israel lasajcaman, ¹⁰ abi' con milia guin guzii reeman xguidxliuj bén rüjn trast bajn ree, zi'c gunabee Dios naj.”

Rniabdiidx Pilato loj Jesús

(Mr. 15:2-5; Lc. 23:3-5; Jn. 18 :33-38)

¹¹ Dxel badxig reeman Jesús loj gobernador Pilato, abi' gunabdiidxaman loj Jesús, rëbaman:

—¿Lüjn naj xrey ree bén Israel ya?

Badxi' Jesúsán, rëbaman:

—Najcan.

¹² Abi' chi cutedia' ree bixhioz rniabee ree bixhioz con ree guxtis Israel laaman, achetzi radxi'man. ¹³ Dxel rëb Pilato lojman:

—¿Nid rigueijnl gra ni canee reeman contr lüj ya?

¹⁴ Per Jesús ni'qui tijb diidx ad badxi'taman, zeel dád badxa loj gobernador guin.

Gunabee reeman guiët Jesús

(Mr. 15:6-20; Lc. 23:13-25; Jn. 18 :38-19:16)

¹⁵ Lën ree dxej lanij, ruslaa gobernador Pilato tijb bén yu' ladxguuib bén guiëb ree bénguiedx guin laa, zi'c naj xcostumbr reeman. ¹⁶ Lën ree dxejzii yu' Barrabás ladxguuib, tijb bén nünbee ree bejn niz ni niz guie. ¹⁷ Abi' chi badxaag lasa' gra ree bejn, gunabdiidx Pilato loj reeman, rëbaman:

—¿Chu rëndi guslaan? ¿Barrabás ya, o Jesús, bén rëb ree bejn naj Cristo?

¹⁸ Rëbaman zian guial gogbeeman ganaxzi guialnadëdlojn zeel bayü reeman Jesús.

¹⁹ La'tgaj zojb Pilato lod rüjnman guialguxtis, bidxin xruson lacheelaman, rëbaman lojman: “Adxhie güünnël bën guin achet dol rajpaman, din dád nadxuudx gune'xchalan laaman nuche.”

²⁰ Per bixhioz rniabee ree bixhioz con ree guxtis Israel, badxe' reeman diidx gra ree bejn persi gunab reeman guslaaman Barrabás, guiáad Jesús guiëtaman. ²¹ Gunabdiidx Pilato loj reeman stijb, rëbaman:

—¿Chu loj grop reeman rëndi guslaan?

Badxi' reeman laan rëb reeman:

—Barrabás.

²² Abi' rëb Pilato loj reeman:

—¿Xhieza günnë'n Jesús, bën rëb ree bejn naj Cristo?

Badxi' gra reeman laan rëb reeman:

—¡Bacaaman loj crüjz!

²³ Abi' rëb Pilato loj reeman:

—¿Xhieza ni mal beenman?

Per laa reeman mazri rejs rbixdiaj reeman, rëb reeman:

—¡Bacaaman loj crüjz!

²⁴ Chi baguiaa Pilato guial achet rile' güünman, al mazri naquie' cayüjn ree bën guin, dxel cwa'man nijs abi' banaaman delant loj gra reeman, rëbaman:

—Achet dol ra'pan guial guiët bën guie, xcwentidan.

²⁵ Badxi' gra ree bën guinan rëb reeman:

—¡Du guijcan, në guijc du xi'nan cwiban guial guiëtaman!

²⁶ Dxel baslaa Pilato Barrabás, zianz gunabeeman gudijn reeman Jesús abi' bayüman laaman din gucaa reeman laaman loj crüjz.

²⁷ Zianz xsuldad ree gobernador guin binë reeman Jesús lën palas lod bado'p gra ree suldad, gadëd lod za'man. ²⁸ Dxel gulëë reeman xabaman bascajcw reeman laaman tijb lajd xnia. ²⁹ Abi' beenchaaw reeman tijb coron guiëjch badxe' reeman laan guijcaman, zianz бага's reeman tijb yag ladxaaman ladbee. Dxel bazuxib reeman lojman, ruze' reeman laaman, rëb reeman:

—¡Guibanri xrey ree bën Israel!

³⁰ Abi' rucojp xhiejn reeman lojman, laagajc tëë yag ni ca'man rugaz reeman guijcaman. ³¹ Chi gulox baze' reeman laaman, dxel babëë reeman lajd xnia guin ladaman, bascajcw reeman xabaman, zianz zinë reeman laaman din gucaa reeman laaman loj crüjz.

Cwa Jesús loj crüjz

(Mr. 15:21-32; Lc. 23:26-43; Jn.19 :17-27)

³² Chi zinë reeman Jesús, badxaagloj reeman tijb bën Cirene, laman Simón, abi' been reeman laaman naguiejn byaaman xcrüjz Jesús.

³³ Chi bidxin reeman tijb luar la Gólgota (rën guiëban Xluar Calaver), ³⁴ ni badëëd reeman vin, no'chan nijs nala da't guië' Jesús. Per chi beenman laan prueb, ad cwëjbtaman nië'man laan.

³⁵ Chi gulox bacaa reeman laaman loj crüjz, dxel gudxijt reeman suert guijc xabaman din yala' reeman laan. ³⁶ Dxel gurej reeman yagaj din gap reeman laaman. ³⁷ Abi' guijc crüjz guin bacaa reeman lejtr ni rëb, chexc zeel cwaman loj crüjz. Rëb lëjtr guin: “BEN GUIE NAJ JESÚS XREY REE BEN ISRAEL.”

³⁸ Nē tio'p xin gubaan baca reeman loj crūjz, tijbix xladbee Jesús stijbix xladruvejsaman. ³⁹ Abi' ree bēn rdēd, rnieeguijdx reeman Jesús, runij guijc reeman, ⁴⁰ rēbgaj reeman:

—Lūj rēb, nuse'nl yadooro' abi' loj choon dxejzi nayūjnlan, baslaa lūj gajc. Bal walil najl Xi'n Dios baguiajt loj crūjz guin.

⁴¹ Ziangajc ree bixhioz rniabee ree bixhioz nē ree mextr rajc ley con ree guxtis Israel, ruze' reeman Jesús, rēb reeman:

⁴² —Baslaax ben ren ree, abi' ad rajct ruslaa laagajquix. Bal wali najx xrey ree bēn Israel, yaguaajtix loj crūjz guin, dīn yaliladx reex.

⁴³ Rililadxix Dios. ꝑYan, guslaaza Dios laax, bal wali rēnman laax, dīn rēbix: “Xi'n Dios najx”!

⁴⁴ Abi' nēgajc ree xingubaan ca cwē'man ruze' laaman.

Gūjt Jesús

(Mr. 15:33-41; Lc. 23:44-49; Jn. 19 :28-30)

⁴⁵ Dxel diizd garol dxej bicajy loj guidib guidxliuj, xt raca choon wadx.

⁴⁶ Loj horzii gurixdiajman rejs da't, rēbaman:

—Elí, Elí, ꝑlama sabactani? —rēn guiēban: Dios, Dios, ꝑchexc zeel gulēladxil naj?

⁴⁷ Yu' ree bēn za' yagaj, chi biguiejn reeman, rēb reeman:

—Laaman cabejdx Elías, bēn badēē xtiidx Dios loj ree bejn.

⁴⁸ Laa baxūūn gajc tijbaman bicajdxaman tijb xiil loj vinagr, abi' bacaaman laan loj tijb yag zianz badxigaman laan ro' Jesús dīn guiē'man laan. ⁴⁹ Per rēb los demazri reeman:

—Basa'nx, dīn yaguaaa ree don zidgaslaa Elías laax ya.

⁵⁰ Zianz gurixdiaj Jesús rejs da't stijb, dxel gūjtaman. ⁵¹ Loj hor zii goxya' lajd nal lēn yadooro' Jerusalén gojcan tio'p lala', diizd guijc guin xt guia' guin goxya'. Abi' guxu, gula' tēē ree guiajro'. ⁵² Guiáad ree baa bixal reen, abi' zien ree bejn bēn naj xbejn Dios, bēn ma gūjt ree baban. ⁵³ Dxel chi baban Jesús, barii lēn xbaa reeman, abi' guyu reeman Jerusalén, lod baguiaa zien ree bejn laa reeman.

⁵⁴ Dxel suldad rniabee ree suldad nē gra ree suldad za'nēman yagaj canaj reeman Jesús, chi baguiaa reeman caxu nē gra ni cayajc, dād bidxeb reeman abi' rēb reeman:

—Walican Xi'n Dios bēn guin.

⁵⁵ Zien ree bēngunaa guzanal Jesús diizd Galilea, bēn been tēē ree laaman yudar, za' reeman zijt ruguiaa reeman ni cayajc. ⁵⁶ Loj reeman no'ch María Magdalena, nē Li xniaa Santiaaw con Xiēb nētēē xniaa ree xi'ngaan Zebedeo.

Biguie'ch Jesús

(Mr. 15:42-47; Lc. 23:50-56; Jn. 19 :38-42)

⁵⁷ Chi gure guiaal, bidxin tijb benrijcw laman Xiēb, bēn Arimatea, nē laaman binal Jesús. ⁵⁸ Wejman loj Pilato, bignabaman xcuerp Jesús. Dxel gunabee Pilato bayū reeman cuerp guin lojman. ⁵⁹ Abi' cwa'man cuerp guin batūūbaman tijb lajd naya. ⁶⁰ Dxel biquie'chaman laaman lēn tijb baa cūb ni gudēēnman par laagajcaman lēn tijb guiaj. Zianz basiaawaman ro' baa guin con tijb guiajro', ziataman. ⁶¹ Abi' zojb María Magdalena con stijb bēn la gajc Li, ro' baa guin.

Rajp ree suldad ro' xbaa Jesús

⁶² Chi bareguiaal, dxej raziiladx ree bejn, wej ree bixhioz rniabee ree bixhioz në ree bénfarisew, bigneenë reeman Pilato, ⁶³ rëb reeman lojman:

—Dad, rasaaduladxan, chi ziz naban bén rusquiee ni, rëbaman guial chi gac choon dxej yabanman. ⁶⁴ Zeel gunabee guiyaawdxi'ch ro' baa guin xt chi gac choon dxej, chitëe gui't ree xbejnman guxhin cwan reeman xcuerpaman. Abi' guiëb reeman loj ree bejn guial ma babanman. Abi' mazri gusquiee reeman bejn guial loj ni yaloj.

⁶⁵ Dxel rëb Pilato loj reeman:

—Laa ree suldad za' yagaj. Gol chinë reeman, gol basiaawdxi'ch ro' baa guin zi'c rëndi.

⁶⁶ Abi' zë reeman, dxel basiaawdxi'ch reeman ro' baa guin. Zianz basa'n reeman suldad guin ree cayajp reeman laan.

28

Raban Jesús

(Mr. 16:1-8; Lc. 24:1-12; Jn.20 :1-10)

¹ Chi gudëd dxej raziiladx ree bejn, bareguiaal chidumingw, María Magdalena con stijb Bén la gajc Li biquiaa reeman ro' baa guin. ² Dxel bi't tijb xudoxh, guial biguiajt tijb xianjl Dios diidz xanyabaa, dxel bibig anjl guin ro' baa guin biquiedaman guiaj nayaaw ro'n, zianz gurejman guijcan. ³ Dád rliajman bacha' zi'c chi rë'p nijs, guiáad xabaman naquichbëjn. ⁴ Chi baguiaa ree suldad guin anjl guin, binij reeman guial dád bidxeb reeman xt badaj reeman abi' biyajb reeman luyuj. ⁵ Dxel rëb anjl guin loj ree béngunaa guin:

—Ad rdxebidi, ragbeen cayguilidi Jesús Bén cwa loj crüjz. ⁶ Per achutri laaman guie, ma babanman zi'c naman. Gol guida nial din guguaadi lod gudixh reeman laaman. ⁷ Yan, gol baxüün gol bicojn ree xbejnman guial ma babanman, ma nedaman lojdi zëgajman Galilea, ni guguaadi laaman. Ni nezan naj ni rugojnan lëjt.

⁸ Dxel cari da't baza reeman ro' baa guin rdxeb reeman rabaa tëe reeman, ruxüün reeman zia reeman zicojn reeman xbejn Jesús. ⁹ La'tgaj zia reeman, balüüloj Jesús loj reeman, bagajpdiozaman laa reeman. Abi' bibig reeman lojman, bazuxib reeman, gudüdx reeman guia'man, ¹⁰ abi' rëbaman loj reeman:

—Ad rdxebidi. Gol chej, gol biguiedx loj ree da bejnan din che reeman Galilea, ni guguaa reeman naj.

Ni rëb ree suldad

¹¹ La'tgaj zia ree béngunaa guin, në tio'p choon ree suldad cayajp ro' baa guin zë luguiedx guin zicojn reeman bixhioz rniabee ree bixhioz gra ni goc. ¹² Dxel wej ree bixhioz rniabee guin bigneenë reeman guxtis Israel ree persi baya'n reeman diidz xhie güün reeman. Abi' dad zro' milia badëed reeman loj ree suldad guin, ¹³ rëb reeman:

—Con gol güjdx loj ree bejn: “Guxhin la'tgaj nadoodyëjsan, bi't ree xbejn Jesús abi' gulan reeman xcuerpaman.” ¹⁴ Abi' bal gagbee gobernador, dunuj yaneeenë' laaman chitëe xhie güünnëman lëjt.

¹⁵ Dxel cwa' ree suldad guin milia guin abi' been reeman zi'c rëb reeman. Laan naj diidx ni nare'ch loj ree Bén Israel xt yan.

Rxhiaal Jesús Bén naj ree apóstoles

(Mr. 16:14-18; Lc. 24:36-49; Jn.20 :19-23)

¹⁶ Guidxiptib ree xi apóstoles Jesús, wej reeman Galilea, guiyc tijb guia' lod rëb Jesús che reeman. ¹⁷ Abi' chi baguiaa reeman Jesús, bazuxib reeman lojman, majsi yu' reeman ad bililadxza'ct. ¹⁸ Dxel bibig Jesús loj reeman, rëbaman:

—Dios ma banee gra guialrniabee din ganabeen xanyabaa në loj guidxliuj. ¹⁹ Zeel, gol chej guidib guidxliuj, gol biglüü ree bejn din gac reeman da bejnan. Gol baroobnijs reeman por dux Dad ree, por Xi'nman në por xSprijtaman, ²⁰ gol balüü tää reeman din guzoob reeman diidx gra ni ma rnin lëjt. Abi' naj gazunë' lëjt gradxejczy xt chi nit guidxliuj. Amén.

Xtiidxza'c Jesucrist ni bacaa San Marcw

Rzuloj Waj ruliüüman xtiidxza'c Jesucrist

(Mt. 3:1-12; Lc. 3:1-9, 15-17; Jn. 1 :19-28)

¹ Ze guzuloj xtiidxza'c Jesucrist, Xi'n Dios.

² Guyu tijb bén badëë xtiidx Dios loj ree bejn brii lajman Isaías, bacamaan xtiidx Dios, rëbaman:
Naj rxhial tijb bén ned lojl,
bén güünchaaw xnejzil.

³ Guuien cha' tijb bén rhidxa' loj yujbidx, rëbaman:

“Gol beenchaaw xnejz dux Dad ree, gol guxhal tijb nejz nali.”

⁴ Zian bi't Waj bén baroobnijs bejn ree, guzuman niz loj yujbidx, abi' rëbaman loj ree bejn guial rayal yayüjn xgab por xtol reeman, yayejc reeman con Dios din gac reeman perdon tiobnijs tëë reeman. ⁵ Gra ree bén zobj niz Judea, nè ree bén Jerusalén brii reeman zicaagdiajg reeman ni rniee Waj, abi' rxhioobdol reeman. Zianz ruroobnijs Waj laa reeman loj guiiw Jordán.

⁶ Guidxlad camell gojcnë xabaman, abi' lënman bixii tijb cinch guid. Gudawaman bi'tsu con dxijn dajn. ⁷ Chi guneenëman bejn ree, rëbaman:

—Xichan zëed tijb bén mazri zobjloj guial lon, ni'qui xgurëchaman ad zajct gaxhiecan guial mazri zobjlojman guial lon. ⁸ Naj curoobnijs lëjt con nijs, per laaman guroobnijs lëjt con xSprijt Dios.

Riobnijs Jesús

(Mt. 3:13-17; Lc. 3:21-22)

⁹ Lën ree dxejzii guza Jesús luguiedx Nazaret ni riga' niz Galilea, abi' baroobnijs Waj laaman loj guiiw Jordán. ¹⁰ Chi bariiman loj nijs guin, laa baguiaa gajcaman bixal xanyabaa, zidguiajt xSprijt Dios zi'c tijb palom xt guijcaman. ¹¹ Dxel biguien cha' bejn xanyabaa, rëbaman:

—Lüj naj da Xi'n'an, rënan lüj rabaanë' tëën lüj.

Been xindxab Jesús prueb

(Mt. 4:1-11; Lc. 4:1-13)

¹² Dxel binë xSprijt Dios Jesús loj yujbidx. ¹³ Ni guzuman tiuu dxej tiuu guiaal, loj ree bedoxh. Abi' been xindxab laaman prueb chitéë nuzoobaman xtiidx Dios, guiáad ree xianjl Dios gunaj laaman.

Rzuloj Jesús ruliüüman bejn ree niz Galilea

(Mt. 4:12-17; Lc. 4:14-15)

¹⁴ Chi mal guyu Waj ladxguuib, wej Jesús niz Galilea bigneeman xtiidxza'c Dios, ¹⁵ rëbaman:

—Ma bidxin dxej zëed xguialrniabee Dios gajxh, zeel gol bayüjn xgab por xtolidi, gol bililadx tëë xtiidxza'caman.

Rbejdx Jesús tajp ree bén gac xbejnman

(Mt. 4:18-22; Lc. 5:1-11)

¹⁶ La'tgaj caza Jesús ro'nijsdoo Galilea, baguiaaman Simón nè bi-chaman Andrejs, cuzaal xguijxh reeman lojnijs din guiniaaz reeman bëjl. ¹⁷ Abi' rëb Jesús loj reeman:

—Gol tanal naj din gulün lëjt xhienaag guto'pιδi bejn par Dios, luar rniaazidi bëjl.

¹⁸ Loj hor guin gajc basa'n guijxh rniaaznë reeman bëjl persi zinal reeman Jesús.

¹⁹ Guzaman zatibda'n, dxel baguiaaman Jacob con Waj Bén naj ree xi'n Zebedeo, yu' reeman loj barcw rayüjnchaaw xguijxh reeman. ²⁰ Dxel gurejdx Jesús laa reeman, abi' basa'n reeman Zebedeo loj barcw guin, Bén naj xdad reeman con ree xmojsaman, guiáad laa reeman zinal reeman Jesús.

Rabëë Jesús xindxab luxdoo tijb bejn

(Lc. 4:31-37)

²¹ Chi bidxin Jesús luguiedx Capernaum. Abi' dxej raziiladx ree bejn guyuman lën xyadoo ree Bén Israel culüüman laa reeman. ²² Dád radxa loj reeman zi'c rnieenëman laa reeman guial rulüüman laa reeman zi'c tijb Bén rniabee, ad rulüütaman zi'c rulüü ree mextr rajc ley. ²³ Lën yadoo guin yu' tijb xin yu' xindxab luxdoo, dxejczy guridxa'x rëbix:

²⁴ —¿Xhie rënl con dunujn, Jesús Bén Nazaret? ¿Zëëdil ya zidganijtíl dunujn? Nünbeen lüj, ragbeen guial naya nalil najl xi'n Dios.

²⁵ Dxel gudilë Jesús xindxab guin, rëbaman:

—¡Bacwëëz ro'l, barií luxdoo xin guin!

²⁶ Abi' been xindxab guin xin guin zi'c Bén rëjtya', zianz gurixdiajx rejs, bariix luxdoo xin guin. ²⁷ Graczi ree Bén riga' dád badxaloj reeman, riniabdiidx loj lasa' reeman rëb reeman:

—¿Xhie ree nicüban rulüü Bén guin? ¡Con guialrniabee ni rajpaman xt ree xindxab ruzoob xtiidxaman!

²⁸ Tibrajtzi bire'ch xtiidx Jesús guidib niz Galilea.

Rayüjn Jesús xnasuegr Bëd

(Mt. 8:14-15; Lc. 4:38-39)

²⁹ Bariiz reeman lën yadoo guin, binë Jesús Jacob con Waj lidx Simón con Andrejs. ³⁰ Abi' naga' xnasuegr Simón, yu'man xliaadoxh. Dxel bagojn reeman Jesús guial ragxuuman. ³¹ Abi' gubigaman cwë'man gunaazaman yaaman, gulesaman laaman. Loj hor guin gajc bariiman xliaa guin dxel guzuloj cudëëdaman ni gaw reeman.

Rayüjn Jesús zien ree Bénragxuu

(Mt. 8:16-17; Lc. 4:40-41)

³² Chi ma gurej guiaal, binë reeman Bénragxuu ree lod za' Jesús, në ree Bén yu' xindxab luxdoo. ³³ Graczi ree Bén luguiedx guin bido'p ruyü lod za' Jesús. ³⁴ Bayüjn Jesús zien ree Bén rajc ree gadxagayaa guialguijdx, babëë tëëman zien ree xindxab luxdoo ree bejn. Per ad rudëëtaman mod guinee ree xindxab guin guial nünbee reex laaman.

Rulüü Jesús xtiidx Dios niz Galilea

(Lc. 4: 42-44)

³⁵ Bixche Jesús rsildoo, chi ziiz nacay, briiman luguiedx guin wejman tijb luar lod achutczy bejn zobj, persi gurejdx gunabaman Dios. ³⁶ Abi' Simón con ree xcompniaraman bigdiil reeman laaman. ³⁷ Chi badxejl reeman laaman, rëb reeman lojman:

—Gra ree bejn cayguiil lüj.

³⁸ Per rëbaman loj reeman:

—Yo' ree guiedx ni riga' ree gajxh din gulün xtiidxza'c Dios, din par zian zialan.

³⁹ Abi' balüü Jesús xtiidx Dios lèn ree xyadoo ree bén Israel guidib niz Galilea babëë tēëman xindxab luxdoo ree bejn.

Rayüjn Jesús tijb bén rajc guialguijdx la lepra

(Mt. 8:1-4; Lc. 5:12-16)

⁴⁰ Tijb bén rajc guialguijdx la lepra, gubigaman lod za' Jesús, bazuxibaman lojman rëbaman

—Bal guiënl, zajc yayüjnl naj.

⁴¹ Baya Jesús laaman, baqui'man laaman, rëbgajman:

—Rënan, bayajc.

⁴² Chi gunee Jesús zian, hor guin gajc bayajc bén guin abi' baya xcuerpaman. ⁴³ Dxel bagu'nejz Jesús laaman, rëbaman lojman:

⁴⁴—Bacaagdiajg ni ganin lüj. Achu loj guiëbil guial ma bayajquil. Lojzi bixhioz wej din guguaaman lüj, binë gon ni rayal chinël loj Dios zi'c gunabee Moisejs, din gagbee gra ree bejn guial ma bayajquil.

⁴⁵ Per bén guin chi ziaman guzuloj catie'chaman diidx loj gra bejn xhienaag bayajcaman. Zeel ad bile't contzi niu Jesús luguiedx ree, ganax dajn ree raya'nman lod achut bejn zobj. Per gra lad rza ree bejn rej reeman lod za'man.

2

Rayüjn Jesús xin nëjt xcuerp

(Mt. 9:1-8; Lc. 5:17-26)

¹ Chi goc tio'p choon dxej, badxin Jesús luguiedx Capernaum, abi' chi gogbee ree bejn, guial za'man yagaj, ² tibrajtzi bido'p zien da't reeman lod za'man, xt ni'quid rdaant ro' port chu' reeman, guiáad laaman culüüman laa reeman xtiidx Dios. ³ Dxel bidxin tajp ree bejn yagaj lejn reeman tijb xin nëjt xcuerp. ⁴ Per ad gojct niunë reeman laax lod za' Jesús guial bén guixiuj guidxa. Abi' guxhal reeman guijc yu lod za'man persi gulet reeman xinragxuu guin guidib ni naga'x loj xt lod za' Jesús. ⁵ Chi baguiaa Jesús guial rililadx reeman laaman, rëbaman loj xinragxuu guin:

—Xi'n, ma benan xtolil perdon.

⁶ Per yagaj zobj tio'p choon ree mextr rajc ley, been reeman xgab naladx reeman: ⁷ “¿Chexc zeel rniee xin guin zian? ¿Chexc zeel rüjnx mazri xin zobjloj guial loj Dios? Achutczi rajc rüjn perdon dol tijbzi Dios.”

⁸ Per gogbee gajc Jesús xgab cayüjn reeman, dxel rëbaman:

—¿Chexc zeel rüjndi xgab zian? ⁹ ¿Conin ad nawëëgt gac, guial guiën loj bénragxuu guin ya: “Ma benan xtolil perdon”, o guiën ya: “Bixche, gules ni go'til loj, baguiaj?” ¹⁰ Per yan gulün lëjt guial Bén guxhaal Dios rajpaman gualrniabee loj guidxliuj guie din güünman dol ree perdon. Dxel rëbaman loj xinragxuu guin:

¹¹—Lüj rnin, bixche, baca' ni go'til loj baguiaj lidxil.

¹² Loj hor guin gajc bayajc xin guin, bixchex baca' ni go'tix loj, bariix lënü guin guidib loj gra ree bén riga' yagaj. Abi' gra reeman badxaloj, ruza't reeman Dios zagdxe, rëb reeman:

—Ni'qui tijb ad waguiaat ree zi'c naj ni cayguiaa ree yan.

Rbejdx Jesús Leví

(Mt. 9:9-13; Lc. 5:27-32)

¹³ Dxel wej Jesús ro'nijdsdoo Galilea zatijb. Dád zien ree bejn rdxin lod za'man persi rulüüman laa reeman xtiidx Dios. ¹⁴ Chi cadëdaman, baguiaaman Leví xi'ngaana Alfeo, zojbaman lod ruquijxaman impuest. Dxel rëb Jesús lojman:

—Tanal naj.

Laa bisu gajc Leví binalaman laaman.

¹⁵ Dxel chi cayaw Jesús lidx Leví con zien ree bën ruquijx impuest në ree bën ad nabant zi'c rën Dios, gra reeman zojbnë Jesús xan mex con ree xbejnman, guial zinal zien ree bejn laaman. ¹⁶ Chi baguiaa ree bënfarisew con ree mextr rajc ley guial cayawnë Jesús bën guin ree, rëb reeman loj ree xbejnman:

—¿Chexc zeel rawnë xmextridi bën ruquijx ree impuest në ree bëndol?

¹⁷ Chi biguiejn Jesús ni rëb reeman, zeel rëbaman:

—Bënnadaan ree ad riaadxt reeman doctor, bënragxuu ree, laa reeman riaadx doctor. Ad zialtan par ree benza'c, zialan par ree bëndol din yayüjn reeman xgab por xtol reeman.

Rniabdiidx reeman loj Jesús xcwent guialrba'n
(Mt. 9:14-17; Lc. 5:33-39)

¹⁸ Lën ree dxej zii guba'n ree xbejn Waj bën ruoobnijs bejn ree, në ree bënfarisew. Abi' yu' ree bën gunabdiidx loj Jesús, rëb reeman:

—¿Chexc zeel ad rba'nt ree xbejnl zi'c rba'n ree xbejn Waj con ree bënfarisew?

¹⁹ Badxi' Jesús laan rëbaman:

—Wen, ¿zajc guiba'n ree biooz za' loj guialruxhliaa ya la'tgaj za'në xin cuxhliaa guin laa reeman? La'tgaj za'nëx laa reeman ad zajct guiba'n reeman. ²⁰ Per guidxin dxej chiquiedix loj reeman, abi' chi guidxin dxej guin dxel guiba'n reeman.

²¹ Achut bën rata' lajd cüb loj lajd yojx, din zaxü'n lajd cüb guin abi' mazri quixya'n lajd yojx guin. ²² Ad rgu' tëet bejn vin cüb lën anfr yojx, din zaguixya' vin cüb guin anfr guin, abi' zi'c anfr guin zi'c vin guin zaxin reen. Zeel vin cüb rayal chu'n lën anfr cüb.

Rgui'ch ree xbejn Jesús trigo dxej raziiladx ree bën Israel
(Mt. 12:1-8; Lc. 6:1-5)

²³ Tijb dxej raziiladx ree bën Israel, cadëd Jesús con ree xbejnman loj guiniaa lod yu' trigo, abi' ree xbejnman guzuloj cagui'ch reeman trigo guin chi cadëd reeman. ²⁴ Dxel rëb ree bënfarisew loj Jesús:

—¿Chexc zeel rüjn ree xbejnl ni ad rayalt gac dxej raziiladx ree bejn?

²⁵ Per rëb Jesús loj reeman:

—¿Gadidi gool loj xtiidx Dios ya ni been Davi chi gulaanman con ree xcompniaraman? ²⁶ Tiamp ni goc Abiatar bixhioz rniabee gra ree bixhioz, guyu Davi lën xyadooro' Dios, gudawnë ree xcompniaraman guiadxtil ma nagle' abi' bixhiosi ree rayal gaw laa reen.

²⁷ Rëb tëe Jesús:

—Dios badxe' dxej raziiladx bejn, per ad badxe'taman dxej guin par sagdiaj bejn. ²⁸ Abi' naj, guial najn Bën guxhaal Dios, ra'pan guialrniabee dxej raziiladx ree bejn.

3

Rayajc tijb xin naxü'n tibladyaa

(Mt. 12:9-14; Lc. 6:6-11)

¹ Tijb dxej guyu Jesús lèn tijb yadoo. Lèn yadoo guin za' tijb xin naxü'n tibladyaa. ² Abi' ree bèn yu' lèn yadoo guin rula'ch reeman Jesús din guidoon zayünman laax dxej raziiladx reeman ya, din gac gutedia' reeman Jesús. ³ Dxel rëb Jesús loj xin naxü'n yaa guin:

—Bisu, guzuj galay guin.

⁴ Abi' rëbaman loj ree bèn guin:

—¿Xhie rayal güün bejn dxej raziiladx reeman? ¿Ni zagdxe ya o ni mal? ¿Guslaaman xguialnaban bejn ya o gugüjtaman laaman?

Per ad badxi't reeman xtiidxaman. ⁵ Dxel rdxe'ch Jesús ruguiaaman loj gra reeman, dád guyunaya luxdooan guial ad guyënt reeman naya lasa' reeman. Zianz rëbaman loj xin guin:

—Basli yaal.

Abi' basli yaax, loj hor guin gajc bayajcan. ⁶ Chi baza ree bënfarisew guin, zianz baya'n reeman diidx con ree xbejn Herodes din gugüjt reeman Jesús.

Zien ree bejn riga' ro'nijsdoo

⁷ Per Jesús zë gajcaman ro'nijsdoo Galilea con ree xbejnman. Zien da't ree bèn Galilea con ree bèn Judea binal laaman, ⁸ në ree bèn Jerusalén con ree bèn Idumea, në ree bèn zojb zatiblad ro' guiwro' Jordán, në ree bèn Tiro con ree bèn zojb niz Sídón. Dád zien ree bejn wej lod za' Jesús guial gogbee reeman ni rünman. ⁹ Zeel rëbaman loj ree xbejnman din guzujsin reeman tijb barcw par laaman chitëë gutëë ree bèn guin laaman. ¹⁰ Guial ma bayünman zien ree bejn, zeel rbig gra ree bënragxuu lojman din guqui' reeman laaman. ¹¹ Guiáad ree bèn yu' xindxab luxdoo chi ruguiaa reeman Jesús, ruzuxib reeman lojman, rbidxa' reeman rëb reeman:

—¡Lüj naj Xi'n Dios!

¹² Per gunabeeman xindxab guin ree chitëë guiëb reex chu laaman.

Rbe Jesús chiptio'p ree apóstoles

(Mt. 10:1-4; Lc. 6:12-16)

¹³ Dxel wè'p Jesús tijb ruguia', abi' gurejdxaman gra ree bèn guleman. Zianz wej reeman, ¹⁴ loj gra reeman gulejman chiptio'p reeman din su reeman con laaman zianczi guixhiaal tëëman laa reeman chigtie'ch reeman xtiidx Dios. ¹⁵ Abi' badëëman guialrniabee din yayün reeman bënragxuu ree yabëë tëë reeman xindxab luxdoo ree bejn. ¹⁶ Bèn guie ree naj guidxiptio'p ree bèn gule Jesús: Simón bèn gulëälajman Bëd, ¹⁷ Jacob con Waj, bèn naj ree xi'n Zebedeo, gunee Jesús laa reeman Boanerges (rën guiëban, xi'n guziaaw); ¹⁸ në Andrejs, Felip, Tol, Matew, Tumajs con Jacob xi'n Alfeo, në Tadeo, nëtëë Simón bèn bi'ch loj ree bèn Cananistas, ¹⁹ con Judas Iscariote bèn bayü Jesús.

Rëb ree bejn ca' Jesús xguialrniabee Beelzebú

(Mt. 12:22-32; Lc. 11:14-23; 12:10)

Chi gulox bacaabeeman laa reeman dxel badxinnëman laa reeman lod zojbaman. ²⁰ Dád zien ree bejn bido'p yagaj stijb, xt ni'quid bile't niajw Jesús con ree xbejnman. ²¹ Chi gogbee ree xfamil Jesús, dxel bidxin reeman din yaca' reeman laaman guial rëb reeman gujccaman rajc.

22 Abi' ree mextr rajc ley bén zëed ree Jerusalén rëb reeman:

—Bén guin rabëë xindxab luxdoo ree bejn por xguialrniabee Beelzebú, xin rniabee ree xindxab.

23 Dxel gurejdx Jesús laa reeman, rëbaman:

—¿Xhienaag yabëë satanás lasa' xindxab gajquix? 24 Bal tijb nacion, ad nadxagt riga' ree gobiarn, zadijl reeman abi' ad zanuut xguialrniabee reeman, 25 ziangajc tijb famil, bal rdilnë lasa' reeman, nayob la' lasa' reeman. 26 Yan, ziangajc bal satanás su contr lasa' xindxabgajquix, zala' lasa' reex abi' wed yagaj lox xguialrniabee reex.

27 'Abi' achut zajc chu' lidx tijb béngojl da't din cwanman gra xieenman bal id zaxhii xgajman laaman. Zian zile' cwanman ni rajpaman.

28 'Naj rni lojdi guial yu' perdon par gra dol ni rüjn bejn, yu' tëë perdon par gra diidxguijdx ni rniee bejn chutëëz. 29 Per bén guinieeguijdx xSprijt Dios, ad yu't dxej gacaman perdon, ma banijtaman loj Dios.

30 Rëb Jesús zian guial rëb reeman yu' xsprijt xindxab luxdooan.

Xniaa Jesús con ree bijchaman

(Mt. 12:46-50; Lc. 8:19-21)

31 Hor guin bidxin xniaa Jesús con ree bijchaman yu' lod za'man, per ad bile't niu reeman zeel guxhaal reeman bén chignee laaman. 32 Dxel ree bén zojbnë laaman yagaj bagojn reeman laaman, rëb reeman:

—Laa xniaal con ree bijchil za' lule' guin cayguuil reeman lüj.

33 Badxi' Jesús xtiidx reeman rëbaman:

—¿Chunin naj da nan con ree da bichan?

34 Dxel baguiaaman bén zojb ree gadëd lod zojbaman, rëbaman:

—Bén guie ree naj da nan con ree da bichan, 35 din graczi ree bén rüjn ni rën Dios, laa reeman naj da bichan, da zanan në da nan.

4

Xcwent bén rtie'ch bin

(Mt. 13:1-9; Lc. 8:4-8)

1 Zatiyb dxej culüü Jesús xtiidx Dios ro'nijsdoo Galilea. Abi' guial dád benzien bido'p lod za'man zeel wë'paman loj tijb barcw yu' lojnijs guin, abi' gurejman lojn guiáad ree bén guin riga' reeman ro' nijs guin. 2 Zien ree ni balüüman laa reeman, rüman laan loj reeman zi'c cwent, loj ree ni culüüman laa reeman rëbaman:

3 —Gol bacaagdiajg ni ganin lojdi: Tijb bejn briiman bigtie'chaman bin loj xguiniaaman. 4 Chi catie'chaman laan, ta'nan biajb lunejz abi' bidxin ree biguijn gudaw reeb laan. 5 Zata'nan biajb loj ree guiaj lod ad riga't zien yuj, abi' cari gulejnan guial ad zient yuj riga'. 6 Per chi gunan gubijdx, bigoolan abi' guial ad zro't liujn yu', gubidxan. 7 Zata'nan biajb loj ree yaquiëjch. Abi' chi guni'san, banidloj yaquiëjch guin laan, abi' ad cwat ladan. 8 Per zata'nan biajb loj yuj za'c, abi' dád gojcan, yu' ni cwa gajlbichii, yu' ni cwa gayojn yu' tëë ni cwa tibgayuu.

9 Rëb tëë Jesús loj reeman:

—Bén rën gucaagdiajg, gol bacaagdiajg.

Chexc zeel rulüü Jesús con cwent ree

(Mt. 13:10-17; Lc. 8:9-10)

10 Chi ma baya'nnë Jesús zata'nz ree bejn con guidxiptio'p ree xbejnman, dxel gunabdiidx reeman xhie rën guieë cwent guin. 11 Badxi'man laan rëbaman:

—Dios ma basa'n lëjt din chignia'di xhienaag naj xguialrniabeeman ni goc naguie'ch par lëjt, sa'n ree bën ad rliladxt xguialrniabeeman, con ganaxzi ree cwent naj guial gulün laa reeman. ¹² Din majsi rani loj reeman, per ad zuguaat reeman, majsi rigueijn reeman, per ad zignia't reeman chitëe yayejc reeman loj Dios abi' güünman perdon xtol reeman.

Rusignia' Jesús xcwent bën rtie'ch bin

(Mt. 13:18-23; Lc. 8:11-15)

¹³ Abi' rëb Jesús loj reeman:

—¿Nid rignia'di ya xhie rën guiëb cwent guin? ¿Xhieza naag chignia'di gra ni ganin lojdi? ¹⁴ Bën gutie'ch bin guin, laaman naj zi'c bën rtie'ch xtiidx Dios. ¹⁵ Bin biajb lunejz, naj zi'c ree bën rigueijn xtiidx Dios, per rdxin gajc xinxab rquiedix laan luxdoo reeman. ¹⁶ Yu' ree bën naj zi'c bin biajb loj ree guiaj. Rigueijn reeman xtiidx Dios abi' dád nix ru luxdoo reeman rigueijn reeman laan. ¹⁷ Per guial naj reeman zi'c tijb cwaan ni ad yu't zro' liuj, chi rzagdiaj reeman o chi rzunal ree bejn laa reeman din güün reeman laa reeman ni mal por xtiidx Dios, laa rusa'n gajc reeman ni rliladx reeman. ¹⁸ Yu' tëe ree bën naj zi'c bin ni biajb loj yaquiëjch. Rigueijn reeman xtiidx Dios, ¹⁹ per ru reeman xgab por ree ni riga' loj guidxliuj guie. Rusquiee guialnaza'c laa reeman rën reeman gap reeman graloj. Abi' guial yu' xgab guin guijc reeman, zianz rucwëez rucaagdiajg reeman xtiidx Dios, abi' achet sirv rüjn ni rucaagdiajg reeman. ²⁰ Per yu' ree bën naj zi'c bin biajb loj yuj zagdx, ridxga' reeman laan con guidib luxdoo reeman. Rüjn reeman zi'c rën Dios, laa reeman naj zi'c ni cwa gajlbichii o ni cwa gayojn o ni cwa tibgayuu.

Achet ni naguie'ch yu'

(Lc. 8:16-18)

²¹ Abi' rëb Jesús loj reeman:

—Achut bën ruze'c tijb guij par guta'cwaman laan con tijb caj, o gudxe'man laan xan loon, ruzujman laan ya din gusnin guidib. ²² Din achet ni naguie'ch yu' ni ad zaguiant ad yu' tëet ni ralan ni ad zagbeet bejn. ²³ Bën rën gucaagdiajg, gol bacaagdiajg.

²⁴ Rëb tëe Jesús:

—Gol been xgab por ree diidx ni caguiejndi. Bal ridxga'di xtiidx Dios, mazri gustëdguienman lëjt. ²⁵ Din bën ma rignia' xtiidx Dios, chignia'man mazri. Per bën ad rignia't, xt ta'n ni rignia'man ad zignia'traman.

Xcwent guial rni's bin

²⁶ Rëb tëe Jesús loj reeman:

—Xguialrniabee Dios naj zi'c rzajc bën rxübin loj xguiniaaman. ²⁷ Din majsi naga'yëjsaman o naga'naaman, majsi radxe o guiaal ya, rliejn bin guin abi' rni'san, ni'quid ragbeetaman xhienaag rajcan. ²⁸ Din yuj guin gajc rusni's laan, yaloj rliejnan najn tijb gui'xhdoo, dxel ririin dojn, zianz rtia ladan. ²⁹ Chi ma gojc reen dxel raru' reen guial ma bidxin tiamp yado'p reen.

Xcwent xhaj moxtajs

(Mt. 13:31-32; Lc. 13:18-19)

³⁰ Rëb tëe Jesús:

—¿Xhienaag ganin naj xguialrniabee Dios, o xhienaag güin diidx lojdi din chignia'di xhienaag naj xguialrniabeeman? ³¹ Rnin lojdi guial

xguialrniabee Dios naj zi'c naj xhaj moxtajs. Chi rxübin reeman laan. Laan naj ni mazri ni dobëz loj gra ree bin yu' loj guidxliuj. ³² Per chi ma guxübin reeman laan, rni'san rajcan mazri narooob loj gra ree cwaan, xt rajc rüjn xguixbitia's ree biguijn xidxan.

Balüü Jesús con ganax cwent
(Mt. 13:34-35)

³³ Balüü Jesús laa reeman xtiidx Dios con ganaxczi cwent zi'c naj ree ni ma beman, xt lodzi bignia' reeman. ³⁴ Ad rulüütaman laa reeman zezi, bal id zulüüman con cwent. Per chi ma za'man con ree xbejnman dxel rusignia'man laa reeman zagdxe xhie rën guiëb ree ni rëbaman.

Racwëëz Jesús bidoxh
(Mt. 8:23-27; Lc. 8:22-25)

³⁵ Dxej zii, chi gure guiaal, rëb Jesús loj ree xbejnman:
—Yo' ree zatiblad ro' nijs guin.

³⁶ Dxel basa'n reeman bën riga' ree yagaj, wë'p reeman loj barcw ni yu' Jesús zinë reeman laaman con ree barcw ren. ³⁷ Dxel brii bidoxh loj nijs guin, xt guzuloj cadxa nijs loj barcw guin. ³⁸ Per Jesús naga'yëjsaman loj barcw guin tijb luar naj xijchan, nucuugaman tijb almoad. Dxel bacwëën reeman laaman rëb reeman:

—¡Mextr! ¿Nid yu'l xgab ya? ¡Ma cayzëëb ree xan nijs!

³⁹ Abi' bixche Jesús, bacwëëzaman bidoxh guin rëb tëëman loj nijs guin:
—¡Bacwëëz, bayajcdxe!

Dxel bayajcdxe bi guin con nijs guin. ⁴⁰ Zianz rëb Jesús loj reeman:

—¿Chexc zeel rdxebidi? ¿Gadzidi chililadx naj ya?

⁴¹ Per laa reeman dád bidxeb reeman abi' rniabdiidx loj lasa' reeman:
—¿Chu bën guin zeel xt bi con nijs ruzoob xtiidxaman?

5

Rayüjn Jesús tijb xin yu' xindxab luxdoo
(Mt. 8:28-34; Lc. 8:26-39)

¹ Chi badxin Jesús con ree xbejnman zatiblad ro' nijsdoo guin, xdajn ree bën Gadara, ² baguiajzti Jesús loj barcw guin, tijb xin yu' xindxab luxdoo bigchaaglojx Jesús. Bariix ro' ree baa, ³ guial nabanx ni. Achutczi rajc rixhii laax ni'qui con caden. ⁴ Zien volt ma guxhii reeman yaax në guia'x con caden, per rüjngajquix gan rurooxix laan. Achut rüjn laax gan. ⁵ Dxejz guiaal rizax niz dajn con lad ree baa, rbixdiajx rguüilguijdx laagajquix con guiaj. ⁶ Zijtri baguiaax Jesús, baxüünx bigchaaglojx laaman abi' bazuxibix lojman. ⁷ Zianz gunëex rejs rëbix:

—¿Xhie rën! con naj Jesús, Xi'n Dios yu' xanyabaa? Rniaaban lojl ad gusagzil naj.

⁸ Rëbix zian, guial cayëb Jesús lojx:

—¡Xindxab, barii luxdoo xin guin!

⁹ Dxel gunabdiidx Jesús lojx rëbaman:

—¿Chu lal?

Badxi'xan rëbix:

—Legión lan din zien nayajcan.

¹⁰ Abi' rëbix lojman chitëë guixhiaalaman xindxab guin ree lood ren.

¹¹ Abi' gajxh yagaj riga' zien ree cüch cayaw reeb. ¹² Zianz rëb ree xindxab guin loj Jesús:

—Guxhaal dunujn lod za' ree cüch guin din yadxu'n lën reeb.

¹³ Dxel cwëjb Jesús barii ree xindxab guin luxdoo xin guin persi bayu reex lën ree cüch guin. Cost tio'p mil naj reeb. Dxel guzuloj cuxüün reeb, zianz bitidya' reeb ro' bala' xt lojnijs, lod gu' reeb nijs zianz güjt reeb. ¹⁴ Guiáad ree bën cayajp laa reeb, baxüün reeman bicojn reeman luguiedx në ree dajn abi' zien ree bejn wej biquiaa ni goc. ¹⁵ Chi bidxin reeman lod za' Jesús, baguiaa reeman xin barii xindxab guin ree luxdoo, zojbix najcw xabix, ma badëdguienx. Abi' bidxeb reeman. ¹⁶ Guiáad ree bën baguiaa gra ni goc con xin guin, në con ree cüch guin, be reeman diidx loj ree bën bidxin. ¹⁷ Dxel guzuloj rëb reeman loj Jesús din yazaman niz ladx reeman.

¹⁸ Chi bayu Jesús loj barcw guin, naguiejn rüjn xin barii xindxab guin ree luxdoo din chinalix laaman. ¹⁹ Per ad cwëjbt Jesús, rëbaman:

—Baguiaj lidxil, bignaj xfamilil, biguie diidx loj reeman gra ni ma been Dios por lüj, xhie tëë naag bayaman lüj.

²⁰ Dxel ziax, guzuloj rëbix loj ree bën zojb niz Decápolis gra ni been Dios por laax, abi' graczi reeman badxaloj.

*Rayajc xi'n Jairo në béngunaa bagaal xab Jesús
(Mt. 9:18-26; Lc. 8:40-56)*

²¹ Chi badxin Jesús loj barcw stiblad ro' nijs guin, dád zien ree bejn bido'p, persi ro'zi nijs guin baya'nman. ²² Dxel bidxin tijb bën rniabee lën tijb xyadoo ree bën Israel, laman Jairo. Chi baguiaaman Jesús, bazuxibaman lojman, ²³ abi' guzajcaman laaman liaadx, rëbaman:

—Ma cayëjt da xi'n'an. Yo'sii din gudxiib yaal guijqum din yayajquim din guibanm.

²⁴ Zinët Jesús bën guin, dád zien bejn zinal laaman xt rixa't reeman laaman. ²⁵ Loj graczi reeman no'ch tijb béngunaa, ma gojc chiptio'p iiz ragxuuman ryajbaman rejn. ²⁶ Dád ma guzagdiajman, ma banijt graczi ni rajpaman guial wejman loj ree doctor, per ad bayajctaman, aal mazri zro' rajcaman. ²⁷ Chi biguiejnman gra ni rüjn Jesús, gudëdaman lad ree bën guin, gubigaman niz xijchaman dxel bagaalaman xabaman. ²⁸ Guial gunaladxaman: “Gugalzan xabaman, ma bayajc gajcan.” ²⁹ Loj hor zii gajc gulëz biajbaman rejn, abi' gogbeeman ma bayajcaman. ³⁰ Laa gogbee gajc Jesús guial yu' chu ma bayajc por xguialrniabeeman, abi' badxi' lojman loj ree bën guin dxel gunabdiidxaman, rëbaman:

—¿Chu baqui' da xaban?

³¹ Abi' rëb ree xbejnman lojman:

—Awa ruguiaal xt rixa't reeman lüj guiáad lüj rniabdiidxil chu baqui' xabil. ³² Per Jesús ruguiaaman gra lad din guguiaaman chu baqui' laaman.

³³ Abi' guidib rnij béngunaa guin guial rdxebaman, guial gogbeeman ma bayajcaman, bigzuxibaman loj Jesús, beman diidxli ni beenman. ³⁴ Dxel rëb Jesús lojman:

—Xi'n, guial bililadxil naj zeel ma bayajquil. Baguiaj zagdxe. Ma bayajquil guialguidx ni goquil.

³⁵ Sta canee Jesús zian, chi bidxin ree bën guza lidx Jairo, rëb reeman loj Jairo:

—Ma güjt xi'n'l. Ad ruslenril mextr guin mazri.

³⁶ Per chi biguiejn Jesús ni rëb reeman, rëbaman loj Jairo:

—Ad rdxebil, bililadxzi naj.

³⁷ Ad cwějbt Jesús ninal gra ree bén riga' laaman, Bédzi, con Jacob, con Waj bijch Jacob. ³⁸ Chi bidxin reeman lidxaman, baguiaa Jesús cayajc naquie' guial roon rbixdiaj reeman. ³⁹ Dxel guyuman lénü abi' rëbaman loj reeman:

—¿Chexc zeel roon rbixdiajdi? Ad güjttim, naga'yëjsim.

⁴⁰ Per baze' reeman laaman. Dxel gunabeeman barii gra reeman, zianz binëman xdadim con xniaam con ree bén zinëman, lod naga' bindo guin. ⁴¹ Dxel gunaazaman yaam rëbaman:

—Talita, cumi —Rën guiëban: Läj rnin, bindoo, bixche.

⁴² Loj hor ziigajc bixchem guzuloj cazam. Yu'm chiptio'p ijz. Abi' dád badxa loj ree bén riga'. ⁴³ Per gunabee Jesús laa reeman chitëë chu loj guiëb reeman ni goc, gunabee tëëman gudëëd reeman ni gawim.

6

Radxin Jesús Nazaret

(Mt. 13:53-58; Lc. 4:16-30)

¹ Baza Jesús yagaj, badxin ladxaman con ree xbejnman. ² Chi bidxin dxej raziiladx ree bejn, guzuloj culüüman bejn ree lën yadoo. Abi' gra ree bén cucaagdiajg dád badxa loj reeman ni rnieeman, abi' rëb reeman:

—¿Ban basiid bén guin gra ni rnieeman? ¿Ban gulëëman guialrignia' guin abi' chu badëë guialrniabee zeel rünjman milagr guin ree?

³ ¿Nid laaman naj bén carpinter ya, xi'n Li abi' ree bijchaman naj Jacob, Xiëb, Judas, në Simón? Guiáad ree bizanman zojb luguiedx guie.

Abi' ad bidxga't reeman Jesús. ⁴ Per rëbaman loj reeman:

—Guidibczi rajp reeman respejt tijb bén rudëë xtiidx Dios loj ree bejn. Per ladxaman achut rajp laaman respejt, ni'qui lidxaman, ni'qui ree xfamilaman ad rajpt laaman respejt.

⁵ Ad bile't nünj Jesús zien ree milagr yagaj. Bëlzi ree bénragxuu bayünjman, badxiib yaaman guijc reeman. ⁶ Dád badxalojman guial ad bililadxt reeman laaman. Dxel zëman guiedx naj ree gajxh, ziglüüman bejn ree.

Rxhiaal Jesús guidxiptio'p ree xbejnman chiglüü reeman xtiidx Dios

(Mt. 10:5-15; Lc. 9:1-6)

⁷ Dxel gurejdx Jesús guidxiptio'p ree xbejnman, abi' guxhaalaman tio'p gaj reeman. Badëëman guialrniabee loj reeman din yabëë reeman xindxab ree luxdoo ree bejn. ⁸ Dxel gunabeeman din achetczi chinë reeman par runejz, ni'qui guijxh, ni'qui guialraw, ni'qui milia, tijbzi yagriiadx reeman, ⁹ con xgurëch reeman, con tijbzi lajd najcw reeman. ¹⁰ Dxel rëbaman loj reeman:

—Yu lod guidxindi, tijbzi yagaj yaya'ndi xt guidxin dxej yazadi luguiedx guin. ¹¹ Bal yu' guiedx lod ad rënt reeman lëjt o ad rënt reeman gucaagdiajg reeman ni rnieedi, gol barii yagaj, gol gudxiyp guxyuj guia'di zi'c sen guial ad rënt reeman guzoob reeman diidx. Din naj rni lojdi, guial dxej ni yadëëd ree bejn cwent loj Dios mazri casti narooob yayal reeman guial loj ree bén Sodoma në Gomorra.

¹² Zianz brii reeman ziguedx reeman loj ree bejn guial rayal yayünj reeman xgab por xtol reeman. ¹³ Abi' rabëë reeman zien ree xindxab luxdoo ree bejn, zien tëë ree bénragxuu gudëëb reeman sejt, abi' bayünj reeman laa reeman.

*Güjt Waj Bén baroobnijs bejn ree**(Mt. 14:1-12; Lc. 9:7-9)*

¹⁴ Chi biguejn rey Herodes ni rüjn Jesús guial ruza't ree bejn laaman guidibczi, rëb reeman:

—Waj, Bén baroobnijs bejn ree ma baban, zeel rajpaman guialrniabee rüjnman milagr ree.

¹⁵ Per yu' reeman rëb:

—Elíasan, Bén rudëë xtiidx Dios loj ree bejn.

Yu'za reeman rëb:

—Tijb Bén rudëë xtiidx Dios loj ree bejnan lasa' ree Bén gocli.

¹⁶ Chi biguejn Herodes rëb reeman zian, rëbaman:

—Wajn, xin gunabeen biru' yëjn, laaxan ma baban yan.

¹⁷ Rëb Herodes guin zian din laagajcaman gunabee gunaaz reeman Waj, abi' badxe'man laaman ladxguuib por Herodías. Herodías naj xbéngunaa Filip bijch Herodes. Per Herodes cwa'man Herodías. ¹⁸ Abi' guial rëb Waj loj Herodes:

—Ad laat tia' xbéngunaa bijchil.

¹⁹ Zeel bidxe'ch Herodías Waj, guyënman nugüjtaman laaman. Per ad riletan, ²⁰ din rdxeb Herodes guial ragbeeman rüjn Waj ni rën Dios, rüjn tëëman zi'c rayal, zeel ad cwëjbtaman xhie nünjnë Herodías Waj. Majsi ad ragbeet Herodes xhie güünman por ni rëb Waj lojman, per ruladxaman gucaagdiajgaman ni rnieeman.

²¹ Per bidxin dxej been Herodías ni rënman. Chi baza' Herodes ijz, abi' beenman lanij, badxe'man tijb guialraw par Bén rniabee ree në par ree Bén rniabee ree suldad nëtëë ree Bén zojbloj niz Galilea. ²² Dxel guyu xi'n Herodías lod cayajc lanij guin zianz baya'm. Abi' Herodes con ree xbioozaman dád bayuladx reeman zi'c baya'm. Zeel rëb rey guin lojm:

—Gunab ni rëntzil, naj gune laan.

²³ Xt badëë xtiidxaman gudëëman ni guiniabtzim, majsi garol ni rajpaman. ²⁴ Dxel bariim bignabdiidx loj xniaam, rëbim:

—¿Xhie ganaaban?

Badxi'man laan rëbaman:

—Gunab guijc Waj Bén ruoobnijs bejn ree.

²⁵ Laa bayugajquim lod za' rey Herodes, rëbim lojman:

—Yan gajc rënan guneel guijc Waj, Bén ruoobnijs bejn ree, guneelan loj tijb pliajt.

²⁶ Dád guyu naya Herodes, per mal badëëd xtiidxaman guidib loj ree Bén riga', zeel ad bile't nibexuuman nudëëman ni gunabim. ²⁷ Dxel gunabee Herodes tijb suldad din chica'x guijc Waj. ²⁸ Zianz wej suldad guin lën ladxguuib guin, gutü'x guijc Waj badxe'xan loj pliajt binëxan lojm. Dxel bayü loj xniaamin.

²⁹ Chi gogbee ree xbejn Waj guial ma güjtaman, baca' reeman xcuerpaman persi biquie'ch reeman laaman.

*Ruyaan Jesús gaay mil bejn**(Mt. 14:13-21; Lc. 9:10-17; Jn. 6:1-14)*

³⁰ Chi bayejc ree xi apóstoles Jesús, be reeman diidx lojman gra ni been reeman në ni balüü reeman. ³¹ Dxel rëb Jesús loj reeman:

—Gol guda, yo' dunujz ree niz lod achut bejn zojb din yaziiladx ree ta'n.

Rëbaman zian guial dád zien ree bén zia zien tëë ree bén zëed, xt ni'qui guial gaw reeman ad riletan.

³² Dxel Jesús con ree bén naj ree apóstoles zë reeman loj barcw tijb luar lod achut zobj. ³³ Per dád zien ree bejn baguiaa guial zë reeman, abi' bayünbee reeman laa reeman zeel zien ree bejn brii luguiedx guin ree ruxüün reeman, abi' yalohl laa reeman bidxin lod zë Jesús con ree xbejnman.

³⁴ Chi baguiajt Jesús loj barcw guin, baguiaaman bén guixiuj riga' yagaj, abi' bayaman laa reeman guial za' reeman zi'c xiil achut rajp. Dxel guzuloj balüüman laa reeman, zien ree ni balüüman laa reeman. ³⁵ Chi ma gudxe, gubig ree xbejnman, rëb reeman lojman:

—Ma gudxe yan, abi' achut bejn zobj niz guie. ³⁶ Gūjdx loj ree bén guin din che reeman ranch ree në ree guiedx ni riga' gajxh chisii xhienin gaw reeman.

³⁷ Per rëb Jesús loj reeman:

—Lëjt gol badëed ni gaw reeman.

Dxel rëb reeman lojman:

—Per zro' da't milia ryaadx din yo' ni gaw ree bén guin, zi'ct ni rüjn bejn gan loj tio'p gayuu dxej.

³⁸ Abi' rëb Jesús loj reeman:

—¿Bël guiadxtil ca'di? Gol baguiaa don.

Chi baguiaa reeman, dxel rëb reeman:

—Gaay guiadxtil con zatio'p bëjl.

³⁹ Dxel gunabeeman din cwe tibcwaa gaj reeman loj guixya'. ⁴⁰ Zianz gurej reeman zian, yu' lod gure tibgayuu reeman, yu' lod gure tü'pchii reeman. ⁴¹ Abi' cwa' Jesús guigaay guiadxtil guin con grop bëjl guin. Dxel gules lojman xanyabaa, badëeman quixtëe loj Dios, gula'man guiadxtil guin badëeman loj ree xbejnman persi gudi's reeman laan loj ree bén riga', gudi's tëeman grop bëjl guin loj gra reeman. ⁴² Graczi reeman gudaw xt bigdxinladx reeman, ⁴³ abi' staczi bacha reeman chiptio'p dxüm guiadxtil laay con bëjl ni baya'n. ⁴⁴ Loj ree bén gudaw no'ch cost gaay mil xinguaaw.

Rza Jesús loj nijs

(Mt. 14:22-27; Jn. 6 :16-21)

⁴⁵ Dxel gunabee Jesús guyu ree xbejnman loj barcw din tédgaj reeman stiblad ro' nijs par guidxin reeman Betsaida, la'tgaj cuzaadiidxnëman benzien guin ree. ⁴⁶ Chi gulox bazaadiidxnëman laa reeman, wejman guijc tijb guia', persi gurejdx gunabaman Dios. ⁴⁷ Chi ma cabej guiaal, ma yu' barcw guin galay nijs guiáad Jesús baya'n xtijbzaman guijc guia' guin. ⁴⁸ Dxel baguiaaman dád cazagdiaj ree xbejnman cusa reeman barcw guin guial rliaj bi niz loj barcw guin. Abi' chi ma cayreguiaal zibig Jesús loj reeman cazaman loj nijs guin, beenman zi'c bén tédnejz. ⁴⁹ Chi baguiaa reeman cazaman loj nijs guin gunaladx reeman sprijt malan, abi' gurixdiaj reeman. ⁵⁰ Dád cadxeb reeman por ni cugiaaa reeman. Per guneenë Jesús laa reeman rëbaman:

—¡Gol bagu' luxdoodi, ad bal rdxebidi, najn!

⁵¹ Dxel guyuman loj barcw guin, zianz gulëjz bi guin. Guiáad laa reeman dád badxa loj reeman, ⁵² din nayaaw xquiarguejn reeman, abi' ad bignia't reeman milagr ni beenman con guiadxtil guin ree.

Rayüjn Jesús bénragxuu ree Genesaret
(Mt. 14:34-36)

⁵³ Chi ma gudëd reeman lojnijs guin bidxin reeman xdajn ree bén Genesaret, yagaj guxhii reeman barcw guin ro' nijs. ⁵⁴ Naabzi baguiajt reeman loj barcw guin, laa bayünbee gajc ree bejn Jesús. ⁵⁵ Abi' gutie'ch reeman diidx guidib niz yagaj. Dxel guzuloj zinë ree bejn bénragxuu ree lod riguejntzi reeman za' Jesús. ⁵⁶ Bantëöz zëman, majsi guiedx narooob o guiedx dobëz o ranch ree, rguijxh reeman bénragxuu guin ree niz lod tédaman. Dxel rzajc reeman laaman liaadx din tiëbaman gugaal reeman majsi guia'z xabaman. Abi' graczi ree bén bagaal xabaman bayajc.

7

Ni rüjn persi rüjn bejn dol
(Mt. 15:1-20)

¹ Tijb dxej, tio'p choon ree bénfarisew con ree mextr rajc ley, bén guza ree Jerusalem, bibig reeman loj Jesús. ² Abi' chi baguiaa reeman guial yu' ree xbejn Jesús cayaw, ad banaat reeman zi'c naj costumbr. Dxel caneeguidx reeman laa reeman. ³ (Din bénfarisew në gra ree bén Israel zinaldxi'ch reeman xcostumbr xbéngulal reeman guial ad zajct gaw reeman bal id reeman gunaa zi'c naj costumbr guin. ⁴ Në chi raza reeman lugua', ad rawt reeman bal id zunaa reeman zi'c naj costumbr guin. Dád zien ni zinal reeman güün reeman zi'c xhienaag quib reeman re, con vajs, con ree trast guuib, në xloon reeman riguib reeman.) ⁵ Zeel bénfarisew ree con ree mextr guin, gunabdiidx reeman loj Jesús, rëb reeman:

—¿Chexc zeel ad runaat ree xbejnl zi'c naj xcostumbr dux béngulal ree?
¿Chexc zeel raw reeman zianzi?

⁶ Dxel rëb Jesús loj reeman:

—¡Bén rusquiee!, waliqui ni gunee Isaías por lëjt, bén badëë xtiidx Dios loj ree bejn, chi bacaaman:

Bén guie ree, rëbzi reeman guial rën da't reeman naj,
per ad rënt reeman naj con guidib luxdoo reeman.

⁷ Xlia'czi rën da't reeman naj,

abi' rulüü reeman bejn ree ganaxzi ni rbëëguijc ree bénguidxliuj.

⁸ Yan, rusa'ndi xtiidx Dios tiblاد persi zinalidi xcostumbr ree bénguidxliuj.

⁹ Rëb tëë Jesús loj reeman:

—Par chitëë nit xcostumbridi zeel rusa'ndi xtiidx Dios tiblاد. ¹⁰ Rëb Moisejs: “Gojp respejt xdadil con xnial”, abi’ “Bén guzaal diidxmal guijc xdad o xnial, rayal guiëtaman.” ¹¹ Per lëjt rëbidi guial zile' guiëb bejn loj xDadaman o xnial: “Ad zajct günan lüj yudar, din gra ni ra'pan naj Corbán” (Corbán rën guiëb gran naj par Dios). ¹² Rëbidi, bén guiëb zian, ad zile'tri güün xdad xnialman yudar. ¹³ Abi' rbëëladxidi xtiidx Dios persi zinal xcostumbridi ni rulüü lasa'di, në zien ree ni ren rüjndi lasa' ree ni guin.

¹⁴ Dxel gurejdx Jesús bén zien guin ree, rëbaman:

—Gol bacaagdiajg gradi gol bignia' tëë ni ganin: ¹⁵ Ad ni rawt bejn rüjn persi rüjnman dol. Ni ririi ro'man në ni rüjnman, laan rüjn persi rüjnman dol. ¹⁶ ¡Bén rën gucaagdiajg, gol bacaagdiajg!

¹⁷ Chi baza Jesús lod za' ree bèn guin bayuman lènü, dxel gunabdiidx ree xbejnman xhie rën guiëb ni rëbaman. ¹⁸ Dxel rëbaman loj reeman:

—¿Në lëjt ad rignia't ni canin ya? ¿Nid ragbeedi ya guial ad ni rawt bejn rÿjn persi rÿjnman dol, ¹⁹ din ni raw bejn ad rejtan luxdooan, rejn lënman, abi' rariin?

Zian basignia'man guial ad rÿjnt bejn dol por ni rawzaman. ²⁰ Rëbaman:

—Ni ririi ro' bejn në ni rÿjnman, laan rÿjn persi rÿjnman dol. ²¹ Din guijc bejn zëed graloj xgab mal, guial rÿjn ni dxuudx, guialgubaan, guialrugÿjt lasa', ²² guial rzunë béngunaa ren o xinguaaw ren, guial-rzëëbladx xieen ben ren, guial rÿjn ni mal, guialrusquiee, guialrajp vijs, guialnadëdloj, guialrbëë xtiidx bejn, guialrÿjn benro', në guial rÿjn ni ad rayalt. ²³ Graczi ree ni guin zëed guijc bejn, abi' laan rÿjn persi rÿjnman dol.

Rayajc xi'n tijb bèn Sirofenicia

(Mt. 15:21-28)

²⁴ Chi baza Jesús niz yagaj, zëman niz Tiro në Sidón. Dxel guyuman tijb lènü guial ad guyëntaman niagbee ree bejn, per ad gojct nuquie'ch lojman. ²⁵ Din gogbee gajc xniaa tijb bindoo yu' xindxab luxdoo. Abi' wej xniaam lod za' Jesús zianz bazuxibaman lojman. ²⁶ Ad najtaman bèn Israael, najman bèn Sirofenicia. Dxel guzajcaman liaadx loj Jesús din yabëëman xindxab guin luxdoo bindoo guin. ²⁷ Per rëb Jesús lojman:

—Badëëdxgaj mod gaw yaløj ree xindoo, din ad rayalt chiquied bejn guiadxtil loj xi'nman din gudëëman laan gaw ree bë'cw.

²⁸ Badxi' bèn guinan rëbaman:

—Waliquil, Dad, per në ree bë'cw raw xguiadxtil laay reem ni ryajb xan mex.

²⁹ Dxel rëb Jesús:

—Laaqui guneel. Ma zajc yaguiajl, ma barri xindxab guin luxdoo xi'nl.

³⁰ Chi badxin lidx bèn guin, baguiaaman laa bindo guin naga' loj loon, ma barri xindxab guin luxdoo.

Bayajc tijb bèn nacwa't ad rniee tëëtaman zagdxë

³¹ Baza Jesús niz Tiro, gudëdaman niz Sidón, në loj ree guiedx riga' Decápolis abi' bidxinman ro'nijsdoo Galilea. ³² Ni bidxinnë reeman tijb xinguaaw nacwa'tix ad rajc tëët rnieex zagdxë. Abi' rëb reeman loj Jesús din gudxiib yaaman guijquix. ³³ Zianz binë Jesús laax tiblad, badxe' xbacwënman lën guidiajguix, abi' con xhiejnman bagaalaman lÿdxix.

³⁴ Dxel gules lojman xanyabaa, banajladxaman, rëbaman:

—¡Efata! —rën guiëban: ¡Baxal!

³⁵ Loj hor zii gajc baxal ree guidiajg xin guin, baban lÿdxix dxel guzuloj caneex zagdxë. ³⁶ Dxel gunabee Jesús laa reeman chitëë chu loj guiëb reeman ni goc. Per guial rëbaman zian, mazri rÿ reeman laan loj ree bejn.

³⁷ Dád badxa loj reeman rëb reeman:

—Xi zagdxë naj gra ree ni rÿjnman, xt rÿjnman persi rigueijn ree bèn nacwa't, abi' ree bengop rniee reeman.

8

Ruyaan Jesús tajp mil bejn

(Mt. 15:32-39)

¹ Tjib dxej bido'p zien ree bejn abi' achet ni gaw reeman. Dxel gurejdx ree xbejn Jesús rëbaman loj reeman:

² —Rayan bën guin ree din ma gojc choon dxej nadxu'në' reeman guie, abi' ad ca't ni gaw reeman. ³ Abi' bal yaxhalan laa reeman lidx reeman sin gualraw, dool yadaj reeman lunejz, din yu' reeman zëed zijt.

⁴ Dxel rëb ree xbejnman:

—Per, ¿ban guin yuca'n ni gaw ree bën guin, achutczi bejn zojb niz guie?

⁵ Dxel gunabdiidxaman loj reeman rëbaman:

—¿Bël guidahtil ca'di?

Abi' rëb reeman:

—Gajdxan.

⁶ Dxel gunabeeman gurej ree bën guin luyuj. Zianz cwa'man guigajdx guidahtil guin, badëëman quixtëë loj Dios, abi' gula'man laa reen badëëd loj ree xbejnman persi gudi's reeman laa reen loj gra ree bën guin. ⁷ Nëgajc tio'p choon ree bëjldoo ca' reeman, abi' badëëman quixtëë loj Dios dxel gunabeeman gudi's reeman në laa reeb loj ree bën guin. ⁸ Graczi reeman gudaw xt bigdxinladx reeman, abi' staczi bacha reeman gajdx dxüm guidahtil laay në bëjl ni baya'n. ⁹ Bën gudaw ree naj reeman cost tajp mil. Chi gulox gudaw reeman, dxel bazaadiidxnë Jesús laa reeman. ¹⁰ Zianz guyuman loj barcw con ree xbejnman zë reeman niz Dalmanuta.

Rniab ree bënfarisew tjb milagr loj Jesús

(Mt. 16:1-4; Lc. 12:54-56)

¹¹ Dxel bidxin ree bënfarisew, guzuloj cadildiidxnë reeman Jesús, abi' par güün reeman laaman prueb, gunab reeman güünman tjb milagr zi'c tjb sen gual por Dios zëëdaman. ¹² Dxel banajladx Jesús, rëbaman:

—¿Chexc zeel rëndi günan tjb milagr? Diidxli ganin, achetczi milagr günan guguaadi.

¹³ Dxel basa'nman laa reeman, bayuman loj barcw zatjib, zignë ree xbejnman stiblad ro' nijs guin.

Xlevadur ree bënfarisew

(Mt. 16: 5-12)

¹⁴ Bayanladx ree xbejn Jesús ninë reeman gualraw, tjbzi guidahtil ca' reeman loj barcw guin. ¹⁵ Abi' chi rëbaman loj reeman:

—Gol gojp cudad con xlevadur ree bënfarisew në xlevadur Herodes.

¹⁶ Dxel guzuloj rëb loj lasa' reeman:

—Naman duloj ree zian gual ad naca't ree guidahtil.

¹⁷ Abi' gogbee Jesús ni canee reeman, zianz rëbaman:

—¿Chexc zeel rëbidi gual ad ca'tidi guidahtil? ¿Staczi ad rignia'tidi ya? ¿Sta nayaaw xquiarguejndi ya? ¹⁸ Yu' guaalojdi per rulüü ad ruguaatidi, yu' guidaajguidi per rulüü ad riguejntidi. ¿Nid rusaaladixidi ya? ¹⁹ Chi gudi'san gaay guidahtil loj gaay mil bejn, ¿bël dxüm ni laay bato'pidi?

Badxi' reeman laan rëb reeman:

—Chiptio'pan.

²⁰ Dxel rëbaman:

—Laadx chi gudi'san gajdx guidahtil loj tajp mil bejn, ¿bël dxüm guidxa baca'di?

Badxi' reeman laan rëb reeman:

—Gajdxan.

²¹ Dxel rëbaman:

—¿Staczi ad waygnia'tidi ya?

Rayüjn Jesús tijb bén ad ranit loj

²² Chi bidxin Jesús guiedx Betsaida con ree xbejnman. Binë ree bejn tijb bén ad ranit loj, rëb reeman loj Jesús din gugaalaman guiaalojman. ²³ Dxel gunaaz Jesús yaaman gulëëman laaman luguiedx guin, abi' gudëëb xhiejnman guiaalojman, baqui'man guiaalojman. Zianz gunabdiidxaman rëbaman:

—¿Rajc ruguiaal ta'n ya?

²⁴ Dxel guzuloj cuguaaman, abi' rëbaman:

—Ruguan bejn ree, per rulüü naj reeman zi'c yag ni caza.

²⁵ Dxel bagaal Jesús guiaalojman stijb, abi' rëbaman lojman din guguiaadxijchaman, dxel guzuloj cuguaaman zagdxe, naynidxuj ma ruguiaaman gra. ²⁶ Abi' baxhaal Jesús laaman lidxaman, rëbaman:

—Ad yayul luguiedx guin achu tëë loj guiëbil xhienaag bayajc lojl.

Rëb Bëd guial Jesús naj Cristo

(Mt. 16:13-20; Lc. 9:18-21)

²⁷ Bazanë ree xbejn Jesús niz Galilea, wej reeman guiedx riga' ree Cesarea de Filipo. Chi zë reeman lunejz gunabdiidx Jesús loj ree xbejnman, rëbaman:

—¿Chu rëb ree bejn najn?

²⁸ Badxi' reeman laan rëb reeman:

—Yu' reeman rëb lüj naj Waj bén baroobnijs bejn ree, yu'za reeman rëb lüj naj Elías, yu' tëë reeman rëb lüj naj tijb ree bén badëëd xtiidx Dios loj ree bejn gocli.

²⁹ Dxel gunabdiidxaman rëbaman:

—Laadx lëjt, ¿xhie nadi chu najn?

Badxi' Bëdan rëbaman:

—Lüj naj Cristo.

³⁰ Per rëb Jesús loj reeman achu loj guiëb reeman zian.

Rugojn Jesús guiëtaman

(Mt. 16:21-28; Lc. 9:22-27)

³¹ Guzuloj Jesús rëb loj ree xbejnman:

—Rayal sagdiaj da't Bén guxhaal Dios. Ad zënt ree guxtis Israel laaman, ni'qui ree bixhioz rniabee ree bixhioz, ni'qui ree mextr rajc ley. Gugüjt reeman laaman, per ni yayon dxej yabanman.

³² Zagdxe basignia'man laa reeman. Dxel gulëëcaan Bëd laaman, rëbaman lojman chitëë rëbraman zian. ³³ Per badxi' lojman baguiaa ree xbejnman, dxel gudilëman Bëd rëbaman:

—¿Bisüd lon, Satanás!, din ad por Diost zëed ree xgab ni rüjnl, rüjnl zi'c naj xixgab bénguidxliuj.

³⁴ Dxel gurejdx ree xbejn Jesús con ree bén riga' yagaj, abi' rëbaman loj reeman:

—Bal chu rën gac da bejnan, ad rayalt güünman zi'c naj xixgabaman. Siibnejzaman guialzi ni tëdzaman abi' guidnalaman naj. ³⁵ Din bén mazri rën guialnaban ni rajpaman loj guidxliuj guie, zadxin dxej gusëëbaman laan, per bén guiët por naj në por da diidxan, zajpaman guialnaban tiblayaa con Dios. ³⁶ ¿Xhie gan güün bejn gapaman gra ni yu' loj guidxliuj bal canijtaman loj Dios? ³⁷ Din ad zile't sii bejn xguialnabanman xanyabaa. ³⁸ Din bén yatunë naj në da diidxan niz loj ree bëndol bén ad

zinalt ree xnejz Dios, bén riga' ree yan, ziangajc naj, najn Bén guxhaal Dios, yatunë'n laaman chi guialan con xguialrniabee da Dadan con ree xianjlanan.

9

¹ Rëb tëë Jesús loj reeman:

—Diidxiciz ganin, yu' ree bén za' guie, ad zëjtt xt guguaa reeman gui't xguialrniabee Dios.

Bidxaa Jesús loj choon ree xbejnman

(Mt. 17:1-13; Lc. 9:28-36)

² Chi goc xho'p dxej, wej Jesús tijb rugua'ya, binëman Bëd, Jacob con Waj. Yagaj bidxaa Jesús niz loj reeman. ³ Balaa xabaman bacha', gojcan naquichbëj, achutczu rguib lajd zian loj guidxliuj guie. ⁴ Dxel baguaa reeman Elías në Moisejs cayünë reeman Jesús diidx. ⁵ Abi' rëb Bëd lojman:

—Mextr, jzagdxen nadxu'n guie! Yaguieenan choon ranch, tijban par lüj, tijban par Moisejs, zatijban par Elías.

⁶ Per ad ragbeet Bëd xhienin caneeman guial dád bidxeb reeman. ⁷ Loj hor guin biguiajt tijb zäj beenan bala guijc reeman, abi' loj zäj guin biguien cha' bejn rëbaman:

—Bén guie naj da Xi'nan, bén rën da'tan, gol bazoob xtiidxaman.

⁸ Abi' chi baguaa reeman gadëd lod za' reeman achutri za'në Jesús, tijbzi laaman za' yagaj. ⁹ La'tgaj cayguiajt reeman rugua' guin, rëb Jesús loj reeman chitëë chu loj guiëb reeman ni baguaa reeman, xt yaban Bén guxhaal Dios. ¹⁰ Abi' laaz reeman ragbee ni baguaa reeman, rniabdiidx tëë loj lasa' reeman xhie rën guiëb guial yabanman loj ree bengüt. ¹¹ Dxel gunabdiidx reeman loj Jesús, rëb reeman:

—¿Chexc zeel rëb ree mextr rajc ley guial yaloj Elías gui't?

¹² Badxi'man laan rëbaman:

—Walican yaloj Elías gui't, laaman guzuxnejz gra. Per, ¿chexc zeel ca loj xtiidx Dios guial Bén guxhaal Dios sagdiaj da'taman ad zën tëët reeman laaman? ¹³ Naj rni lojdi guial mal bi't Elías, abi' beennë reeman laaman ni guyëntzi reeman zíc ca loj xtiidx Dios ni rayal sacaman.

Rayüjn Jesús tijb xin yu' xindxab luxdoo

(Mt. 17:14-21; Lc. 9:37-43)

¹⁴ Chi badxin Jesús lod za' sta'n ree xbejnman, baguaaaman dád zien bejn riga', në ree mextr rajc ley za' yagaj cadildiidx reeman con ree xbejnman. ¹⁵ Chi baguaa reeman zëëd Jesús, dád badxa loj reeman abi' baxüün reeman bicajpdioz reeman laaman. ¹⁶ Dxel gunabdiidxaman loj reeman rëbaman:

—¿Chexc zeel cadildiidxidi?

¹⁷ Abi' rëb tijb bén za' yagaj:

—Mextr, zidnë' da xi'nan lojl guial yu' xindxab luxdoox abi' nusa'nx laax gop. ¹⁸ Bantëëz guin za'x, chi ru xindxab guin luxdoox rureeyujx laax, abi' rbëëx bichijn ro'x, raw tëë ree layix, dxel ratiaguix. Ma gunaaban loj ree xbejnl din nabëë reeman xindxab guin, per ad gojct reeman.

¹⁹ Zeel rëb Jesús:

—¡Bén ad riladxt! ¿Xt goc gazunë'n lëjt gadaan tëën lëjt? Gol tanë xinzii guie.

20 Dxel binë reeman laax lojman. Per chi baguiaa xindxab guin laaman, laa bagüjtya'gajquix xin guin, bareeyujx laax abi' rbixtüjpix ririi tëë bichijn ro'x. 21 Dxel gunabdiidx Jesús loj xdadix rëbaman:

—¿Goc guzuloj rajquix zian?

Badxi'man laan rëbaman:

—Diizd xindobëzix. 22 Dád zien volt ruzaalix laax loj guij në loj nijs din guiëtix. Zeel bal zajc güünl xhienin por dunujn, gognë dunujn, baya dunujn.

23 Dxel rëb Jesús lojman:

—¿Chexc zeel nal, “bal zajcan”? Graczan zajc bal chu rliladx naj.

24 Dxel gurixdiaj xdadix rëbaman:

—¡Rliladxan lüj, gognë naj din chililadxan mazri!

25 Chi baguiaa Jesús cado'p zien bejn dxel gudilëman xindxab yu' luxdoo xin guin, rëbaman:

—Xindxab gop nacwa't tëë, rniabeen lüj din yariil luxdoo xin guin. Ad bal yajejcril luxdoox zatijb.

26 Dxel gurixdiaj xindxab guin, abi' bagüjtya'x laax zatijb abi' bariix luxdoox, basa'nx laax zi'c xingüt zeel rëb ree bejn guial ma güjtix. 27 Per gunaaz Jesús yaax gulesaman laax, dxel guzulix.

28 Dxel bayu Jesús lënü con ree xbejnman, abi' gunabdiidx reeman lojman, rëb reeman:

—¿Chexc zeel ad gojct nalëën xindxab guin luxdoo xin guin?

29 Badxi' Jesúsán rëbaman:

—Par yarii lasa' ree xindxab guin, rayal cwedx guiniabidi Dios guiba'n tëëdi.

Rugojn Jesús zatijb guial guiëtaman

(Mt. 17:22-23; Lc. 9:43-45)

30 Chi baza reeman yagaj, gudëd reeman niz Galilea, per ad guyënt Jesús chu niagbee guial cadëdaman niz yagaj, 31 guial culüü ree xbejnman, rëbaman:

—Yayü reeman Bén guxhaal Dios loj ree bén gugüjt laaman, per ni gac choon dxej yabanman.

32 Per laa reeman ad bignia't reeman ni rëbaman, abi' bidxeb reeman niniabdiidx reeman lojman.

¿Chu mazri zojbloj?

(Mt. 18:1-5; Lc. 9:46-48)

33 Dxel badxin Jesús Capernaum con ree xbejnman, abi' badxin reeman yu lod zojb reeman. Dxel gunabdiidxaman loj reeman rëbaman:

—¿Xhie diidxan rüdi lunejz chi zio'p ree?

34 Per achet rëb reeman guial cadildiidx reeman lunejz chu reeman mazri zojbloj. 35 Dxel gurej Jesús, gurejdxaman guidxiptio'p reeman, rëbaman:

—Bal chu bén rën gac mazri bén zojbloj lojdi, rayal güün laagajcaman zi'c tijb bén ad zojblojt güün tëëman sirv loj gradi.

36 Dxel cwa'man tijb xindoo, bazujman laax galay reeman, zianz gudiidxaman laax, rëbaman:

37 —Bén ridxga' tijb xindoo por naj, najn ridxga'man, guiáad bén ridxga' naj, bén guxhaal najn ridxga'man.

Bén ad za't contr dunuj ree za'man con dunuj ree

(Lc. 9:49-50; Mt.10 :42)

³⁸ Rëb Waj loj Jesús:

—Mextr, baguaan tijb bejn rabëëman xindxab luxdoo ree bejn por xguialrniabeel. Per badxoonan guial ad najtaman dux bejn ree.

³⁹ Badxi' Jesúsán rëbaman:

—Ad rudxoondi, din bën rüjn milagr por da guialrniabeen, ad zile't guinieeguijdxaman naj. ⁴⁰ Bén ad za't contr dunuj ree, za'man con dunuj ree. ⁴¹ Chutëëz bën gunee majsi tibxijgzi nijs lojdi guial najdi xbejn Cristo, diidxli rnin guial ziangajc yu' ni gudëed Dios lojman.

Bén ruzaalguiiw bejn din güünman dol

(Mt. 18:6-9; Lc. 17:1-2)

⁴² 'Chutëëz bën guzaalguiiw tijb bën qui riladxri naj din güünman dol, par laaman zagdxeli naj guixhii reeman tijb guiaj mulin yëjnman guzaal reeman laaman loj nijsdoo. ⁴³ Bal laagajc yaal rusajb lüj loj dol, zagdxeli gutü'n. Mazri zagdxe chu' con tiblodzi yaal xanyabaa, guial che con grop yaal gabijl loj bajl ni ad yu't dxej yayü', ⁴⁴ lod ad rëjtt ree bizog lod ad rayü' tëet bajl. ⁴⁵ Abi' bal laagajc guia'l rusajb lüj loj dol, zagdxeli gutü'n. Mazri zagdxe chu' con tiblodzi guia'l xanyabaa guial che con groplad guia'l gabijl lod yu' bajl ni ad yu't dxej yayü', ⁴⁶ lod ad rëjtt ree bizog lod ad rayü' tëet bajl. ⁴⁷ Bal laagajc guiaalojl rusajb lüj loj dol, zagdxeli gulëën. Mazri zagdxe chu' con tiblodzi guiaalojl xanyabaa guial che con groplad guiaalojl gabijl lod yu' bajl ni ad yu't dxej yayü', ⁴⁸ lod ad rëjtt ree bizog lod ad rayü' tëet bajl.

⁴⁹ 'Zi'c ru zëd guijc guialraw, ziangajc ree bën riladx naj sagdiaj reeman din gac reeman naya.

⁵⁰ 'Ni zagdxe naj zëd, per bal id zajcran naxij, ¿xhieza naag yayajcan naxij zatijb? Gol been zi'c rayal chitëë saquidi zi'c zëd ni ad rüjnt sirv, gol gubajnnë tëe lasa'di zagdxe.

10

Ruliüü Jesús xcwent guial rala' lasa'

(Mt. 19:1-12; Lc. 16:18)

¹ Chi baza Jesús Capernaum, dxel wejman niz Judea në stiblad ro' guiiw Jordán. Abi' lod za'man bido'p ree bejn zatijb, dxel guzuloj culüüman laa reeman zi'c goc xcostumbaman. ² Yu' ree bënfarisew gubig lod za'man. Abi' par güün reeman laaman prueb, gunabdiidx reeman lojman rëb reeman:

—¿Zajc yala' xinguaaaw lacheelix ya?

³ Badxi'man laan rëbaman:

—¿Xhie gunabee Moisejs güündi?

⁴ Abi' rëb reeman:

—Cwëjb Moisejs yala' xinguaaaw lacheelix, per gudëëdix gui'ch tia'man guial ma bala' reex.

⁵ Dxel rëb Jesús:

—Rëb Moisejs gac zian guial nadidi. ⁶ Per guia'xchej chi gule'cchaaw Dios guidxliuj, “beenman xinguaaaw con bëgunaa”. ⁷ “Zeel xinguaaaw gusa'n xdad xniaax din guibannë lacheelix, ⁸ dxel grop reex ma gac zi'c tijbzi bejn.” Zianan zeel ad najtri reex tio'p, ma naj reex tijbzi. ⁹ Zeel, bënguidxliuj ad rayalt yala'man lasa' ni ma bachajg Dios.

¹⁰ Chi bayu reeman lënü, gunabdiidx ree xbejnman lojman zatijb, xcwent ni guneeman. ¹¹ Abi' rëbaman loj reeman:

—Xin rala' lacheel, abi' rtia'x ben ren dolan cayüjn^x, ¹² ziangajc bal tijb béngunaa yala' lacheelaman abi' tia' xin ren laaman, dolan cayüjnman.

Rüjnle' Jesús xindoo ree

(Mt. 19:13-15; Lc. 18:15-17)

¹³ Binë ree bejn xindoo ree lod za' Jesús din gudxiib yaaman guijc reex. Per ree xbejnman guzuloj cadilë reeman Bén binë ree laa reex. ¹⁴ Chi baguiaa Jesús zian, balenman zeel rëbaman:

—Gol badëéd mod gui't reex lon, ad bal rudxoondi. Din lod rniabee Dios naj par ree Bén naj zi'c laa reex. ¹⁵ Diidxiczi rnin, Bén ad riladxt xgualrniabee Dios zi'c tijb xindoo, ad zile't chu'man lod rniabee Dios.

¹⁶ Dxel gudiidx Jesús laa reex, badxiib yaaman guijc reex, beenle'man laa reex.

Xcwent tijb xinrijcw

(Mt. 19:16-30; Lc. 18:18-30)

¹⁷ Chi ma gusnuu xnejz Jesús, ruxüün tijb xinguaaw bidxin^x abi' bazuxibix lojman, dxel gunabdiidxix rëbix:

—Mextr za'c, ¿xhie rayal günan din ga'pan guialnaban tiblyaa con Dios?

¹⁸ Badxi' Jesús laan rëbaman:

—¿Chexc zeel nal lon benza'c? Achut naj benza'c, tijbzi Dios. ¹⁹ Lüj rajc ree mandamient, “Ad gugüjtil bejn, ad sunël béngunaa ren, ad cwanl, ad cwëël xtiidx bejn ad gusquiee tëël, gojp respejt xdad xniaal.”

²⁰ Dxel rëbix loj Jesús:

—Mextr, gra ree ni guin cayünan diizd xindoon.

²¹ Baguiaa Jesús lojx, bayaman laax, rëbaman:

—Per yu' zatijb ni riaadx güünl: bigto' gra ni rajpil, badëéd milia guin loj ree Bénprob, zian gapil guialnaza'c xanyabaa dxel guidnalil naj majsi xhietëez saquil.

²² Chi biguiejn xin guin zian, ad nixt guyu luxdoox abi' dád yu'nayax ziax guial dád xinrijcwan.

²³ Dxel baguiaa Jesús loj gra reeman, abi' rëbaman loj ree xbejnman:

—¡Dád nawëëg naj chu' benrijcw loj xgualrniabee Dios!

²⁴ Dád badxa loj ree xbejnman ni rëbaman. Per rëbaman loj reeman zatijb:

—Xi'n, ¡Bén yu'guijc mazri ni rajpaman, dád nawëëg naj chu'man loj xgualrniabee Dios! ²⁵ Adli nawëëgt tëd tijb camell xan gagux guial chu' tijb benrijcw loj xgualrniabee Dios.

²⁶ Chi biguien reeman diidx guin ree, mazri badxa loj reeman, dxel rniabdiidx loj lasa' reeman, rëb reeman:

—¿Chu zajc laa loj xcasti Dios?

²⁷ Baguiaa Jesús loj reeman, abi' rëbaman:

—Par bejn nawëëgan, per par Dios ad nawëëgtan din par Dios graczan zile' gac.

²⁸ Dxel guzuloj rëb Bëd loj Jesús:

—Dunuyn basa'nan graczi ni raya'pan persi zudnaalan lüj.

²⁹ Badxi' Jesús an rëbaman:

—Diidxiczi ganin lëjt, chutëez Bén rusa'n lidx, o bijch, o bizan, o xdad xniaa, o lacheel o xi'n, o guidxliuj ree por naj nè por xtiidxza'c Dios, ³⁰ loj guidxliuj guie tia'man tibgayuu volt mazri guial loj ni basa'nman, bal

najn lidxaman, bijchaman, bizanman, xniaaman, xi'nman, në xguidxli-
ujman, majsi guidib wazagdiaj, abi' guidxin dxej gapaman guialnaban
tiblyaa con Dios. ³¹ Per dád zien ree bén naj bén yaløj yan, gac reeman
bén bigra, guiáad ree bén naj bén bigra yan, gac reeman bén yaløj.

Rugojn Jesús zatijb guial guiétaman

(Mt. 20:17-19; Lc. 18:31-34)

³² Chi zë reeman Jerusalén, ned Jesús loj ree xbejnman, abi' dád
radxaløj reeman guial zëman Jerusalén, guiáad ree bén nal laaman rdxeb
reeman. Dxel gurejdx guidxiptio'p ree xbejnman lood ren, zianz guzuloj
rëbaman ni sacaman:

³³ —Rëbaman loj reeman: Lëjt ragbee guial ziyo' ree Jerusalén, abi'
naj najn Bén guxhaal Dios, yayü reeman naj loj ree bixhioz rniabee ree
bixhioz, në loj ree mextr rajc ley. Abi' nabee reeman guiétan, yayü tëe
reeman naj loj ree bén ad najt bén Israel. ³⁴ Guze' reeman naj, gucojpp
xhiejn reeman lon, quin reeman gugüjt tëe reeman naj, per yayon dxej
yabanan.

Ni gunab ree Jacob con Waj

(Mt. 20:20-28)

³⁵ Dxel Jacob con Waj xi'n Zebedeo, gubig reeman loj Jesús rëb reeman:
—Mextr, rayënan güünl tijb favor ni yanaaban lojl.

³⁶ Abi' gunabdiidxaman rëbaman:

—¿Xhie rëndi günan?

³⁷ Badxi' reeman laan rëb reeman:

—Rayënan guial chi ma canabeel, yadxu'n cwë'l, tijb dunujn yadxu'
xladbeel, zatijb dunujn yadxu' xladruvejsil.

³⁸ Badxi'man laan rëbaman:

—Ni'quid ragbeetidi xhie ni guin rniabidi. ¿Wen zajc sagdiajdi zi'c
gazaagdiajn ya? ¿Zajc guiëtidi zi'c guiétan ya?

³⁹ Badxi' reeman laan rëb reeman:

—Zayajcan.

Dxel rëb Jesús:

—Waliquidi sagdiajdi zi'c naj guiët tëedi zi'c naj, ⁴⁰ per guial cwedi da
ladbeen o da ladruvejsan, ad najt rayal gune laan, din ma najn par ree
bén rayal laan.

⁴¹ Chi biguien zachii xbejn Jesús ni rëb reeman, dád balen reeman
Jacob con Waj, ⁴² per gurejdx Jesús laa reeman rëbaman:

—Lëjt ragbee guial ree bén rniabee loj guidxliuj guie, rniabee reeman
bejn ree zi'ctzi rën reeman, guiáad ree bén zøjbloj rüjnnë reeman bejn
ree zi'ctzi rën reeman por guialrniabee ni rajp reeman. ⁴³ Per con lëjt ad
rayalt gac zian. Din bal chu rën gac bén rniabee lojdi, rayal güünman sirv
lojdi, ⁴⁴ guiáad bén rën gac bén zøjbloj, rayal güünman sirv loj gradi zi'c
bén nado'. ⁴⁵ Din ni'qui naj najn Bén guxhaal Dios, ad zialtan loj guidxliuj
par güün ree bejn sirv lon, zialan din günan laa reeman sirv, abi' con da
guialnabanan gaguixan por xtol zien ree bénguidxliuj.

Rayajc guiaaløj tijb xin ad ranit loj la Bartimeo

(Mt. 20:29-34; Lc. 18:35-43)

⁴⁶ Bidxin reeman guiedx Jericó, abi' chi ma cayrii Jesús luguiedx guin,
con ree xbejnman në ree benzien. Tijb xin ad ranit loj lax Bartimeo, xi'n
bén la Timeo, zøjbix cwë'l nejz rniabix carda. ⁴⁷ Chi biguiejnx cadëd Jesús
bén Nazaret niz yagaj, guzuloj cabidxa'x rëbix:

—¡Jesús, xdiaa Davi, baya naj!
 48 Dád zien ree bejn ridilé laax din yacwëéz ro'x. Per mazri rejs rbidxa'x rëbix:
 —¡Xdiaa Davi, baya naj!
 49 Dxel guzudxe Jesús rëbaman:
 —Gol gurejdxix.
 Dxel gurejdx reeman laax, rëb reeman:
 —Bagu' luxdool, bisu, lüj caneeman.
 50 Dxel laa badxe'bi gajc xin guin lajd najcwix luya, xt gutiajsix guzulix bibiguix loj Jesús. 51 Gunabdiidx Jesús lojx rëbaman:
 —¿Xhie rën l gūnan por lüj?
 Badxi'xan rëbix:
 —Mextr, rënan yani lon.
 52 Dxel rëb Jesús:
 —Ma zajc yaguiajl, ma bayajquil guial bililadxil naj.
 Loj hor zii gajc bani lojx dxel zinalix Jesús niz yagaj.

11

Ru Jesús Jerusalén

(Mt. 21:1-11; Lc. 19:28-40; Jn. 12 :12-19)

¹ Chi ma zë reeman gajxh Jerusalén, niz lod riga' guiedx Betfagé con Betania, gajxh guia' la Olivos, dxel guxhaal Jesús tio'p ree xbejnman, ² rëbaman:

—Gol chej guiedxdo riga' delant guin. Chi guidxindi guidxaaglojdi tijb burquie'n, caduub achut wabib laab. Gol guxhiequib gol tanëb. ³ Abi' bal chu guiniabdiidx lojdi: “Chexc zeel caxhiequidi laab”, gol güjdx: “Dad Jesús cayaadx laab, doo yaxhaal gajcaman laab.”

⁴ Dxel wej reeman, bidxaagloj gajc reeman burdo guin, caduub runejz ro' tijb port, abi' guxhiéc reeman laab.

⁵ Bén baguiaa ree zian gunabdiidx reeman loj reeman, rëb reeman:

—¿Xhie rüjndi? ¿Chexc zeel caxhiequidi burdo guin?

⁶ Badxi' reeman laan zi'c rëb Jesús, abi' cwëjb ree bén guin zinë reeman laab. ⁷ Bidxinnë reeman laab lojman, badxiib xab reeman xijchib, persi gudxibaman laab. ⁸ Zien ree bejn riguijxh xab niz lod rdëdaman, yu' tëë reeman rutüüg ziji persi rguijxh reeman laan niz lod rdëdaman.

⁹ Abi' zi'c ree bén ned, në ree bén nal rbixdiaj reeman, rëb reeman:

—¡Gagnëman dunuj ree yan! ¡Nagle' bén zëëd por Dios! ¹⁰ ¡Nagle' bén zëëd nabee zi'c dux béngulal ree rey Davi! ¡Quixtëë dux Dad ree Dios Bén yu' xanyabaa!

¹¹ Zian guyu Jesús Jerusalén abi' guyuman lën yadooro' Jerusalén. Chi gulox baguiaaman graczi, dxel zinë guidxiptio'p ree xbejnman Betania guial ma gudxe.

Bazaal Jesús diidx guijc yag higo

(Mt. 21:18-19)

¹² Chi bareguiaal, barri reeman Betania. Dxel guzuloj calaan Jesús. ¹³ Zijtri baguiaaman tijb yag higo ca ree balag lojn. Abi' wejman biquiaaman bal ca higo lojn. Per achet bidxaaglojman, balagzi ree ca lojn din ad xtiampantan. ¹⁴ Dxel rëbaman loj yag higo guin:

—¡Ad yu'tri dxej gaw bejn ninejxh tia lojl!

Abi' biguiejn ree xbejnman ni rëbaman.

*Rabëe Jesús bén ruto' ree ro' yadooro' Jerusalén**(Mt. 21:12-17; Lc. 19:45-48; Jn. 2:13-22)*

¹⁵ Chi bidxin reeman Jerusalén. Dxel guyu Jesús ro' yadooro' Jerusalén guin, abi' guzuloj caybëeman bén cuto' ree në ree bén cazii. Barexguiataman xmex ree bén ruchaam milia con xyagxhil ree bén ruto' ree palom, ¹⁶ ad rtiëjtaman xhie chu'në ree bejn ro' yadoo guin. ¹⁷ Abi' guzuloj culüüman laa reeman, rëbaman:

—Loj xtiidx Dios rëb: “Lidxan grii laj yu lod rbejdx rniab bejn Dios.” Per lëjt nüjndan zi'c lidx ree xingubaan.

¹⁸ Bixhioz rniabee ree bixhioz con ree mextr rajc ley, chi biguiejn reeman ni rëb Jesús, guzuloj raguiil reeman mod xhienaag gugüjt reeman Jesús, guial rdxeb reeman laaman din gra bejn radxaloj ni rulüüman.

¹⁹ Chi ma caxhin, bazanë ree xbejn Jesús Jerusalén.

*Tijb yag higo ni gubidx**(Mt. 21:20-22)*

²⁰ Chi bareguiaal rsildoo, badëd reeman niz lod zojb yag higo guin, abi' baguiaa reeman ma gubidx diidz liujn. ²¹ Dxel basaaladx Bëd ni rëb Jesús, abi' rëbaman lojman:

—Mextr; jbaguiaa yag higo ni bazaalil diidx guijc ma gubidxan!

²² Badxi' Jesúsán rëbaman:

—Gol bililadx Dios. ²³ Din diidxiczi ganin, bal chu guiëb loj guia' guin: “Bisüd guie biajb loj nijsdoo”, bal id yu' nawëëg luxdooan, bal rililadxaman, gac ni guneeman. Zian gacan. ²⁴ Zeel rnin lojdi, gra ni rniabidi loj Dios, gol bililadx guial ma cwa'di laan, abi' zaca'dan. ²⁵ Guiáad chi ribejdx rniabidi Dios, bal yu' bén rdxe'chidi, gol beenman perdon din ziangajc xDadidi bén yu' xanyabaa güünman perdon xtolidi. ²⁶ Din bal id züjndi perdon, ziangajc xDadidi Bén yu' xanyabaa ad züjntaman perdon xtolidi.

*Xguialrniabee Jesús**(Mt. 21:23-27; Lc. 20:1-8)*

²⁷ Chi badxin reeman Jerusalén. Chi caza Jesús niz lën yadooro' Jerusalén guin, dxel gubig bixhioz rniabee ree bixhioz con ree mextr rajc ley con ree xguxtis ree bén Israel, ²⁸ gunabdiidx reeman loj Jesús, rëb reeman:

—¿Xhie guialrniabee rajpil zeel rüjnl ni guin ree? ¿Chu banee guialrniabee lojl güünl zian?

²⁹ Badxi' Jesúsán rëbaman:

—Ziangajc naj yu' ni ganabdiidxan lojdi, bal yadxi'dan dxel ganin chu banee guialrniabee günan ni guin ree. ³⁰ ¿Chu guxhaal Waj bidgaroobnjsaman bejn ree? ¿Dios ya o bénguidxliuj? Gol badxi'n.

³¹ Dxel guzuloj rëb loj lasa' reeman:

—Bal yaguie'ch ree, Dios guxhaal laaman, zanaman: “¿Chexquiza zeel ad bililadxtidi laaman?” ³² Ad zajc tëët yaguie'ch ree, bénguidxliuj guxhaal laaman.

Rëb reeman zian guial rdxeb reeman bejn ree, din graczi reeman rililadx guial gojc Waj tijb bén badëe xtiidx Dios loj ree bejn, bén wali guneë xtiidx Dios. ³³ Abi' badxi' reeman laan rëb reeman:

—Ad rayagbeetan.

Zeel rëb Jesús loj reeman:

—Ni'qui naj ad zanitan lojdi chu banee guialrniabee günan ni guin ree.

12

*Xcwent ree mojs guiidx**(Mt. 21:33-46; Lc. 20:9-19)*

¹ Dxel guzuloj caneenë Jesús laa reeman con ganax ree cwent, rëbaman:

—Tijb bejn guxübinman uv loj xguiniaaman, dxel beenman gurajl gadëd ro'n, beenchaaw tëëman tijb luar lod grii xnijs uv guin, abi' beenman tijb yu ya da't lod guiya'p guiniaa guin.

² Zianz badëëman laan garol loj ree bën güün laan dxiin, briitaman zëman zijt. ³ Chi bidxin dxej yala' reeman uv guin, guxhaal tijb xmojsaman din chigxiiman ni rayalaman. ⁴ Per ree bën rüjn dxiin loj guiniaa guin gunaaz reeman laaman, gudijn reeman laaman abi' badxi' reeman laaman zezì. ⁵ Dxel guxhaal bën naj xguidxliuj laan zatijb xmojsaman, per ziangajc, bacaaguij reeman laaman, gula' reeman guijcaman abi' guneeguijdx reeman laaman. ⁶ Guxhaalaman ben ren, per bagüjt reeman laaman. Zien ree ben guxhaalaman, yu' reeman gudijn reeman yu' tëë reeman bagüjt reeman.

⁷ Dxel bën naj xguidxliuj laan stijbzi xi'ngaanman ryaadx guixhiaalaman, xin rën da'taman. Dxel guxhaalaman laax guial gunaladxaman: “Zajp reeman da xi'nän respejt.” ⁸ Per ree bën guin, rëb loj lasa' reeman: “Xin guin naj xin yaya'nnë guidxliuj guin, yagüjt reex din gacan du xieen ree.” ⁹ Dxel gunaaz reeman laax, bagüjt reeman laax abi' babëë reeman laax loj guidxliuj guin.

¹⁰ Dxel gunabdiidx Jesús loj ree bën caneenëman, rëbaman:

—Yan, ¿xhie naladxidi güün bën naj xguidxliuj laan? Zi'taman din gugüjtaman bën guin ree, dxel gudëëman guidxliuj guin loj ree ben ren.

¹¹ ¿Nid wayoolidi loj xtiidx Dios ya?, lod rëb:

Guij ni gulëëgo'n ree bën rüjn yu, laan goc ni mazri been sirv gojcnë yu guin.

¹² Zian been dux Dad ree Dios, zeel radxaduloj ree.

¹³ Chi biguiejn ree bën rniabee guin ni gunee Jesús, guyën reeman niniaaz reeman laaman guial gogbee reeman laa reeman cuza'taman, per guial rdxeb reeman bejn ree, basa'n reeman laaman, ziat reeman.

*Xcwent Impuest**(Mt. 22:15-22; Lc. 20:20-26)*

¹ Guxhaal reeman tio'p choon ree bënfarisew në tio'p choon ree xbejn Herodes lod za' Jesús, din yaguuil reeman mod guiniee Jesús diidx ni gudxiib reeman guijc din gac cwe'c reeman xguialquiaman. ² Abi' rëb reeman:

—Mextr, dunujn rayagbee guial lüj rniee diidxli ad ridxga' tëëtil chu naj bejn. Din par lüj tiblojzi naj bejn, abi' walil rulüül guial xhienaag rën Dios guiban bejn. Zeel ranabdiidxan lojl: ¿Zagdxen ya radijxan impuest loj César o ad zagdxetan? ¿Zadijxanan ya o ad zadijxtanan?

³ Per gogbee gajc Jesús guial wed rüjnz reeman, zeel rëbaman:

—¿Chexc zeel rüjndi naj prueb? Gol tanë cintabl din guguianan.

⁴ Dxel badëëd reeman cintabl guin lojman, abi' rëbaman:

—¿Chu loj ca lojn, chu tëë laj ca lojn?

Badxi' reeman laan rëb reeman:

—Loj César ca lojn në lajman.

⁵ Dxel rëb Jesús loj reeman:

—Gol badëeliza loj César ni naj xieen César, guiáad loj Dios gol badëed ni naj xieen Dios.

Dád badxa loj reeman ni rëbaman.

Xcwent guial yaban ree bengüt

(Mt. 22:23-33; Lc. 20:27-40)

¹⁸ Tio'p choon ree bénsaducew bignaj Jesús, laa reeman ad riladxt guial yaban ree bengüt. Zeel gunabdiidx reeman loj Jesús rëb reeman:

¹⁹ —Mextr, loj xley Moisejs rëb guial bal guiët tijb xinguaaw abi' achut xi'n x guyu con lacheelix, bijch xin güt guin guxhlianë béngunaa bizëjb guin din chu' xi'n reex zi'c gulüü xi'n xingüt guinan. ²⁰ Guyu tijb famil lod goc reex gajdx bijch. Baxhliaa xin yaloj guin, per güjtix abi' ad guyut xi'n reex con lacheelix. ²¹ Dxel bijch barojpix baxhlianë béngunaa guin, per güjt gajquix, ad guyu gajct xi'n reex. Abi' ziangajc guzajc xin bayon guin, ²² abi' zianz baxhlianëman guigajdx reex, zianz bara reex güjt achut xi'n reex guyu con laaman. Ni bigra tëë në béngunaa guin güjt. ²³ Yan, chi yaban ree bengüt, loj guigajdx reex, ¿chu loj gra reex gac xbéngunaa laaman guial gra reex baxhlianë laaman?

²⁴ Badxi' Jesúsán rëbaman:

—Ad laat naj xgab rüjndi guial ad nünbeetidi xtiidx Dios ad ragbee tëëtidi xhienaag naj xguialrniabeeman. ²⁵ Din chi yaban ree bengüt, ad zuxhliaatri reeman, ad zudëë tëëtri xi'n reeman guxhliaa, ma gac reeman zi'c ree anj yu' xanyabaa. ²⁶ Abi' xcwent ni yaban ree bengüt, ¿nid wayoolidi loj xlibr Moisejs ya, lod rëb guial baguíaaman yag ni cayë'c? Yagaj biguien cha' Dios, rëbaman lojman: “Naj naj xDios Abraham, xDios Isaac në xDios Jacob.” ²⁷ Din Dios ad najtaman xDios ree bengüt, najman xDios ree bën naban. Zeel ad laat naj xgab rüjndi.

Mandamient mazri zojbloj

(Mt. 22:34-40)

²⁸ Chi biguiejn tijb mextr rajc ley badxi' Jesús xtiidx reeman zagdx guial bacaagdiajgaman diidx ni cayü reeman, gubigaman lojman, abi' gunabdiidxaman rëbaman:

—¿Con mandamientan mazri zojbloj loj gra ree mandamient?

²⁹ Badxi'man laan rëbaman:

—Mandamient mazri zojbloj rëban: “Gol bacaagdiajg, bën Israel, dux Dad ree Dios, tijbzi laaman naj Dios. ³⁰ Guyën xDadil Dios guidiblagaa guidib guijc guidib ladxil.” Laan naj mandamient mazri zojbloj. ³¹ Mandamient rarojp, rëban: “Guyën ree ben ren zi'c rën lüj gajc.” Achet mandamient mazri zojbloj guial loj grop ree mandamient guie.

³² Dxel rëb mextr guin loj Jesús:

—Zagdxequi guneel, Mextr. Waliquil tijbzi Dios yu', achutri ben ren yu'. ³³ Abi' guidib guijc guidib ladx bejn guiënman laaman guidiblagaa, guiën tëëman ben ren ree zi'c rën laagajcaman. Laan naj ni mazri zojbloj guial loj gra gon ni rudëed bejn loj Dios.

³⁴ Chi biguien Jesús badxi' mextr guinan zagdx, rëbaman:

—Ad zijtt za'l par chu' loj xguialrniabee Dios.

Dxel achutri bayax xhie niniabdiidx lojman.

Chu loj xdiaa za Cristo

(Mt. 22:41-46; Lc. 20:41-44)

³⁵ Chi culüü Jesús bejn ree lën yadooro' Jerusalén, gunabdiidxaman loj reeman rëbaman:

—¿Chexc zeel rëb ree mextr rajc ley guial za Cristo loj xdiaa rey Davi?

³⁶ Awa Davi guin gajc gunee por xSprijt Dios, rëbaman:

Dios rëb loj da Dadan:

“Gurej da ladbeen,

xt gabecan xin rdx'e'ch ree lüj guia'l.”

³⁷ Yan bal xi'n Davi naj Cristo, ¿chexquiza zeel rëb Davi guin lojman Dad?

Graczi ree bën riga' lën yadoo guin dád nix yu' luxdoo reeman rucaag-diajg reeman xtiidxaman.

Ni rüjn ree mextr rajc ley

(Mt. 23:1-36; Lc. 11:37-54; 20: 45-47)

³⁸ Chi culüü Jesús bejn ree, rëbaman loj reeman:

—Gol gojp cudad con ree mextr rajc ley, din ruladx reeman sa reeman gacw reeman lajd zagdx, ruladx tää reeman gugajpdioz ree bejn laa reeman con respekt niz lunejz. ³⁹ Abi' lën ree yadoo ruladx reeman cwe reeman lod rbej ree bën zobjloj, ziangajc rüjn reeman lod ritaw reeman.

⁴⁰ Raca' tää reeman lidx ree béngunaa bizëjb, abi' din guiëb ree bejn guial benza'c naj reeman, dád xchej rbejdx rniab reeman Dios. Per laa reeman mazri casti narooob yayal reeman.

Gon badëed tijb béngunaa bizëjb

(Lc. 21:1-4)

⁴¹ Tijb dxej zobj Jesús lën yadooro' Jerusalén niz lod za' alcancia ni ru gon, abi' ruguiaaman rgu' ree bejn milia lën alcancia guin, në zien ree benrijcw rgu' zro' milia. ⁴² Dxel bidxin tijb béngunaa bizëjb prob, badxe'man tio'p zintabldoo ni lasajc ta'nzi. ⁴³ Abi' gurejdx Jesús bën naj ree xbejnman, rëbaman:

—Diidxli rnin lojdi guial bën bizëjb prob guin mazri lasajc gon badxe'man guial loj gon badxe' gra ree bën guin. ⁴⁴ Din graczi reeman rudxe' ni rüjn laa reeman sobr, per laaman majsi najman bënprob, badxe'man graczi ni rajpaman par guibannëman.

13

Rëb Jesús guial yaze'n yadooro' Jerusalén

(Mt. 24:1-2; Lc. 21:5-6)

¹ Chi barii Jesús lën yadooro' Jerusalén, rëb tijb ree xbejnman lojman:

—Mextr, ¡baguiaa xi nix naj ree guiaj guin nix tää naj ree yu guin!

² Badxi' Jesús an rëbaman:

—Zi'c ruguiaal yu narooob guin ree, zadxin dxej, ni'czi tijb guiaj guin ad zaya'nt guijc stijban, gran yaze'n.

Ni gac chi gad guidxliuj nit

(Mt. 24:3-28; Lc. 21:7-24; 17:22-24)

³ Chi zobj Jesús ruguia' la Olivos, ni naj niz lod nudxi' loj yadooro' Jerusalén. Dxel gubig Béd lojman con Jacob, Waj con Andrejs, laaz reeman za'në laaman yagaj, abi' gunabdiidx reeman lojman, rëb reeman:

⁴ —Guna, ¿goc gac zian? ¿Xhie sen gac chi ma zidyob gac zian?

⁵ Badxi' Jesús laan rëbaman:

—Gol gojp cudad chitëe chu gusquiee lëjt. ⁶ Din zien ree bën gui't guiëb reeman guial por naj zëed reeman, guiëb tëe reeman: “Naj naj Cristo”, abi' gusquiee reeman zien bejn.

⁷ 'Per lëjt chi guiguejndi cayajc wadijl o zëeb diidx gac wadijl, ad guidxebidi; din najczi gac zian, per ad por laatan ma bidxin dxej nit guidxliuj. ⁸ Din til nacion con stijb nacion, til tëe bën rajp guialrniabee con stijb bën rajp guialrniabee, gui't tëe ree xudoxh në gubijn niz ni niz guie. Zian gac chi ma suloj ree guialzi ni naj gac.

⁹ 'Gol gojp cudad, din zadxin dxej yayü ree bejn lëjt loj ree guxtis, abi' quin reeman lëjt lën ree yadoo. Chinë reeman lëjt loj ree gobernador në loj ree rey guial najdi da bejnan, zian gac din chile' güdi da diidxan loj reeman. ¹⁰ Per yalojxgaj rüjn naguiejn guire'ch xtiidxza'c Dios loj gra ree nacion, dxelri nit guidxliuj. ¹¹ Chi chinë reeman lëjt loj ree guxtis, ad bal chu'di xgab, ad bal güün tëedi xgab xhie guiëbidi loj reeman. Gol gunee diidx gunee Dios lëjt loj hor guin. Din ad lëjttaan guinee, xSprijt Diosan guinee. ¹² Abi' guidxin dxej yayü bejn laagajc bijchaman din guiëtix, ziangajc ree bën naj dad yayü laagajc xi'n reeman, abi' ree bejn yayü xdad xniaa reeman par guiët reeman. ¹³ Gra bénguidxliuj guidxe'ch lëjt guial najdi da bejnan, per bën sudxi'ch loj ni rliladxaman naj xt dxej chigra guibanman, laaman yayal xanyabaa.

¹⁴ 'Chi guguaadi zojb tijb ni dxuudx lën yadooro' Jerusalén, zi'c bacaa Daniel, bën badëe xtiidx Dios loj ree bejn diizd gulal (bën gool ree gui'ch guie, gol bignia'n), guial bën zojb ree niz Judea chigxüün reeman niz dajn. ¹⁵ Guiáad bën yë'p guijc yu lidx dxejzii, ad yayu lënü lidxaman tia' xhie xieenman. ¹⁶ Guiáad bën za' dajn, ad yayejc lidxaman chigxii xabaman. ¹⁷ jProbza ree béngunaa nüü xi'n o bën ca' ree xindobëz lën ree dxej zii! ¹⁸ Gol gurejdx gunab Dios chitëe yayal gac zian tiamp nayaag, ¹⁹ din dád guialziro' chu' dxejzii ree, zi'c ad wayajctczi diizd chi beenchaaw Dios guidxliuj, ad yu' tëetri dxej gac zian. ²⁰ Bal id zasdop Dios dxej zii ree, ni'czi tijb bejn ad zalaat, per gusdopaman laa reen, por ree bën rënman, bën gulejman par laaman.

²¹ 'Bal chu na lojdi: “Gol bagueiaa, laa Cristo za' guie”, o “laaman za' ni”, ad bal chililadxidi. ²² Din gui't zien ree bejn, na reeman guial laa reeman naj Cristo o na reeman laa reeman naj bën rudëe xtiidx Dios loj ree bejn, abi' güün reeman milagr ree në ree graloj ni yadxaloj ree bejn, din gusquiee reeman laa reeman, abi' bal zile'n xt zajc në ree bën gulej Dios gusquiee reeman. ²³ Zeel gol gojp cudad, ma bagojnxgajn lëjt gra ni gac.

Gui't Bén guxhaal Dios zatijb

(Mt. 24:29-35, 42-44; Lc. 21:25-36)

²⁴ 'Per lën ree dxej ni ma gudëd gra ree guialzi guin, zacajy loj gubijdx abi' ad zusntri bëew, ²⁵ zayajb ree bajl yu' xanyabaa guiáad gra ree ni yu' xanyabaa guiniib reen. ²⁶ Dxel guguaa ree bejn Bén guxhaal Dios rdiinman bacha' zëedaman loj zaj con xguialrniabee narooberman. ²⁷ Abi' guixhiaal ree xianjlaman guidiblagaa guidxliuj din guchajg reeman lasa' ree bën na naj par Dios.

²⁸ 'Gol badxe'guijc ni ganin lëjt: Chi ma naquie'n xidx yag higo abi' ma caydxib ree xbalagan, lëjt ragbee guial ma zidyob tiamp nalaa. ²⁹ Ziangajc chi guguaadi ma cayajc ree ni guin, gol gogbee guial ma zidyob dxej gac zi'c ma rnin. ³⁰ Diidxli rnin lëjt guial gra ree ni guin gac

chi gad ree b n naban l n ree dxej guie gui t. ³¹ Guidxliuj n  xanyabaa zanijt reen, per da diidxan ad zad dt gacan cumplid.

³² Per achut ragbee xhie dxejn xhie t   horan gac ree ni guin, ni'qui ree anjl yu' xanyabaa, ni'qui Xi'n Dios ad ragbeet, tijbzi dux Dad ree Dios ragbee.

³³ Zeel gol gojp cudad, gol guzujsin t  , gol gurejdx gunab Dios din ad ragbeetidi goc gac zian. ³⁴ Ni guin ree naj zi'c chi ririi tijb bejn rejman zijt. Abi' chi gadaman grii rud  man dxiin loj tijbgaj ree xmojsaman, rniabee t  man susin b n rajp ro' port. ³⁵ Yan ziangajc l jt gol guzujsin, din ad ragbeetidi goc o xhie horan guialan bal chi ma ribej guiaal ya, o garol guiaal, o chi ma rbidxa' guid, o rsildoo. ³⁶ Zeel gol guzusin din bal dxejczy guialan ad guidxaaglojn l jt ad cay jntidi zi'c rayal. ³⁷ Abi' ni canin lojdi, loj gradi caninan: Gol guzujsin.

14

Baya'n reeman diidx xhienaag guiniaaz Jes s

(Mt. 26:1-5; Lc. 22:1-2; Jn.11 :45-53)

¹ Zatio'p dxej riaadx gal lanij pascw, lanij raw ree bejn guidxtil ni ad yu't levadur. Abi' ree bixhioz rniabee ree bixhioz con ree next rajc ley, raguiil reeman mod xhienaag gusquiee reeman Jes s, din guiniaaz reeman laaman gug jt reeman laaman. ² Per r b reeman:

—Ad zaguieent ree zian loj ree dxej lanij guin, chit   gac naquie'!

Baroob tijb b ngunaa perfum guijc Jes s

(Mt. 26:6-13; Jn.12 :1-8)

³ Dxel chi za' Jes s luguiedx Betania lidx Sim n, b n gunee reeman leproso, abi' chi zojbaman xan mex cayawaman, bidxin tijb b ngunaa ca'man lumejt yu'n perfum ni lasajc way jx guial gojcchaawn n ganax nardo, zianz guxhalaman ro' lumejt guin persi baroobaman perfum guin guijc Jes s. ⁴ Abi' yu' ree b n za' yagaj bidxe'ch, r b loj lasa' reeman:

— Chexc zeel guxhie'man perfum guin? ⁵ Awa zajc nido'n choon gayuu denario din n jnan yudar b nprob ree.

Abi' caneeguijdx reeman b ngunaa guin.

⁶ Per r b Jes s loj reeman:

—Gol basa'nman.  Chexc zeel ruslendi laaman? Zagdxe naj ni beenman con naj. ⁷ Zianczy sun di b nprob ree, abi' zajc g  ndi laa reeman yudar chi gui ndi, sa'n naj ad ziantczy sun di naj. ⁸ B ngunaa guie beenman ni golguzujman, ma beenchaawxgajman da cuerpan par chi guidxin dxej guiguie'chan. ⁹ Diidxliczi rnin l jt, guial guidib loj guidxliuj bant  z guin guiniee reeman xtiidxza'c Dios, z  ree bejn diidx ni been b ngunaa guin con naj din gusaaladx reeman laaman.

Baguiil Judas mod xhienaag yay man Jes s

(Mt. 26:14-16; Lc. 22:3-6)

¹⁰ Judas Iscariote, tijb ree xbejn Jes s, wejman bigneen man bixhioz rniabee ree bixhioz din yay man Jes s loj reeman. ¹¹ Chi biguiejn ree bixhioz guin zian, d d babaa reeman. Abi' r b reeman gud  d reeman milia lojman. Dxel guzuloj raguiilaman mod xhienaag yay man Jes s.

Gudawn  ree xbejn Jes s xche

(Mt. 26:17-29; Lc. 22:7-23; Jn.13 :21-30; 1Co.11 :23-26)

¹² Dxej ni guzuloj lanij raw ree bén Israel guiadxtil ni ad yu't levadur, chi rugüjt reeman tijb xiildoo par lanij pascw, gunabdiidx ree xbejn Jesús lojman, rëb reeman:

—¿Ban guin rënl yuguieenan ni yadaaw ree guxhin pascw?

¹³ Dxel guxhaal Jesús tio'p ree xbejnman, rëbaman:

—Gol chej Jerusalén. Ni guguaadi tijb xinguaaw ca' re yu' nijs. Gol chinalix. ¹⁴ Abi' lod yayux, gol güjdx loj bén naj lidxan: “Na mextr: ¿Ban lënú gawnë ree xbejnman yan guxhin pascw?” ¹⁵ Dxel gulüüman lëjt tijb lënú narooob ni rarojp cwaa, ma najcchaaw lënú guin. Yagaj gol been ni yadaaw ree xche.

¹⁶ Dxel brii ree xbejnman wej reeman luguiedx guin, abi' bidxaagloj gajc reeman zi'cgajczi rëbaman, zianz been reeman ni gaw reeman guxhin pascw.

¹⁷ Chi gure guiaal, bidxin Jesús con guidxiptio'p ree xbejnman. ¹⁸ Dxel chi zojb reeman xan mex cayaw reeman, rëb Jesús loj reeman:

—Diidxliczi rnin lojdi guial tijb lëjt, bén cayawnë naj, laaman yayü naj.

¹⁹ Dád guyunaya reeman, abi' guzuloj canabdiidx tijb gaj reeman, rëb reeman lojman:

—¿Najn ya?

Abi' rëb stijbaman:

—¿Wa najn ya?

²⁰ Badxi'man laan rëbaman:

—Loj guidxiptio'pidi, tijb lëjtan, bén cugajdx xguiadxtil loj gajc pliajt lod cugajdx da guiadxtilan, laaman. ²¹ Walican guial Bén guxhaal Dios naj sacaman zi'c ca loj xtiidx Dios. Per, jprob bén yayü laaman! Zagdxeli naj par laaman ad niutaman loj guidxliuj

²² La'tgaj cayaw reeman, cwa' Jesús guiadxtil abi' badëëman quixtëë loj Dios, gudul gula'man laan badëëman loj reeman, rëbaman:

—Gol gudaw guiadxtil guie, laan naj da cuerpan.

²³ Dxel cwa'man tijb cojp yu' vin, chi gulox badëëman quixtëë loj Dios, badëëman cojp guin loj reeman, abi' gra reeman gu' vin yu' lojn. ²⁴ Zianz rëbaman loj reeman:

—Vin guie naj da rejnan ni gaxhie'n chi guiëtan por zien ree bénguidxliuj, din guixal tijb nejz cüb xhienaag gap ree bejn perdon loj Dios. ²⁵ Naj rni lëjt, ad yu'tri dxej guië'n vin rajcchaawnë uv, xt dxej ni guië'n vin cüb lod rniabee Dios.

Rëb Jesús guial guiëb Bëd ad nünbeetaman laaman

(Mt. 26:30-35; Lc. 22:31-34; Jn.13 :36-38)

²⁶ Chi gulox biil reeman tijb cant par Dios. Dxel zë reeman ruguia' Olivos. ²⁷ Dxel rëb Jesús loj reeman:

—Graczidi tio'nladx naj yan guxhin, zi'c ca loj xtiidx Dios lod rëb: “Gugüjtan bén rajp ree xiil, abi' guire'ch reeb.” ²⁸ Per chi yabanan, yaloj naj ganeed lojdi gan Galilea.

²⁹ Dxel rëb Bëd lojman:

—Majsi gra reeman tio'nladx lüj, per naj ad zaro'nladxtan lüj.

³⁰ Badxi' Jesús san rëbaman:

—Najn rni lüj Bëd, yan guxhin gajc chi gad gujd cwidxa' tio'p volt, choon volt mal rëbil guial ad nünbeetil naj.

³¹ Per nagueijn rüjn Bëd rëbaman:

—Majsi guiëtnë'n lüj, per ad zëtan guial ad nünbeetan lüj.

Abi' graczi reeman rëb zian.

Rbejdx rniab Jesús Dios lod la Getsemani

(Mt. 26:36-46; Lc. 22:39-46)

³² Chi bidxin reeman tijb luar la Getsemani, dxel rëb Jesús loj ree xbejnman:

—Gol gurejsii guie, la'tgaj gabedx ganaaban Dios.

³³ Abi' binëman Bëd, Jacob con Waj, dxel guzuloj guyunayaman abi' ad nixtri yu' luxdooman. ³⁴ Zianz rëbaman loj reeman:

—Yu' naya da't luxdon, rulüü ma gugüjtan naj. Gol baya'n guie ad gaayëjsidi.

³⁵ Abi' guzaman zata'n, zianz gurerojman, gunabaman loj Dios, bal zile' téd ni naj sagdiajman. ³⁶ Chi cabejdx canabaman Dios, rëbaman:

—Dad, graczi zajc güünl. Babëë naj loj ni gazaagdiajn. Per ad gac zi'c rënan, rayal gac zi'c rënl.

³⁷ Dxel ziaman lod baya'n ree xbejnman, chi badxinman cwë' reeman laa reeman naga'yëjs, zianz rëbaman loj Bëd:

—Simón, ¿naga'yëjsil ya? ¿Ni'qui tib hor ad gojct nibejnaal ya? ³⁸ Gol gurenaa, gol gurejdx gunab Dios chitëë güün xindxab lëjt gan. Din rëndi güündi zi'c rayal, per xcuerpidi ad rtiëjbtan.

³⁹ Dxel zëman zatijb persi gurejdx gunabaman Dios con diidx guin gajc ree. ⁴⁰ Chi badxinman lod riga' reeman, laagajc reeman naga'yëjs zatijb, guial yu' da't bacaal loj reeman, abi' ni'quid radxejlt xhie guiëb reeman lojman. ⁴¹ Ni bayon volt badxinman, rëbaman:

—¿Sta naga'yëjsidi ya? ¿Sta cayziiladxidi ya? Gol batie'ch xbacaalidi din naj, najn Bén guxhaal Dios ma bidxin hor yayü reeman naj loj ree bëndol.

⁴² Gol bixche, yo' ree, laa Bén yayü naj ma zëed gajxh.

Gunaaz reeman Jesús

(Mt. 26:47-56; Lc. 22:47-53; Jn. 18 :2-11)

⁴³ Sta caneenë Jesús laa reeman chi bidxin Judas, Bén goc tijb ree xbejnman. Bidxinnëman zien ree bejn ca' reeman espad con yag, guxhaal ree bixhioz rniabee ree bixhioz laa reeman con ree mextr rajc ley con ree guxtis Israel. ⁴⁴ Abi' Judas Bén bayü laaman ma bagojnxgajman Bén guin ree rëbaman:

—Bén gawan xid, laaman naj Bén raguiilidi, gol gunaazaman gol chinëman, gol gojpaman ad guslaadi laaman.

⁴⁵ Chi bidxin Judas dxel gubigaman loj Jesús, rëbaman:

—Mextr, Mextr.

Dxel gudawaman laaman xid. ⁴⁶ Zianz gunaaz ree Bén guin laaman din chinë reeman laaman. ⁴⁷ Per tijb Bén za' yagaj gulëë xiespadaman, gutü'man guidiajg xmojs bixhioz rniabee gra ree bixhioz. ⁴⁸ Dxel rëb Jesús loj ree Bén guin:

—¿Chexc zeel zëedidi con espad con yag din chinëdi naj zi'c tijb xingubaan? ⁴⁹ Zianczi guzunë'n lëjt lën yadooro' Jerusalén rulün lëjt xtiidx Dios, abi' ad gunaaztidi naj. Per gra ree ni guie cayajc din gac cumplid ni ca loj xtiidx Dios.

⁵⁰ Dxel graczi ree xbejn Jesús baxüün, guro'nladx reeman laaman.

Tijb xin binal Jesús

⁵¹ Per guyu tijb xinguiag binalix Jesús, nadüübix tijbzi lajd. Abi' chi gunaaz ree Bén guin laax, ⁵² baslaagajquix lajd guin, zigxüünt ziladix.

*Za' Jesús loj ree guxtis**(Mt. 26:57-68; Lc. 22:54-55, 63-71; Jn.18 :12-14, 19-24)*

⁵³ Dxel binë reeman Jesús loj bixhioz rniabee gra ree bixhioz, abi' badxaag lasa' ree bixhioz rniabee ree bixhioz con ree guxtis Israel con ree mextir rajc ley. ⁵⁴ Abi' zijt zijt binal Béd Jesús xt rule' lidx bixhioz guin, dxel gurejman ruděj con ree bën rajp rulidx bixhioz guin,

⁵⁵ Abi' ree bixhioz rniabee ree bixhioz con gra ree guxtis, baguuil reeman mod xhienaag gutedia' reeman Jesús din chile' gugüjt reeman laaman, per ad badxejlt xhienaag nutedia' reeman laaman, ⁵⁶ majsi zien reeman rudxiib diidx rusquiee guijcaman, per garent garen rëb tijb gaj reeman. ⁵⁷ Dxel guzuli tio'p choon reeman gunee reeman diidx rusquiee ree contr laaman, rëb reeman:

⁵⁸ —Dunujn baguiejn rëbix: “Naj guse'n yadooro' Jerusalén ni been ree bejn, abi' choon dxejzi yayünanan sin xyudar ree bejn.”

⁵⁹ Per ni'qui zian ad gunee reeman tibloj, garent garen gunee reeman.

⁶⁰ Dxel bixhioz rniabee gra ree bixhioz guzuliman galay ree bën riga' yagaj, abi' gunabdiidxaman loj Jesús, rëbaman:

—¿Nid xhie diidx yadxi'l ya? ¿Wali ni canee reeman contr lüj ya?

⁶¹ Per achetczi rëb Jesús, ad badxi'taman diidx, dxel gunabdiidx bixhioz rniabee guin lojman zatijb, rëbaman:

—¿Lüj naj Cristo ya, Xi'n Dios Bén nagle'?

⁶² Badxi' Jesúsán rëbaman:

—Walican, najcan. Abi' lëjt zuguaadi naj najn Bén guxhaal Dios zooban xladbee Dios Bén ca' gra guialrniabee guguaa tēēdi naj guialan loj zaj xanyabaa.

⁶³ Chi biguiejn bixhioz guin zian, gudixya' xabaman, dxel rëbaman:

—Ad rüjntri naguiejn yadiil ree testiw. ⁶⁴ Lëjt ma biguiejn caneeguijdxix Dios. Yan, ¿xhie nadi?

Abi' graczi reeman rëb, guiëtaman.

⁶⁵ Yu' reeman rucojp xhiejn lojman, ruta'cw tēē reeman lojman, dxel riguin reeman laaman, rëb reeman:

—¡Guneeya' chu gudin lüj!

Guiáad ree bën rajp yagaj wēēz reeman lojman.

*Rëb Béd ad nünbeetaman Jesús**(Mt. 26:69-75; Lc. 22:56-62; Jn.18 :15-18, 25-29)*

⁶⁶ Chi za' Béd rule' guin, dxel bidxin tijb béngunaa rüjn dxiin lidx bixhioz rniabee guin. ⁶⁷ Chi baguaaaman zojb Béd ruděj guin cucha'man, baguaaaman lojman, dxel rëbaman:

—Në lüj za'në Jesús bën Nazaret.

⁶⁸ Per gurexuu Béd rëbaman:

—Ad nünbeetan laaman, ad ragbeetan xhienin rnieel.

Chi bariiman ro' port guin, dxel guridxa' guid. ⁶⁹ Dxel baguaa béngunaa guin Béd zatijb, zianz guzuloj rëbaman loj ree bën riga' yagaj:

—Në bën guin naj xbejn Jesús.

⁷⁰ Per gurexuu Béd zatijb. Gojc xchejdoo rëb ree bën riga' yagaj loj Béd: —Walican në lüj naj xbejnx din xin Galilea lüj, abi' zi'cgajc rniee reeman rnieel.

⁷¹ Per guzudxi'ch Béd con ni rëbaman, zianz rëbaman:

—Gudëed Dios naj casti bal rusquieen, ad nünbeetan bën nadi.

⁷² Loj hor zii gajc barojp volt guridxa' guid. Dxel basaaladx Bëd guial rëb Jesús lojman: “Chi gad guid cwidxa' tio'p volt, mal gojc choon volt rëbil ad nünbeetil naj.” Chi basaaladxaman zian, dxel guzuloj cayoonman.

15

Binë reeman Jesús loj Pilato

(Mt. 27:1-2, 11-14; Lc. 23:1-5; Jn.18 :28-38)

¹ Chi bareguiaal rsildoo, badxajg lasa' ree bixhioz rniabee ree bixhioz con ree guxtis Israel në ree mextr rajc ley con gra ree guxtis, abi' baya'n reeman diidx xhienaag güün reeman. Dxel guxhii reeman Jesús binë reeman laaman loj Pilato. ² Abi' gunabdiidx Pilato loj Jesús rëbaman:

—¿Lüjn naj xrey ree bën Israel ya?

Badxi' Jesús laan rëbaman:

—Najcan.

³ Abi' ree bixhioz rniabee ree bixhioz zien ni rudxiib reeman guijcaman, ⁴ zeel gunabdiidx Pilato lojman zatijb, rëbaman:

—¿Nid xhie diidx yadxi'l ya? Baguiaa dád zien ni rudxiib reeman guijquil.

⁵ Per achetczi badxi' Jesús, zeel dád badxa loj Pilato

Gunabee reeman guiët Jesús

(Mt. 27:15-31; Lc. 23:13-25; Jn.18 :38–19:16)

⁶ Loj ree dxej lanij pascw, ruslaa Pilato tijb bën yu' ladxguiib, bën rëb ree bën guiedx guin guslaaman. ⁷ Lën ree dxej zii yu' bën la Barrabás ladxguiib con ree ben ren, bën bagüjt ree bejn loj tijb wadijl ni been reeman contr gobiarn. ⁸ Dxel chi bido'p ree bejn, rëb reeman loj Pilato din güünman zi'c naj costumbr, ⁹ Abi' rëb Pilato loj reeman:

—¿Rëndi ya guslaan xreydi?

¹⁰ Rëbaman zian guial ragbeeman bayü ree bixhioz guin laaman por guial rdëdlojzi reeman laaman. ¹¹ Per ree bixhioz rniabee guin badxe' reeman bejn ree diidx din guiëb reeman loj Pilato guslaaman Barrabás.

¹² Abi' gunabdiidx Pilato loj reeman rëbaman:

—¿Xhie rëndi günnë'n bën nadi naj xreydi?

¹³ Dxel gurixdiaj reeman rëb reeman:

—¡Bacaax loj crüjz!

¹⁴ Zianz rëb Pilato loj reeman:

—Per ¿xhieza ni mal beenx?

Guiáad laa reeman mazri rbixdiaj reeman, rëb reeman:

—¡Bacaax loj crüjz!

¹⁵ Abi' guial rën Pilato yaya'nman zagdxe loj reeman, zeel baslaaman Barrabás, gunabeeman a Jesús, dxel bayüman laaman loj reeman din tiaman loj crüjz.

¹⁶ Abi' binë ree xin sultad guin Jesús xlule' palas, yagaj badxaag lasa' gra reex. ¹⁷ Abi' bascajcw reex laaman tijb lajd murad, dxel been reex tijb coron guiëjch badxe' reex guijcaman. ¹⁸ Dxel guzuloj rbixdiaj reex rëb reex:

—¡Guibanri xrey ree bën Israel!

¹⁹ Zianz rugaz reex var guijcaman, rulaa xhiejn reex lojman, abi' ruzuxib reex lojman. ²⁰ Chi gulox baze' reex laaman, babëë reex lajd

murad guin ladaman, bascajcw reex xabczaman, dxel zinë reex laaman din gucaa reex laaman loj crüjz.

Bacaa reeman Jesús loj crüjz

(Mt. 27:32-44; Lc. 23:26-43; Jn.19 :17-27)

²¹ Chi zinë reex Jesús, badxaagloj reeman tijb bén Cirene, laman Simón, xdad Lejandr con Rufo, ziaadaman bazaman dajn. Abi' been ree suldad guin naguiejn biaaman xcrüjz Jesús.

²² Abi' binë reex Jesús luar la Gólgota, rën guiëban Calaver. ²³ Yagaj badëed reex vin no'ch ni la mirra lojman din guië'man laan, per ad gu'taman laan. ²⁴ Chi ma bacaa reex laaman loj crüjz, dxel gudxijt reex suert gujic xabaman din guidoon xhie yayal tijbgaj reex

²⁵ Raca gaa rsil bacaa reex laaman loj crüjz. ²⁶ Gujic crüjz guin bacaa reex lejtr ni rëb chexc zeel bacaa reex laaman loj crüjz, rëban: "Xrey ree bén Israel." ²⁷ Chi bacaa reex laaman loj crüjz, në zatio'p ree xin gubaan bacaa reex loj crüjz, tijbix cwa xladbeeman, zatijbix cwa xladruvejsaman. ²⁸ Zian gojc cumplid ni ca loj xtiidx Dios, lod rëb: "Nayabaman loj ree benmal."

²⁹ Abi' ree bén ridëd yagaj ruze' reeman laaman runij gujic reeman, rëb reeman:

—Conza ni rnieel guial rëbil, yase'nl yadooro' Jerusalén abi' loj choon dxejzi ma bayüjnlan zatijb, ³⁰ yan baslaa lüj gajc baguiajt tëë loj crüjz zii.

³¹ Ziangajc ruze' ree bixhioz rniabee laaman con ree mextr rajc ley, rëb reeman:

—Gognëx ben ren ree, guiáad laax ad rajct ruslaa laagajquix. ³² Yaguiajtix loj crüjz guin, bal laax naj Cristo, xrey ree bén Israel, din yaguiaa ree, dxel yaliduladx ree.

Xt në ree xingubaan canëman loj crüjz guneeguijdx laaman.

Güjt Jesús

(Mt. 27:45-56; Lc. 23:44-49; Jn.19 :28-30)

³³ Chi gol garol dxej, bicajy guidib guidxliuj xt raca choon wadx.

³⁴ Dxel raca choon guin gurixdiaj Jesús rejs, rëbaman:

—Eloi, Eloi, ¿lama sabactani? —rën guiëban: Diosan, Diosan, ¿chexc zeel gulëeladxil naj? ³⁵ Yu' ree bén za' yagaj bigueijn, abi' rëb reeman:

—Gol bacaagdiajg niad. Laax cabejdx Elías bén badëë xtiidx Dios loj ree bejn.

³⁶ Dxel ruxüün tijbaman, bicajdxaman tijb xiil loj vinagr, bacaaman laan loj tijb yag, abi' bacaaman laan ro' Jesús din guië'man laan, rëbaman:

—Gol basa'nx, yaguiaa ree don zi't Elías yalet laax loj crüjz guin ya.

³⁷ Per Jesús dád rejs gurixdiajman, dxel güjtaman. ³⁸ Loj hor zii goxya' lajd nal lën yadooro' Jerusalén, gojcan tio'p lala', diizd gujic guin xt guia' guin goxya'. ³⁹ Dxel suldad rniabee ree suldad guial za'x niz loj Jesús. Chi baguiaax xhienaag güjtaman, rëbix:

—Walican, Xi'n Dios bén guin.

⁴⁰ Në tio'p choon ree béngunaa za' zijt ruguiaa ni cayajc. Loj ree béngunaa guin no'ch María Magdalena, në Salomé në Li xniaa Xiëb con Jacob bén naj benguiag loj Xiëb. ⁴¹ Béngunaa guin ree binal Jesús, been tëë reeman laaman yudar chi guzuman Galilea, në zien ree béngunaa ren binal laaman diizd Galilea xt Jerusalén.

*Biguie'ch Jesús**(Mt. 27:57-61; Lc. 23:50-56; Jn.19 :38-42)*

⁴² Chi bidxin dxej rüjn ree bén Israel gra, chi guixiezi naj dxej razi-ladx reeman, ma cabej guiaal, ⁴³ bidxin Xiëb bén za guiedx Arimatea. Gojcaman tijb xguxtis ree bén Israel, abi' gojp ree bejn laaman respejt, në laaman rhëz xguialrniabee Dios, abi' guyuman valor wejman loj Pilato, persi banabaman xcuerp Jesús. ⁴⁴ Dád badxa loj Pilato guial ma güjt Jesús, dxel gurejdxaman xin suldad rniabee ree suldad persi gunabdiidxaman bal walin. ⁴⁵ Abi' rëb suldad guin guial walican ma güjtaman, dxel cwëjb Pilato baca' Xiëb cuerp guin. ⁴⁶ Guzii Xiëb tijb lajd, abi' chi baletaman xcuerp Jesús loj crüjz guin dxel batüübaman laaman lajd guin, biquie'chaman laaman lën tijb baa ni bidëën lën tijb guiaj, dxel basiaawaman ro' baa guin con tijb guiajro'. ⁴⁷ María Magdalena con Li xniaa Xiëb, baguiaa reeman lod baquie'ch reeman Jesús.

16*Raban Jesús**(Mt. 28:1-10; Lc. 24:1-12; Jn.20 :1-10)*

¹ Chi gudëd dxej raziiladx ree bejn, María Magdalena, në Salomé, në Li xniaa Jacob, bisii reeman perfum din chitëëb reeman laan xcuerp Jesús.

² Bareguiaal chidumingw, rsildoo brii reeman wej reeman ro' xbaa Jesús, naabzi rliejn gubijdx. ³ Chi zë reeman lunejz, rëb loj lasa' reeman:

—¿Chuza chisüd guiaj nayaaw ro' baa guin?

⁴ Per chi bidxin reeman baguiaa reeman ma biniib guiaj za' ro' baa guin ad za'tri loj xluaran. ⁵ Chi guyu reeman lën baa guin, baguiaa reeman tijb xinguiag zojbix ladbee, najcwix lajd naquich yool, abi' bidxeb reeman. ⁶ Per rëbix loj reeman:

—Ad rdxebidi, raguuilidi Jesús bén Nazaret bén cwa loj crüjz. Per ma babanman, achutri laaman guie, gol baguiaa lod gudixh reeman laaman. ⁷ Yan, gol chej gol chiguiedx loj Bëd në loj los demazri ree xbejnman guial yaloj Jesús ned cheman Galilea dxel chedi, ni guguaaadi laaman zi'c ma naman lojdi.

⁸ Dxel cari da't barii ree béngunaa guin lën baa guin, dád canij reeman cadxeb reeman, abi' achut loj rëb reeman guial rdxeb reeman.

*Balüüloj Jesús loj María Magdalena**(Jn. 20:11-18)*

⁹ Chi ma baban Jesús, chidumingw rsildoo, yaloj loj María Magdalena balüülojman, bén babëëman gajdx xindxab luxdoo. ¹⁰ María Magdalena guin bicojn ree xbejn Jesús, bén yu'naya ree roon tëë reeman por laaman.

¹¹ Chi biguiejn reeman guial naban Jesús baguiaa tëë María Magdalena laaman, ad bililadxt reeman.

*Balüüloj Jesús loj tio'p ree xbejnman**(Lc. 24:13-35)*

¹² Chi gudëd gojc zian, garen balüüloj Jesús loj tio'p ree xbejnman lunejz chi zë reeman niz dajn. ¹³ Dxel bén guin ree bicojn lasa' reeman, per ni'qui laa reeman ad bililadxt reeman.

*Rucaabee Jesús bén naj ree apóstoles**(Mt. 28:16-20; Lc. 24:36-49; Jn.20 :19-23)*

¹⁴Ni bigratë balüüloj Jesús loj za chiptib ree xbejnman, chi zojb reeman xan mex cayaw reeman, gudilëman laa reeman guial nad reeman, ad riladxt reeman bén baguiaa ree laaman guial ma babanman. ¹⁵Dxel rëbaman loj reeman:

—Gol chej guidib guidxliuj, gol chigtie'ch xtiidxza'c Dios loj gra ree bejn. ¹⁶Bén chililadx tiobnijs tée zajcaman perdon loj Dios. Per bén ad zaliladxt xtiidxza'c Dios, laaman yayal casti. ¹⁷Sen guie ree gap ree bén chililadx naj: Por da guialrniabeen zabëë reeman xindxab luxdoo ree bejn, zanee tée reeman diidx ren ree, ¹⁸zanaaz reeman bëël ree, abi' majsi guië' reeman ni yu' venen guijc achet gac reeman, chi gudxiib yaa reeman guijc ree bënragxuu, zayajc reeman.

Bayë'p Jesús xanyabaa
(Lc. 24:50-53)

¹⁹Chi gulox guneenë Dad Jesús laa reeman, dxel bayë'paman xanyabaa, gurejman xladbee Dios. ²⁰Guiáad laa reeman brii reeman zigtie'ch reeman xtiidxza'c Dios guidibczi. Abi' Dad Jesús gognë laa reeman, been reeman milagr ree, persi gogbee ree bejn guial xtiidxqui Dios naj ni rníee reeman. Amén.

Xtiidxza'c Jesucrist ni bacaa San Lujc

Rxhiaal Lujc gui'ch loj Teófilo

¹ Zien ree b́en ma been naguiejn gucaa ni goc con dunuj ree, ² zi'cgajczi balüü ree bejn dunuj ree, b́en baguiaa ree diizd guia'xchej ni been Jesús nē ni guzacaman, gutie'ch tēē reeman xtiidxaman. ³ Naj baguixne-jzchaaw diizd guia'xchejn, dad Teófilo, zeel naladxan zagdxen gucanan xnejz par lüj, ⁴ dín chignia'l zagdxex diidxli balüü reeman lüj.

Rugojn tijb anjl gal Waj

⁵ Tiamp gunabee rey Herodes guidib niz Judea, guyu tijb bixhioz brier laj Zacarías, bachajgaman tib cwaa ree bixhioz brier laj xbejn Abías. Xbéngunaa Zacarías brier laj Elisabet, zaman loj xdiaa bixhioz brier laj Aarón. ⁶ Grop reeman gubajn xnejz loj Dios bazoob tēē reeman diidx graczi ni rniabee Dios, abi' achut rila' guiēb guial rajp reeman dol. ⁷ Per achut xi'n reeman guyu guial ad gojct niu xi'n Elisabet, grop reeman ma naj bengol.

⁸ Tijb dxej ni bayal ree bixhioz no'ch Zacarías loj, been reeman sirv loj Dios, ⁹ zi'c naj xcostumbr ree bixhioz guin, gudxiyt reeman suert dín guidoon chu yayal gudxe' goxyaal lēn yadooro' Jerusalén, abi' bayal Zacarías cu'man goxyaal guin. ¹⁰ La'tgaj cagu'man goxyaal guin, gra ree bejn riga' lule' cabejdx canab reeman Dios. ¹¹ Dxel balüüloj tijb xianjl Dios loj Zacarías, za'liman xladbee altar lod cayu goxyaal guin. ¹² Chi baguiaa Zacarías anjl guin, ad badxejlt xhie nünman, dád bidxebaman. ¹³ Per rēb anjl guin:

—Zacarías, ad rdxebil ma bacaagdiajg Dios ni gunabil. Chu' xi'n xbéngunaa Elisabet, gaquix xinguaaw abi' yagu'l lajx Waj. ¹⁴ Yabaa da'til, nē zien ree bejn yabaa chi galix, ¹⁵ guial gaquix xin lasajc loj Dios. Ad zē'tix vin ni'qui ni gusüdx laax. Abi' diizd chi gadix gal mal za'nē xSprijt Dios laax. ¹⁶ Por laax zien ree b́en Israel yayejc loj xDad reeman Dios. ¹⁷ Laax ned lojman, chu' xSprijt Dios luxdoox gap tēēx guialrniabee zi'c Elías, b́en badēē xtiidx Dios loj ree bejn, yabe'cdxex b́en naj ree dad con xi'n reeman, gulüü tēēx b́en ad ruzoobt ree diidx dín guzuxnejzix bejn ree guidxga' reeman laaman chi gui'taman.

¹⁸ Dxel rēb Zacarías loj anjl guin:

—¿Xhienaag gagbeen guial gac cumplid ni nal? Dín naj con da béngunaan ma nayajcan bengol.

¹⁹ Badxi' anjl guinan rēbaman:

—Naj naj Gabriel, rünan sirv loj Dios, laaman guxhaal naj zidnē'n diidxza'c guie lojl. ²⁰ Per yan guial ad bililadxtil da diidxan, yaya'nl gop ad zajct guinieel xt guidxin dxej gal xindo guin.

²¹ Guiáad ree ben riga' lule' guin cabēz reeman Zacarías yu' nawēēg reeman guial cayaglaaman lēn yadoo guin. ²² Chi bariiman ad rajctri rnieeman, gaz sen rünman guial ma baya'nman gop. Dxel gogbee reeman guial yu' xhie baguiaaman lēn yadoo guin.

²³ Zianz baza' ree dxej ni been Zacarías sirv lēn yadoo guin, dxel zia lidxaman. ²⁴ Chi gudēd ree dxej guin, guyu xi'n xbéngunaa Elisabet.

Gaay bëew tib guyuzaman lënu, rëbaman: ²⁵ “Ze naj ni beennë Dios naj lën ree dxej guie chitëë guze'ri ree bejn naj.”

Rugojn tijb anjl Li gal Jesús

²⁶ Ni goc xho'p bëew, guxhaal Dios anjl la Gabriel luguiedx Nazaret ni riga' niz Galilea, ²⁷ din chignajman tijb biinxdüb lam Li. Ma naj tia' tijb xin la Xiëb laam, xin zëed loj xdiaa rey Davi.

²⁸ Guyu anjl guin lod yu' Li abi' rëbaman:

—jXchan Li, Dios ma gulej lüj! Dios za'në lüj, ma beenle' tëëman lüj loj gra ree bëngunaa.

²⁹ Chi baguiaa Li anjl guin dád badxa lojm guial rëbaman zian, abi' gunabdiidxim xhie rën guiëb ree diidx guin. ³⁰ Dxel rëb anjl guin:

—Li, ad rdxe bil din lüj gule Dios beenle' tëëman lüj. ³¹ Chu' xi'nl, abi' chi galaman yagu'l lajman JESÚS. ³² Laaman gac bën zobjloj, guinee ree bejn laaman Xi'n Dios bën yu' xanyabaa. Güün dux Dad ree Dios laaman rey zi'c goc xdiaagulalaman Davi, ³³ din nabeeman bën Israel ree xt goctëëz, abi' xguialrniabeeman ad yu't dxej loxan.

³⁴ Dxel rëb Li loj anjl guin:

—jXhienaag chu' da xi'n'an awa achut bënguiaaw nabannë'n?

³⁵ Badxi' anjl guinan rëbaman:

—Por xSprijt Dios chu' xi'nl, abi' xguialrniabee Dios bën yu' xanyabaa gusiaawan guijquil con xbalan. Zeel xi'nl bën gal, gacaman naya nali abi' guinee ree bejn laaman Xi'n Dios. ³⁶ Ziangajc lasa'l Elisabet ma yu' xi'nman, majsi ma najman bengol, bën rëb ree bejn ad zajct chu' xi'n, per yan ma gojc xho'p bëew yu' xi'nman. ³⁷ Din Dios graczi zajc güünman.

³⁸ Dxel rëb Li loj anjl guin:

—Dios naj bën rniabee naj, gacza zi'c rënman.

Ziat anjl guin.

Rignaj Li Elisabet

³⁹ Lën ree dxej guin wej Li cari da't tijb guiedx ni riga' lad ree guia' niz Judea, ⁴⁰ dxel guyum lënu lidx Zacarías, bagajpdiozim Elisabet. ⁴¹ Chi biguiejn Elisabet cha'm cugajpdiozim laaman, laa baniib gajc xindobëz yu' lënman, dxel guyu xSprijt Dios luxdooman guidiblagaa. ⁴² Abi' gunee Elisabet rejs, rëbaman:

—jDios ma beenle' lüj loj gra ree bëngunaa, beenle' tëëman bejndobëz yu' lën! ⁴³ jChuzaj najn zeel zidganaj xniaa da Diosan naj, bën rniabee? ⁴⁴ Din biguiejnzan cha'l bagajpdiozil naj, laa baniib gajc da bindoon lënan guial babaam. ⁴⁵ Xiquilbaal guial bililadxil, din gac zi'c bagojn Dios lüj.

⁴⁶ Dxel rëb Li:

Ruzatan Dios zagdxe,

⁴⁷ rabaanë' tëën laaman, guial ragnëman naj.

⁴⁸ Guial baguiaaman naj, majsi biin rüjnzi sirv lojman naj.

Abi' diizd yan xt goctëëz guza't ree bejn naj, guiëb reeman xiquilbaam.

⁴⁹ Din Dios, bën rniabee, dád zro' naj ni ma beennëman naj.

Naya naliman.

⁵⁰ Ad rbëzt rayaman graczi ree bën ruzoob xtiidxaman.

⁵¹ Zro' naj ni ma beenman con xguialrniabeeman.

Base'nman xixgab ree bën rüjn benro',

⁵² biquiedaman guialrniabee loj ree bën rniabee,

guiáad loj ree bën ad zobjlojt badëëman guialrniabee loj reeman.

⁵³ Badëëman guialnaza'c loj ree bén biaadx guialraw,
guiáad ree benrijcw basa'nman laa reeman zezi.

⁵⁴ Gognëman bén Israel ree, xbejnman,
abi' ad bayanladxtaman nayaman laa reeman,

⁵⁵ zi'c rëbaman loj dux béngulal ree,
Abraham në loj ree xdiaaman.

⁵⁶ Abi' baya'nnë Li Elisabet cost choon bëëw, dxel baguiaj lidxim.

Rajl Waj

⁵⁷ Chi bidxin dxej gojl xi'n Elisabet najx xinguaaw. ⁵⁸ Abi' gogbee ree lasa'man në ree bén zobj gajxh guial baya Dios laaman, dád babaa reeman bignaj reeman laaman. ⁵⁹ Chi ma gojc xindobëz guin toxman, dxel binë reeman laax guyux sen ni ru ree bén Israel. Abi' guyën reeman nagu' reeman lajdoox Zacarías zi'c la xdadix, ⁶⁰ per gunee xniaax, rëbaman:

—Ad zayutan zian. Rayal gaquim Waj.

⁶¹ Dxel rëb reeman lojman:

—¿Chexquiza zeel gaquix Waj? Achut ree lasa'l la zian.

⁶² Abi' con sen gunabdiidx reeman loj xdad xindobëz guin chu rënman grii lajx. ⁶³ Zianz gunabaman tibia' tabl abi' bacaaman lojn: “Waj grii lajx.” Dád badxaloj gra ree bén guin. ⁶⁴ Loj hor ziigajc gojc banee Zacarías, abi' guzuloj cuza'taman Dios zagdx. ⁶⁵ Gra ree bén zobjnëman gajxh dád badxa loj reeman, xt gra ree guiedx riga' lađ ree guia' niz Judea gogbee reeman graczi ni goc. ⁶⁶ Guiáad graczi ree bén gogbee zian, rniabdiidx loj lasa' reeman, rëb reeman:

—¿Chu gac xindo guin ya'n chi ni'six?

Rëb reeman zian guial laa rguien gajc ma beenle' Dios laax.

Ni gunee Zacarías

⁶⁷ Zacarías, bén naj xdad xindo guin guyu xSprijt Dios luxdooman guidiblagaa, zianz guzuloj caneeman, rëbaman:

⁶⁸ Benza'c bendxoon naj Dios, dux Dad ree nayajc ree bén Israel, guial bi'taman bidganajman dunuj ree nayajc ree xbejnman, bidgalëë tëëman dunuj ree loj ni cayza'c ree.

⁶⁹ Guxhaalaman tijb bén rajp guialrniabee din yabëëman dunuj ree loj ni cayza'c ree,

zëëdaman loj xdiaa rey Davi, bén naj xbejn Dios.

⁷⁰ Zi'c been Dios promejs diizd gocli, zian gunee ree bén badëë xtiidxa-man loj ree bejn, bén guban ree zi'c rënman:

⁷¹ guial yabëëman dunuj ree loj ree bén ralen dunuj ree, në loj gra ree bén yu'xyajn dunuj ree,

⁷² yaya tëëman dux béngulal ree,

abi' ad zayanladxtaman promejs ni beenman.

⁷³ Ni ne naj promejs ni beenman loj dux béngulal ree Abraham:

⁷⁴ guial yabëëman dunuj ree loj ree bén ralen dunuj ree,

din chile' yaguieen ree sirv lojman sin guialrdxeb,

⁷⁵ yabajn ree yaguieen tëë ree zi'c rënman, guidib tiamp ni yabajn ree.

⁷⁶ Guiáad lüj xi'n, guiniee ree bejn lüj bén rudëë xtiidx Dios loj ree bejn,
Dios yu' xanyabaa.

Din nedil chiguieenchaawil xnejz bén naj Dad,

77 gulüü tëël xbejnman din gagbee reeman xhienaag gac xtol reeman perdon,

laa tëë reeman loj casti.

78 Guial raya da't dux Dad ree dunuj ree,

zeel guxhaal xi'nman, bén naj zi'c xbacha' gubijdx din gusniman du loj ree,

79 guixhial tëëman xquiargueijn ree bén zë loj nejzmal, bén ad nabant ree xnejz zi'c rën Dios,

gulüü tëëman dunuj ree yadxoo ree loj xnejzaman din yabajn ree zagdxe sin wadijl.

80 Guiáad xindo guin guni'six guyu tëë xquiarguejnx mazri por Dios. Guzujx loj yujbidx, xt bidxin dxej guneex xtiidx Dios loj ree bén Israel.

2

Rajl Jesús

(Mt. 1:18-25)

¹ Lën ree dxejzii gunabee rey César Augusto guiyab gra ree bejn guidib lod rniabeeman. ² Laan naj ni yaloj biyab ree bejn chi goc Cirenio gobernador Siria. ³ Graczi ree bejn naj yaguiaj ladx ladx din guiyab reeman. ⁴ Zianan zeel brii Xiëb luguiedx Nazaret ni riga' niz Galilea, wejman Belén, ni riga' niz Judea, lod gol rey Davi din loj xdiaa rey Davi zëed Xiëb. ⁵ Wejman binëman Li, lacheelaman din guiyab reeman. Ma yu' xi'n Li. ⁶ Abi' la'tgaj za' reeman Belén, bidxin dxej gojl bejndobëz guin. ⁷ Yagaj gol xi'n yaloj Li, dxel batüübaman bejndobëz guin lajd, gudijxhaman laaman lod ru ni raw ree be, guial ad bidxejlt lënu naya'n reeman.

Bidxin ree xianjl Dios lod za' ree bén rajp xiil

⁸ Gajxh Belén guin za' ree bén rajp xiil, abi' dajn guin gajc rdëd reeman guiaal rajp reeman laa reeb. ⁹ Dxejczy balüüloj tijb xianjl Dios loj reeman, naynidxuj basni xbiani Dios lod riga' reeman abi' dád bidxeb reeman.

¹⁰ Per rëb anjl guin loj reeman:

—Ad rdxebidi din zidnë'n diidxza'c lojdi, por laan yabaa gra ree bejn.

¹¹ Yan, ladx rey Davi ma gojl bén yabëë lëjt loj ni cazajquidi, laaman naj Cristo, laaman naj Dad. ¹² Abi' din yayünbeedi laaman; nadüübaman lajd, naga'man lod ru ni raw ree be.

¹³ Dxejczy balüüloj zien da't ree anjl cwë' anjl yaloj guin, ruza't reeman Dios zagdxe, rëb reeman:

¹⁴ jBenza'c bendxoon naj Dios bén yu' xanyabaa,

abi' loj guidxliuj yabe'cdxeman luxdoo bén rüjn ree zi'c rënman!

¹⁵ Chi ma zia ree anjl guin xanyabaa, dxel rëb loj lasa' ree bén rajp ree xiil guin:

—Yo' ree Belén yuquiaa ree ni goc ni, zi'c ma bagojn dux Dad ree Dios dunuj ree.

¹⁶ Dxel cari da't zë reeman, abi' bidxaagloj reeman Li në Xiëb, nëtëë bejndobëz guin naga'man lod ru ni raw ree be. ¹⁷ Chi baguiaa reeman laaman, be reeman diidx ni rëb anjl guin loj reeman xcwent bejndobëz guin, ¹⁸ abi' graczi ree bén bigueijn dád badxa loj reeman ni rëb ree bén rajp ree xiil guin. ¹⁹ Per Li, rgu'chaaw luxdooan gra ni rucaagdiajgaman, rüjn tëëman laan xgab. ²⁰ Dxel zia ree bén rajp ree xiil guin, rabaa

reeman rudëe tëe reeman quixtëe loj Dios por gra ni baguiaa reeman biguiejn tëe reeman, guial gojc zi'c rëb anjl guin loj reeman.

Binë reeman Jesús lën yadooro' Jerusalén

²¹ Chi ma gojc toxman gojl bejndobëz guin, badxe' reeman laaman sen ni ru ree bën Israel, bagu' tëe reeman lajman Jesús zi'c rëb anjl guin loj Li chi gad Jesús gacxhiejlënman.

²² Chi bayaaloj ree dxej ni been Li zi'c rüjn ree béngunaa rajl xi'n, dxel binë reeman bejndobëz guin loj Dios lën yadooro' Jerusalén. ²³ Been reeman zian din loj ley guin ca: "Gra ree xindoniguaiaaw rajl yaloj ma naj reex par Dios." ²⁴ Abi' binë reeman gon par Dios zi'c rniabee ley: rayal chinë reeman tio'p gugdoo o tio'p palomdoo.

²⁵ Tiamp zii zojb bën la Simeón Jerusalén. Najman benza'c rën tëeman Dios, rbëzaman bën gagnë bën Israel ree za'në tëe xSprijt Dios laaman. ²⁶ Abi' por Sprijt guin gogbeeman guial ad zëjttaman xt guguaiaaman Cristo, bën guixhiaalaman. ²⁷ Dxel por xSprijt Dios wejman lën yadooro' Jerusalén. La'tgaj yu'man lën yadoo guin, Xiëb con Li bidxinnë reeman Jesús din güün reeman zi'c rniabee ley, ²⁸ zianz gudiidx Simeón bejndobëz guin baza'taman Dios zagdx, rëbaman:

²⁹ Dad, yanri ma babedxe luxdon.

Ma zajc guslaal naj guiëtan najn xmojsil, ma gojc zi'c nal.

³⁰ Din con quijb guiaalon ma baguian bën gagnë dunujn.

³¹ Guial ma bazujl laaman loj gra ree bénguidxliuj.

³² Laaman naj biani par ree bën ad najt bën Israel, naj tëeman bacha' par ree xbën Israelil.

³³ Guiáad Xiëb con xniaa Jesús dad badxa loj reeman ni biguiejn reeman rëb Simeón xcwent bejndobëz guin. ³⁴ Dxel beenle'man laa reeman, zianz rëbaman loj Li xniaa Jesús:

—Li, Dios bacaabee bejndobëz guie din por laaman zien da't ree bën Israel laa loj dol, per zien reeman yaya'n loj xtol. Zidgalüüman bejn ree conin naj ni ruladx Dios, per zien reeman ad zënt laaman. ³⁵ Abi' zian gagbeeman xhienaag naj xixgab tijbgaj bejn, guiáad lüj zi'c tijb espad chëez luxdool chi gac ree ni guin.

³⁶ Yagaj gajc za' tijb béngunaa yo'xh laman Ana, rudëeman xtiidx Dios loj ree bejn, xdadaman brii laj Fanuel, xdiaagulalaman gojc Aser. Benguiagan chi cwa' xinguaiaaw laaman, abi' gajdx ijsi gubajnnë lacheelaman. ³⁷ Ma gojc tajpgajlbitap iyz baya'nman bizëjb. Zianczi yu'man lën yadooro', rba'nman rbejdx rniab tëeman Dios. ³⁸ Loj hor ziigajc bibigaman lod za'në Xiëb Li con Jesús, guzuloj cudëedaman quixtëe loj Dios cuza't tëeman bejndobëz guin loj gra ree bën cabëz guixhiaal Dios bën gagnë bën Jerusalén ree.

Zia reeman Nazaret

³⁹ Chi ma been reeman graczi ni rniabee xley Dios, dxel zia ladx reeman Nazaret ni riga' niz Galilea. ⁴⁰ Cani's bejndobëz guin, cayuman gojl, cayajcaman nasin, cayüjnle' tëe Dios laaman.

Yu' Jesús lën yadooro' Jerusalén

⁴¹ Gazob iyz ree xdad Jesús Jerusalén lanij pascw. ⁴² Chi baza' Jesús chiptio'p iyz, binë ree xdadaman laaman lanij zii zi'c naj xcostumbr reeman. ⁴³ Chi ma gudëd lanij guin, baza ree xdad Jesús ma zia ladx

reeman. Ad gogbeet reeman baya'n Jesús Jerusalén. ⁴⁴Gunaladx reeman ma no'chaman loj ree bén zia. Zian guza reeman tibdxej. Per chi baguuil reeman laaman loj lasa' reeman në loj ree bén nünbee reeman, ⁴⁵ achut laaman naguiee. Dxel bayejc reeman zia reeman Jerusalén zatijb zigdiil reeman laaman.

⁴⁶ Xt ni gocri choon dxej badxejl reeman laaman lèn yadooro' Jerusalén, zojbaman galay ree mextr rajc ley, cucaagdiajgaman canabdiidx tëeman laa reeman. ⁴⁷ Gra ree bén caguiejn ni rnieeman caydxaloj reeman guial rajcaman në ree diidx radxi'man. ⁴⁸ Chi baguiaa ree xdadaman laaman, dád badxaloj reeman, dxel rëb xniaaman:

—Xi'n, ¿chexc zeel basajquil dunujn zian? Xdadil con naj dád nadxu'n xgab caydiilan luj.

⁴⁹ Badxi' Jesús laan rëbaman:

—¿Chexc zeel raguuilidi naj? ¿Nid ragbeedi ya rayal günan xchiin da Dadan?

⁵⁰ Per ad bignia't reeman xhie rën guiëb ni rëbaman.

⁵¹ Dxel bayejcnëman laa reeman zia reeman Nazaret, graczi xtiidx ree xdadaman ruzoobaman, guiáad xniaaman graczan rgu'chaaw luxdooman. ⁵² Zi'cri cani's Jesús cayu tëë mazri xquiargueijnman. Rabaanë Dios laaman rabaanë tëë ree bejn laaman.

3

Rzuloj Waj ruliüüman xtiidx Dios

(Mt. 3:1-12; Mr. 1:1-8; Jn. 1:19-28)

¹ Chi goc chiin ijz rniabee rey Tiberio, abi' Poncio Pilato najman gubernador Judea, Herodes najman gubernador Galilea, bijchaman Felip najman gubernador Iturea në Traconite, guiáad Lisania najman gubernador Abilinia. ² Anás në Caifás naj reeman bixhioz rniabee gra ree bixhioz. Lèn ree dxej zii gunee Dios Waj, xi'n Zacarías lod naj yujbidx.

³ Dxel gudëd Waj graczi ree guiedx riga' ro' guiiw Jordán, rëbaman loj ree bejn din yayüjn reeman xgab por xtol reeman tiobnijs tëë reeman, din güün Dios xtol reeman perdon. ⁴ Zian gojc cumplid ni bacaa Isaías bén badëë xtiidx Dios loj ree bejn, lod rëbaman:

Rguien cha' tijb bén rbidxa' loj yujbidx, rëbaman:

“Gol beenchaaw xnejz dux Dad ree Dios,

gol guxhal tijb nejz nali.

⁵ Gra ree la'ch yadxa reen guiáad ree guia' con

ree lom yayajc reen tibloj,

në ree nejz volt yayaali

yadxa tëë ree lunejz ni ad najt tibloj.

⁶ Gra ree bénguidxliuj guguaa Bén

guixhiaal Dios gagnë dunuj ree.”

⁷ Chi brie zien ree bejn din guroobnijs Waj laa reeman, rëbaman loj reeman:

—¿Xi'n xindxab lëjt! ¿Chu bagojn lëjt guial laadi loj castiro' ni zëëd? ⁸ Gol gubajn zagdxë din guiguien guial waliqui ma bayüjndi xgab por xtolidi, ad guiëb tëë loj lasa'di: “Dunujn zio'p loj xdiaa Abraham”, din naj rni lëjt xt guiaj guie ree zajc yayüjn Dios xdiaa Abraham. ⁹ Abi' ree bén ad zinalt xnejz Dios zi'c rayal, ma zidyob dxej ni güünnë Dios laa reeman zi'c rüjnnë bejn tijb yag chi ad rtiatan, rütüügaman laan din che'can.

¹⁰ Dxel gunabdiidx reeman, rëb reeman:

—¿Xhie rayal yaguieenan?

¹¹ Badxi' Wajn rëbaman:

—Bén yu' tio'p xab, rayal gudëëman tijban loj bén achet rajp. Guiáad bén yu' ni raw, rayal gudëëman ta'nan loj bén ryaadxan.

¹² Në tio'p choon ree bén ruquijx impuest bidxin din tiobnijs reeman. Abi' gunabdiidx reeman loj Waj, rëb reeman:

—Mextr, laadx dunujn, ¿xhie rayal yaguieenan?

¹³ Badxi' Wajn, rëbaman:

—Ad guquijxidi mazri guial loj ni rayal guquijxidi.

¹⁴ Yu' tëë ree suldad gunabdiidx lojman rëb reex:

—Laadxza dunujn, ¿xhie rayal yaguieenan?

Badxi'man laan rëbaman:

—Ad cwëëxuudi xhie xieen bejn, guial guchejbidi laa reeman o gudxi-ibidi guijc reeman ni ad beent reeman, gol guziibnejz tëë ni rajxidi.

¹⁵ Guiáad ree bejn gagbeenezdoo reeman bal Wajn naj Cristo, ¹⁶ per rëbaman loj gra reeman:

—Naj curobnijs lëjt con nijs. Per zëed tijb bén guroobnijs lëjt con xSprijt Dios në bajl. Laaman rajp mazri gualrniabee guial lon, ni'qui xgurëchaman ad zajct gaxhiecan. ¹⁷ Abi' zi'c raya trigo zian güünnëman bejn. Din bén zinal ree xnejz Dios yayal reeman lod rniabeeman, guiáad ree bén ad zinalt xnejz Dios guixhiaalaman laa reeman loj bajl ni ad yu't dxej yayü'.

¹⁸ Zian guneenë Waj laa reeman, në ree con diidx ren guneenëman laa reeman rulüüman laa reeman xtiidxza'c Dios. ¹⁹ Gudilë tëëman rey Herodes guial cwa'man Herodías xbéngunaa bijchaman Filip, në por graczi ni mal ni ma beenman. ²⁰ Per luar nidxga' Herodes xtiidx Waj aal beenman zatijb ni mal: badxe'man Waj ladxguuib.

Rirobnijs Jesús

(Mt. 3:13-17; Mr. 1:9-11)

²¹ Chi curoobnijs Waj bejn ree nëgajc Jesús guroobnijs. Abi' la'tgaj cabejdx canabaman Dios, bixal xanyabaa ²² zianz biguiajt xSprijt Dios zi'c tijb palom xt guijcaman. Dxel biguien cha' tijb bejn xanyabaa, rëbaman:

—Lüj naj da xi'nan, rënan lüj rabaanë' tëën lüj.

Bén goc ree xdiaagulal Jesús

(Mt. 1:1-17)

²³ Cost gajlbichii ijz yu' Jesús chi guzuloj beenman xchiin Dios. Naladx ree bejn xi'n Xiëb najman, Xiëb guin gojc xi'n Elí. ²⁴ Elí gojc xi'n Matat, Matat gojc xi'n Leví, Leví gojc xi'n Melqui, Melqui gojc xi'n Jana, Jana gojc xi'n Xiëb, ²⁵ Xiëb gojc xi'n Matatías, Matatías gojc xi'n Amós, Amós gojc xi'n Nahum, Nahum gojc xi'n Esli, Esli gojc xi'n Nagai, ²⁶ Nagai gojc xi'n Maat, Maat gojc xi'n Matatías, Matatías gojc xi'n Semei, Semei gojc xi'n Xiëb, Xiëb gojc xi'n Judá, ²⁷ Judá gojc xi'n Joana, Joana gojc xi'n Resa, Resa gojc xi'n Zorobabel, Zorobabel gojc xi'n Salatiel, Salatiel gojc xi'n Neri, ²⁸ Neri gojc xi'n Melqui, Melqui gojc xi'n Adi, Adi gojc xi'n Cosam, Cosam gojc xi'n Elmodam, Elmodam gojc xi'n Er, ²⁹ Er gojc xi'n Josué, Josué gojc xi'n Eliezer, Eliezer gojc xi'n Jorim, Jorim gojc xi'n Matat, ³⁰ Matat gojc xi'n Leví, Leví gojc xi'n Simeón, Simeón gojc xi'n Judá, Judá gojc xi'n Xiëb, Xiëb gojc xi'n Jonán, Jonán gojc xi'n Eliaquim, ³¹ Eliaquim gojc xi'n Melea, Melea gojc xi'n Mainán, Mainán gojc xi'n Matata, Matata gojc xi'n Natán,

³² Natán gojc xi'n Davi, Davi gojc xi'n Isaí, Isaí gojc xi'n Obed, Obed gojc xi'n Booz, Booz gojc xi'n Salmón, Salmón gojc xi'n Naasón, ³³ Naasón gojc xi'n Aminadab, Aminadab gojc xi'n Aram, Aram gojc xi'n Esrom, Esrom gojc xi'n Fares, Fares gojc xi'n Judá, ³⁴ Judá gojc xi'n Jacob, Jacob gojc xi'n Isaac, Isaac gojc xi'n Abraham, Abraham gojc xi'n Taré, Taré gojc xi'n Nacor, ³⁵ Nacor gojc xi'n Serug, Serug gojc xi'n Ragau, Ragau gojc xi'n Peleg, Peleg gojc xi'n Heber, Heber gojc xi'n Sala, ³⁶ Sala gojc xi'n Cainán, Cainán gojc xi'n Arfaxad, Arfaxad gojc xi'n Sem, Sem gojc xi'n Noé, Noé gojc xi'n Lamec, ³⁷ Lamec gojc xi'n Matusalén, Matusalén gojc xi'n Enoc, Enoc gojc xi'n Jared, Jared gojc xi'n Mahalaleel, Mahalaleel gojc xi'n Cainán, ³⁸ Cainán gojc xi'n Enós, Enós gojc xi'n Set, Set gojc xi'n Adán, guiáad Adán gojc xi'n Dios.

4

Been xindxab Jesús prueb

(Mt. 4:1-11; Mr. 1:12-13)

¹ Yu' xSprijt Dios luxdoo Jesús guidiblagaa. Chi bazaman guiwro' Jordán dxel biné xSprijt Dios laaman lod naj yujbidx. ² Ni guzuman tiuu dxej tiuu guiaal, abi' been xindxab laaman prueb. Achetdzi gudawaman dxej zii ree, zianz gulaanman. ³ Dxel rëb xindxab guin lojman:

—Bal wali najl Xi'n Dios, gunabee yayajc guiaj guie guiadxtil.

⁴ Badxi' Jesús laan rëbaman:

—Loj xtiidx Dios rëb: “Ad ganaxtizi guiadxtil guiban bejn, nëgajc gra diidx rniee Dios.”

⁵ Dxel biné xindxab guin laaman tijb guiyc guia' ya da't, lod balüüx laaman gra ree nacion riga' loj guidxliuj. ⁶ Abi' rëb xindxab guin lojman:

—Gunen graczi guialrniabee në guialnaza'c ni yu' loj ree nacion guie. Din naj ca' laa reen, zajc gudëdan laa reen loj chutëz bën rënan. ⁷ Bal guzuxibil lon abi' guiën da'til naj, graczan gac xieenl.

⁸ Badxi' Jesús laan, rëbaman:

—Loj xtiidx Dios rëb: “Tijbzi loj xDadil Dios guzuxibil guiën tëël laaman, abi' tijbzi laaman been sirv.”

⁹ Dxel biné xindxab guin laaman Jerusalén, abi' gulë'pix laaman guiyc yadooro' zojb luguiedx guin. Zianz rëbix lojman:

—Bal wali najl Xi'n Dios, gudidya' diizd guie xt luyuj, ¹⁰ din loj xtiidx Dios rëb:

Dios guixhiaal ree xianjlaman din guinia reeman lüj.

¹¹ Yales reeman lüj con yaa reeman, chitëë quiilguijdx guiaj guia'l.

¹² Badxi' Jesús laan rëbaman:

—Rëb tëë loj xtiidx Dios: “Ad güünl prueb xDadil Dios.”

¹³ Chi ad badxejltri xhienaag güün xindxab guin Jesús prueb, dxel biquiedix tiblädëd.

Rzuloj Jesús rulüüman bejn ree niz Galilea

(Mt. 4:12-17; Mr. 1:14-15)

¹⁴ Badxin Jesús niz Galilea, yu' xSprijt Dios luxdooan guidiblagaa, abi' guidibcziz niz yagaj bire'ch xtiidxaman. ¹⁵ Rulüüman bejn ree lën ree yadoo guidib niz yagaj, abi' graczi reeman ruza't laaman zagdxe.

*Radxin Jesús Nazaret**(Mt. 13:53-58; Mr. 6:1-6)*

¹⁶ Badxin Jesús Nazaret luguiedx lod guni'saman. Abi' dxej raziiladx ree bejn guyuman lèn yadoo zi'c naj xcostumbraman. Dxel guzuliman persi biilaman xtiidx Dios. ¹⁷ Badëed reeman gui'ch ni bacaa Isaías bèn badëe xtiidx Dios loj ree bejn. Chi bachijlaman loj gui'ch guin, badxejlaman lod rëb:

¹⁸ XSprijt dux Dad ree Dios za'në naj, din laaman ma beenle' naj din ganen xtiidxza'caman loj ree bënprob. Guxhaalaman naj din gugoynan bejn ree xhienaag laa reeman loj ni rzajc reeman,

yaxhal tëen loj ree bénlutia'p.

Gün tëen yudar bèn rusagzi reeman,

¹⁹ din gugoynan guial ma bidxin dxej za'cdxoon ni güünle' Dios bejn ree.

²⁰ Dxel batüüb Jesús gui'ch guin bayüman laan loj bèn rüjn yudar lèn yadoo guin, zianz gurejman. Graczi ree bèn riga' yagaj ruguiaadxiyx laaman. ²¹ Dxel guzuloj caneenëman laa reeman, rëbaman:

—Yan dxej gajc ma gojc cumplid zi'c ca loj xtiidx Dios ni ma biguiejndi.

²² Graczi reeman cuza't laaman zagdxe caydxa tëe loj reeman didxzza'cdxoon ni caneeman. Dxel canabdiidx loj lasa' reeman rëb reeman:

—¿Nid laaman naj xi'n Xiëb ya?

²³ Dxel rëb Jesús loj reeman:

—Ma ragbeen guial nadi tijb diidx ni rëb: “Doctor, bayüjn lüj gajc”, na tëedi: “Ni ma baguiejnan beenl Capernaum nëgajc guie beenan najn ladxil.”

²⁴ Rëb tëe Jesús:

—Diidxliczi rnin, ni'czi tijb bèn rudëe xtiidx Dios loj ree bejn, ad rënt reeman laaman ladx gajcaman. ²⁵ Gol basaaladx dád zien ree béngunaa bizëjb zojb Israel lèn ree dxej guban Elías bèn badëe xtiidx Dios loj ree bejn, chi ad golt guia choon ijz garol, abi' guyu gubijn guidibczi. ²⁶ Per ad guxhaalt Dios Elías guin loj tijb ree bèn bizëjb zojb Israel, guxhaalaman laaman loj tijb bèn bizëjb zojb guiedx la Sarepta, gajxh Sidón. ²⁷ Në lèn ree dxej guban Eliseo bèn badëe xtiidx Dios loj ree bejn, dád zien ree bejn rajc guialguijdx la lepra, per ni'czi tijb reeman ad bayüjntaman, tijbzi bèn Siria bayüjnman laman Naamán.

²⁸ Chi biguiejn gra ree bèn yu' lèn yadoo guin ni rëb Jesús, dád balen reeman. ²⁹ Bisu reeman babëe reeman Jesús luguiedx guin, dxel binë reeman laaman ro' tijb bala' ya guial naj guiedx guin guijc tijb guia', din gutedia' reeman laaman. ³⁰ Per gudëd Jesús galay reeman, ziataman.

*Rabëe Jesús xindxab luxdoo tijb bejn**(Mr. 1:21-28)*

³¹ Wej Jesús guiedx Capernaum ni riga' niz Galilea, yagaj rulüüman bejn ree dxej ni raziiladx reeman. ³² Abi' dád badxaloj reeman ni rulüüman guial rnieenëman laa reeman con guialrniabee.

³³ Lèn yadoo guin yu' tijb xin yu' xindxab luxdoo, abi' guridxa' xindxab guin rëbix:

³⁴ —Basa'n dunujn, ¿xhie rënl con dunujn, Jesús bèn Nazaret? ¿Zëëdil ya zidganijttil dunujn? Nünbeen lüj, naya nalil najl xi'n Dios.

³⁵ Dxel gudilë Jesús xindxab guin, rëbaman lojx:

—¡Bacwëez ro'l, barii luxdoo xin guin!

Zianz badxe'bi xindxab guin xin guin luyuj guidib niz loj reeman, bariitix luxdoox achetczi goquix. ³⁶ Graczi reeman badxaloj, rëb loj lasa' reeman:

—¿Xhie ree diidx guin rnieeman? ¡Con guialrniabee ni rajpaman, rniabeeman rarii ree xindxab luxdoo ree bejn!

³⁷ Abi' guidibczi niz yagaj bire'ch xtiidxaman.

Rayüjn Jesús xnasuegr Bëd

(Mt. 8:14-15; Mr. 1:29-31)

³⁸ Dxel barii Jesús lën yadoo guin, abi' wejman lidx Simón. Ragxuu xnasuegr Simón guin yu'man xliaadoxh zeel guzajc reeman Jesús liaadx din yayüjnman laaman. ³⁹ Zianz basajb loj Jesús lod naga'man gunabeeman yarii xliaa guin, abi' bariin. Loj hor ziigajc bixcheman guzuloj cudëeman ni gaw reeman.

Rayüjn Jesús zien ree bénragxuu

(Mt. 8:16-17; Mr. 1:32-34)

⁴⁰ Chi ma wëez gubijdx, graczi ree bén rajp bénragxuu bén rajc ree gadxagayaa guialguijdx binë reeman laa reeman loj Jesús, persi badxiib yaaman guijc tijb gaj reeman, bayüjnman laa reeman. ⁴¹ Në zien ree bénragxuu guin rarii xindxab luxdoo, rbidxa' reex rëb reex:

—¡Lüj naj Xi'n Dios!

Per gudilëman xindxab guin ree, ad cwëjbtaman niniee reex, guial ragbee reex laaman naj Cristo.

Rülüü Jesús xtiidx Dios niz Galilea

(Mr. 1:35-39)

⁴² Chi bareguiaa, barii Jesús luguiedx guin zëman lod achut bejn zojb. Per raguuil ree bénguiedx guin laaman, bidxin reeman lod za'man abi' rëb reeman lojman din yaya'nnëman laa reeman. ⁴³ Per rëbaman loj reeman:

—Në ree luguiedx ren rayal chinë'n xtiidxza'c Dios guial xhienaag naj xguialrniabeeman, din par zian guxhaalaman naj.

⁴⁴ Zian basnuu guneeaman xtiidx Dios lën ree yadoo niz Galilea.

5

Rniaaz reeman zien bëjl

(Mt. 4:18-22; Mr. 1:16-20)

¹ Tijb dxej chi za' Jesús ro' nijs Genesaret, bidxin ree benzien. Xt rxa't reeman laaman guial rën reeman gucaagdiajg reeman xtiidx Dios. ² Dxel baguiaa Jesús tio'p barcw ro' nijs guin; ni basa'n ree bén rniaaz bëjl la'tgaj caguiib xguijxh reeman ni rniaaznë reeman bëjl. ³ Zianz wë'paman loj tijb barcw ni naj xbarcw Simón, abi' rëbaman lojman din gudxigaman laan niz galay nijs guin. Dxel gurejman, guzuloj culüüman bejn ree. ⁴ Chi gulox guneenëman laa reeman, dxel rëbaman loj Simón:

—Binë barcw guin lod mazri naxhit, gol bazaal xguijxhidi din guini-aazidi bëjl.

⁵ Badxi' Simón laan rëbaman:

—Mextr, gudëd guiaalczi baguieenan dxiin, achutczi bëjl wanaazan. Per bal lüj na, yazaalan guijxh guin ree.

⁶ Chi bazaal reeman guijxh guin ree loj nijs guin, bëjl zien da't gunaaz reeman xt guzuloj cayaxya' ree guijxh guin. ⁷ Abi' been reeman sen loj

ree xcompniar reeman b́en yu' ree loj stijb barcw guin, din chiguieen reeman laa reeman yudar. Dxel wej reeman, abi' bacha reeman b́ejl guin ree loj grop barcw guin xt ma nizéeb reen xan nijs. ⁸ Chi baguiaa Simón Béd ni goc, bazuxibaman loj Jesús rēbaman:

—Biquied lod za'n, Dad, din b́endol naj.

⁹ Guial Simón con ree b́en za'nēman badxa loj reeman guial dád zien b́ejl gunaaz reeman. ¹⁰ Ziangajc badxaloj ree Jacob con Waj, b́en naj ree xi'n Zebedeo, naj tēē reeman xcompniar Simón. Per rēb Jesús loj Simón:

—Ad rdxebil, din diizd yan guto'pil bejn ree par Dios luar guiniaazil b́ejl.

¹¹ Dxel babēē reeman barcw guin ree loj nijs guin, basa'n reeman laa reen, zinalt reeman Jesús.

Rayūjn Jesús tijb b́en rajc guialguijdx la lepra

(Mt. 8:1-4; Mr. 1:40-45)

¹² Chi za' Jesús tijb luguiedx, bidxin tijb b́en rajc guialguijdx la lepra, guidibczaman ma yu' guialguijdx guin. Chi baguiaaman Jesús laa bazuxib gajcaman, basajb lojman luyuj, rēbaman:

—Dad, bal rēnl, zajc yayūjnl naj.

¹³ Zianz basli yaa Jesús baqui'man laaman, rēbaman:

—Rēnan. Bayajc.

Loj hor ziigajc bayajc b́en guin. ¹⁴ Dxel rēb Jesús lojman:

—Achuczi loj guiēbil guial ma bayajquil. Lojzi bixhioz wej din guguiaaman lūj. Binē gon ni rayal chinēl zi'c gunabee Moisejs din gagbee gra bejn guial ma bayajquil.

¹⁵ Per guixie guixie mazri bire'ch xtiidx Jesús por gra ree ni zagdxe rūjnman. Abi' dád benzien rdo'p din gucaagdiajg reeman ni rnieeman yayūjn tēēman laa reeman guialguijdx ni rajc reeman. ¹⁶ Guiáad laaman rejman niz lod achut bejn zobj, persi rbejdx rniabaman Dios.

Rayūjn Jesús b́en nējt xcuerp

(Mt. 9:1-8; Mr. 2:1-12)

¹⁷ Tijb dxej culūū Jesús bejn ree, abi' zobj tio'p choon ree b́enfarisew nē ree mextr rajc ley, zēēd reeman guiedxdo ni riga' ree niz Galilea nē niz Judea, nē Jerusalén. Za'nē xguialrniabee Dios laaman persi rayūjnman b́enragxuu ree. ¹⁸ Dxel bidxin tio'p choon ree bejn, bidxinnē reeman tijb xin nējt xcuerp, naga'x loj da. Abi' guyēn reeman niunē reeman laax lēnū guin din niguijxh reeman laax lod za' Jesús. ¹⁹ Per ad badxejlt ban niz niunē reeman laax guial b́en guixiuj riga' yagaj. Dxel wē'p reeman guiyc yu guin, abi' biquied reeman tex dxiib guiycan, zianz gulet reeman xinragxuu guin guidib naga'x loj da guin, gudijxh reeman laax galay ree b́en guin lod za' Jesús. ²⁰ Chi baguiaa Jesús guial rliladx reeman laaman; rēbaman loj xinragxuu guin:

—Xi'n, ma benan xtolil perdon.

²¹ Per ree mextr rajc ley con ree b́enfarisew guzuloj cayūjn reeman xgab: “¿Chu xin guin zeel rūjnx mazri xin zobjloj guial loj Dios? Achutdzi rajc rūjn perdon dol, tijbzi Dios.”

²² Per gogbee gajc Jesús xgab cayūjn reeman, dxel rēbaman:

—¿Chexc zeel rūjndi xgab zian? ²³ ¿Conin ad nawēēgt gac, guial guiēn ya: “Ma naj xtolil perdon”, o guiēn: “Bixche guza tēē”? ²⁴ Per yan, gulūn

lëjt guial Bén guxhaal Dios rajpaman guialrniabee loj guidxliuj guie din güünman perdon dol ree.

Dxel rëb Jesús loj xinragxuu guin:

—iBixche, baca' ni go'til loj! Baguiaj lidxil.

²⁵ Loj hor guin gajc bixchex guidibloj gra ree bén riga' yagaj balesix ni go'tix loj, zianz zia lidxix ruza'tix Dios zagdx. ²⁶ Graczi reeman badxaloj ruza't tée reeman Dios zagdx abi' dád bidxeb reeman, rëb reeman:

—iNi'qui tijb ad waguiaat ree zi'ct naj ni cayguiaa ree yan!

Rbejdx Jesús Leví

(Mt. 9:9-13; Mr. 2:13-17)

²⁷ Chi gudëd gojc zian, baguiaa Jesús tijb bén ruquijx impuest, laman Leví, zojbaman lod ruquijxaman. Abi' rëbaman lojman:

—Tanal naj.

²⁸ Dxel bisu Leví, guro'nldaxaman gran zinaltaman Jesús.

²⁹ Abi' been Leví lanijro' lidxaman par Jesús, në zien ree bén ruquijx impuest zojb nëtëe ree ben ren zojbnë reeman xan mex. ³⁰ Per ree bénfarisew ree në ree mextr rajc ley, bén nuchajg gajc ree bénfarisew guin, guzuloj caneeguidx reeman xbejn ree Jesús, rëb reeman:

—iChexc zeel rë' rawnëdi bén ruquijx ree impuest në ree bëndol?

³¹ Badxi' Jesús laan rëbaman:

—Bénnadaan ree ad riaadxt reeman doctor, bénragxuu ree laa reeman riaadx Doctor. ³² Ad zialtan par ree benza'c, zialan par ree bëndol din yayüjn reeman xgab por xtol reeman.

Rniabdiidx reeman loj Jesús xcwent guialrba'n

(Mt. 9:14-17; Mr. 2:18-22)

³³ Bénfarisew ree në ree mextr rajc ley, rëb reeman loj Jesús:

—Xbejn Waj, në ree xbejn ree bénfarisew dád zien volt rba'n reeman rbejdx rniab tée reeman Dios, guiáad ree xbejnl ganax rë' raw reeman.

³⁴ Badxi' Jesús laan rëbaman:

—iWen zajc güündi naguiejn ya guiba'n ree biooz za' loj guialruxh-liaa, la'tgaj za'në xin cuxhliaa guin laa reeman? ³⁵ Per guidxin dxej chiquiedix, dxel guiba'n reeman.

³⁶ Rëb tée man loj reeman:

—Achut bén rutüüg ta'n lajd cüb din yata'man laan loj lajd yojx. Bal güünman zian, zaguixya' lajd cüb guin lajdyojx guin, nëtëe yan ad zuguaatan zagdx loj lajdyojx guin. ³⁷ Ad rgu' tée't bejn vin cüb lën anfr yojx, din bal güünman zian, zaguixya' vin cüb guin anfr guin, abi' zi'c anfr guin zi'c vin guin zaxin reen. ³⁸ Zeel vin cüb rayal chu'n lën anfr cüb din ni'qui tijb reen ad zaxint. ³⁹ Abi' tijb bén ma gu' vin yu' gocli ad rë'taman vin cüb, din rëbaman: “Vin yu' gocli mazri ni zagdxen.”

6

Rgui'ch ree xbejn Jesús trigo dxej raziiladx ree bén Israel

(Mt. 12:1-8; Mr. 2:23-28)

¹ Tijb dxej raziiladx ree bén Israel, la'tgaj cadëd Jesús con ree xbejnman loj tijb guiniaa lod yu' trigo. Guzuloj cagui'ch reeman trigo guin, dxel cuxho'p reeman laan cayaw reeman. ² Abi' yu' ree bénfarisew rëb loj reeman:

—iChexc zeel rüjndi ni ad rayalt güündi dxej raziiladx ree bejn?

³ Badxi' Jesús laan, rëbaman:

—¿Gadidi gool loj xtiidx Dios ya ni been Davi chi gulaanman con ree xcompniaraman? ⁴ Guyuman lën xyadoo Dios, cwa'man guiadxtil ma nagle' ree gudawaman con ree xcompniaraman, ni ad rayalt niajw reeman bixhiosi ree rayal gaw laa reen.

⁵ Rëb tëë Jesús loj reeman:

—Bën guxhaal Dios rajpaman guialrniabee dxej raziiladx ree bejn.

Rayajc tijb xin naxü'n tiblad yaa

(Mt. 12:9-14; Mr. 3:1-6)

⁶ Zatiyb dxej raziiladx reeman, guyu Jesús lën tijb yadoo abi' guzuloj culüüman bejn ree. Yagaj za' tijb xin naxü'n yaa ladbee. ⁷ Abi' ree mextr rajc ley në ree bénfarisew rzunal reeman din guidoon zayüjn Jesús laax dxej raziiladx reeman ya, din gac gutedia' reeman Jesús. ⁸ Per laaman ragbee gajcaman xhie xgab cayüjn reeman, zeel rëbaman loj xin naxü'n yaa guin:

—Bisu, guzuli galay guin.

Dxel guzulix, guzujx galay guin. ⁹ Dxel rëb Jesús loj reeman:

—Ganabdiidxan lëjt: ¿Xhie rayal güün bejn dxej raziiladx reeman, ni zagdxe ya o ni mal? ¿Guslaaman xguialnaban bejn ya o gugüjtaman laaman?

¹⁰ Dxel baguiaa Jesús gra ree bën riga' yagaj, abi' rëbaman loj xin guin:

—Basli yaal.

Dxel beex zic rëbaman, abi' bayajc yaax. ¹¹ Per laa reeman dád bidxe'ch reeman, guzuloj rëb loj lasa' reeman xhienaag güünnë reeman Jesús.

Rbe Jesús chiptio'p ree apóstoles

(Mt. 10:1-4; Mr. 3:13-19)

¹² Lën ree dxej zii wej Jesús tijb ruguia' persi gurejdx gunabaman Dios, abi' gudëd guiaalczi gurejdx gunabaman Dios yagaj. ¹³ Chi bareguiaal, gurejdxaman bën nal ree laaman, dxel gulejman chiptio'p reeman loj reeman, abi' guneeaman laa reeman apóstoles. ¹⁴ La reeman: Simón, bën gulëëla'jman Bëd, Andrejs bijch Simón, Jacob, Waj, Felip, Tol, ¹⁵ Matew, Tumajs, Jacob xi'n Alfeo, Simón, bën bi'ch loj ree bën cananistas, ¹⁶ Judas xi'n Jacob, në Judas Iscariote bën bayü Jesús.

Rülüü Jesús zien ree bejn

(Mt. 4:23-25)

¹⁷ Baguiajt Jesús ruguia' guin con guidxiptio'p ree xbejnman, badxin reeman lod naj tijb la'ch. Yagaj bado'p zien ree xbejnman në ree ben ren, bën zëëd ree niz Judea në Jerusalén në ree bën zëëd Tiro con Sidón, guiedx riga' ree gajxh ro' nijsdoo. Bidxin reeman din gucaagdiajg reeman xtiidx Jesús din yayüjn tëëman laa reeman guialguijdx ni rajc reeman. ¹⁸ Në ree bën yu' xindxab luxdoo bayajc. ¹⁹ Zeel graczi ree bejn rën guqui' laaman, guial rayüjnman laa reeman con xguialrniabeeman.

Xiquilbaa ree bejn

(Mt. 5:1-12)

²⁰ Dxel baguiaa Jesús loj ree xbejnman, abi' rëbaman:

—Xiquilbaadi bënprob, din lëjt rayal loj xguialrniabee Dios.

²¹ Xiquilbaadi bën rliian ree yan, din Dios gunee ni gawidi xt chigdxin-ladxidi.

²² Xiquilbaadi bën roon ree yan, din zadxin dxej guxijdxidi.

²² 'Xiquilbaadi chi rdxe'ch bejn lëjt, chi rabëëca reeman lëjt, rnieeguidx tëë reeman lëjt, naladx reeman najdi bendxuudx guial rliadxidi Bén guxhaal Dios. ²³ Gol babaa gol badxe' tëë luxdoodi zagdxe chi güünnë reeman lëjt zian, din zro' ni tia'di yu' xanyabaa, din ziangajc beennë xbéngulal reeman bén badëë ree xtiidx Dios loj ree bejn.

²⁴ 'Per probza lëjt benrijcw, din ma guyuxgaj luxdoodi nix.

²⁵ 'Probza lëjt bén raw xt rigdxinladx yan, din zadxin dxej guiliaandi.

'Probza lëjt bén ruxijdx yan, din zadxin dxej goondi guial chu'nayadi.

²⁶ 'Probza lëjt, bén ruladx ree guilies bejn xvalor, din zian beennë ree xbéngulal reeman bén goc ree bén rusquiee, rëb reeman rudëë reeman xtiidx Dios loj ree bejn.

Guyën bén rdxe'ch lüj

(Mt. 5:38-48; 7:12)

²⁷ 'Per ganin lëjt bén rucaagdiajg ree da diidxan: Gol guyën bén ralen lëjt, gol gojc benza'c con ree bén yu'xyajn lëjt, ²⁸ gol bazaal diidxa'c guijc ree bén ruzaal diidxmal guijquidi, gol gurejdx gunab Dios por ree bén rnieeguidx lëjt. ²⁹ Bal chu chëëz tiblax hajguil, badëëd zatibladan, bal chu cwëëxuu xchamarril, ad cwexuul chinëman në xmanguil. ³⁰ Chutëëz bén rniab xhienin lojl, badëëdan. Bal chu rquied xhie xieenl, ad bal yanabilan. ³¹ Gol beennë ree bejn zi'c rëndi güünnë reeman lëjt.

³² 'Bal rëndi ganaxzi bén rën lëjt, ¿xhieza ni zagdxen cayüjndi? Din xt bëndol ree rüjn zian, rën reeman bén rën laa reeman. ³³ Abi' bal rüjndi wen ganaxzi bén rüjn lëjt wen, ¿xhieza ni zagdxen cayüjndi? Din xt bëndol ree rüjn zian. ³⁴ Ziangajc bal rudëëdidi ni rgui'n ganaxzi bén naladxidi zajc yaguijx lojdi, ¿xhieza ni zagdxen cayüjndi? Din xt në ree bëndol rudëëd rgui'n ree bén naladx reeman zajc yaguijx loj reeman. ³⁵ Per lëjt gol guyën bén ralen lëjt, gol been reeman wen. Gol badëëd qui'n reeman, ad cwëzidi xhie tia'di guijcan. Zian tia'di zro' guialnaza'c ni gunee Dios bén yu' xanyabaa, gac tëëdi xi'nman, din laaman naj benza'c con ree bén ad rudëët quixtëë lojman në con ree benmal. ³⁶ Gol baya bejn zi'c raya dux Dad ree Dios bejn.

Xcwent guialrula'ch

(Mt. 7:1-5)

³⁷ 'Ad gula'chidi, ad gudxiib tëëdi ni mal guijc ree bejn chitëë saquidi zian, gol been perdon din gaquidi perdon. ³⁸ Gol badëëd ni riaadx ree bejn, Dios mazri zro' naj ni gunee man zi'c tijb bols guidxadi. Din zi'c rudëëdidi loj ree bejn, ziant gajc naj ni gunee Dios lojdi.

³⁹ Rëb Jesús loj reeman zatijb diidx:

—¿Wen zajc chinë bénlutia'p zatijb bénlutia'p ya? ¿Nid zayajb grop reeman ro' bala' ya? ⁴⁰ Tijb bén cusiid, ad mazt rajcaman guial loj xmextraman. Guiáad chi ma gulox basiidaman rajcaman zi'ctgajc rajc xmextraman.

⁴¹ 'Ad gula'chil ben ren por faldobëz ni rajpaman, zagdxeli guyu xgab por falt narooob ni rajpil. ⁴² Abi' bal mazri falt narooob rajpil, ¿xoxa guiëbil loj zatijb bejn: “Ad laat naj ni rüjnl”? ¡Bén rusquiee! yaloxgaj been zi'c rayal, chi ma beenl zian dxel ma zile' guiëbil loj zatijb bejn: “Ad laat naj ni rüjnl”.

Por ni rtia loj yag rayünbee bejn xhie yagan

(Mt. 7:17-20; 12:33-35)

⁴³ Ad yu't yag zagdxé rtia ni guijdx loj, ad yu' tēēt yag guijdx rtia ni zagdxé loj. ⁴⁴ Din tijbgaj yag rayünbee bejn xhie yagan por ni rtia lojn. Ad raru't higo loj yaquieĵch, ad raru' tēēt uv loj gui'xh. ⁴⁵ Benza'c rnieeman diidxa'c din laan yu' luxdooan, guiáad benmal rnieeman diidxmal din laan yu' luxdooan. Din ni yu' luxdoo bejn laan rnieeman.

Tio'ploj cimiant
(Mt. 7:24-27)

⁴⁶ '¿Chexc zeel rnieedi naj, “Dad, Dad”, abi' adza rüjntidi ni rnin? ⁴⁷ Ganin lojdi chu naj zi'c bēn ri't lon, riguejñman ni rēn, abi' rüjñman laan: ⁴⁸ laaman naj zi'c tijb bēn been yu, yaløj xgaj gudēñman naxhit xt chi bila loj guiaj, dxel gulesaman xcimiantan guic guiaj guin. Abi' chi bi't nijsro' majsi gulajn lad yu guin, per ni'quid baniibtan laan guial naj cimiant guin guic guiaj. ⁴⁹ Per bēn riguejñ da diidxan abi' ad rüjntaman laan, najman zi'c tijb bēn been yu ni ad yu't xcimiant. Abi' chi bi't nijsro' gulajn lad yu guin, balenxanan laan, tiblyaazi base'nan laan.

7

Rayajc xmojs tijb suldad rom xin rniabee ree suldad
(Mt. 8:5-13)

¹ Chi gulox guneenē Jesús bejn ree, dxel zēman Capernaum. ² Yagaj zojb tijb suldad Rom xin rniabee ree suldad. Yu' tijb xmojsix xin rēn da'tix, ragxuu mojs guin ma rulüücüi guiētix. ³ Chi biguejñ suldad rniabee guin ruza't ree bejn Jesús, guxhaalix tio'p choon ree bēn rniabee Israel lojman din chisajc reeman liaadx yayüjñman xmojsix. ⁴ Abi' bidxin reeman loj Jesús guzajc reeman liaadx, rēb reeman:

—Gagnēsiil suldad rniabee guin, ⁵ din rēnx bēn duladx ree, nē yan por laax gojc dux yadoo ree.

⁶ Dxel binē Jesús laa reeman. Per chi ma cadxin reeman gajxh lidix, guxhaal tio'p choon ree xmiwix loj Jesús biguiedx reex lojman:

—Dad, ad chu'l xgab, din ad rayaltan chu'l lēnū lidxan, ⁷ zeel ad bayaxtan nial quijb naj nidgadilan lüj. Per con gunee diizd lod za'l din yayajc da mojsan. ⁸ Din zi'c naj yu' ree bēn rniabee naj, ziangajc naj yu' ree da suldadan xin rniabeen. Chi rēn loj tijb reex: “Wej”, rejx. Chi rēn loj zatijbix: “Guda”, ri'tix. Abi' chi rēn loj da mojsan: Been ni guin, rüjngajquixan.

⁹ Chi biguejñ Jesús zian, dád badxa lojman ni rēb suldad guin, abi' badxi' lojman loj gra ree bēn zinal laaman, rēbaman:

—Diidxliczi rnin, ni'qui Israel ad wadxaaglojtan tijb bēn rliladx da't Dios zi'c rliladx xin guin Dios.

¹⁰ Chi badxin ree xin guxhaal suldad rniabee guin lidix, baguiaa reex ma bayajc mojs guin.

Rasban Jesús xi'n tijb béngunaa bizējb

¹¹ Chi gudēd gojc zian, wej Jesús tijb luguiedx la Naín binē ree xbenñman, nē zien ree ben ren. ¹² Chi bidxinman gajxh ro' guiedx guin, baguiaaman ziquie'ch reeman tijb xingüt, tijbzi laax naj xi'n xníaax, najman bēn bizējb. Zien da't ree bēnluguiedx guin zinal laaman. ¹³ Chi baguiaa Dad Jesús laaman, bayaman laaman, dxel rēbaman lojman:

—Ad roonl.

¹⁴ Abi' bibig Jesús baqui'man xcaj xingüt guin, dxel guzudxe ree bén zinë laax. Zianz rébaman lojx:

—Xi'n, naj rni lojl: ¡Bixche!

¹⁵ Dxel gureli xin guin, guzuloj caneex, zianz bayü Jesús laax loj xniaax.
¹⁶ Chi baguiaa reeman zian, graczi reeman bidxeb guzuloj cuza't reeman Dios zagdxe, réb reeman:

—Du loj ree ma gules Dios tijb bén zojbloj, bén rudëë xtiidx Dios loj ree bejn.

Rëb tëë reeman:

—Ma bi't Dios din gagnë ree xbejnman.

¹⁷ Abi' guidib niz Judea në ree guiedx riga' niz yagaj gogbee ree bejn ni been Jesús.

Bigneenë ree xbejn Waj Jesús

(Mt. 11:2-19)

¹⁸ Gogbee Waj gra ree ni cayüjn Jesús, guial bagojn ree xbejnman laaman. Abi' guneeman tio'p reeman, ¹⁹ dxel guxhaalaman laa reeman loj Jesús din chignabdiidx reeman bal laacaman naj Cristo bén naj diidx gui't, bén cabëz reeman, o cwëz reeman ben ren ya. ²⁰ Abi' bibig reeman, guneenë reeman laaman, réb reeman lojman:

—Waj bén ruroobnijs bejn ree guxhaal dunujn lojl zudganabdiidxan bal lüjcan naj Cristo bén naj diidx gui't, bén caylëjzan o yalëjzan ben ren ya.

²¹ Hor ziigajc bayüjn Jesús zien da't ree bénragxuu, në ree bén rdoob, nëtëë ree bén yu' xindxab luxdoo, baxhal tëëman loj ree bénlutia'p. ²² Dxel badxi' Jesús xtiidx ree bén guxhaal Waj, rébaman:

—Gol chej, gol chiguiedx loj Waj ni cuguiaadi në ni caguiejndi. Gol güjdx lojman guial ma ruguiaa ree bénlutia'p, ma rajc rza ree bencoj, ma rayajc tëë ree bén goc guialguijdx la lepra, ma riguiejn ree bén nacwa't, guiaad ree bengüt ma baban reeman, abi' ree bénprob ma caguiejn reeman xtiidxza'c Dios. ²³ ¡Xiquilbaa ree bén ad zucwëëzt chililadx naj!

²⁴ Chi baza ree bén guxhaal Waj, guzuloj Jesús caneeman xcwent Waj loj ree bejn, rébaman:

—¿Chu naladxidi naj bén biquiaadi loj yujbidx? ¿Naladxidi ya najman zi'c tijb biqui runiib bi? ²⁵ ¿O chu biquiaadi? ¿Tijb bén najcw lajd zagdxe ya? Lëjt ragbee guial bén rajcw ree lajd zagdxe, në ree bén naban zagdxe, lën palas zojb reeman. ²⁶ ¿Chu biquiaadi? ¿Tijb bén rudëë xtiidx Dios loj ree bejn ya? Per diidxliczi rnin lojdi, biquiaadi tijb bén mazri zojbloj guial loj tijb bén rudëë xtiidx Dios loj ree bejn. ²⁷ Wajn naj bén ruza't xtiidx Dios, lod rëb:

Naj rxhial tijb bén ned lojl,

bén güünchaaw xnejzil.

²⁸ Rnin lëjt, loj graczi ree bénguidxliuj ad wayut bén rudëë xtiidx Dios loj ree bejn, bén mazri zojbloj guial loj Waj. Per majsi zian, bén ad zojblojt loj xguialrniabee Dios, laaman mazri zojbloj guial loj Waj.

²⁹ Gra ree bejn, në ree bén ruquijx impuest bén baroobnijs Waj, chi biguiejn reeman ni réb Jesús bignia' reeman guial rünj Dios zi'c rayal.

³⁰ Per ree bénfarisew con ree mextr rajc ley ad cwëjbt reeman nuroobnijs Waj laa reeman, zian ad guyënt reeman ni rën Dios par laa reeman.

³¹ Rëb tëë Jesús:

—¿Xhienaag ganin lëjt naj ree bën riga' loj guidxliuj guie yan? ¿Chu naj zi'c laa reeman? ³² Laa reeman naj zi'c ree xindoo rguijt niz galay luguiedx, abi' rbixdiaj reex rëb loj lasa' reex: “Bacwejdxa par nuya'di, per ad baya'tidi, badoolan ni naya ree, per ad biintidi.” ³³ Din bi't Waj bën baroobnijs bejn ree, ad rawtaman ad rë' tëtëman vin, abi' rëbidi xinxab yu' luxdooman. ³⁴ Yan bi't Bén guxhaal Dios, rawaman rë' tëtëman vin, abi' rëbidi guial dád nalaman ruladxaman guië'man, ruchajg tëtëman bëndol ree con ree bën ruquijx impuest. ³⁵ Per xguialrignia' Dios, rguienan por ree xbejnman.

Rej Jesús lidx tijb bënfarisew la Simón

³⁶ Tijb bënfarisew rëb loj Jesús din chitaw Jesús guin lidxaman. Abi' bidxinman lidxaman gurejman xan mex. ³⁷ Dxel tijb béngunaa dxuudx zojb gajc luguiedx guin. Chi gogbeeman cayaw Jesús lidx bënfarisew guin, bidxinnëman tijb lumejt yu' perfum. ³⁸ Dxel roonman gurejman lod nuzuj guia' Jesús, guzuloj caxhie' nijs carii lojman guia' Jesús. Abi' cucwiidxnë guidxguijcaman laan, cayawaman xid guia'man curoob tëtëman laan perfum guin. ³⁹ Chi baguiaa bënfarisew guin zian, beenman xgab: “Balgui zian wali bën guin najman bën rudëë xtiidx Dios loj ree bejn, zagbeeman chunin cuqui' laaman xhie tëë naag naban béngunaa guin, najman bendxuudx.” ⁴⁰ Dxel rëb Jesús loj bënfarisew guin:

—Simón, yu' tijb ni ganin lüj.

Badxi' bënfarisew guinan rëbaman:

—Gunan, mextr.

⁴¹ Abi' rëb Jesús lojman:

—Tijb bën rudëëd milia rgui'n ree bejn, ral tio'p ree bejn lojman. Tijbman nuzëëb gaaygayuu denario, zatijbaman nuzëëb tü'pchiin. ⁴² Grop reeman ad beent gan naguijx lojman, per bën badëëd milia guin rëbaman loj reeman guial ad zaguijxt reeman ni nuzëëb reeman. Yan guna, ¿chu loj grop reeman mazt guiën laaman?

⁴³ Badxi' Simón laan, rëbaman:

—Par naj, bën bazëëb mazri zro' guin.

Dxel rëb Jesús:

—Waliquil.

⁴⁴ Zianz baguiaa Jesús loj béngunaa guin, abi' rëbaman loj Simón:

—¿Ruguiaal béngunaa guie ya? Chi guyu'n lidxil ad baneetil nijs niëd guia'n. Guiaad laaman gudiibaman guia'n con nijs brii lojman, abi' bacwiidxaman laan con guidxguijcaman. ⁴⁵ Ad gudawtil naj xid, guiaad laaman diizd chi guyu'n ad rbëzt rawaman xid guia'n. ⁴⁶ Achet sejt badxe'l guican, per laaman ma badxe'man perfum guia'n. ⁴⁷ Zeel rnin lüj, gra ree xtolaman ma gojc perdon guial rën da'taman naj. Per bën yu' ta'nz xtol abi' rajcaman perdon, ta'nz rënman naj.

⁴⁸ Dxel rëb Jesús loj béngunaa guin:

—Ma naj gra xtolil perdon.

⁴⁹ Guiaad ree bën zojbnëman yagaj guzuloj canabdiidx loj lasa' reeman, rëb reeman:

—¿Chu bën guin zeel xt në ree dol rüjnman perdon?

⁵⁰ Per rëb Jesús loj béngunaa guin:

—Ma najl perdon guial riladxil naj, baguiaj zagdxe ad ruril xgab.

8

Béngunaa been ree Jesús yudar

¹ Chi gudëd gojc zian, wej Jesús gra ree guiedx narooß në ree guiedx dobëz bicojnman biglöö tëëman xhienaag naj xgualrniabee Dios. Në guidxiptio'p ree apóstoles binëman, ² nëtëë tio'p choon ree béngunaa, bën babëëman xindxab luxdoo, në ree bën bayünman gualguijdx ni rajc reeman. Loj reeman no'ch María Magdalena, bën babëë Jesús gajdx xindxab luxdoo. ³ Në Xuan, lacheel Cuza, Cuza guin goc bën nulen xchiin Herodes. Në Susan nëtëë zien ree béngunaa ren, been reeman yudar Jesús con ni rajp reeman.

*Xcwent bën rtie'ch bin
(Mt. 13:1-9; Mr. 4:1-9)*

⁴ Zien ree bejn brii loj ree guiedx ziquiaa reeman Jesús. Chi bido'p ree benzien, beman tijb cwent loj reeman rëbaman:

⁵ —Tijb bejn zëman zigtie'chaman bin. Chi catie'chaman laan, ta'nan biajb lunejz abi' balëë ree bejn guijcan gudaw tëë ree biguijn laan. ⁶ Zata'nan biajb loj ree guiaj, chi gulejn reen gubidx reen gual ad yu' xcojpt loj ree guiaj guin. ⁷ Zata'nan biajb loj ree yaquiëjch. Abi' chi guni's reen tijbzi, banidloj yaquiëjch guin laa reen. ⁸ Zata'nan biajb loj yujza'c abi' dád gojcan, cwa xt tibgayuu bin loj tijbgajn.

Chi gulox gunee Jesús zian, dxel gunee man rejs rëbaman:

—Bën rën gucaagdiajg, gol bacaagdiajg.

*Chexc zeel rulüü Jesús con cwent ree
(Mt. 13:10-17; Mr. 4:10-12)*

⁹ Dxel gunabdiidx ree xbejn Jesús lojman, rëb reeman:

—¿Xhie rën guiëb cwent guin?

¹⁰ Badxi' Jesús laan rëbaman:

—Lëjt, Dios ma basa'n lëjt din chignia'di xhienaag naj xgualrniabee-man. Per loj gra reeman rünan zi'c cwent din majsi rani loj reeman, per ad zuguaat reeman, majsi riguiëjn reeman, per ad zignia't reeman.

*Rusignia' Jesús xcwent bën rtie'ch bin
(Mt. 13:18-23; Mr. 4:13-20)*

¹¹ 'Ni ne rën guiëb xcwent bën rtie'ch bin: Bin guin naj zi'c xtiidx Dios, ¹² guiáad bin biajb runejz naj zi'c ree bën riguiëjn xtiidx Dios; per rdin gajc xindxab rquiedix laan luxdoo reeman chitëë chililadx reeman laan abi' gac reeman perdon. ¹³ Guiáad bin biajb loj ree guiaj, naj zi'c ree bën riguiëjn xtiidx Dios, abi' dád nix ru luxdoo reeman riguiëjn reeman laan, per gual naj reeman zi'c cwaan ni ad yu't liuj, rliladx reeman laan tiblädëd abi' chi rzagdiaj reeman laa rusa'n gajc reeman ni rliladx reeman. ¹⁴ Guiáadza bin biajb loj ree yaquiëjch, naj zi'c ree bën riguiëjn xtiidx Dios; per ru reeman xgab por gra ree gualnaza'c riga' loj guidxliuj guie rüjn tëë reeman ni rëntzi reeman, abi' zianz rucwëëz rucaagdiajg reeman xtiidx Dios ad rüjn tëët reeman ni rënman. ¹⁵ Guiáad bin biajb loj yujza'c, laan naj zi'c ree bën rucaagdiajg xtiidx Dios, rucaagdiajg reeman laan con guidib luxdoo reeman za'dxi'ch tëë reeman loj xnejzaman, zianczi rüjn reeman ni rënman.

*Achet ni naguie'ch yu'
(Mr. 4:21-25)*

¹⁶ Achut b́en ruze'c tijb guij dxel ruta'cwaman laan, ad rudxe' t́eetaman laan xan lon, ruzujman laan ya din gusnin loj ree b́en chu' ĺenü. ¹⁷ Achet ni naguie'ch yu' ni ad zaguiet ad yu' t́eet ni ralan ni ad zagbeet bejn, zadxin dxej gagbee bejn laan.

¹⁸ Zeel gol bacaagdiajg zagdx, b́en ma rignia' gusnuu chignia'man mazri, per b́en ad rignia't, xt ta'n ni naladxaman rignia'man ad zig-nia'traman.

Xniaa Jesús con ree bijchaman

(Mt. 12:46-50; Mr. 3:31-35)

¹⁹ Xniaa Jesús con ree bijchaman bidxin reeman lod za'man, per ad gojct nibig reeman lojman guial dád zien bejn riga'. ²⁰ Abi' yu' b́en bagojn Jesús ŕebaman:

—Laa xniaal con ree bijchil za' lule' guin ŕen reeman guinieeńe reeman ĺuj.

²¹ Badxi' Jesús laan ŕebaman:

—B́en rucaagdiajg ree xtiidx Dios ŕujn t́e reeman zi'c ŕenman, laa reeman naj da nan laa t́e reeman naj da bichan.

Racẃeéz Jesús bidoxh

(Mt. 8:23-27; Mr. 4:35-41)

²² Tijb dxej guyu Jesús loj barcw con ree xbejnman, abi' ŕebaman loj reeman:

—Yo' ree zatiblad ro' nijs guin.

Zianz źe reeman. ²³ La'tgaj cadéd reeman loj nijs guin, goodýejs Jesús. Dxel guzuloj cabi' bidoxh loj nijs guin, abi' cadxa nijs loj barcw guin, ma cazéebczi barcw guin xan nijs. ²⁴ Dxel bacẃeén reeman Jesús, ŕeb reeman:

—¡Mextr! ¡Mextr! ¡Ma cayźeéb ree xan nijs!

Abi' bixche Jesús gunabeeman bacẃeéz bidoxh guin ńe xtújp nijs guin, zianz guléjz reen dxel bayajcdxe. ²⁵ Abi' ŕebaman loj reeman:

—¿Conza xguialrliladxidi?

Per laa reeman dád bidxeb reeman badxa t́e loj reeman, abi' canab-diidx loj lasa' reeman ŕeb reeman:

—¿Chu b́en guin zeel rniabeeman bi ńe nijs, abi' ruzoob reen xtiidxaman?

Rayüjn Jesús tijb xin yu' xindxab luxdoo

(Mt. 8:28-34; Mr. 5:1-20)

²⁶ Dxel badxin Jesús con ree xbejnman xdajn ree b́en Gadara, ni riga' zatiblad ro' nijs Galilea. ²⁷ Chi barii Jesús loj barcw guin, bibig tijb xin luguiedx guin lojman. Ma gojc xchej da't yu' xindxab luxdoox. Ad rajcwt xabix, ad nabantix ĺenü, ganaxzi ro' ree baa nabanx. ²⁸ Chi baguiaax Jesús bazuxibix lojman, guneex rejs ŕebix:

—¿Xhie ŕenl con naj, Jesús, Xi'n Dios yu' xanyabaa? Rniaaban lojl ad gusagzil naj.

²⁹ Ŕebix zian guial ma canabee Jesús din yarii xindxab guin luxdoox. Ma gojc xchej naax xindxab guin laax. Abi' ma guxhii ree bejn yaax ńe guia'x con caden chit́e ban chex, per rutüguia'gajquix caden guin abi' rulaagdxa xindxab guin laax niz lod achut bejn zojb.

³⁰ Gunabdiidx Jesús lojx ŕebaman:

—¿Chu lal?

Badxi'xan ŕebix:

—Legión lan.

Rëbix zian guial zien da't ree xindxab yu' luxdoox. ³¹ Rëb ree xindxab guin loj Jesús chitëë guixhiaalaman laa reex gabijl. ³² Dajn guin riga' zien ree cüch cayaw reeb. Zeel rëb ree xindxab guin lojman din gudëëman mod chu' reex lën ree cüch guin, dxel cwëjbaman. ³³ Zianz barii reex luxdoox bayu reex lën ree cüch guin, abi' guzuloj cuxüün reeb zianz bitidia' reeb ro' bala' xt loj nijs, lod gu' reeb nijs abi' güjt reeb.

³⁴ Chi baguiaa ree bën cayajp ree cüch guin ni goc, baxüün reeman bicojn reeman bejn ree luguiedx në ree dajn. ³⁵ Dxel wej reeman biquiaa reeman ni goc. Chi bidxin reeman lod za' Jesús, baguiaa reeman xin barii xindxab guin ree luxdoo, zojbix guia'man ma najcw xabix, ma badëdguienx abi' bidxeb reeman. ³⁶ Guiáad ree bën baguiaa ni goc, be reeman diidx loj reeman xhienaag bayajquix. ³⁷ Graczi ree bën zojb Gadara gunab loj Jesús din yazaman yagaj guial dád rdxeb reeman. Dxel bayë'paman loj tijb barcw, ziataman. ³⁸ Guiáad xin barii xindxab guin ree luxdoo rëbix lojman din chinalix laaman, per ad cwëjbtaman, rëbaman lojx:

³⁹ —Baguiaj lidxil, biguiedx graczi ni been Dios por lüj.

Dxel ziax luguiedx guin abi' bex diidx loj gra ree bejn ni been Jesús por laax.

Rayajc xi'n Jairo në béngunaa bagaal xab Jesús
(Mt. 9:18-26; Mr. 5:21-43)

⁴⁰ Chi badxin Jesús zatiblad ro' nijs guin, dád rabaa gra ree bën za' yagaj guial badxinman din mal cabëz reeman laaman. ⁴¹ Dxel bidxin bën la Jairo, laaman rniabee lën tijb xyadoo ree bën Israel. Bazuxibaman loj Jesús, rëbaman lojman din cheman lidxaman, ⁴² guial yu' tijb xi'nman biin chiptio'p ijz, ma guiëtczim. Chi zë Jesús dád zien ree bejn zinal laaman xt rixa't reeman laaman.

⁴³ Abi' tijb béngunaa no'ch loj reeman, ma gojc chiptio'p ijz ragxuuman ryajbaman rejn. Ma banijtaman graczi ni rajpaman guial wejman loj ree doctor, per ni'qui tijbaman ad gojct nayüjn laaman. ⁴⁴ Bibigaman niz xijch Jesús abi' bagaalaman guia' xabaman. Loj hor ziigajc bayajcaman.

⁴⁵ Dxel gunabdiidx Jesús rëbaman:

—¿Chu baqui' naj?

Abi' graczi reeman rëb guial ad laat reeman baqui' laaman. Zianz rëb Bëd loj Jesús:

—Mextr, graczi ree bejn xt rixa't reeman lüj cucadxaa tëë reeman lüj, abi' rniabdiidxil chu baqui' lüj.

⁴⁶ Per rëb Jesús zatijb:

—Yu' chu baqui' naj din gogbeen yu' tijb bën ma bayajc con da gualrniabeen.

⁴⁷ Chi gogbee béngunaa guin guial ma gogbee gajc Jesús ni beenman, guidib rniyman bigzuxibaman loj Jesús. Dxel rëbaman lojman guidibloj ree bën guin chexc zeel baqui'man xabaman abi' loj hor guin gajc bayajcaman. ⁴⁸ Dxel rëb Jesús lojman:

—Xi'n, ma bayajquil guial bililadxil naj, baguiaj zagdx.

⁴⁹ Sta caneenë Jesús béngunaa guin, chi bidxin tijb bën guza lidx Jairo, bën rniabee lën xyadoo ree bën Israel, rëbaman loj Jairo:

—Mal güjt xi'nl, ad ruslenril Mextr guin.

⁵⁰ Per chi biguiejn Jesús zian, rëbaman loj Jairo:

—Ad rdxebil, bililadxzi, zayajcqui xi'nl.

⁵¹ Chi bidxin reeman lidxaman, ad cwëjbt Jesús niu ree ben ren, Bëdзи con Waj, con Jacob, con ree xdad xniaa bindo guin. ⁵² Graczi ree bën riga' yagaj cayoon, yu'naya tëë reeman por laam. Per rëb Jesús loj reeman:

—Ad roondi, ad güjttim, naga'yëjszim.

⁵³ Graczi reeman baze' laaman guial ma ragbee reeman güjtim. ⁵⁴ Dxel gunaaz Jesús yaam, guneeman rejs, rëbaman:

—Bindoo, bixche.

⁵⁵ Loj hor ziigajc babanm, bixchem. Dxel gunabee Jesús badëëd reeman ni gudawim. ⁵⁶ Dád badxa loj ree xdadim, per rëb Jesús loj reeman achu loj guiëb reeman ni goc.

9

Rxhiaal Jesús guidxiptio'p ree xbejnman chigliüü reeman xtiidx Dios

(Mt. 10:5-15; Mr. 6:7-13)

¹ Gurejdx Jesús guidxiptio'p ree xbejnman, abi' badëëman guialrniabee loj reeman din yabëë reeman graloj xindxab luxdoo ree bejn yayüjn tëë reeman bënragxuu ree. ² Guxhaalaman laa reeman chigliüü reeman xhienaag naj xguialrniabee Dios, yayüjn tëë reeman bënragxuu ree. ³ Rëbaman:

—Ad chinëdi xhienin par runejz: ni'qui yagriadxidi, ni'qui guijxh, ni'qui guialraw, ni'qui milia, ni'qui stibnejz xabidi. ⁴ Chutëëz lidx guidxindi, tib gol baya'nzi xt chi yazadi luguiedx guin. ⁵ Bal yu' guiedx lod ad rënt reeman lëjt, gol baza yagaj, gol gudxijp guxyuj guia'di zi'c tijb sen guial ad rënt reeman guzoob reeman xtiidx Dios.

⁶ Dxel brii reeman zë reeman tijbgaj guiedx zigtie'ch reeman xtiidxza'c Dios, rayüjn tëë reeman bënragxuu ree.

Riguiejn Herodes ni cayüjn Jesús

(Mt. 14:1-12; Mr. 6:14-29)

⁷ Chi gogbee rey Herodes graczi ni cayüjn Jesús. Guyunawëëgaman guial yu' ree bejn rëb, Waj bën baroobnijs bejn ree ma baban, ⁸ yu' tëë reeman rëb Eliasan bën badëë xtiidx Dios loj ree bejn ma balüüloj, yu'za reeman rëb, tijb ree bën badëë xtiidx Dios loj ree bejn gocli ma baban.

⁹ Per rëb Herodes:

—Naj gajc gunabee biru' yëjn Waj. ¿Chuza bënan riguiejnan ruza't ree bejn xcwent ni cayüjnman?

Zianan zeel rüjn Herodes naguiejn guguaaman Jesús.

Ruyaan Jesús gaay mil bejn

(Mt. 14:13-21; Mr. 6:30-44; Jn. 6 :1-14)

¹⁰ Chi badxin ree xi apóstoles Jesús, be reeman graczi ni biguieen reeman. Dxel binëman laa reeman lod achutczi bejn zojb, gajxh guiedx Betsaida. ¹¹ Per chi gogbee ree bejn, dxel zinal reeman laaman lod zëman. Abi' balüüman laa reeman xcwent xguialrniabee Dios bayüjn tëëman bënragxuu ree.

¹² Chi ma cadxe, bibig guidxiptio'p ree apóstoles lojman rëb reeman:

—Güjdx loj gra ree bën guin din yagua'j reeman chitiil lod yaya'n reeman luguiedx doo ree në ree ranch, chitiil tëë ni gaw reeman din lod nadxu' ree achetczi yu'.

¹³ Dxel rëbaman loj reeman:

—Lëjt gajc gol badëëd ni gaw reeman.

Abi' rëb reeman:

—Per gaayzi guiadxtil naca'n con zatio'p bëjl, bajtëë bal yo'n yusiin ni gaw gra reeman.

¹⁴ Abi' cost gaay mil ree xinguaaw riga' yagaj. Per rëb Jesús loj ree xbejnman:

—Gol güjdx loj reeman din cwe tü'pchii gaj reeman.

¹⁵ Abi' bagojn reeman laa reeman persi gurej gra reeman zian. ¹⁶ Dxel cwa'man guigaay guiadxtil guin con zatio'p bëjl guin. Gules lojman xanyabaa, badëëman quixtëë loj Dios, zianz gula'man laa reen badëëman loj ree xbejnman din qui's reeman laan loj ree Bén guin. ¹⁷ Graczi reeman gudaw xt bigdxinladx reeman. Abi' bato'p reeman chiptio'p dxüm nilaay baya'n.

Rëb Bëd guial Jesús naj Cristo

(Mt. 16:13-19; Mr. 8:27-29)

¹⁸ Tijb dxej cabejdx canab Jesús Dios, za'në ganaxzi ree xbejnman. Gunabdiidxaman loj reeman, rëbaman:

—¿Chu rëb ree bejn najn?

¹⁹ Badxi' reeman laan rëb reeman:

—Yu' reeman rëb lüj naj Waj Bén baroobnijs bejn ree, yu'za reeman rëb lüj naj Elías Bén badëë xtiidx Dios loj ree bejn, yu' tëë reeman rëb lüj naj tijb ree Bén badëë xtiidx Dios loj ree bejn gocli, Bén ma baban.

²⁰ Dxel gunabdiidx Jesús zatijb, rëbaman:

—Laadx lëjt, ¿xhie nadi chu najn?

Badxi' Bëdan rëbaman:

—Lüj naj Cristo. Lüj naj Xi'n Dios.

Rugojn Jesús guiëtaman

(Mt. 16:20-28; Mr. 8:30-9:1)

²¹ Rëb Jesús loj reeman achuczi loj guiëb reeman zian, ²² rëb tëëman:

—Rayal sagdiaj Bén guxhaal Dios: ad zënt ree guxtis Israel laaman, ni'qui ree bixhioz rniabee ree bixhioz, ni'qui ree mextr rajc ley. Gugüjt reeman laaman, per ni yayon dxej yabanman.

²³ Dxel rëbaman loj gra reeman:

—Bal chu rën gac da bejnan ad rayalt güünman zi'c naj xixgabaman, siibnejzaman gualzi ni tédzaman guixie guixie abi' guidnalaman naj.

²⁴ Din Bén mazri rën gualnaban ni rajpaman loj guidxliuj guie, zadxin dxej gusëëbaman laan, per Bén guiët por naj, zajpaman gualnaban tiblayaa con Dios. ²⁵ ¿Xhie gan güün bejn gapaman gra ni yu' loj guidxliuj abi' nitaman loj Dios? ²⁶ Bal chu ratu guza't naj nè da diidxan,

ziangajc naj najn Bén guxhaal Dios, yatunë'n laaman chi gualan con da gualrniabeen loj xbiani da Dadan nëtëë loj xbiani ree xianjlaman.

²⁷ Per diidxliczi rnin lojdi, yu' ree Bén za' guie ad zëjtt xt guguaa reeman xgualrniabee Dios.

Bidxaa Jesús loj choon ree xbejnman

(Mt. 17:1-8; Mr. 9:2-8)

²⁸ Chi gudëd cost xhujn dxej ni gunee Jesús diidx guin ree, wejman persi gurejdx gunabaman Dios tijb guiic guia', binëman Bëd con Waj con Jacob. ²⁹ La'tgaj cabejdx canabaman Dios, bidxaa lojman guiáad xabaman gojcan naquichbëj bidiin tëën bacha'. ³⁰ Dxejczu gulentie tio'p ree bejn, caneenë reeman laaman. Tijbaman naj Moisejs zatijbaman naj Elías. ³¹ Yu' reeman galay biani cayü reeman diidx guial guiët Jesús

Jerusalén. ³² Majsí yu' bacaal loj Béd në loj ree xcompniaraman, batie'ch xbacaal reeman persi baguiaa reeman xbiani Jesús con zatio'p ree bèn za'nëman. ³³ Chi ma baza ree bèn caneenë Jesús, rëb Béd lojman:

—Mextr, ¡zagdxen nadxu' ree guie! Zajc yaguieenan choon ranch, tijban par lùj, tijban par Moisejs zatijban par Elías.

Per ad ragbeet Béd xhienin caneeman. ³⁴ La'tgaj caneeman zian, biguiajt tijb zaj xt guijc reeman, chi ma yu' reeman lèn zaj guin dád bidxeb reeman. ³⁵ Dxel loj zaj guin biguien cha' bejn, rëbaman:

—Bèn guie naj da Xi'nan bèn rën da'tan. Gol bacaagdiajg xtiidxaman.

³⁶ Chi gulox biguien cha'man loj zaj guin, baguiaa reeman xtijbzi Jesús za'man. Abi' ad gutie'cht reeman diidx. Lèn ree dxej zii achutdzi loj rëb reeman ni baguiaa reeman.

Rayüjn Jesús tijb xin yu' xindxab luxdoo

(Mt. 17:14-21; Mr. 9:14-29)

³⁷ Bareguiaal, chi baguiajt reeman guijc guia' guin, dád benzien brii bigchaagloj Jesús. ³⁸ Abi' tijb bèn no'ch loj reeman guridxa', rëbaman lojman:

—¡Mextr!, been wen baguiaa da xi'nan din tijbzi laax ra'pan. ³⁹ Tijb xindxab ru luxdoox abi' rucwixdiajx laax, rugüjtya'x laax rbëë tëëx bichijn ro'x. Dád rusagdiajx laax ad rëntix guslaax laax. ⁴⁰ Ma gunaaban loj ree xbejn din nabëë reeman xindxab guin, per ad gojct reeman.

⁴¹ Badxi' Jesús laan rëbaman:

—¡Benguijdx, bèn ad riladxt! ¿Xt goc gazunë'n lëjt gadaan tëen lëjt? Tanë xi'nl guie.

⁴² Chi cabig xin guin basajb xindxab guin laax luyuj, bagüjtya'x laax zatijb. Per gunabee Jesús barii xindxab guin, bayüjnman laax dxel bayüman laax loj xdadix. ⁴³ Graczi reeman badxaløj guialrniabee ni rajp Dios.

Rugojn Jesús zatijb guial guiëtaman

(Mt. 17:22-23; Mr. 9:30-32)

La'tgaj caydxa loj reeman ni cayüjn Jesús, rëbaman loj ree xbejnman:

⁴⁴ —Gol bacaagdiajgchaaw ni ganin lëjt: yayü reeman Bèn guxhaal Dios loj ree bejn.

⁴⁵ Per laa reeman ad bignia't reeman ni rnieeman guial ad badëëtaman mod nigña' reeman, abi' bidxeb reeman niniabdiidx reeman lojman xhie rën guiëb ni rëbaman.

¿Chu mazri zøjbloj?

(Mt. 18:1-5; Mr. 9:33-37)

⁴⁶ Dxel guzuloj ree xbejnman rëb loj lasa' reeman chu loj gra reeman mazri zøjbloj. ⁴⁷ Per gogbee Jesús xgab ni cayüjn reeman abi' cwa'man tijb xindoo, bazujman laax cwë'man, ⁴⁸ dxel rëbaman loj reeman:

—Bèn ridxga' tijb xindoo por naj, najn ridxga'man, guiáad bèn ridxga' naj, bèn guxhaal najn ridxga'man. Din bèn rüjn sirv lojdi, laaman mazri zøjbloj lojdi.

Bèn ad za't contr dunuj ree za'man con dunuj ree

(Mr. 9:38-40)

⁴⁹ Rëb Waj loj Jesús:

—Mextr, baguiaan tijb bejn rabëëman xindxab luxdoo ree bejn por xguialrniabeel. Per badxoonan guial ad najtaman dux bejn ree.

⁵⁰ Per rëb Jesús lojman:

—Ad rudxoondi, din bën ad za't contr dunuj ree, za'man con dunuj ree.

Gudilë Jesús Jacob con Waj

⁵¹ Chi ma cadxin dxej yayë'p Jesús xanyabaa, dxel beenman xgab guial rüjn naguiejn cheman Jerusalén. ⁵² Guxhaalaman bën guned ree, wej reeman tijb guiedxdo nulen Samaria bitiil reeman lod yaya'n reeman. ⁵³ Per ad cwëjbt ree bën Samaria guin nudëed reeman lod naya'nman guial gogbee reeman cheman Jerusalén. ⁵⁴ Chi baguiaa Waj con Jacob zian, rëb reeman lojman:

—Dad, çrënl ya yanabeen guiat bajl xanyabaa din gunijtan bën guin ree zi'c been Eliás bën badëe xtiidx Dios loj ree bejn?

⁵⁵ Dxel badxi' loj Jesús loj reeman, abi' gudilëman laa reeman rëbaman:

—¿Nid ragbeedi ya guial loj xindxab zëed ni rnieedi? ⁵⁶ Naj, Bén guxhaal Dios, ad zialtan din gunijtan xguialnaban bejn loj Dios, zialan din yabën laa reeman loj dol.

Dxel zë reeman zatijb guiedx.

Bén rën chinal Jesús

(Mt. 8:19-22)

⁵⁷ Chi zë reeman lunejz, tijb bejn rëb loj Jesús:

—Dad, rënan guidnaalan lüj bantëez guin chel.

⁵⁸ Badxi' Jesús laan rëbaman:

—Cuyojt ree yu' xguiajbiliaa reeb guiáad ree biguijn yu' xguixbitia's reeb. Per Bén guxhaal Dios ni'qui lod quixh guijcaman ad yu't.

⁵⁹ Rëb Jesús loj ben ren:

—Tanal naj.

Per badxi'man laan rëbaman:

—Dad, banee mod gabenë' da Dadan xt chi guiëtaman.

⁶⁰ Abi' rëb Jesús lojman:

—Basa'n xdadil con ree bën ad rënt guidnal naj, laa reeman guquie'ch laaman. Sa'n lüj bigtie'ch diidx xhienaag naj xguialrniabee Dios.

⁶¹ Dxel rëb zatijb bën guin:

—Dad, rënan guidnaalan lüj, per yalojxgaj banee mod chigzadiidxnë' ree da familan.

⁶² Per rëb Jesús:

—Bén guiniaaz guia' garad abi' gudxi' lojman niz xijchaman, ad zile't guilia'man yuj zagdx. Ziangajc bën rën guidnal naj, bal id zusa'nman graczi tiblاد ad zile't chu'man loj xguialrniabee Dios.

10

Rxhial Jesús gayojnchii bejn

¹ Chi gudëd gojc ree ni guin, gulej Dad Jesús gayojnchii bejn, abi' guxhaalaman tio'p gaj reeman luguiedx ree në ree ranch din ned reeman che gaj reeman lod naj cheman. ² Rëbaman loj reeman:

—Diidxliczi, zien bejn rën gucaagdiajg xtiidx Dios, per ad zient bën gulüü laa reeman yu'. Zeel gol gurejdx gunab Dios din guixhiaalaman mazri zien bën gulüü laa reeman. ³ Gol chej, naj rxhial lëjt zi'c rej ree xiil galay ree cuyojt. ⁴ Ad chinëdi guijxh, ni'qui milia, ni'qui zatib nejj xgurëchidi, ad sudxedi guinieenëdi bejn ree runejz. ⁵ Bantëez lënü chu'di, yalojxgaj gol güjdx: “Dios yabe'cdxe luxdoodi.” ⁶ Abi' bal lënüzii yu' ree

bén rayal guialnaza'c guin, zaya'nan yagaj. Guiáad bal id rayal reeman laan zayejan con lëjt. ⁷ Yagaj gol baya'n, gol gudaw, gol gu' ni gunee reeman. Din bën rüjn rayal gaxaman. Yagajzi gol baya'n ad bal yaya'ndi lood ren. ⁸ Chi guidxindi tijb guiedx lod yaca' reeman lëjt, gol gudaw ni gunee reeman. ⁹ Gol bayüjn ree bënragxuu yu' ree luguiedx guin, gol güjdx tää loj reeman: “Ma zëed xguialrniabee Dios gajxh par lëjt.” ¹⁰ Per bal guidxindi tijb guiedx lod ad rënt reeman yaca' reeman lëjt, gol brii lunejz, gol güjdx loj reeman: ¹¹ “Xt xgoxyuj ladxidi ni cwa du guia'n, radxijpan zi'c tijb sen guial ad bidxga'tidi dux tiidxan. Per gol gogbee, guial ma zëed xguialrniabee Dios gajxh par lëjt.” ¹² Naj rni lëjt guial dxej yadëed ree bejn cwent loj Dios, mazri casti narooob yayal reeman guial loj ree bën gure guiedx Sodoma.

Bén ad bazoobt ree xtiidx Dios
(Mt. 11:20-24)

¹³ Rëb tää Jesús:

—¡Probza lëjt bën Corazín! ¡Probza lëjt bën Betsaida! Din bal guiedx Tiro në guiedx Sidón niajc gra ree milagr ni goc ladxidi, diidz gocli nayüjn reeman xgab por xtol reeman, niajcw reeman lajd ya's nuroob tää cobdëj guijc reeman zi'c tijb sen guial ma bayüjn reeman xgab por xtol reeman. ¹⁴ Per rnin lojdi guial dxej yadëed ree bejn cwent loj Dios, mazri casti narooob yayalidi guial loj ree bën Tiro në ree bën Sidón. ¹⁵ Guiáad lëjt, bën Capernaum, ad naladxidi yayalidi xanyabaa, lëjt yayal gabijl.

¹⁶ Dxel rëb Jesús loj ree xbejnman:

—Bën ridxga' lëjt, najn ridxga'man, per bën ad ridxga't lëjt, najn ad ridxga'taman. Guiáad bën ad ridxga't naj, bën guxhaal najn ad ridxga'taman.

Badxin ree bën gayojnchii guxhaal Jesús

¹⁷ Chi badxin ree bën gayojnchii guxhaal Jesús, dád rabaá reeman rëb reeman lojman:

—Dad, xt ree xindxab ruzoob dux tiidxan chi raza'tan lajl.

¹⁸ Abi' rëb Jesús loj reeman:

—Waliquidi, naj baguia, zi'czi rë'p nijs basëeb xguialrniabee xindxab. ¹⁹ Naj banee lëjt guialrniabee din gulëedi guijc ree bëel në guijc ree nixüb, në par güüнди gan loj xguialrniabee xindxab sin guial güünx lëjt xhienin. ²⁰ Per ad rabaadi guial ruzoob ree xindxab guin xtiidxidi, gol babaa guial ca lajdi loj libr yu' xanyabaa.

Rabaá Jesús

(Mt. 11:25-27; 13:16-17)

²¹ Loj hor ziigajc babaa da't Jesús por xSprijt Dios, abi' rëbaman:

—Ruzatan lüj zagdxe, Dad, lüj rniabee xanyabaa në loj guidxliuj, din ni baquie'chil loj ree bën rajc në loj ree bën rignia', laan ma balüül loj ree bën ad rajcza'ct. Zian gojcan Dad, din zian guyënl.

²² 'Da Dadan banee gra lon. Abi' achut nünbee Jesucrist Xi'n Dios, tijbzi Dios, achu tää nünbee Dios, tijbzi Jesucrist xi'nman con ree bën rënman güünbee Dios.

²³ Dxel baguiaaman loj ree xbejnman, abi' rëbaman lojzi reeman:

—Xiquilbaa ree bën guguiaa ni cuguiaadi. ²⁴ Din naj rni lojdi, zien ree bën badëe xtiidx Dios loj ree bejn në ree rey guyën nuguiaa ni cuguiaadi,

per ad baguiaat reeman laan. Guyën reeman nucaagdiajg reeman ni cucaagdiajgudi, per ad bacaagdiajgt reeman laan.

Xcwent tijb bén Samaria

²⁵ Tijb mextr rajc ley guzuliman guneenëman Jesús. Abi' din güünman laaman prueb, gunabdiidxaman lojman rëbaman:

—Mextr, ¿xhie rayal günan din ga'pan guialnaban tiblyaa con Dios?

²⁶ Badxi' Jesús laan rëbaman:

—¿Xhie ca loj ley badëë Dios loj Moisejs? ¿Xhienaag rignia'lan?

²⁷ Abi' rëb mextr guin:

—“Guyën xDadil Dios guidib guiyc guidib ladxil guyën tëë ben ren zi'c rën lüj gajc.”

²⁸ Badxi' Jesús laan, rëbaman:

—Zagdxequi badxi'lan. Bal güünl zian zajpil guialnaban tiblyaa con Dios.

²⁹ Per guyën mextr guin naya'nman zagdxe, gunabdiidxaman loj Jesús, rëbaman:

—¿Chu bénan guiënan zi'c rën naj gajc?

³⁰ Dxel be Jesús tijb cwent lojman, rëbaman:

—Tijb bén Israel briiman Jerusalén zëman guiedx Jericó. Abi' gunaaz ree xingubaan laaman, gudijn reex laaman gulan tëë reex gra ni ca'man xt në xabaman, basa'n reex laaman ma güjtczaman. ³¹ Dxel gudëd tijb bixhioz niz yagaj, per chi baguiaaman bén guin, zijt bicaaman volt, zëtaman. ³² Në tijb bén Levita bén rüjn yudar bixhioz ree, gudëd niz yagaj, chi baguiaaman bén guin, zijt bicaaman volt, zëtaman. ³³ Per tijb bén Samaria gudëd niz yagaj, chi baguiaaman bén guin, bayaman laaman, ³⁴ dxel gubigaman lod naga'man, badxe'man sejt con vin lod nadxeelguijdxaman dxel guxhiiman laan con lajd. Zianz badxiibaman laaman xburaman binëman laaman lënü lod raya'n ree bejn. Yagaj gunajman laaman. ³⁵ Chi bareguiaa, chi ma yaguij bén Samaria guin, gulëëman milia xieen tio'p dxej dxiin badëëman laan loj bén naj lidxan, rëbaman lojman: “Gunaj bén guie, bal gunijtil mazri, naj yaguix laan chi yaye'can.”

³⁶ Dxel rëb Jesús loj mextr guin:

—Yan, loj guiyon ree bén guin, ¿chu bénan guyën bén gudin ree xingubaan guin?

³⁷ Badxi' mextr guinan rëbaman:

—Bén baya laaman.

Dxel rëb Jesús lojman:

—Baguij, been ziangajc con ben ren.

Rignaj Jesús Mart në Li

³⁸ Basnuu Jesús zëman abi' bidxinman tijb guiedxdoo, yagaj wejman lidx tijb biin la Mart. ³⁹ Yu' tijb xbëlim lam Li. Gurej Li guin guia' Jesús cucaagdiajguim ni caneeman. ⁴⁰ Per Mart guin mazri ruquiejnne gra xmandadim, abi' bibiguim loj Jesús rëbim:

—Dad, ¿nid rul xgab ya guial rusa'n da bëlan naj con gra mandad guin? Güjdx lojm din güünm naj yudar.

⁴¹ Badxi' Jesús laan rëbaman:

—Mart, Mart, dád rul xgab guial yu' da't xmandadil. ⁴² Per tijbzi ni mazri zobjloj yu'. Li gulejm ni mazri zobjloj, abi' achut zajc chiquiedan lojm.

11

Ruliü Jesüs xhienaag cwedx guiniab bejn Dios

(Mt. 6:9-15; 7:7-11)

¹ Tijb dxej cabejdx canab Jesús Dios. Abi' chi gulox gurejdx gunabaman Dios, rëb tijb xbejnman lojman:

—Dad, balüü dunujn yarejdx yanaaban Dios, zi'c balüü ree xbejn Waj bën baroobnijs bejn ree.

² Abi' rëb Jesús loj reeman:

—Chi cwedx guiniabidi Dios, gol güjdx:

Dad, lüj yu' xanyabaa,
rayal yaya'p da'tan lajl respejt.

Gac zi'c rniabeel.

Gac zi'c rënl loj guidxliuj, zi'c rajc xanyabaa.

³ Bazaladx ni yadaawan guixie guixie.

⁴ Been dunujn perdon gra ree ni mal ma baguieenan, zi'c raguieenan perdon bën rüjn ree dunujn ni mal.

Ad tiëbil güün xindxab dunujn gan yaguieenan dol, babëë dunujn loj gra ni mal.

⁵ Abi' rëb Jesús loj reeman:

—Yaguie'ch ree, tijb lëjt yu' xmiw abi' garol guiaal chedi lidix, guiëbidi: “Miw, baneesii choon guiadxtil gagui'nan, ⁶ din bi't tijb da miwan abi' achet ra'pan gudëdan lojx.” ⁷ Dxel nax diizd lënu guin: “Ad ruslenl naj. Ma nayaaw ro' da portan. Ma naga'yë'snë' ree da xi'nan. Ad zile't chixchejn gunen laa reen.” ⁸ Per rnin lëjt, majsi bal id zixchex din guneex ni ryaadxidi guial rajc xmiwidi laax. Per züjnx naguiejn chixchex din guneex ni ryaadxidi chitëë guslenridi laax. ⁹ Zeel rnin lëjt: Gol gunab loj Dios, laaman guneë ni rniabidi. Gol baguuilaman, zadxejlidi laaman. Gol gurejdx gunabaman, zidxga'man lëjt. ¹⁰ Din bën rniab, zaca'man. Abi' bën rguuil, zadxejlaman guiáad bën rbejdx rniab laaman zidxga'man laaman.

¹¹ ¿Lëjt najdi dad, wen zudëëdi tijb guiaj loj xi'ndi ya chi guiniabix guiadxtil?, ¿o zudëëdi tijb bëel ya chi guiniabix bëjl? ¹² ¿O zudëëdi nixüb ya chi guiniabix dxijt? ¹³ Nacli lëjt najdi bëndol rajc rudëëdi ni zagdx loj xi'ndi. ¡Diidxgui xDadidi bën yu' xanyabaa, nid zudëë xSprijtaman loj ree bën rniab laaman ya!

Rëb ree bejn ca' Jesüs xguialrniabee Beelzebú

(Mt. 12:22-30; Mr. 3:19-27)

¹⁴ Caybëë Jesús tijb xindxab basa'n tijb bejn gop. Abi' chi barii xindxab guin guzuloj canee bën guin. Dxel dád badxaloj ree bejn. ¹⁵ Per yu' reeman rëb:

—Bën guin rabëë xindxab luxdoo ree bejn por xguialrniabee Beelzebú, xin rniabee ree xindxab.

¹⁶ Yu'za reeman par güün reeman laaman prueb, rëb reeman lojman din güünman milagr zëed xanyabaa. ¹⁷ Per Jesús ragbee gajcaman xgab cayüjn reeman, abi' rëbaman:

—Gra nacion bal id nadxag riga' bejn por wadijl, rlia' lasa' reeman, ziangajc tijb famil bal id nadxag riga' reeman por wadijl, rlia' lasa' reeman. ¹⁸ Ziangajc bal Satanás xin rniabee ree xindxab su contr lasa' xindxab gajquix, nayob nit xguialrniabeex. Canin zian guial rëbidi por xguialrniabee Beelzebú rabën xindxab luxdoo ree bejn. ¹⁹ Per bal rabën

xindxab luxdoo ree bejn por xguialrniabee Beelzebú, ¿chuza rudëéd guialrniabee loj ree xbejndi din yabëë reeman xindxab? Zeel laagajc reeman rulüü guial ad laat rnieedi. ²⁰ Per por xguialrniabee Dios rabën xindxab luxdoo ree bejn, laan rën guiëb guial ma za'në xguialrniabee Dios lëjt.

²¹ 'Bal tijb béngojl da't ca' xguiibaman, rajp lidxaman. Ad zajct cwan bejn ni rajpaman. ²² Per bal guidxin bën mazri gojl guial lojman güünman laaman gan abi' chisüdaman guiib ni ca'man tia' tëëman gra ni rajpaman.

²³ 'Bén ad za't con naj, za'man contr naj, guiáad bën ad ruto'pt bejn par naj rtie'chaman laa reeman.

Xindxab rayejc

(Mt. 12:43-45)

²⁴ 'Chi rarii tijb xindxab luxdoo tijb bejn, abi' rza xindxab guin niz loj yujbidx rguuilix lod yaziiladxix. Chi ad rdxejlt lod yaziiladxix, dxel rüjnx xgab naladxix: “Zagdxeli yaye'can lod bariin.” ²⁵ Abi' chi rayejquix ruguiaax luxdoo bën guin, najn zi'c tijb lënü lod bilioob lod najcchaaw tëë. ²⁶ Dxel rica'x zagajdx ree xindxab naj mazri xinmal guial lojx. Abi' ru gra reex luxdoo bën guin. Dxel piorli raya'nman guial zi'c gocaman yaløj.

Xiquilbaa ree bën ruzoob xtiidx Dios

²⁷ La'tgaj canee Jesús diidx guin ree, gurixdiaj tijb béngunaa no'ch loj ree benziën guin, rëbaman:

—iXiquilbaa béngunaa bazuj lüj loj guidxliuj, bën baslaa tëë lüj!

²⁸ Per badxi' Jesús laan rëbaman:

—iMazri xiquilbaa ree bën rucaagdiajg xtiidx Dios ruzoob tëë reeman xtiidxaman!

Rniab ree bejn güün Jesús tijb milagr

(Mt. 12:38-42; Mr. 8:12)

²⁹ Zi'cri cado'p ree bejn lod za' Jesús, abi' guzuløj rëbaman loj reeman:

—Bén riga' ree loj guidxliuj yan, naj reeman benmal. Abi' rniab reeman tijb milagr, per achet guguiaa reeman, tijbzi zi'c guzac Jonás bën badëë xtiidx Dios loj ree bejn. ³⁰ Zi'c goc Jonás tijb sen par ree bën gure guiedx Nínive, ziangajc Bén guxhaal Dios najman tijb sen par ree bën naban yan. ³¹ Abi' bën goc reina guiedx Sabá, zabanman chi yadëéd ree bejn cwent loj Dios dxel guiëbaman guial ree bën riga' yan, yayal reeman xcasti Dios. Din laaman dád zijt guzaman bicaagdiajgaman xguialrajc rey Salomón. Abi' yan, naj za'në'n lëjt, mazri lasajcan guial loj rey Salomón. ³² Ziangajc ree bën guban guiedx Nínive, zaban reeman chi yadëéd ree bejn cwent loj Dios abi' guiëb reeman guial ree bën riga' yan, yayal reeman xcasti Dios. Din bën Nínive ree bayejc reeman loj Dios chi bacaagdiajg reeman xtiidxaman ni gunee Jonás. Abi' yan, naj za'në'n lëjt mazri lasajcan guial loj Jonás.

Guiaaløj bejn naj zi'c biani

(Mt. 5:15; 6:22-23)

³³ 'Achut rucaaguij tijb guij par sun lod naguie'ch, achu tëët ruta'cw laan lën tijb yagalm. Rayal sun lod guiguienan din gusnin loj bën chu' lënü. ³⁴ Guiaaløj bejn naj zi'c tijb biani par xcuerpaman. Bal por ni ruguiaal rüjnl ni zagdx, guidib xcuerpil naj biani. Per bal por ni ruguiaal rüjnl ni mal, guidib xcuerpil naj zi'c lod nacay. ³⁵ Gojp cudad

chitëe chinë guiaalojl lüj loj nejz mal luar loj nejz zagdxe. ³⁶ Abi' bal ni'qui tibusda'n xcuerpil ad rüjnt ni mal, guidibczan gac nayni zi'c chi rusni guij con xbacha'n.

*Ni rüjn ree mextr rajc ley në ree bénfarisew
(Mt. 23:1-36; Mr. 12:38-40; Lc. 20:45-47)*

³⁷ Chi gulox guneenë Jesús laa reeman, tijb bénfarisew rëb loj Jesús din chitaw Jesús lidxaman. Chi guyuman, zianz gurejman xan mex. ³⁸ Abi' bénfarisew guin badxalojman chi baguiaaman ad banaat Jesús chi ma gawaman zi'c naj xcostumbr reeman. ³⁹ Per rëbaman loj reeman:

—Najdi zi'c tijb vajs con pliajt ni naya xijch, rguiendi benza'c, per luxdoodi yu' da't guialgubaan në ni mal. ⁴⁰ ¡Bennad! ¿Nid bén been gajc xcuerpidi been luxdoodi ya? ⁴¹ Zeel gol been yudar bén achet rajp din guiguien guial najquidi benza'c.

⁴² ¡Probza lëjt bénfarisew! Rbëecadi ni naj par Dios, rüjndi chii lala' ni rajpidi zi'c bidxtil në rud në graloj ni rxübindi abi' rudëedi tijban loj Dios. Per ad rüjntidi zi'c rayal ad rën tëtidi Dios. Gol bidxga' Dios ad gucwëez tëe gudëedi ni rudëedi lojman.

⁴³ ¡Probza lëjt, bénfarisew! guial ruladxidi cwedi lod rbej ree bén zojbloj lën ree yadoo, ruladx tëedi gugajpdioz ree bejn lëjt zagdxe niz lunejz.

⁴⁴ ¡Probza lëjt, mextr rajc ley në lëjt bénfarisew, bén rusquiee!, din najdi zi'c baa ni ad rguient, abi' ad ragbeet ree bejn rë'p reeman guijcan.

⁴⁵ Dxel gunee tijb mextr rajc ley, rëbaman loj Jesús:

—Mextr, në dunujn caneeguijdxil guial rëbil zian.

⁴⁶ Badxi' Jesús laan rëbaman:

—¡Ziangajc lëjt mextr rajc ley, probza lëjt!, guial rniabeedi bejn ree güün reeman ni nawëëgda't abi' rniabeezidi güün bejn zian guiáad lëjt ni'qui ta'n ad rüjntidi laa reeman yudar din güün reeman zi'c rëndi.

⁴⁷ ¡Probza lëjt!, guial rüjnchaawidi xbaa ree bén badëe xtiidx Dios loj ree bejn, bén bagüjt gajc ree xbéngulalidi. ⁴⁸ Zian ragbee ree bejn guial ruladxidi ni been ree xbéngulalidi. Laa reeman bagüjt ree bén badëe ree xtiidx Dios loj ree bejn, guiáad lëjt rayüjnchaawidi xbaa reeman.

⁴⁹ Zeel Dios guial ragbeeman gra ni gac, rëbaman: “Gaxhalan bén rudëe ree xtiidx Dios loj ree bejn, në ree apóstoles, yu' reeman gugüjtidi yu' tëe reeman sunalidi din güüandi laa reeman xhienin.” ⁵⁰ Abi' bén naban ree yan, laa reeman yadëed cwent loj Dios por rejn ni guxhie' ree bén badëe xtiidx Dios loj ree bejn, bén güt ree diizd chi go'tchaaw guidxliuj, ⁵¹ diizd xrejñ Abel xt xrejñ Zacarías bén bagüjt reeman ro' yadooro' Jerusalén. Zeel rnin lëjt guial ree bén naban yan, laa reeman quix por gra reeman.

⁵² ¡Probza lëjt, mextr rajc ley!, guial ad rtiëjbtidi chu' ree bejn loj xnejz Dios, ni'quiza lëjt ad rüjnt naguiejn chu'di loj xnejz Dios abi' rudxoondi chu' ree bejn loj xnejzaman.

⁵³ Chi gunee Jesús zian, dád bidxe'ch ree bénfarisew guin në ree mextr rajc ley. Abi' guzuloj zien ree ni rniabdiidx reeman lojman, ⁵⁴ din guidoon xhie guiebaman din chile' gutedia' reeman laaman.

12

Xlevadur ree bénfarisew

¹ La'tgaj canee Jesús zian, guzuloj cado'p por mil bejn, abi' guial zien da't reeman xt rxa't lasa' reeman. Dxel guzuloj Jesús rëbaman yaloj loj ree xbejnman:

—Gol gojp cudad con xlevadur ree bënfarisew, rën guiëban gapidi cudad con ni rusquiee reeman. ² Din achet ni naguie'ch yu' ni ad zaguiënt, ad yu' tëët ni ralan ni ad zagbeet bejn. ³ Zeel gra diidx ni ma guneedi lod nacay, zaguiëjn ree bejn laan lod nayni. Guiáad ree diidx ni ma guneedi ralan lëñü, yu' chi cwidxa' reeman guiniee reeman diidx guin ree diizd guijc ree yu.

Chu rayal guidxeb bejn

(Mt. 10:28-31)

⁴ 'Rnin lëjt, ad ridxebidi bën rën ree gugüjt lëjt din zile' gugüjt reeman xcuerpidi, sa'n xsprijtidi ad zile't gugaal reeman laan. ⁵ Ganin lëjt chu rayal guidxebidi: gol bidxeb Dios bën rajp guialrniabee guial chi ma biquiedaman xguialnabandi zajc guzaalaman lëjt gabijl. Zeel gol bidxebaman.

⁶ 'Lëjt ragbee guial biguijndoo ree ad lasajct reeb wayëjx, per Dios ad rayanladxtaman ni'qui tijb reeb. ⁷ Guiáad lëjt xt guidxguijquidi, graczan nayab loj Dios. Zeel ad rdxebidi din mazri lasajquidi guial loj zien da't ree biguijndoo.

Bën rëb loj ree bejn guial najman xbejn Jesucrist

(Mt. 10:32-33; 12:32; 10:19-20)

⁸ 'Rnin lëjt, chutëëz bën guiëb loj ree bejn guial najman da bejnan, ziangajc naj najn Bën guxhaal Dios guiën loj ree xianjl Dios guial da bejnan najman. ⁹ Per bën guiëb loj ree bejn guial ad najtaman da bejnan, ziangajc guiën loj ree xianjl Dios guial ad najtaman da bejnan.

¹⁰ 'Chutëëz bën guinieeguijdx Bën guxhaal Dios zajcaman perdon, sa'n bën guinieeguijdx xSprijt Dios, ad zajctaman perdon.

¹¹ 'Chi chinë reeman lëjt lën ree yadoo o loj ree juejs në loj ree guxtis, ad aal chu'di xgab xhienaag yadxi'di xtiidx reeman. ¹² Din chi guidxin hor ni guinieedi, xSprijt Dios gunee diidx guinieedi.

Xcwent tijb xinrijcw

¹³ Tijb bën no'ch loj ree benzien guin rëb loj Jesús:

—Mextr, güjdx loj da bichan din guneex ni rayalan.

¹⁴ Per rëb Jesús lojx:

—¿Chu bazuj naj günan guialguxtis o gagui'san ni tia'di?

¹⁵ Rëb tëëman loj reeman:

—Gol gojp cudad; ad sëëbladxidi gapidi ni rajp ree ben ren, din ad ni rajpt bejn runee guialnaban.

¹⁶ Dxel beman tijb cwent loj reeman, rëbaman:

—Guyu tijb xinrijcw, dád gojc xguiniaax. ¹⁷ Dxel beenx xgab nal-
adix: “¿Xhienaag günan? Ad ra'ptan lod gagu'chaawan guialnaza'c guin
ree.” ¹⁸ Abi' gunaladix: “Ma ragbeen xhienaag günan. Guse'nan
yu lod rgu'chaawan da guialnaza'can din günan mazri yu naroo ree
lod gagu'chaawan laa reen, në graczi ni ra'pan. ¹⁹ Dxel guiën, dád
zien guialnaza'c ra'pan par zien ijz, yaziiladxan, gawan, guië'n yabaa
tëën.” ²⁰ Per rëb Dios lojx: “Xin tont, yanguxhin gajc guiëtil, laadx ni
nagu'chaawil, ¿chu yaya'nnë laan?”

²¹ Zian rzajc b́en rgu'chaaw ni za'c par laagajcaman, per loj Dios achet rajpaman.

Achetczi rayal chu' bejn xgab

(Mt. 6:25-34)

²² Dxel rēb Jesús loj ree xbejnman:

—Naj rni lējt: Ad chu'di xgab por ni gawidi par guibandi ni'qui por lajd ni gacwidi. ²³ Guialnaban mazri lasajcan guial loj guialraw, guiaad xcuerp bejn mazri lasajcan guial loj xabaman. ²⁴ ¡Gol baguiaa balo ree! Ad rxübint reeb ad rato'p tēēt reeb guialnaza'c, ad rajp tēēt reeb lod yagu'chaaw reeb guialnaza'c guin, per Dios rudēēd ni raw reeb. ¡Abi' mazri lasajquidi guial loj reeb! ²⁵ ¿Wen guial ru da'tidi xgab ma güün lējt gajc mazri ziool ya? ²⁶ Abi' bal ni'qui zian ad zile't güündi, ¿xhieczy gan rudi xgab por ni ren ree?

²⁷ ¡Gol baguiaa xhienaag rini's ree guiaa dajn! Ad rüjnt reen dxiin ad rguib tēēt reen. Per ni'qui rey Salomón ad guzujchaawt zi'c za'chaaw ree guiaa guin, majsi mast guzujchaawaman. ²⁸ Abi' bal gui'xh dajn ruzujchaaw Dios yan, majsi guixiezi che'can. ¡Diidxgui lējt, b́en ad riladxza'ct ree laaman nid zuneeman ni gacwidi ya! ²⁹ Zeel ad rudi xgab xhie gawidi o xhie guiē'di, ad bal tib yu'zidi laan xgab. ³⁰ Din b́en ad nünbeet ree Dios rüjn zian. Laa reeman ru xgab por gra ree ni guin. Per lējt yu' xDadidi, laaman ragbeechaaw xhienin riaadxidi. ³¹ Per yaloxgaj gol baguiil güündi zi'c rniabee Dios, laaman guneē gra ni ryaadxidi.

Guialnaza'c yu' xanyabaa

(Mt. 6:19-21)

³² Lējt najdi da bejnan, ad rdxebidi. Ta'nzi najdi, per xDadidi Dios ma beenman xgab nabeenēdi laaman. ³³ Gol bato' ni rajpidi din gudēēdan loj ree b́enprob. Gol been naguiejn güündi gan guialnaza'c ni ad rarat ni yu' xanyabaa, lod ad zut xingubaan cwan laa reen lod ad zacabe tēēt reen. ³⁴ Din lod rajpidi guialnaza'c guin, yagaj za' xquiarguejndi.

Gol guzujsin

³⁵ 'Gol guzujsin zi'c b́en ma najcw xab ca' tēē xguijman par griiman. ³⁶ Gol been zi'c ree mojs cabēz yadxin xpatron reex, b́en zē loj guialruxh-liaa, din diob guixhial reex ro' port yayuman chi gucaaman. ³⁷ ¡Xiquilbaa ree mojs naga'naa cabēz xpatron reex! Naj rni lējt, laagajc patron guin cwe'c laa reex xan mex, dxel chicchaa xabaman din gudēēman ni gaw reex. ³⁸ Xiquilbaa reex bal guidxaagloj xpatron reex laa reex naga'naa reex, majsi yadxinman garol guiaal o chi ma cayreguiaal ya. ³⁹ Gol been xgab, bal tijb bejn ragbeeman xhie hor chu' xingubaan lidxaman cwanx, ad zatiējbtaman chu'x lidxaman. ⁴⁰ Zianan zeel gol guzujsin din ad ragbeetidi dxejczy gui't B́en guxhaal Dios.

Mojs za'c nē mojs guiidx

(Mt. 24:45-51)

⁴¹ Dxel gunabdiidx Béd loj Jesús, rēbaman:

—Dad, ¿par dunuzan bel cwent guin ya o par gra ree bejn?

⁴² Badxi' Jesús laan, rēbaman:

—¿Chu lējt naj zi'c tijb mojs za'c, nazobdiidx, rusa'n xpatronx laax lidxaman persi rulenx gra ree mojs rudēē tēēx ni raw reex chi rajl hor? ⁴³ Xiquilbaa mojs cayüjn dxiin zagdxe chi yadxin xpatronx. ⁴⁴ Din

diidxliczi rnin lëjt, zusa'n gra xieen patron guin loj mojs guin. ⁴⁵ Per bal naladx mojs guin: “Zaglaari yaguaaad da patronan”, zianz sulojx gusagzix gra ree bën rijn dxiin yagaj, zi'c béngunaa zi'c xinguaaaw, dxel suloj gawix, guiè'x sùdx tèèx, ⁴⁶ abi' yadxin xpatronx tijb dxej ni ad rbèztix në tijb hor ni ad ragbeetix. Dxel dád casti narooob gudëed patron guin laax, guixhiaalaman laax lod rayal ree bën ad ruzoobt diidx.

⁴⁷ Din tijb mojs ragbee ni rën xpatronx güünx, abi' ad za'tix porvinid ad ruzoob tèètix diidx, dád casti narooob tédix. ⁴⁸ Per mojs ad ragbeet ni rën xpatronx güünx abi' güünx ni rayal casti, ta'nz tédix casti. Din bën badëed Dios quiarguejn, mazri zien ni rayal güünman por quiarguejn ni badëed Dios lojman. Ziangajc bën badëed Dios guialrniabee, mazri zien ni rayal güünman por guialrniabee ni badëed Dios lojman.

Por Jesús rlia' lasa' ree bejn
(Mt. 10:34-36)

⁴⁹ 'Zialan loj guidxliuj zi'c tijb bën zidgacaaguij xhienin, abi' jma rën nejzdoon tiaguijn! ⁵⁰ Gazaagdiajn guièt tèèn, abi' j dád yu'nayan diidz yan xt chi gacan cumplid! ⁵¹ Ad naladxidi zialan loj guidxliuj par yabecdxcn luxdoo bejn, zialan din guial guililadx reeman naj chu' wadijl. ⁵² Din diidz yan, lod naj reeman gaay loj tijb famil, til choonman contr tio'paman, tio'paman contr choonaman. ⁵³ Dad su contr xi'nman guiáad xi'nman su contr laaman; na su contr xi'ndxa'paman guiáad laam su contr laaman; abi' nasuegr su contr xwalidxaman guiáad laam su contr laaman.

Sen rguien xanyabaa
(Mt. 16:1-4; Mr. 8:11-13)

⁵⁴ Rëb tèè Jesús loj ree benzien guin:

—Chi ruguiaadi ririi zaj niz lod rëéz gubijdx, rëbidi: zal guia, abi' rajc gajc zian. ⁵⁵ Abi' chi ririi bi niz sur, rëbidi: gac nalaa, abi' rajc gajc zian. ⁵⁶ jBén rusquiee! Ragbeedi xhie rën guièb sen rguien xanyabaa në loj guidxliuj, ¿chexquiza zeel ad ragbeetidi xhie rën guièb ni cayajc loj guidxliuj yan?

Babej zagdxe con bën rdxe'ch lüj
(Mt. 5:25-26)

⁵⁷ ¿Chexc ad rüjnt lëjt gajc xgab conin naj ni zagdxe? ⁵⁸ Bal chu bën rudëed lüj loj guxtis, been naguejn baya'nnëman diidx zagdxe la'tgaj yu' tiamp, chitëè yayüman lüj loj guxtis, abi' guxtis guin yayü lüj loj ree bën cu' lüj ladxguuib. ⁵⁹ Naj rni lüj, ad zariitil ladxguuib guin xtczi quixil gra ni na guxtis guin.

13

Gol bayüjn xgab por xtolidi

¹ Lën gajc ree dxejzii wej tio'p choon ree bejn biguie reeman diidx loj Jesús guial bagüjt Pilato tio'p choon ree bën Galilea, abi' bago'chaman xrejn reeman con xrejn ree be bagüjt reeman par gudëed reeman loj Dios zi'c gon. ² Dxel rëb Jesús:

—Ad bal naladxidi guzajc ree bën Galilea guin zian guial naj reeman mazri bëndol guial loj gra ree bën Galilea. ³ Din naj rni lëjt guial ad ziantan. Abi' bal id zayüjndi xgab por xtolidi ziangajc saquidi. ⁴ Ad bal naladxidi bën chiinbichoon güt ree chi guxa't torre ni la Siloé laa reeman,

naj reeman mazri béndol guial loj gra ree bén zojb Jerusalén. ⁵ Naj rni lëjt guial ad ziantan. Abi' bal id zayüjndi xgab por xtolidi ziangajc saquidi.

Xcwent yag higo ni ad rtiat

⁶ Dxel be Jesús tijb cwent loj reeman, rëbaman:

—Tijb bejn gojpaman yag higo lod nagu'man uv, abi' biquiaaman bal ca higo lojn, per achetczi bidxaaglojman. ⁷ Dxel rëbaman loj bén rajp guidxliuj guin: “Baguiaa, ma gojc choon ijz rialan rguilan higo loj yag guin, abi' achetczi rdxaaglojn. Batüügan din nawëëgzi rüjn loj guidxliuj guie.” ⁸ Per rëb Bén rajp guidxliuj guin: “Dad, basa'nsiin zatib ijz, yabeclaan yuj xanan gagu' tëënan abon. ⁹ Rupent zian tian, per bal id zacan dxel tügan.”

Bayüjn Jesús tijb béngunaa ca bëw xijch

¹⁰ Tijb dxej raziiladx ree bejn, culüü Jesús bejn ree lën tijb yadoo, ¹¹ yagaj za' tijb béngunaa ma gojc chiinbichoon ijz ragxuuman, tijb xindxab basa'n laaman con tijb bëw xijchaman, ad rle'tczi yaliman. ¹² Chi baguiaa Jesús laaman, gurejdxaman laaman, rëbaman:

—Na, ma bayajquil guialguijdx ni goquil.

¹³ Dxel badxiib yaaman gujcaman; abi' loj hor guin gajc baliman, zianz guzuloj cuza'taman Dios zagdxe. ¹⁴ Per bén rniabee lën yadoo guin dád bidxe'chaman guial bayüjn Jesús bén guin dxej raziiladx ree bejn, dxel rëbaman loj ree bejn:

—Xho'p dxej yu' guial güün bejn dxiin, loj ree dxej guin gol guida din yajajquidi, per ad dxej raziiladxt bejn.

¹⁵ Badxi' Dad Jesús laan rëbaman:

—Bén rusquiee, ¿nid rxhiee xgo'ndi o xburidi dxej raziiladx ree bejn ya par chiquié'di laa reeb nijs? ¹⁶ Béngunaa guie zëëdaman loj xdiaa Abraham, ma gojc chiinbichoon ijz naxhii xindxab laaman con guialguijdx guie. ¿Wen id zajc yajajcaman dxej raziiladx ree bejn ya?

¹⁷ Chi rëb Jesús zian, gra ree bén rdxe'ch laaman baya'n xtu; per graczi ree bejn rabaa guial ruguiaa reeman gra ree ni zagdxe ni rüjnman.

Xcwent xhaj moxtajs

(Mt. 13:31-32; Mr. 4:30-32)

¹⁸ Rëb tëë Jesús:

—¿Xhienaag ganin naj xguialrniabee Dios o xhie gulün lojdi din chignia'di xhienaag naj xguialrniabeeman? ¹⁹ Laan naj zi'c xhaj moxtajs ni rxübin bejn loj xguiniaaman, rni'san xt rajcan yag narooob. Abi' guial narooob da't rajcan xt rüjn xguixbitia's ree biguijn xidxan.

Xcwent levadur

(Mt. 13:33)

²⁰ Rëb Jesús zatijb:

—¿Xhienaag ganin naj xguialrniabee Dios? ²¹ Laan naj zi'c levadur ni rugo'ch tijb béngunaa choon midid harin persi rusaaguijn gra cob guin.

Port nadëë

(Mt. 7:13-14, 21-23)

²² Chi zë Jesús Jerusalén, rulüüman bejn ree luguiedx narooob ree në ree luguiedx dobëz niz lod rdëdaman. ²³ Abi' tijb bejn gunabdiidx lojman rëbaman:

—Dad, ¿ta'nz ree bén gac perdon ya?

Badxi' Jesús laan rëbaman:

24 —Gol been naguiejn din chu'di niz ro' port nadëe, din naj rni lëjt, zien ree bën rën chu', per ad zile't chu' reeman. 25 Din chi chisu bën naj lidxan gusiaawaman ro' port guin, lëjt guial yaya'ndi xchu, gucaadi ro' port guin guiëbidi: “Dad, guxhal.” Per yadxi'man xtiidxidi naman: “Ad ragbeetan ban zadi.” 26 Dxel suloj guiëbidi: “Tijbzi badaaw ree, tijbzi badü' ree, niz lad dux nejzan balüül dunujn.” 27 Per naman lojdi: “Ma rnin, ad ragbeetan ban guzadi. Gol biquied lon bëndol.” 28 Ni goondi gaw tëe layidi chi guguaadi Abraham, Isaac, Jacob, në gra ree bën badëe xtiidx Dios loj ree bejn, za' reeman lod rniabee Dios, guiáad lëjt yariicadi. 29 Din gui't ree bën sa gra lad guidiblagaa guidxliuj din cwe reeman gaw reeman lod rniabee Dios. 30 Abi' zien ree bën bigra yan, laa reeman gac bën yaløj nadxel. Guiáad ree bën naj bën yaløj yan, laa reeman gac bën bigra.

Roon Jesús por Jerusalén

(Mt. 23:37-39)

31 Hor guin gajc bidxin tio'p choon ree bënfarisew, abi' rëb reeman loj Jesús:

—Baguij, baza niz guie, din rën rey Herodes gugüjtaman lüj.

32 Badxi' Jesús laan rëbaman:

—Gol chej gol chiguiedx loj bën rusquiee zii: “Yan, në guixie yabën xindxab yayün tëen bënragxuu ree, abi' widx gulooxan.” 33 Per naj rayal gusnuu ad nejzan yan në guixie në widx, din ad najt guial guiët tijb bën rudëe xtiidx Dios loj ree bejn luguiedx ren bal id najn Jerusalén.

34 'iBën Jerusalén, bën Jerusalén, rugüjtidi bën rudëe ree xtiidx Dios loj ree bejn rucaaguij tëedi gra ree bën rxhiaal Dios lojdi! iBëlczi volt guyënan nuchagan lasa'di zi'c rüjn tijb guid ruchajg lasa' ree xi'nb lën xhiilib, per ad cwëjbtidi! 35 Zianan zeel yaya'n ladxidi zi'c tijb guiedx lod achut zøjb. Abi' rnin lëjt, diizd yan ad zuguaatrudi naj xt chi guidxin dxej guiëbidi: “iNüjnle' Dios bën zëed por laaman!”

14

Rayüjn Jesús tijb bën rzaaguij

1 Tijb dxej raziiladx ree bejn wej Jesús bitawaman lidx tijb bënfarisew rniabee. Yu' ree bënfarisew guin cula'ch laaman xhie güünman, 2 guial za' tijb xinragxuu lojman rzaaguijx. 3 Dxel gunabdiidx Jesús loj ree mextr rajc ley në loj ree bënfarisew guin, rëbaman:

—¿Zajc yayüjn bejn bënragxuu dxej raziiladx ree bejn ya o ad zajctan?

4 Per laa reeman achetçi rëb reeman. Dxel gunaaz Jesús xinragxuu guin bayüjnman laax, abi' rëbaman lojx din yaguijx. 5 Dxel rëbaman loj ree bënfarisew guin:

—¿Bal tijb xburidi o tijb xgo'ndi yab lën tijb bizë, nid zabëedi laab ya, majsi naj dxej raziiladx bejn?

6 Abi' achet gojc nadxi' reeman.

Bën rej ree loj guialruxhliaa

7 Chi baguiaa Jesús rbe ree biooz luar lod rbej ree bën mazri zøjbloj, rëbaman loj reeman:

8 —Bal chu guiniee lüj chel loj tijb guialruxhliaa, ad cwel luar rbej ree bën mazri zøjbloj. Din zajc guidxin zatijb biooz mazri zøjbloj guial lojl, 9 abi' gui't bën guneë gropidi naman lojl: “Badëed lod zøjbil cwe

bén guie.” Dxel rayal chel guidib ratul chisobil loj yagxhil bigra. ¹⁰ Zeel chi guinee reeman lüj, zagdxeli bisob loj yagxhil bigra, din chi gui't Bén gunea lüj naman lojl: “Miw, badëd loj tijb luar mazri zojbloj.” Zian, gra ree Bén zojbnël xan mex guza't lüj zagdxe. ¹¹ Din Bén rlies xvalor gajc, yaya'nxtuman. Guíáad Bén rüjn naya zajs xvaloraman.

¹² Dxel rëb Jesús loj Bén gunea laaman:

—Bal goc cu'l guialraw, ad guinee xmiwil, ni'qui lasa'l, ni'qui bijchil, ni'qui benrijcw zojbnël gajxh. Din laa reeman yu' dxej guinee reeman lüj, abi' zian yanee reeman ni gudaw reeman lidxil. ¹³ Zagdxeli naj, chi güünl tijb lanij, gunea Bénprob ree, në ree Bén ad nadaant yaa, në ree bencoj con ree Bénlutia'p. ¹⁴ Xiquilbaal bal güünl zian, din laa reeman ad zajct yanee ni badëdil. Per chi guidxin dxej yaban ree Bén bazoob xtiidx Dios, Dios yaguijx laan lojl.

Xcwent Bén been tijb lanij

¹⁵ Chi biguiejn tijb Bén zojbnë Jesús xan mex ni rëbaman, rëbaman loj Jesús:

—jXiquilbaa ree Bén yayal gaw lod rniabee Dios!

¹⁶ Dxel rëb Jesús lojman:

—Tijb bejn badxe' guialraw par xche, abi' guneeman zien da't ree bejn. ¹⁷ Chi ma gojl hor gaw reeman xche, guxhaal xmojsaman din chex chiguiedxix loj ree biooz guin: “Gol guda din graczi ma najcchaaw.” ¹⁸ Per graczi reeman guzuloj caynab perdon. Bén yaloj guin, rëbaman: “Yan gajczi guzin tijb guidxliuj, rayal chiquianan; been wen güjdx lojman din güünman naj perdon.” ¹⁹ Zatijbaman rëb: “Guzin gaay nejz go'n, yan chiguienan laa reeb prueb guidoondon rajc rüjn reeb dxiin ya; been wen güjdx lojman din güünman naj perdon.” ²⁰ Zatijbaman rëb: “Yan gajczi baxhlian zeel ad zile't guialan.” ²¹ Chi badxin mojs guin bagojn xpatronx gra ni rëb ree Bén guin, dád balenman, dxel rëbaman lojx: “Baquiejn wej niz galay ni, në niz lad ree nejz, tanë gra ree Bénprob në ree Bén ad nadaant yaa, në ree bencoj con ree Bénlutia'p.” ²² Chi ma been mojs guin zian, dxel rëbix lojman: “Dad, ma benan ni nal, per sta yu' gajc luar lidxil.” ²³ Dxel rëbaman lojx: “Wej niz loj carreter në niz loj ree nejz la's, been naguiejn ben ren ree din gui't reeman din cha lënu lidxan. ²⁴ Din naj rni lojdi, ni'czi tijb ree Bén gunen yaloj ad zajwt guialraw benchaawan par xche.”

Ni rayal güün ree Bén rën gac xbejn Jesús

²⁵ Dád zien ree bejn zinal Jesús; abi' badxi' lojman loj reeman rëbaman:

²⁶ —Bal chudi rën guidnal naj, rayal guiëndi naj mazri guial loj xdadidi, guial loj xniaadi, guial loj lacheelidi, në guial loj xi'ndi, o bijchidi o bizandi, rayal tëë guiëndi naj mazri guial loj xguialnabandi, din bal id züjndi zian ad zajct gaquidi da bejnan. ²⁷ Bén ad rënt sagdiaj guidnal tëëman naj, ad zajct gacaman da bejnan.

²⁸ 'Bal chu rën güün tijb yu narooob, ¿nid yalojxgaj cweman ya din cwëëman cwent zadaan xmiliaman ya din gulooxaman laan? ²⁹ Din bal sulojman xcimiantan abi' ad zulooxtaman laan, graczi ree Bén guguiaa laan guze' laaman, ³⁰ guiëb reeman: “Guzuloj cayüjn Bén guin yu abi' ad gojct nulooxaman laan.”

³¹ 'O bal tijb rey güün wadijl contr zatijb rey, ¿nid yalojxgaj cweman ya güünman xgab züjn chii mil xsuldadaman gan loj stijb rey zidnë gajl mil

suldad ya? ³² Per bal naladxaman ad züjntaman gan loj rey guin, la'tgaj sta za' rey guin zijt, guixhiaalaman bén chinë ree xrusonman din yaya'n reeman diidx ad zut wadijl. ³³ Yan, ziangajc rnin lojdi, chutëez lëjt bal id zusa'n gra ni rajpidi din guidnalidi naj, ad zajct gaquidi da bejnan.

Bal id zajcri zëd naxij

(Mt. 5:13; Mr. 9:50)

³⁴ Dxel rëb Jesús:

—Ni zagdxe naj zëd. Per bal id zajcran naxij, ¿xhieza naag yayajcan naxij zatijb? ³⁵ Ad rüjntan sirv par luyuj ni'qui par loj abon, rzëëbzan. ¡Ben rën ree gucaagdiajg, gol bacaagdiajg!

15

Xcwent xiil gunit

(Mt. 18:10-14)

¹ Gra ree bén ruquijx impuest në gra ree béndol, bibig reeman lod za' Jesús din gucaagdiajg reeman ni rnieeman. ² Guiáad ree bénfarisew con ree mextr rajc ley rnieeguijdx reeman laaman, rëb reeman:

—Ruchajg bén guin béndol ree rawnë tëëman laa reeman.

³ Dxel rëb Jesús loj reeman:

⁴ —Bal tijb bejn rajp tibgayuu xiil abi' rnijt tijbib, ¿nid rusa'nman zatajpgajlchiinbitapib dajn ya abi' rigdiilaman xiil gunit guin xt lodzi radxejlaman laab? ⁵ Abi' chi radxejlaman laab rabaaman, rudxiibaman laab dxidyëjnman. ⁶ Dxel chi radxin lidxaman, ruto'p ree xmiwaman në ree bén zojbnëman gajxh abi' rëbaman loj reeman: “Gol babaa zi'c rabaan, din ma badxejlan da xiilan be gunit.” ⁷ Yan, rnin lëjt, ziangajc rabaanë Dios tijb bén rayüjn xgab por xtol guial loj tajpgajlchiinbitap benza'c ad ryaadxt yayüjn xgab por xtol.

Xcwent milia ni bizëëb

⁸ O bal tijb béngunaa rajpaman chii milia plajt abi' rusëëbaman tijban, ¿nid ruze'caman guij ya ruloob tëëman lënü abi' raguiilaman laan zagdxe da't xt lodzi radxejlan? ⁹ Abi' chi radxejlaman laan, ruto'p ree xmiwaman në ree bén zojbnëman gajxh, abi' rëbaman loj reeman: “Gol babaa zi'c rabaan din ma badxejlan milia basëban.” ¹⁰ Yan, naj rni lojdi, ziangajc rabaa ree xianjl Dios por tijb béndol rayüjn xgab por xtol.

Xcwent bén rüjn perdon xi'n

¹¹ Rëb tëë Jesús loj reeman:

—Tijb bejn yu' tio'p xi'nman. ¹² Abi' xin naj mazri xinguiag, rëb loj xdadix: “Dad, banee ni rayal gaca'n.” Dxel badëëman ni rayal tijbgaj reex. ¹³ Ad gojct xchej ni cwa' reex ni rayal reex, xin naj xinguiag guin bato'gajquix graczi ni badëëd xdadix lojx, abi' con milia guin wejx zijt bignijt xlia'x graczi xmiliax guial beenx ni rëntzix. ¹⁴ Per chi ma banijtx gran, dxel guyu gubijn niz lod za'x abi' guzuloj biaadx ni gawix. ¹⁵ Dxel wejx bignabix dxiin loj tijb bén zojb yagaj, abi' guxhaalaman laax chigajpix cüch ree dajn. ¹⁶ Guial tant rliaanx xt guyënx niajwix ni raw ree cüch guin, per achut rudëë laan. ¹⁷ Dxel beenx xgab naladxix: “¡Zien ree xin rüjn dxiin lidx da Dadan xt sobr rüjn ni raw reex, guiáad naj guie ma guiëtan bëjz! ¹⁸ Yan, yazaan yaya' lidx da dadan din guiën lojman: Dad, ma benan dol loj Dios në lojl. ¹⁹ Ad rayaltri guinieel naj xi'n; been naj cwent zi'c tijb ree xmojsil.” ²⁰ Dxel bayunejzix zia lidx xdadix.

¹Per zijtri ziaadix chi baguiaa xdadix laax dxel bayaman laax, zianz ruxüünman bigchaaglojman laax, abi' gudiidxaman laax gudaw tēēman laax xid. ²¹Dxel rēbix lojman: “Dad, ma benan dol loj Dios nē lojl, ad rayaltri guinieel naj xi'n.” ²²Per rēb xdadix loj ree xmojsaman: “Gol baquiejn gol tanē lajd zagdx, gol bascajcwixan, gol badxe' tijb guiibnil yaax gol baslēē tēēx gurēch, ²³gol chica' go'n mazri nadaan, gol bagūjtib din yadaaw ree yaguieen ree lanij. ²⁴Din par naj ma gūjt da xi'n'an abi' yan ma babanx, gunijtx abi' ma badxejlax.” Dxel guzuloj cayūjn reeman lanij.

²⁵'La'tgaj xi'nman xingol guin cayūjnx dxiin dajn. Chi badxinx gajxh lidx xdadix, biguiejnx cucwejdx reeman cuya' tēē reeman. ²⁶Dxel gurejdxix tijb xmojs xdadix, gunabdiidxix xhienin cayajc lidxix. ²⁷Badxi' mojs guinan rēbix: “Guial baguiaad bijchil zeel gunabee xdadil gūjt tijb go'n mazri nadaan guial nadaanx baguiaadix.” ²⁸Per dād bidxe'ch xingol guin, abi' ad guyēntix nayux. Zeel wej xdadix biguiedxaman lojx din yayux. ²⁹Dxel rēb loj xdadix: “Lūj ragbee ma gojc xchej cayūnan xchiinl, zianczi ruzoban xtiidxil; per ni'czi tijb ad waneetil tijb dxibdobēz din gūnnē' ree da miwan lanij. ³⁰Guiáad yan baguiaad xi'n'l, xin ma bignijt xlia' xmilial con ree bēngunaa dxuudx, abi' gunabeel gūjt go'n mazri nadaan par laax.”

³¹'Dxel badxi' xdadix laan rēbaman: “Xi'n, zianczi za'l con naj, graczi ni ra'pan naj xieenl. ³²Per yan rayal yaguieen ree lanij yabaa tēē ree, din bijchil xin ma gūjt par naj, ma babanx, gunijtx abi' ma badxejlax.”

16

Xcwent tijb mojs rniabee ree mojs

¹Rēb tēē Jesús loj ree xbejnman:

—Guyu tijb benrijcw, nuzujman tijb mojs guinia graczi ni rajpaman. Abi' biguiedx ree ben ren lojman guial cunijt xlia' mojs guin ni naj xieenman. ²Dxel gurejdxaman laax rēbaman lojx: “¿Xhie rēn guiēb ni riguejnan cayūjnl? Banee cwent lon xcwent xchiinl, din achetri dxiin gunen lojl.” ³Dxel guzuloj beenx xgab gunaladxix: “¿Xhienaag gūnan yan ma gusa'n da patronan naj sin dxiin? Ad yu'tan gojl gūnan dxiin dajn, ratu tēēn ganaaban carda. ⁴Ma ragbeen xhienaag gūnan din guiēn ree bejn naj chi ad zūntran dxiin.” ⁵Dxel gurejdxix tijb gaj ree bēn ral loj xpatronx, rēbix loj bēn bidxin yaloj: “¿Plac ralil loj da patronan?” ⁶Abi' rēbaman: “Ralan tibgayuu barril sejt lojman.” Dxel rēbix: “Cwa' gui'ch guie lod ca ni ralil lojman, been zatijban bacaa lojn ralil tū'pchiizan.” ⁷Dxel gunabdiidxix loj zatijbaman rēbix: “Laadx lūj, ¿plac ralil?” Abi' rēbaman: “Tib gayuu ingujch trigo.” Zianz rēbix: “Cwa' gui'ch guie lod ca ni ralil lojman, been zatijban bacaa lojn ralil tajpgajlzan.” ⁸Dād badxaloj patron guin guial nasin mojs mal guin por ni beenx. Din mazri nasin ree bēn ad zinalt xnejz Dios con lasa' reeman guial loj ree bēn zinal xnejz Dios.

⁹'Rnin lojdi, gol beennē dxiin ni rajpidi loj guidxliuj guie par gagnēdi bejn din chu' xmiwidi, din chi yaran ma yu' bēn yaca' lējt lod gapidi gualnaban tiblayaa.

¹⁰'Bal chu rūjn zi'c rayal con ta'n ni rudēēd bejn lojman, zūjnman zi'c rayal con zro'n. Ziangajc bēn ad rūjnt zi'c rayal con ta'n ni rudēēd bejn lojman, ad zūjn gajctaman zi'c rayal con zro'n. ¹¹Yan, ziangajc bal id

zūjndi zi'c rayal con ni za'c yu' loj guidxliuj guie, ¿chu gap lèjt confianz con guialnaza'c yu' xanyabaa? ¹² Bal id zūjndi zi'c rayal con ni ad najt xieendi, ¿chu gunee lèjt ni rayalidi?

¹³ 'Ni'qui tijb mojs ad zajct gūñx sirv loj tio'p patron; din zadxe'chix tijbaman abi' zēnx zatijbaman; o zajquix xinza'c con tijbaman abi' zūjnx tiblad zatijbaman. Zeel ad zajct gūñdi sirv loj Dios, nē loj milia.

¹⁴ Abi' ree bēnfarisew guial mazri rēn reeman milia, chi biguiejn reeman ni rēb Jesús guzuloj cuze' reeman laaman. ¹⁵ Dxel rēb Jesús loj reeman:

—Rūjndi benza'c niz loj ree bejn, per Dios nūnbee luxdoodi; abi' majsi loj bejn lasajc da'tidi, per loj Dios achet lasajquidi.

Xley Moisejs con xguialrniabee Dios

¹⁶ 'Xley Moisejs nē ni bacaa ree bēn badēē xtiidx Dios loj ree bejn, naga'loj been reen dxiiñ xt chi bi't Waj bēn baroobnijs bejn ree. Abi' diizd nadxel guzuloj rire'ch xtiidxza'c Dios xhienaag naj xguialrniabeeman, abi' zien ree bejn rūjn naguiejn chu' loj xguialrniabeeman.

¹⁷ 'Adli nawēēgt nit xanyabaa nē guidxliuj, guial yaya'n tijb diidx zēēd loj ley guin guial ad zajctan cumplid.

Rulūū Jesús xcwent guial rala' lasa'

(Mt. 19:1-12; Mr. 10:1-12)

¹⁸ 'Bal tijb xinguaaw rala' lacheelix abi' rtia'x ben ren, dolan cayūjnx. Ziagajc xin rtia' tijb bēngunaa bala' lacheel, dolan cayūjnx.

Xinrijcw con Lazr

¹⁹ Basnuu Jesús, rēbaman:

—Guyu tijb xinrijcw, guzujchaawix con ganaxczi lajd zagdx, abi' guixie guixiecki rūjnx lanijro'. ²⁰ Guyu tēē tijb xinprob brii lajx Lazr, rbejx ro' xport xinrijcw guin abi' guidibлагаax ca guiadx. ²¹ Rēn nejzdoo Lazr guin gawix ni riajb xan xmex xinrijcw guin. Abi' xt ree bē'cw rbig rlie' reeb loj ree guiadx ni cax.

²² 'Chi bidxin dxej gūjt Lazr dxel bignē ree xianjl Dios laax lod naj nix da't, lod za' Abraham. Nē xin rijcw guin gūjt, abi' biguie'chix. ²³ Chi ma cazagdiaj xin rijcw guin gabijl, gules lojx abi' zijtri baguaiaax za' Lazr cwē' Abraham. ²⁴ Dxel gurixdiajx rēbix: “Dad Abraham, baya naj, guxhaal Lazr din gugajdx lupunt xbacwēnx din gui'tix yasiaalyujx lūdxan, din dād cazaagdiajn loj bajl guie.” ²⁵ Per badxi' Abraham xtiidx rēbaman: “Xi'n, basaaladx guial dād nix guyu luxdool chi gubanl loj guidxliuj, guíaad Lazr dād naya gubajnx. Yan, rayalix lod yabaax guíaad lūj rayalil lod sagdiajl. ²⁶ Nētēē yan bēn za' ree guie ad zajct tēd reeman yagaj, ni'qui ree bēn za' yagaj ad zajct tēd reeman guie, din za' bala'ro' du galay ree.”

²⁷ 'Dxel rēb xinrijcw guin lojman: “Rniaaban lojl dad, been wen guxhaal Lazr lidx da dadan, ²⁸ lod zobj gaay ree da bichan din chicojnx laa reex chitēē nē laa reex gui't luar guie, lod yu' zro' casti.” ²⁹ Per rēb Abraham lojx: “Ma rajp reex gui'ch ni bacaa Moisejs con ree bēn badēē xtiidx Dios loj ree bejn, laan rayal guidxga' reex.” ³⁰ Abi' rēb xinrijcw guin: “Walil, dad Abraham, per ad zaliladxt reex, sa'n bal yaban tijb bēn ma gūjt chigneenēman laa reex, zayūjn reex xgab por xtol reex.” ³¹ Per rēb Abraham lojx: “Bal id ridxga' reex xtiidx Moisejs nē xtiidx ree bēn badēē xtiidx Dios loj ree bejn, ad zaliladxt reex majsi yaban tijb bēn ma gūjt.”

17

Bén ruzaalguiiw bejn din güünman dol

(Mt. 18:6-7, 21-22; Mr. 9:42)

¹ Rëb Jesús loj ree xbejnman:

—Zianczi yu' ree ni ruzaalguiiw bejn din güünman dol, per ¡probza naj bén ruzaalguiiw zatijb bejn guial güünman dol! ² Par laaman zagdxeli naj guixhii reeman tijb guiaj mulin yëjnman din guzaal reeman laaman loj nijsdoo, luar guzaalguiiwaman tijb bén qui rliladxri naj din güünman dol. ³ ¡Gol gojp cudad!

⁴ Bal xhie tijb ni mal güün tijb lasa'l, guneenëman. Abi' bal bayünman xgab por ni beenman, beenman perdon. ⁵ Majsi gajdx volt loj tibdxej güünman xhienin contr lüj, abi' bal gui'taman lojl gajdx volt naman: “Been naj perdon ad züntran zian”, rayal güünl laaman perdon.

Guialrniabee në guialrliladx

⁵ Dxel rëb ree xi apóstoles Jesús lojman:

—Banee dunujn mazri guialrliladx.

⁶ Abi' rëb Jesús loj reeman:

—Bal naj xguialrliladxidi majsi zi'czi naj xhaj moxtajs, zile' guiëbidi loj yagro' guin: “Bia'xh guie, bisob loj nijsdoo”, zuzooban xtiidxidi.

Ni rayal güün tijb mojs

⁷ Bal tijb lëjt rajp tijb mojs, abi' chi yaguaad mojs guin bigla'x yuj o bigajpix begui'xh ree ya, ¿wen zëjbidi lojx ya: “Guyu, gurej din gawil”? ⁸ Ad zëjbtidi zian, guiëblidi: “Bachaa xabil, been ni gawan, guda'n. Chi lox gawan guië' tēen dxel ma zajc gawil guië' tēël.” ⁹ Abi' wed ni'qui quixtēē ad zudëētidi lojx din cayüjnizix ni rayal güünx. ¹⁰ Ziangajc lëjt chi loox güündi gra ni gunabee Dios dxel guiëbidi: “Nayajcan mojs ni ad rüjnt sirv, din baguieenzan ni rayal yaguieenan.”

Rayün Jesús chii ree bén rajc guialguijdx la lepra

¹¹ Chi ma cadxin Jesús Jerusalén, gudëdaman guiedx riga' ree niz Samaria në niz Galilea. ¹² Abi' chi cayuman tijb luguiedx dobëz, bigchaa-gloj chii ree bén rajc guialguijdx la lepra laaman. Per zijt guzuj reeman, ¹³ rbixdiaj reeman, rëb reeman:

—¡Jesús, Mextr, baya dunujn!

¹⁴ Chi baguiaa Jesús laa reeman, rëbaman loj reeman:

—Gol chej loj ree bixhioz din guguiaa reeman lëjt.

Abi' la'tgaj zë reeman, baya xcuerp reeman guialguijdx ni rajc reeman. ¹⁵ Dxel tijbaman chi gogbeeman ma bayajcaman, bayejcaman, rbixdiajman rudëëman quixtëē loj Dios. ¹⁶ Abi' bazuxibaman loj Jesús, basajb lojman xt luyuj persi badëëman quixtëē lojman. Abi' najman Bén Samaria. ¹⁷ Dxel rëb Jesús:

—¿Nid chii naj ree Bén bayajc ya? ¿Con zagaa reeman? ¹⁸ ¿Tijbzi benzit guie bayejc ya rudëëman quixtëē loj Dios?

¹⁹ Dxel rëbaman loj Bén guin:

—Bisu. Baguiaj, ma bayajquil guial bililadxil naj.

Xhienaag gui't xguialrniabee Dios

(Mt. 24:23-28, 36-41)

²⁰ Gunabdiidx ree Bénfarisew loj Jesús goc gui't xguialrniabee Dios, abi' rëbaman:

—Xgualrniabee Dios ad najtan ni guguaa bejn. ²¹ Abi' achut guiëb: “Laan za' guie”, o “Laan za' ni” ya, din xgualrniabee Dios mal za'n galaydi.

²² Dxel rëbaman loj ree xbejnman:

—Zadxin dxej guiëndi guguaadi Bén guxhaal Dios majsi tibdxexji, per ad zuguaatidi laaman. ²³ Abi' yu' reeman na lëjt: “Laaman za' guie”, o “Laaman za' ni” ya, ad bal chinalidi laa reeman. ²⁴ Din zi'c chi rë'p nijs rulaan bacha' guidib xanyabaa, zian gac chi gui't Bén guxhaal Dios loj guidxliuj. ²⁵ Per yalojxgaj sagdiajman abi' ad zënt ree bén riga' yan laaman. ²⁶ Zi'c goc gulal chi guban Noé, zian gac chi gui't Bén guxhaal Dios. ²⁷ Din nadxel gudaw ree bejn, gu' reeman, baxhliaa reeman badëë tëë xi'n reeman baxhliaa xt chi bidxin dxej guyu Noé lën barcwro' ni beenman, abi' guzuloj guiadoxh ni bagüjt gra reeman. ²⁸ Ziangajc gojc chi guban bén brii laj Lot, gudaw ree bejn, gu' reeman, bato' reeman, guzii reeman, guxübin reeman been tëë reeman yu ree. ²⁹ Per chi brii Lot luguiedx Sodoma, guzuloj biyajb guij xanyabaa në azufre, abi' güjt gra reeman. ³⁰ Ziangajc gac dxej ni gui't Bén guxhaal Dios.

³¹ 'Dxej ni gac zian, bén yë'p guijc yu ad zaguiajtaman chiglëë ni nagu'man lëñü. Abi' bén za' dajn, ad zayejct lidxaman. ³² Gol basaaladx ni guzac lacheel bén brii laj Lot. ³³ Bén mazri rën guialnaban rajpaman loj guidxliuj guie, zadxin dxej gunijtaman laan, per bén guiët por naj, zajpaman guialnaban tiblayaa con Dios.

³⁴ 'Naj rni lëjt, guxhinzii lod naga' tio'p bejn tijbzi loj loon, tijbaman sa zatijbaman yaya'n. ³⁵ Guiáad lod cayojt tio'p ree béngunaa, tijbaman sa zatijbaman yaya'n. ³⁶ Abi' lod za' tio'p ree xinguaaw dajn, tijbix sa zatijbix yaya'n.

³⁷ Chi biguejn ree xbejnman zian, rëb reeman:

—¿Ban guin, Dad?

Badxi'man laan rëbaman:

—Laa guiguien gajc ban guinan, zi'c chi rado'p ree golbich laa rguien gajc naga' tijb begüt.

18

Xcwent tijb béngunaa bizëjb në tijb juejs

¹ Be Jesús tijb cwent loj ree xbejnman, persi balüüman laa reeman guial zianczi rayal cwedx guiniab reeman Dios ad zadxagtci reeman. ² Abi' rëbaman loj reeman:

—Guyu tijb guiedx lod guyu tijb juejs, ad rdxebtaman Dios ad ridxga' tëëtaman bejn ree. ³ Luguiedx ziigajc zojb tijb béngunaa bizëjb, rniabaman loj juejs guin din güünman gualguxtis gagnëman laaman loj bén rdxe'ch laaman. ⁴ Xchej ad bidxga't juejs guin béngunaa bizëjb guin, per zianz laagajcaman been xgab naladxaman: “Majsi ad rdxebtan Dios ad ridxga' tëëtan bejn ree, ⁵ per béngunaa guie ad rucwëëzt ruslenman naj. Zagdxeli naj günan laaman yudar chitëë ri'traman naga gad da pacensan chigra.”

⁶ Dxel rëb Jesús loj reeman:

—Zian gunee juejs mal guin. ⁷ Diidxgui Dios, ¿nid zagnëman bén guleman ya bén rbejdx rniab ree laaman dxej guiaal? ¿Wen zaglaa gagnëman laa reeman ya? ⁸ Naj rni lëjt guial ad zaglaat gagnëman laa reeman. Per chi gui't Bén guxhaal Dios, ¿chuj ni zadxaaglojraman bén riladx Dios loj guidxliuj ya?

Xcwent bénfarisew con Bén ruquijx impuest

⁹ Be Jesús zatijb cwent par ree Bén naladx tijbzi laa reeman naj benza'c guial loj ree ben ren, rëbaman:

¹⁰ —Tio'p ree xinguaaw wej lën yadooro' Jerusalén persi gurejdx gunab reex Dios, tijbix naj xinfarisew, zatijbix naj xin ruquijx impuest.

¹¹ Xin farisew guin, za'lix cabejdx canabix Dios, rëbix: “Quixtëë runen lojl, Dad, guial ad najtan zi'c ree ben ren, naj reeman béngubaan, benmal, Bén za'në béngunaa ren, ni'qui zi'c naj Bén ruquijx impuest guin.

¹² Rba'nán tio'p volt lën xuman, abi' gra ni rünan gan rünanan chii lala' persi runen tijban lojl.” ¹³ Per xin ruquijx impuest guin, zijt za'x abi' ni'quid rayaxtix guilies lojx, rga'p luxdoox rëbgajx: “¡Dios, baya naj najn tijb xindol!” ¹⁴ Naj rni lëjt guial xin ruquijx impuest guin ma been Dios laax perdon chi bayejc lidix, per xin farisew guin ad beentaman laax perdon. Din Bén rlies xvalor gajc achet lasajcaman loj Dios, guiáad Bén rüjn naya laaman mazri lasajc loj Dios.

Rüjnle' Jesús xindoo ree

(Mt. 19:13-15; Mr. 10:13-16)

¹⁵ Binë ree bejn xindoo ree lod za' Jesús din gudxiib yaaman guijc reex, per chi baguiaa ree xbejnman guzuloj cadilë reeman Bén zinë ree laa reex. ¹⁶ Per gurejdx Jesús laa reeman, rëbaman loj reeman:

—Gol badëë mod gui't reex lon, ad bal rudxoondi, din lod rniabee Dios naj par ree Bén naj zi'c laa reex. ¹⁷ Din naj rni lëjt, Bén ad riladxt xgualrniabee Dios zi'c tijb xindoo, ad zile't chu'man loj xgualrniabee Dios.

Xcwent tijb xin rijcw

(Mt. 19:16-30; Mr. 10:17-31)

¹⁸ Tijb xin rniabee, gunabdiidx loj Jesús rëbix:

—Mextrza'c, ¿xhie rayal günan din ga'pan guialnaban tiblyaa con Dios?

¹⁹ Badxi' Jesús laan, rëbaman:

—¿Chexc zeel nal lon benza'c? Achut naj benza'c, tijbzi Dios. ²⁰ Lüy rajc ree mandamient: “Ad sunël béngunaa ren, ad gugüjtil bejn, ad cwanl, ad cwëël xtiidx bejn, gojp respejt xdad xniala.”

²¹ Dxel rëbix loj Jesús:

—Gra ree ni guin cayünan diizd xindoon.

²² Chi biguiejn Jesús zian, rëbaman:

—Yu' zatijb ni ryaadx güünl: bigto' gra ni rajpil dxel gudëël milia guin loj ree Bénprob. Zian gapil guialnaza'c xanyabaa, dxel gui'til guidnalil naj.

²³ Chi biguiejn xin guin zian, dád guyunayax guial dád xinrijcwan.

²⁴ Chi baguiaa Jesús guial dád yu'nayax, rëbaman:

—¡Dád nawëëg naj chu' benrijcw loj xgualrniabee Dios! ²⁵ Adli nawëëgt téd tijb camell xan gagux, guial chu' tijb Bén rijcw loj xgualrniabee Dios.

²⁶ Abi' ree Bén biguiejn ni rëb Jesús, rëb reeman:

—¿Chu za zajc laa loj xcasti Dios?

²⁷ Dxel rëbaman loj reeman:

—Yu' ni ad zajct güün bénguidxliuj, per Dios graczan zajc güünman.

²⁸ Dxel rëb Béd lojman:

—Dad, ma basa'nán graczi ni raya'pan persi zudnaalan lüy.

²⁹ Zianz rëb Jesús:

—Diidxliczi rnin lojdi, chutëéz bén rusa'n lidx, lacheel, bijch, o xdad, o xniaa, o xi'n guial rúnman zi'c rniabee Dios, ³⁰ mazri zien ni tia'man loj guidxliuj guie. Abi' zajpaman guialnaban tiblyaaa con Dios.

Rugojn Jesús zatijb guial guiétaman

(Mt. 20:17-19; Mr. 10:32-34)

³¹ Gurejdx Jesús guidxiptio'p ree xbejnman tibladd, abi' rëbaman loj reeman:

—Yan, ziyo' ree Jerusalén lod gac zi'c bacaa ree bén badëë xtiidx Dios loj ree bejn xcwent Bén guxhaal Dios. ³² Yayü reeman laaman loj ree benzit, guze' reeman laaman, guiniee reeman laaman ni rëntzi reeman, abi' gucojpx xhiejn reeman lojman. ³³ Quin reeman laaman dxel gugüjt reeman laaman, per ni yayon dxej yabanman.

³⁴ Per laa reeman ad bignia'tczi reeman ni rëbaman, ad ragbee tëët reeman chexc zeel rëbaman zian din ad bile't nignia' reeman xhie rën guiëb ni guneeman.

Rayajc guiaaloj tijb bénlutia'p

(Mt. 20:29-34; Mr. 10:46-52)

³⁵ Chi ma cadxin Jesús gajxh guiedx Jericó, tijb bénlutia'p, zojbaman cwë' nejj rniabaman carda. ³⁶ Chi gogbeeman cadëd zien ree bejn, gunabdiidxaman xhie cayajc. ³⁷ Abi' rëb reeman lojman guial Jesús bén Nazaret cadëd niz yagaj. ³⁸ Dxel gurixdiajman rëbaman:

—jJesús, xdiaa Davi, baya naj!

³⁹ Bén ned ree rdilë reeman laaman din gucwëéz ro'man, per mazri rbixdiajman, rëbaman:

—jXdiaa Davi, baya naj!

⁴⁰ Dxel guzudxe Jesús abi' gunabeeman bica' reeman laaman. Chi bidxinman gajxh lojman, gunabdiidxaman lojman, rëbaman:

⁴¹ —¿Xhie rënl günan por lüj?

Badxi'man laan rëbaman:

—Dad, rënan yani lon.

⁴² Dxel rëb Jesús lojman:

—jMa zile' guguaal! Ma bayajquil guial bililadxil naj.

⁴³ Hor guin gajc bani loj bén guin, abi' binalaman Jesús rudëëman quixtëë loj Dios. Në gra ree bén baguiaa ni goc rudëë quixtëë loj Dios.

19

Wej Jesús lidx Zaqueo

¹ Guyu Jesús luguiedx Jericó abi' guzuloj cadëdaman luguiedx guin. ² Yagaj zojb tijb benrijcw laman Zaqueo. Laaman rniabee ree bén ruquijx impuest. ³ Rën Zaqueo guin güünbeeman Jesús, per ad rilet' guguaaman laaman guial dád zien ree bejn abi' laaman najman bendop. ⁴ Zeel ruxüünman gunedaman, abi' din chile' guguaaman Jesús, wë'paman loj tijb yagro' zojb gajxh lod téd Jesús. ⁵ Chi gudëd Jesús yagaj, gules lojman abi' rëbaman lojman:

—Zaqueo, cari baguiajt, din yandxej naj yaya'nan lidxil.

⁶ Dxel cari da't baguiajt Zaqueo, abi' dád rabaaman zignëman Jesús. ⁷ Chi baguiaa ree bejn zian, gra reeman guzuloj caneeguijdx Jesús rëb reeman zigya'nman lidx tijb béndol. ⁸ Dxel guzuli Zaqueo, abi' rëbaman loj Jesús:

—Dad, gagui's garol ni ra'pan loj ree bénprob. Abi' bal yu' bén baquixan mazri guial loj ni naj quixaman, yayünan tajp volt mazri guial loj ni gulaanan.

⁹ Dxel rëb Jesús lojman:

—Yandxej ma been Dios perdon gra ree bén zojb lidx Zaqueo guial rililadxaman Dios zi'cgajc Abraham. ¹⁰ Din Bén guxhaal Dios zëédaman zidgadiilaman bén ad zèt ree loj xnejz Dios din laa reeman loj xcasti Dios.

Xcwent milia

¹¹ Bén cucaagdiajg ree ni canee Jesús, beman tijb cwent loj reeman guial ma zè reeman gajxh Jerusalén abi' laa reeman naladx reeman guial hor guin guidxin xguialrniabee Dios. ¹² Dxel rëbaman loj reeman:

—Guyu tijb bejn, zëédaman loj tijb famil zojbloj. Zëman zijt lod tia'man guialrniabee din gacaman rey dxel yayejcaman nabee ladxaman. ¹³ Chi gadaman grii gurejdxaman chii xmojsaman abi' loj tijbgaj reex badëëman zro' milia, zianz rëbaman loj reex: “Gol beennë milia guin dxiin xt chi guidxin dxex yaguialan.” ¹⁴ Per ree bén ladxaman guial rdxe'ch reeman laaman, guxhaal reeman tibcwaaw ree bén zinal laaman persi biguiedx reeman guial ad rënt reeman gac bén guin xrey reeman. ¹⁵ Per laaman bazuj reeman gacaman rey, abi' bayejc ladxaman. Chi badxinman dxel gunabeeman bignee reeman mojs badëëman milia guin din gagbeeman plac ma been tijbgaj reex gan. ¹⁶ Mojs bidxin yaloj rëbix: “Dad, milia ni baneel ma beenan gan chii volt mazri.” ¹⁷ Dxel rëb rey guin lojx: “Zagdxen mojsza'c, ma beenl zi'c rayal. Abi' guial beenl zi'c rayal con ta'nzi ni banen, yan guzun lüj nabeel chii guiedx.” ¹⁸ Chi bidxin mojs barojp guin, rëbix: “Dad, milia ni baneel lon ma beenan gan gaay volt mazri.” ¹⁹ Ziangajc rëb rey guin loj mojs guin: “Lüj nabee gaay guiedx.” ²⁰ Dxel bidxin zatijb mojs guin abi' rëbix: “Dad, laa xmilial guie, badxe'chaawanan lën tijb baydoo, ²¹ din bidxeban lüj guial ad rayatil bejn. Raca'l ni ad najt xieenl abi' rato'pil guialnaza'c lod ad guxübintil.” ²² Dxel rëb rey guin: “Mojs guijdx por xtiidxgajquil rayalil casti. Bal ragbeel guial ad rayatan bejn, abi' raca'n ni ad najt da xieenan ratop tëen guialnaza'c lod ad guxübintan. ²³ ¿Chexc ad badëëtäl da milian nigui'n bejn din chi naguialan naca'nan con guidib xi'nan?” ²⁴ Dxel rëb rey guin loj ree bén za' yagaj: “Gol baca' milia zii lojx, gol badëëdan loj xin ca' mazran.” ²⁵ Abi' rëb reeman loj rey guin: “Dad, per ma ca'x zro'n.” ²⁶ Badxi'man laan rëbaman: “Bén rajp zro', zaca'man mazri, per bén rajp ta'nzi, xt ta'n ni rajpaman chiquied lojman. ²⁷ Abi' ree bén rdxe'ch naj bén ad guyënt ree niajcan rey, gol tanë reeman guie, gol bagüjt reeman lon.”

Ru Jesús Jerusalén

(Mt. 21:1-11; Mr. 11:1-11; Jn. 12 :12-19)

²⁸ Chi gulox rëb Jesús zian, dxel basnuu zëman Jerusalén. ²⁹ Chi bidxinman gajxh guiedx Betfagé con Betania, në gajxh guia' la Olivos, dxel guxhaal tio'p ree xbejnman, ³⁰ rëbaman loj reeman:

—Gol chej guiedxdoo riga' guin, chi guidxindi guidxaaglojdi tijb burquie'n, caduub, achut wabib laab. Gol guxhiequib gol tanëb. ³¹ Abi' bal chu guiniabdiidx lojdi chexc zeel rxhiequidi laab, gol güjdx Dad Jesús cayaadx laab.

³² Wej ree bën guxhaalaman bidxaagloj gajc reeman zi'cgajczi rëb Jesús loj reeman. ³³ Abi' chi caxhieci reeman bur guin, gunabdiidx ree bën naj xbur laab, rëb reeman:

—¿Chexc zeel caxhiequidi bur guin?

³⁴ Badxi' reeman laan, rëb reeman:

—Din Dad Jesús cayaadx laab.

³⁵ Dxel binë reeman bur guin lod za' Jesús, zianz badxiib xab reeman xijchib abi' been reeman laaman yudar persi gudxibaman laab. ³⁶ Abi' ree bejn rguijxh xab reeman lunejz lod zë Jesús. ³⁷ Chi ma zë reeman gajxh laguiajt ni naj guia' la Olivos, gra ree bën zinal Jesús guzuloj rbixdiaj reeman guial dád rabaa reeman abi' ruza't reeman Dios zagdxex por gra ree milagr ni ma baguiaa reeman. ³⁸ Rëb reeman:

—¡Nüjnle! Dios bën zëed por laaman! ¡Yu' guialrabaa xanyabaa! ¡Ben-za'c bendxoon naj Dios bën yu' xanyabaa!

³⁹ Dxel ree bënfarisew no'ch loj ree bën zinal laaman, rëb reeman lojman:

—Mextr, gudilë ree bën guin chitëë rniee reeman zian.

⁴⁰ Per badxi'man laan rëbaman:

—Naj rni lëjt, bal yacwëez ro' reeman, guiaj ree cwixdiaj zian.

⁴¹ Chi bidxinman gajxh Jerusalén, dxel baguiaaman guiedx guin, zianz biinman por laan. ⁴² Rëbaman:

—¡Bën Jerusalén, xi nix majsi yandxejzi yayagbeedi chu yabe'cdxe luxdoodi! Per yan naguie'ch najn par lëjt, ad zile't chignia'di laan. ⁴³ Din guidxin dxej ni güün ree bën rdxe'ch lëjt tijb ze' gadëd ladxidi, abi' gra lad gusiaaw reeman lëjt, ⁴⁴ gugüjt reeman lëjt. Dxel gunijt reeman ladxidi, ni'qui tijb guiaj ad zaya'nt guijc stijb guiaj, din ad bidxga'tidi hor ni bidganaj Dios lëjt.

Rabëë Jesús bën ruto' ree ro' yadooro' Jerusalén

(Mt. 21:12-17; Mr. 11:15-19; Jn.2 :13-22)

⁴⁵ Chi bidxin Jesús ro' yadooro' Jerusalén, guzuloj caybëëman bën cuto' ree në ree bën cazii, ⁴⁶ rëbaman loj reeman:

—Loj xtiidx Dios rëb: “Lidxan naj yu lod rbejdx rniab bejn Dios.” Per lëjt nüjndan zi'c lidx ree xingubaan.

⁴⁷ Guixie guixie rulüü Jesús bejn ree lën yadooro' Jerusalén, per ree bixhioz rniabee ree bixhioz con ree mextr rajc ley, në ree guxtis luguiedx guin raguiil reeman mod din gugüjt reeman laaman. ⁴⁸ Per ad radxejlt xhienaag güün reeman, din graczi ree bejn rucaagdiajg chaaw ni rulüüman laa reeman.

20

Xguialrniabee Jesús

(Mt. 21:23-27; Mr. 11:27-33)

¹ Lën ree dxej ni za' Jesús lën yadooro' Jerusalén, culüüman bejn ree xtiidx Dios, bidxin ree bixhioz rniabee ree bixhioz, con ree mextr rajc ley, në ree guxtis Israel, ² abi' rëb reeman lojman:

—Guna, ¿chu na güünl ni guin ree? ¿Chu banee gualrniabee lojl?

³ Badxi' Jesús laan, rëbaman:

—Ziangajc naj yu' tijb ni ganabdiidxan lojdi. Gol badxi'n: ⁴ ¿chu guxhaal Waj bidgaroobnijsaman bejn ree, Dios ya o bénguidxliuj?

⁵ Dxel guzuloj rëb loj lasa' reeman:

—Bal yaguie'ch ree Dios guxhaal laaman, zanaman. “¿Chexquiiza zeel ad bililadxtidi laaman?” ⁶ Abi'za bal yaguie'ch ree bénguidxliuj guxhaal laaman, zugüjt ree bejn dunuj ree con guiaj din gra reeman riladx guial Waj gojc bën badëë xtiidx Dios loj ree bejn.

⁷ Abi' badxi' reeman laan rëb reeman guial ad ragbeet reeman chu guxhaal Waj bidgaroobnijsaman bejn ree. ⁸ Dxel rëb Jesús loj reeman:

—Ni'qui naj ad zanitan lojdi chu banee guialrniabee günan ni guin ree.

Xcwent ree mojs guiidx

(Mt. 21:33-44; Mr. 12:1-11)

⁹ Dxel guzuloj cayü Jesús tijb cwent loj ree bejn, rëbaman:

—Guyu tijb bejn guxübinman uv ree loj xguiniaaman, dxel badëëman laan garol loj ree bën güün dxiin lojn, zëtaman zijt. ¹⁰ Chi bidxin dxex yala' reeman uv guin, guxhaalaman tijb xmojsaman chigxiix ni rayalaman, per ree bën rüjn dxiin loj guiniaa guin gudijn reeman mojs guin abi' badxi' reeman laax zezi. ¹¹ Dxel guxhaalaman mojs ren, per nëgajc mojs guin gunee reeman ni rëntzi reeman, gudijn reeman laax abi' badxi' reeman laax zezi. ¹² Zianz guxhaalaman zatijbix, per gudiilguiidx reeman laax abi' babëë reeman laax loj guiniaa guin.

¹³ 'Dxel rëb bën naj xguidxliuj laan: “¿Xhienaag günan yan? Gaxhal da xi'n'an xin rën da'tan, wed zajp reeman laax respejt.” ¹⁴ Per chi baguiaa ree bën guin laax, rëb loj lasa' reeman: “Xin guinan naj xin yaya'nnë guidxliuj guin. Yagüjt reex din gacan du xieen ree.” ¹⁵ Dxel babëë reeman laax loj guidxliuj guin, bagüjt reeman laax.

Zianz gunabdiidx Jesús loj ree bën caneenëman, rëbaman:

—Yan, ¿xhie naladxidi güünnë bën naj xguidxliuj laan bën guin ree? ¹⁶ Naj rni lojdi guial zi'taman din gugüjtaman bën guin ree dxel gudëëman guidxliuj guin loj ree ben ren.

Chi bigueijn reeman zian dxel rëb reeman:

—¡Gagnë Dios ad zajct zian!

¹⁷ Per Jesús baguiaaman loj reeman, abi' rëbaman:

—Bal id zajc zian ¿xhieza rën guiëb ni ca loj xtiidx Dios? Lod rëb:

Guiaj ni gulëëgo'n ree bën rüjn yu, laan naj ni mazri been sirv gojcnë yu guin.

¹⁸ Chutëëz bën yab guijc guiaj guin, gacaman zi'c tijb ni riroox, guiáad bal yab guiaj guin guijcaman, gacaman zi'c tijb ni ryüüdëj.

Xcwent impuest

(Mt. 21:45-46; 22:15-22; Mr. 12:12-17)

¹⁹ Bixhioz rniabee ree bixhioz con ree mextr rajc ley, hor guin gajc guyën reeman niniaaz reeman Jesús guial gogbee reeman cuza'taman laa reeman, per bidxeb reeman bejn ree. ²⁰ Abi' guxhaal reeman bën zigla'ch ree laaman din güünzi reeman guial gulüü naj reeman benza'c, din yaguüil reeman mod guiniee Jesús diidx ni gudxiib reeman guijc, din chile' yayü reeman laaman loj gobernador Rom. ²¹ Dxel gunabdiidx reeman lojman, rëb reeman:

—Mextr, dunujn rayagbee guial rnieel rulüü tëël zi'c rayal, din par lüj tiblojzi naj bejn, abi' walil rulüül guial xhienaag rën Dios guiban bejn.

²² ¿Zagdxen ya radijxan impuest loj rey César, o ad zagdxetan?

²³ Per gogbee gajc Jesús xgab mal ni cayüjn reeman abi' rëbaman loj reeman:

²⁴ —Gol balüü tijb cintabl lon. ¿Chu loj ca lojn chu tëë laj ca lojn?

Badxi' reeman laan, rëb reeman:

—Loj rey César ca lojn në lajman.

²⁵ Dxel rëbaman loj reeman:

—Gol badëcliza loj rey César ni naj xieen César, guiáad loj Dios gol badëë ni naj xieen Dios.

²⁶ Abi' gra ni guneeman niz loj ree bejn, achetri badxejl nudxiib reeman guijc din niniaaz reeman laaman. Badxali loj reeman ni guneeman abi' achetri rëb reeman.

Xcwent guialyaban ree bengüt

(Mt. 22:23-33; Mr. 12:18-27)

²⁷ Tio'p choon ree bénsaducew bignaj Jesús, bénsadusew guin ree ad rliadxt reeman guial yaban ree bengüt, zeel rëb reeman loj Jesús:

²⁸—Mextr, loj xley Moisejs rëb guial bal guiët tijb xinguaaw abi' achut xi'nix guyu con lacheelix, bijch xingüt guin guxhlianë béngunaa bizëjb guin din chu' xi'n reex zi'c gulüü xi'n xin güt guinan. ²⁹ Guyu tijb famil lod goc reex gajdx bijch. Baxhliaa xin yaløj guin, per güjtix abi' ad guyut xi'n reex con lacheelix. ³⁰ Dxel bijch barojpax baxhlianë béngunaa guin, per güjtgaquix ad guyu gajct xi'n reex. ³¹ Zianz baxhlianë xin bayon guin béngunaa bizëjb guin, zianz baxhlianëman guigajdx reex abi' gra reex güjt achut xi'n reex guyu con laaman. ³² Ni bigratë në béngunaa guin güjt. ³³ Yan, chi yaban ree bengüt, ¿chu loj guigajdx reex gac xbéngunaa laaman guial gra reex baxhlianë laaman?

³⁴ Dxel rëb Jesús loj reeman:

—Loj guidxliuj guie ruxhliaa ree bejn abi' rudëed xi'n reeman ruxhliaa. ³⁵ Per ree bén yaban zatijb, bén rayal ree gap guialnaban tiblyaa con Dios, ad zuxhliaatri reeman ad zudëë tëëtri xi'n reeman guxhliaa, ³⁶ din ad zëjttri reeman, gac reeman zi'c ree xianjl Dios. Gac tëë reeman xi'n Dios guial ma baban reeman. ³⁷ Abi' xcwent ni yaban ree bengüt, xt Moisejs rëb zian tiblajt loj xtiidx Dios lod rëbaman guial baguiaaman yag ni caye'c. Yagaj rëb Dios lojman guial Dios naj xDios Abraham, xDios Isaac, në xDios Jacob. ³⁸ Din Dios ad najtaman xDios ree bengüt, najman xDios ree bén naban, din par laaman gra ree bejn naban.

³⁹ Dxel yu' ree mextr rajc ley, rëb lojman:

—Mextr, zagdxequi guneel.

⁴⁰ Abi' achetri bayax reeman niniabdiidx reeman lojman.

Chu loj xdiaa zëed Cristo

(Mt. 22:41-46; Mr. 12:35-37)

⁴¹ Rëb Jesús loj ree bejn:

—¿Chexc zeel rëb ree bejn guial zëed Cristo loj xdiaa rey Davi? ⁴² Awa Davi guin gajc guneel loj libr Salmos, rëbaman:

Dios rëb loj dux Dad ree:

“Gurej da ladbeen,

⁴³ xt gabecan xin rdxe'ch ree lüj guia'l.”

⁴⁴ Yan, bal xi'n Davi naj Cristo. ¿Chexquiza zeel rëb Davi guin lojman Dad?

Ni rüjn ree mextr rajc ley

(Mt. 23:1-36; Mr. 12:38-40; Lc. 11:37-54)

⁴⁵ La'tgaj cucaagdiajg gra ree bejn ni rëb Jesús, rëb loj ree xbejnman:

⁴⁶ —Gol gojp cudad con ree mextr rajc ley. Din ruladx reeman sa reeman gacw reeman lajd zagdxe ruladx tēē reeman gugajpdioz ree bejn laa reeman con respetj niz lunejz, abi' lēn ree yadoo ruladx reeman cwe reeman lod rbej ree bēn zojbloj, ziangajc rūjn reeman lod ritaw reeman. ⁴⁷ Raca' tēē reeman lidz ree bēngunaa bizējb, abi' din guiēb ree bejn guial benza'c naj reeman, dád xchej rbejdx rniab reeman Dios. Per laa reeman mazri casti narooob yayal reeman.

21

Gon badēēd tijb bēngunaa bizējb
(Mr. 12:41-44)

¹ Chi culūū Jesús bejn ree lēn yadooro' Jerusalén, dxel gules lojman baguiaaman cagu' ree benrijcw gon lēn alcancia. ² Baguiaa tēēman tijb bēngunaa bizējb prob, cagu'man tio'p cintabldoo lēn alcancia guin. ³ Dxel rēb Jesús loj ree xbejnman:

—Diidxli rnin lojdi guial bēn bizējb prob guin mazri lasajc gon badxe'man guial loj gon badxe' gra ree bēn guin. ⁴ Din graczi reeman rudxe' ni rūjn laa reeman sobr, per laaman majsi najman bēnprob, badxe'man graczi ni rajpaman par guibannēman.

Rēb Jesús guial yaze'n yadooro' Jerusalén
(Mt. 24:1-2; Mr. 13:1-2)

⁵ Tio'p choon ree xbejn Jesús cayū reeman diidx xcwent ree guiaj zagdxe najchaawnē yadooro' Jerusalén, nē ree ni lasajc ni rudēēd ree bejn par suchaaw yadoo guin. Dxel rēb Jesús loj reeman:

⁶ —Gra ni cuguiaadi yan, zadxin dxej ni'qui tijb guiaj ad zaya'nt guijc stijban, gran yaze'n.

Ni gac chi gad guidxliuj nit
(Mt. 24:3-28; Mr. 13:3-23)

⁷ Dxel gunabdiidx reeman lojman rēb reeman:

—Mextr, ¿goc gac zian? ¿Xhie ree sen gac chi ma zidyob gac zian?

⁸ Zianz rēb Jesús loj reeman:

—Gol gojp cudad achu gusquiee lējt. Din zien ree bēn gui't guiēb reeman guial por naj zēēd reeman guiēb tēē reeman: “Naj naj Cristo”; o “Ma zidyob dxej gui'taman.” Per ad chililadxidi laa reeman. ⁹ Abi' chi guiguiejndi cayajc wadijl o chas ree bejn contr xguxtis reeman, ad guidxebidi din yaloj gac zian. Per ad por laatan ma bidxin dxej nit guidxliuj.

¹⁰ Rēb tēē Jesús loj reeman:

—Til nacion con stijb nacion, til tēē bēn rajp gualrniabee con stijb bēn rajp gualrniabee, ¹¹ gui't tēē xudoxh, nē gubijn, nē gualguijdxdoxh niz ni niz guie abi' xanyabaa guiguieen ree ni nadxeb.

¹² Per chi gad gra ree ni guin gac, guiniaaz ree bejn lējt din gusagzi reeman lējt, chinē reeman lējt lēn ree yadoo din gudēēd reeman lējt casti, cu' reeman lējt ladxguuib chinē tēē reeman lējt loj ree rey nē loj ree gobernador guial najdi da bejnan. ¹³ Zian gac din chile' gūdi da diidxan loj reeman. ¹⁴ Ad aal chu'di xgab xhie guiēbidi loj reeman. ¹⁵ Din naj gune diidx ni guinee di gune tēēn quiarguejn. Abi' ni'qui tijb bēn rdxe'ch lējt ad zūjnt gan loj xtiidxidi ad zanee tēēt reeman contr lējt. ¹⁶ Per lējt xt xdadidi o xniaadi, o bijchidi o xfamilidi o xmiwidi yayū reeman lējt,

abi' yu'di gugüjt reeman. ¹⁷ Gra bénguidxliuj guidxe'ch lëjt guial najdi da bejnan. ¹⁸ Per ni'qui tijb guidxguijquidi ad zanijt por zian. ¹⁹ Abi' bal sudxi'chidi loj xnejz Dios, zajpidi guialnaban tiblayaa con Dios.

²⁰ 'Chi guguaadi nayaw ree suldad Jerusalén, ma qui nit guiedx guin. ²¹ Dxejzii ree, bén za' ree niz Judea, gol bigxüün niz dajn ree, abi' ree bén za' guiedx Jerusalén gol brii luguiedx guin, guiáad ree bén za' dajn ad bal yayudi luguiedx guin. ²² Din dxej guin ree gudëed Dios bejn ree casti din gac cumplid zi'c ca loj xtiidxaman. ²³ ¡Probza ree béngunaa nüü xi'n o béngunaa ca' ree xindobëz lën ree dxejzii! Din dád sagdiaj ree bejn abi' dád casti narooob yayal ree bénluguiedx guin. ²⁴ Yu' ree bén guiët loj wadijl yu' tëe reeman guiniaaz reeman chinë naguiejn reeman laa reeman nacion rent nacion ren ree. Abi' ree benzit zanabee reeman Jerusalén xt yayaaloj dxej ni tiëb Dios nabee reeman yagaj.

Gui't Bén guxhaal Dios zatijb

(Mt. 24:29-35, 42-44; Mr. 13:24-37)

²⁵ 'Dxel gac sen loj gubijdx, con loj bëew, con loj ree bajl xanyabaa. Abi' loj guidxliuj gagdxa ree bejn guidxeb tëe reeman guial gac naquie' loj nijsdoo gac tëe naquie' por xtüjp nijs. ²⁶ Abi' ree bejn xt yadaj reeman guial guidxeb reeman chi güün reeman xgab ni gac loj guidxliuj, guiáad ree ni rguien xanyabaa guiniib reen. ²⁷ Abi' guguaa reeman Bén guxhaal Dios, rdiinman bacha' zëedaman loj zaj con xguialrniabeeman. ²⁸ Chi suloj gac ree ni guin, gol bagu' luxdoodi zagdxe gol gules tëe lojdi din ma zidyob dxej ni laadi loj casti.

²⁹ Rëb tëe Jesús loj reeman:

—Gol baguaa yag higo o xhietëez zatijb yagan. ³⁰ Chi ma caydxib ree xbalagan, lëjt ragbee guial ma zëed tiamp nalaa. ³¹ Ziangajc chi guguaadi ma cayajc ree ni guin, zagbeedi guial ma zëed xguialrniabee Dios gajxh.

³² 'Diidxli rnin lojdi guial gra ree ni guin gac chi gad gra ree bén naban yan guiët. ³³ Guidxliuj në xanyabaa zanijt reen, per da diidxan ad zadëdt gacan cumplid.

³⁴ 'Gol gojp cudad ad güün graloj ni riga' loj guidxliuj guie lëjt gan, zi'c guial rzüdx, në guial ru xgab por ni ryaadxidi par guibandí din chi guialan zatijb, ad gac dxej guin par lëjt ³⁵ zi'c tijb tramp. Din zian gac dxej guin par gra ree bénguidxliuj. ³⁶ Gol guzujsin, guixie guixie gol gurejdx gunab Dios din gac laadi loj gra ree ni gac loj guidxliuj din chile' tëe sudi loj Bén guxhaal Dios.

³⁷ Radxe rulüü Jesús bejn ree lën yadooro' Jerusalén guiáad guxhin raya'nman ruguia' la Olivos. ³⁸ Abi' rsildoo rej gra ree bejn lën yadoo guin ricaagdiaj reeman ni rnieeman.

22

Baya'n reeman diidx xhienaag guiniaaz reeman Jesús

(Mt. 26:1-5, 14-16; Mr. 14:1-2, 10-11; Jn. 11 :45-53)

¹ Chi ma zidyob lanij pascw, chi raw reeman guiadxtil ni ad yu't levadur. ² Bixhioz rniabee ree bixhioz con ree mextr rajc ley, raguiil reeman mod xhienaag gugüjt reeman Jesús guial rdxeb reeman bejn ree.

³ Dxel guyu xindxab luxdoo tijb ree xi apóstoles Jesús, bén la Judas Iscariote. ⁴ Judas guin bigneenë bixhioz rniabee ree bixhioz con ree

bén rniabee bén rajp ree yadooro' Jerusalén, abi' benëman laa reeman diidx xhienaag yayüman Jesús loj reeman. ⁵ Dád babaa reeman abi' rëb reeman guial gudëed reeman milia lojman. ⁶ Zianz cwëjbaman, dxel guzuloj raguuilaman mod xhienaag yayüman Jesús, guial ad zagbeet ree bejn.

Gudawnë ree xbejn Jesús xche

(Mt. 26:17-29; Mr. 14:12-25; Jn. 13 :21-30; 1Co. 11 :23-26)

⁷ Chi bidxin lanij pascw, tijbgaj yu raw ree bejn guiadxtil ni ad yu't levadur rugüjt tée reeman tijb xiil, ⁸ dxel guxhaal Jesús Béd con Waj, rëbaman loj reeman:

—Gol biguieen ni yadaaw ree guxhin pascw.

⁹ Abi' gunabdiidx reeman lojman rëb reeman:

—¿Ban guin rën l yuguieenan laan?

¹⁰ Zianz rëb Jesús loj reeman:

—Chi chu'di luguiedx guin, guguaaadi tijb xinguaaaw ca'x tijb re yu' nijs. Gol chinalix xt lod yayux, ¹¹ gol güjdx loj bén naj lidxan: “Na mextr: ¿Con lënü gawnë ree xbejnman guxhin pascw?” ¹² Dxel gulüüman lëjt tijb lënü ni rarojp pijs, ma najcchaaw lënü guin. Yagaj gol been ni yadaaw ree xche.

¹³ Zianz wej reeman abi' bidxaagloj reeman gra zi'cgajczi rëb Jesús loj reeman. Dxel been reeman guialraw guin ni gaw reeman guxhin pascw.

¹⁴ Chi bidxin hor, Jesús con ree bén naj apóstoles gurej reeman xan mex.

¹⁵ Dxel rëbaman loj reeman:

—¡Diizd gocli rënan gawnë'n lëjt pascw guie, chi gad dxej guidxin gazaagdiajn abi' guiëtan! ¹⁶ Din naj rni lëjt guial ad yu'tri dxej gawnë'n lëjt, xt chi ma canabee Dios guidiblagaa.

¹⁷ Dxel cwa'man tijb cojp yu' vin, chi gulox badëëman quixtëe loj Dios, rëbaman loj reeman:

—Gol cwa' vin guie, gol gudi'san loj gradi. ¹⁸ Din diidxli rnin lëjt, ad yu'tri dxej guië'n vin xt chi ma canabee Dios guidiblagaa.

¹⁹ Dxel cwa'man guiadxtil badëëman quixtëe loj Dios, zianz gula'man laan, gudi'saman laan loj reeman, rëbgajman:

—Guiadxtil guie naj da cuerpan ni ma bayün din guiëtan por lëjt. Chi güündi zian, gol been zian guial rusaaladixdi naj.

²⁰ Abi' ziangajc beenman con cojp ni yu' vin guin, chi gulox gudawaman xche, rëbaman:

—Vin guie naj da rejnan ni gaxhie'n chi guiëtan din guixal tijb nejz cüb xhienaag gap ree bejn perdon loj Dios.

²¹ 'Per yan bën yayü naj, laa yaaman xoob loj mex lod xoob gajc yan.

²² Per Bén guxhaal Dios, naj sagdiajman abi' guiëtaman. Per ¡proba Bén yayü laaman!

²³ Dxel guzuloj rniabdiidx loj lasa' reeman chu reeman yayü laaman.

Chu mazri zojbloj

²⁴ Dxel guzuloj reeman cadildiidx reeman chu loj gra reeman naj mazri Bén zojbloj. ²⁵ Per rëb Jesús loj reeman:

—Bén naj ree rey loj guidxliuj guie rniabee reeman Bén ladx reeman zi'ctzi rën reeman, abi' ree Bén rniabee, rëb reeman guial rüjn reeman ni zagdx. ²⁶ Per lëjt ad rayalt güündi zian, Bén mazri zojbloj lojdi rayal güün laagajcaman zi'c tijb Bén ad zojblojt. Guiáad Bén rniabee lojdi rayal

güün laagajcaman zi'c tijb mojs. ²⁷ ¿Chu naj mazri bën zobjbloj loj guidxliuj guie? ¿Bën rbej xan mex par gaw ya o bën rbe'c guialraw? ¿Nid bën rbej xan mex guin naj mazri bën zobjbloj ya? Guiáad naj za'n lojdi zi'c tijb bën rbe'c guialraw.

²⁸ Lëjtci za'në naj loj ree dxej cazaagdiajn. ²⁹ Zeel gunen guialrniabee lojdi zi'c banee da Dadanan lon, ³⁰ abi' gawidi loj da mexan lod ganabeen cwe tēedi loj ree yagxhil lod güündi guialguxtis loj gra ree bën za loj guidxiptio'p xdiaa Israel.

Rëb Jesús guial guiëb Bëd ad nünbeetaman laaman
(Mt. 26:31-35; Mr. 14:27-31; Jn.13 :36-38)

³¹ Rëb tēë Jesús:

—Simón, Simón, ma gunab xindxab lëjt din güünx lëjt prueb zi'c rbijb bejn trigo. ³² Per naj ma guredx gunaaban Dios por lüj chitëë cwëz chililadxil naj. Guiáad lüj chi yazudxi'chil loj ni rliladxil naj zatijb, gognë ree lasa'l din sudxi'ch reeman loj ni rliladx reeman naj. ³³ Dxel rëb Bëd lojman:

—Dad, ad zaro'nladxtan lüj majsi gayu'në'n lüj ladxguuib o xt guiëtnë'n lüj.

³⁴ Abi' rëb Jesús:

—Naj rni lüj Bëd, yan guxhin gajc chi gad guid cwidxa', choon volt mal rëbil ad nünbeetil naj.

Zidyob dxej sagdiaj Jesús

³⁵ Dxel gunabdiidx Jesús loj ree xbejnman rëbaman:

—Chi guxhalan lëjt sin bols, sin milia, në sin gurëch, ¿yu' ni biaadxidi ya?

Badxi' reeman laan rëb reeman:

—Achet.

³⁶ Dxel rëbaman loj reeman:

—Sa'n yan bën rajp milia në bols, gol cwa'n. Guiáad bën ad rajpt espad, gol bato' xabidi din siidi tijban. ³⁷ Din naj rni guial rüjn naguiejn gac zi'c rëb loj xtiidx Dios por naj, lod rëb: “Abi' nayabaman loj ree benmal.” Gra ni ca loj xtiidx Dios por naj, naj gacan cumplid.

³⁸ Dxel rëb reeman lojman:

—Dad, guie naca'n tio'p espad.

Badxi'man laan rëbaman:

—Zajquican.

Rbejdx rniab Jesús Dios lod la Getsemani

(Mt. 26:36-46; Mr. 14:32-42)

³⁹ Dxel brii Jesús zi'c naj xcostumbraman zëman ruguia' Olivos, abi' binal ree xbejnman laaman. ⁴⁰ Chi bidxin reeman yagaj, rëbaman loj reeman:

—Gol gurejdx gunab Dios, chitëë güün xindxab lëjt gan.

⁴¹ Abi' wejman zijt zi'ct lod rucaa bejn tijb guiaj, zianz bazuxibaman gurejdx gunabaman Dios, ⁴² rëbaman:

—Dad, bal tiëbil, babëë naj loj ni gazaagdiajn per ad gac zi'c rënan, rayal gac zi'c rënl.

⁴³ Dxel balüüloj tijb anjl guza xanyabaa lojman persi badëëman laaman gojl. ⁴⁴ Abi' chi cazagdiaj da'taman, mazri con gan cabejdx canabaman Dios ryajb tēë ree xnijs ragneeyaman luyuj zi'c rejn.

⁴⁵ Chi bisuman lod cabejdx canabaman Dios, bignaj ree xbejnman abi' chi badxinman cwè' reeman laa reeman naga'yèjs, guial yu'naya reeman. ⁴⁶ Zianz rëbaman loj reeman:

—¿Chexc zeel naga'yèjsidi? Gol bixche, gol gurejdx gunab Dios chitëë güün xindxab lëjt gan.

Gunaaz reeman Jesús

(Mt. 26:47-56; Mr. 14:43-50; Jn.18 :2-11)

⁴⁷ Sta caneenë Jesús Bén naj ree xbejnman chi bidxin ree benzien. Nè Bén brii laj Judas, Bén goc tijb ree xbejn Jesús, nedaman loj ree Bén guin abi' bibigaman loj Jesús gudawaman laaman xid. ⁴⁸ Dxel rëb Jesús lojman:

—Judas, ¿wen con tijb xid rayül Bén guxhaal Dios ya?

⁴⁹ Chi baguiaa ree Bén za'në Jesús ni cayajc, rëb reeman lojman:

—Dad, ¿zalëë dux espadan ya?

⁵⁰ Abi' tijb xbejnman gudilguijdxaman xmojs bixhioz rniabee gra ree bixhioz, gutü'man guidaig ladbeeman. ⁵¹ Per rëb Jesús loj reeman:

—Guzujr ree Bénan. Ma gojczy.

Dxel baqui' Jesús guidaig mojs guin abi' bayünman laan. ⁵² Zianz rëb Jesús loj ree bixhioz rniabee ree bixhioz, con ree Bén rniabee ree Bén rajp yadooro' Jerusalén con xguxtis ree Bén Israel, Bén bidxin ree par chinë laaman:

—¿Chexc zeel zëedidi con espad con yag din chinëdi naj zi'c tijb xingubaan? ⁵³ Guixie guixie guzunë'n lëjt lën yadooro' Jerusalén abi' ad gunaaztidi naj. Per yan ma bidxin xihoridi, hor ni nabee xindxab.

Rëb Bëd ad nünbeetaman Jesús

(Mt. 26:57-58, 69-75; Mr. 14:53-54, 66-72; Jn.18 :12-18, 25-27)

⁵⁴ Dxel gunaaz reeman Jesús zinë reeman laaman lidx bixhioz rniabee gra ree bixhioz, binal Bëd laaman zijt zijt. ⁵⁵ Yagaj gule'c ree Bén guin guij galay lule', abi' gurej reeman rudëj guin. Nè Bëd gurejnë laa reeman. ⁵⁶ Per tijb bëngunaa rüjn dxiin yagaj, chi baguiaaman Bëd zojbaman rudëj guin, baguiaaman lojman, abi' rëbaman:

—Nè Bén guin za'në Jesús.

⁵⁷ Per gurexuu Bëd, abi' rëbaman loj Bén guin:

—Ad nünbeetan laax.

⁵⁸ Ad gojct xchej chi baguiaa zatijb bejn laaman, rëbaman lojman:

—Nè lüj naj xbejn Jesús.

Badxi' Bëdan rëbaman:

—Yajqui dad, ad xbejntix naj.

⁵⁹ Gudëd cost tib hor, dxel rëb zatijb bejn:

—Nëczy Bén guie za'në laaman din nëman naj Bén Galilea.

⁶⁰ Zianz rëb Bëd:

—Ad ragbeetan xhienin rnieel.

Hor ni canee gajc Bëd zian guridxa' tijb guid. ⁶¹ Dxel badxi' loj Jesús baguiaaman loj Bëd, abi' basaaladx Bëd guial rëb Jesús lojman: “Yan guxhin gajc chi gad guid cwidxa', choon volt mal rëbil ad nünbeetil naj.”

⁶² Dxel barii Bëd yagaj, abi' dád naya biinman.

Baze' reeman Jesús gudijn tëë reeman laaman

(Mt. 26:67-68; Mr. 14:65)

⁶³ Bén cayajp ree Jesús, baze' reeman laaman gudijn tëë reeman laaman. ⁶⁴ Guxhii reeman lojman abi' gudijn reeman laaman, dxel rëb reeman lojman:

—¡Guneeya' chu gudin lüj!

⁶⁵ Abi' zien ree diidxguijdx rëb reeman lojman.

Za' Jesús loj ree guxtis Israel

(Mt. 26:59-66; Mr. 14:55-64; Jn.18 :19-24)

⁶⁶ Chi bareguiaal, badxajg lasa' ree guxtis Israel, në ree bixhioz rniabee ree bixhioz con ree mextr rajc ley, abi' binë reeman Jesús lod radxaag lasa' gra ree xguxtis reeman, dxel rëb reeman lojman:

⁶⁷ —Guna du lojn, ¿lüj naj Cristo ya?

Badxi'man laan rëbaman:

—Bal ganinan ad zaliladxtidi. ⁶⁸ Abi' bal xhie ganabdiidxan lojdi, ad zadxi'tidan. ⁶⁹ Per diizd yan, Bén guxhaal Dios cweman xladbee Dios, bén ca' gra gualrniabee.

⁷⁰ Dxel rëb gra reeman lojman:

—¿Lüjn naj Xi'n Dios ya?

Badxi'man laan, rëbaman:

—Waliquidi najcan.

⁷¹ Zianz rëb reeman:

—¿Xhie mazri rüjn naguiejn yadiil ree testiw? Dunuj gajc ree ma bagueijn ni nax con quijb xtiidxix.

23

Binë reeman Jesús loj Pilato

(Mt. 27:1-2, 11-14; Mr. 15:1-5; Jn.18 :28-38)

¹ Dxel wajs gra reeman binë reeman Jesús loj Pilato. ² Yagaj guzuloj cutedia' reeman Jesús lojman, rëb reeman:

—Badxaaglojn xin guie cusquieex bén du ladx ree, rëbix guial ad rayalt yadijx ree impuest loj rey César, rëb tëëx guial laax naj Cristo, naj tëëx rey.

³ Dxel gunabdiidx Pilato lojman rëbaman:

—¿Lüjn naj xrey ree bén Israel ya?

Badxi' Jesús laan, rëbaman:

—Waliquil, najcan.

⁴ Dxel rëb Pilato loj ree bixhioz rniabee ree bixhioz në loj gra ree bén riga' yagaj:

—Achet xfalt xin guie radxejlan.

⁵ Per laa reeman naguiejnczi rüjn reeman, rëb reeman:

—Cusquieex bejn ree guidib niz Judea con ree ni rulüux laa reeman. Guzulojx niz Galilea abi' yan cayüjnx zian niz guie.

Binë reeman Jesús loj Herodes

⁶ Chi biguiejn Pilato baza't reeman Galilea, gunabdiidxaman loj reeman bal niz Galilea naj ladx Jesús. ⁷ Abi' chi rëb reeman guial najman bén Galilea, guxhaalaman laaman loj Herodes bén rniabee Galilea, guial lën ree dxej guin në Herodes za' Jerusalén. ⁸ Chi baguiaa Herodes Jesús dád babaaman guial diizd gocli rënman guguaaaman laaman guial bacaagdiajgaman ruza't ree bejn laaman, abi' rbëzaman guguaaaman güünman tijb milagr. ⁹ Zien ree ni gunabdiidxaman lojman, per Jesús achetczi badxi'man. ¹⁰ Në ree bixhioz rniabee ree bixhioz za' yagaj

con ree mextr rajc ley, ad rucwëët rutedia' reeman laaman. ¹¹ Dxel Herodes con ree xsuldadaman xhiernarajc beennë reeman laaman, baze' reeman laaman, bascajcw reeman laaman lajd zagdxe lasa' ni rajcw ree rey. Zianz baxhaal Herodes guin laaman loj Pilato zatijb. ¹² Abi' dxejzii bazuloj baneenë Herodes Pilato zagdxe, din gocli rdxe'ch lasa' reeman.

Gunabee reeman guiët Jesús

(Mt. 27:15-26; Mr. 15:6-15; Jn. 18 :39–19 :16)

¹³ Dxel bachajg Pilato lasa' ree bixhioz rniabee ree bixhioz con ree guxtis, con ree bën luguiedx guin, ¹⁴ abi' rëbaman loj reeman:

—Bidnëdi xin guie nadi cusquieex bejn ree. Per niz lojdi ma gunabdiidxan lojx abi' achet xfaltix radxejlan zi'c nadi. ¹⁵ Ni'qui Herodes ad badxejlt xfaltix, zeel baxhaalaman laax lon zatijb. Ma baguiaalojdi achet ni mal beenx din guiëtix. ¹⁶ Yan, gudëdan laax casti dxel guslaan laax.

¹⁷ Lën ree dxej lanij guin ruslaa Pilato tijb bën yu' ladxguiib zi'c goc xcostumbr reeman. ¹⁸ Per graczi reeman guzuloj rbixdiaj, rëb reeman:

—¡Bagüjt xin guin! ¡Baslaa Barrabás!

¹⁹ Badxe' reeman Barrabás guin ladxguiib guial beenman tijb wadijl Jerusalén, guial guzujman contr ree suldad rom, në guial bagüjtaman bejn. ²⁰ Guneeenë Pilato laa reeman zatijb guial guyënman nuslaaman Jesús, ²¹ per laa reeman gurixdiaj reeman mazri rejs, rëb reeman:

—¡Bacaax loj crüjz! ¡Bacaax loj crüjz!

²² Ni bayon volt rëb Pilato loj reeman:

—¿Xhieza ni mal been xin guin? Achet xfaltix radxejlan din guiëtix. Gudëdan laax casti dxel guslaan laax.

²³ Per laa reeman mazri rbixdiaj reeman, rëb reeman loj Pilato din gucaaman laaman loj crüjz. Abi' guial tant rbixdiaj reeman con ree bixhioz rniabee ree bixhioz, been reeman gan gojc zi'c rën reeman. ²⁴ Dxel cwëjb Pilato beenman zi'c rën reeman. ²⁵ Abi' baslaaman Barrabás bën guyu ladxguiib por wadijl në guial bagüjtaman bejn, guíaad Jesús bayüman laaman loj reeman persi beennë reeman laaman zi'ctzi rën reeman.

Bacaa reeman Jesús loj crüjz

(Mt. 27:32-44; Mr. 15:21-32; Jn. 19 :17-27)

²⁶ Chi zinë reeman Jesús din gucaa reeman laaman loj crüjz, gunaaaz reeman tijb bën za Cirene laaman Simón. Ziaadaman bazaman dajn, gunabee reeman laaman güüman xcrüjz Jesús din chinalaman laaman.

²⁷ Zien da't bejn zinal laaman, abi' zien ree béngunaa roon rbixdiaj guial raya reeman laaman. ²⁸ Per baguiaa Jesús loj reeman abi' rëbaman:

—Béngunaa Jerusalén ad roondi por naj, gol biin por lëjt gajc në por xi'ndi. ²⁹ Din zadxin dxej guiëbidi: “Xiquilbaa ree béngunaa ad rajct ru xi'n, në ree béngunaa ad gojlt xi'n con ree béngunaa ad ca't bindobëz.”

³⁰ Dxel suloj guiëb ree bejn loj ree guia': “Gol guxa't du guijcan”, guíaad loj ree lom guiëb reeman: “Gol baquie'ch dunujn.” ³¹ Yan, nacli naj rüjnnë reeman zian, diidxgui lëjt, wed xhiezcinin güünnë reeman lëjt.

³² Abi' në tio'p ree xingubaan zinë reeman din tia reex loj crüjz con Jesús. ³³ Chi bidxin reeman lod la Calaver, bacaa reeman Jesús loj crüjz, con grop ree xingubaan guin: tijbix cwa ladbee zatijbix cwa ladruvejs.

³⁴ Abi' chi cucaa reeman Jesús loj crüjz, rëbaman:

—Dad, been reeman perdon, din ad ragbeet reeman xhienin rüjn reeman.

Dxel gudxijt ree suldad suert guiyc xabaman din yala' reex laan. ³⁵Zien ree bejn riga' yagaj cuguiaa reeman, abi' xt ree guxtis ruze' laaman, rëb reeman:

—Baslaax ben ren ree, yan guslaa laagajquix bal walix laax naj Cristo.

³⁶Në ree xin suldad ruze' laaman, rbig reex rudëed reex vinagr guië'man, ³⁷rëb reex lojman:

—Bal lüj naj xrey ree bén Israel, baslaa lüj gajc.

³⁸Abi' guiyc crüzj guin bacaa reex lëjtr con diidx grieg, diidx latin, në diidx hebreo, rëban: “Bén guie naj xrey ree bén Israel.”

³⁹Tijb xingubaan ni ca loj crüzj guin guneex diidxgujdx loj Jesús, rëbix:

—Bal lüj naj Cristo, baslaa lüj gajc, baslaa tëë dunujn.

⁴⁰Per zatijbix gudilë xcompniarix, rëbix lojx:

—¿Staczi ad rdxebtil Dios ya majsi lasa'gajc casti guin cadëdil? ⁴¹Dunuj rayalczi cayzaagdiaj din zian caydijx ni baguieen. Per bén guie achetdzi ni mal wayüjnman.

⁴²Dxel rëbix loj Jesús:

—Basaaladx naj chi ma canabeel.

⁴³Abi' rëb Jesús lojx:

—Diidxli rnin lojl guial yandxej gajc sunël naj lod naj nix, lod gan.

Güjt Jesús

(Mt. 27:45-56; Mr. 15:33-41; Jn. 19 :28-30)

⁴⁴Chi gol garol dxej, bicajy guidibczi guidxliuj xt raca choon wadxe.

⁴⁵Bicajy logbijdx guiáad lajd nal lën yadooro' Jerusalén goxya'n, gojcan tio'p lala'. ⁴⁶Dxel gurixdiaj Jesús, rëbaman:

—Dad, lojl rusa'n da sprijtan.

Chi gulox guneeman zian, dxel güjtaman.

⁴⁷Chi baguiaa suldad rniabee ree suldad ni goc, baza'tix Dios zagdxe, rëbix:

—Walican achet xtol bén guin yu'.

⁴⁸Chi baguiaa gra ree bén za' yagaj ni goc, dád guyunaya reeman zia reeman riga'pgaj luxdoo reeman. ⁴⁹Per gra ree bén nünbee Jesús, con ree béngunaa nal laaman diisd Galilea, zijt guzuj reeman baguiaa reeman gra ree ni goc.

Biguie'ch Jesús

(Mt. 27:57-61; Mr. 15:42-47; Jn. 19 :38-42)

⁵⁰Guyu tijb bejn, brie lajman Xiëb, gojcaman benza'c, beenman zi'c rayal. Gojc ladxaman guiedx Arimatea tijb guiedx naaz Judea. Gojc tëëman tijb xguxtis ree bén Israel. ⁵¹Nëman rbëz nabee Dios, abi' ad nëtaman bachajg xixgab ree bén bagüjt Jesús. ⁵²Wejman loj Pilato bignabaman xcuerp Jesús. ⁵³Chi gulox baletaman xcuerp Jesús loj crüzj guin, cwa'man laaman batüübaman tijb lajd, dxel biquie'chaman laaman lën tijb baa ni bidëën lën guiaj lod achutczi waguie'ch. ⁵⁴Dxej guin rüjn reeman porvinid gra par dxej raziiladx ree bejn. Zamer suloj dxej guin chi biquie'ch reeman Jesús.

⁵⁵Abi' ree béngunaa zidnë Jesús diisd Galilea, në reeman binal abi' baguiaa reeman xbaa Jesús baguiaa tëë reeman xhienaag gudijxh reeman xcuerpaman. ⁵⁶Chi bayejc reeman, zianz beenchaaw reeman

perfum në zaj ni rliaa nejxh ni guidëëbaman. Dxel baziiladx reeman dxej raziiladx ree bejn zi'c rniabee ley.

24

Raban Jesús

(Mt. 28:1-10; Mr. 16:1-8; Jn.20 :1-10)

¹ Chi dumingw rsildoo, wej ree béngunaa guin ro' xbaa Jesús binë reeman parfum ni beenchaaw reeman. ² Chi bidxin reeman yagaj, baguiaa reeman guiaj ni bida'cw ro' baa guin ad naga'tri xluaran. ³ Abi' guyu reeman, per ad bidxaaglojtri reeman xcuerp Dad Jesús. ⁴ La'tzi cadxeb reeman ni'quid radxejlt xhie güün reeman, dxejczy baguiaa reeman tio'p ree bejn za'li reeman gajxh lod za' reeman, najcw reeman lajd bacha'. ⁵ Abi' guial tant bidxeb reeman, basajb loj reeman xt luyuj, dxel rëb ree bën guin loj reeman;

—¿Chexc zeel raguillidi tijb bën naban loj ree bengüt? ⁶ Achutri laaman guie din ma babanman. Gol basaaladx ni naman lojdi chi guzuman niz Galilea. ⁷ Naman lojdi guial yayü reeman Bén guxhaal Dios loj ree bëndol din gucaa reeman laaman loj crüjz, abi' ni yayon dxej yabanman.

⁸ Dxel basaaladx reeman diidx ni rëb Jesús loj reeman, ⁹ abi' chi baza reeman ro' baa guin, bicojn reeman guidxiptib ree xi apóstoles Jesús në los demazri ree xcompniar reeman gra ni baguiaa reeman. ¹⁰ María Magdalena, con Xuan, con Li xniaa Jacob con ree béngunaa ren, laa reeman bignë ruson guin loj ree xi apóstoles Jesús. ¹¹ Per laa reeman ad bililadxt reeman ni rëb ree béngunaa guin, gunaladx reeman wed rëbzi reeman.

¹² Per Bëd baxüünman biquiaaman lën baa guin, abi' chi baguiaaman lën baa guin, lajd ni bidüübzi Jesús baguiaaman, zianz ziaman dád radxalojman por ni goc.

Baliüloj Jesús loj tio'p ree xbejnman

(Mr. 16:12-13)

¹³ Dxej guin gajc, tio'p ree xbejn Jesús zë tijb guiedx la Emaús, raya'nan zi'ct chiptib kilometro par Jerusalén. ¹⁴ Chi zë reeman lunejz cayü reeman diidx xcwent gra ree ni goc. ¹⁵ La'tgaj cayü reeman diidx, gubig Jesús cwë' reeman abi' guzuloj cazanëman laa reeman. ¹⁶ Per majsi cuguaa reeman laaman, yu' ni badxoon nayünbee reeman laaman. ¹⁷ Dxel gunabdiidx Jesús loj reeman, rëbaman:

—¿Xhie diidxan rüdi la'tgaj cazadi? ¿Chexc zeel yu'nayadi?

¹⁸ Badxi' tijb bën la Cleofas laan, rëbaman:

—Gra ree bejn ragbee ni goc Jerusalén lën ree dxej guie. ¿Wen tijbzi lüj naj bën guzu Jerusalén ad gogbeetil ni goc ya?

¹⁹ Dxel rëbaman loj reeman:

—¿Xhie goc?

Abi' rëb reeman:

—Ni beennë reeman Jesús bën Nazaret, laaman goc tijb bën badëë xtiidx Dios loj ree bejn, bën gop gualrniabee zi'c ni beenman në ree diidx ni guneeman niz loj Dios në niz loj ree bejn. ²⁰ Në guial bayü ree bixhioz rniabee ree bixhioz laaman në ree dux guxtis ree din guiëtaman, abi' bacaa reeman laaman loj crüjz. ²¹ Par dunujn laaman naj bën yabëë ree bën Israel loj ree bën rom, per yan gojc choon dxej ni goc ree ni guin. ²² Majsi tio'p choon ree béngunaa no'ch du lojn bachejb reeman

dunujn, guial rsildoo wej reeman ro' baa guin, ²³ abi' guial ad baguiaat reeman xcuerpaman, bayejc reeman rü reeman diidx guial balüüloj ree anjl loj reeman, rëb ree anjl guin loj reeman guial naban Jesús. ²⁴ Laa biquiaa gajc ree tio'p choon ree dux compniaran ro' baa guin abi' baguiaa reeman zi'cgajczi rëb ree béngunaa guin, per ad baguiaat reeman Jesús.

²⁵ Dxel rëb Jesús loj reeman:

—iXi nawëëg naj chignia'di abi' xi raglaa par chililadxidi gra ni guneë ree bén badëë xtiidx Dios loj ree bejn! ²⁶ ¿Wen id naj ya guial sagdiaj Cristo, dxelri yayë'paman xanyabaa?

²⁷ Dxel guzuloj cusignia'man laa reeman ni rën guiëb ni ca loj xtiidx Dios xcwentaman. Guzulojman con ree xlibr Moisejs abi' basnuuman con gra ree libr ni bacaa ree bén badëë xtiidx Dios loj ree bejn.

²⁸ Chi bidxin reeman guiedx lod zë reeman, been Jesús zi'c bén che mazri zijt. ²⁹ Per laa reeman been reeman naguiejn din yaya'nnëman laa reeman, rëb reeman lojman:

—Baya'n con dunujn, din ma gudxe yan abi' ma cabej guiaal.

Dxel guyu Jesús persi baya'nnëman laa reeman. ³⁰ Abi' chi zojbnëman laa reeman xan mex, cwa'man guiadxtil abi' chi gulox badëëman quixtëë loj Dios, gula'man laan persi badëëman laan loj reeman. ³¹ Hor guin gajc guzajc reeman zi'c bén baxal guiaaløj, abi' bayünbee reeman laaman. Per laa gunidloj gajcaman, ³² zianz rëb loj lasa' reeman:

—iZe'cliza dád nix yu' du luxdoo chi zudnë'man lunejz, chi cusignia'man dunuj ni rëb loj xtiidx Dios!

³³ Abi' ni'quid gulëjzt reeman, laa bayunejz gajc reeman zia reeman Jerusalén lod riga' guidxiptib ree xi apóstoles Jesús con ree xcompniar reeman. ³⁴ Rëb reeman loj grop ree bén guin:

—Walican ma baban Dad Jesús, ma balüülojman loj Simón.

³⁵ Zianz be reeman diidx ni guzac reeman chi zë reeman lunejz xhie tëë naag bayünbee reeman Jesús chi gula'man guiadxtil.

Balüüloj Jesús loj ree xbejnman

(Mt. 28:16-20; Mr. 16:14-18; Jn.20 :19-23)

³⁶ Sta cayü reeman diidx xcwent ree ni guin, chi balüüloj Jesús galay reeman, rëbaman:

—Yabe'cdxe Dios luxdoodi.

³⁷ Dád badxaløj reeman abi' bidxeb reeman guial gunaladx reeman anman cuguaa reeman. ³⁸ Per rëb Jesús loj reeman:

—¿Chexc zeel rdxebidi? ¿Chexc zeel yu'nawëëg luxdoodi? ³⁹ Gol baguiaa yan në guia'n. Naj gajcan, gol baqui' naj gol baguiaa tëë naj, din tijb anm ad yu'taman dxijit ad ca tëëtaman bëël zi'c ruguiaadi naj.

⁴⁰ Chi rëbaman zian, balüü yaaman në guia'man. ⁴¹ Per laa reeman staczi ad rliladxt reeman guial tant rabaa reeman radxa tëë loj reeman, abi' rëbaman loj reeman:

—¿Rajpidi ta'n guialraw ya?

⁴² Dxel badëë reeman tibliä' bëjl biguie', ⁴³ abi' cwa'man laab gudawaman niz loj reeman. ⁴⁴ Zianz rëbaman loj reeman:

—Ni ma guza'can naj ni rnin lojdi chi sta za'n con lëjt: Guial naj gac gra ree ni ca loj xlibr Moisejs ni gaza'can, në xlibr ree bén badëë xtiidx Dios loj ree bejn, në loj libr salmos.

⁴⁵ Dxel guxhalaman xquiarguiejn reeman persi bignia' reeman ni ca loj xtiidx Dios, ⁴⁶ abi' rëbaman loj reeman:

—Loj xtiidx Dios rëb guial Cristo, naj guial guiëtaman, abi' ni yayon dxej yabanman. ⁴⁷ Abi' diizd Jerusalén suloj guire'ch xtiidxaman xt guidib loj guidxliuj guial yu' perdon par gra ree bën yayüjn xgab por xtol guililadx tää reeman naj. ⁴⁸ Lëjt naj testiw xcwent gra ree ni guin. ⁴⁹ Naj gaxhal par lëjt ni ma na da Dadan. Per gol guzujsii luguiedx Jerusalén xt tia'di guialrniabee ni gui't diizd xanyabaa.

Bayë'p Jesús xanyabaa

(Mr. 16:19-20)

⁵⁰ Dxel briinë Jesús laa reeman luguiedx Jerusalén binëman laa reeman gajxh Betania, zianz gules yaaman beenle'man laa reeman. ⁵¹ Abi' la'tgaj cayüjnle'man laa reeman, wajsaman ziaman xanyabaa. ⁵² Chi gulox bazuxib reeman badëë reeman quixtää lojman, dxel zia reeman Jerusalén, dád rabaa reeman. ⁵³ Abi' guixie guixie yu' reeman lën yadooro' Jerusalén ruza't reeman Dios zagdxë rudëëd tää reeman quixtää lojman.

Xtiidxza'c Jesucrist ni bacaa San Juan

Bi't Xi'n Dios loj guidxliuj

¹ Diisd guia'xchej chi gad guidxliuj gacchaaw, mal yu' bén naj xtiidx Dios. Laaman za'në Dios abi' laagajcaman naj Dios. ² Laaman mal za'në Dios diisd guia'xchej. ³ Laaman been graczi ni yu'. Achetczi ni yu' niajc bal id laaman. ⁴ Laaman rajp guialnaban, guiáad guialnaban guin naj bajl par gra bénguidxliuj. ⁵ Bajl guin rusni bén nacay xquiarguejn, abi' ad rajct rutëë guialnacay guin loj bajl guin.

⁶ Guyu tijb bén brii laj Waj, Dios guxhaal laaman, ⁷ bidgaguieman diidx xcwent bén naj xbajl Dios, din gac chililadx gra ree bejn laaman. ⁸ Per ad Wajt goc bajl guin, bi'tzaman bidgaguieman diidx xcwent bajl guin. ⁹ Din bén naj quijb bajl guin, laaman rusni xquiarguejn gra bénguidxliuj, abi' ma bi'taman loj guidxliuj.

¹⁰ Laaman guzu loj guidxliuj, abi' majsi laaman been guidxliuj, per ree bénguidxliuj ad bayagbeet reeman laaman. ¹¹ Bi'taman loj ree bén Israel, abi' majsi gojcaman bén Israel, per ad bidxga't reeman laaman. ¹² Per, gra ree bén bidxga' laaman bililadx tëë reeman laaman, beenman laa reeman xi'n Dios. ¹³ Abi' naj reeman xi'n Dios, ad zi'c rut xi'n bejn loj guidxliuj por xixgab bejn o guial rën bejn chu' xi'nman, por guial rliiladx reeman ma naj reeman xi'n Dios.

¹⁴ Jesús, ben naj xtiidx Dios, laaman goc bejn abi' gubajnman loj guidxliuj con dunuj ree, abi' dád guyënman bejn ree gunee tëëman ganax diidxli. Dunujn baguiaa xguialrniabeeman, guialrniabee ni ca'man guial tijbzi laaman naj Xi'n Dios. ¹⁵ Chi be Waj xtiidxaman loj ree bejn, guneeman rejs, rëbaman:

—Jesús guie naj bén ruzatan, chi rnin guial bén zëed xichan mazri lasajcaman guial lon, din diisd gocli mal yu'man guial lon.

¹⁶ Dád rënman dunuj ree, gra dxejczy raca' dugra ree xguialnaza'caman. ¹⁷ Por Moisejs banee Dios xleyaman duloj ree, per por Jesucrist bayagbee ree xhienaag rën Dios dunuj ree xhie tëë naag naj xtiidxliman. ¹⁸ Ad yu't dxej waguaa bejn Dios. Bén naj tijbzi xi'nman. Bén nabannë laaman balüü duloj ree xhienaag naj Dios.

Waj bén baroobnijs rëbaman chu naj Jesús

(Mt. 3:11-12; Mr. 1:7-8; Lc. 3:15-17)

¹⁹ Diisd Jerusalén guxhaal ree xguxtis ree bén Israel bixhioz ree con ree bén naj ree levitas persi bignabdiidx reeman loj Waj chu najman.

²⁰ Dxel be Waj diidxli loj reeman, rëbaman:

—Ad najtan naj Cristo.

²¹ Abi' gunabdiidx reeman lojman stijb rëb reeman:

—¿Chuza najl? ¿Lüjn naj Elías ya, bén badëë xtiidx Dios loj ree bejn?

Badxi' Wajn rëbaman:

—Ad najtan.

Dxel gunabdiidx reeman stijb rëb reeman:

—O, ¿lüjn naj bén naj diidx gui't ya, bén gudëë xtiidx Dios loj ree bejn?

Badxi'man laan rëbaman:

—Ad najtan.

22 Abi' rëb reeman:

—¿Chuzá najl? Din rayal yugnë'n ruson loj ree bën guxhaal dunujn. Guna chu najl.

23 Dxel rëb Waj loj reeman:

—Naj naj tijb bën rbidxa' loj yujbidx: “Gol guxhal tijb nejz nali par bën ca' gualrniabee” —zi'c rëb Isaías bën badëë xtiidx Dios loj ree bejn.

24 Abi' ree bën guxhaal ree bënfarisew din guinieenë reeman Waj, 25 gunabdiidx reeman lojman, rëb reeman:

—Bal id lüjn naj Cristo, ni'qui Elías, ni'qui bën naj diidx gui't, bën gudëë xtiidx Dios loj ree bejn, ¿chexquiza zeel ruuroobnijsil bejn?

26 Badxi' Waj laan rëbaman:

—Naj ruurobnijs con nijs, per lojdi no'ch tijb bën ad wayünbeetidi. 27 Laaman naj bën zëed xichan, ni'qui xgurëchaman ad rayalt gaxhiecan guial najman bën mazri lasajc guial lon.

28 Gra niguie gojc lod la Betábara, ni naj stiblad ro' guiiw Jordán, lod baroobnijs Waj bejn ree.

Jesús naj Xi'n Dios

29 Chi bareguiaal, baguiaa Waj zibig Jesús lod za'man, dxel rëbaman:

—Gol baguiaa, bën guin naj bën bacaabee Dios din guiëtaman zi'c xiildoo por xtol ree bënguidxliuj. 30 Laaman bazatan lojdi chi rnin: “Xichan zidnal bën mazri lasajc guial lon, din laaman mal yu' diidz gocli guial lon.” 31 Ni'qui naj ad gogbeetan guial laaman naj bën gui't, per naj zialan din gurobnijsan bejn ree con nijs din chile' güünbee ree bën Israel laaman.

32 Rëb tëë Waj loj reeman:

—Naj baguia biguiaajt xSprijt Dios diidz xanyabaa zi'c tijb palom xt guijcaman. 33 Majsi ad nünbeetan laaman, per bën guxhaal naj baroobnijsan con nijs, laaman na lon: “Chi guguaal guiat xSprijt Dios xt guijc tijb bejn, laaman naj bën runee xSprijt Dios.” 34 Naj ma baguia laaman, abi' ragbeechaawan guial laaman naj Xi'n Dios.

Bën binal ree Jesús yaloj

35 Chi bareguiaal, za' Waj yagaj stijb, za'në tio'p ree xbejnman. 36 Abi' chi baguiaaman cadëd Jesús, dxel rëbaman loj reeman:

—Gol baguiaa, bën guinan naj zi'c xi xiildoo Dios din guiëtaman por xtol bënguidxliuj.

37 Chi biguiejn reeman rëb Waj zian, dxel binal reeman Jesús. 38 Chi badxi' lojman, baguiaaman zinal reeman laaman, abi' rëbaman loj reeman:

—¿Xhie rguilidi?

Badxi' reeman laan rëb reeman:

—Mextr, ¿ban zojbil?

39 Dxel rëb Jesús loj reeman:

—Gol guda din guguaadi.

Dxel wej reeman biquiaa reeman lod zojbaman, abi' baya'nnë reeman laaman dxej guin, guial ma gojl cost raca tajp wadxë.

40 Tijb ree xbejn Waj bën binal Jesús, bën bacaagdiajg ni rëb Waj, laaman brii laj Andrejs, bijch Simón Bëd. 41 Andrejs guin, yalojxgaj bijchaman Simón bigdiilaman, abi' rëbaman lojman:

—Ma badxaaglojn bën naj Mesías —rën guiëban Cristo.

⁴² Dxel binë Andrejs Simón lod za' Jesús, chi baguiaa Jesús laaman, rëbaman:

—Lüj naj Simón, xi'n Jonás, per yan grii lajl Cefas —rën guiëban Bëd.

Gurejdx Jesús Felip në Natanael

⁴³ Chi bareguiaa been Jesús xgab cheman niz Galilea, abi' badxaagan Felip, zianz rëbaman:

—Tanal naj.

⁴⁴ Ladx Felip guin naj guiedx Betsaida, ni gajc naj ladx Andrejs con Bëd.

⁴⁵ Dxel bigdiil Felip Natanael, abi' rëbaman lojman:

—Ma badxaaglojn bën ruza't Moisejs loj xlibr xleyaman, bën ruza't ree bën badëë xtiidx Dios loj ree bejn loj ni bacaa reeman. Laaman naj Jesús, xi'n Xiëb, bën Nazaret.

⁴⁶ Dxel rëb Natanael lojman:

—¿Wen yu' benza'c Nazaret ya?

Badxi' Felipan rëbaman:

—Yo' din guguaal.

⁴⁷ Chi baguiaa Jesús zëed Natanael, rëbaman:

—Guie zëed tijb bën naj quijb bën Israel, abi' ad rusquieetaman.

⁴⁸ Dxel gunabdiidx Natanael lojman, rëbaman:

—¿Xoza nünbeel naj?

Badxi' Jesúsán rëbaman:

—Chi gad Felip cwedx lüj, chi za'l xan yag higo, dxel baguian lüj.

⁴⁹ Zianz rëb Natanael lojman:

—Mextr, lüj naj Xi'n Dios, lüj naj rey Israel.

⁵⁰ Badxi' Jesús laan rëbaman:

—¿Rliladxil naj ya guialzi rnin baguian lüj xan yag higo? Per mazri naj ree ni guguaal guial loj ni ma baguaal.

⁵¹ Rëb tëëman:

—Naj ragbeecheaaw, zuguaadi zojbyal xanyabaa, abi' zuguaadi xianjl ree Dios yayë'p reeman xanyabaa yaguaajt tëë reeman xt guijc Bén guxhaal Dios loj guidxliuj.

2

Wej Jesús loj tijb guialruxhliaa

¹ Ni goc choon dxej guyu tijb guialruxhliaa luguiedx Caná, ni riga' niz Galilea. Dxel në xniaa Jesús za' yagaj, ² abi' në Jesús con ree xbejnman gunee reeman persi wej reeman loj lanij guin. ³ Chi babidx vin, dxel rëb xniaa Jesús lojman:

—Achetri vin rajp reeman.

⁴ Badxi' Jesúsán rëbaman:

—Na, ¿chexquiza zeel nal lon zian? Ad wadxint da horan günan ni rayal günan.

⁵ Per xniaaman rëb gajcaman loj ree bën cayüjn mandad yagaj:

—Gol been gra ni naman.

⁶ Yagaj za' xho'p ree guiajs guiaj, ni ru nijs ni rüjnnë ree bën Israel dxiin chi rusia laa reeman zi'c naj xcostumbr reeman. Abi' lën tijbgaj reen ru cost tibgayuu lijtr. ⁷ Abi' rëb Jesús loj ree bën rüjn mandad guin:

—Gol bacha ree guiajs guie nijs.

Dxel bachadi reeman laa reen, ⁸ abi' rëbaman loj reeman:

—Yan gol gulëë ta'nán, gol bigdëen loj bën canabee loj lanij guie.

Dxel bigdëe reeman laan lojman, ⁹ abi' bën canabee loj lanij guin beenman prueb nijs bayajc vin guin, sin guial niagbeeman ban guzan, bën cayüjnz ree mandad guin ragbee, din laa reeman bica' nijs guin. Dxel gurejdxaman xin cuxhliaa guin, ¹⁰ rëbaman lojx:

—Graczi bejn rgui's yaloj vin zagdxe, abi' chi ma gu' reeman zilan, dxel rgui'saman vin corrient. Per lüj badxe'chaawil vin zagdxe guin persi cagui'silan yan.

¹¹ Ni guin naj milagr yaloj been Jesús, beenman milagr guin Caná, guiedx riga' niz Galilea. Zian balüü guialrniabee ni rajpaman abi' bililadx ree xbejnman laaman.

¹² Chi gulox gojc zian dxel zë reeman guiedx Capernaum, con xniaaman, con ree bijchaman con në ree xbejnman. Ni guzu reeman tio'p choon dxej.

Babëe Jesús bën ruto' ree ro' yadooro'
(Mt. 21:12-13; Mr. 11:15-18; Lc. 19:45-46)

¹³ Chi ma zidyob pascw xlanij ree bën Israel, wej Jesús Jerusalén. ¹⁴ Abi' ro' yadooro' bidxaaglojman bën cuto' ree go'n, con ree xiil con ree palom, në ree bën zojb xan mex ruchaa reeman xmilia ree bën ziaad lood ren. ¹⁵ Chi baguiaa Jesús zian, dxel beenchaawaman tijb duu persi babëeman gra reeman, con gra ree xgo'n reeman në ree xiil. Gutie'chaman xmilia ree bën ruchaa milia guin barexguiat tëeman xmex reeman. ¹⁶ Dxel rëbaman loj ree bën cuto' palom:

—¡Gol babëe reeb guie! ¡Ad rüjnnëdi lidx da Dadan zi'c luguia'!

¹⁷ Dxel basaaladx ree xbejnman ni ca loj xtiidx Dios lod rëb: “Dád ralenan ruguian ni rüjn reeman lidxil.”

¹⁸ Zianz rëb ree bën Israel lojman:

—¿Xhie milagr gulüül du lojn din yayagbeen guial rajpil guialrniabee güünl zian?

¹⁹ Badxi' Jesús laan rëbaman:

—Gol base'n yadoo guie, naj yayün laan loj choon dxejzi.

²⁰ Dxel rëb ree bën Israel guin lojman:

—Tiuubixho'p ijz goglaa reeman been reeman yadoo guie, ¿güiáad lüj ya yayüjnlan choon dxejzi?

²¹ Per Jesús xcuerp gajcaman ruza'taman chi ruza'taman yadoo guin.

²² Zeel chi babanman loj ree bengüt, basaaladx ree xbejnman ni rëbaman, abi' bililadx reeman xtiidxaman bililadx tëe reeman ni ca loj xtiidx Dios.

Jesús nünbee xixgab gra bejn

²³ Chi guzu Jesús Jerusalén pascw, zien ree bejn bililadx laaman, chi baguiaa reeman milagr ree ni beenman. ²⁴ Per laaman ad rëbtaman loj reeman chu najman, din laaman nünbeechaaw xhienaag naj xixgab reeman. ²⁵ Ad biaadxtaman chu niëjb lojman xhienaag naj bejn, din laaman ragbeechaaw xhienaag naj xixgab tijbgaj bejn.

3

Bigneenë Nicodemo Jesús

¹ Guyu tijb bënfarisew brii lajman Nicodemo, gojcaman tijb guxtis loj ree bën Israel. ² Abi' wejman bignajman Jesús tijb guxhin, dxel rëbaman lojman:

—Mextr, rayagbeen guial Dios guxhaal lüj din gulüül dunujn, din achutczí zajc güün lasa' ree milagr ni rüjnl bal id za'në Dios laaman.

³ Dxel rëb Jesús:

—Diidxliczi rnin lüj, bën ad zajlt stijb, ad zajct guguaaaman xguialrniabee Dios.

⁴ Abi' rëb Nicodemo lojman:

—Per, ¿xhienaag gal bejn stijb chi ma najman bengol? ¿Wen zajc yayu lën xníaaman ya abi' galaman stijb?

⁵ Badxi' Jesús laan rëbaman:

—Diidxliczi rnin, bën ad rirobnijst ad nabannë tëëtaman xSprijt Dios ad zile't yayuman loj xguialrniabee Dios. ⁶ Bën naban zi'c naj xixgabaman, lojzi guidxliuj guie rajpaman guialnaban, per bën nabannë xSprijt Dios, por Sprijt guin rajpaman stijb guialnaban. ⁷ Ad bal radxa lojl guial rnin: “Rüjn naguiejn gal bejn stijb.” ⁸ Din zi'c rbi' bi gralad abi' majsi riguejnl chi rbi'n, per ni'quid ragbeetil ban zëedan o ban zën. Ziangajc naj xSprijt Dios con gra ree bën nabannë laaman.

⁹ Dxel rëb Nicodemo lojman:

—¿Xhienaag rajc zian?

¹⁰ Badxi' Jesúsán rëbaman:

—¿Lüj, naj mextr loj ree bën Israel, ad rignia'til gra ree ni guin ya? ¹¹ Diidxliczi rnin lojl, raneen ni rayagbeen ni baguiaa tëen, per lëjt ad riladxtidi ni ranan. ¹² Bal id riladxtidi chi rnin xcwent ree ni loj guidxliuj guie, ¿xhienaag chililadxtidi bal ganin xcwent ree ni xanyabaa?

¹³ 'Achut wayej xanyabaa, tijbzi bën biguiat diizd xanyabaa, Bën guxhaal Dios loj guidxliuj. ¹⁴ Abi' zi'c bacaa Moisejs bëel guiib loj yag niz loj yujbidx, ziangajc Bën guxhaal Dios loj guidxliuj, gucaa reeman laaman loj crüjz, ¹⁵ din gra bën chililadx laaman ad zanijt reeman loj Dios, gap reeman guialnaban tiblyaa con laaman.

Rën Dios bejn

¹⁶ 'Guial tant rën Dios bénguidxliuj, majsi tijbzi xi'nman, per guxhaalaman laaman loj guidxliuj, din graczi bën chililadx laaman ad zanijt reeman loj Dios, gap reeman guialnaban tiblyaa con laaman. ¹⁷ Din Dios ad guxhaalt xi'nman loj guidxliuj din gudëedaman bejn casti, guxhaalaman laaman din gap ree bejn perdon loj Dios.

¹⁸ 'Bën rililadx Xi'n Dios ad rayaltaman xcasti Dios. Per bën ad rililadxt, laaman ma rayal casti guial ad rililadxtaman Xi'n Dios, bën naj tijbzi xi'nman. ¹⁹ Bën ad rililadxt ree rayal reeman casti, din yan ni bi't bën naj xbajl Dios, mazri bayuladx reeman nejz mal, guial rüjn reeman ganax ni mal. ²⁰ Graczi ree bën rüjn ni mal ad ruladxtczi reeman bajl guin, ad rbigt reeman lojn, chitëë guiguien ni mal cayüjn reeman. ²¹ Per ree bën naban zi'c rayal loj Dios, laa reeman rbig loj xbajlaman din guiguien guial graczi ni cayüjn reeman naj ni rën Dios.

Waj bën baroobnijs ruza'taman Jesús stijb

²² Chi gudëd gojc zian, Jesús con ree xbejnman wej reeman niz Judea, lod guzunëman laa reeman tio'p choon dxej, ni baroobnijs reeman bejn ree. ²³ Nëgajc Waj curoobnijs bejn ree luguiedx la Enón, ni riga' gajxh guiedx Salim, guial yu' zil nijs ni. Abi' rej ree bejn persi rirobnijs reeman. ²⁴ Laan goc chi gad Waj chu' ladxguiib.

²⁵ Per bëlzi ree xbejn Waj, con za tio'p choon gajc ree bén Israel guzuloj cadildiidx reeman por xcostumbr reeman guial xhienaag gac reeman naya. ²⁶ Dxel biguiedx reeman loj Waj:

—Mextr, bén guzunèl stiblad ro' guiw Jordán, bén bel xtiidx du lojn, nè laaman curoobnijs bejn ree abi' gra reeman zinal laaman.

²⁷ Badxi' Waj laan rëbaman:

—Achut zajc gap guialrniabee bal id Dios gudëe laan. ²⁸ Lëjt rag-bee guial biguiejndi rën guial ad najtan naj Cristo, naj guneed lojman zidgagojnan por laaman. ²⁹ Dunuj ree rayagbee guial loj guialruxhliaa, xin za'në biingunaa guin, laaxan cuxhliaa, guiáad xmiwix xin za' con laax rabaanë da'tix laax chi riguiejnx rnieex. Ziangajc naj dád rabaanë'n laaman. ³⁰ Abi' laaman gusnuu gacaman mazri bén zojbloj, guiáad naj gusnuu gacan bén ad lasajct guial lojman.

Bén zëed xanyabaa

³¹ 'Din bén zëed diidz xanyabaa, laaman naj bén rniabee loj gra. Per bénguidxliuj, bénguidxliujzi najman abi' ganax ni yu' loj guidxliuj ruza'taman. Per Bén zëed diidz xanyabaa laaman rniabee gra, ³² abi' rüman ni ma baguiaaman ni ma biguiejn tëëman, per achut rliladx ni rnieeman. ³³ Bal yu' bén rliladx xtiidxaman, zian rguien guial ni diidxli naj xtiidx Dios. ³⁴ Abi' bén zëed por Dios, laaman rü xtiidx Dios guial guidiblagaa badëed Dios xSprijtaman lojman. ³⁵ Dios rën Xi'nman abi' basa'nman gra lojman. ³⁶ Abi' chutëez bén rliladx Xi'nman, laaman rajp guialnaban tiblayaa loj Dios. Per bén ad rtiëjbt chililadx, ad rajptaman guialnaban guin, laaman rayal xcasti Dios.

4

Jesús con béngunaa Samaria

¹ Gogbee ree bénfarisew guial mazri zien bejn ma zinal Dad Jesús mazri zien tëe bejn ruroobnijsaman guial loj Waj, ² majsi diidxliczi ad Jesústan ruroobnijs bejn ree, bén naj ree xbejnman ruroobnijs. ³ Chi gogbeeman zian dxel briiman niz Judea zëman niz Galilea stjib.

⁴ Per chi zëman niz Galilea been nagueijn gudëedaman niz Samaria. ⁵ Abi' bidxinman tijb guiedx la Sicar, ni nulen Samaria, gajxh lod naga' yuj ni badëe Jacob loj xi'nman Xiëb. ⁶ Yagaj naj tijb bizëduu rniee reeman laan xbizë Jacob. Abi' guial ma badxag Jesús cazaman, dxel gurejman ro' bizë guin. Ma zidyob garol dxej. ⁷⁻⁸ Guiáad ree xbejnman zë reeman luguiedx guin zisii ni gaw reeman. Hor guin bidxin tijb béngunaa Samaria ro' bizë guin din tia'man nijs, dxel rëb Jesús lojman:

—Bazaladx ta'n xnijsil guië'n.

⁹ Per guial ad rnieenët lasa' ree bén Israel zagdx con ree bén Samaria, badxi' béngunaa guinan rëbaman:

—¿Chexquiza zeel rniabil nijs lon najl bén Israel awa bén Samaria naj? (Din bén Israel ree ad rnieenët reeman bén Samaria ree zagdx.)

¹⁰ Badxi' Jesús laan rëbaman:

—Bal zian ragbeel ni rën Dios guneeman lüj, chutëe bénan canab nijs lojl, zanabil nijs lon abi' naj zunen nijs runee guialnaban.

¹¹ Dxel rëb béngunaa guin loj Jesús:

—Dad, ni'quid ca'til ni cwëenël nijs, abi' bizë guin dád naxhitan. ¿Ban chica'l nijs runee guialnaban? ¹² Dux béngulalan Jacob basa'nnë dunujn

bizë guie, lod gu'man nijs con ree xi'nman con ree xbegui'xhaman. ¿Wen mazri najl guial lojman ya?

¹³ Badxi' Jesús laan rëbaman:

—Graczi ree bën rë' nijs guie re'c reeman nijs stijb. ¹⁴ Per bën guië' nijs gudëdan, ad yu'tri dxej che'caman nijs. Din nijs gudëdan gacan luxdooman zi'c lod ad rbëzt rajch nijs, abi' nijs guin gudëë guialnaban tiblyaaa.

¹⁵ Dxel rëb béngunaa guin lojman:

—Dad, banee nijs guin lon, chitëë che'cran nijs ad zial tëtëtran guidca'n nijs guie.

¹⁶ Rëb Jesús lojman:

—Bignee lacheelil, dxel yaguaaadil guie.

¹⁷ Badxi' béngunaa guinan rëbaman:

—Achut da bénguiaawan yu'.

Dxel rëb Jesús:

—Waliquil achut lacheelil yu', ¹⁸ din ma gojc gaay xinguaaw rtia' lüj, abi' yan xin zojbnël ad lacheeltilan. Zeel waliqui ni nal.

¹⁹ Chi bigueijnman ni rëb Jesús, dxel rëbaman:

—Dad, ma ragbeen guial lüj naj bën rudëë xtiidx Dios loj ree bejn. ²⁰ Dux béngulalan gunajchi' reeman Dios ruguia' guie, per lëjt najdi bën Israel rëbidi guial Jerusalén naj lod guiniajchi' bejn laaman.

²¹ Badxi' Jesús san rëbaman:

—Na, zagdxe rnin guial guidxin dxej guiniajchi'di dux Dad ree Dios, ad zi'ttridi ruguia' guie ad zej tëtëtridi Jerusalén. ²² Lëjt ni'quid ragbeetidi chunin rniajchi'di, per dunujn rayagbeen chunin ranajchi'n, din loj ree bën Israel grii bën güün bejn ree perdon. ²³ Abi' ma bidxin dxej ni gra ree bën diidxli rniajchi' Dios, guiniajchi' reeman laaman zi'c rayal por xSprijtaman. Din zian rën dux Dad ree Dios güün ree bën rniajchi' laaman. ²⁴ Dios naj Sprijt, abi' bën rniajchi' ree laaman rayal guiniajchi' reeman laaman con guidib luxdoo reeman por xSprijtaman.

²⁵ Dxel rëb béngunaa guin lojman:

—Naj ragbee gui't bën naj Mesías, bën la gajc, Cristo. Abi' chi gui'taman, laaman gusignia' dunuj ree gran.

²⁶ Abi' rëb Jesús:

—Najn naj bën zii, laaman caneenë lüj.

²⁷ Loj hor guin badxin ree xbejn Jesús, abi' dád badxaloj reeman guial cayünëman tijb béngunaa diidx. Per ni'qui tijb reeman ad gunabdiidx lojman xhie rënman o xhie diidxan cayü reeman. ²⁸ Guiáad béngunaa guin basa'n xreman ro' bizë guin, dxel ziaman luguiedx guin, abi' rëbaman loj ree bejn:

²⁹ —Gol taquiaa tijb bën ma na graczi ni ma benan. ¿Nid laaman naj Cristo ya?

³⁰ Dxel brii reeman luguiedx guin zë reeman lod za' Jesús. ³¹ Per la'tgaj zia béngunaa guin luguiedx guin, rëb ree xbejn Jesús lojman:

—Mextr, gudaw.

³² Per rëbaman loj reeman:

—Laa da guialrawan yu', ni ad nünbeetidi.

³³ Dxel guzuloj canabdiidx loj lasa' reeman rëb reeman:

—¿Ni yu' chu bidnë ni gudawaman ya'n?

³⁴ Dxel rëb Jesús loj reeman:

—Da gualrawan naj gūnan zi'c rēn Dios, bēn guxhaal naj abi' guloox gūnan ni naman. ³⁵ Lējt rēb: “Ryaadx zatajp bēew din gac ni yu' loj guiniaa.” Per naj rni lējt: Gol gules lojdi, gol baguiaa loj ree guiniaa, ma naj reen din yado'p reen. ³⁶ Abi' bēn rato'p loj guiniaa guin, rtia'man ni rayalaman por dxiin ni rūjnman. Guiaad ni rato'paman naj par lod yu' gualnaban tiblayaa. Dxel zi'c bēn rxūbin zi'c bēn rato'p, rabaa reeman tiblojzi. ³⁷ Waliqui ni rēb ree bejn: “Ben ren rxūbin, ben ren rato'p gualnaza'c.” ³⁸ Naj guxhal lējt din chigto'pidi gualnaza'c lod ad beentidi dxiin. Ben ren ree been dxiin, guiaad lējt gaz bigto'pidi gualnaza'c lod ad beentidi dxiin.

³⁹ Zien ree bēn Samaria bililadx Jesús guial be bēngunaa guin diidx loj reeman rēbaman: “Ma gunaman graczi ni benan.” ⁴⁰ Zeel chi bidxin reeman lod za' Jesús, guzajc reeman laaman liaadx din yaya'nnēman laa reeman. Dxel baya'nnēman laa reeman tio'p dxej. ⁴¹ Abi' mazri zien reeman bililadx laaman chi biguiejn reeman ni rnieeman, ⁴² dxel rēb reeman loj bēngunaa guin:

—Bajy yan ad por ni natzil raliduladxan laaman, nēgajc dunujn ma baguiejn ni rnieeman, abi' rayagbeen walican laaman naj Cristo, bēn yabēē bēnguidxliuj loj dol.

Bayūjn Jesús xi'n xbejn tijb rey

⁴³ Chi goc tio'p dxej guin, baza Jesús niz Samaria abi' zēman niz Galilea, ⁴⁴ majsi laagajcaman rēb guial ni'qui tijb bēn rudēē xtiidx Dios loj ree bejn ad rajpt reeman laaman respejt ladx gajcaman. ⁴⁵ Per chi badxinman niz Galilea, bēn niz ni ree baca' reeman laaman zagdxe. Din nē laa reeman wej lanij pascw Jerusalén, abi' baguiaa reeman gra ni beenman ni. ⁴⁶ Chi za'man niz ni wejman Caná stijb, lod bayūjnman nijs vin. Abi' luguiedx Capernaum guyu tijb xbejn rey ragxuu xi'nman. ⁴⁷ Chi gogbee bēn guin baza Jesús niz Judea badxinman niz Galilea, wejman lod za' Jesús bisajcaman laaman liaadx din cheman yayūjnman xi'nman guial zamer guiētix. ⁴⁸ Abi' rēb Jesús lojman:

—Lējt, bal id zuguaadi xhie ree sen o milagr ree, ad zaliladxtidi.

⁴⁹ Per rēb bēn guin:

—Dad, yo' yan gajc, naga gad da xi'nan guiēt.

⁵⁰ Dxel rēb Jesús lojman:

—Baguiaj lidxil, ma bayajc xi'nl.

Bililadx bēn guin ni rēb Jesús, abi' zia lidxaman. ⁵¹ La'tgaj ziaman, bigchaagloj ree xmojsaman laaman, abi' rēb reeman:

—Ma bayajc xi'nl.

⁵² Dxel gunabdiidxaman loj reeman, rēbaman:

—¿Xhie hor guzuloj banaa da xi'nan?

Abi' rēb reeman lojman:

—Nieey cost raca tijb wadxe bariix xliaa.

⁵³ Dxel basaaladx bēn guin guial hor ziin rēb Jesús lojman: “Ma bayajc xi'nl.” Abi' laaman nē gra bēn zojb lidxaman bililadx reeman Jesús. ⁵⁴ Ni ne naj milagr baroip ni been Jesús niz Galilea chi bazaman niz Judea.

5

Bayūjn Jesús tijb bēn ad rajct rza

¹ Chi gudëd gojc zian, guyu tijb xlanij ree bën Israel, abi' wej Jesús Jerusalén. ² Jerusalén guin, gajxh ro' port la xport ree Xiil, naj tijb tanc ro', diidx hebreo lan Betesda, yu' gaay xcurduran. ³ Yagaj riga' zien ree bënragxuu, zi'c ree bën lutia'p, nè ree bencoj con ree bën ad rajctzi rza, cabëz reeman guiniib nijs yu' lën tanc guin. ⁴ Din gocli goc rguiajt tijb xianjl Dios runiibaman nijs guin, abi' bën ru lojnijs guin yalaj chi caniiban, rayajcaman xhietëez guialguijdxan rajcaman. ⁵ Dxel loj ree bën guin no'ch tijb bejn, ma gojc zi'ctiubichoon ijz ragxuuman. ⁶ Chi baguiaa Jesús laaman naga'man yagaj, abi' gogbeeman guial gocli ragxuuman dxel gunabdiidxaman lojman rëbaman:

—¿Rënl ya yayajquil?

⁷ Badxi' bënragxuu guinan rëbaman:

—Dad, achut ra'pan gudxe' naj loj nijs guin chi riniiban. Beegaj chi rënan gayu'n, yalojl ben ren ru.

⁸ Dxel rëb Jesús lojman:

—Bixche, baca' ni naal loj, baguiaj.

⁹ Loj hor guin gajc bayajc bën guin, baca' ni naaman loj abi' guzuloj cazaman. Per guial dxej zii naj dxej raziiladx ree bën Israel, ¹⁰ zianz bën Israel zinal ree ley rëb reeman loj bën bayajc guin:

—Yandxej naj dxej raziiladx bejn, ad zajct yaca' ni go'til loj.

¹¹ Badxi' bën guinan rëbaman:

—Bën bayüjn naj naman: “Baca' ni naal loj, baguiaj.”

¹² Dxel gunabdiidx reeman lojman rëb reeman:

—¿Chu na lojl: “Baca' ni naal loj, baguiaj?”

¹³ Per bën guin ad ragbeetaman chunin bayüjn laaman guial bi'ch Jesús loj ree benzien riga' yagaj. ¹⁴ Chi badxaag Jesús laaman lën yadooro' Jerusalén, abi' rëbaman lojman:

—Baguiaa ma bayajquil, ad güünril dol chitëe gaquil mazri guial loj ni goquil.

¹⁵ Dxel zia bën guin abi' biguiedxaman loj ree bën Israel guial Jesús naj bën bayüjn laaman. ¹⁶ Zeel guzunal reeman Jesús din gugüjt reeman laaman, guial rüjnman milagr guin ree dxej raziiladx bejn. ¹⁷ Per rëb Jesús loj reeman:

—Da Dadan Dios ad rbëzt rüjnman ni rayal güünman, zeel nëgajc naj rün zi'c rüjnman.

¹⁸ Zianan zeel mazri rejs guzuj reeman din gugüjt reeman laaman, ad guialzi rüjntaman ni ad najt gac dxej raziiladx bejn, në guial rüjn laagajcaman zi'c Dios chi rnieeman guial quijb xDadaman naj Dios.

Xguialrniabee Xi'n Dios

¹⁹ Rëb Jesús loj reeman:

—Diidxliczi rnin, achet zajc güün Xi'n Dios por xixgabzaman, rüjnman ni ruguiaaman rüjn xDadaman. Din graczi ni rüjnman rüjn gajc xi'nman. ²⁰ Din Dios rën xi'nman abi' rulüüman laaman gra ree ni rüjnman. Abi' mazri naj ni gulüü loj xi'nman ni yadxa da't lojdi. ²¹ Din zi'c rasban Dios bengüt ree rudëe tëëman guialnaban loj reeman, ziangajc rudëe xi'nman guialnaban loj ree bën nünman xgab. ²² Abi' ad Diost rüjn guialguxtis, bazuj xi'nman din güünman guialguxtis, ²³ din gap gra ree bejn xi'nman respejt zi'cgajc rajp reeman laaman respejt. Bën ad rajpt

Xi'n Dios respejt, ad rajp gajctaman respejt xDadaman Dios, b n guxhaal laaman.

²⁴ 'Diidxiczi rnin: B n ruzoob da diidxan rliadx t eman Dios, b n guxhaal naj, laaman ma rajp guialnaban tiblyaa lojman. Abi' ad rayaltraman casti din ad najtraman zi'c beng t par Dios, rajpaman guialnaban lojman. ²⁵ Diidxiczi rnin ma bidxin hor, abi' yandxej gajcan, b n naj ree zi'c beng t loj Dios gucaagdiajg reeman cha' xi'nman. Abi' ree b n guzoob xtiidxaman zajp reeman guialnaban tiblyaa con Dios. ²⁶ Din zi'c rajp Dios guialnaban, lasa'gajc guialnaban guin ma bad e loj xi'nman, ²⁷ abi' bad eman guialrniabee lojman din g unman guialguxtis, din laaman naj B n guxhaal Dios loj guidxliuj. ²⁸ Ad bal radxa lojdi ni rnin, din zadxin dxej guien gra ree beng t cha' Xi'n Dios, ²⁹ abi' yarii reeman l n baa. Dxel b n been ree ni ruladx Dios, yaban reeman, din gap reeman guialnaban tiblyaa con laaman. Gui ad ree b n been ni mal, yaban reeman din yayal reeman casti ni rayal reeman.

Ni rulu  guialrniabee rajp Jes s

³⁰ 'Achet zajc g nan por da xgabzan, r nan guialguxtis zi'c rniabee da Dadan. Abi' r nan guialguxtis zi'c rayal, din ad r ntanan zi'c naj da xgaban, r nanan zi'c r n da Dadan b n guxhaal naj. ³¹ Bal g  da diidx gajcan, achet lasajcan. ³² Per yu' ben ren r  da diidxan, abi' ragbeechaawan guial diidxlin. ³³ L jt guxhaal b n bignabdiidx ree loj Waj, abi' laaman ganax ni diidxli gunaman. ³⁴ Majsi ad ryaadxt yadxi'n ni gune ree bejn por naj, per canin lojdi ni guna Waj din chililadxidi gap t edi perdon. ³⁵ Waj goc zi'cgajczi tijb bajl ni re'c abi' rusnin, gui ad l jt d d babaadi bidxga'di tijb tiamp ni bal uman l jt. ³⁶ Per naj mazri naj ni gul n l jt guial loj ni bal u Waj l jt por naj. Din ni na da Dadan Dios g nan, laanan cay nan yan din guiguien guial diidxli laaman guxhaal naj. ³⁷ N  da Dadan b n guxhaal naj, laagajcaman be da diidxan, majsi ad waguiejntidi cha'man ad waguiaa t etidi laaman. ³⁸ Ad yu'guij t etidi xtiidxaman zeel ad rliadxtidi b n guxhaalaman. ³⁹ L jt con cudad da't roolidi loj xtiidx Dios, guial ragbeedi con laan gapidi guialnaban tiblyaa con Dios. Abi' majsi loj xtiidx gajcaman ruza't naj, ⁴⁰ per ad r ntidi chililadxidi naj din gapidi guialnaban guin.

⁴¹ 'Naj ad raguiltan guilies ree bejn da valoran. ⁴² Abi' ragbeechaawan guial ad walit r ndi Dios. ⁴³ Naj zial por da Dadan abi' ad ridxga'tidi naj. Per bal stijb bejn gui't por laagajcaman, laaman guidxga'di. ⁴⁴  Xoza chililadxidi naj? Awa mazri naguiejn r jndi guilies ree bejn xvaloridi luar yaya'ndi zagdxe loj Dios, din b n naj tijbzi Dios. ⁴⁵ Ad bal naladxidi naj gabec xguialquiadi loj Dios, din b n cwe'c xguialquiadi naj Moisejs, b n rb zidi g un l jt yudar. ⁴⁶ Bal bililadxidi ni r b Moisejs, n  naj zaliladxidi, din Moisejs baca loj xtiidx Dios lod ruza't naj. ⁴⁷ Per bal id rliadxidi ni bacaaman,  xoza chililadxidi ni rnin l jt?

6

Bayaan Jes s gaay mil bejn

(Mt. 14:13-21; Mr. 6:30-44; Lc. 9:10-17)

¹ Chi gud d gojc zian, dxel z  Jes s stiblad ro'nijsdoo riga' niz Galilea, nijsdoo la gajc Tiberias. ² B nguixiuj binal laaman, guial ruguiaa reeman milagr ree ni r jnman ray jnman b nragxuu ree. ³ Dxel w 'paman tijb

rugua' abi' gurenë ree xbejnman. ⁴ Dxejzii ree ma zidyob pascw, xlanij ree bën Israel. ⁵ Chi gules loj Jesús, abi' baguiaaman zëed ree bénguixiuj lod za'man, dxel rëbaman loj Felip:

—¿Ban yusii ree ni gaw gra ree bën guin?

⁶ Per rëbzaman zian din guidoon xhie guiëb Felip, din Jesús mal ragbeeman xhie güünman. ⁷ Dxel badxi' Felipan rëbaman:

—Ni'qui ni rüjn bejn gan loj xhujn bëew ad zadaant yo' guiadxtil din gaw tijbgaj reeman majsi tibia'dogajzan.

⁸ Dxel gunee stijb xbejn Jesús, bën la Andrejs bijch Simón Bëd, rëbaman:

⁹ —Laa tijb xindo ca' gaay guiadxtil con zatio'p bëjl za' guie. Per, ¿të'czi taan ni guin par gra bën guin?

¹⁰ Dxel rëb Jesús:

—Gol güjdx loj gra reeman din cwe reeman.

Abi' guial yu' da't guixya' yagaj, dxel gurej reeman. Naj reeman cost gaay mil xinguaaw. ¹¹ Dxel cwa' Jesús guiadxtil guin ree. Chi gulox badëeman quixtëe loj Dios, badëeman laa reen loj ree xbejnman persi gudi's reeman laa reen loj gra ree bën zojb yagaj. Ziangajc beenman con ree bëjl guin, badëeman laa reen zi'tczy guyën reeman. ¹² Chi ma bixienladx reeman, dxel rëbaman loj ree xbejnman:

—Gol bato'p gra ree ni laay baya'n, chitëe xhie guizëeb.

¹³ Zianz bato'p reeman laa reen, abi' bacha reeman chiptio'p dxüm nilaay baya'n ree loj gaay guiadxtil guin. ¹⁴ Chi baguiaa ree bejn milagr narooob ni been Jesús, rëb reeman:

—Walican bën guin naj bën rudëe xtiidx Dios loj ree bejn, bën naj gui't loj guidxliuj.

¹⁵ Per gogbee Jesús guial rën reeman chinë naguiejn reeman laaman din güün reeman laaman rey, dxel bazaman yagaj, wë'paman mazri lada yagaj guia' guin, lod su xtijbaman.

Rza Jesús lonijsdoo

(Mt. 14:22-27; Mr. 6:45-52)

¹⁶ Chi ma cabej guiaal, biguiajt ree xbejn Jesús ro'nijsdoo, ¹⁷ guyu reeman loj tijb barcw, abi' cadëd reeman loj nijs guin din guidxin reeman Capernaum. Ma bicajy, guiáad Jesús gadaman yadxin. ¹⁸ Dxel guzuloj cabi' bidoxh abi' wajs xtüjp nijs guin. ¹⁹ Chi ma gojc zi'c gaay o xho'p kilometro zë reeman, baguiaa reeman caza Jesús lojnijs guin cabigaman lod zë barcw guin, dád bidxeb reeman. ²⁰ Per rëbaman loj reeman:

—¡Najn, ad rdxebidi!

²¹ Dxel guyën reeman niuman loj barcw guin, per hor guin gajc bidxin reeman lod zë reeman.

Bigdiil ree bën bayaan Jesús laaman

²² Chi bareguiaal, bën riga' ree stiblad ro' nijs guin, ragbee reeman guial tijbzi barcw guzu yagaj, abi' gogbee reeman, lojn zë ree xbejn Jesús per ad nët laaman. ²³ Loj hor zii bidxin ree barcw ren za guiedx Tiberias, gajxh lod gudaw reeman guiadxtil chi gulox badëed Jesús quixtëe loj Dios. ²⁴ Chi baguiaa reeman achutri Jesús za' yagaj ni'qui ree xbejnman, dxel wë'p reeman loj ree barcw guin, zë reeman Capernaum zigdiil reeman laaman.

Jesús naj bën rudëed guialnaban

²⁵ Chi bidxin reeman Capernaum, badxejl reeman Jesús, abi' gunabdi-idx reeman lojman, rëb reeman:

—Mextr, ¿goc bi'til guie?

²⁶ Badxi' Jesúsán rëbaman:

—Ragbeechaawan, raguilidi naj guial gudawidi xt bigdxinladxidi, ad guial baguiaatidi milagr ree ni rënan. ²⁷ Ad chu'di xgab guialraw rara, gol guyu xgab guialraw runee guialnaban tiblyaa con Dios. Din laan naj ni runee Bén guxhaal Dios loj guidxliuj guial ma bacaabee Dios laaman.

²⁸ Dxel gunabdiidx reeman lojman rëb reeman:

—¿Xhie rayal yaguieenan din chile' yaguieenan ni rën Dios?

²⁹ Badxi' Jesús laan rëbaman:

—Ni rën Dios güündi naj guial chililadxidi bén guxhaalaman loj guidxliuj.

³⁰ Dxel rëb reeman lojman:

—¿Xhie gulüül dunujn din yaliduladxan lüj? ¿Xhietëe ree milagr rüjn?

³¹ Dux béngulal ree gudaw reeman mana chi guzu reeman niz loj yujbidx, zi'c rëb loj xtiidx Dios: “Badëeman guiadxtil biajb xanyabaa loj reeman gudaw reeman.”

³² Badxi' Jesús laan rëbaman:

—Naj rni lojdi: Ad Moisejst badëed guiadxtil guin, da Dadan naj Bén runee quijb guiadxtil za xanyabaa. ³³ Guiadxtil runee Dios, laan bi't diizd xanyabaa abi' ruman guialnaban loj bénguidxliuj.

³⁴ Abi' rëb reeman lojman:

—Dad, baneé guiadxtil guin du lojn zianczi.

³⁵ Rëb Jesús loj reeman:

—Naj naj guiadxtil runee guialnaban guin. Bén gui't lon, ad yu't dxej guiliaanman, ziangajc Bén chililadx naj, ad yu't dxej che'caman nijs.

³⁶ Per zi'c rnin lojdi, majsi ma baguiaadi naj, ad rliladxtidi naj. ³⁷ Gra ree Bén ma baneé da Dadan lon, gui't reeman lon, abi' Bén gui't lon, ad zasiejctan laaman. ³⁸ Din naj zial diizd xanyabaa, zidgaguienan zi'c rën da Dadan Bén guxhaal naj, ad par güntan zi'c rënan. ³⁹ Da Dadan Bén guxhaal naj, ni rënman naj guial gra ree Bén baneeman lon ni'qui tijb reeman ad zunijttan, rënman yasbanan laa reeman chi nit guidxliuj.

⁴⁰ Din rënman guial gra ree Bén yayagbee Xi'nman chililadx tëe reeman laaman, gap reeman guialnaban tiblyaa con laaman, guiáad naj yasban laa reeman chi nit guidxliuj.

⁴¹ Dxel guzuloj ree Bén Israel caneeguidx reeman Jesús, guial rëbaman: “Naj naj guiadxtil ni biguiajt diizd xanyabaa.” ⁴² Abi' rëb reeman:

—¿Nid laaxan naj Jesús ya, xi'n Xiëb? Dunuj ree naguieenbee xdadix con xniaax. Yan, ¿chexc zeel nax xanyabaa biguiajtxit?

⁴³ Dxel rëb Jesús:

—Gol bacwëez rnieeguidxidi naj loj lasa'di. ⁴⁴ Dios naj Bén guxhaal naj. Achut zile' gui't lon bal id zëedaman por da Dadan, abi' naj yasban laaman chi nit guidxliuj. ⁴⁵ Loj ree libr ni bacaa ree Bén badëe xtiidx Dios loj ree bejn, rëb: “Dios gulüü gra ree bejn.” Zeel gra ree Bén rucaagdiajg xtiidxaman, rusiid tëe reeman ni rulüüman laa reeman, laa reeman zëed lon.

⁴⁶ 'Achutczí waguiaa da Dadan Dios, tijbzi Bén guxhaalaman loj guidxliuj ma baguiaa laaman. ⁴⁷ Diidxliczi rnin, Bén rliladx naj rapjapan guialnaban tiblyaa con Dios. ⁴⁸ Naj naj guiadxtil ni runee

gualnaban. ⁴⁹ Xbéngulalidi gudaw mana loj yujbidx, per ni'czi zian güjt gajc reeman. ⁵⁰ Per naj canin lojdi xcwent guiadxtil za xanyabaa, bén gaw laan gapaman gualnaban tiblayaa con Dios. ⁵¹ Naj naj guiadxtil naban ni biyajb diidz xanyabaa. Bén gaw guiadxtil guie zajpaman gualnaban tiblayaa con Dios. Guiadxtil ni rudëdan, laan naj quijb da cuerpan, gudëdanan din gap ree bénguidxliuj gualnaban.

⁵² Dxel guzuloj ree bén Israel guin cadildiidx reeman, rëb reeman:

—¿Xhienaag gunee xin guin xcuerpix yadaaw ree?

⁵³ Abi' rëb Jesús loj reeman:

—Naj rni lëjt, bal id zajwidi xcuerp Bén guxhaal Dios, bal id zë' tëëdi xrejman, ad zajptidi gualnaban. ⁵⁴ Per bén gaw da cuerpan guië' tëëman da rejnán, zajpaman gualnaban tiblayaa con Dios, abi' naj yasban laaman chi nit guidxliuj. ⁵⁵ Din da cuerpan naj quijb gualraw, guiáad da rejnán naj quijb ni guië' bejn. ⁵⁶ Abi' bén raw da cuerpan rë' tëëman da rejnán, laaman nabannë naj, guiáad naj nabannë' laaman. ⁵⁷ Da Dadan bén guxhaal naj, rajpaman gualnaban, abi' naj nabanán por laaman. Ziangajc bén gaw da cuerpan, zajpaman gualnaban tiblayaa con Dios por naj. ⁵⁸ Naj caní xcwent guiadxtil ni biguiajt xanyabaa. Abi' guiadxtil guie ad najtan zi'c naj mana ni gudaw xbéngulalidi, din laa reeman majsi gudaw reeman mana guin, per güjt gajc reeman. Guiáad bén gaw guiadxtil guie zajpaman gualnaban tiblayaa con Dios.

⁵⁹ Zian balüü Jesús bejn ree lën yadoo Capernaum.

Diidx runee gualnaban tiblayaa

⁶⁰ Chi gulox bacaagdiajg reeman ni balüü Jesús laa reeman, zien ree bén zinal laaman rëb:

—Nawëëg da't naj yayignia' ree ni naman. ¿Chu zajc guidxga' laaman?

⁶¹ Chi gogbee Jesús ni canee reeman, gunabdiidxaman loj reeman, rëbaman:

—¿Rüjnnaa ni rnin lëjt ya? ⁶² ¿Xhieza güündi bal guguaadi Bén guxhaal Dios yayë'paman lod guzuman gocli? ⁶³ Tijbzi por xSprijt Dios rajp bejn gualnaban tiblayaa, bejn ad zile't güün laazaman xhienin. Abi' naj por xSprijt Dios zëëd ree diidx ni gunen lojdi, por ree diidx guin rajp bejn gualnaban. ⁶⁴ Per lëjt yu'di ad waliladxt.

Rëb Jesús zian gual ragbeechaawaman diidz yaløj chu ree ad riladxt laaman chu tëë yayü laaman. ⁶⁵ Rëb tëëman loj reeman:

—Zeel ma rnin lojdi gual achut zile' gui't lon bal id zëëdaman por da Dadan Dios.

⁶⁶ Diidz nadxel, zien ree bén zinal Jesús guro'nladx laaman, abi' ad gusanëtri reeman laaman. ⁶⁷ Dxel rëb Jesús loj guidxiptio'p ree xbejman:

—¿Në lëjt rën yaguaiaj ya?

⁶⁸ Per badxi' Simón Bëd laan, rëbaman:

—Dad, ¿chu loj yo'n? Awa xtiidxil zidnë gualnaban tiblayaa con Dios.

⁶⁹ Dunujn ma baliduladx rayagbee tëën gual lüj naj Cristo, Xi'n Dios naban.

⁷⁰ Dxel rëb Jesús loj reeman:

—¿Nid naj gule guidxiptio'pιδi ya? Abi' yan tijb gajqui lëjt naj zi'c xindxab.

⁷¹ Rëb Jesús zian por Judas Iscariote, xi'n Simón, din Judas guin naj bén bayü laaman, majsi tijb gajc xbejman najman.

7

Ad rliadxt ree bijch Jesús laaman

¹ Chi gudëd gojc zian, wej Jesús loj ree guiedx riga' niz Galilea. Ad guyëntaman niejman niz Judea, guial cayguil ree bén Judea guin laaman din gugüjt reeman laaman. ² Per guial ma zidyob lanij ni rüjn ree bén Israel, chi rbej reeman lën ranch, ³ rëb ree bijch Jesús lojman:

—Brii, wej niz Judea, din në ree xbejnl bén riga' ree niz ni guguaa milagr rüjnl. ⁴ Din chi chu rën gagbee bejn ni rüjnman, ad rayalt güünman laan ralan. Yan zi'c rüjnl milagr ree, beenan loj gra ree bejn.

⁵ Gunee ree bijch Jesús zian, guial ni'qui laa reeman ad rliadxt laaman. ⁶ Dxel rëb Jesús loj reeman:

—Ad wadxint da horan, per par lëjt xhietëez horan naj zagdxe. ⁷ Ad zajct guidxe'ch bénguidxliuj lëjt, sa'n naj rdxe'ch reeman naj guial rën loj reeman ad laat naj ni rüjn reeman. ⁸ Gol wej lanij guin, sa'n naj ad zazaagajtan, din ad wadxint hor ni gazaan.

⁹ Chi gulox rëbaman loj reeman zian, baya'nman Galilea.

Wej Jesús xlanij ree bén Israel

¹⁰ Chi ma zë ree bijch Jesús, dxel nëman zë lanij guin, per ralanzi zëman chitëe chu gagbee. ¹¹ Per yu' ree bén Israel raguil laaman loj lanij guin, rëb reeman:

—¿Con bén guin ya'n?

¹² Loj gra ree benzien we lanij guin, zienloj ni rniee reeman Jesús. Yu' reeman rëb: “Benza'can”, yu'za reeman rëb: “Ad benza'ctan, rusquieeman bejn ree.”

¹³ Per achutczi ruza't laaman loj gra bejn, guial rdxeb reeman guxtis Israel ree.

¹⁴ Chi gurol xuman ni cayajc lanij guin, guyu Jesús lën yadooro' Jerusalén, abi' guzuloj culüüman bejn ree. ¹⁵ Guiáad ree bén Israel badxaloj reeman, rëb reeman:

—¿Chexc ya'n contzi gra gagbeex, awa ni'quid basiiditix?

¹⁶⁻¹⁷ Dxel rëb Jesús loj reeman:

—Ad guictan carii ni culün lëjt, zëëdan por Dios, bén guxhaal naj. Bal chu rën güün zi'c rënman, zignia'man bal ni carii guicanan culün lëjt o zëëdan por Dios ya. ¹⁸ Bén rulüü ganaxzi ni rbëëgujcaman, rüjnman laan din guilies ree bejn xvaloraman. Per bén rüjn mazri din guilies bejn xvalor Dios, bén guxhaal laaman, laaman rniee ni diidxli, ad rusquieetaman bejn.

¹⁹ Yan, majsi basa'nnë Moisejs lëjt ley, per ni'qui tijbidi ad rüjnt zi'c rëb ley guin. ¿Chexquiza zeel rëndi gugüjtidi naj?

²⁰ Badxi' ree bén guinan, rëb reeman:

—Xindxab yu' luxdool. ¿Chuczi rën gugüjt lüj?

²¹ Abi' rëb Jesús loj reeman:

—Por tijbzi milagr ni benan radxalojdi. ²² Abi' lëjt gunabee Moisejs lëjt guial gra ree xinguaaw chu' sen, (majsi ad por Moisejst ru bejn sen guin, mal rüjn ree dux bengol gulal ree zian), abi' lëjt rgu'di bejn ree sen, majsi dxej raziiladx bejn. ²³ Yan, bal chitëë gusaglojdi ley ni basa'nnë Moisejs lëjt, rgu'di sen bejn ree majsi dxej raziiladx bejn. ¿Chexquiza zeel ralendi guial bayünan tijb bénraxuu dxej raziiladx bejn? ²⁴ Ad rüjndi xgabmal por ni ruguaazidi rüjn bejn, yaloj xgaj gol gogbee zagdxe xhie cayüjnman.

Rëb Jesús ban zaman

²⁵ Yu' ree bën Jerusalén guzuloj rniabdiidx loj lasa' reeman, rëb reeman:

—¿Nid bën guinan cayguil reeman ya din gugüjt reeman laaman?
²⁶ Abi' yan laaman canee niz loj ree bejn, abi' ni'qui chut xhie rëb lojman. ¿Ni ma bililadx ree guxtis ya'n guial laaman naj Cristo? ²⁷ Per dunuj ree rayagbeechaaw ban zaman, guiáad chi gui't Cristo, achut gagbee ban saman.

²⁸ Chi biguiejn Jesús zian, la'tgaj culüüman bejn ree lën yadooro' Jerusalén, dxel guneeman rejs rëbaman:

—¡Lëjt rëb nünbeedi naj abi' ragbeedi ban guzaan! Per ad zialtan por naj gajc, zialan por quijb bën rniabee bën ad nünbeetidi. ²⁹ Per naj nünbee laaman guial zialan diidz lod za'man, laa tëëman guxhaal naj.

³⁰ Chi biguiejn reeman zian, guyën reeman niniaaz reeman laaman, per achut gunaaz laaman, guial gad hor gal guiniaazaman. ³¹ Loj ree bénguixiuj za' yagaj zien reeman bililadx laaman, abi' rëb reeman:

—Chi gui't Cristo, ¿wen mazri zien ree milagr güünman guial loj bën guin ya?

Guyën reeman niniaaz reeman Jesús

³² Biguiejn ree bënfarisew ni rniee ree bejn Jesús. Abi' laa reeman con ree bixhioz rniabee, guxhaal reeman bën rajp ree ro' yadooro' Jerusalén din guiniaaz reeman Jesús. ³³ Dxel rëb Jesús:

—Ad xchejtri gazunë'n lëjt, dxel yaya'n lod za' bën guxhaal naj. ³⁴ Yaguuilidi naj, per ad zadxejltidi naj, din ad zile't gui'tidi lod gazun.

³⁵ Abi' ree bën Israel guin guzuloj rniabdiidx loj lasa' reeman, rëb reeman:

—¿Banczi zajc che bën guin din ad zadxejltaman? ¿Ni zejman lod zojb ree bën Israel loj ree benzit ya, chiglüüman laa reeman në ree bën ad najt bën Israel? ³⁶ ¿Xhie rën guiëb guial naman: “Yaguuilidi naj per ad zadxejltan, din ad zile't gui'tidi lod gazun”?

Nijs runee guialnaban

³⁷ Dxej rliox lanij guin naj mazri dxej zojbloj, dxejzii guzuli Jesús guneeman rejs, rëbaman:

—Bal chu lëjt re'c nijs, gol guda lon din guië'dan. ³⁸ Din bën rliiladx naj zi'c ca loj xtiidx Dios, lën luxdooman gach nijs runee guialnaban.

³⁹ Chi gunee Jesús zian, rën guiëb xtiidxaman guial gra ree bën chililadx laaman zabajnnë reeman xSprijt Dios. Din nadxel ad wayi'tt xSprijt Dios guial ad waguiajt Jesús lod canabeeman.

Gula' lasa' ree bejn

⁴⁰ Yu' ree bën no'ch loj ree benzien guin, chi bacaagdiajg reeman ni gunee Jesús, rëb reeman:

—Walican, bën guin naj gui't guidgadëë xtiidx Dios loj ree bejn.

⁴¹ Yu'za reeman rëb:

—Bën guin naj bën bacaabee Dios.

Per yu' reeman rëb:

—Ad laataman naj Cristo, din ad niz Galileat naj griiman. ⁴² Loj xtiidx Dios ca guial loj xdiaa rey Davi grii Cristo, abi' Belén galaman ladx gajc rey Davi.

⁴³ Zian gojc dxel gula' lasa' reeman por Jesús. ⁴⁴ Zien reeman guyën niniaaz laaman, per achut bayax niniaaz laaman.

Ad bililadxt ree guxtis Jesús

⁴⁵ Chi bayejc ree b́en rajp ro' yadoo guin lod za' ree b́enfarisew guin con ree bixhioz rniabee guin. Ŕeb reeman loj reeman:

—¿Chexc zeel ad bidnétidi laax?

⁴⁶ Dxel ŕeb ree b́en rajp ro' yadoo guin:

—¡Ad goct wayu b́en guiniee zi'c rnieex!

⁴⁷ Abi' ŕeb ree b́enfarisew guin:

—¿Ńe ĺejt ma cwéjb basquieex ĺejt ya? ⁴⁸ ¿Wen yu' ree dux guxtis ree, o b́enfarisew ree ma bililadx laax ya? ⁴⁹ ¿Nid ragbeedi ya guial zien ree b́en guin banijt loj Dios guial ad núnbeet reeman ley?

⁵⁰ Per b́enfarisew la Nicodemo b́en bignaj Jesús tijb guxhin, ŕebaman loj reeman:

⁵¹ —Loj dux ley ree ca guial ad zile't yaguie'ch ree xhie casti rayal tijb bejn, chi gad dunuj ree yacaagdiajg xtiidxaman, din chile' yayagbee ree xhie beenman.

⁵² Badxi' reeman laan ŕeb reeman:

—¿Wen ńe ĺuj za'ńe ree b́en Galilea ya? Basiid zagdxe loj xtiidx Dios din gagbeel ad goct warii b́en rudéé xtiidx Dios loj ree bejn niz Galilea.

⁵³ Dxel bare'ch reeman zia lidx lidx reeman.

8*Béngunaa banaazńe xinguaaaw ren*

¹ Per Jesús źeman ruguia' Olivos. ² Chi bareguiaal, rsil badxinman ĺen yadooro' Jerusalén stijb. Zien ree bejn bido'p lod za'man, dxel gurejman guzuloj culúúman laa reeman. ³ Abi' mextr rulúú ree ley con ree b́enfarisew bidxinné tijb béngunaa banaazńe tijb xinguaaaw, dxel bazuj reeman laaman galay ree b́en guin, ⁴ zianz ŕeb reeman loj Jesús:

—Mextr, banaaz béngunaa guie loj mer hor ni yu'ńeman xinguaaaw ren.

⁵ Abi' loj ley basa'ńńe Moisejs dunuj ree ca guial lasa' béngunaa guie rayal guiétaman con guiaj. ¿Laadx ĺuj xhie nal?

⁶ Gunabdiidx reeman zian dín guidoon xhie guiébaman dín gac gutedia' reeman laaman. Per con basajb lojman abi' guzulojman cucaaman luyuj con xbacwénman. ⁷ Per guial laa reeman canabdiidxzi canabdiidx reeman lojman, abi' babejlíman, ŕebaman loj reeman:

—Chutééz b́en ad wayüjnt dol, yalój laaman gucaaguaiaj béngunaa guie.

⁸ Dxel basajb lojman stijb, basnuu bacaaman luyuj guin. ⁹ Chi biguiejn reeman ni guneeman, guzuloj cayza tijbgaj reeman, diizd mazri bengol xt bara reeman baza. Tijbzi béngunaa guin baya'n con Jesús loj ree b́en riga' yagaj. ¹⁰ Dxel babejlíman, ŕebaman loj béngunaa guin:

—¿Con ree b́en bidńe ĺuj? ¿Ni'qui tijb reeman achut xhie been ĺuj ya?

¹¹ Dxel ŕeb béngunaa guin:

—Dad, ni'qui tijbaman.

Abi' ŕeb Jesús:

—Ni'qui naj achet günan ĺuj. Baguiaj yan, ad güünril dol.

Jesús naj bajl par bénguidxliuj

¹² Dxel gunee Jesús stijb, ŕebaman loj ree b́en riga' yagaj:

—Naj naj bajl rusni bénguidxliuj. Abi' b́en guzoob da diidxan, zani xquiarguiejnman xhienaag gapaman guialnaban tiblayaa con Dios, ad yu' téét dxej guicajy xquiarguiejnman.

¹³ Abi' ree b́enfarisew ŕeb reeman lojman:

—Lüj gajc ruza't lüj, abi' achet lasajc xtiidxil.

¹⁴ Dxel rëb Jesús loj reeman:

—Lasajc da diidxan, majsi naj gajc cane por naj, din naj ragbee ban zialan ban tëë gan, sa'n lëjt ad ragbeetidi ban zialan ban tëë gan. ¹⁵ Lëjt rnieedi bejn zi'ctizi naj xixgabidi, sa'n naj achut ruzatan. ¹⁶ Abi' bal guzatan bejn, ganen diidxli, din ad zanetan zi'c naj da xgaban, në da Dadan bën guxhaal naj ragbee guial diidxli naj ni ganen. ¹⁷ Abi' loj xleydi ca guial chi yu' tio'p bën rniee tiblojzi, diidxliqui naj ni rniee reeman. ¹⁸ Yan, naj gajc naj tijb bën rniee por naj, abi' da Dadan bën guxhaal naj, naj stijb bën rniee por naj.

¹⁹ Gunabdiidx reeman lojman rëb reeman:

—¿Con xdadil?

Badxi'man laan rëbaman:

—Lëjt ad nünbeetidi naj, ad nünbee tëëtidi da Dadan, din bal nünbeedi naj, ziangajc nünbeedi da Dadan.

²⁰ Zian gunee Jesús la'tgaj rulüman bejn ree lën yadooro' Jerusalén, niz lod za' ree ni rgu' reeman gon. Per achut gunaaz laaman, din ad wadxint hor guiniaazaman.

Lod gan ad zile't gui'tidi

²¹ Gunee Jesús stijb, rëbaman:

—Chi ma gan, zaguilidi naj, per zëjtnë xtolidi, din lod gan ad zile't gui'tidi.

²² Dxel rëb ree bën Israel guin:

—¿Wen ni laagajcaman gugüjt laaman ya, zeel naman guial ad zajct yo' ree lod cheman?

²³ Abi' rëb Jesús loj reeman:

—Lëjt naj bën ladguiajt guie, sa'n naj ladya ni zialan. Lëjt naj bénguidxliuj, sa'n naj ad bénguidxliujt naj. ²⁴ Zeel rnin, zëjtnë xtolidi. Din bal id zaliladxidi guial naj naj bën najn, zëjtnë xtolidi.

²⁵ Dxel gunabdiidx reeman lojman, rëb reeman:

—¿Chuza lüj?

Badxi'man laan rëbaman:

—Ma rnin lojdi diizd yaloj. ²⁶ Zien ni ra'pan gulün lëjt ni ganenë' tëën lëjt. Per naj, ni canen loj bénguidxliuj naj ni rucagdiagan rniee bën guxhaal naj, abi' ni rnieeman naj diidxli.

²⁷ Per laa reeman ad gogbeet guial Diosan ruza'taman. ²⁸ Zeel rëbaman loj reeman:

—Chi ma beendi zi'ctizi rëndi con Bén guxhaal Dios, dxel gagbeedi najcan, gagbee tëëdi guial achetctzi rünan por da xgabzan, naj rnie ni ma balüü da Dadan naj. ²⁹ Din laaman guxhaal naj, laaman za' con naj, abi' ad yu't dxej cwëeladxaman naj, guial zianctzi rünan ni rayuladxaman.

³⁰ Chi rëb Jesús zian, zien ree bejn bililadx laaman.

Bën wali naj xbejn Dios

³¹ Rëb Jesús loj ree bën Israel bililadx laaman:

—Bal gusnuu guzoobidi da diidxan, waliqui najdi da bejnan, ³² abi' zünbeedi conin naj diidxli, abi' por diidxli guin zalaadi.

³³ Badxi' reeman laan rëb reeman:

—Dunujn zio'p loj xdiaa Abraham, abi' ad yu't dxej wayajcan zi'c bën nado'. ¿Chexquiza zeel nal du lojn, guial por diidxli zalaan?

³⁴ Dxel rëbaman loj reeman:

—Diidxli rnin lojdi, guial graczi bén rüjn ganaxzi dol, laa reeman naj zi'c bén nado' loj dol. ³⁵ Abi' tijb bén nado' loj bejn, ad zile't guiëbaman xfamilaman naj xpatronman, sa'n xi'n patron guin zile' guiëbix xfamilixan. ³⁶ Zeel bal Xi'nman guslaa lëjt, ad najtridi zi'c bén nado'. ³⁷ Ma qui ragbeen guial loj xdiaa Abraham zëedidi, per lëjt rën gugüjt naj guial ad rayuladxtidi da diidxan. ³⁸ Naj rni ni ma balüü da Dadan naj, sa'n lëjt rüjndi zi'c na xDadidi güüdi.

³⁹ Badxi' reeman rëb reeman:

—Dux Dadan naj Abraham.

Dxel rëb Jesús loj reeman:

—Bal niajquidi xi'n Abraham, züjndi zi'c beenman. ⁴⁰ Per yan, majsi ma rnin lëjt diidxli zi'c balüü Dios naj, lëjt rëndi gugüjtidi naj. ¡Abi' Abraham ad yu't dxej nünjman zian! ⁴¹ Sa'n lëjt rüjndi zi'cgajc rüjn xDadidi.

Abi' rëb reeman loj Jesús:

—Dunuyn achut mazri xi'n nayajcan. Tijbzi Dios naj dux Dadan.

⁴² Dxel rëb Jesús loj reeman:

—Bal walidi Dios naj xDadidi, guiëndi naj, din por laaman zialan loj guidxliuj. Ad zialtan por naj gajc, zialan por Dios bén guxhaal naj. ⁴³ Abi' ad rignia'tidi ni rnin, guial ad rëntidi gucaagdiajguidi da diidxan. ⁴⁴ XDadidi naj xindxab, abi' rüjndi zi'c rënx güüdi, din diidz yalaj ruladx xindxab guin gugüjtix bejn. Ad yu't dxej chinalix ni naj diidxli, din ad rnieetix diidxli. Chi rnieex diidx rusquiee, achet naladxix, din laax naj xin rusquiee naj tëex xdad guialrusquiee. ⁴⁵ Per guial naj rni lëjt ganax diidxli, ad rliladxtidi naj. ⁴⁶ ¿Chu lëjt zajc na guial yu' xhie dol ma benan? Abi' bal diidxli naj ni canen, ¿chexquiza zeel ad rliladxtidi naj? ⁴⁷ Bén naj xbejn Dios rucaagdiajgaman xtiidxaman, per lëjt ad xbejntaman najdi, zeel ad rucaagdiajgtidi xtiidxaman.

Mal yu' Jesús chi gad Abraham gal

⁴⁸ Dxel rëb ree bén Israel guin loj Jesús:

—Waliqni ni ranan guial xindxab yu' luxdool naj tëel bén Samaria.

⁴⁹ Badxi'man laan rëbaman:

—Achut xindxab yu' luxdon, naj cuzob xtiidx da Dadan, per lëjt ganax diidxguijdx rnieedi naj. ⁵⁰ Naj ad raguiltan guilies ree bejn da valoran, majsi yu' bén rën güün bejn zian, abi' laaman rüjn xguialguxtis. ⁵¹ Diidxli rnin lëjt, bén guzoob da diidxan, ad yu't dxej guiëtaman.

⁵² Dxel rëb ree bén Israel guin lojman:

—Yanri ma rayagbeechaawan guial xindxabqui yu' luxdool. Abraham në gra ree bén badëë xtiidx Dios loj ree bejn, güjt reeman, guiáad lüj nal: “Bén guzoob da diidxan, ad yu't dxej guiëtaman.” ⁵³ ¿Wen mazri lasajquil ya guial loj dux béngulal ree Abraham? Güjtaman, güjt tëe ree bén badëë xtiidx Dios loj ree bejn. ¿Laadx lüj chu naladxil najl?

⁵⁴ Abi' rëb Jesús loj reeman:

—Bal naj gajc gales da valoran, achet lasajc ni ganen por naj. Per bén rlies da valoran naj da Dadan, bén nagajquidi naj xDiosidi. ⁵⁵ Lëjt ad nünbeetidi laaman, sa'n naj nünbeen laaman. Abi' bal ganin ad nünbeetan laaman, nëgajc naj ma naj bén rusquiee zi'cgajc lëjt. Per nünbeen laaman abi' ruzoban xtiidxaman. ⁵⁶ Xbéngulalidi Abraham, babaaman guial guguaaman dxej ni guialan. Abi' chi baguaaman dxej guin, mazri babaaman.

⁵⁷ Dxel rëb ree bën Israel guin lojman:

—Ni'qui gadil chu' tü'pchii ijz, ¿guiáad lüj ya nal baguiaal Abraham?

⁵⁸ Abi' guneee Jesús rëbaman:

—Diidxli rnin lojdi, mal nabanan chi gad Abraham chu'.

⁵⁹ Dxel gules reeman guiaj din nucaa reeman laan Jesús. Per laa guzëëb gajcaman galay ree bejn, abi' gudëdaman galay reeman bariiman lën yadoo guin, laa zia gajcaman.

9

Rayüjn Jesús tijb xin ad ranit loj

¹ Chi cadëd Jesús tiblajt, baguiaaman tijb xin ad ranit loj diizd chi golix.

² Dxel gunabdiidx ree xbejnman lojman, rëb reeman:

—Mextr, ¿chexc zeel ad ranit loj bën guin diizd chi golaman? ¿Por xtol ree xDadaman ya, o por xtol gajcaman?

³ Badxi' Jesúsán, rëbaman:

—Najman zian ad por xtoltaman ad por xtol tëët ree xDadaman. Gojlaman zian din chi yayajcaman, guguiaa ree bejn xguialrniabee narooob Dios. ⁴ Yan, la'tgaj yu' tiamp, rüjn naguiejn yaguieen ree ni na bën guxhaal naj, din ma yayaaloj tiamp ni achetri zajc gac. ⁵ Abi' la'tgaj za'n loj guidxliuj guie, naj naj bajl rusni bénguidxliuj.

⁶ Chi gulox guneeman zian, guxhie' xhiejnman luyuj, abi' beennëman laan bajn, persi gudëëbaman laan guiaaloj xin guin. ⁷ Abi' rëbaman lojx:

—Bitiib lojl ro' tanc Siloé —Siloé rën guieëb ni guxhaalaman.

Dxel bitiib lojx, abi' chi bayejquix, ma rani lojx. ⁸ Dxel bën zojb ree gajxh lod zojbix con ree bën ragbee guial laax rniab carda, rëb reeman:

—¿Nid xin guinan rbej rniab carda ya?

⁹ Yu' reeman rëb:

—Laaquixan.

Yu'za reeman rëb:

—Ad laatixan, rguienzix zian.

Per laax rëb:

—Najcan.

¹⁰ Dxel gunabdiidx reeman lojx, rëb reeman:

—¿Xhieza naag gojc bani lojl?

¹¹ Badxi'xan, rëbix:

—Bën la Jesús been bajn, gudëëbaman guiaalon abi' naman: “Wej bitiib lojl ro' tanc Siloé.” Dxel wan, chi gulox gudiib lon, max bani lon.

¹² Abi' rëb reeman lojx:

—¿Conzaman yan?

Zeel rëbix:

—Ad ragbeetan.

Gunabdiidx ree bënfarisew loj xin guin xhienaag guzuloj rani lojx

¹³ Loj hor zii binë reeman xin bayajc guiaaloj guin loj ree bënfarisew,

¹⁴ din dxej been Jesús bajn persi bayüjnman guiaaloj xin guin, dxej guin raziiladx ree bejn. ¹⁵ Dxel gunabdiidx ree bënfarisew guin lojx xhienaag guzuloj rani lojx. Abi' rëbix loj reeman:

—Jesús gudëëb bajn guiaalon, dxel bitiib lon, yan ma ranin.

¹⁶ Yu' ree bënfarisew guin rëb:

—Bën bayüjn guiaalojl ad xbejnt Diosan, din ad rajptaman respejt dxej raziiladx bejn.

Per yu'za reeman rëb:

—¿Xhienaag güünman milagr guie ree, bal najman bëndol?

Garent garen rëb reeman. ¹⁷ Abi' gunabdiidx reeman loj xin bayajc guin zatijb, rëb reeman:

—¿Laadx lüj xhie nal chu naj bën bayüjn guiaalojl?

Badxi'xan rëbix:

—Naj rni guial laaman naj bën rudëë xtiidx Dios loj ree bejn.

¹⁸ Per bën Israel guin ree ad rliladxt reeman, din ad banit lojx abi' yan ma ranin, dxel gurejdx reeman xdadix con xniaax, ¹⁹ abi' gunabdiidx reeman loj reeman, rëb reeman:

—¿Xin guien naj xi'ndi ya, xin rëbidi ad ranit loj diizd gojlax? Yan, ¿xhienaag gojc zeel ma ruguiaax?

²⁰ Badxi'xan reeman laan rëb reeman:

—Dunuyn rayagbee guial du xi'nanan, rayagbee tëen guial diizd chi golix ad ranit lojx. ²¹ Per ad rayagbeetan xhienaag gojc zeel rani lojx, ad rayagbee tëtëtan chu bayüjn guiaalojx. Gol gunabdiidx lojx, ma najx xingol, ma zajc na laagajquix lojdi xhienaag gojc.

²² Rëb ree xdadix zian guial rdxeb reeman xguxtis ree bën Israel, din ma baya'n reeman diidx, chutëéz bën guiëb guial Jesús naj Cristo, ad zatiëjbtri reeman chu'man lën yadoo. ²³ Zianan zeel rëb reeman: “Gol gunabdiidx lojx, ma najx xingol.”

²⁴ Dxel gurejdx reeman laax zatijb, abi' rëb reeman:

—Laa Dios ruguiaa, guna diidxli, din dunuyn rayagbee guial bëndol naj bën bayüjn lüj.

²⁵ Badxi'xan rëbix:

—Ad ragbeetan bal bëndolan o ad bëndoltan ya. Tijbzi ni ragbeen naj guial ad banit lon, abi' yan ma ruguian.

²⁶ Dxel gunabdiidx reeman lojx stijb, rëb reeman:

—¿Xhienaag beennëman lüj? ¿Xhienaag beenman persi rani lojl?

²⁷ Badxi'xan rëbix:

—Ma rnin lojdi, abi' lëjt ad rliladxtidi naj. ¿Chexc zeel rëndi ganin zatijb xhienaag beenman? ¿Wen në lëjt rën gac xbejnman ya?

²⁸ Dxel gudilë reeman laax rëb reeman:

—Lüj bal najl xbejnman, sa'n dunuyn xbejn Moisejs nayajcan. ²⁹ Din dunuyn rayagbee Dios gunee Moisejs, per bën guin ni'quid rayagbeetan ban zaman.

³⁰ Badxi'xan rëbix:

—¿Xhiechalnin zeel ad ragbeetidi ban zaman! Guiáad naj por laaman ma rani lon. ³¹ Dunuj ree rayagbeechaaw guial ad ridxga't Dios xtiidx ree bëndol, ridxga'man xtiidx ree bën ruzoob xtiidxaman rüjn tëë reeman zi'c rënman. ³² Ad goct wacaagdiajg ree guial chu' bën yayüjn loj bën ad ranit loj diizd gojlaman. ³³ Yan, bal id por Dios zëed bën guin, achetzi nile' nünman.

³⁴ Dxel rëb reeman lojx:

—Lüj gojl con dol, ¿wed lüj gulüü dunuyn?

Abi' babëë reeman laax yagaj.

Bililadx xin bayajc guin Jesús

³⁵ Gogbee Jesús ni guzac xin bayüjnman, dxel chi badxaagaman laax, rëbaman lojx:

—¿Rliladxil bën guxhaal Dios loj guidxliuj ya?

³⁶ Badxi'xan rëbix:

—Dad, guna chunin, din chililadxan laaman.

³⁷ Dxel rëbaman lojx:

—Ma baguiaal laaman, laaman naj Bén caneenël.

³⁸ Abi' bazuxib xin guin lojman, rëbix:

—Rliladxan lüj, Dad.

³⁹ Zianz rëb Jesús:

—Bialan loj guidxliuj guie din gūnan guialguxtis, din por naj yani loj ree Bén ad ranit loj, guiáad ree Bén rani loj, ad zanit loj reeman.

⁴⁰ Yu' ree Bénfarisew za'në laaman. Chi biguiejn reeman rëbaman zian, rëb reeman:

—¿Wen në dunujn ad ranit duloj ya?

⁴¹ Dxel rëb Jesús loj reeman:

—Bal id rani lojdi, achet dol rajpidi. Per guial nadi rani lojdi, rajpidi dol por ree xtolidi.

10

Bén rniaj xiil

¹ Rëb tëë Jesús:

—Diidxliczi rnin lojdi, Bén ad rut niz ro' xgurajl ree xiil, Bén ru niz lood ren, laaman naj béngubaaan. ² Per Bén ru niz ro' xgurajl reeb, laaman naj Bén rniaj laa reeb. ³ Abi' rxhial Bén rajp ro' xgurajl reeb persi ru Bén rniaj laa reeb, abi' chi rbejdxaman tijbgaj reeb, rayünbee reeb cha'man. Zianz rbëëman laa reeb lën gurajl guin. ⁴ Abi' chi ma brii gra reeb, dxel rniedaman loj reeb, guiáad laa reeb rnal laaman, guial nünbee reeb cha'man. ⁵ Per ad rnalt reeb tijb Bén ad nünbeet reeb, ruxüünl reeb lojman, guial ad nünbeet reeb cha'man.

⁶ Chi gulox gunee Jesús zian, ad bignia't ree Bén riga' yagaj xhie rën guiëb ni guneeman.

Jesús naj zi'c Bén rniaj xiil ree zagdxe

⁷ Rëb Jesús loj reeman zatijb:

—Diidxliczi rnin, naj naj zi'c ro' xgurajl ree xiil, lod ru reeb. ⁸ Gra ree Bén bi't chi gad naj guial naj reeman zi'c béngubaaan, rban reeman rusagzi tëë reeman. Per ree Bén naj da bejnan ad bidxga't reeman laa reeman. ⁹ Naj naj ro' port, abi' Bén ru ro' port guie zajpaman perdon, dxel ma zile' chu'man yarii tëëman zi'cgajczi tijb xiil abi' zian rdxejl ni rawib.

¹⁰ 'Béngubaaan ri'tzaman din cwanman, gugüjtaman gunijt tëëman, sa'n naj zialan din gapidi guialnaban, gap tëëdi zro' da'tan. ¹¹ Naj naj zi'c tijb Bén rniaj xiil ree zagdxe. Abi' Bén rniaj xiil ree zagdxe xt xguialnabanman rudëëman por laa reeb. ¹² Per Bén rniaj laa reeb por milia, chi ruguiaaman zëed cuyojt, laa ruxüün gajcaman, rbëëladxaman xiil guin ree guial ad najt reeb xi xiilaman në guial ad najtaman Bén rniaj ree xiil, dxel rniaaz cuyojt guin laa reeb abi' rtie'chib laa reeb. ¹³ Laaman rbëëladx laa reeb, din por miliazi rniajman laa reeb abi' achet naladxaman por laa reeb.

¹⁴⁻¹⁵ 'Naj naj zi'c Bén rniaj xiil ree zagdxe. Abi' zi'c nünbee da Dadan naj, zian nünbeen laaman, ziangajc nünbee ree da xiilan, guiáad laa reeb nünbee naj. Abi' xt da guialnabanan gudëdan por laa reeb. ¹⁶ Ra'p tëën stibcwaan ree xiil ad yu't lën gurajl guie. Në laa reeb ryaadx chigxin, laa reeb guzoob da diidxan, yadxaag grop cwaa reeb gac reeb tijbzi, abi' tijbzi bejn gap laa reeb.

¹⁷ 'Da Dadan Dios rënman naj guial naj gajc rudë naj guiëtan par yabanan stijb. ¹⁸ Achut zajc gugüjt naj bal id naj gatiëëb. Naj ra'p gualrniabee par gatiëëban guiëtan në par yabanan stijb, din laan naj gualrniabee ni banee da Dadan lon.

¹⁹ Chi biguiejn ree bën Israel guin ni rëbaman, gojc reeman tio'p lala' stijb. ²⁰ Zien reeman rëb:

—¿Chexc zeel ridxga'di laaman? Awa xindxab yu' luxdooman rajc tëë guijcaman.

²¹ Per yu' reeman rëb:

—Ni'qui tijb bën yu' xindxab luxdoo ad rnieet zian. ¿Wen zajc yaxhal xindxab guiaalaj ree bën ad ranit loj ya?

Jesús con xDadaman Dios naj reeman tijbzi

²² Tiamp nayaag, chi cayünj ree bën Israel lanij ni rüjn reeman gazobijz par yadooro' Jerusalén. ²³ Wej Jesús lën yadoo guin. Chi cazaman niz ro' curdur ni rniee reeman xcurdur Salomón. ²⁴ Dxel biyaw ree bën Israel laaman, rëb reeman lojman:

—¿Xt goc naga'loj cu'nawëëguil dunujn? Guna du lojn bal lüj naj Cristo.

²⁵ Badxi' Jesúsán rëbaman:

—Ma rnin lojdi, per lëjt ad rliladxtidi naj. Abi' ree ni rünan con xguialrniabee da Dadan Dios, laa reen rulüü chu najn. ²⁶ Per ad rliladxtidi, guial ad najtidi da bejnan. ²⁷ Bën naj ree da bejnan, nünbee reeman cha'n, guiáad naj nünbeen laa reeman, abi' laa reeman rzanal naj. ²⁸ Naj rudë gualnaban tiblayaa loj reeman, ad yu't dxej nit reeman. Abi' achut zajc chiquied laa reeman lon. ²⁹ Din da Dadan, bën banee laa reeman lon, rajpaman mazri gualrniabee guial loj gra. Achut zajc chiquied laa reeman lojman. ³⁰ Da Dadan con naj, nayajcan tijbzi.

³¹ Dxel cwa' ree bën Israel guin guiaj din gucaaguaiaj reeman Jesús. ³² Per rëbaman loj reeman:

—Por xguialrniabee da Dadan, zien ni zagdxe ma benan niz lojdi. ¿Con pornin gucaaguaiajdi naj?

³³ Badxi' reeman laan rëb reeman:

—Ad por ree ni zagdxe ni beentilan yacaaguaiajn lüj, yacaaguaiajn lüj guial ad rajptil Dios respejt, din bénguixliujzi lüj, abi' rüjn lüj gajc zi'c Dios.

³⁴ Dxel rëb Jesús:

—Loj xleydi rëb: “Naj rni guial lëjt naj dios.” ³⁵ Dunuj ree rayagbee guial ad ni rusquieet naj ni ca loj xtiidx Dios. Abi' laaman gulëëljaj dios bën basa'nnë ree xtiidxaman, bën gojp ree gualrniabee loj ree bën Israel. ³⁶ Yan, bal da Dadan Dios gulëëca naj persi guxhaalaman naj loj guidxliuj, ¿chexquiza zeel nadi ad ra'ptan laaman respejt guial rnin, xi'nman naj? ³⁷ Bal id cayünan zi'c na da Dadan, ad chililadxidi naj. ³⁸ Per bal cayünan zi'c naman, majsi ad zaliladxtidi naj, per gol bililadx guial por laaman zëëd ni rünan din gagbeedi guial da Dadan za'në naj, guiáad naj za'në'n laaman.

³⁹ Dxel guyën reeman niniaaz reeman Jesús, per gulaaman loj reeman.

⁴⁰ Abi' zëman zatiblad ro' guiiw Jordán, lod baroobnijs Waj bejn ree yalaj, yagaj baya'nman. ⁴¹ Abi' zien ree bën bidxin yagaj rëb:

—Walín, majsi achet milagr been Waj, per gra ni guneeman xcwent bën guie naj diidxli.

⁴² Dád zien reeman bililadx Jesús yagaj.

11

Güjt Lazr

¹ Guyu tijb bėnragxuu, brii lajman Lazr. Laaman con re bizanman Li con Mart, naj ladx reeman Betania. ² Abi' Li bizan Lazr, laam baroob perfum guia' Jesús abi' bacwiidxmin con guidxguijquim. ³ Dxel grop bėl reem guxhaal ruson loj Jesús, rėb reem:

—Dad, ragxuu xmiwil Lazr.

⁴ Chi biguiejn Jesús zian, rėbaman:

—Guialguijdx guin ad zėėdan par gugűjtan, zėėdan din gac guguiaa bejn xgualrniabee Dios nė par guguiaa reeman xgualrniabee Xi'n Dios.

⁵ Majsı rėn da't Jesús Mart con Li nė Lazr, ⁶ per chi cwa'man ruson ragxuu Lazr, sta goglaaman zatio'p dxej lod za'man. ⁷ Dxel rėbaman loj ree xbejnman:

—Yo' ree niz Judea zatijb.

⁸ Abi' rėb reeman lojman:

—Mextr, ad wayajct xchej guyėn ree bėn zobj niz ni nucaaguij reeman lűj. ¿Abi' chel ni zatijb ya?

⁹ Dxel rėb Jesús:

—Lėjt ragbee guial chiptio'p hor yu' tibdxej. Abi' bėn rza radxe, achet rırejł guia'man, din yu' bajł rusni loj guidxliuj guie. ¹⁰ Per bėn rza guxhin, yu' ni rırejł guia'man, din achet bajł guin rajpaman.

¹¹ Rėb tėė Jesús loj reeman:

—Ma naga'yėjs dux miw ree Lazr, per chicwėėnan laax.

¹² Dxel rėb ree xbejnman:

—Dad, bal naayėjsix, rėn guiėban yayajquix.

¹³ Per ni rėb Jesús rėn guiėban guial ma gűjt Lazr, guiáad ree xbejnman gunaladx reeman rėbaman naga'yėjsizix. ¹⁴ Dxel bagojn Jesús laa reeman, rėbaman:

—Ma gűjt Lazr. ¹⁵ Rabaan por lėjt guial ad guzutan ni din chililadxidi naj. Yan, yo' ree yugnaj reex.

¹⁶ Dxel Tumajs, bėn rniee reeman cwajch, rėbaman loj los demazri xbejn Jesús:

—Yo' ree yunė' reeman, din lod guiėtaman, yayėjtnė' reeman.

Jesús naj bėn rusban bejn runee tėėman guialnaban

¹⁷ Chi bidxin Jesús Betania, ma gojc tajp dxej biguie'ch Lazr. ¹⁸ Betania guin raya'nan gajxh Jerusalėn, zi'ct choon kilometro. ¹⁹ Abi' zien ree bėn Israel bignaj Mart con Li din yagu' reeman luxdoo reem guial gűjt bizan reem. ²⁰ Chi gogbee Mart ma zėėd Jesús gajxh, briim bigchaaglojm laaman, guiáad Li baya'nm lėnű. ²¹ Dxel rėb Mart loj Jesús:

—Dad, bal nizujł guie, ad ziant niėjt da zanan. ²² Per naj ragbee guial ni'qui yan zunee Dios ni guiniabil lojman.

²³ Dxel rėb Jesús:

—Naj rni yaban bizanł.

²⁴ Badxi'min rėbim:

—Ma qui ragbeen, yabanm dxej yaban gra ree bengűt. Chi guidxin dxej gűűn xgualguxtis Dios.

²⁵ Abi' rėb Jesús:

—Naj naj bėn rusban ree bengűt rudė tėėn guialnaban loj ree bejn. Bėn chililadx naj, majsı guiėtaman, per zajpaman guialnaban loj Dios.

²⁶ Guiáad gra Bén naban rliiladx tée naj, zajpaman guialnaban loj Dios. ¿Rliiladxil ni canin lüj ya?

²⁷ Dxel rëbim lojman:

—Rliiladxanan Dad. Rliiladxan lüj naj Cristo, Xi'n Dios, Bén naj gui't loj guidxliuj.

Biin Jesús ro' xbaa Lazr

²⁸ Chi gulox rëb Mart zian, dxel bignee xbëlim Li, rëbim ralan:

—Ma bi't Jesús, abi' caneeman lüj.

²⁹ Biguiejnzi Li zian, laa bisugajquim bigchaaglojm Jesús. ³⁰ Abi' Jesús gadzaman chu' luguiedx guin, sta za'man lod bigchaagloj Mart laaman.

³¹ Guiáad ree Bén Israel zojbnë Li ragu' reeman luxdoom, chi baguiaa reeman cari da't bisum zëm, binal reeman laam. Gunaladx reeman ro' xbaa Lazr ziguaanm.

³² Chi bidxinm lod za' Jesús, bazuxibim lojman rëbim:

—Dad, bal nizujl guie, ad ziant niëjt da zanan.

³³ Chi baguiaaman roon Li con ree Bén Israel nal laam, dád gognaa luxdooman guyu naya tëëman. ³⁴ Dxel gunabdiidxaman rëbaman:

—¿Ban biquie'chidi laax?

Abi' rëb reeman:

—Dad, guda nial din guguaal.

³⁵ Dxel biinman. ³⁶ Abi' rëb ree Bén Israel guin:

—Gol baguiaa nial dád guyënman laax.

³⁷ Per yu' reeman rëb:

—Bén guinan baxhal guialoj tijb Bén ad ranit loj. Yan, ¿niche niajc nüjnman ya'n chitëë niëjt Lazr?

Basban Jesús Lazr

³⁸ Dád guyu naya luxdoo Jesús stijb, chi gubigaman ro' xbaa Lazr. Najn tijb guiajbiliaa, nada'cw tijb guiaj ro'n. ³⁹ Dxel rëbaman:

—Gol biquied guiaj guin.

Per Mart, bizan xingüt guin, rëbim:

—Dad, ma rliaam nadxuudx, din ma gojc tajp dxej ni gütim.

⁴⁰ Badxi' Jesúsán rëbaman:

—¿Nid rnin ya, bal rliiladxil, guguaal xguialrniabee Dios?

⁴¹ Dxel bisüd reeman guiaj guin. Zianz gules loj Jesús xanyabaa rëbaman:

—Dad, quixtëë lüj guial ma bacaagdiajguil ni rnin. ⁴² Naj ragbeechaaw guial zianczi rucaagdiajguil ni rnin. Per rnin zian por ree Bén riga' guie, din chililadx reeman guial lüj guxhaal naj.

⁴³ Chi gulox rëbaman zian, dxel guridxa'man rëbaman:

—¡Lazr, barii yagaj!

⁴⁴ Dxel barii Lazr lën baa guin nalüüb vend yaax con guia'x, guiáad lojx nayaaw lajd. Dxel rëb Jesús loj reeman:

—Gol baxhiequix, gol baslaax yaguaiajx.

Baya'n reeman diidx xhienaag guiniaaz Jesús

(Mt. 26:1-5; Mr. 14:1-2; Lc. 22:1-2)

⁴⁵ Dád zien ree Bén binal Li bililadx Jesús, guial baguiaa reeman milagr beenman. ⁴⁶ Per yu' reeman bicojn Bénfarisew ree ni been Jesús. ⁴⁷ Dxel Bénfarisew ree në ree bixhioz rniabee, bachajg lasa' reeman con los demazri ree guxtis, rëb reeman:

—¿Xhienaag yaguieen ree ya'n, din dád zien milagr cayüjn xin guin?
 48 Bal yadëéd ree mod, graczi bejn guililadx laax, dxel guxtis Rom ree guidganijt reeman dux yadoo ree në dux nacion ree.

49 Per loj reeman yu' bën la Caifás, bixhioz zobjloj rniabee loj ijszii, rëbaman loj reeman:

—¿Nid ragbeedi ya, 50 nid rignia' tëedi ya, zagdxe naj guiët tijbzi bejn por gra bën Israel, luar nit dux nacion ree?

51 Per Caifás guin ad ni naladxtzaman rëbaman. Guial najman bixhioz zobjloj rniabee loj ijszii, zeel badëéd Dios ni guneeman, guial guiët Jesús por gra ree bën Israel. 52 Abi' ad por laatzi reeman, par gac reeman tijbzi con gra ree xbejn Dios, bën riga' ree guidib guidxliuj. 53 Zeel diizd dxejzii baya'n reeman diidx gugüjt reeman Jesús.

54 Zianan zeel ad contzi rulülojtraman loj ree bën Israel, bazaman yagaj ziaman guiedx la Efraín, najn gajxh yujbidx, yagaj guzunë ree xbejnman.

55 Dxejzii ree ma zidyob pascw, lanij rüjn ree bën Israel, dád zien ree bën guiedx ree zë Jerusalén din güün reeman zi'c naj xcostumbr reeman par gac reeman naya loj Dios chi gad pascw gal. 56 Dxel raguil reeman Jesús, abi' rniabdiidx loj lasa' reeman lën yadooro' Jerusalén, rëb reeman:

—¿Xhie nadi? ¿Zi'taman lanij ya o ad zi'ttaman?

57 Bénfarisew ree con ree bixhioz rniabee, gunabee reeman bal chutëéz bën ragbee ban za' Jesús, gugojnman din chile' guiniaaz reeman laaman.

12

Baroob Li perfum guia' Jesús

(Mt. 26:6-13; Mr. 14:3-9)

1 Za xho'p dxej riaadx gal pascw, chi we Jesús Betania, lod zobj Lazr, xin basbanman. 2 Ni been reeman tijb guialraw par xche ni gudawnë reeman Jesús. Mart gule'c guialraw guin, guiáad Lazr naj tijb bën gurenë laa reeman xan mex. 3 Dxel cwa' Li cost garol lijtr perfum ni lasajc wayëjx, najcchaawnën ganax nardo, baroobimin guia' Jesús abi' bacwiidxnë guidxguijquimin. Guidibczi lënu guin baree nejxh. 4 Dxel Judas Iscariote, xin naj tijb ree xbejn Jesús, xin bayü laaman, rëbix:

5 —¿Chexc ad gudo't perfum guin? Zagdxeli nido'n zi'ct rüjn tijb bejn gan tib ijz, din nüjnan yudar bënprob ree.

6 Ad guial yu'tix xgab bënprob guin ree zeel rëbix zian, rëbix zian guial najx xin gubaan. Abi' guial laax naaz bols yu' milia, rbanx ni rudëë reeman rgu'chaawix. 7 Dxel rëb Jesús lojx:

—Guzujr biinan. Ma badxe'xgajm naj perfum guin par chi guidxin dxej guiguie'chan. 8 Din bënprob guin ree zianczi za'në reeman lëjt, per naj ad ziantczi gazunë'n lëjt.

Baya'n reeman diidx gugüjt reeman Lazr

9 Bén guixiuj bën Israel gogbee za' Jesús Betania, abi' wej reeman yagaj, ad par guguiaatzzi reeman Jesús, në par guguiaa reeman Lazr, xin basbanman. 10 Zeel baya'n ree bixhioz rniabee diidx guial në Lazr gugüjt reeman. 11 Din por laax dád zien ree bejn cayrii loj reeman, abi' caliladx reeman Jesús.

Bagajpdioz ree bejn Jesús zi'c rey

(Mt. 21:1-11; Mr. 11:1-11; Lc. 19:28-40)

¹² Chi bareguiaal, zien da't ree bén zē lanij pascw Jerusalén gogbee guidxin Jesús yagaj, ¹³ dxel cwa' reeman zijn, brij reeman bigchaagloj reeman laaman, rbidxa' reeman rēb reeman:

—¡Benza'c bendxoon naj Dios! ¡Nüjnle'man Bén guxhaalaman! ¡Nüjnle'man bén naj rey Israel!

¹⁴ Bidxaagloj Jesús tijb burdoo, abi' gudxibaman laab, persi gojc zi'c ca loj xtiidx Dios lod rēb:

¹⁵ Bén Sión, ad rdxebidi.

Gol baguiaa, laa xreydi zēed,

dxiibaman tijb burdoo.

¹⁶ Yaloj ad bignia't ree xbejn Jesús ni cayajc. Per chi ma bayē'paman xanyabaa, dxel bignia' reeman guial zian ca loj xtiidx Dios xcwentaman, zeel gojc zian.

¹⁷ Bén guzu ree con Jesús chi guredxaman Lazr din yariix lēn baa, basban tēeman laax loj ree bengüt, rusnuu rü reeman diidx loj ree bejn ni baguiaa reeman. ¹⁸ Zeel zien ree bejn brij bigchaagloj laaman, guial gogbee reeman milagr beenman. ¹⁹ Dxel rēb loj lasa' ree bénfarisew:

—Gol baguiaa nial graczi bejn zinal laax, achetri zajc yaguieen ree.

Yu' ree bén grieg raguiil Jesús

²⁰ Loj gra ree bén we lanij bignajchi' reeman Dios Jerusalén, no'ch bēlzi ree bén grieg, ²¹ gubig reeman loj Felip, bén za guiedx Betsaida, ni riga' niz Galilea, guzajc reeman liaadx rēb reeman:

—Dad, rayēnan yaneenē'n Jesús.

²² Abi' wej Felip biguiedxaman loj Andrejs, dxel wej grop reeman bicojn reeman Jesús. ²³ Badxi' Jesús san rēbaman:

—Ma bidxin hor par Bén guxhaal Dios, guiētaman abi' yabanman.

²⁴ Diidxliczi rnin, zi'c tijb xob bal idan chu' luyuj najz najz tijbzi, per bal chu'n luyuj zajcxhiejn. ²⁵ Bén ru mazri xgab naabzi por guialnaban yu' loj guidxliuj guie, yu' dxej gunijtaman laan, per bén ru mazri xgab güünman zi'c rēn Dios, xhietēz sacaman, zajpaman guialnaban tiblyaaa con laaman. ²⁶ Bal chu rēn güün ni rēnan guidnalaman naj, lod gazun, nēgajcaman su. Bén güün ni rēnan, guiēn da Dadan laaman.

Rugojn Jesús guial guiētaman

²⁷ Rēb tēē Jesús:

—Dád yu'n xgab. ¿Xhie guiēn? ¿Zēn ya: “Dad, babēē naj loj ni gazaagdiajn”? Per ad zētan zian, din par zian zialan. ²⁸ Dad, balüü xguialrniabeel.

Dxel biguien cha' bejn xanyabaa rēbaman:

—¡Ma balü da guialrniabeen, per gulūnan stijb!

²⁹ Riguien ree bén riga' yagaj, zeel rēb reeman:

—Guziaawan guridxa'.

Per yu' reeman rēb:

—Tijb anjlan gunee laaman.

³⁰ Dxel rēb Jesús:

—Ad por najtan biguien cha' bejn, por lējtan. ³¹ Ma bidxin dxej gac guialguxtis loj guidxliuj, yan yarii bén rniabee lojn. ³² Per chi guilies reeman naj ya loj guidxliuj guie, dxel gui't graloj bejn lon.

³³ Zian basignia'man xhienaag guiëtaman. ³⁴ Badxi' ree bén guinan rëb reeman:

—Dunujn rayagbee rëb loj ley, Cristo guiban tiblyaa. ¿Chexc zeel nal, rayal guilies reeman Bén zëed xanyabaa? ¿Chunin naj Bén zëed xanyabaa?

³⁵ Rëb Jesús loj reeman:

—Ad zien dxejtri sunë bajl guie lëjt. Gol guza la'tgaj za'nëdi bajl guie, chitëe guiniaaz guiaal lëjt. Din bén rza loj xcay, ad ragbeetaman ban cheman. ³⁶ Gol bililadx bajl guie, la'tgaj za'nëdan, din gaquidi xbejnan.

Chi gulox gunee Jesús zian, dxel baquie'chlojman loj reeman.

Ad bililadxt ree bejn Jesús

³⁷ Majsí been Jesús zien da't milagr baguiaa reeman, ad bililadxt reeman. ³⁸ Zian gojc cumplid ni bacaa Isaías bén badëe xtiidx Dios loj ree bejn, rëban:

Dad, ¿chu ma bililadx ruson radëëdan?

¿Chu loj ma balüü Dios xgualrniabeeman?

³⁹ Zianan zeel ad gojct nililadx reeman, din në ze bacaa Isaías:

⁴⁰ Dios basiaaw guiaal loj reeman,

bascajy tëëman xquiarguejñ reeman,

chitëe guguaa reeman chignia' tëë reeman,

chitëe yadxi' loj reeman lon, abi' ad zayüntan laa reeman.

⁴¹ Rëb Isaías zian guial baguiaaman xbiani Jesús, zeel baza'taman laaman.

⁴² Per ni'czi zian, dád zien ree bén zojbloj bililadx Jesús. Per ad rëbt reeman loj ree bejn zian, guial rdxeb reeman yabëë ree bénfarisew laa reeman lod ricaagdiajg reeman xtiidx Dios, ⁴³ din mazri rën reeman guiën ree bejn laa reeman, guial guiën Dios laa reeman.

Rniee Jesús zi'c rniabee xDadaman

⁴⁴ Gunee Jesús rejs rëbaman:

—Bén rliladx naj, ad najtzan rliladxaman, në da Dadan bén guxhaal naj. ⁴⁵ Bén ruguaa naj, në bén guxhaal naj ruguaaman. ⁴⁶ Naj naj bajl, bialan loj guidxliuj guie, chitëe yaya'n ree bén rliladx naj loj xcay.

⁴⁷ Bal chu guien da diidxan abi' ad zuzoobtaman laan, ad najt gudëd laaman casti, din ad bialtan din gudëdan casti, bialan din yabën laa reeman loj dol.

⁴⁸ Bén ad rënt naj ad rucaagdiajg tëëtaman da diidxan, mal yu' ni gudëed laaman casti: diidx ni rën, laan gudëed laaman casti chi guidxin dxej. ⁴⁹ Din ad ni rbëguictan rnien. Da Dadan, Bén guxhaal naj rniabee ni ganen ni gulü tëën, ⁵⁰ zeel ragbeen, ni rniabee da Dadan runee guialnaban tiblyaa. Zianan zeel ni rnin rulünan zi'c rniabeeman.

13

Gudiib Jesús guia' ree xbejnman

¹ Guixiezi gal lanij pascw. Ma ragbee Jesús guial ma bidxin hor gusa'nman guidxliuj guie din yaguaaj loj xDadaman. Zianczi guyën ree xbejnman, bén riga' ree loj guidxliuj, rënman laa reeman goctëëz. ²⁻⁴ Chi gad reeman gaw xche, mal badxe' xinxab ni mal luxdoo Judas, xi'n Simón Iscariote, ma rüjñx xgab yayüx Jesús loj ree bén gugüjt laaman. Ragbee Jesús guial badëed xDadaman gra gualrniabee lojman, laa tëëman guxhaal laaman, zeel yaguaajman lod za'man. La'tgaj cayaw reeman, bisuman xan mex, gulëëman tijb lajd najcwaman luya, dxel

cwa'man tijb tuay guxhii xizaman. ⁵ Abi' badxe'man nijs loj tijb xijg, guzulojman caguiibaman guia' ree xbejnman, cucwiidx tēeman laan con tuay naxii xizaman. ⁶ Chi bayal quiibaman guia' Simón, bēn rniee reeman Bēd, rēbaman loj Jesús:

—Dad, ¿luj quiib guia'n ya?

⁷ Badxi'man laan rēbaman:

—Ad rignia'til ni cayūnan yan, per qui chignia'rilan.

⁸ Zeel rēb Bēd lojman:

—Ad zatiēēbtan quiibil guia'n.

Abi' rēb Jesús:

—Bal id zaguiiban guia'l, ad zile'tri gaquil da bejnan.

⁹ Zeel rēb Bēd lojman:

—Dad, ad bal guia'zan quiibil, gudiib nē yan con guican.

¹⁰ Badxi'man laan rēbaman:

Bēn goznejz guia'zaman riaadx chēd, din guidibaman naya. Abi' lējt ma nayadi, majsi ad gratidi.

¹¹ Ma ragbeeman chu yayū laaman, zeel rēbaman: “Ad gratidi naya.”

¹² Chi gulox gudiibaman guia' reeman, bayajcw xabaman, gurejman xan mex guin zatijb, dxel rēbaman:

—¿Bignia'di ni benan ya? ¹³ Rnieedi naj Mextr nē Dad, waliquidi najn.

¹⁴ Bal najn Mextr nē Dad, gudiiban guia'di, ziangajc quiib guia' lasa'di.

¹⁵ Ma balūn lējt, din güündi zi'c benan. ¹⁶ Diidxliczi ganin, achut mojs naj mazri guial loj bēn rniabee laaman, achut bēn ri't naj mazri guial loj bēn rxhiaal laaman. ¹⁷ Bal rignia'di nine güün tēēdan, yabaanē Dios lējt.

¹⁸ Ad gratidi ruzatan ragbeen chu reenin gulen. Per rayal gac cumplid ni ca loj xtiidx Dios, rēban: “Bēn rawnē'n tijbzi, bayejcaman contr naj.” ¹⁹ Ma rugojnan lējt din gagbeedi chi gac zian, din chililadxidi chu najn.

²⁰ Diidxliczi ganin, bēn rucaagdiajg ni rēb bēn rxhialan, najn rucaagdiajgaman, guiáad bēn rucaagdiajg da diidxan, xtiidx bēn guxhaal najn rucaagdiajgaman.

Bagojn Jesús chu yayū laaman

(Mt. 26:20-25; Mr. 14:17-21; Lc. 22:21-23)

²¹ Chi gulox guneē Jesús zian, dád gyunayaman, dxel rēbaman loj reeman zagdxē:

—Diidxliczi ganin, tijb lējt yayū naj loj ree bēn gugūjt naj.

²² Dxel guzuloj ree xbejnman ruguiaa loj lasa' reeman, ni'quid ragbeet reeman chunin ruza'taman. ²³ Tijb bēn guyēn da'taman zobj cwē'man, hor zii chi cayaw reeman xche, ²⁴ dxel been Bēd sen lojman din guini-abdiidxaman chunin ruza't Jesús. ²⁵ Zeel mazri gubigaman cwē' Jesús gunabdiidxaman, rēbaman:

—Dad, ¿chunin?

²⁶ Badxi' Jesúsán rēbaman:

—Gugajdxan ta'n guiadxtil, din loj xin gudēdanan, laaxan yayū naj.

Dxel bagajdxaman ta'n guiadxtil badēeman laan loj Judas, xi'n Simón Iscariote. ²⁷ Chi gudawixan, laa guyu gajc xindxab luxdoox. Zeel rēb Jesús lojx:

—Ni güünl, cari beenan.

²⁸ Per achutczi ree bēn zobj xan mex guin bignia' chexc zeel rēbaman zian. ²⁹ Guial ca' Judas bols ni yu' milia, zeel naladx garol reeman rēb

Jesús lojx din chisiix ni gaw reeman lanij guin o gudëédix ta'nán loj ree b́en rzagdiaj ya. ³⁰ Chi ma gudawix guiadxtil guin, dxel briix, ma guxhin.

Gunabee Jesús tijb nicüb

³¹ Chi ma brii Judas, rëb Jesús loj ree xbejnman:

—Yan guien xgualrniabee B́en guxhaal Dios din gagbee ree bejn xhienaag naj gualrniabee gudëe Dios lojman. ³² Din bal gulüü B́en guxhaal Dios xgualrniabee Dios, ziangajc gulüü Dios xgualrniabeeman, zeel ma gudëédaman laan. ³³ Xi'n, ad zien dxejtri gazunë'n lëjt, yaguilidi naj, per zi'cgajc rën loj ree bejn, ziangajc ganin lojdi yan: Ad zajct chedi lod gan. ³⁴ Ganin tijb nicüb ganabeen: Gol guyën lasa'di zi'c rënan lëjt. ³⁵ Bal guiën lasa'di, zian gagbee gra bejn gual najdi da bejnan.

Guiëb Béd ad nünbeetaman Jesús

(Mt. 26:31-35; Mr. 14:27-31; Lc. 22:31-34)

³⁶ Gunabdiidx Béd loj Jesús rëbaman:

—Dad, ¿ban chel?

Zeel rëb Jesús:

—Ad zajct guidnalil naj lod gan yan, per zadxin dxej guidnalil naj.

³⁷ Zeel rëb Béd:

—Dad, ¿chexc zeel ad zajct guidaalan lüj yan? Xt zajc guiëtan por lüj.

³⁸ Badxi' Jesúsán rëbaman:

—¿Walil ya rënl guiëtil por naj? Diidxliczi ganin, chi gad guid cwidxa', mal rëbil choon volt, ad nünbeetil naj.

14

Jesús naj nejz guidxinnë bejn loj Dios

¹ Rëb tëë Jesús:

—Ad rudi xgab. Gol bililadx Dios, gol bililadx tëë naj. ² Lidx da Dadán dád zien luar lod guiban bejn yu'. Bal iche yu', ad ziant ganin lojdi, chiguienchaawan xluaridi. ³ Chi ma benchaawan luar guin, dxel yagualan guidgaxin lëjt din sudi lod gazun. ⁴ Ma nünbeedi nejz zë lod gan.

⁵ Zeel rëb Tumajs lojman:

—Dad, ad rayagbeetan ban chel, ¿xhienaag yaguieenbeen nejz guin?

⁶ Badxi'man laan rëbaman:

—Naj naj nejz, najn diidxli, naj tëën gualnaban. Tijbzi naj zajc chinë' bejn ree loj da Dadán. ⁷ Bal nünbeedi naj, në da Dadán güünbeedi. Per ma nünbeedi laaman diizd yan, din ma baguiaadi laaman.

⁸ Dxel rëb Felip:

—Dad, banee mod majsi yaguiaazan b́en naj xDadil.

⁹ Badxi'man laan rëbaman:

—Felip, ma gojc xchej za'në'n lëjt. ¿Nid wayünbeel naj ya? Din b́en ruguiaa naj, da Dadanan ruguiaaman. ¿Chexc zeel nal gunen mod guguiaa da Dadán? ¹⁰ ¿Nid rliladxil ya, naj za'në' da Dadán, guiáad laaman za'në naj? Ni rnin lojdi, ad rhëguictanan. Da Dadán, b́en nabannë'n, laaman rüjn dxiin guin. ¹¹ Gol bililadx naj za'në' da Dadán, guiáad laaman za'në naj. Balgui majsi ni rünzan gol bililadx. ¹² Diidxliczi ganin: B́en rliladx naj, nëgajcaman güün ni rünan, güünman ni mazri naroo, din naj yaya' lod za' da Dadán. ¹³ Graczi ni guiniabidi lojman por naj, günanan din gulün xgualrniabeeman. ¹⁴ Günan xhietëz ni guiniabidi.

Guixhiaal Jesús xSprijtaman

¹⁵ Bal rëndi naj, gucaagdiajguidi ni balün. ¹⁶ Din guië loj da Dadan guixhiaalaman Sprijt sunë lëjt, ¹⁷ Sprijt gulüü diidxli, din zianczi sunëman lëjt. Bén ad rliadxt ree Dios ad zajct tia' reeman Sprijt guin, din ad ruguiaat reeman ad nünbee tëët reeman laaman. Per lëjt nünbee laaman, din sunëman lëjt yaya'n tëëman luxdoodi tiblayaa. ¹⁸ Ad zusa'ntan xtijbidi, yaguialan stijb guidganan lëjt. ¹⁹ Sta'nz riaadx ad zuguaatri ree bénguidxliuj naj, per lëjt guguaadi naj, guibandi din nabanen. ²⁰ Dxej zii ree, gagbeedi za'në' da Dadan, lëjt za'në naj, guiáad naj za'në'n lëjt zianczi. ²¹ Bén rucaagdiaj ni rniabeen rüjn tëëman laan, walicaman rënman naj. Guiën da Dadan bén rën naj, në naj guiën laaman din güünbeeman naj.

²² Gunabdiidx Judas (ad bén bayüt Jesús) rëbaman:

—Dad, ¿chexc zeel dunujzan yayagbee chu lüj, guiáad ree bénguidxliuj ad zagbeet reeman?

²³ Badxi' Jesúsán rëbaman:

—Bén guiën naj guzoobaman da diidxan, guiën da Dadan laaman, guiáad naj guidnë' da Dadan din yabajnnë'n laaman. ²⁴ Bén ad zënt naj ad zuzoobtaman da diidxan, din diidx cucaagdiajguidi yan ad da diidxtanan, xtiidx da Dadanan bén guxhaal naj.

²⁵ 'Canin lojdi gra nine, la'tgaj za'në'n lëjt. ²⁶ Per xSprijt Dios, bén sunë lëjt zianczi, bén guixhiaal da Dadan por naj, graczi gulüüman lëjt din gusaaladxidi ni canin.

²⁷ 'Chi yaya'n, yabecdxen luxdoodi, gunen gualnaza'c lojdi, ad zi'c runeet ree bénguidxliujn, ad bal ru nayadi ad rdxeb tëëdi. ²⁸ Ma rnin lojdi, yaya'n, dxel yaguialan zatijb. Bal walidi rëndi naj, chu' luxdoodi zagdxe, gual gagbeedi yaya' loj da Dadan, din mazri zobjlojman gual lon. ²⁹ Ma rugojnan lëjt, din chi gac zian, chililadxidi.

³⁰ 'Ad zro'tri ganenë'n lëjt, din ma zëed xin rniabee guidxliuj, majsi ad nët naj rniabeex. ³¹ Per zian gac din gagbee ree bénguidxliuj, rënan da Dadan, zeel rünan ni rniabeeman. Gol bisu, yo' ree yan.

15

Rën Jesús yadxu'në' reeman zianczi

¹ Basnuu rëb Jesús:

—Naj naj zi'c yag rtia ni nejxh zagdxe, guiáad da Dadan naj zi'c Bén rxübin laan. ² Da bejn reen naj zi'c ree xidx yag guin. Bal id rtia reen gutüüg da Dadan laa reen. Per bal rtia reen, gusiaman laa reen din tia reen mazri. ³ Lëjt ma nayadi, gual basia diidx rnin lëjt. ⁴ Gol gubajnnë naj zi'c nabannë'n lëjt. Ad zajct tia xidx yag, bal id najnën yag guin tijbzi. Ziangajc lëjt ad zajct güündi ni rën Dios bal id za'nëdi naj.

⁵ 'Naj naj zi'c yag rtia ni nejxh, guiáad lëjt naj zi'c xidxan. Bén sunë naj zianczi nuchajgaman naj, guiáad naj nuchagan laaman, zeel rüjnman ni rën Dios. Din bal ichu naj, achet zajc güündi. ⁶ Bén ad zazujnët naj guizëebaman zi'c yagbidx ruto'p reeman, din che'can.

Rëb tëë Jesús:

⁷ —Bal za'nëdi naj tijbzi ruzoob tëëdi da diidxan, gol gunab ni rëntzidi, din tia'dan. ⁸ Bal güündi ni rën da Dadan, gaquidi quijb da bejnan, din guza't ree bejn laaman zagdxe. ⁹ Rënan lëjt zi'c rën da Dadan naj, gol

basaaladx rēnan lējt. ¹⁰ Bal guzoobidi da diidxan, gusaaladxidi rēnan lējt, zi'cgajc ruzoban xtiidx da Dadan, ragbeen rēnman naj.

¹¹ 'Rnin lojdi zian din chu' luxdoodi zagdxē zi'c yu' luxdon zagdxē, zagdxē da't chu' luxdoodi. ¹² Gol guyēn lasa'di zi'c rēnan lējt, laan rniabeen gūūndi. ¹³ Achut rēn xmiw mazri guial loj bēn rējt por laa reeman. ¹⁴ Lējt naj da miwan bal gūūndi ni rēnan. ¹⁵ Ad zanetran lējt mojs, din mojs ad ragbeetaman xhie rūjn bēn rniabee laaman. Ganen lējt miw, din balūn lējt graczi ni na da Dadan lon. ¹⁶ Ad lējtt gule naj, naj gule lējt. Zeel rnin lojdi, chedi chiglūūdi bejn ree ni rēn da Dadan, din gusnuu gūūn reeman ni rēnman, din guneeman graczi ni guiniabidi por naj. ¹⁷ Rniabeen: Guiēn lasa'di.

Ralen ree bejn Jesús con ree xbejnman

¹⁸ Rēb tēē Jesús:

—Bal ralen ree bēnguidxliuj lējt, gol basaaladx, yaloj naj balen reeman. ¹⁹ Bal niajquidi bēnguidxliuj, niēn reeman lējt zi'c rēn lasa' reeman. Per naj gule lējt loj reeman, zeel ralen reeman guial ad najtidi bēnguidxliuj. ²⁰ Gol basaaladx ni rnin: “Achut mojs naj mazri guial loj bēn rniabee laaman.” Bal basagzi reeman naj, ziangajc gusagzi reeman lējt, bal bazoob reeman da diidxan, ziangajc guzoob reeman xtiidxidi. ²¹ Graczi nine gūūnnē reeman lējt por naj, din ad nūnbeet reeman bēn guxhaal naj.

²² 'Achet xtol reeman niu, bal idan nial ninienē'n laa reeman, per yan yu' xtol reeman. ²³ Bēn ralen naj, nēgajc da Dadan ralenman. ²⁴ Achet xtol reeman niu, bal idan nūn ree ni benan loj reeman ni achutczi wayūjn, per ma baguiaa reeman laa reen, majsi zian ralen gajc reeman naj nē da Dadan. ²⁵ Per rajc zian din gac cumplid ni ca loj xley reeman, rēban: “Achet rūnan ralen reeman naj.”

²⁶ 'Per chi gui't Sprijt gaxhalan din sunēman lējt gulūū tēēman diidxli, Sprijt zēēd loj da Dadan, laaman gū da diidxan. ²⁷ Nēgajc lējt gū laan, din diidz yaloj za'nēdi naj.

16

¹ 'Rnin zian, din ad zabējzt chililadxidi naj. ² Yabēē reeman lējt lod ricaagdiajg reeman xtiidx Dios, zadxin dxej, chutēēz bēn gugūjt lējt naladx reeman Dios cayūjn reeman wen. ³ Gūūn reeman zian din ad nūnbeet reeman naj ni'qui da Dadan. ⁴ Per ma rnin lējt, din chi guidxin dxej guin gusaaladxidi guial ma bagojnan lējt.

Ni rūjn xSprijt Dios

'Ad rnitan lojdi zian diidz yaloj, din naj guzunē' lējt. ⁵ Per yan yaya'n loj bēn guxhaal naj. Achutczi rniabdiidx ban gan, ⁶ aal yu'nayadi guial canin zian. ⁷ Per diidxcliczi rnin: zagdxē najn yaya'n. Din bal idan yaya', ad zi'tt xSprijt Dios sunē lējt, per bal yaya'n, naj gaxhal laaman. ⁸ Chi gui'taman, laaman gulūū ree bēnguidxliuj ni naj dol, ni naj ni zagdxē, nē xguialguxtis Dios. ⁹ Gagbee reeman yu' xtol reeman, guial ad riladxt reeman naj. ¹⁰ Ni zagdxē guin naj guial yaya' loj da Dadan din ad zuguaatridi naj. ¹¹ Guiáad Dios ma been xguialguxtisaman con xindxab rniabee guidxliuj.

¹² 'Yu'ri ni rēnan ganin, per dád zien gacan par lējt. ¹³ Chi gui't Sprijt gulūū lējt diidxli, din ad zūt xtiidx gajcaman, guinieeman graczi ni guienman, laaman gulūū lējt ni gac. ¹⁴ Guza'taman naj zagdxē, din naj

gudëd ni gulüüman lëjt. ¹⁵ Graczi ni rajp da Dadan naj par naj, zeel rnin, Sprijt guin tia' ni gudëdan din gulüüman laan lëjt.

Guguaa ree xbejn Jesús laaman zatijb

¹⁶ 'Ma guidxin dxej ad zuguaatrudi naj, per ad zajct xchej, guguaadi naj stijb.

¹⁷ Chi rëb Jesús zian, dxel guzuloj ree xbejnman canabdiidx loj lasa' reeman, rëb reeman:

—¿Chexc zeel naman, ma guidxin dxej ad zuguaatri reeman, per ad zajct xchej, yaguaa reeman stijb, din yaguaiaj loj xDadaman? ¹⁸ ¿Chexc zeel naman: “Ad zajct xchej”? Ad rayignia't ree ni caneeman.

¹⁹ Gogbee Jesús guial rën reeman guiniabdiidx reeman, zeel rëbaman:

—Ma rnin lojdi, ma guidxin dxej ad zuguaatrudi naj, per ad zajct xchej, guguaadi naj stijb. ¿Ni nen canabdiidxidi ya? ²⁰ Diidxli ganin, goondi chu' tëë luxdoodi naya, guiáad ree bénguidxliuj yabaa reeman. Per majsi chu' luxdoodi naya, guidxin dxej yabaadi. ²¹ Chi gal xi'n béngunaa, rdëdaman tarbajw, din ma bidxin hor guin. Per chi ma gojl xi'nman, dxel rayanladxaman tarbajw guin, ru luxdoooman zagdxe, guial ma gojl xi'nman. ²² Ziangajc lëjt cadëdidi tarbajw yan, per chi guguian lëjt zatijb, chu' luxdoodi zagdxe, achutczzi zajc yabëë laan luxdoodi.

²³ 'Dxel achetri guiniabdiidxidi lon. Diidxliczi ganin, graczi ni guiniabidi loj da Dadan por naj, guneeaman. ²⁴ Guiáad yan achet wanabidi por naj, gol gunaban din tia'dan, din chu' luxdoodi zagdxe tiblyaa.

Yaguaiaj Jesús lod guzaman

²⁵ Rëb tëë Jesús:

—Rnin nine ree zi'c cwent, per zadxin dxej ad zulütran zian, gusignia'n lëjt zagdxe xcwent da Dadan. ²⁶ Dxej zii ree guiniabidi loj da Dadan por naj, ad rüjnt naguiejn ganaaban por lëjt lojman, ²⁷ din rënman lëjt, rënman lëjt guial rëndi naj rliladx tëëdi guial laaman guxhaal naj. ²⁸ Briin lod za' da Dadan persi bialan loj guidxliuj guie, yan gusa'n nan laan din yaya'n lojman.

²⁹ Dxel rëb ree xbejnman:

—Yanri ma cusignia'l zagdxe. ³⁰ Rayagbeen rajquil graczi, ad rüjnt naguiejn chu guiniabdiidx lojl. Zianan zeel raliduladxan guxhaal Dios lüj.

³¹ Badxi' Jesús laan rëbaman:

—¿Ma rliladxidi yan ya? ³² Gol gogbee, ma bidxin hor yare'chidi, tijb gajdi yaguaiaj lidx, gusa'ndi da xtijban. Per ad za't da xtijban, da Dadan za'në naj. ³³ Rnin gra nine din cwedi zagdxe guial nuchajguidi naj. Loj guidxliuj sagdiajdi, per ad guidxebidi, din ma benan gan loj guidxliuj.

17

Gurejdx gunab Jesús xDadaman por ree xbejnman

¹ Chi gulox rëb Jesús zian loj ree xbejnman, dxel baguaaaman xanyabaa rëbaman:

—Dad, ma bidxin hor, balüü da gualrniabeen din gulün xgualrniabeel. ² Baneel gualrniabee lon din ganabeen gra bejn gudëd tëën gualnaban tiblyaa loj gra bën baneel. ³ Guiban reeman tiblyaa bal güünbee reeman lüj, tijbzi lüj naj quijb Dios, güünbee tëë reeman najn guxhaalil.

⁴ 'Naj bazat lüj zagdxé loj guidxliuj; yan ma gulox benan ni nal. ⁵ Yan, Dad, yaguialan lojl, din yaneel gualrniabee ca'n gocli, diizd chi gad guidxliuj gacchaaw.

⁶ Rëb tëë Jesús:

—Bén gulel loj guidxliuj baneel lon, ma balün laa reeman chu lüj. Gojc reeman xbejnl, per baneel laa reeman lon, ma bazoob reeman xtiidxil. ⁷ Yan ma gogbee reeman guial gra ni benan gra tëë ni balün naj xieenl. ⁸ Gunen xtiidxil ni baneel, zeel bacaagdiajg reeman laan, gogbee reeman, walican lojl guzaan, bililadx tëë reeman lüj guxhaal naj.

⁹ 'Rbedx rniaaban lüj por laa reeman, guial naj reeman xbejnl baneel tëël laa reeman lon, ad rbedx rniaabtan por ree bénguidxliuj. ¹⁰ Gra ni ca'n naj xieenl, guiáad gra ni ca'l naj da xieenan, ma rguien da gualrniabeen por ree bén baneel.

¹¹ 'Ad zazutran loj guidxliuj, per laa reeman suri reeman guie, guiáad naj yazaan din yaguialan lod za'l. Dad, lüj naj bén naya nali, gunaj reeman con gra gualrniabee ca'l ni baneel tëël lon, din gac reeman tijbzi zi'c nayajc. ¹² Chi guzunë'n laa reeman loj guidxliuj, gunan laa reeman con xgualrniabeel ni baneel. Achut reeman bizëëb, tijbzi xin ma naj diidx bizëëb, din gac cumplid ni ca loj xtiidxil.

¹³ 'Yan yaguialan lod za'l, per canen zian la'tgaj za'n loj guidxliuj guie, din chu' luxdoo reeman zagdxé, zi'c yu' luxdon zagdxé. ¹⁴ Ma balün laa reeman xtiidxil, zeel ralen ree bénguidxliuj laa reeman guial ad najt reeman bénguidxliuj, zi'cgajc ad najtan bénguidxliuj. ¹⁵ Ad rniaabtan yabëël laa reeman loj guidxliuj, rënan guinial laa reeman, chitëë güün reeman ni mal. ¹⁶ Ad najt reeman bénguidxliuj, zi'cgajc naj. ¹⁷ Basia reeman con xtiidxil, din laan naj ni diidxli. ¹⁸ Zi'c guxhaalil naj loj ree bénguidxliuj, ziangajc rixhial ree da bejnan loj reeman. ¹⁹ Por laa reeman rudëd da gualnabanan din gac reeman xbejnl diidxliczi.

²⁰ Basnuu Jesús, rëbaman:

—Ad por laatzi reeman rbedx rniaaban lüj, në por ree bén chililadx chi gucaagdiajg reeman ni guiniee reeman. ²¹ Rniaaban lojl din guchajg lasa' reeman din yayajcnë' reeman tijbzi, Dad, zi'c za'në' naj ziangajc za'në'n lüj, ziangajc sunë' lasa' reeman. Din chililadx ree bejn lüj guxhaal naj. ²² Badëdan gualrniabee baneel loj reeman, din gac reeman tijbzi zi'c nayajc, ²³ naj za'në' laa reeman, guiáad lüj za'në'l naj. Zeel gac reeman tijbzi din gagbee ree bejn, lüj guxhaal naj rën tëël laa reeman zi'c rën'l naj.

²⁴ 'Dad, lüj baneel laa reeman lon, zeel rënan su reeman lod gazun din guguaa reeman biani baneel lon, din guyën'l naj diizd chi gad guidxliuj gacchaaw. ²⁵ Dad, lüj rüjn gualguxtis zagdxé. Ad nünbeet ree bénguidxliuj lüj, sa'n naj nünbeen lüj, në ree da bejnan ragbee lüj guxhaal naj. ²⁶ Balün laa reeman chu najl, gulüran laa reeman mazri, din gagbee reeman rën'l laa reeman zi'c rën'l naj, gazunë' tëën laa reeman.

18

Bayü Judas Jesús

(Mt. 26:47-56; Mr. 14:43-50; Lc. 22:47-53)

¹ Chi gulox gunee Jesús zian, dxel briinë ree xbejnman, zë reeman stiblad ro' guiiw la Cedrón, bidxin reeman lod yu' ree yag. ² Në Judas, xin yayü laaman, nünbee yagaj, guial zien volt binëman laa reeman ni.

³ Zeel bidxinnëx tibcwaa ree sultad në ree bén rajp ro' yadoo, guxhaal quijb ree bixhioz laa reeman në ree bénfarisew, ca' reeman bajl rusni ree, në ree espad con ree lans. ⁴ Per ma ragbee Jesús gra ni gac, briiman gunabdiidxaman loj reeman, rëbaman:

—¿Chu raguuilidi?

⁵ Badxi' reeman laan rëb reeman:

—Jesús bén Nazaret.

Abi' rëbaman loj reeman:

—Najn.

Judas xin bayü laaman bidxinnë laa reeman. ⁶ Chi rëbaman loj reeman: “Najn”, dxel baguiadruxan reeman biajb reeman luyuj.

⁷ Gunabdiidxaman zatijb rëbaman:

—¿Chu raguuilidi?

Rëb reeman:

—Jesús bén Nazaret.

⁸ Zeel rëbaman:

—Ma rnin, najn. Bal naj raguuilidi, gol baslaa ree bén guie yaguiaj reeman.

⁹ Zian gojc cumplid ni rëb loj xDadaman: “Achut ree bén baneel lon bizëëb.” ¹⁰ Dxel gulëë Bëd espad, gutü'man guidiajg ladbee xin la Malco, najx xmojs quijb bixhioz zobjbloj. ¹¹ Dxel rëb Jesús loj Bëd:

—Bagu'chaaw espad zii. Bal rën da Dadan gazaagdiajn zian, gaza'canan.

Biniaaz Jesús

(Mt. 26:57-58; Mr. 14:53-54; Lc. 22:54)

¹² Sultad guin ree con xin rniabee laa reex con ree bén rajp ro' yadoo gunaaz reeman Jesús, guxhii reeman laaman. ¹³ Dxel binë reeman laaman yaløj lidx bén la Anás, din laaman naj xdadsuegr Caifás quijb bixhioz zobjbloj loj ijz zii. ¹⁴ Laagajcaman rëb loj gabilt, mazri zagdxë guiet tijbzi bejn por gra ree bén Israel.

Rëb Bëd ad najtaman xbejn Jesús

(Mt. 26:69-70; Mr. 14:66-68; Lc. 22:55-57)

¹⁵ Tio'p ree xbejn Jesús binal laaman. Tijbaman la Simón, bén rniee reeman Bëd, stijbaman naj bén nünbee quijb bixhioz zobjbloj, zeel guyunëman Jesús lënü guin, ¹⁶ guiáad Bëd baya'nman lule'. Zeel barii bén nünbee bén rniabee ree bixhioz, guneenëman biin rajp ro' port guin, persi guyu Bëd lënü. ¹⁷ Gunabdiidxim lojman rëbim:

—¿Nid lüjn naj tijb xbejn bén guin ya?

Badxi'man laan rëbaman:

—Ad najtan.

¹⁸ Per guial dád nayaag, zeel bén naj ree mojs con ree bén rajp ro' yadoo nabe'c reeman guij rucha' reeman. Nëgajc Bëd cucha'në reeman rudëj guin.

Gunabdiidx Anás loj Jesús

(Mt. 26:59-66; Mr. 14:55-64; Lc. 22:66-71)

¹⁹ Guzuloj bén la Anás canabdiidxaman loj Jesús xcwent ree xbejnman në xcwent ni rulüüman. ²⁰ Zeel rëb Jesús:

—Gunen loj gra ree bejn. Zianczi balün lod rucaagdiajg ree xtiidx Dios në lën dux yadooro' ree, lod rado'p dugra ree. Achet ni gunen ralan.

21 ¿Chexc zeel rniabdiidxil lon? Gunabdiidx loj ree bén bacaagdiajg ni rën, laa reeman na xhie gunen, laa reeman ragbee.

22 Chi rëbaman zian, tijb bén rajp ro' yadoo guin wëez ro'man, rëbaman: —¿Zian yadxi'l xtiidx Bén rniabee guin ya?

23 Badxi' Jesús laan rëbaman:

—Bal xhie ni mal rën, guna xhienin. Per bal gunen zagdx, ¿chexc zeel rguinl naj?

24 Dxel guidib naxiiman guxhaal Anás laaman loj Caifás, Bén naj quijb bixhioz zojbloj.

Rëb Bëd stijb ad nünbeetaman Jesús

(Mt. 26:71-75; Mr. 14:69-72; Lc. 22:58-62)

25 Per Bëd sta za'man cucha'man ruděj guin. Abi' gunabdiidx reeman lojman, rëb reeman:

—¿Nid në lüj naj tijb ree xbejn Bén guin ya?

Badxi' Bëd laan rëbaman:

—A'n, ad xbejntaman naj.

26 Dxel tijb xmojs bixhioz zojbloj guin, Bén naj lasa' Bén gutü' Bëd guidaajg, rëbaman loj Bëd:

—¿Nid lüjn baguian ya za'nël laaman guia' ree yag olivos?

27 Rëb Bëd stijb guial ad nünbeetaman Jesús, loj hor zii gajc guridxa' tijb guid.

Binë reeman Jesús loj Pilato

(Mt. 27:1-2, 11-14; Mr. 15:1-5; Lc. 23:1-5)

28 Chi bani luyuj, bazanë reeman Jesús lidx Caifás, zinë reeman laaman lën xpalas gobernador Pilato. Per ree Bén Israel guin ad guyut reeman lën palas guin, din par laa reeman bal niu reeman, ad nayatri reeman loj Dios, abi' ad nile't niajw reeman xche guialraw ni raw reeman pascw.

29 Zeel brii Pilato persi guneenëman laa reeman, rëbaman:

—¿Xhie been xin guie zeel zidnëdi laax guie?

30 Badxi' reeman laan rëb reeman:

—Bal najman benza'c, ad ziant nudnë'n laaman lojl.

31 Dxel rëb Pilato:

—Gol bignëx, gol been guialguxtis zi'c naj xleydi.

Abi' rëb reeman:

—Per ad naca'tan guialrniabee yanabeen guiët bejn.

32 Zian gojc cumplid xtiidx Jesús chi bagojnman xhienaag guiëtaman.

33 Bayu Pilato lën palas guin, dxel gurejdxaman Jesús, gunabdiidxaman lojman rëbaman:

—¿Lüj naj xrey ree Bén Israel ya?

34 Badxi' Jesúsán rëbaman:

—¿Lüjczy rniabdiidx lon ya o yu' ree ben ren na lojl zian?

35 Badxi' Pilato laan, rëbaman:

—¿Wen Bén Israel naj ya? Bén ladx gajc reel con ree bixhioz rniabee bidnë lüj lon. ¿Xhie beenl?

36 Badxi' Jesúsán rëbaman:

—Guialrniabee ni ra'pan ad lojt guidxliuj zan, din bal loj guidxliuj zan, nia'pan Bén nidijl ree chitëë niniaaz ree ben Israel naj. Per yan ad lojt guidxliuj guie za da guialrniabeen.

37 Dxel rëb Pilato lojman:

—¿Zë loj diidxan ya rey najl?

Badxi' Jesús laan rëbaman:

—Reyqui naj, zi'c nal. Par zian goolan par zian tëë zialan loj guidxliuj guie zidgaguien ni naj diidxli, graczi ree bën zinal ni diidxli rucaagdiajg reeman ni rnien.

³⁸ Dxel rëb Pilato:

—¿Xhiezanan naj diidxli?

Gunabee reeman guiët Jesús

(Mt. 27:15-31; Mr. 15:6-20; Lc. 23:13-25)

Chi gulox rëb Pilato zian, dxel briiman bigneenëman bën Israel ree stijb, rëbaman:

—Achet xguialquia xin guin radxejlan. ³⁹ Per lëjt, xcostumbridi naj guial loj lanij pascw laa tijb bën yu' ladxguiib. Yan, ¿rëndi ya guslaan xreydi?

⁴⁰ Dxel gurixdiaj ree bën Israel guin, rëb reeman:

—¡Ad laataman guslaal! ¡Zagdxeli baslaa Barrabás!

Abi'za Barrabás guin bégubaanan.

19

¹ Dxel gunabee Pilato gudijn ree suldad Jesús. ² Abi' beenchaaw reeman coron guiëjch, badxe' reeman laan guijcaman, bascajcw reeman laaman tijb lajd xniaya's. ³ Dxel gubig reeman lojman, rëbgaj reeman:

—¡Guibanri xrey ree bën Israel!

Dxel rëëzgaj reeman lojman.

⁴ Brii Pilato stijb, abi' rëbaman loj ree bën Israel guin:

—Gol baguiaa, gabën laax din gagbeedi, achet xguialquiaux radxejlan.

⁵ Dxel brii Jesús, yu' coron guiëjch guin guijcaman, najcw tëëman lajd xnia guin. Abi' rëb Pilato:

—Laax guie.

⁶ Dxel bixhioz rniabee ree në ree bën rajp ro' yadooro' Jerusalén, chi baguiaa reeman laaman, guzuloj rbixdiaj reeman, rëb reeman:

—¡Bacaax loj crüjz! ¡Bacaax loj crüjz!

Rëb Pilato loj reeman:

—Gol chinëx, lëjt gol bacaax loj crüjz, achet xtolix radxejlan.

⁷ Badxi' reeman laan rëb reeman:

—Laa tijb dux leyan yu', rëb lojn rayal guiëtix, guial nax najx Xi'n Dios.

⁸ Chi biguienman ni rëb reeman, mazri bidxebaman. ⁹ Bayuman lën palas guin zatijb, gunabdiidxaman loj Jesús rëbaman:

—¿Ban xin lüj?

Per ad badxi't Jesús laan. ¹⁰ Zeel rëb Pilato:

—¿Nid zadxi'l ni rnin ya? ¿Nid ragbeel ya ca'n guialrniabee din gucan lüj loj crüjz o guslaan lüj ya?

¹¹ Dxel rëb Jesús:

—Achetczi guialrniabee nitia'l bal id Dios nunee laan. Zianan zeel mazri zien xtol bën bidnë naj guie yu' guial lojl.

¹² Diidz hor zii gajc raguiil Pilato mod, xhienaag guslaaman Jesús, per rbidxa' ree bën riga' yagaj, rëb reeman:

—¡Bal guslaal laax, ad najtil xmiw bën naj César! ¡Din chutëëz bën rajc rey rzuj contr César!

¹³ Chi biguien Pilato rëb reeman zian, gunabeeman babëë reeman Jesús, dxel gurej lod rniabeeman, lod la Gabata con diidx hebreo, rën

guiëban Lod yu' ree guiaj. ¹⁴ Chi guixiez gal lanij pascw, cost garol dxej rëb Pilato loj ree bën Israel:

—¡Laa xreydi guie!

¹⁵ Per rbidxa' reeman rëb reeman:

—¡Guiëtix! ¡Guiëtix! ¡Bacaax loj crüjz!

Gunabdiidx Pilato loj reeman, rëbaman:

—¿Wen gucan xreydi loj crüjz ya?

Badxi' ree bixhioz rniabee laan, rëb reeman:

—Achut dux reyan yu', tijbzi César.

¹⁶ Dxel bayü Pilato Jesús loj ree suldad din gucaa reex laaman loj crüjz, dxel zinë reex laaman.

Cwa Jesús loj crüjz

(Mt. 27:32-44; Mr. 15:21-32; Lc. 23:26-43)

¹⁷ Briinë reex Jesús, nüüman crüjz, binë reex laaman lod la Calaver, diidx hebreo lan Gólgota. ¹⁸ Ni bacaa reex laaman loj crüjz con zatio'p ree bejn, tijb gaj reeman ca cwë'man. ¹⁹ Gunabee Pilato cwa lejtr guijc crüjz guin, rëban: “Jesús bën Nazaret, xrey ree bën Israel.” ²⁰ Dád zien ree bën Israel biil lejtr guin, guial naj luar zii gajxh loj ciuda, guiáad lejtr guin can con diidx hebreo, diidx latin në diidx grieg. ²¹ Rëb ree bixhioz rniabee ree bixhioz loj Pilato:

—Ad rucaal: “Xrey ree bën Israel”, bacaa: “Bën rëb naj xrey ree bën Israel.”

²² Badxi' Pilato laan rëbaman:

—Ni ma bacan yaya'n nan zian.

²³ Chi gulox bacaa ree suldad guin Jesús loj crüjz, baca' reex xabaman, gudixya' reexan tajp la', dxel cwa' reex tib la' gajn. Në stijb xabaman cwa' reex, ad nadiibtan, najcchaaw diizd yëjnan xt guia'n, najn tijbzi lajd.

²⁴ Zeel rëb loj lasa' reex:

—Ad zarooxt reen, yadxi't ree suert din guidoon chu yayal laan.

Zian gojc cumplid ni ca loj xtiidx Dios, rëban: “Bala' reeman da xaban, gudxijt tëë reeman suert guijcan.” Zeel been ree xinsuldad guin zian.

²⁵ Gajxh cwë' crüjz ca Jesús za' xniaaman con xbël xniaaman con Li xbéngunaa Cleofas con Li bën gunee reeman Magdalena. ²⁶ Chi baguiaa Jesús xniaaman, za' tijb ree xbejnman cwë'man, bën rën da'taman, rëb loj xniaaman:

—Na, laa xi'nl yagaj.

²⁷ Dxel rëb loj xbejnman:

—Laa xniaal yagaj.

Diizd dxej zii bignëman xniaa Jesús lidxaman.

Güjt Jesús

(Mt. 27:45-56; Mr. 15:33-41; Lc. 23:44-49)

²⁸ Chi gulox rëb Jesús zian, gogbeeman ma gojc gran cumplid. Per din gac cumplid ni ca loj xtiidx Dios, rëbaman:

—Re'can nijs.

²⁹ Yagaj za' tijb re yu'n vin no'chan vinagr, zeel bagajdx reex tijb xiil loj vin guin, bacaa reexan loj tijb yag, dxel badxig reexan ro'man. ³⁰ Chi ma gu'man laan, dxel rëbaman:

—Ma gojc gran cumplid.

Dxel basajb lojman luyuj, güjtaman.

Guliiz tijb suldad guiib cwë'lën Jesús

³¹ Ma cayüjn ree bën Israel porvinid din guixiez gal lanij pascw. Zeel ad guyënt reeman naya'n ree cuerp guin loj crüjz dxej raziiladx reeman, din dád rajp reeman dxej guin respejt. Zeel biguiedx reeman loj Pilato din nabeeman qui'ch ree suldad guin xdxijt ree bën ca loj crüjz din guiët reeman yalet tēē reex laa reeman. ³² Zeel wej reex. Yaloj gudi'ch reex xdxijt bën ca cwè' Jesús, dxel gudi'ch reex xdxijt bën ca stiblad cwè'man. ³³ Chi gubig reex lod ca Jesús, baguiaa reex ma güjtaman, zeel ad gudi'cht reex xdxijtaman.

³⁴ Per tijb suldad guin guxhal ladaman con guuib ca'x, dxel briin rejn con nijs. ³⁵ Bën rü diidx guie baguiaaman, zeel ragbeeman najn diidxli, rüman laan din nē lējt chililadx. ³⁶ Gra nine gojc din gac cumplid ni ca loj xtiidx Dios, rēban: “Ad rayalt gach xdxijt xiildoo.” ³⁷ Stibljajt rēb: “Guguaa reeman bën guxhalnē reeman guuib lad.”

Biguie'ch Jesús

(Mt. 27:57-61; Mr. 15:42-47; Lc. 23:50-56)

³⁸ Chi gulox gojc zian, wej Xiëb, bën zēēd guiedx la Arimatea, bignabaman diidxbee loj Pilato din yaletaman xcuerp Jesús din chiquie'chaman laaman. Nē bën la Xiëb bililadx Jesús, per ralanzi, guial bidxebaman bejn ree. Badēēd Pilato diidxbee, zeel wej Xiëb bigxiiman xcuerp Jesús. ³⁹ Nē Nicodemo wej, bën bigneenē Jesús tijb guxhin, bidxinnēman cost gajlbichii quil ni la mirra, no'chan aloe, rureen nejxh. ⁴⁰ Bagajdxnē reeman laan lajd batüüb reeman laaman, zi'c rüjn ree bën Israel chi ruquie'ch reeman bengüt. ⁴¹ Lod cwa Jesús loj crüjz naga' tijb guidxliuj lod yu' ree yag. Yagaj naj tijb baa cüb lod achutczí waguie'ch. ⁴² Yagaj gudixh reeman xcuerpaman, guial najn gajxh, guial ma suloj tēē dxej raziiladx reeman.

20

Achetri xcuerp Jesús badxejl

(Mt. 28:1-10; Mr. 16:1-8; Lc. 24:1-12)

¹ Chidumingw chi sta nacayri, wej María Magdalena ro' xbaa Jesús, abi' baguiaaman ma bisüd guiaj nayaaw ro' baa guin. ² Dxel ruxüünman wejman lod za' Simón Béd con zatijb xbejn Jesús, bën rēn da'taman, abi' rēbaman loj reeman:

—Ma zinē reeman xcuerp Dad Jesús, banczi bigsa'n reeman laaman, achutri laaman yu' lēn baa guin.

³ Abi' brii Béd con bën guin, zē reeman ro' baa guin. ⁴ Grop reeman ruxüün zē reeman. Per bën guin mazri ruxüünman guial loj Béd, abi' yaloj laaman bidxin ro' baa guin. ⁵ Dxel gudixlojman baguiaaman vend bidüüb Jesús, per ad guyutaman. ⁶ Dxelri bidxin Simón Béd, abi' guyuman lēn baa guin. Nēgajcaman baguiaa vend guin ⁷ Baguiaa tēēman lajd bidüüb guijc Jesús, nadüüban naga'n lood ren, ad naga'tan tijbzi con vend guin. ⁸ Dxel guyu bën bidxin ro' baa guin yaloj, baguiaaman ni goc, zianz bililadxaman, ⁹ guial gocli ad bignia't reeman ni ca loj xtiidx Dios guial yaban Jesús loj ree bengüt. ¹⁰ Dxel zia ree xbejn Jesús lidx reeman.

Baliüloj Jesús loj María Magdalena

(Mr. 16:9-11)

¹¹ Per Li baya'nman ro' baa guin cayoonman. La'tgaj cayoonman gudixlojman lēn baa guin, ¹² abi' baguiaaman tio'p ree anjl, najcw

reeman lajd naquich, zojb reeman lod go't xcuerp Jesús, tijbaman lod go't guicaman, zatijbaman lod go't guia'man. ¹³ Dxel gunabdiidx ree anjl guin lojman, rëb reeman:

—Na, ¿chexc zeel roonl?

Badxi'man laan rëbaman:

—Guial zinë reeman xcuerp Dad Jesús, abi' banczi guin bigsa'n reeman laaman.

¹⁴ Guloxzi rëbaman zian, badxi' lojman baguiaaman za' Jesús yagaj, per ad bayünbeetaman laaman. ¹⁵ Dxel gunabdiidx Jesús lojman, rëbaman:

—Na, ¿chexc zeel roonl? ¿Chu raguuilil?

Gunaladx Li, bën rajp lod yu' ree yagnejxh guinan, abi' rëbaman:

—Dad, bal lüj binë xcuerpaman, guna ban bigsa'nl laaman din chigxin laaman.

¹⁶ Zianz rëb Jesús lojman:

—¡Li!

Dxel badxi' loj Li, rëbaman lojman con diidx hebreo:

¡Rabuni! —rën guiëban Mextr.

¹⁷ Rëb Jesús lojman:

—Ad guqui'l naj, din gadan yaya' loj da Dadan. Per baguiaj biguiedx loj ree da bejnan guial yaya' loj da Dadan bën naj gajc xDadidi, loj da Diosan bën naj gajc xDiosidi.

¹⁸ Dxel wej María Magdalena bicojnman xbejn ree Dad Jesús guial baguiaaman laaman, bagojn tëëman laa reeman gra ni rëbaman lojman.

Balüüloj Jesús loj ree xbejnman

(Mt. 28:16-20; Mr. 16:14-18; Lc. 24:36-49)

¹⁹ Chidumingw zii gajc chi ma caxhin, bado'p ree xbejn Jesús, nayaaw ro' port yu' reeman guial rdxeb reeman guxtis Israel ree. Dxel balüüloj Jesús galay reeman, rëbaman loj reeman:

—Yabe'cdxe Dios luxdoodi.

²⁰ Chi ma gulox rëbaman zian, balüü yaaman loj reeman në cwë'lënman, abi' laa reeman dád babaa reeman baguiaa reeman Dad Jesús. ²¹ Dxel rëbaman loj reeman zatijb:

—Yabe'cdxe Dios luxdoodi. Zi'c guxhaalaman naj, ziangajc rxhialan lëjt.

²² Dxel balüjbaman guijc reeman, rëbaman:

—Gol gubajnnë xSprijt Dios. ²³ Bën güüнди perdon xtol, chiquied xtol reeman, guiáad bën ad züjntidi perdon xtol, yaya'nnë xtol reeman.

Baguiaa Tumajs Jesús

²⁴ Tumajs, bën rniee reeman Cwajch, achut laaman za' chi balüüloj Jesús loj ree xbejnman. ²⁵ Chi rëb reeman loj Tumajs:

—Ma baguiaan Dad Jesús.

Dxel rëbaman:

—Bal id zuguiän yaaman lod wëëz clav, abi' bal id zagu' da bacwënan lod wëëz clav guin, bal id zagu' tëë yan cwë'lënman lod bidxeelguijdx, ad zaliladxtan.

²⁶ Chi goc xhujn dxej, badxajg lasa' ree xbejn Jesús zatijb, per dxel në Tumajs za'në laa reeman, nayaaw ruyu yu' reeman. Per balüüloj Jesús galay reeman, rëbaman loj reeman:

—Yabe'cdxe Dios luxdoodi.

²⁷ Dxel rëbaman loj Tumajs:

—Badxe' xbacwën'l guie, baguiaa ree yan, banee yaal guie badxe'n cwë' lënan. Ad runawëëgril, bililadx.

²⁸ Dxel rëb Tumajs lojman:

—¡Da Dadan, da Diosan!

²⁹ Abi' rëb Jesús lojman:

—Rliladxil guial ma baguiaal naj. Xiquilbaa ree bën rliladx, majs ad waguiaat reeman naj.

Chexc zeel cwa gui'ch guie

³⁰ Zienri ree milagr been Jesús loj ree xbejnman, ni ad cwat ree loj gui'ch guie. ³¹ Sa'n nine ree cwa reen din chililadxidi guial Jesús naj Cristo, Xi'n Dios, abi' guial chililadxidi laaman guibandi tiblayaa con Dios.

21

Balüüloj Jesús loj ree xbejnman ro' nijs

¹ Chi gudëd gojc zian, balüüloj Jesús loj ree xbejnman zatijb, ro' nijs naj gajxh guiedx Tiberias. Ze balüülojman: ² Chi nadxag lasa' ree Simón Bëd con Tumajs bën rniee reeman Cwajch, në Natanael bën za Caná guiedx riga' niz Galilea, con ree xi'n Zebedeo, nëtëë zatio'p xbejn Jesús, ³ dxel rëb Bëd loj reeman:

—Gan chignaazan bëjl.

Badxi' reeman laan rëb reeman:

—Në dunujn yadxoo.

Abi' wë'p reeman loj barcw zë reeman, per guxhin zii achutdzi bëjl gunaaz reeman. ⁴ Chi ma cayreguiaal, bidxin Jesús ro' nijs guin, per ad bayünbeet reeman laaman. ⁵ Dxel gunabdiidxaman loj reeman rëbaman:

—Xi'n, ¿nid chu bëjl wanaazidi ya?

Badxi' reeman laan rëb reeman:

—Achutdzi.

⁶ Abi' rëb Jesús loj reeman:

—Gol bazaal xguijxhidi xladbee barcw guin din guiniaazidi bëjl.

Zian been reeman, abi' ad rajctri rabëë reeman guijxh guin, guial dád zien bëjl yu' lojn. ⁷ Dxel xbejn Jesús, bën rën da'taman, rëbaman loj Bëd:

—¡Dad Jesúsán!

Biguiejnzi Simón Bëd zian, laa got gajc xabaman ni gulëëman, abi' gutiajsaman lojnijs guin. ⁸ Guiáad zaxho'p xbejn Jesús loj barcw guin badxin reeman ro' nijs guin, coobyuj reeman guijxh guin, guidxan bëjl, guial zi'ctzi tibgayuu mejtr ryaadx yadxin reeman ro' nijs guin. ⁹ Chi baguiajt reeman, baguiaa reeman laa guij ma riga', dxiib tijb bëjl lojn, në guiadxtil riga' yagaj. ¹⁰ Dxel rëb Jesús loj reeman:

—Gol tanë tio'p choon bëjl gunaaz nejzidi.

¹¹ Dxel wë'p Bëd loj barcw guin, guxoobyujman guijxh guin guidxan bëjl narooob ree, xt ro' nijs guin. Tibgayuu tü'pchiibichoon bëjl yu' lojn. Abi' majsi zienb, per ad goxya'tan. ¹² Zianz rëb Jesús loj reeman:

—Gol guda din gawidi rsiil.

Abi' ni'qui tijb reeman ad rayaxt guiniabdiidx chu bénan, guial ragbee reeman Dad Jesúsán. ¹³ Dxel gubigaman cwa'man guiadxtil badëëman loj reeman, ziangajc beenman con bëjl guin. ¹⁴ Ni ne bayon volt balüüloj Jesús loj ree xbejnman chi babanman loj ree bengüt.

Guneenë Jesús Bëd

¹⁵ Chi gulox gudaw Jesús con ree xbejnman, gunabdiidxaman loj Simón Béd, rëbaman:

—Simón, xi'n Waj, ¿walil ya rënl naj mazri guial loj ree bën guie?

Badxi' Bëdan rëbaman:

—Dad, ragbeequil rënan lüj.

Zeel rëb Jesús:

—Gunaj ree da xiildoon.

¹⁶ Abi' rëb Jesús zatijb:

—Simón, xi'n Waj, ¿walil ya rënl naj?

Badxi' Bëdan rëbaman:

—Dad, ragbeequil rënan lüj.

Zeel rëb Jesús:

—Gunaj ree da xiilan.

¹⁷ Bayon volt gunabdiidx Jesús rëbaman:

—Simón, xi'n Waj, ¿rënl naj ya?

Dád guyunaya Béd, guial ma gojc choon volt gunabdiidx Jesús bal rënman laaman. Zianz rëb Béd:

—Dad, lüj ragbee graczi, ragbeel rënan lüj.

Zeel rëb Jesús:

—Gunaj ree da xiilan. ¹⁸ Diidxiczi ganin, chi goquil xinguiag, rajcw xabil persi rejil lod rënl. Per chi ma najl bengol, gusli xu'quil din guscajcw ben ren xabil dín chinë reeman lüj lod ad rëntil chel.

¹⁹ Rëb Jesús zian guial basignia'man xhienaag guiët Béd, din güünbee ree bejn Dios. Dxel rëb Jesús:

—Tanal naj.

Ni ne bacaa xbejn Jesús bën guyën da'taman

²⁰ Chi badxi' loj Béd, baguiaaman laa bën rën da't Jesús zinal laa reeman. Laaman gure cwë' Jesús chi gudaw reeman xche, gunabdiidx tëëman loj Jesús rëbaman: “Dad, ¿chu yayü lüj?” ²¹ Chi baguiaa Béd laaman, gunabdiidxaman loj Jesús rëbaman:

—Dad, laadxza xin guin, ¿xhie saquix?

²² Badxi' Jesúsán rëbaman:

—Bal rënan guibanx xt yaguialan, ¿xhie güünl? Lüj tanal naj.

²³ Zianan zeel hire'ch diidx loj ree xbejnman guial ad zëjtt bën guin. Per ad ziantan rëb Jesús, rëbaman: “Bal rënan guibanx xt yaguialan, ¿xhie güünl?”

²⁴ Bën guin gajcan rü diidx xcwent ree nine, laa tëëman bacaa laan, rayagbee tëë ree rüman diidxli. ²⁵ Dád zien ree ni been Jesús, bal nitia tijn gajn, wed ad zadaant loj guidxliuj niu ree libr ni niajc.

Ni been ree xi Apóstoles Jesucrist

¹ Rugajpdiozan lüj dad Teófilo: Loj da gui'ch yalojn rnin graczi ni been Jesús ni balüü tēēman chi guzuloj xchiinman ² xt chi ziaman xanyabaa. Chi gadaman yaguaiaj, gunabeeman bēn naj ree apóstoles, bēn guleman, ni rayal güün reeman, zi'c rēb xSprijt Dios lojman. ³ Chi mal guzagdiaj da'taman loj xgualgüjtaman, babanman loj ree bengüt. Loj tiuu dxej balüülojman zien volt loj bēn naj ree apóstoles, persi gogbee reeman nambancaman. Dxej zii ree guneenēman laa reeman xcwent xgualrniabee Dios.

⁴ Chi ziz za'nēman laa reeman, guneenēman laa reeman ad yaza reeman Jerusalén, rēbaman:

—Gol gulējz gac cumplid ni na da Dadan zi'c ma rnin lojdi. ⁵ Walican baroobnijs Waj con nijs, per ma zidyob dxej gui't xSprijt Dios guibannē lējt, laan gac zi'c gualrirobnijis par lējt.

Zia Jesús xanyabaa

⁶ Lēn ree dxej zii chi badxaag lasa' reeman con Jesús, gunabdiidx reeman lojman rēb reeman:

—Dad, ¿yanan yayül gualrniabee loj ree bēn Israel ya?

⁷ Badxi' Jesúsán rēbaman:

—Ad lējtít rayal gagbee xhie dxejn o xhie horan gac zian. Tijbzi da Dadan ragbee laan din laaman ca' gualrniabee. ⁸ Per chi ma nabannēdi xSprijt Dios, tia'di gualrniabee. Dxel griidi chiguiedi diidx loj ree bēn Jerusalén chu najn, nē gra ree guiedx riga' niz Judea nē niz Samaria, xt ree guiedx ren ni riga' ree zijt da't.

⁹ Gulox guneeaman, ruguiaa reeman laaman dxejlczi wajsaman ziaman xanyabaa, abi' biguiajt tijb bēj bata'cwan laaman, dxel ad baguiaa-tri reeman laaman. ¹⁰ La'tgaj ruguiaa reeman ziaman xanyabaa, gulentie tio'p ree bēn najcw lajd naquich lod za' reeman, ¹¹ abi' rēb reeman loj ree apóstoles guin:

—Bēn Galilea, ¿chexc zeel sta ruguiaadi xanyabaa? Jesús, bēn baguiaadi zia xanyabaa, laagajcaman yaguaaad stijb, zi'cgajc baguiaadi ziaman.

¹² Chi baza ree xi apóstoles Jesús ruguia' la Olivos, guza reeman zi'ct rza reeman dxej raziiladx reeman, persi badxin reeman Jerusalén.

¹³ Chi badxin reeman, wē'p reeman lēnü ladya lod zojb reeman. Brii laj reeman Bēd, Waj, Jacob, Andrejs, Felip, Tumajs, Tol, Matew, Jacob xi'n Alfeo, Simón (bēn guzunē ree bēn cananistas), nē Judas xi'n Jacob.

¹⁴ Gra reeman rüjn tijbzi xgab, radxaag lasa' reeman din cwedx guiniab reeman Dios, con ree bijch Jesús con Li xniaaman, con ree bēngunaa ren.

Gulej reeman bēn baya'n xluar Judas

¹⁵ Lēn ree dxej zii bado'p ree bēn rliladx Jesús, naj reeman cost tibgayuu gajl bejn, dxel guzuli Bēd galay reeman, rēbaman loj reeman:

¹⁶ —Compniar raliduladx ree Jesucrist, ganin lojdi, gojc cumplid ni bacaa rey Davi loj xtiidx Dios por xSprijtaman xcwent Judas, xin balüü Jesús loj ree bēn gunaaz laaman, ¹⁷ gojquix tijb dux compniaran, nē laax been lasa' dxiin raguieenan. ¹⁸ Per con milia ni gudix reeman laax por ni mal beenx, bio' guidxliuj lod gudidya'x, bazuj guijquix, goxya'x abi'

brii gra xziix. ¹⁹ Chi gogbee gra ree bén Jerusalén ni goc, gune reeman guidxliuj zii Acéldama, rën guiëban guidxliuj rejn. ²⁰ Din rëb loj libr la Salmos:

Yaya'n dëjch lidxix,
achutcziri cwe lënan.
Rëb tëë lojn:

Yayu ben ren guia'x.

²¹ 'Zeel loj gra ree bén za'në dunuj ree guidib tiamp ni guzunë Jesús dunuj ree, ²² diizd chi baroobnijs Waj laaman xt chi ziaman xanyabaa. Loj gra reeman rayal grii tijbaman din güünman dunuj ree yudar yaguei'ch ree loj ree bejn guial walican babanman loj ree bengüt.

²³ Dxel gulej reeman tio'p reeman: tijb bén la Xiëb (rniee reeman laaman Barsabás, rniee tëë reeman laaman Justo), gulej tëë reeman bén la Matías. ²⁴ Dxel gurejdx gunab reeman Dios, rëb reeman:

—Dad, lüj nünbee luxdoo gra ree bejn. Balüü chu loj grop reeman gulejl ²⁵ din gacaman apóstol luar Judas, din banijtx delant lojlr por dol ni beenx abi' ziax luar ni rayalix.

²⁶ Dxel baguiaa reeman chu yayal suert guin, abi' bayal Matías laan. Loj hor zii gajc bayuman loj zachibtib ree apóstoles.

2

Biguiajt xSprijt Dios diizd xanyabaa

¹ Chi bidxin dxej gojl lanij la Pentecostés, gra ree bén rliladx Jesucrist bado'p tijbzi luar. ² Dxejlczi gojc naquie' xanyabaa zi'c bidoxh xt bayu bi lënü lod riga' reeman, ³ abi' gulentie zi'c bajl dobëz ree, biguiajt reen guijc tijb gaj reeman. ⁴ Zianz guyu xSprijt Dios luxdoo graczi reeman, dxel guzuloj canee reeman diidx ren ree zi'c cusnee Sprijt guin laa reeman.

⁵ Lën ree dxej zii za' zien ree bén Israel Jerusalén, baza reeman gra ladczi din cwedx guiniab reeman Dios. ⁶ Chi biguiejn reeman cayajc naquie', bado'p reeman persi biquiaa reeman. Dxel chi biguiejn reeman rniee gra ree bén rliladx Jesús xtiidx tijb gaj reeman, ad badxejlt xgab nünjn reeman. ⁷ Dád badxa loj reeman xt ni'quid badxejlt xhie nünjn reeman, abi' gunabdiidx loj lasa' reeman rëb reeman:

—¿Nid bén Galilea gra ree bén canee guin ya? ⁸ ¿Chexc zeel raguiejn ree rniee reeman dux tiidx ree? ⁹ Du loj ree no'ch ree bén zëed guiedx riga' ree niz Partia, Media, Elam, Mesopotamia, Judea, Capadocia, Ponto, Asia Menor, ¹⁰ bén zëed tëë ree guiedx riga' ree niz Frigia, Panfilia, Egipto, në ree guiedx nulen Libia ni riga' ree gajxh Cirene, në ree bén zëed Rom, yu' reeman gojl Israel per naban reeman Rom, yu' tëë reeman naj quijb ben Rom per rliladx reeman ni rliladx ree bén Israel. ¹¹ Në ree bén zëed niz Creta nëtëë ree bén zëed guiedx riga' ree niz Arabia no'ch du loj ree. ¡Per dugraczi ree caycaagdiajg con dux tiidx ree niza'cdxoon rünjn Dios!

¹² Graczi reeman badxa da't loj xt ni'quid badxejlt xgab nünjn reeman, abi' guzuloj canabdiidx loj lasa' reeman rëb reeman:

—¿Xhie rën guiëb gra ni guie?

¹³ Per garol reeman baze' laa reeman, rëb reeman:

—Rë' reeman.

Ni rëb Bëd loj ree bejn

¹⁴ Dxel guzuli Bëd con zachibtib ree apóstoles guin, guneeman rejs rëbaman:

—Lëjt Bén Judea në graczi ree Bén zobj Jerusalén, gol bacaagdiajg gol bignia' tée ni ganin. ¹⁵ Ad rë't ree Bén guin zi'c naladxidi, din qui gojlri raca gaa rsil. ¹⁶ Guie cayajc cumplid ni gunee Bén brii laj Joel, Bén badëë xtiidx Dios loj ree bejn, chi rëbaman:

¹⁷ Na Dios,

guidxin dxej gaxhal da Sprijtan luxdoo gra ree bejn, abi' xi'ndi xinguaaw con biingunaa gudëed reex da diidxan, zien ree ni gulüuloj loj ree xinguiag, guiáad ree bengol zien ree ni guinie'xhaal reeman.

¹⁸ Dxej zii ree gaxhal da Sprijtan luxdoo ree Bén rüjn da dxiinan, xinguaaw ree në ree béngunaa, abi' gudëed reeman da diidxan.

¹⁹ Gulün sen ree xanyabaa ni yadxa lojdi, guiáad loj guidxliuj gulün sen ree zi'c rejn në bajl nëtëë go'xh.

²⁰ Guicajy loj gubijdx, guiáad bëëw yayajcan zi'c rejn. Chi ma gojc zian, dxel guidxin quijb dxej guin, dxej za'cdxoon gui't Dios Bén rniabee, dxej guiguien guidib xbianiman.

²¹ Abi' graczi ree Bén cwedx guiniab laaman güünman laa reeman perdon.

²² Rëb tée Bëd loj reeman:

—Yan, gol bacaagdiajg ni ganin lëjt Bén Israel: Lëjt ragbee guial Jesús Bén Nazaret najman Bén guxhaal Dios, been tëëman milagr ree në ree ni radxa loj ree bejn zi'c sen din gagbeedi guial Dios guxhaal laaman.

²³ Diizd gocli mal nüjn Dios xgab guial zian güünnëdi Jesús, gunaazidi laaman bayüdi laaman loj ree benmal, din gugüjt reeman laaman loj crüzj. ²⁴ Per basban Dios laaman stijb, babëëman laaman loj gualgüjt, din ad gojct nutëë gualgüjt guin laaman. ²⁵ Chi gunee rey Davi xcwent Jesús, rëbaman:

Zianczi baguian dux Dad ree Dios za'nëman naj.

Za'man da ladbeen, achetczi zajc guchejb naj.

²⁶ Meel yu' luxdon nix, ruzat tëen Dios zagdx.

majsi guiëtan ad rdxebtan,

²⁷ din ad zusa'ntil naj lën baa,

ad zatiëjbtill xhin xcuerp xi'nl Bén naya nali.

²⁸ Balüül naj nejz runee guialnaban,

chu' tée luxdon zagdx guial guibannël naj.

²⁹ Basnuu gunee Bëd, rëbaman:

—Ganin loj gradi compniar, diidxliczi dux béngulal ree Davi güjtaman biguie'ch tëëman, abi' laa xbaaman sta raguiaa ree yan. ³⁰ Per gojcaman Bén badëë xtiidx Dios loj ree bejn, abi' gogbeeman been Dios promejs guial loj xdiaaman grii Cristo Bén nabee. ³¹ Rulüü ma cuguaaman gra ni gac, rëbaman guial yaban Cristo loj ree bengüt, ad zaya'ntaman lën baa ad zaxin tëët xcuerpaman. ³² Yan ma basban Dios Jesús, dugran nayajc testiw guial walican babanman. ³³ Zia tëëman xanyabaa zisobaman xladbee Dios, persi badëë xSprijt Dios lojman zi'c ma rëbaman, yan ma guxhaal Jesús Sprijt guin loj guidxliuj, por laaman cayajc ni cuguaadi caguiejn tëëdi. ³⁴ Ad Davitan zia xanyabaa, din laagajcaman rëb:

Rëb dux Dad ree Dios loj Bén rniabee naj:

“Gurej da ladbeen,

³⁵xt gabecan xin rdxe'ch ree lüj guia'l.”

³⁶'Gradi bën Israel gol gogbee guial Jesús bën bacaadi loj crüjz, Dios bacaabee laaman din gacaman Dad, bën nabee dunuj ree.

Bachajg zien ree bejn bën rlıladx ree Jesús

³⁷Chi biguiejn ree bën riga' yagaj ni rëb Bëd, dád guyu naya luxdoo reeman. Abi' gunabdiidx reeman lojman në loj los demazri ree apóstoles guin, rëb reeman:

—Dad, gol guna, ¿xhie rayal yaguieenan?

³⁸Dxel rëb Bëd loj reeman:

—Gol bayagbee xtolidi, gol badxi' tõe lojdi loj Dios, gol gurobnijs por xguialrniabee Jesucrist din gac xtolidi perdon, zian chu' xSprijtaman luxdoodi. ³⁹Din promejs guin naj par lëjt në par ree xi'ndi në par gra ree bën riga' zijt, par gra ree bën cwe Dios par laaman.

⁴⁰Con ree diidx guie në mazri ree diidx ren guneenë Bëd laa reeman, rëbaman:

—¡Gol bariica loj ree bën rüjn ni mal!

⁴¹Zian gojc, graczi bën bazoob diidx ni rëbaman gurobnijs. Dxej zii gajc bachajg cost choon mil bejn bën rlıladx ree Jesús. ⁴²Graczi reeman binal ni balüü ree xi apóstoles Jesús laa reeman, gubajnnë lasa' reeman zagdxe, gurejdx gunab reeman Dios abi' rado'p reeman persi raw reeman guiadxtıl tıjbzi zi'c gunabee Jesucrist güün reeman.

Ze gubajn ree bën bililadx Jesús yaloj

⁴³Graczi ree bejn radxa da't loj milagr në los demazri ree ni been ree apóstoles guin. ⁴⁴Graczi ree bën bililadx Jesucrist gubajnnë lasa' zagdxe, rgui's tõe ni rajp reeman loj lasa' reeman. ⁴⁵Ruto' xguidxliuj reeman në gra ni rajp reeman, persi rgui's reeman milia guin loj lasa' reeman zi'ctzi naj ni riaadx tıjb gaj reeman. ⁴⁶Guixie guixie rado'p reeman lën yadooro' Jerusalén, dxel raguiay reeman lidx xcompniar reeman rtaw reeman, dád nix yu' luxdoo reeman rën tõe lasa' reeman, ⁴⁷ruza't reeman Dios zagdxe, guiaad gra bejn guyën laa reeman. Guixie guixie ragnë Dios din gacxhiey mazri bën rlıladx Jesucrist, persi gojc xtol reeman perdon.

3

Bayajc tıjb bën ad rajct rza

¹Tıjb dxej zë ree Bëd con Waj lën yadooro' Jerusalén raca choon wadxe, hor zii naj hor ni rbejdx rniab reeman Dios. ²Ro' xport yadoo guin zojtb tıjb bën ad rajct rza diızd gojlaman. Zianczi rbe'c reeman laaman ro' port guin, ni la Port Za'cdxoon, din guiniabaman carda loj ree bën ru lën yadoo guin. ³Chi baguiaaman Bëd con Waj ma chu' reeman lën yadoo guin, gunabaman carda loj reeman. ⁴Baguiaa reeman lojman, dxel rëb Bëd lojman:

—Baguiaa du lojn.

⁵Chi biguiejnman rëb Bëd zian, dxel baguiaaman loj reeman, naladxaman milia nudëed reeman lojman. ⁶Per rëb Bëd:

—Ad ra'ptan plajt ni'qui or par gunen lojl, per ni zajc günan por lüj günanan: Por xguialrniabee Jesucrist bën Nazaret, guzuli, guza.

⁷ Dxel gunaazaman yaaman ladbee, bazuliman laaman. Loj hor zii gajc guyu ree guia'man gojl, ⁸ abi' gutiajsaman, guzuliman guzuloj cazaman. Dxel guyunëman laa reeman lën yadoo guin, cazaman, catiajsaman cuza't tēëman Dios zagdxë. ⁹ Graczi ree bën cuguiaa laaman cazaman cuza't tēëman Dios zagdxë, ¹⁰ dád badxa loj reeman bidxeb tēë reeman guial gojc zian guial nünbee reeman bën guin, ragbee tēë reeman laaman rbej ro' xpört yadoo guin ni la Port Za'cdxoon, rniabaman carda.

Gunee Bëd loj ree bejn lod la xcurdur Salomón

¹¹ Ad riro'nladxt bën bayajc guin Bëd con Waj. Dád badxa loj ree bejn, abi' baxüün reeman wej reeman lod la xcurdur Salomón lod za' ree Bëd con Waj. ¹² Chi baguiaa Bëd zian, rëbaman loj reeman:

—Bën Israel, ¿chexc zeel radxa lojdi ni goc? Ad naladxidi por dunujn rza bën guie guial naca'n guialrniabee o guial nayajcan naya delant loj Dios ya. ¹³ XDios dux bégulal ree Abraham, Isaac në Jacob, laaman badëë guialrniabee loj Jesús, bën bayüdi loj guxtis. Abi' chi guyën Pilato nuslaaman laaman, ad cwëjbtidi. ¹⁴ Luar niniabidi nuslaa Pilato bën naya nali, bën rüjn zi'c rayal, gunabidi baslaaman tijb xin bagüjt bejn. ¹⁵ Zian bagüjtidi bën runee guialnaban. Per basban Dios laaman stijb, abi' dunujn nayajc testiw guial babanman. ¹⁶ Bën guie, bën ruguiaadi nünbee tēëdi, guyu gojl guia'man por xguialrniabee Jesucrist, bayajcaman guial baliduladxan, zi'c ruguiaa graczi.

¹⁷ 'Ganin lëjt compniar, ragbeen guial lëjt con ree bën rniabee lëjt ni'quid gogbeetidi xhienin beendi chi bagüjtidi Jesús. ¹⁸ Per zian been Dios persi gojc cumplid ni rëbaman loj ree bën badëë xtiidxaman loj ree bejn diizd gocli guial sagdiaj Cristo. ¹⁹ Zeel gol bayagbee xtolidi gol badxi' tēë lojdi loj Dios din güünman xtolidi perdon. Dxel yayaalyuj luxdoodi, ²⁰ guixhiaal tēëman Jesús stijb, bën naj Cristo diizd gocli par lëjt, ²¹ majsı yan rayalri suman xanyabaa, xt ma bazuxnejz Dios gra, zi'c rëbaman loj ree bën badëë xtiidxaman loj ree bejn diizd gocli, bën gubajn ree naya delant lojman. ²² Abi' rëb Moisejs loj ree dux bégulal ree: “Loj xdiaadi cwëë Dios tijb bën gudëë xtiidxaman loj ree bejn zi'c naj, gol bazoob xtiidxaman graczi ni naman lojdi, ²³ din graczi ree bën ad zuzoobt xtiidxaman nit reeman, ad zajc tēëtri reeman cwent zi'c xbejn Dios.”

²⁴ 'Gra ree bën badëëd xtiidx Dios loj ree bejn, diizd Samuel con los demazri ree bën badëë xtiidx Dios diizd gulal, mal bagojn reeman ni cayajc ree lën ree dxëj guie. ²⁵ Lëjt naj xdiaa reeman, lojdi gac cumplid ni cwëb Dios loj ree dux bégulal ree chi rëbaman loj Abraham: “Por xdiaal güñle'n gra ree bënguidxliuj.” ²⁶ Abi' chi basban Dios xi'nman Jesucrist, yaløj lojdi guxhaalaman laaman din güünle'man lëjt din yabëëcaman gradi loj ni mal rüjndi.

4

Bazuj reeman Bëd con Waj loj ree guxtis

¹ Sta canee ree Bëd con Waj loj ree bejn, chi bidxin ree xbxhioz ree bën Israel në suldad rniabee suldad rniaj ree ro' yadooro' Jerusalén, nëtëë ree bënsaducew. ² Dád ralen reeman guial culüü ree Bëd con Waj bejn ree, rëb reeman guial yaban ree bejn loj ree bengüt, din laan ma baguiaa reeman chi baban Jesucrist. ³ Zeel gunaaz reeman laa reeman, per guial

ma gudxe, zeel badxe' reeman laa reeman ladxguuib la'tgaj rareguiaal. ⁴ Per dád zien ree b́en bacaagdiajg ni rēb ree Béd con Waj bililadx xtiidx Dios, gojc reeman cost gaay mil xinguaaaw xcwentqui ree béngunaa.

⁵ Chi bareguiaal, guxtis Jerusalén nē ree bengol nē ree mextr rulüü ley, bado'p reeman loj ciuda guin. ⁶ Nē Anás bidxin yagaj, b́en naj bixhioz mazri zobjloj rniabee graczi ree bixhioz, bidxin tēē bixhioz la Caifas nē Waj nē Lejandr, nētēē gra ree b́en naj lasa' ree bixhioz rniabee guin. ⁷ Gunabee reeman bica' reeman Béd con Waj, abi' bazuj reeman laa reeman galay lod riga' reeman, dxel gunabdiidx reeman loj reeman, rēb reeman:

—¿Chu banee diidxbee o chu por rüjndi ni guin?

⁸ Per guial yu' xSprijt Dios luxdoo Béd dád gognēman laaman, zeel rēbaman:

—Gol bacaagdiajg ni ganin lējt bengol nē lējt guxtis, ⁹ rniabdiidxidi dunujn xhienaag baguieenan béngogxuu guin yudar, xhie tēē naag gojc zeel bayajcaman. ¹⁰ Yanan lojdi dín gagbeedi gagbee tēē gra b́en Israel xhienaag bayajc b́en za' lojdi. Bayajcaman por xguialrniabee Jesucrist b́en Nazaret, b́en bacaadi loj crüz abi' basban Dios laaman stijb. ¹¹ Beennēdi laaman zi'c rüjn ree b́en rüjn yu chi rbēēgo'n reeman tijb guiaj, dxel qui ragbeeri reeman guial guiaj guin naj ni mazri lasajc par gacnē yu guin. ¹² Achut ben ren rüjn dux tol ree perdon, tijbzi Jesús, dín achut mazri guxhaal Dios loj guidxliuj dín güünman dunuj ree perdon.

¹³ Chi baguiaa ree guxtis guin ad rdxebt ree Béd con Waj guial rniee reeman, abi' gogbee reeman ad b́en basiidt ree mazran achu tēēt naj reeman, badxa loj reeman bayünbee tēē reeman laa reeman guial b́en binal ree Jesúsán. ¹⁴ Abi' yagaj gajc za' b́en bayajc guin, zeel ad bile'tri xhie niējb reeman contr laa reeman. ¹⁵ Dxel gunabee ree guxtis guin barii ree Béd con Waj dín yaya'n laaz reeman dín gü reeman diidx. ¹⁶ Rēb reeman:

—¿Xhienaag yaguieennē' ree xin guin ree? Graczi ree b́en Jerusalén ma ragbee milagr been reex. Abi' ad zajct yarexuu ree. ¹⁷ Per chitēē guire'ch xtiidx Jesús, yachejb reex dín diizd yan achutziri loj guza't reex laax.

¹⁸ Dxel gurejdx reeman laa reeman gunabee reeman chitēē churi loj guza't reeman Jesús, ad gulüü tēēri reeman xtiidxaman. ¹⁹ Per badxi' Béd con Waj laan, rēb reeman:

—Lējt gajc gol been xgab: ¿Zagdxe naj yazooban xtiidxidi luar yazooban xtiidx Dios ya? ²⁰ Per ad zajct yacwēēz yaguie'chan gra ni baguiaan baguiejn tēēn.

²¹ Dxel bachejb ree guxtis guin laa reeman stijb, dxelri baslaa reeman laa reeman zia reeman guial ad badxejlt xhienaag nudēēd reeman laa reeman casti, dín graczi ree bejn ruza't Dios zagdxe por ni goc. ²² Nadēd tiuu ijz yu' b́en bayajc guin.

Rbejdx ree b́en rliladx Jesús Dios

²³ Chi baslaa ree guxtis guin Béd con Waj, baguiaj reeman lod riga' xcompniar reeman b́en rliladx ree Jesucrist, abi' be reeman diidx ni rēb ree bixhioz rniabee ree bixhioz nē ree bengol rniabee. ²⁴ Chi gulox bacaagdiajg reeman diidx ni be reeman, graczi reeman guzuloj cabejdx canab Dios, rēb reeman:

—Dad lüj rniabee gra, lüj naj Bén been xanyabaa në guidxliuj nētēē nijsdoo con gra ni yu' loj reen. ²⁵ Por xSprijt tēēl gunee rey Davi diidx guie ree, chi rēbaman:

¿Chexc zeel ridxe'chnē ree bénguidxliuj Dios?

¿Chexc zeel rüjn reeman xgab ni ad rüjnt wen?

²⁶ Bado'p ree rey në gra ree guxtis

din su reeman contr dux Dad ree Dios në contr Cristo.

²⁷ 'Abi' zian ma gojc, Herodes con Poncio Pilato con ree Bén Israel nētēē ree Bén ad najt Bén Israel, badxajg lasa' reeman luguiedx guie persi guzuj reeman contr xi'n'l Jesús, Bén naya nali, Bén bacaabeel. ²⁸ Zian gojc, been reeman zi'c ma beenl xgab diidx gocli. ²⁹ 'Abi' yan Dad, baguiaa yan ruchejb reeman dunujn. Gognē dunujn nayajcan xbejnl din gac yatie'chan xtiidxil sin guialrdxeb, ³⁰ në con xguialrniabeel yasiajcan Bénragxuu ree, yaguieen tēēn milagr ree por xguialrniabee xi'n'l Jesús, Bén naya nali.

³¹ Chi gulox gurejdx gunab reeman Dios, guzuloj canij luar lod riga' reeman, dxel guyu xSprijt Dios luxdoo gra reeman, abi' guzuloj catie'ch reeman xtiidx Dios sin guialrdxeb.

Ragnē lasa' ree Bén rliadx Jesús

³² Graczi ree Bén rliadx Jesucrist bidxajg gubajn reeman, rüjn reeman tijbzi xgab, ni'qui tijb reeman ad rēbt guial xieenzi reeman naj ni rajp reeman, din najn par gra reeman. ³³ Gognē Dios apóstoles guin ree persi basnuu be reeman diidxli guial baban Dad Jesús loj ree bengüt. Dád beenle' Dios laa reeman. ³⁴ Ni'czi tijb reeman ad biaadxt xhienin, din graczi ree Bén rajp guidxliuj o Bén rajp yu ya ruto' reeman laan, abi' milia guin ³⁵ rayü reeman loj ree apóstoles guin, persi laa reeman rgui's laan loj gra reeman zi'ctzi naj ni riaadx tijb gaj reeman. ³⁶ Loj reeman no'ch tijb Bén brii laj Xiëb, najman xdiaa Bén brii laj Leví, zēēdaman yuj la Chipre ni riga' loj nijsdoo. Gunee ree apóstoles guin laaman Bernabé, rēn guiëban Bén ragu' luxdoo ree bejn zagdx. ³⁷ Gojpaman tijb guidxliuj, abi' bato'man laan persi badēēman milia guin loj ree apóstoles guin din qui's reeman laan.

5

Dol ni been ree Ananías con Safira

¹ Per guyu stijb Bén brii laj Ananías, xbéngunaaman brii laj Safira. Bato' tijb xguidxliuj reeman, ² per baya'nnē xbéngunaaman diidx persi baya'nnēman ta'n milia guin. Sta'nan badēēman loj ree apóstoles guin, rēbaman laan naj gran. ³ 'Abi' rēb Béd lojman:

—Ananías, ¿chexc zeel cwējbil gunabee xindxab lüj? ¿Chexc zeel guyēnl nusquieel loj xSprijt Dios, din naya'nnēl ta'n milia ni bato' xguidxliujl?

⁴ ¿Wen nid xguidxliujl gojcan ya? 'Abi' chi bato'lan, ¿nid xmilialan ya? ¿Chexc zeel balablaxdixil beenl zian? Loj Diosan nuyēnl nusquieel, ad lojt bejnan.

⁵ Chi biguejcn Ananías ni rēbaman, biajbaman abi' güjtaman. Graczi ree Bén gogbee ni guzacaman dád bidxeb reeman. ⁶ Dxel bibig bēlzi ree xinguiaq, batüüb reex laaman lajd persi biquie'ch reex laaman.

⁷ Chi gudēd cost choon hor, dxel bidxin xbéngunaa Ananías, ad ragbeetaman ni goc. ⁸ Dxel gunabdiidx Béd lojman rēbaman:

—Guna, ¿bato' xguidxliujdi zi'c na lacheelil ya?

Abi' rëbaman:

—An, zianqui bato'nan.

⁹ Dxel rëb Bëd lojman:

—¿Chexc zeel baya'ndi diidx persi nuyëndi nusquieedi xSprijt Dios? Laa ree xin biquie'ch lacheelil ziaad ni, yan nëgajc lüj chiquie'ch reex.

¹⁰ Loj hor zii gajc biajb Safira lod za' Bëd, abi' güjtaman. Chi bayu ree xin guin baguiaa reex ma güjtaman, dxel bales reex laaman biquie'ch reex laaman cwë' lacheelaman. ¹¹ Graczi ree bën rliladx Jesucrist në gra ree bën gogbee ni goc, dád bidxeb reeman.

Zien ree milagr been ree apóstoles

¹² Zien ree milagr narooob been ree apóstoles guin loj ree bejn. Graczi ree bën rliladx Jesucrist radxajg lasa' ro' curdur lod rniee reeman xcurdur Salomón. ¹³ Zagdxë ruza't ree bën luguiedx guin laa reeman, per ad rayaxt reeman guchajg reeman laa reeman. ¹⁴ Abi' guixie guixie cayajcxhiey ree bën rliladx Dad Jesús, zi'c xinguaaw zi'c béngunaa. ¹⁵ Xt rbëë reeman bënragxuu ree lunejz, rguijxh reeman laa reeman loj ree loon në loj ree da, din chi téd Bëd, majsi xbalazaman téd guijc reeman. ¹⁶ Në ree bën zojb guiedx riga' ree gajxh Jerusalén, zien reeman bidxin Jerusalén, bidxinnë reeman bënragxuu ree në ree bën yu' xindxab luxdoo, abi' graczi reeman bayajc.

Gunaaz ree guxtis Bëd con Waj

¹⁷ Bixhioz mazri zojbloj rniabee graczi ree bixhioz në ree bénsaducew za'në laaman, guyu guialnadédloj luxdoo reeman, ¹⁸ abi' gunabee reeman biniaaz ree apóstoles guin persi badxe' reeman laa reeman ladxguuib. ¹⁹ Per guxhin zii tijb xi anjl Dios guxhal ro' ree xport ladxguuib guin, abi' babëëman laa reeman, rëbaman:

²⁰ —Gol chej lën yadooro', gol biguiedx loj ree bejn xhie naag gap reeman guialnaban tiblyaa con Dios.

²¹ Chi biguiejn reeman ni rëb anjl guin, bareguiaal rsildoo wej reeman lën yadoo guin, guzuloj culüü reeman bejn ree xtiidx Dios.

Guiáad bixhioz zojbloj guin con ree bën za'në laaman, bato'p reeman guxtis con gra ree bengol Israel. Abi' gunabee reeman suldad ree din chica' reex apóstoles guin ree lën ladxguuib guin. ²² Per chi bidxin reex ro' ladxguuib guin, achutri ree apóstoles guin ree yu'. Dxel bicojn reex guxtis guin ree, ²³ rëb reex:

—Chi badxinan, baguiaan nayaaw ro' ladxguuib guin zagdxë, laa ree suldad rajp ro' ladxguuib guin za', per chi baxhalan, achutczi yu' lënan.

²⁴ Dxel bixhioz zojbloj guin con suldad rniabee ree suldad rniaj ro' yadoo guin, con ree bixhioz rniabee ree bixhioz, chi biguiejn reeman zian, guzuloj rëb loj lasa' reeman, ¿ban xt guin chigdiblagaa ree ni guie?

²⁵ Loj hor zii gajc bidxin tijb xin rëb loj reeman:

—Laa ree bën badxe'di ladxguuib yu' lën yadoo culüü reeman bejn ree.

²⁶ Dxel wej suldad rniabee guin con ree xsuldadix bica' reex apóstoles guin ree, per ad beennaat reex laa reeman guial rdxeb reex gucaaguiaj ree bejn laa reex. ²⁷ Chi badxinnë reex laa reeman, bayü reex laa reeman loj guxtis. Dxel rëb bixhioz zojbloj guin loj reeman:

²⁸ —¿Nid ranan ya guial ad zajctri gulüüdi bejn ree xtiidx Jesús? Abi' yan graczi loj ree bën Jerusalén ma gutie'chidi xtiidx, nëtëë yan rëndi gudxiibidi du guijcan guial dunujn bagüjt laax.

²⁹ Abi' badxi' Bédan në gra ree apóstoles guin, rëb reeman:

—Rayal yazooban xtiidx Dios luar yazooban xtiidx ree bénguidxliuj. ³⁰ XDios dux béngulal ree basban Jesús, bén bacaadi loj crújz. ³¹ Abi' nùjn Dios laaman bén zobjloj, nabe'caman laaman xladbeeman, laaman naj bén rniabee rabëë tèeman bejn ree loj xtol reeman, abi' zian guxhalaman nejz par ree bén Israel din cwëeladx xtol reeman yadxi' tèë loj reeman loj Dios din güünman laa reeman perdon. ³² Dunujn në xSprijt Dios bén rudëëman loj ree bén ruzoob xtiidxaman, rayagbeen guial gra ree ni guin naj diidxli.

³³ Chi biguiejn ree guxtis guin ni rëb reeman, dád balen reeman abi' guyën reeman nugüjt reeman laa reeman. ³⁴ Per loj ree guxtis guin no'ch tijb bénfarisew laman Gamaliel, najman mextr rulüü ley abi' graczi ree bejn rajp laaman respejt. Guzuliman abi' gunabeeman barii ree apóstoles guin xchu tibrajt. ³⁵ Dxel rëbaman loj ree guxtis guin:

—Bén Israel, gol been xgab xhienin güünnëdi bén guin ree. ³⁶ Gol basaaladx, guyu tijb xin brii laj Teudas, rëbix yu' chu najx abi' cost tajp gayuu ree bejn binal laax. Per chi bagüjt ree bejn laax, bire'ch gra ree bén binal laax, yagaj gulox gra ni beenx. ³⁷ Abi' tèë lën ree dxej gunabee gobiarn biab ree bejn, guyu tijb xin brii laj Judas, gojquix xin Galilea, ziangajc dád zien ree bejn binal laax. Per chi bagüjt ree bejn laax, gra ree bén binal laax bire'ch. ³⁸ Zeel rnin lojdi, ad bal chu'ridi con ree bén guin, gol baslaa reeman. Din bal bénguidxliuj rniabee ni rùjn reeman, zadxin dxej loxan. ³⁹ Per bal por Dios cayüjn reeman ni guin ree, ad zajct gutëedi loj ni cayüjn reeman. Gol gojp cudad ad niad chi gagbeedi contr Diosan za'di.

⁴⁰ Beencwent ree guxtis guin xtiidx Gamaliel, dxel gurejdx reeman apóstoles guin ree, gudijn reeman laa reeman abi' rëb reeman loj reeman ad gutie'chri reeman xtiidx Jesús, dxel baslaa reeman laa reeman zia reeman. ⁴¹ Per laa reeman dád nix yu' luxdoo reeman barii reeman lod za' ree guxtis guin guial baslaa Dios guzagdiaj reeman por Jesús. ⁴² Abi' ad rucwëëzt rulüü reeman rniee tèë reeman xtiidx Jesús, gra dxejczy rulüü reeman lën yadooro' Jerusalén nëtëë lidx lidx ree bejn.

6

Bibee gajdx ree bén güün yudar

¹ Lën ree dxej zii chi canuu cayajcxhiey ree bén rililadx Jesús, guzuloj cabe'c ree bén rniee diidx grieg xguialquia ree bén rniee diidx hebreo, rëb reeman guial gra dxejczy chi rië's ni raw ree béngunaa bizëyb, ta'ndoon rtia' ree bén rniee diidx grieg guial loj ree bén rniee diidx hebreo.

² Dxel guidxibtio'p ree apóstoles guin bato'p reeman graczi ree bén rililadx Jesucrist, abi' rëb reeman:

—Ad zagdxet naj guial yacwëëz yalüün xtiidx Dios par yadi'san ni gaw ree bejn. ³ Zeel yanan lëjt compniar raliduladx ree Jesucrist, gol gudiil entr lojdi gajdx ree bén ragbeedi naban zi'c rayal, bén yu' xSprijt Dios luxdoo, bén yu' tèë ree xquiarguiejn, din yazuj reeman güün reeman dxiin guin. ⁴ Guíaad dunujn yasnuu yarejdx yanaaban Dios, yalüü tèën xtiidxaman.

⁵ Graczi reeman cwëjb ni rëb reeman, abi' gulej reeman bén la Esteban, laaman rililadx Jesucrist guidib luxdooan, rniabee tèë xSprijt Dios luxdooan guidiblagaa. Gulej tèë reeman Felip, Prócoro, Nicanor,

Timón, Parmenas nē Nicolás bēn zēed Antioquía, nēman bililadx ni rliadx ree bēn Israel chi gadaman chililadx Jesucrist. ⁶ Dxel binē reeman laa reeman loj ree apóstoles guin, persi gurejdx gunab reeman Dios por laa reeman badxiib tēē yaa reeman guijc reeman.

⁷ Canuu care'ch xtiidx Dios, abi' Jerusalén cayajcxhiey ree bēn rliadx Jesucrist, nē zien ree bixhioz Israel bililadx laaman.

Biniaaz Esteban

⁸ Dád gognē Dios Esteban badēē tēēman gualrniabee persi rünman zien loj milagr delant loj ree bejn. ⁹ Abi' bēlzi ree bēn yadoo ni la Libertados nē ree bēn Cirene con ree bēn Alejandría con ree bēn niz Cilicia nētēē ree bēn zēed niz Asia, guzuloj cadildiidxnē reeman Esteban, ¹⁰ per ad gojct nadxi' reeman xtiidxaman gual cayagnē xSprijt Dios laaman. ¹¹ Dxel gudijx reeman bēlzi ree bejn din guiēb reeman, bacaagdiajg reeman rniee Esteban contr Dios nē contr Moisejs. ¹² Zian been reeman persi bidxe'ch ree bēn luguiedx guin, nē ree bengol nē ree mextr rulüü ley. Dxel gunaaz reeman Esteban, binē reeman laaman loj guxtis. ¹³ Gudiil tēē reeman bēn basquiee ree persi rēb reeman loj ree guxtis guin:

—Ad ruwēēt rnieeguidx xin guie xley Moisejs nē xyadoo Dios. ¹⁴ Dunuj ma bacaagdiajg rēbix gual Jesús xin Nazaret guse'nx dux yadoor' ree, guchaa tēēx costumbr basa'n Moisejs du loj ree.

¹⁵ Abi' guxtis guin ree nē gra ree bēn riga' yagaj, chi baguiaa reeman loj Esteban, baguiaa reeman najn zi'c tijb loj anjl.

7

Ni rēb Esteban loj ree guxtis

¹ Dxel bixhioz mazri zojbloj rniabee graczi ree bixhioz, gunabdiidxaman loj Esteban, rēbaman:

—¿Walin ya rēbil zian?

² Badxi' Esteban laan, rēbaman:

—Dad guxtis, nē lējt compniar, gol bacaagdiajg ni ganin. Dios bēn yu' xanyabaa balüüloj loj dux bēngulal ree Abraham, chi gureman niz Mesopotamia chi gadaman chisob guiedx Harán. ³ Abi' rēb Dios lojman: “Basa'n ladxil nē gra ree lasa'l, wej loj yuj ni gulün lüj.” ⁴ Dxel brii Abraham ladx ree bēn Caldea bisobaman Harán. Chi güt xDadaman, dxel bidnē Dios Abraham loj guidxliuj guie lod nadxu' ree yan. ⁵ Per chi bi't Abraham guie, achetczí guidxliuj badēēd Dios lojman, ni'czi tibda'nan ad badēētaman. Per beenman promeys loj Abraham gual gudēēman guidxliuj guie lojman, dxel chi guiētaman tia' ree xdiaaman laan, majsi chi rēb Dios zian, ad wayut xi'n Abraham. ⁶ Rēb tēē Dios lojman gual xdiaaman chisob zi'c ree benzit nacion ren, lod gugüjn da't reeman laa reeman dxiin gusagzi tēē reeman laa reeman loj tajp gayuu ijz. ⁷ Per rēb tēē Dios lojman: “Gudēdan gra ree bēn gusagzi laa reeman casti, gac xchej yarii reeman yagaj abi' guie güün reeman sirv lon zi'c rayal.” ⁸ Chi guneenē Dios Abraham, baya'n reeman diidx gual rayal chu' gra ree xinguaaw sen. Zeel chi gol Isaac xi'n Abraham, gojc xhujn dxej, dxel badxe'man laax sen. Ziangajc beennē Isaac xi'nman Jacob, ziangajc beennē Jacob guidxiptio'p ree xi'nman, bēn goc ree dux bēngulal ree.

⁹ Bēn goc ree dux bēngulal ree gudēdloj reeman Xiēb bēn naj bijch reeman, abi' bato' reeman laaman loj ree bēn zē Egipto, per ad guro'nladxt

Dios laaman, ¹⁰ gognëman laaman loj ni guzagdiajman badëe tëëman xquiarguiejnman, gognë tëëman laaman persi biajb rey guin laaman zagdxë, abi' beenman laaman gobernador Egipto, bazuj tëëman laaman din nabeeman gra ni rajp rey guin.

¹¹ 'Chi guyu gubijn guidibczi Egipto në niz Canaán, dxel guzagdiaj da't ree dux béngulal ree guial achet ni gaw reeman. ¹² Per chi gogbee Jacob guial yu' trigo Egipto, guxhaal ree xi'nman Bén naj dux béngulal ree, dxel wej reeman Egipto. ¹³ Chi barojp volt wej reeman, rëb Xiëb guial laaman naj bijch reeman, dxel gogbee rey Egipto xhie diaa zëëdaman. ¹⁴ Dxel rëb Xiëb loj ree bijchaman din chigxii reeman xDadaman në gra ree lasa'man din chisob reeman Egipto. Gojc reeman gayojnchiin bejn. ¹⁵ Zianan zeel bisob Jacob Egipto, ni gütaman ni gajc güt ree xi'nman, dux béngulal ree. ¹⁶ Gojc xchej dxel bigné reeman xdxijt ree dux béngulal ree guiedx Siquem, persi biguie'ch reen lën baa guzii Abraham loj ree xi'n Hamor.

¹⁷ 'Chi ma zidyob tiamp gac ni rëb Dios loj Abraham, zien ree Bén Israel ma gojcxhiey Egipto. ¹⁸ Abi' guzuloj gunabee rey ren Egipto, Bén ad beenbeet Xiëb. ¹⁹ Rey zii basagzi Bén du ladx ree, gunabeeman chigsëëb reeman xindo niguiaaw golnejz ree din guiët reex. ²⁰ Abi' tiamp zii gojl Moisejs, tijb xindo bayuladx Dios. Gunaj ree xdadix laax choon bëëw. ²¹ Chi bidxin dxej bigsa'n reeman laax lod bigsëëb reeman laax, xi'n gajc rey guin baca' laax, persi baslaaman laax zi'c xi'nman. ²² Basiid Moisejs gra ni rajc ree Bén Egipto, abi' lasajc ni guneex ni been tëëx.

²³ 'Chi guyu Moisejs tiuu ijz, bidyajb guijcaman bignaj lasa' Bén Israelaman. ²⁴ Abi' chi baguiaaman caguin tijb Bén Egipto tijb Bén Israel, balajman laaman, bagüjtaman Bén Egipto guin. ²⁵ Naladx Moisejs niagbee ree Bén Israel guial por laaman yabëë Dios laa reeman loj ree Bén Egipto, per ad gogbeet reeman. ²⁶ Chi bareguiaa, bidxaagloj Moisejs tio'p ree Bén Israel caga'p reeman, abi' guyënman nabe'cdxëman laa reeman, rëbaman: “¿Chexc zeel rdilidi? Awa Bén Israel naj gropidi.” ²⁷ Abi' Bén caguin Bén zatijb guin bacadxaaman Moisejs, rëbaman: “¿Chu bazuj lüj din nabeel dunujn, din na tëël ni rayal yaguieenan? ²⁸ ¿Wen rënl ya gugüjtil naj zi'c bagüjtil Bén Egipto ni nieey?” ²⁹ Chi biguiejn Moisejs ni rëb Bén guin, baxüünman wejman niz Madián. Ni gureman zi'c benzit, abi' cwa'man béngunaa, zianz guyu tio'p ree xi'ngaanman.

³⁰ 'Chi gudëd tiuu ijz, dxel balüüloj tijb xi anjl Dios loj Moisejs loj xbjal tijb yag ni cayzbxajl lod naj yujbidx, gajxh guia' la Sinaí. ³¹ Dád badxa loj Moisejs guial baguiaaman bajl guin. Abi' chi bibigaman din guguiaaman laan mazri zagdxë, biguiejnman cha' Dios rëbaman lojman: ³² “Naj naj xDios xbéngulal reel, Abraham, Isaac në Jacob.” Dxel guzuloj canij Moisejs guial bidxebaman, ad bayaxtaman nuguiaaman bajl guin. ³³ Dxel rëb Dios lojman: “Gulëë xgurëchil, din nagle' lod za'l. ³⁴ Naj cuguia xhienaag cazagdiaj ree da bejnan Egipto, riguiejnan roon reeman zeel biguia'tan din yabën laa reeman. Yan, guda din gaxhalan lüj Egipto.”

³⁵ 'Abi' majsi ad guyënt ree Bén Israel nuzoob reeman xtiidx Moisejs yaloj, rëb reeman lojman: “¿Chu bazuj lüj din nabeel dunujn na tëël ni yaguieenan?” Per por anjl balüüloj loj bajl guin, badëëd Dios guialrniabee lojman, abi' guxhaalaman laaman din güünman laa reeman yudar yarii reeman Egipto, zi'c rëb anjl balüüloj lojman loj yag caye'c. ³⁶ Moisejs guin naj Bén babëë dux béngulal ree Egipto, been tëëman milagr ree niz

Egipto, në niz ro' nijsdoo ni la Nijs Xnia, në loj yujbidx lod guzu reeman tiuu ijz. ³⁷ Laagajc tëëman rëb loj ree bën Israel: “Loj gajquidi cwe Dios tijb bën gudëëd xtiidxaman loj ree bejn zi'c guleman naj. Gol bazoob xtiidxaman.” ³⁸ Dxel chi guzunë Moisejs dux béngulal ree niz loj yujbidx, laaman naj bën guzeneë xi anjl Dios ruguia' la Sinaí, persi badëëman xtiidx Dios loj reeman, abi' diidx guin ree naj ni basa'n reeman duloj ree yan.

³⁹ Per dux béngulal ree ad bazoobt reeman xtiidx Moisejs. Ad guyënt reeman niniabeeman laa reeman, tib guyuguijczy reeman nayejc reeman Egipto. ⁴⁰ Dxel rëb reeman loj Aarón: “Been dios ree, din ned reeman du loj ree, din ad rayagbeet ree gonczy Moisejs bën babëë dunuj ree Egipto.” ⁴¹ Dxel been reeman tijb go'ndobëz din gaquib xdios reeman. Bagüjt reeman be ree persi badëëd reeman laa reeb zi'c gon loj ni been reeman, been reeman lanij guial babaanë reeman ni been gajc reeman. ⁴² Dxel guro'nladx Dios laa reeman, baslaaman guyën reeman gubijdx con bëëw con bajl yu' ree xanyabaa. Din zian ca loj xtiidx Dios ni bacaa ree bën badëëd xtiidxaman loj ree bejn, lod rëb:

Bën Israel, loj tiuu ijz ni guzudi loj yujbidx,

¿wen bagüjtidi be ree ya din guneedi laa reeb lon zi'c gon?

⁴³ Per mazri guyëndi xdxandi Moloc biao tëëdi lidxan,

në xbajl dxan Refán, dxan been gajquidi din guzuxibidi loj reen.

Zeel gaxhalan lëjt mazri zijt guial Babilonia.

⁴⁴ 'Abi' chi guzu ree dux béngulal ree loj yujbidx, gojp reeman tijb yu been laa reeman sirv zi'c yadoo, lod guyuchaaw ree guiaj ni ca xley Dios. Been reeman yadoo guin zi'c gunabee Dios Moisejs, chi rëbaman lojman guial güünman laan zi'c ma baguiaaman. ⁴⁵ Chi güt Moisejs, baya'nnë ree dux béngulal ree yadoo guin. Chi baya'n Josué xluar Moisejs, dxel bidnë reeman yadoo guin chi gudil reeman guijc guidxliuj con ree bën ren, abi' gognë Dios laa reeman persi been reeman gan baya'nnë reeman guidxliuj guin ree. Zian guzunë reeman yadoo guin xt hidxin dxej guzuloj gunabee rey Davi. ⁴⁶ Guyën Dios rey Davi, abi' laaman guyënman nüjnman tijb yadoo par Dios, bën naj dux Dios ree nayajc ree bën Israel. ⁴⁷ Per rey Salomón naj bën been laan, ⁴⁸ majsi Dios bën yu' xanyabaa ad rbejtaman lën yadoo ni rüjn ree bejn, zi'c rëb bën badëëd xtiidx Dios loj ree bejn diizd gocli, chi rëbaman:

⁴⁹⁻⁵⁰ Xanyabaa naj lod zooban par ganabeen,

guiáad loj guidxliuj naj lod ruzu guia'n.

¿Xhienaag gac yu güüdi par naj?

¿O xhienaag naj lod yaziiladxan?

¿Id naj ben graczi ree ni guie ya?, rëb Dios.

⁵¹ Per lëjt —rëb Esteban —dád nadidi, ad rëntidi guzoobidi xtiidx Dios, ad rën tëëtidi chignia'di, zianczy za'di contr xSprijt Dios, zi'cgajc been ree xbéngulalidi. ⁵² ¿Chu bën badëëd xtiidx Dios loj ree bejn ad beennaat ree xbéngulalidi? Xt bagüjt reeman bën badëëd ree xtiidx Dios bën rëb ree guial guit' tijb bën naya nali. Abi' yan ma bi'taman, bayüdi laaman loj ree bën rniabee, gunabee tëëdi güjtaman. ⁵³ Majsi cwa'di xley Dios loj ree xi anjlaman, per ad rüjntidi zi'c rëb loj ley guin.

Bagüjt reeman Esteban

⁵⁴ Chi biguiejn reeman ni rëb Esteban, xt raw lay reeman tant balen reeman laaman. ⁵⁵ Per guial yu' xSprijt Dios luxdoo Esteban, chi gules

lojman xanyabaa, dxel baguiaaman xbiani Dios baguiaa tēēman Jesús za'man xladbee Dios. ⁵⁶ Dxel rēb Esteban:

—¡Gol baguiaa! Ruguia naxal xanyabaa, ruguia tēēn Bén guxhaal Dios za'man xladbee Dios.

⁵⁷ Per chi biguiejn reeman zian, bata'cw guidiajg reeman, dxel gurixdiaj reeman zignaaz reeman Esteban, ⁵⁸ babēē reeman laaman loj ciuda guin, bicūjt reeman laaman con guiaj, guiaad xab reeman basa'nsii reeman loj xinguiag la Saulo persi canajxan. ⁵⁹ La'tgaj cucaaguiaj reeman Esteban, rēbaman:

—Dad Jesús, baca' da sprijtan.

⁶⁰ Dxel bazuxibaman guridxa'man rejs, rēbaman:

—Dad Jesús, ad güüncwentil dol cayüjn ree bén guin yan.

Naabczi gulox rēbaman zian, laa güt gajcaman.

8

Guzunal Saulo bén rliiladx ree Jesucrist

¹ Baya'n Saulo conform guial bagūjt reeman Esteban. Abi' dxej zii gajc guzuloj rzunal reeman bén Jerusalén ree bén rliiladx ree Jesucrist, dxel bire'ch reeman guidib niz Judea nē niz Samaria, bén najzi ree apóstoles baya'n. ² Guyu bēlzi ree xinza'c, laa reex biquie'ch Esteban, abi' dád biin reex guijcaman. ³ Guiaad Saulo rzunalaman bén rliiladx ree Jesucrist, ruman yu yu din cwēē naguiejnman laa reeman, zi'c xinguiaw zi'c bēngunaa, persi rgu'man laa reeman ladxguuib.

Bacaagdiajg ree bén Samaria xtiidx Dios

⁴ Per bén brii ree Jerusalén, lod zētzi reeman rtie'ch reeman xtiidx Dios. ⁵ Zi'c been Felip, wejman guiedx Samaria, guzuloj caneeman xtiidx Jesucrist loj ree bejn. ⁶ Dád zien ree bejn rdo'p, graczi reeman rucaagdiajg chaaw ni rēb Felip, ruguiaa tēē reeman milagr ree ni rüjnman. ⁷ Zien ree bén nējt tib lajt xcuerp bayüjn Felip, nē ree bén ad rzat zagdxe, bayüjn tēēman bén yu' ree xinxab luxdoo abi' rbixdiaj reex rarii reex. ⁸ Zianan zeel babaa da't ree bén luguiedx zii.

⁹ Per luguiedx zii guyu tijb bén brii laj Simón, diizd gocli rüjnman guialbidxaa persi rusquieeman bén Samaria ree, rüjnman bén lasajc. ¹⁰ Graczi reeman rucaagdiajg chaaw ni rēbaman, diizd mazri ree xinguiag xt mazri ree bengol, abi' rēb reeman:

—Naroob naj xguialrniabee Dios ni rajp bén guie.

¹¹ Bidxga' reeman laaman guial ma gojc xchej cusquieeman laa reeman con guialbidxaa ni rüjnman. ¹² Per chi bililadx reeman ni rēb Felip xcwent xguialrniabee Dios nē xcwent Jesucrist, zi'c ree xinguiaw zi'c ree bēngunaa gurobnijs reeman. ¹³ Xt nē Simón bililadx gurobnijs tēēman, abi' ad riro'nladxtaman Felip radxa tēē lojman graloy ree milagr ruguiaaman rüjn Felip.

¹⁴ Chi gogbee ree apóstoles riga' Jerusalén guial ma bililadx ree bén Samaria xtiidx Dios, dxel guxhaal reeman Bēd con Waj ni. ¹⁵ Chi bidxin reeman, gurejdx gunab reeman Dios por ree bén Samaria bén ma rliiladx ree xtiidx Dios din chu' xSprijt Dios luxdoo reeman, ¹⁶ din ni'qui tijb reeman ad wayut Sprijt guin luxdoo, gurobnijsi reeman por Dad Jesús. ¹⁷ Dxel guxhoob yaa ree Bēd con Waj guijc reeman, abi' guyu xSprijt Dios luxdoo reeman.

¹⁸ Chi baguiaa Simón cayu xSprijt Dios luxdoo ree bén guial caxhoob yaa ree apóstoles guin guiç reeman, dxel guyënman nudëëman milia loj reeman, ¹⁹ rëbaman:

—Në lon gol baneë guialrniabee guin din chi gaxhob yan chutëëz guiç bënëan, në luxdooan chu' xSprijt Dios.

²⁰ Dxel badxi' Bëd xtiidxaman rëbaman:

—Nitol con guidib xmilial, din rüjnl xgab guial zajc siil guialrniabee razaladx Dios. ²¹ Ad rayalt ad zajc tëët güünl zi'c raguieenan, din ni'quid zinaltil xnejz Dios. ²² Bayüjn xgab por ni mal beenl, gurejdx gunab tëë Dios, rupent güünman lüj perdon por ree xixgabmalil, ²³ din ragbeen ganax guialralen yu' luxdool, abi' dol guin naj ni rniabee lüj.

²⁴ Dxel badxi' Simón xtiidxaman, rëbaman:

—Gol gurejdx gunab Dios por naj, chitëë gaza'can ni'qui tijb ni ma nadi.

²⁵ Chi gulox gunee ree apóstoles guin xtiidx Dios loj ree bén guin, dxel badxin reeman Jerusalén, abi' graczi ree guiedx riga' niz Samaria lod gudëd reeman gutie'ch reeman xtiidxza'c Jesucrist.

Felip con bén Etiopía

²⁶ Chi ma gudëd gojç zian, gunee tijb xi anjl Dios Felip rëbaman:

—Wej niz sur nejz ni zë Jerusalén xt lod la Gaza, niz lod naj ganax yujbidx.

²⁷ Dxel brii Felip zëman. Runejz guin banaazaman tijb bén Etiopía, na-jman bén zojb loj guial laaman rgu'chaaw xmilia Candace, bén naj reina Etiopía. Wejman Jerusalén bignajchi'man Dios, ²⁸ abi' ma bayunejzaman zia ladxaman, zojb lën xcarrejt zagdxeman, roolaman loj gui'ch ni bacaa Isaías, bén badëëd xtiidx Dios loj ree bejn. ²⁹ Dxel rëb xSprijt Dios loj Felip:

—Bibig gajxh cwë' carrejt guin.

³⁰ Chi bibigaman, biguiejnman cayool bén guin loj gui'ch bacaa Isaías. Dxel gunabdiidxaman lojman rëbaman:

—Dad, çrignia'l ni cayoolil ya?

³¹ Badxi' bén guinan rëbaman:

—çXoza chignia'n'an? Awa achut gusignia' naj.

Dxel rëbaman loj Felip din chë'paman loj carrejt guin, cweman cwë'man.

³² Loj xtiidx Dios lod cayool bén guin rëban:

Zi'c rinë reeman tijb xiil,

binë reeman laaman lod gugüjt reeman laaman.

Abi' achet rëbaman,

zi'c tijb xiil ma za' loj ree bén gugaj guidxladib.

³³ Chi beennë reeman laaman zi'ctzi rën reeman, achut been guialguxtis por laaman.

Yan achut guza't xdiaaman,

din ma bisüd reeman laaman loj guidxliuj.

³⁴ Rëb bén guin loj Felip:

—Guna sii, çchu xcwent rniee bén bacaa diidx guie ree? çXcwent gajcaman ya o xcwent ben renan?

³⁵ Dxel guzuloj Felip cusignia'man laaman xtiidx Dios ni cayoolaman, zian bean xtiidxza'c Jesucrist lojman. ³⁶ Abi' chi gudëd reeman lod yu' nijs, dxel rëb bén guin loj Felip:

—Guie yu' nijs. çNid zajc garobnijsan guie ya?

³⁷ Zeel rëb Felip lojman:

—Bal rlliladxil guidib luxdool, zajcan.

Badxi' bën guinan rëbaman:

—Rlliladxan guial Jesucrist naj Xi'n Dios.

³⁸ Dxel gunabeeman guzudxe xcarrejtaman. Abi' baguiajt grop reeman, dxel guyu reeman lojnijs guin persi baroobnijs Felip laaman. ³⁹ Chi barii reeman lojnijs guin, loj hor zii gajc gunidloj Felip binë xSprijt Dios laaman, abi' ad baguiaatri bën guin laaman, per dád rabaaman zinal xnejzaman. ⁴⁰ Chi gogbee Felip, ma za'man xt guiedx Azoto, dxel zëman guiedx guiedx zigtie'chaman xtiidxa'c Jesucrist xt bidxinman Cesarea.

9

Bililadx Saulo Dad Jesucrist

(Hch. 22:6-16; 26:12-18)

¹ Guiáad Saulo ad rucwëët rdxe'chaman bën rlliladx ree Jesucrist, rëbaman gugüjtaman laa reeman. Zeel wejman bigneenëman bixhioz mazri zobjloj rniabee graczi ree bixhioz, ² din gac tijb gui'ch din gac cheman lën ree yadoo Damasco chigdiilaman bën rlliladx ree Jesucrist, zi'c ree xinguaaaw zi'c ree béngunaa, din chignëman laa reeman ladxguiib Jerusalén. ³ Per chi ma cadxinman gajxh guiedx Damasco, dxejlczi brii tijb guij xanyabaa balaan bacha' lod zëman. ⁴ Abi' bireeyujman, chi naga'man luyuj guin bigueijnman cha' bën rëb:

—Saulo, Saulo, ¿chexc zeel rzunalil naj?

⁵ Abi' gunabdiidxaman rëbaman:

—¿Chu lüj, Dad?

Badxi'man laan rëbaman:

—Naj naj Jesús bën rzunalil. Per ganin lüj, lüj gajc rguuil xguialnaal zi'c rüjn tijb go'n rudxeguaia' loj yag ni rulaagnë reeman laab.

⁶ Rnij Saulo guial tant bidxebaman, abi' rëbaman:

—Dad, ¿xhie rënl günan?

Dxel rëb Dad Jesucrist lojman:

—Bixche, wej guiedx Damasco, ni na reeman ni rayal güünl.

⁷ Abi' ree bën në Saulo dád bidxeb reeman guial bigueijn reeman cha' bejn, per achutczi baguiaa reeman. ⁸ Chi bixcheman luyuj guin, baxhal lojman, ad rajctri ruguiaaman. Dxel gunaaz reeman yaaman bignë reeman laaman Damasco. ⁹ Ni guzuman choon dxej, ad rajct ruguiaaman, achetczi rawaman ache tëëtctzi rë'man.

¹⁰ Damasco gure tijb bën rlliladx Dad Jesucrist, brii lajman Ananías. Balüüloj Jesucrist lojman, rëbaman:

—¡Ananías!

Badxi'man laan rëbaman:

—Laa naj guie Dad.

¹¹ Dxel rëb Jesucrist lojman:

—Bisu, wej call ni la nali. Chi guidxinl lidx Judas, gunabdiidx por tijb xin zëéd Tarso, lax Saulo. Din laax cabejdx canab naj, ¹² abi' zi'c rulüü cane'xhchaalix, baguiaax guyu tijb bën la Ananías guxhoob yaaman guijquix persi baguiaax stijb.

¹³ Chi biguien Ananías zian, dxel rëbaman:

—Dad, zien da't ree bejn ruza't xin zii, në ree ni mal rüjnnëx bën rliadx ree lüj Jerusalén. ¹⁴ Yan zëëdix guie con xgualrniabee ree bixhioz rniabee ree bixhioz, din guiniaazix gra ree bën rliadx lüj.

¹⁵ Dxel rëb Jesucrist lojman:

—Wej, din naj gule laax din chiguiex da diidxan loj ree bën ad najt bën Israel, në loj ree rey, con nëgajc loj ree bën Israel. ¹⁶ Guiën lojx guial sagdiaj da'tix guial najx da bejnan.

¹⁷ Dxel zë Ananías lënü lod za' Saulo. Chi guyuman, guxhoob yaaman guijcaman, rëbaman:

—Bijch Saulo, Dad Jesús bën balüüloj lojl runejz lod zëëdil, laaman guxhaal naj din yaguaal, chu' tää xSprijt Dios luxdool.

¹⁸ Loj hor gajc zi'c rülüü yu' xhie biquied guiaalojman abi' baguiaaman stijb. Dxel guzuliman gurobnijsaman, ¹⁹ gudaw tääman persi bayuman gojl. Dxel guzujman Damasco tio'p choon dxej con ree bën rliadx Jesucrist.

Gunee Saulo xtiidx Dios Damasco

²⁰ Dxel guzuloj gunee Saulo xtiidx Dios lën ree yadoo, rëbaman guial Jesucrist naj Xi'n Dios. ²¹ Graczi ree bën biguien ni rëbaman badxa loj reeman abi' rëb reeman:

—¿Nid bën guien rzunal bën rliadx ree Jesucrist Jerusalén ya? ¿Nid laagajcaman zëëd guie ya, din guiniaazaman bën rliadx ree Jesucrist chignë tääman laa reeman loj ree bixhioz rniabee ree bixhioz?

²² Per Saulo guixie guixie mazri cariiman guialrdxeb rnieeman xtiidx Dios, rülüüman guial Jesús naj Cristo, din yabëëman bejn ree loj dol. Xt ragdxa ree bën Israel zojb ree Damasco chi rucaagdiajg reeman ni rëbaman.

Baxüün Saulo guiedx Damasco

²³ Ad xchejt gojc, baya'n ree bën Israel diidx din nugüjt reeman Saulo, ²⁴ per laa gogbee gajcaman ni rën reeman güün reeman. Dxej guiaal rbëz reeman laaman ro' ree port ni rarii ro' ciuda guin din nugüjt reeman laaman. ²⁵ Per ree bën rliadx Jesucrist, guxhin badxe' reeman laaman lën dxüm narooob, abi' gulet reeman laaman niz xijch ze' nusiaaw ciuda guin, zian baxüünman Damasco.

Badxin Saulo Jerusalén

²⁶ Chi badxin Saulo Jerusalén, guyënman nuchajgaman bën rliadx ree Jesucrist, per graczi reeman bidxeb laaman guial ad rliadxt reeman nëman ma rliadx Jesucrist. ²⁷ Dxel binë Bernabé laaman loj ree apóstoles guin, bagojnman guial baguiaa Saulo dux Dad ree Jesucrist, guneeën tääman laaman chi zëman Damasco, bagojn tääman guial Damasco gunee Saulo xtiidx Jesucrist sin guialrdxeb. ²⁸ Zian baya'n Saulo Jerusalén abi' nayuman laa reeman. ²⁹ Ad rdxebtaman ruza'taman Dad Jesús, abi' xt gudijldiidxnëman bën Israel rniee ree diidx grieg, per guyën reeman nugüjt reeman laaman. ³⁰ Chi gogbee ree bën rliadx Jesucrist zian, binë reeman laaman guiedx Cesarea. Yagaj baxhaal reeman laaman guiedx Tarso.

³¹ Dxel babedxe luxdoo ree bën rliadx Jesucrist, bën zojb ree niz Judea në niz Galilea nëtëë niz Samaria, chigagaj beenbee reeman mazri xhienaag naj xnejz Dios, bazoob tää reeman xtiidxaman, abi' cayagnë xSprijt Dios cayajcxhieje reeman.

Bayajc Eneas

³² Chi biza Béd bitixlojman Bén riladx ree Jesucrist, dxel wej gajcaman bitixlojman Bén riladx ree Jesucrist guiedx Lida. ³³ Ni bidxaaglojman tijb xinguaaw la Eneas. Ma gojc xhujn ijz naga'x, ragxuux, ad rajct rzax. ³⁴ Abi' rëb Béd lojx:

—Eneas, ma bayüjn Jesucrist lüj. Bixche, bales ni go'til loj.

Loj hor zii gajc bixchex. ³⁵ Chi baguiaa gra ree Bén zojb guiedx Lida në ree Bén zojb niz Sarón guial ma bayajc Eneas, dxel në reeman bililadx Jesucrist.

Baban Dorcas

³⁶ Loj tiamp zii guyu tijb béngunaa riladx Jesucrist luguiedx Jope, laman Tabita, diidx grieg laman Dorcas. Laaman been ni za'c ree, been tëëman yudar Bénprob ree. ³⁷ Lën ree dxex zii gogxuu Dorcas abi' güjtaman. Chi gulox bagajz reeman laaman, dxel bitixh reeman laaman lënu ladya. ³⁸ Abi' gajxh guiedx Jope raya'n guiedx Lida lod za' Béd. Chi gogbee ree Bén riladx Jesucrist guial za'man ni, guxhaal reeman tio'p ree xinguaaw bisajc reex Béd liaadx, rëb reex:

—Been wen yo' ree Jope yan gajczi.

³⁹ Laa zinë gajcaman laa reex. Chi bidxinman, binë reeman laaman lënu lod naga' xcuerp Dorcas. Ni riga' zien ree béngunaa bizëjb roon reeman, abi' bibig reeman loj Béd culüü reeman gra lajd ni been Dorcas chi sta nabanman. ⁴⁰ Dxel gunabee Béd barii gra reeman, abi' bazuxibaman gurejdx gunabaman Dios. Dxel baguiaaman bengüt guin, rëbaman:

—jTabita, bixche!

Laa guxhal gajc lojman. Chi baguiaaman Béd, gureliman, ⁴¹ dxel gunaaz Béd yaaman persi guzuliman. Abi' gurejdxaman Bén riladx ree Jesucrist con ree Bén bizëjb guin, persi baguiaa reeman guial ma baban Dorcas. ⁴² Guidibczi guiedx Jope gogbee reeman ni goc, abi' zien da't reeman bililadx Jesucrist por zian. ⁴³ Guiáad Béd baya'nman mazri dxex luguiedx guin, lidx Simón Bén rüjnchaaw guid.

10*Wej Béd lidx Cornel*

¹ Luguiedx Cesarea gurej tijb Bén brie laj Cornel. Laaman goc suldad gunabee tibcwaa ree suldad brie laj Italiano. ² Gojcaman benza'c, laaman në gra ree Bén zojb lidxaman guyën reeman Dios, abi' dád beenman yudar Bén Israel ree, Bén naj ree Bénprob, në zianczi rbejdx rniabaman Dios. ³ Tijb dxex cost raca choon wadxe, guzajcaman zi'c rulüü cane'xhchaalaman. Zagdxeczi baguiaaman guyu tijb xi anjl Dios lënu lod za'man, abi' rëb anjl guin lojman:

—jCornel!

⁴ Baguiaaman loj anjl guin, abi' dád bidxebaman, rëbaman:

—¿Xhienin, Dad?

Abi' rëb anjl guin:

—Ma biguiejn Dios xtiidxil ma baguiaa tëëman xhienaag rüjnl yudar Bénprob ree. ⁵ Guxhaal ree Bén che luguiedx Jope din chica' reeman Simón, Bén la gajc Béd. ⁶ Zojbaman lidx tijb Bén la gajc Simón, Bén rüjnchaaw guid, Bén zojb gajxh ro' ni nijsdoo. Béd guin na ni rayal güünl.

⁷ Chi zia anjl guneé Cornel, gurejdxaman tio'p ree xmojsaman, zatijb sultad rajpaman confians rililadx tēēman Dios. ⁸ Gulox beman diidx loj reeman ni guzacaman, dxel guxhaalaman laa reeman Jope.

⁹ Chi bareguiaal, la'tgaj cadxin reeman gajxh Jope, cost garol dxej wē'p Bēd guijc yu lod zobjaman din cwedx guiniabaman Dios. ¹⁰ Dád gulaanman, guyēnman niajwaman, per la'tgaj cayūjn reeman ni gawaman guzajcaman zi'c rulüü cane'xhchaalaman. ¹¹ Baguiaaman bixal xanyabaa abi' caguiajt zi'c tijb lajd narooob xt lod za'man, naxii guidap xquinan. ¹² Loj lajd guin yu' gra loj ree be yu' tajp guia', nē ree bēēl, nētēē ree be rzuj. ¹³ Dxel biguiejnman cha' bēn rēb:

—Bēd, bisu, bagūjt be gawil.

¹⁴ Per badxi' Bēd laan rēbaman:

—Yajqui, Dad. Ad wayawtczan nidxuudx ni ad rayalt gaw bejn.

¹⁵ Abi' rēb cha' bēn guin zatijb:

—Ni ma basia Dios ad rnieelan nidxuudx.

¹⁶ Choon volt gojc zian, dxel bayē'p lajd guin xanyabaa stijb. ¹⁷ La'tgaj cayūjn Bēd xgab xhie rēn guiēb ni baguiaaman, loj hor zii gajc bidxin ree bēn guxhaal Cornel rulidx Simón, guial ma gunabdiidx reeman banguin naj lidxaman. ¹⁸ Chi bidxin reeman, gunabdiidx reeman bal ni zobj Simón bēn la gajc Bēd.

¹⁹ Guiáad Bēd sta cayūjnman xgab ni baguiaaman, chi rēb xSprijt Dios lojman:

—Laa choon ree xinguaaaw raguuil lūj. ²⁰ Bisu, biguiajt binē reex, ad chu' luxdool tio'p, din naj guxhal laa reex.

²¹ Dxel baguiajt Bēd lod za' ree bēn guxhaal Cornel, abi' rēbaman loj reeman:

—Naj naj bēn raguuilidi, ¿chexquiza zeel raguuilidi naj?

²² Dxel badxi' reeman laan rēb reeman:

—Guxhaal bēn la Cornel dunujn, bēn rniabee tibcwaa ree sultad, najman benza'c, rdxebaman Dios, abi' graczi ree bēn Israel rēn laaman. Tijb xi anjl Dios rēb lojman, guial rayal guixhiaalaman dunujn yudca'n lūj din yo' ree lidxaman, din gucaagdiajgaman ni rayal guiēbil.

²³ Dxel badxe' Bēd laa reeman lēnū, ni gudēd reeman guiaal. Chi bareguiaal, binēman laa reeman. Nē bēlzi ree bēn zobj Jope bēn rililadx ree Jesucrist binē laaman.

²⁴ Chi bareguiaal bidxin reeman Cesarea lod zobj Cornel. Abi' bato'p Cornel gra ree lasa'man nē ree xmiwaman, din cwēz reeman guidxin reeman. ²⁵ Chi bidxin Bēd lidx Cornel, laa brii gajc Cornel bigchaaglojman laaman, dxel bazuxibaman loj Bēd persi gojpaman laaman respejt.

²⁶ Per bazuli Bēd laaman, rēbaman:

—Guzuli, din lasa' bejn gajcan lūj.

²⁷ La'tgaj cadxin reeman ruyu guin cayū reeman diidx. Abi' chi guyu reeman, baguiaa Bēd zien da't ree bejn riga' ni. ²⁸ Dxel rēb Bēd loj reeman:

—Ma qui ragbeedi xhienaag naj xley ree bēn Israel, guial ad zajct go'ch reeman loj ree bēn ad najt bēn Israel o chu' reeman lidx reeman. Per ma balüü Dios naj guial achutczí rayal ganen bendxuudx, bēn nabixhladx. ²⁹ Zeel chi bidca' reeman naj, laa bial gajcan achet guijc badxiban. Yan rēnan gagbeen, ¿chexquiza zeel gurejdxidi naj?

³⁰ Badxi' Cornelan rēbaman:

—Ma gojc tajp dxej cost hor guie gajc, chi zoob lidxan, raca choon wadxé, cabedxé canaabán Dios, loj hor zii balüüloj tijb bejn lon najcwanan lajd nayni. ³¹ Abi' naman lon: “Cornel, ma biguiejn Dios xtiidxil, yu'guijc tēēman xhienaag rüjn yudar bēnprob ree. ³² Zeel guxhaal ree xin che luguiedx la Jope din chica' reex Simón, bēn la gajc Bēd. Zojbaman lidx tijb bēn la gajc Simón, bēn rüjnchaaw guid, bēn zojb gajxh ro'nijsdoo. Bēd guin na ni rayal güünl.” ³³ Zianan zeel laa guxhal gajcan xin bidgadiil ree lüj. Zagdxé beenl bi'til. Abi' yan dugraczan nadxu' delant loj Dios yu' xanyabaa, din yacaagdiajgan gra ni gunabee Dios lüj nal du lojn.

Ni gunee Bēd lidx Cornel

³⁴ Dxel guzuloj canee Bēd, rēbaman:

—Ma ragbeen yan guial tiblojzi ruguiaa Dios bejn. ³⁵ Din Dios, chutēēz bēnguidxliuj ridxga' laaman rüjn tēēman zi'c rayal, nēgajc Dios ridxga' laaman. ³⁶ Dios ma gunee bēn Israel ree, ma bagojnman guial por Jesucrist rabeledxe luxdoo bejn, bēn naj Dad par gra ree bēnguidxliuj. ³⁷ Lējt ragbee xhienaag baza't reeman Jesús diizd niz Galilea xt guidib niz Judea, chi gulox bagojn Waj bejn ree xcwent guialrirobnijs. ³⁸ Ragbee tēēdi guial ma badēē Dios xSprijtaman con xguialrniabeeman loj Jesús bēn Nazaret, abi' bizaman biguieenman ni zagdxé, bayünman gra ree bēn cazagdiaj por xindxab. Gojc beenman zian guial za'nē Dios laaman. ³⁹ Abi' dunujn baguiaa gra ni been Jesús guidib niz Judea, nē niz Jerusalén. Dxelri bagüjt reeman laaman, bacaa reeman laaman loj crüjz. ⁴⁰ Per Dios basban laaman ni bayon dxej, abi' cwējb Dios bidgalüülojman du lojn. ⁴¹ Ad balüülojtaman loj gra ree bejn, tijbzi du lojn nayajcan bēn gule Dios diizd yaloj din yaguaan graczi ni beenman. Abi' dunujn badaawnē' laaman badü'nē' tēēn laaman chi babanman stijb. ⁴² Dxelri guxhaal Jesús dunujn din yatie'chan xtiidxaman loj ree bejn, guial Dios ma gulej laaman din güünman guialguxtis chi guidxin dxej yadēēd gra ree bejn cwent loj Dios, zi'c ree bēn naban zi'c ree bēn ma güjt. ⁴³ Nētēē diizd gocli graczi ree bēn badēēd xtiidx Dios loj ree bejn, gunee reeman xcwent Jesús, rēb reeman guial graczi ree bēn chililadx laaman, gac xtol reeman perdon.

Guyu xSprijt Dios luxdoo ree bēn ad najt bēn Israel

⁴⁴ Sta canee Bēd, chi guyu xSprijt Dios luxdoo gra ree bēn cucaagdiajg ni cayēbaman. ⁴⁵ Dxel bēn Israel rililadx ree Jesucrist, bēn binē ree Bēd, dád badxa loj reeman guial nē ree bēn ad najt ree bēn Israel guyu xSprijt Dios luxdoo, ⁴⁶ guial rigujn reeman ma rniee ree bēn guin galoj ree diidx, abi' ruza't reeman Dios zagdxé. ⁴⁷ Dxel rēb Bēd loj reeman:

—¿Chu zaje gudxoon tiobnijs ree bēn guie, bal ma yu' xSprijt Dios luxdoo reeman zi'cgajc dunuj ree?

⁴⁸ Abi' gunabeeman tiobnijs reeman por Jesucrist. Dxelri guzajc reeman liaadx loj Bēd din sunēman laa reeman za tio'p choon dxej mazri.

11

Guyu xSprijt Dios luxdoo ree bēn ad najt bēn Israel

¹ Bēn naj ree xi apóstoles Jesús con ree bēn Judea, bēn rililadx ree laaman, gogbee reeman guial nē ree bēn ad najt bēn Israel bililadx xtiidx Dios. ² Abi' chi badxin Bēd Jerusalén, bēn Israel ma rililadx ree Jesucrist, bēn sta zinal ree ley, gudilē reeman Bēd. ³ Rēb reeman lojman:

—¿Chexc zeel bichu'l lidx ree bén ad najt bén Israel abi' gudawnël laa reeman?

⁴ Dxel guzuloj cayü Béd diidx diizd guia'xchej xhienaag gojc zeel wejman lidx ree bén guin abi' rëbaman loj reeman:

⁵ —Chi za'n luguiedx Jope, la'tgaj cabedx canaaban Dios, guza'can zi'c rulüü cane'xhchalan. Baguian zi'c tijb lajd narooob naxii guidap xquinan caguiajtan diizd xanyabaa xt lod za'n. ⁶ Chi baguian zagdx xhie yu' loj lajd guin, baguian bedoxh ree në ree be yu' tajp guia' në ree bëel con ree be rzuj. ⁷ Dxel biguiejnan cha' bejn, naman: “Béd, guzuli, bagüjt be gawil.” ⁸ Per badxi'nan rën: “Yajqui, Dad, din ad goctzi wayawan nidxuudx, ni ad rayalt gaw bejn.” ⁹ Abi' guneeman diizd xanyabaa stijb, naman: “Ni ma basia Dios, ad rnieelan nidxuudx.” ¹⁰ Choon volt gojc zian, dxel bayë'p gra ni guin xanyabaa. ¹¹ Loj hor zii gajc bi't choon ree xinguaaaw lod guren, zëed reex diizd Cesarea, cayguil reex naj. ¹² Abi' na xSprijt Dios lon guial chinë'n laa reex, ad chu' luxdon tio'p. Në guixo'p ree bén guie bén naj dux compniar ree binë'n. Abi' dugraczan badxu' lidx bén guin. ¹³ Dxel beman diidx du lojn xhienaag balüüloj tijb xi anjl Dios lojman lidxaman, rëb anjl guin lojman: “Guxhaal ree bén che luguiedx Jope din chica' reeman Simón, bén la gajc Béd, ¹⁴ laaman na xhienaag gac ree xtolil perdon, con gra ree bén zojb lidxil.” ¹⁵ Chi guzuloj canenë'n laa reeman, guyu xSprijt Dios luxdoo reeman zi'cgajc guyuman du luxdoo ree yaloj. ¹⁶ Dxel basaaladxan xtiidx Dad Jesucrist chi naman: “Walican baroobnijs Waj con nijs, per lëjt chu' xSprijt Dios luxdoodi.” ¹⁷ Abi' yan bal ma guxhaal Dios xSprijtaman par laa reeman zi'cgajc guxhaalaman laaman du loj ree chi baliladx ree Dad Jesucrist, ¿chu najn din gudxonan ni rüjn Dios?

¹⁸ Chi biguiejn ree bén guin ni rëb Béd, dxel achetri rëb reeman lojman abi' baza't reeman Dios zagdx, rëb reeman:

—¡Ma rayagbee ree yan guial në ree bén ad najt bén Israel ma balüü Dios guial rayal yayüjn xgab por xtol reeman yadxi' tëë loj reeman lojman din gap reeman guialnaban tiblyaa delant lojman!

Bililadx ree bén Antioquía Jesucrist

¹⁹ Chi mal bagüjt ree bejn Esteban, dxel guzuloj rzunal reeman bén rliladx ree Jesucrist persi bire'ch gra ree bén rliladx guin niz Fenicia, niz Chipre në Antioquía. Abi' gutie'ch reeman xtiidxza'c Jesucrist, per ganaxzi loj ree bén Israel. ²⁰ Per loj reeman no'ch bëlzi ree bén Chipre në ree bén Cirene. Laa reeman we luguiedx Antioquía abi' gutie'ch reeman xtiidx Dad Jesucrist loj ree bén ad najt bén Israel. ²¹ Gognë Dios laa reeman, dád zien ree bejn bililadx ni rëb reeman abi' bililadx reeman Jesucrist.

²² Chi gogbee ree bén Jerusalén rliladx Jesucrist ni goc, guxhaal reeman Bernabé xt guiedx Antioquía. ²³ Chi bidxinman ni, dád babaaman chi baguaaaman xhienaag cayagnë Dios bén guin ree. Dxel guneenëman gra reeman din con guidib luxdoo reeman gusnuu chinal reeman xtiidx Jesucrist. ²⁴ Benza'c gojc Bernabé, dád gognë xSprijt Dios laaman abi' bililadxaman Jesucrist con guidib luxdoo. Zeel dád zien ree bejn bililadx Jesucrist.

²⁵ Dxelri wej Bernabé guiedx Tarso bigdiilaman Saulo. ²⁶ Chi badxejla-man laaman, dxel binëman laaman xt Antioquía. Ni guzunë reeman bén

rliladx ree Jesucrist tibijz, dád zien ree bejn balüü reeman. Abi' luguiedx Antioquía naj lod gulëelaj reeman bën rliladx ree Jesucrist, cristian.

²⁷ Lën ree dxej zii bëlzi ree bën badëë xtiidx Dios loj ree bejn, guza Jerusalén wej reeman Antioquía. ²⁸ Tijb reeman la Agabo, laaman guzuli loj ree bejn abi' por xSprijt Dios bagojnman guial chu' gubijn guidibczi guidxliuj. Laan gojc loj tiamp gunabee rey Claudio. ²⁹ Abi' ree bën rliladx Jesucrist luguiedx Antioquía, baya'n reeman diidx din guido'p reeman zi'ctzi ni galguzuj gudëëd tijb gaj reeman, din gagnë lasa' reeman, bën rliladx ree Jesucrist, bën zojb ree niz Judea. ³⁰ Abi' zian been reeman. Dxel guxhaalnë reeman laan Saulo con Bernabé din gudëëd reeman laan loj ree bën rniabee ree bën rliladx Jesucrist niz Judea.

12

Guyu Bëd ladxguuib

¹ Lën ree dxej zii guzuloj rey Herodes cusagziman bëlzi ree bën rliladx Jesucrist. ² Abi' gunabeeman bagüjt reeman Jacob bijch Waj, con espad. ³ Chi baguiaaman bayuladx ree bën Israel ni beenman, dxel gunabeeman gunaaz reeman Bëd. Ni ne goc lën ree dxej lanij pascw chi raw reeman guiadxtil ad yu't levadur. ⁴ Chi gunaaz reeman Bëd, badxe' reeman laaman ladxguuib abi' gunabee rey Herodes tajp cwaa ree suldad din guinia reeman ro' ladxguuib guin, tib cwaa gaj reeman naj tajp suldad. Din beenman xgab nuzujman Bëd loj ree bën guiedx guin chi nidëd pascw. ⁵ Zian guyu Bëd ladxguuib, gojp da't reeman laaman. Per gra ree bën rliladx Jesucrist ad rucwëëzt rbejdx rniab reeman Dios por laaman.

Babëë Dios Bëd ladxguuib

⁶ Guxhin zii gajc chi yareguiaal cwëë Herodes Bëd loj ree bën guiedx guin, naga'yëjs Bëd galay tio'p ree suldad, naxiiman con tio'p ree caden, guiáad los demazri ree suldad guin cayajp ro' ladxguuib guin. ⁷ Dxejczy bidxin tijb xi anjl Dios abi' basni tijb guij lën ladxguuib guin, dxel baqui' anjl guin cwë'lën Bëd persi bacwëënman laaman, rëbaman lojman:

—jCari bixche!

Loj hor zii gajc biajb ree caden naxii yaa Bëd, ⁸abi' rëb anjl guin lojman:

—Guxhiidxi'ch lënl balëë tëë xgurëchil.

Chi ma been Bëd zian dxel rëb anjl guin:

—jGojt xcajpil, tanal naj!

⁹ Laa barii gajc Bëd nalaman anjl guin, per ad ragbeetaman bal diidxli naj ni cayün anjl guin, gunaladxaman cane'xhchaalzaman. ¹⁰ Abi' gudëd reeman loj tibcwaa ree suldad guin, dxel gudëd reeman loj stibcwaa reeman. Chi bidxin reeman ro' portguuib ni rarii runejz guin, dxel xtijbzán bixal abi' barii reeman. Abi' chi bidxin reeman tijb xquin, yagaj basa'n anjl guin Bëd. ¹¹ Dxel gogbee Bëd guial ni diidxliqui naj ni cazajcaman, abi' rëbaman:

—Yanri ma ragbeen guial guxhaal xi anjl Dios persi babëëman naj loj Herodes, con loj gra ni nünjë ree bën Israel naj.

¹² Chi bayagbee Bëd ni guzacaman, dxel baguijman lidx Li, xniaa Waj, bën la gajc Marcw, lod riga' zien ree bejn cabejdx canab reeman Dios.

¹³ Chi gulajw Bëd ro' port, dxel brii tijb biin la Rode ziquiaam chunin.

¹⁴ Per chi bayünbeem cha' Bëd, dád babaam, dxel luar nixhialim ro' port

guin, baxüünm bicojnm guial za' Béd ro' port guin. ¹⁵ Abi' rëb reeman lojm:

—jRajc guijsquil!

Per za'dxi'chczim guial waliqui ni rëbim. Dxel rëb reeman lojm:

—Ad laataman, wed xi anjlaman.

¹⁶ Per Béd cabajwzi cabajwaman ro' port guin. Dxel chi guxhal reeman dád bidxeb reeman baguiaa reeman laaman. ¹⁷ Abi' been Béd sen loj reeman din yacwëez ro' reeman, dxel beman diidx xhienaag babëë Dios laaman ladxguuib. Abi' rëbaman loj reeman:

—Gol be ni guie loj Jacob në loj gra ree bën rlliladx Jesucrist.

Dxelri briiman yagaj zëman lood ren.

¹⁸ Chi bareguiaa, ad radxejlt xhie güün ree suldad guin guial ad ragbeet reeman xhienaag barri Béd ladxguuib guin. ¹⁹ Dxel gunabee Herodes chigdiil reeman Béd, per ad badxejlt reeman laaman. Abi' chi gulox gunabdiidx Herodes loj ree suldad guin xhienaag gojc, gunabeeman gugüjt reeman laa reeman. Dxel brii Herodes Judea abi' bisobaman lugüedx Cesarea.

Güjt rey Herodes

²⁰ Balen Herodes bën Tiro në ree bën Sidón, per baya'n ree bën guin diidx din chigdeenë reeman laaman. Chi been reeman gan guneenë reeman bën brii laj Blasto zagdx, tijb bën naj xbejn rey Herodes, dxel gunee Blasto por laa reeman loj rey guin din lox til reeman, din guidibczi lod rniabee rey guin zëed ni raw reeman. ²¹ Bazuj Herodes xhie dxej guinieenëman laa reeman abi' dxej zii gojt xab zagdxeman, gurej loj xyagxhilaman lod rniabeeman, zianz guzuloj guneenëman laa reeman. ²² Dxel guzuloj gurixdiaj ree bën guin, rëb reeman:

—jAd bejntan canee, tijb diosan!

²³ Loj hor zii gajc badëë tijb xi anjl Dios tijb guialguijdx loj Herodes. Gudaw bizog laaman abi' güjtaman guial bayuladxaman baza't ree bejn laaman zagdx luar nuza't reeman Dios zagdx.

²⁴ Per xtiidx Dios care'chzi care'chan gra ladczi abi' gra ladczi cayajcxhie ree bën rlliladx laaman.

²⁵ Chi ma badëed ree Bernabé con Saulo ni guxhaal ree bën Antioquía, dxel baza reeman Jerusalén, binë reeman Waj, bën la gajc Marcw.

13

Guzuloj Bernabé con Saulo bigtie'ch reeman xtiidx Dios

¹ Loj ree bën rlliladx Jesucrist, bën zojb ree Antioquía, no'ch ree bën rudëed xtiidx Dios loj ree bejn në ree bën rulüü xtiidxaman. La reeman Bernabé, Simón bën rniee reeman Benya's, Lucio bën Cirene, Saulo con Manaén bën guni'snë Herodes tijbzi, bën gunabee Galilea. ² Tijb dxej chi naba'n reeman, la'tgaj cabejdx canab reeman cuza't tëë reeman Dios zagdx, rëb xSprijt Dios loj reeman:

—Gol bacaabee Bernabé në Saulo din güün reeman dxiin rënan güün reeman.

³ Chi gulox guba'n reeman gurejdx tëë reeman Dios, dxel guxhoob yaa reeman guiyc Bernabé con Saulo din gagnë Dios laa reeman abi' bazaadiidxnë reeman laa reeman.

Bernabé con Saulo wej reeman Chipre

⁴ XSprijt Dios naj bén guxhaal Bernabé con Saulo, zë reeman Seleucia, ni guyu reeman loj barcw, zë reeman yuj la Chipre, ni riga' loj nijs-doo. ⁵ Chi bidxin reeman niz Chipre, dxel luguedx Salamina lojuzuloj gutie'ch reeman xtiidx Dios lën ree xyadoo ree bén Israel. Nê Waj binë reeman din güünman laa reeman yudar. ⁶ Chi biza reeman guidib niz Chipre, dxel bidxin reeman Pafos. Ni bidxaagloj reeman tijb bén Israel laman Barjesús, rajcaman guialbidxaa, rusquieeman bejn ree, rëbaman guial laaman naj bén rudëed xtiidx Dios loj ree bejn. ⁷ Barjesús guin rnieenëman Sergio Paulo zagdxe, bén naj gobernador Chipre, rignia' da'taman. Gurejdx gobernador guin Bernabé con Saulo guial rënman gucaagdiajgaman xtiidx Dios. ⁸ Per bénbidxaa guin (con diidx grieglaman Elimas) guyënman nudxoonman guial nililadx Sergio Paulo xtiidx Dios. ⁹ Abi' Saulo, bén la gajc Pab, rniabee xSprijt Dios luxdooan guidiblagaa, baguiaadxijchaman loj bénbidxaa guin, ¹⁰ rëbaman:

—iXi'n xindxab lüj, ganax rusquieel, ganax niguijdx rüjnl, ad rëntczil ni zagdxe! ¿Xt goc gudëel mod chinal ree bejn xnejz nali Dios? ¹¹ Yan gudëed Dios lüj casti: ad zanit lojl abi' xchej ad zuguaatil xbacha' gubijdx.

Loj hor zii gajc gurexcajy Elimas abi' ad gojctri nuguaaaman, dxel raguuilaman chu guiniaaz yaaman guial ad rajctri ruguaaaman. ¹² Chi baguiaa gobernador guin zian, dxel bililadxaman abi' dád badxa lojman ni balüü reeman xcwent Dad Jesús.

Bidxin Pab con Bernabé niz Pisidia

¹³ Chi ma gudëd gojc zian, guyu Pab con ree xcompniaraman loj barcw luguedx Pafos abi' zë reeman luguedx Perge ni riga' niz Panfilia. Ni basa'n Waj laa reeman bayejcaman Jerusalén. ¹⁴ Dxel barii reeman guiedx Perge, zë reeman luguedx Antioquia ni riga' niz Pisidia. Abi' dxej raziiladx ree bén Israel, guyu reeman lën xyadoo ree bén Israel zianz gurej reeman. ¹⁵ Dxel chi gulox biil bén biil tib lajt loj libr bacaa Moisejs nê loj libr bacaa ree bén badëe xtiidx Dios loj ree bejn, gunee ree bén rniabee lën yadoo guin, rëb reeman loj Pab con Bernabé:

—Bal xhie guiëbidi loj ree bén riga' guie din gudëedi consejw loj reeman, zajc guiëbidan yan.

¹⁶ Dxel guzuli Pab, beenman sen loj reeman din yacwëez ro' reeman, dxel rëbaman:

—Bén Israel, nê gra ree bén rdxeb Dios, gol bacaagdiajg: ¹⁷ Dux Dios ree, nayajc ree bén Israel, gulejman dux bëngulal ree abi' laaman been persi gojcxhiey reeman, chi sta zojb reeman zi'c benzit niz Egipto. Dxel con xguialrniabeeman babëëman laa reeman Egipto. ¹⁸ Abi' baslejn-guijcaman laa reeman loj tiuu ijz ni guzu reeman niz lod naj ganax yujbidx, ¹⁹ banijt tëëman gajdx ree nacion ni gure Canaán persi badëëman guidxliuj guin ree loj dux bëngulal ree. ²⁰ Zian gojc loj tajp gayuu garol ijz, dxelri bacaabee Dios juejs ree persi gunabee reeman laa reeman. Abi' Samuel bén badëed xtiidx Dios loj ree bejn gojc xjuejs bigra reeman. ²¹ Dxel gunab reeman din chu' tijb rey nabee laa reeman, abi' bazuj Dios rey Saúl xi'n Cis, bén zëed loj xdiaa Benjamín persi gunabeeman laa reeman tiuu ijz. ²² Chi bisüd Dios rey Saúl, dxel bazujman rey Davi. Abi' rëbaman: “Ma baguian guial Davi xi'n Isaí, nabanx zi'c rënan, güün tëëx cumplid da diidxan guial güünx gra zi'c rënan.” ²³ Abi' yan zi'c gajczi rëb Dios, loj gajc xdiaa rey Davi, brii Jesús bén guxhaalaman din yabëëman

bén Israel ree loj dol. ²⁴ Chi gad Jesús guit, Waj bén baroobnijs bejn ree, bagojman gra ree bén Israel guial rayal yayüjn reeman xgab por xtol reeman tiobnijs tëë reeman. ²⁵ Chi ma zidyob yadiblagaa xgualnaban Waj, dxel rëbaman: “Ad najtan bén naladxidi, qui guitraman, laaman mazri lasajc guial lon, ni'quid rayalt gaxhiecan xgurëchaman.”

²⁶ Yan, dugra ree nayajc ree xdiaa Abraham në gra los demazri ree bén rdxeb Dios, par dunuj ree naj xtiidxaman ni rugojn reeman dunuj ree, xhienaag rabëë Jesucrist dunuj ree loj dol. ²⁷ Per ree bén Jerusalén con ree xguxtis reeman ad bayagbeet reeman Jesús. Ad gogbee tëët reeman xhie rën guiëb xtiidx Dios ni bacaa ree bén badëëd ree xtiidxaman loj ree bejn, ni rool reeman lën yadoo dxej raziiladx ree bejn, dxel laagajc reeman bagüjt Jesús, zian gojc cumplid ni ca loj xtiidx Dios. ²⁸ Abi' majsi achetcki xtol Jesús guyu, per ni'czi zian rëb gajc reeman loj Pilato guial nabeeman guiëtaman. ²⁹ Chi gulox been reeman gra zi'c ca loj xtiidx Dios xcwent Jesús, balet reeman laaman loj crüjz abi' baquie'ch reeman laaman. ³⁰ Per Dios basban laaman, ³¹ dxel loj zien dxej balüülojman loj ree bén binë laaman chi briiman niz Galilea zëman Jerusalén, abi' yan laa reeman naj bén rniee por laaman loj ree bejn.

³² Zeel caygojnan lëjt diidxza'c guin ree, guial promejs been Dios loj ree dux bëngulal ree, ³³ ma beenman laan cumplid con dunuj ree guial zio'p ree loj xdiaa reeman. Beenman cumplid xtiidxaman chi basbanman Jesús zi'c ca loj Salmo barojp, lod rëb: “Lüj naj da xi'n'an abi' diizd yan ma rajpil guialrniabee zi'cgajc naj.” ³⁴ Dios rëb guial yasbanman Jesús abi' ad zaxint xcuerpaman zi'c gajczi ca loj xtiidx Dios lod rëb: “Naj günle' lëjt zi'c benan promejs loj Davi.” ³⁵ Abi' rëb tëë stib lajt loj xtiidxaman: “Ad zatiëjbtill xhin xcuerp xi'nl, bén naya nali.” ³⁶ Yan diidxliczi diidx guin ree ad rnieet reen xcwent Davi, din chi gulox gunabeeman bejn ree xtiampaman zi'c rëb Dios nabeeman, dxel güjtaman, biguie'chaman abi' guxin xcuerpaman. ³⁷ Per xcuerp Jesús bén basban Dios, ad guxintan. ³⁸ Zeel caygojnan lëjt compniar din gagbeedi guial por laaman ma yu' perdon par dux tol ree. ³⁹ Graczi bén rliiladx Jesucrist ma gojc perdon gra xtol reeman ni ad gojct niajc perdon por ley badëë Dios loj Moisejs. ⁴⁰ Zeel gol gojp cudad chitëë saquidi zi'c bacaa ree bén badëë xtiidx Dios loj ree bejn, lod rëb:

⁴¹ Gol bacaagdiajg, lëjt bén ruze' ree da diidxan,

gol badxalojdi gol gunidloj tëë.

Din loj ree dxej nabandi gün reen ni xt ni'quid zaliladxtidi,

majsi chu na laa reen lojdi.

⁴² Chi barii Pab con Bernabé lën xyadoo ree bén Israel guin, gunab reeman favor loj Pab, din chi guidxin stijb dxej raziiladx ree bejn chiguieman mazri diidx loj reeman xcwent ni beman dxej zii. ⁴³ Chi barii ree bén guin lën yado guin, zien da't reeman binal Pab con Bernabé, zi'c ree bén Israel zi'c ree bén ad najt bén Israel, bén rën ree Dios zi'cgajc ree bén Israel. Abi' rëb Pab con Bernabé loj reeman din sudxi'ch reeman loj nejz zagdx guredx Dios laa reeman guial rënman laa reeman.

⁴⁴ Chi bidxin dxej ni raziiladx ree bejn, gra bén luguiedx guin bado'p din gucaagdiajg reeman xtiidx Dios. ⁴⁵ Per chi baguiaa ree bén Israel zien da't ree bejn riga' yagaj, dxel guyu guialnadëdloj luxdoo reeman abi' guzuloj caneeguijdx reeman canee tëë reeman diidxguijdx loj Pab.

⁴⁶ Dxel sin guialrdxeb badxi' Paban con Bernabé loj reeman, rëb reeman:

—Yaløj lëjt rayal yagojnan xtiidxza'c Dios, lëjt najdi bën Israel, per yan ad rëntidi gucaagdiajguidi laan, dxel lëjt gajc culüü guial ad zajct yayalidi guialnaban tiblyaa con Dios. Yan ma yugtie'chan diidxza'c guin ree loj ree bën ad najt bën Israel. ⁴⁷ Din zian gunabee dux Dad ree Dios dunujn, chi rëbaman tib lajt loj xtiidxaman:

Nuzun lüj zi'c guij par gra ree nacion,
din chel guidibchicniaa loj guidxliuj chicojnl
xhienaag gac ree bejn perdon.

⁴⁸ Chi biguiejn ree bën ad najt bën Israel zian, dxel babaa reeman, guzuløj rëb reeman guial zagdxë naj xtiidx Dios, abi' graczi bën ma naj yayal guialnaban tiblyaa con Dios, bililadx reeman xtiidxaman. ⁴⁹ Zianan zeel bire'ch xtiidxza'c Dios guidib niz ni. ⁵⁰ Per ree bën Israel batiaalguiiw reeman bëngunaa rej ree laydoo zianczi naj tëë reeman bën zøjbloj luguiedx zii, në ree xinguaaw naj gajc xin zøjbloj, din sunal reeman Pab con Bernabé xt yabëë reeman laa reeman ni. ⁵¹ Dxel Pab con Bernabé gudxijp guxyuj guia' reeman zi'c tijb sen guial ad bazoobt ree bën guin diidx, dxel zë reeman Iconio. ⁵² Per ree bën bililadx Jesús niz ni, ma rniabee xSprijt Dios luxdoo reeman guidiblagaa abi' dád rabaa reeman.

14

Bidxin Pab con Bernabé Iconio

¹ Luguiedx Iconio, Pab con Bernabé guyu reeman lën xyadoo ree bën Israel. Abi' zi'c balüü reeman xtiidxza'c Jesucrist, zien da't reeman bililadx, zi'c ree bën Israel zi'c ree bën ad najt bën Israel. ² Per ree bën Israel ad bililadxt batiaalguiiw reeman bën ad najt ree bën Israel persi guzuløj been reeman xgab mal por ree bën rliladx Jesucrist. ³ Per ni'czi zian, xchej da't guzuj ree apóstoles guin ni, abi' sin guialrdxeb gunee reeman xtiidx Dios guial rliladx reeman Jesucrist, laaman badëëd guialrniabee loj reeman persi been reeman zien da't ree milagr në mazri ree ni ren, persi balüü Jesucrist guial diidxli naj ni rëb reeman xcwent Dios. ⁴ Per ree bën luguiedx zii gojc reeman tio'p lala', garol reeman guzunë ree bën Israel zagarol reeman guzunë apóstoles guin ree. ⁵ Dxel zi'c ree bën Israel zi'c ree bën ad najt bën Israel, baya'n reeman diidx con ree guxtis din tilë reeman Pab con Bernabé gucaaguij tëë reeman laa reeman. ⁶ Abi' chi gogbee Pab con Bernabé zian, laa zia gajc reeman Litra con Derbe, guiedx riga' ree niz Licaonia, në gra ree guiedx riga' niz ni, ⁷ gunee reeman xtiidxza'c Jesucrist.

Bacaaguij reeman Pab Litra

⁸ Luguiedx Litra guyu tijb xinguaaw ad rajct rza, ad guzatzcix guial naxin guia'x diidz chi golix abi' zøjbix ⁹ cucaagdiajguix ni rëb Pab. Chi baguiaa Pab laax, gogbeeman guial rliladxix par yayajquix. ¹⁰ Abi' gunee reeman rejs, rëbaman:

—jBisu, guzuli zagdxë!

Loj hor zii gajc gutiajs xin guin, guzulix abi' guzuløj cazax. ¹¹ Chi baguiaa ree bejn ni been Pab, guzuløj canee reeman rejs diidx Licaonia, rëb reeman:

—Dios naj ree zi'c bejn ma biguij lod nadxu' ree.

¹² Abi' rëb reeman guial Bernabé naj dios Júpiter, guiad Pab naj dios Mercurio guial laaman naj bën rniee loj reeman. ¹³ Abi' ro' guiedx

guin niz lod ru bejn naj xyadoo Júpiter, dxel bixhioz yu' lèn yadoo guin binëman go'n ree con ree guiaa, abi' laaman con ree bën guin guyën reeman nugüjt reeman go'n guin ree din niën reeman apóstoles guin ree zi'c xdios reeman. ¹⁴ Per chi gogbee Pab con Bernabé zian, gudixya' xab reeman, guzëëb reeman lad ree bën guin, rbixdiaj reeman rëb reeman:

¹⁵ —Gol bacaagdiajg, ¿chexquiza zeel rüjndi zian, awa bejn gajc dunujn zi'cgajc lëjt? Awa par zianclan zio'pan din yanan lojdi din yasa'ndi ni rüjndi, din achetzi lasajc reen. Mejorli gol binal xnejz Dios naban, bën been xanyabaa në guidxliuj nëtëë nijsdoo con gra ni yu' loj reen.

¹⁶ Tiamp gulal Dios baslaa been ree bejn ni guyëntzi reeman. ¹⁷ Per ni'czi zian, zianczi balüüman chu najman por ree ni zagdxe ni rüjman. Din laaman naj bën razaladx guia con guialnaza'c abi' razaladxaman ni radaaw ree din chu' du luxdoo ree zagdxe. ¹⁸ Chi rëb Pab con Bernabé zian, con ree diidx guin penz been reeman gan badxoon reeman guial nugüjt ree bën guin go'n guin ree din niën reeman laa reeman zi'c xdios reeman.

¹⁹ Per bëlzi ree bën Israel zojb Antioquía në Iconio, chi bidxin reeman luguiedx Listra been reeman gan batiaalguiiw reeman bën luguiedx guin ree. Dxel bacaaguij reeman Pab abi' gunaladx reeman ma güjtaman abi' guxoobyuj reeman laaman, babëë reeman laaman luguiedx guin. ²⁰ Per chi bido'p ree bën rliladx Jesucrist gadëd lod naga'man, dxel bixchewan, bayuman luguiedx guin stijb. Chi bareguiaal briinëman Bernabé zë reeman luguiedx Derbe.

²¹ Chi gulox gutie'ch reeman xtiidxza'c Jesucrist luguiedx Derbe lod been reeman gan bililadx zien ree bejn laan, dxel bayejc reeman luguiedx Listra në Iconio nëtëë Antioquía. ²² Luguiedx zii ree badxe' reeman luxdoo ree bën rliladx Jesucrist. Rëb reeman loj reeman din sudxi'ch reeman loj ni rliladx reeman laaman, din dád sagdiaj reeman din yayu reeman lod rniabee Dios. ²³ Abi' tëë loj tijb gaj ree guiedx guin bacaabee reeman bengol nabee ree loj ree bën rliladx Jesucrist. Zianz chi gulox guba'n reeman gurejdx tëë reeman Dios, dxel basa'n reeman laa reeman con Dad Jesús bën ma bililadx reeman.

Badxin ree Pab con Bernabé Antioquía ni riga' niz Siria

²⁴ Chi baza ree Pab con Bernabé niz Pisidia, bidxin reeman niz Panflia. ²⁵ Abi' gunee reeman xtiidx Dios luguiedx Perge, dxel zë reeman guiedx Atalia. ²⁶ Ni guyu reeman loj barcw zë reeman Antioquía, luguiedx lod basa'n ree los demazri ree bën rliladx Jesucrist laa reeman con Dios din gagnëman Pab con Bernabé din gutie'ch reeman xtiidxaman. Abi' dxiin guin naj ni ma baloox reeman. ²⁷ Dxel chi bidxin reeman Antioquía, bato'p reeman bën rliladx ree Jesucrist, persi be reeman diidx loj reeman gra ni been Dios con laa reeman, xhie tëë naag guxhalaman nejz din chililadx ree bën ad najt bën Israel Jesucrist. ²⁸ Ni guzu Pab con Bernabé xchej, guzunë reeman bën Antioquía rliladx ree Jesucrist.

15

Guyu gabilt Jerusalén

¹ Lèn ree dxej zii bidxin bëlzi ree bën Judea luguiedx Antioquía. Abi' senzuloj rëb reeman loj ree bën rliladx Jesucrist, guial bal id zu reeman sen zi'c gunabee Moisejs, ad zajct güün Dios xtol reeman perdon. ² Dxel Pab con Bernabé dád zro' gudijldiidx reeman con ree bën guin. Dxel

bacaabee ree b́en rliiladx Jesús Pab nē Bernabé, nē ree ben ren din che reeman Jerusalén chigneenē reeman apóstoles guin ree, con ree bengol rniabee loj ree b́en rliiladx Jesucrist din guguaa reeman xhienaag güün reeman xcwent sen guin.

³ Abi' badxe'nejz ree b́en Antioquía rliiladx ree Jesucrist laa reeman persi zē reeman. Chi zē reeman gudēd reeman niz Fenicia nē niz Samaria abi' bagojn reeman b́en rliiladx ree Jesucrist, b́en zobj ree niz ni guial ma rliiladx ree b́en ad najt ree b́en Israel xtiidx Dios. Abi' graczi b́en ma rliiladx Jesucrist niz ni, dád babaa reeman chi biguiejn reeman zian.

⁴ Chi bidxin Pab con Bernabé Jerusalén, dxel baca' ree b́en rliiladx Jesucrist laa reeman, con ree apóstoles, con ree bengol rniabee loj ree b́en rliiladx Jesucrist. Abi' be ree Pab diidx con Bernabé gra ni been Dios con laa reeman. ⁵ Per yu' ree b́enfarisew ma rliiladx Jesucrist, guzuli reeman abi' rēb reeman:

—B́en ad najt ree b́en Israel abi' ma rliiladx reeman Jesucrist, rüjn naguiejn chu' reeman sen ru ree b́en Israel, gagbee tēē reeman guial ryal chinal reeman xley Moisejs.

⁶ Dxel bado'p ree xi apóstoles Jesús con ree bengol rniabee loj ree b́en rliiladx Jesucrist din guidoon xhienaag güün reeman. ⁷ Guial tant canee reeman por zian, dxel guzuli Béd, rēbaman loj reeman:

—Gradi compniar raliduladx ree Jesucrist, lējt ragbee guial diizd gocli gulej Dios naj lojdi din chignen xtiidxza'c Jesucrist loj ree b́en ad najt b́en Israel din chililadx reeman laaman. ⁸ Abi' Dios b́en nünbee luxdoo graczi ree bejn, balüüman guial naj reeman xbejnman guial ma badēēd xSprijtaman loj reeman zi'cgajc baneeman du loj ree. ⁹ Zi'c ruguaa Dios dunuj ree ziangajc ruguaaaman laa reeman, din zi'c basiaman du luxdoo ree ziangajc basiaman luxdoo reeman guial ma rliiladx reeman Jesucrist. ¹⁰ Yan, ¿chexc zeel ad ridxga'tidi ni ma been Dios abi'za rniabeedi chinal ree b́en rliiladx Jesucrist ley ni ni'qui dunuj ree ni'qui dux b́engulal ree ad gojct naguieen ree zi'c rniabee ley guin? ¹¹ Dunuj ree rayagbee guial por ni zagdxe ni been Dad Jesucrist, been Dios dux tol ree perdon zi'cgajc laa reeman.

¹² Dxel bacwēēz ro' gra reeman abi' bacaagdiajg reeman ni cayü ree Bernabé con Pab, xcwent gra ree xmilagr Dios ni been reeman loj ree b́en ad najt b́en Israel. ¹³ Chi gulox gunee reeman, dxel nēgajc Jacob rēb:

—Gradi compniar raliduladx ree Jesucrist, gol bacaagdiajg: ¹⁴ Simón Béd be diidx duloj ree xhienaag guzuloj gulej Dios b́en ad najt ree b́en Israel din gac reeman xbejnman. ¹⁵ Gra ni ma gojc naj zi'c ni bacaa ree b́en badēē xtiidx Dios loj ree bejn loj xtiidxaman lod rēb:

¹⁶ Chi ma gojc zian,

yayünxhiey ree da bejnan mazri zi'c goc chi naban Davi,

gacxhiey reeman por ree b́en sta naban,

zi'c guban ree bejn xtiamp Davi

abi' por laa reeman yayajcxhiey ree da bejnan.

¹⁷ Din yaguuil ree los demazri ree bejn guial guiēn reeman naj,

gra ree b́en nacion ren, yaguuil guial guiēn reeman naj,

b́en ma gule reen din gac reeman da bejnan,

b́en guiguiejn ree guza't ree bejn naj.

¹⁸ Zian na Dios, b́en cugojn bejn gra ree nine diizd tiamp gulal.

¹⁹ Zeel naladxan ad rayalt chu güün naguiejn bén ad najt ree bén Israel par chinal reeman ley, laa reeman guial ma basa'n xcostumbr reeman par chinal reeman xnejz Dios. ²⁰ Yan con yaxhaal ree tijb gui'ch loj reeman guial ad rayalt gaw reeman ni ragle' loj ni naj xdios reeman, ad rayal tēēt sunē reeman ben ren bén ad najt lacheel reeman, ad rayalt gaw reeman bëēl rberejn ni'qui rejn. ²¹ Zian yaguie'ch ree loj reeman, din diizd tiamp gulal tijb gaj guiedx yu' bén rulüü laa reeman xhie rēn guiēb xley Moisejs ni rool reeman lēn ree yadoo dxej raziiladx ree bejn.

²² Dxel apóstoles guin ree con ree bengol rniabee loj ree bén rliadx Jesucrist, con los demazri ree bén rliadx Jesucrist, rēb reeman gucaabee reeman bén guixhiaalnē reeman Pab con Bernabé din che reeman Antioquía. Abi' bacaabee reeman Judas, bén la gajc Barsabás, nē Silas, laa reeman rajp guialrniabee loj ree bén rliadx Jesucrist. ²³ Abi' guxhaalnē reeman laa reeman tijb gui'ch ni rēb:

“Dunujn nayajcan xi apóstoles Jesús, con ree bengol rniabee loj ree bén rliadx laaman, nē los demazri ree bén rliadx laaman. Ragajp diozan lējt bén ad najt ree bén Israel, per nayajc ree compniar raliduladx ree Jesucrist, lējt zobjidi Antioquía, nē los demazri ree bén zobj ree niz Siria nētēē niz Cilicia. ²⁴ Ma bayagbeen guial yu' ree bén duladxan brii sin dux tiidxbeen, abi' cagu'nawēēg reeman lējt con xtiidx reeman persi ad radxejlt xhie güündi guial na reeman lojdi rayal chu'di sen ni ru ree bén Israel güün tēēdi zi'c rniabee xley Moisejs, per ad dunujtan baxhaal laa reeman. ²⁵ Zeel bado'pan abi' raguie'chan guial zagdxe naj yacaabee bëlzi dux compniaran din guidganaj reeman lējt, guidnē tēē reeman tio'p dux compniaran, Bernabé con Pab, bén rayēn da'tan. ²⁶ Zien ree ni guijdx cuhaagloj reeman guial cayüjn reeman sirv loj Dad Jesucrist. ²⁷ Dxel cayxhaalnē'n laa reeman Judas con Silas, laa reeman na lojdi gra con quijb xtiidx reeman. ²⁸ Abi' zi'c naj xgab bazaladx xSprijt Dios du lojn, dxel achetri naguiejn rüjn yanabeen lējt ni güündi, ni rayalzi cu'guijquidi naj guial, ²⁹ ad gawidi xbëēl ree be ni rbe'c ree bejn loj ni naj xdios reeman, ad gaw tēēdi bëēl rberejn, ni'qui rejn, ad sunēdi ben ren bén ad najt lacheelidi. Bal gapidi cudad ad züjntidi gra ree nine, zagdxequi güündi. Gagnē Dios lējt.”

³⁰ Zian gojcan, gui'ch guin naj ni guxhaalnē reeman guidap ree bén guin par luguiedx Antioquía. Ni bato'p reeman bén rliadx ree Jesucrist abi' bayü reeman gui'ch guin loj reeman. ³¹ Chi biil reeman laan, dád nix guyu luxdoo reeman por ree diidx zagdxe ni zēēd lojn. ³² Abi' Judas con Silas guial nēgajc reeman rajp quiarguiejn par gudēēd reeman xtiidx Dios, dxel zien naj ni guneenē reeman bén rliadx ree Jesucrist, bagu' reeman luxdoo reeman con xtiidx reeman. ³³ Chi ma gudēd zien dxej za' ree Judas con Silas ni, bazaadiidxnē ree bén rliadx Jesucrist laa reeman din yaguiaj reeman lod za' ree bén guxhaal laa reeman, rēb reeman loj reeman: “Chignē Dios lējt zagdxe.” ³⁴ Per Silas beenman xgab baya'nman ni mazri. ³⁵ Abi' Pab con Bernabé baya'n reeman Antioquía mazri, laa reeman con ree ben ren basnuu balüü reeman gutie'ch tēē reeman xtiidxza'c Jesucrist loj ree bejn ni.

Ni barojp volt brii Pab biglüüman xtiidx Dios guiedx ren ree

³⁶ Chi gudēd tio'p choon dxej, dxel rēb Pab loj Bernabé:

—Yo' stijb yugnaj dux compniar ree bèn rliładx ree Jesucrist, graczi ree luguiedx lod ma bugtie'ch xtiidx Dios, din yuquiaa xhienaag za' reeman.

³⁷ Bernabé guyèn ninē reeman Waj, bèn la gajc Marcw. ³⁸ Per Pab ad cwějbt ninē reeman laaman, din chi we reeman niz Panfilia guro'nladxaman laa reeman, ad binētraman laa reeman. ³⁹ Abi' ni'qui tijbaman ni'qui zatijbaman ad baya'nt conform, zianz gula' lasa' reeman. Dxel binē Bernabé Marcw, guyu reeman loj barcw zē reeman yuj la Chipre ni riga' loj nijsdoo, ⁴⁰ dxel gulej Pab Silas din chinēman laaman abi' rēb los demazri ree bèn rliładx Jesucrist loj reeman guial chinē Dios laa reeman zagdxē. ⁴¹ Zianz gudēd reeman niz Siria nē niz Cilicia, ragu' reeman luxdoo ree bèn rliładx Jesucrist niz ni.

16

Bine ree Pab con Silas Timoteo

¹ Chi bidxin Pab con Silas guiedx Derbe nē guiedx Listra abi' Listra bidxaagloj reeman tijb bèn rliładx Jesucrist, laman Timoteo, xniaaman naj bèn Israel, nēman rliładx Jesucrist guiáad xdadaman naj bèn grieg. ² Graczi ree bèn rliładx Jesucrist, bèn zojb ree guiedx Listra nē Iconio ruza't laaman zagdxē. ³ Dxel rēb Pab chinēman Timoteo, per yaloj badxe'man laaman sen ni ru ree bèn Israel, chitéē xhie guiēb ree bèn Israel riga' niz ni, din gra reeman ragbee guial naj xDadaman bèn grieg. ⁴ Graczi ree guiedx ni gudēd reeman bagojn reeman bèn rliładx ree Jesucrist ni rayal güün reeman zi'c ma rēb ree apóstoles, con ree bengol rniabee loj ree bèn rliładx laaman Jerusalén. ⁵ Zianan zeel guzudxi'ch ree bèn niz ni loj guialrliładx reeman Jesucrist, abi' guixie guixie gojcxhie majri ree bèn rliładx laaman.

Baliüloj tijb bèn Macedonia loj Pab

⁶ Chi ma gojc zian ad baslaat xSprijt Jesús nignee reeman xtiidx Dios niz Asia. Dxel gudēdzinejz reeman niz Frigia nē niz Galacia ⁷ abi' bidxin reeman niz Misia. Ni been reeman xgab niej reeman niz Bitinia, per ad cwějbt gajct xSprijt Dios niej reeman niz ni. ⁸ Dxelri gudēdzinejz reeman niz Misia, bidxin reeman guiedx Troas. ⁹ Yagaj, guxhinzii guzajc Pab zi'c rulüü cane'xhchaalaman. Baguiaaman tijb xinguaaaw zēēd niz Macedonia, za'lix rzajquix liaadx loj Pab, rēbix:

—Guda niz Macedonia, taguieen dunujn yudar.

¹⁰ Guloxzi baguiaa Pab zian, laa baguieen gajcan porvinid din yo'n niz Macedonia guial bayagbeen Diosan naj bèn cabejdx dunujn niz ni par yatie'chan xtiidzxa'c Jesucrist.

Bidxin ree Pab con Silas Filipos

¹¹ Badxu'n loj barcw luguiedx Troas abi' bio'n naliduu Samotracia. Chi bareguiaa badxinan guiedx Neápolis. ¹² Yagaj badxoon bio'n Filipos, guiedx mazri zojbloj niz Macedonia, per Rom rniabee guiedx zii, ni badxu'n bēlzi ree dxēj. ¹³ Abi' tijb dxēj raziiladx ree bejn, bariin luguiedx guin bio'n tijb ruguiiwro', lod rayagbeen rado'p ree bèn Israel par cwedx reeman Dios. Abi' badxu'n baneen xtiidzxa'c Jesucrist loj ree bēngunaa bado'p yagaj. ¹⁴ Tijb ree bēngunaa guin la Lidia, najman bèn Tiatira, ruto'man lajd zagdxē ni culor murad. Diidxli rdxebaman Dios abi' cucaagdiajgaman. Dios guxhal xquiarguiejnman din gucaagdiajgaman

zagdxe gra ni rëb Pab. ¹⁵ Abi' gurobnijsaman con gra xfamilaman. Dxel gunabaman favor du lojn, naman:

—Bal walidi rliadixidi guial ma rliadixan Jesucrist, gol baya'n lidixan. Dxel beenman naguiejn baya'n nan lidixaman.

¹⁶ Dxel tib volt, chi zio'n lod rej ree bejn par cwedx guiniab reeman Dios, badxaaglojn tijb biingunaa, yu' xinxab luxdoom, abi' por xguialrniabee xinxab guin rnieeya'm guiaad ree bën guzii laam dád zro' milia rüjn reeman gan por dxiin guin. ¹⁷ Dxel bidnalim Pab con dunujn, rbidxa'm rëbim:

—Bën guie ree rüjn xchiin Dios yu' xanyabaa, laa reeman gugojn lëjt xhienaag gaquidi perdon.

¹⁸ Zien dxej da't beenm zian, xt chi balenya' Pab, dxel bayejcaman rëbaman loj xinxab yu' luxdoom:

—Por xguialrniabee Jesucrist, rniabeen lüj din yariil luxdoo biin guie. Loj hor zii gajc barii xinxab guin luxdoom.

¹⁹ Per chi gogbee ree bën guzii laam guial ad zajctri güünm gan milia par laa reeman, dxel gunaaz reeman Pab con Silas, binë reeman laa reeman roylay loj guxtis. ²⁰ Chi bayü reeman laa reeman loj ree guxtis guin, rëb reeman:

—Xin Israel guie ree rbëe reex wadijl du ladx ree, ²¹ abi' rulüü reex costumbr ree ni ad zatiëëbt ree yaguieen ree ad zajc tëët yaguieen ree, din ben Rom dunuj ree.

²² Dxel wajs gra ree bën guin contr laa reeman, abi' gunabee ree guxtis guin gulëe xab Pab con Silas din quin reeman laa reeman con var. ²³ Chi gulox gudijn da't reeman laa reeman, dxel bilu' reeman laa reeman ladxguuib abi' gunabee reeman bën rajp ro' ladxguuib guin din gapdxi'chaman laa reeman. ²⁴ Chi biguiejn bën rajp ro' ladxguuib guin zian, dxel bilu'man laa reeman xt lën cuart bigra yu' lën ladxguuib guin, guxhiiman guia' reeman loj tabl naal con caden.

²⁵ Per garol guiaal, la'tgaj cabejdx canab Pab con Silas Dios, cayool tëe reeman cant par laaman, dxel cucaagdiajg los demazri ree bën yu' ladxguuib guin. ²⁶ Dxel tijbzi golp guzuloj xudoxh, niz ni niz guie rurliia xcimiant ladxguuib guin. Loj hor zii gajc bixal gra ree xportan abi' baxiec ree caden naxii gra ree bën yu' lënan. ²⁷ Chi baban bën rajp ro' ladxguuib guin abi' baguiaaman zøjbyal gra ree xportan, gulëe xi espadaman din nugüjt laagajcaman guial gunaladxaman gra ree bën yu' ladxguuib guin ma baxüün. ²⁸ Dxel gurixdiaj Pab, rëbaman lojman:

—Ad güünnaa lüj gajc, laa dugran nadxu' guie.

²⁹ Laa gunab gajc bën guin tijb guij, dxel ruxüünman guyuman, rnijman guial rdxebaman, bigzuxibaman loj Pab në loj Silas. ³⁰ Dxel babëëman laa reeman, gunabdiidxaman loj reeman, rëbaman:

—Dad, gol guna, ¿xhie rayal günan din güün Dios naj perdon?

³¹ Badxi' reeman laan, rëb reeman:

—Bililadx Dad Jesucrist, zian gaquil perdon con xfamilil.

³² Abi' be reeman xtiidx Dios lojman con loj gra ree bën zøjb lidixaman. ³³ Zianz guxhin zii gajc gudiibaman lod nadxeelguijdx reeman, dxel gurobnijsaman con gra xfamilaman. ³⁴ Abi' bignëman laa reeman lidixaman, dxel badëëman ni gudaw reeman. Guiaad laaman dád nix yu' luxdooman con gra xfamilaman Guial ma rliadix reeman Dios.

³⁵ Chi bareguiaal, guxhaal ree guxtis guin suldad ree persi biguiedx reeman loj bén rajp ro' ladxguiib guin guial guslaaman Pab con Silas.
³⁶ Abi' rëb bén rajp ro' ladxguiib guin loj Pab:

—Ma na ree guxtis guial guslaan lëjt. Yan ma zajc yaguiajdi ad chu'di xgab.

³⁷ Per rëb Pab loj ree suldad guin:

—Nayajcan quijb ben Rom abi' gudijn reeman dunujn delant loj ree bén guiedx, ni'quid baneet reeman mod nadëëdan cwent loj reeman con badxe' reeman dunujn ladxguiib. Abi' yan, ¿guslaa reeman dunujn ralan ya? ¡Ad zajctan zian! Gui't quijb laa reeman guidgalëë reeman dunujn.

³⁸ Abi' bicojn ree suldad guin guxtis guin ree zian, dxel dád bidxeb reeman chi biguiejn reeman guial ben Rom naj Pab con Silas. ³⁹ Dxel wej reeman bignab reeman perdon loj Pab con Silas babëë tëë reeman laa reeman, rëb reeman loj reeman din yaza reeman luguiedx guin. ⁴⁰ Chi barii reeman ladxguiib, wej reeman lidx Lidia. Zianz chi gulox guneenë reeman los demazri ree bén riladx ree Jesucrist din chu' luxdoo reeman sudxi'ch reeman loj ni riladx reeman, dxel baza reeman.

17

Bidxin ree Pab con Silas Tesalónica

¹ Chi zë Pab con Silas, gudëd reeman niz Anfípolis në niz Apolonia zianz bidxin reeman luguiedx Tesalónica lod yu' tijb xyadoo ree bén Israel. ² Abi' zi'c goc xcostumbr Pab, wejman lën yadoo guin, choon dxej raziiladx ree bejn. Wejman bigneenëman laa reeman xtiidx Dios. ³ Bagojnman balüü tëëman laa reeman loj xtiidx Dios lod rëb guial naj sagdiaj Cristo, abi' chi ma güjtaman yabanman stijb. Rëbaman loj reeman: —Jesús ruzat gajcan lojdi, laagajcaman naj Cristo din yabëëman dunuj ree loj dol.

⁴ Yu' ree bén Israel guin bililadx abi' bachajg reeman Pab con Silas. Në zien ree bén grieg rën Dios bililadx, nëtëë zien ree béngunaa zobjbloj bililadx Jesús. ⁵ Per ree bén Israel ad bililadx Jesucrist, gudëdloj reeman abi' bato'p reeman benmal ziza ree lunejz persi gulëë reeman wadijl luguiedx guin, abi' guyu reeman lidx Jasón, raguiil reeman Pab con Silas din cwëë reeman laa reeman guzuj reeman laa reeman loj ree bén guiedx guin. ⁶ Per guial ad badxejlt reeman laa reeman yagaj, dxel guxoobyuj reeman Jasón në ree ben ren bén riladx Jesucrist, binë reeman laa reeman loj guxtis, rbixdiaj reeman, rëb reeman:

—Tio'p ree xin cabëë wadijl guidib guidxliuj, ma bi't reex guie, ⁷ abi' lidx Jasón zobj reex. Laa reex con gra ree bén nuchajg laa reex, ad cayüjnt reex zi'c rniabee xley rey César, din rëb reex guial yu' zatijb rey la Jesús.

⁸ Chi biguiejn ree guxtis guin zian con ree bejn, gra loj xgab been reeman. ⁹ Per Jasón con los demazri ree bén guyu ladxguiib guin gudijx reeman loj ree guxtis guin, dxel baslaa reeman laa reeman.

Bidxin Pab con Silas Berea

¹⁰ Guxhinzii gajc, guxhaal ree bén riladx Jesucrist Pab con Silas luguiedx Berea. Chi bidxin reeman ni, wej reeman lën xyadoo ree bén Israel. ¹¹ Mazri benza'c naj ree bén Israel guin guial loj ree bén Israel zobj Tesalónica. Con gan bacaagdiajg reeman ni rëb Pab. Abi' guixie guixie rusiid reeman xtiidx Dios, din gagbee reeman waliqui ni rëb Pab ya. ¹² Zeel dád zien reeman bililadx Jesucrist, nëtëë zien bén

grieg bililadx laaman zi'c ree xinguaaw zi'c ree béngunaa zojbloj niz ni.¹³ Chi gogbee ree bén Israel zojb Tesalónica guial catie'ch Pab xtiidx Dios luguiedx Berea, dxel wej reeman ni bigtiaalguiuw reeman bejn ree din guidxe'ch reeman Pab.¹⁴ Per ree bén rililadx Jesucrist ad goglaat reeman, laa guxhaal gajc reeman Pab niz ro' nijsdoo. Guiáad Silas con Timoteo baya'n reeman mazri Berea.¹⁵ Abi' ree bén biglu'nejz Pab, xt Atenas binë reeman laaman. Chi baza reeman ni, bignë reeman xruson Pab din diob che Silas con Timoteo chinal reeman laaman.

Bidxin Pab Atenas

¹⁶ La'tgaj cabëz Pab guidxin Silas con Timoteo luguiedx Atenas, guyunayaman guial baguiaaman zien da't ni rajp ree bejn niz ni zi'c dios.¹⁷ Zeel wejman lën xyadoo ree bén Israel bigneenëman laa reeman në los demazri ree bén rën Dios zi'c ree bén Israel, guixie guixie rnieenëman chutëëz bén rdxaglojman niz galay guiedx guin.¹⁸ Guneenë tëëman garol ree bén zinal ni balüü bén brii laj epicureo, në za garol ree bén estoicos. Abi' yu' reeman rëb:

—¿Xhienin rniee xin guin zeel rniee da'tix?

Yu' tëë reeman rëb:

—Rulüü xtiidx dios ren ree bén ad naguieenbeet ree catie'chix.

Rëb reeman zian guial caneenë Pab laa reeman xtiidxza'c Jesucrist në xcwent guial babanman stijb.¹⁹ Dxel binë reeman Pab tijb luar la Areópago, lod rado'p reeman. Abi' gunabdiidx reeman lojman, rëb reeman:

—¿Zajc nal ya xhie ree nicüb guin zidgalüül niz guie? ²⁰ Din rül diidx du lojn ni ad rayagbeetan, zeel rayënan yayagbeen xhie rën guiëban.

²¹ Graczi ree bén Atenas, con los demazri ree benzit zojb ni, zianczi za' reeman zian. Ruladx reeman téd reeman dxej, gucaagdiajg reeman o gü reeman ni naj ree nicüb.

²² Dxel guzuli Pab galay reeman lod la Areópago, rëbaman:

—Bén Atenas, por graczi ni ma baguian, ma gogbeen guial dád zien ree xdiosidi.²³ Abi' chi zizaan ziquian luar lod rbejdxidi xdiosidi, badxejlan tijb luar lod ca ree diidx ni rëb: “Par Dios ad naguieenbeet ree.” Yan, Dios rbejdxidi sin guial ad nünbeetidi laaman, xtiidxaman naj ni zidguien lojdi.

²⁴ 'Dios guin been guidxliuj con graczi ni yu' lojn, laaman rniabee xanyabaa në loj guidxliuj. Ad za'taman lën yadoo ni rüjn ree bejn.²⁵ Ad riaadx tëëtaman chu güün xhienin par laaman, din laaman naj bén razaladx bi nabajnnë' ree, laaman razaladx guialnaban duloj ree në ree ni rayaadx ree.

²⁶ 'Por tijb bejn been Dios din chu' zienloj bejn loj guidxliuj din cwe reeman guidib loj guidxliuj. Abi' ma naj xhie tiamp guiban reeman ban tëë cwe reeman.²⁷ Din yaguiil reeman Dios majsi zi'c chi rgan bejn chi raguiilaman xhienin, zian güün reeman din yadxejlaman. Majsi diidxliczi ad zijtt za'man par gra bejn.²⁸ Din por Dios nabajn ree, por laaman raniib ree radxoo tëë ree, por laaman nadxu' ree loj guidxliuj. Zi'c rëb tëë ree xbénrignia'di, chi rëb reeman: “Dunuj ree nayajc xi'n Dios.”²⁹ Zeel bal nayajc ree xi'n Dios, ad rayalt yaguieen ree xgab guial Dios najné or, o plajt, o guiaj ya zi'c naj ni rüjn ree bejn zi'c naj xixgab reeman.³⁰ Tiamp gulal cwëjb Dios been ree bejn zi'c naladx reeman guial achetczi ragbee reeman, per yan gra ladczi canabeeman gra ree

bejn din yayüjn reeman xgab por xtol reeman. ³¹ Din Dios ma gulej tijb dxej ni yadëed ree bejn cwent lojman, dxej ni güün xguialguxtisaman. Ma gulej tëeman Jesucrist din güünman guialguxtis guin, abi' din guiguien guial gulejman laaman par zian, basbanman laaman chi gütaman.

³² Chi bigueijn reeman rëb Pab guial baban Jesucrist loj ree bengüt, yu' reeman baze' laaman, yu' tëë reeman rëb:

—jZatijb dxej yasnuu yacaagdiajgan ni canal!

³³ Dxel baza Pab lod za' reeman. ³⁴ Per yu' reeman bachajg laaman, abi' bililadx reeman xtiidx Dios. Loj reeman no'ch tijb bën zobjloj lën Areópago laman Dionisio, në stijb búngunaa la Dámaris në ree ben ren.

18

Bidxin Pab Corinto

¹ Dxel brii Pab Atenas zëman Corinto. ² Yagaj bidxaaglojman tijb bën Ponto laman Aquila, zëedaman diaa Israel. Aquila con xbéngunaaman Priscila qui bazari reeman niz Italia guial gunabee rey Claudio yarii gra ree bën Israel Rom. Dxel wej Pab bitixlojman laa reeman. ³ Abi' guial lasa'gajc dxiin ni rüjnman rüjn reeman, rüjnchaaw reeman guid ni rajc ree carp, dxel baya'nnëman laa reeman persi been reeman dxiin guin. ⁴ Abi' beegaj dxej raziiladx ree bën Israel, rej Pab rigneeman xtiidx Dios lën xyadoo ree bën Israel, zi'c ree bën naj ree bën Israel zi'c ree bën ad najt bën Israel raguuilaman mod din chililadx reeman ni rëbaman.

⁵ Chi baza ree Silas con Timoteo niz Macedonia, bidxin reeman Corinto, dxel achetri ni ren been Pab, ganaxzi xtiidx Dios guneeman loj ree bejn, balüü tëeman bën Israel ree guial Jesús naj Cristo bën cabëz reeman. ⁶ Per guzuloj bidxe'ch reeman Pab abi' guneë reeman diidxguijdx contr laaman. Dxel gudxijp xabaman zi'c tijb sen guial ad ruzoobt reeman diidx, abi' rëbaman loj reeman:

—Lëjt gajc rajp dol guial guizëëbidi delant loj Dios, ad najt ra'p dol. Diizd yan chiguien xtiidx Dios loj ree bën ad najt bën Israel.

⁷ Dxel bariiman lën yadoo guin wejman lidx bën la Justo, rën bën zii Dios, gajxh gajc yadoo guin naj lidxaman. ⁸ Abi' Crispo, tijb bën rniabee lën xyadoo ree bën Israel, bililadxaman Dad Jesucrist con gra xfamilaman. Në zien ree bën Corinto bililadx chi bigueijn reeman xtiidx Jesucrist abi' gurobnijs reeman. ⁹ Tijb guxhin balüüloj Dios loj Pab, rëbaman lojman:

—Ad rdxebil, basnuu guneë da diidxan, ad gucwëëzil, ¹⁰ naj za'në' lüj, achutzzi zajc güün lüj xhienin, din luguiedx guie zien da't bejn naj par naj.

¹¹ Zianan zeel baya'n Pab Corinto tibijz garol, balüüman bën guin ree xtiidx Dios.

¹² Per chi goc Galión gobernador Acaya, bën Israel ree bachajg lasa' reeman persi gunaaz reeman Pab binë reeman laaman loj gobernador guin, ¹³ rëb reeman loj gobernador guin:

—Xin guie ziza cayüjnx gan bejn ree guial guiën reeman Dios zi'c tijb mod ni ad najt loj ley.

¹⁴ Ma ninieë Pab, chi guneë Galión rëbaman loj ree bën Israel guin:

—Bal niajcan tijb falt o tijb guialquia narooob beenman zeel zidnëdi laaman, züncwentan lëjt. ¹⁵ Per najn por ree diidx në por laj ree bejn

nètëe por xleydi, zeel lëjt gajc gol gunaj xhienaag güüнди, ad rëntan günan guialguxtis xcwent ree ni guin.

¹⁶ Abi' laa babëe gajcaman laa reeman roylay guin. ¹⁷ Dxel yagaj gajc gunaaz gra reeman Sóstenes, bën rniabee lën xyadoo ree bën Israel abi' gudijn reeman laaman, per ni'quid beencwentt gobernador guin laa reeman.

Badxin Pab Antioquía

¹⁸ Zienri ree dxej baya'n Pab Corinto. Dxel bazaadiidx nëman los demazri ree bën rliladx Jesucrist, abi' bazanëman Priscila con Aquila, guyu reeman loj barcw zë reeman niz Siria. Per chi gad reeman grii Cencrea bagaj guijc Pab, por tijb promeys ni beenman. ¹⁹ Chi bidxin reeman Éfeso, ni basa'n Pab Priscila con Aquila, abi' wejman lën xyadoo ree bën Israel zojb ree ni, bigneenëman bën Israel rado'p ree lën yadoo guin. ²⁰ Abi' guyën reeman niaglaa Pab ni mazri, per ad cwëjbtaman. ²¹ Rëbaman loj reeman:

—Ma yaya'n, bal gagnë Dios naj, guidganan lëjt stijb.

Dxel guyuman loj barcw bazaman Éfeso. ²² Chi bidxinman Cesarea, dxel wejman Jerusalén bicajpdiozaman bën rliladx ree Jesucrist, dxelri zëman Antioquía. ²³ Chi ma gojc xchej za'man Antioquía, dxel briiman zatijb. Wejman tijb gaj ree guiedx riga' niz Galacia në niz Frigia, ragu'man luxdoo gra ree bën rliladx Jesucrist.

Gutie'ch Apolos xtiidx Dios Éfeso

²⁴ Tiamp zii bidxin tijb bën Israel luguiedx Éfeso, laman Apolos, gojlaman Alejandría. Dád radxejlaman diidx par guinieeman abi' dád rajcaman xtiidx Dios. ²⁵ Basiidaman xtiidx Dios, dxel con gan balüüman bejn ree, zagdxe tëe rüman xtiidx Jesús loj reeman, majsi ad ragbeetaman par xhieri mazri rirobnijs bejn, tijbzi xcwent xguial waroobnijs Waj ragbeeman. ²⁶ Abi' Apolos, sin guialrdxeb guzuloj caneeman xtiidx Dios loj ree bën Israel lën xyadoo reeman, zianz chi biguiejn Priscila con Aquila ni rëbaman, dxel bignë reeman laaman lidx reeman. Ni balüü reeman laaman persi basnuu basiidaman mazri xtiidx Dios. ²⁷ Chi been Apolos xgab cheman niz Acaya, gra ree bën rliladx Jesucrist bën za'në laaman, badxe' reeman luxdoo din cheman, abi' guxhaal reeman tijb gui'ch loj ree bën rliladx Jesucrist bën zojb ree niz Acaya din yaca' reeman laaman zagdxe chi guidxinman niz ni. Chi bidxinman niz Acaya dád beenman yudar bën ma rliladx ree Jesucrist guial gognë Dios laa reeman. ²⁸ Din delant loj gra ree bejn rëbaman guial ad laat zë ree bën Israel, abi' achutczi gojc nadxi' xtiidxaman guial graczi ni rëbaman naj diidxli, balüü tëëman loj xtiidx Dios gra luar lod rëb guial Jesús naj Cristo bën gulëjz reeman.

19

Bidxin Pab Éfeso

¹ La'tgaj za' Apolos Corinto, wej Pab guiedx riga' ree niz ruguia', abi' bidxinman Éfeso, yagaj bidxaaglojman bëlzi ree bën rliladx Jesucrist.

² Abi' gunabdiidxaman loj reeman rëbaman:

—¿Guyu xSprijt Dios luxdoodi ya chi bililadxidi?

Badxi' reeman laan rëb reeman:

—Ni'quid waguiejntan guial yu' xSprijt Dios.

³ Dxel rëb Pab loj reeman:

—¿Xhieza naag gurobnijsidi?

Badxi' reeman laan rëb reeman:

—Barobnijsan zi'c balüü Waj bejn ree.

⁴ Dxel rëb Pab loj reeman:

—Walican barobnijs Waj bejn, bën bayüjn ree xgab por xtol reeman. Per rëbaman guial rayal chililadx reeman bën zëëd xijchaman abi' laaman naj Jesús, bën naj gajc Cristo.

⁵ Chi biguiejn reeman zian, dxel gurobnijs reeman por Dad Jesús.

⁶ Abi' chi guxhoob yaa Pab guijc reeman, dxel guyu xSprijt Dios luxdoo reeman, zianz guzuloj canee reeman diidx ren ree. Dxel guzuloj cudëëd reeman xtiidx Dios loj ree bejn. ⁷ Loj gra reeman naj cost chiptio'p xinguaaw.

⁸ Choon bëëw wej Pab lën xyadoo ree bën Israel zojb ni. Sin guialrdxeb guneenëman laa reeman xtiidx Dios, guneenëman laa reeman abi' beenman naguiejn din güünman gan chililadx reeman xhienaag naj xguialrniabee Dios. ⁹ Per garol reeman gojc nad ad guyënt reeman nililadx reeman, al guzuloj gunee reeman diidxguijdx por xtiidx Jesucrist delant loj ree bejn. Dxel bariica Pab loj reeman con ree bën ma rliladx Jesucrist, binëman laa reeman lën tijb xzcuel bën la Tiranno. Ni balüüman laa reeman guixie guixie, ¹⁰ loj tio'p ijz beenman zian. Abi' graczi ree bën zojb niz Asia, zi'c ree bën Israel zi'c ree bën ad najt bën Israel, bacaagdiajg reeman xtiidx Dad Jesucrist. ¹¹ Abi' por xguialrniabee Dios been Pab milagr narooob ree, ¹² xt ree xbay Pab në ree lajd rtia lojman zi'c lantar rignë reeman loj ree bënragxuu, abi' rayajc reeman guialguijdx ni rajc reeman, rarii tëë ree xindxab yu' luxdoo reeman.

¹³ Per guyu bëlzi ree bën Israel ziza rabëë reeman xindxab luxdoo ree bejn, abi' guyën reeman nünjnë reeman dxiin laj Dad Jesucrist dxel rëb reeman loj ree xindxab guin:

—jPor Jesús bën ruza't Pab, rniabeen lëjt, gol barii!

¹⁴ Zian naj ni been gajdx ree xi'ngaan tijb bën Israel la Esceva, bën goc tijb bixhioz rniabee ree bixhioz. ¹⁵ Per tib volt tijb ree xindxab guin badxi' xtiidx reeman rëbaman:

—Nünbeen Jesús ragbee tëën chunin naj Pab, per lëjt ni'quid nünbeetan lëjt.

¹⁶ Abi' bën yu' xindxab guin luxdoo guzuloj caguinman laa reeman, con gojl ni yu'man beenman laa reeman gan. Dád gudijnman laa reeman abi' baxüün reeman barii reeman lënü guin, ziladzi reeman nadxeelguijdx tëë reeman. ¹⁷ Graczi ree bën zojb Éfeso, zi'c ree bën Israel zi'c ree bën ad najt bën Israel, gogbee reeman gojc zian, dxel dád bidxeb reeman abi' baza't reeman Dad Jesús zagdx.

¹⁸ Në zien ree bën rliladx Jesucrist bidxin abi' delant loj gra ree bejn baneero' reeman gra ni mal ma been reeman. ¹⁹ Nëtëë zien ree bën been guialbidxaa bidxinnë xlibr reeman abi' baze'c reeman laa reen delant loj gra ree bejn. Chi babëë reeman cwent plac lasajc ree libr guin dxel cost tü'pchii mil milia plajt lasajc reen. ²⁰ Abi' zian bire'ch xtiidx Jesucrist biguiejn tëë xguialrniabeeman.

²¹ Chi ma gudëd gojc zian, been Pab xgab cheman niz Macedonia në niz Acaya xt yadxinman Jerusalén. Rëb tëëman guial chi ma wejman Jerusalén dxelri cheman në Rom. ²² Abi' guxhaalaman tio'p bën rüjn

laaman yudar, Timoteo con Erasto, persi wej reeman niz Macedonia la'tgaj baya'nman mazri niz Asia.

Gojc nadxeb Éfeso

²³ Lën ree dxej zii been ree bën Éfeso nadxeb por xtiidx Jesús. ²⁴ Din Demetrio, bën rüjn ree ni plajt, rüjnman figur plajt ni naj ree form xyadoo dios la Diana, ragbeeman guial dád rüjnman gan con ree bën rüjnnëman dxiin. ²⁵ Dxel bato'paman laa reeman con ree ben ren bën rüjn gajc ree lasa' dxiin guin, abi' rëbaman loj reeman:

—Gol bacaagdiajg, lëjt ragbee guial loj dxiin guie raguieen ree gan milia ro'. ²⁶ Per yan lëjt ruguiaa riguejn tēedi, Pab ziza cayëbix guial dios ni rüjn ree bejn ad diost reen. Abi' zian cayujnx gan caliladx zien ree bejn laax, ad tijbtizi luguiedx guie, nē guidib niz Asia. ²⁷ Dxel nadxeb yasëëb dux chiin ree, abi' ad tijbtizi dux chiin ree, nē xyadoo dios Diana ad zayagbeetri ree bejn laan zi'c nünbee reeman laan yan abi' achutri guidxga' xguialrniabee dios Diana, bën rën ree bejn guidib niz Asia nē guidib loj guidxliuj.

²⁸ Chi biguejn reeman zian, bidxe'ch reeman abi' gurixdiaj reeman rëb reeman:

—jBën zojbloj naj Diana, xdios ree bën Éfeso!

²⁹ Abi' gurixdiaj ree bën guiedx guin wajs reeman, gunaaz reeman tio'p ree bën Macedonia, Gayo nē Aristarco, bën rzanë ree Pab. Dxel guxoobyuj reeman laa reeman, binë reeman laa reeman lod rajc xgabilt ree bën guiedx. ³⁰ Guyën Pab niuman yagaj din ninieenëman bejn ree, per ad cwëjbt ree xcompniaraman, bën ma rililadx ree Jesucrist. ³¹ Nētëë loj ree guxtis Asia guin no'ch bëlzi ree xmiw Pab, laa reeman guxhaal ruson lojman guial mejorli ad chu'man ni. ³² Zianz gurixdiaj ree bën guin rëb reeman ni rent ni ren, been reeman nadxeb abi' zien reeman ni'quid ragbeet par xhie bado'p reeman yagaj. ³³ Dxel galay ben zien guin babëë ree bën Israel tijb xcompniar reeman bën la Lejandr din guinieenëman bën guin ree. Dxel beenman sen loj ree bën guin din yacwëëz ro' reeman din guinieeman por ree bën Israel delant loj ree bën guiedx guin. ³⁴ Per chi gogbee reeman guial najman bën Israel, tiblazujzi gurixdiaj reeman cost tio'p hor, rëb reeman:

—jBën zojbloj naj Diana, xdios ree bën Éfeso!

³⁵ Dxel chi been squiarban luguiedx guin gan bacwëëz ro' reeman, dxel rëbaman:

—Bën Éfeso, gra bénguidxliuj ragbee guial luguiedx guie zianczi rnijaj ree bejn xyadoo dios Diana abi' rën tēë ree bejn dios Diana bjajb xanyabaa. ³⁶ Lëjt ragbee guial laan naj ni diidxli, zeel ad rayalt güüнди zian, ad gontzi güüнди xhienin sin xgab. ³⁷ Din bën bidnëdi achet ni mal been reeman yadoo guin, ad wanee tēët reeman diidxguijdx dux dios ree. ³⁸ Bal Demetrio con ree xcompniaraman bën rüjnnëman dxiin rajp reeman wadijl con ree ben ren, laa roylay naj, laa ree guxtis yu', ni che reeman chitawquia reeman. ³⁹ Per bal xhieri mazri rëndi, chi gac xgabilt bën guiedx dxel gacan reglad. ⁴⁰ Yan, por ni ma gojc, nadxeb na gobiarn guial dunuj ree caylu' ree bejn diidx din güün reeman wadijl guin, ¿abi' xhieza yaguie'ch ree loj reeman bal guiniabdiidx reeman duloj ree xcwent ree ni cayajc?

⁴¹ Chi gulox rëbaman zian, dxel bare'ch reeman.

20

Wej Pab Macedonia në Grecia

¹ Chi babedxe ree bën Éfeso, gurejdx Pab bën rliladx ree Jesucrist persi bagu'man luxdoo reeman. Dxelri bazaadiidxnëman laa reeman abi' zëman niz Macedonia. ² Bitixlojman bën rliladx ree Jesucrist guidib niz ni, dád bagu'man luxdoo reeman con xtiidxaman, dxelri bidxinman Grecia ³ lod guzuman choon bëëw. Ma niuman loj barcw din niejman Siria, chi gogbeeman guial nuyën ree bën Israel nünj reeman laaman xhienin. Dxel mejorli beenman xgab bayejcaman niz Macedonia. ⁴ Binëman Sópater, bën Berea, xi'ngaan Pirro, në Aristarco con Segundo, bën Tesalónica ree, nëtëë Gayo, bën Derbe, con Timoteo, në Tíquico con Trófimo, bën niz Asia ree. ⁵ Gra reeman guned abi' gulëjz reeman Pab con naj Lujc guiedx Troas. ⁶ Guiáad dunujn chi gudëd lanij ni raw ree bën Israel guiadxtil ni ad yu't levadur, dxel badxu'n loj barcw badxoon Filipos, abi' ni goc gaay dxej badxinan guiedx Troas lod za' reeman. Ni badxu'n gajdx dxej.

Basban Pab Eutico

⁷ Chi bidxin chidumingw, badxajg du lasa'n din yadaawan guiadxtil tijbzi, abi' guial mal been Pab xgab guial yareguiaal griiman, chi bidxin garol guiaal sta caneenëman bejn ree, ⁸ guiáad lënü ladya lod rado'pan dád zien ree guij re'c. ⁹ Tijb xinguiag zojb ro' ventan lax Eutico. Guial xchej da't guneenë Pab laa reeman, dxel xt garej gunaaz bacaal xin guin, abi' gudidya'x diizd yu bayon guin xt luyuj, ma güjtix chi bales reeman laax. ¹⁰ Dxel biguiajt Pab lod naga'x, bazuxibaman abi' gudiidxaman laax, dxel rëbaman loj reeman:

—Ad rdxebidi, nabanquix.

¹¹ Dxel bayë'p Pab zatijb, gula'man guiadxtil abi' gudaw reeman, dxel basnuu guneenëman laa reeman xt bareguiaal. Chi bareguiaal bayunejzaman ziaman. ¹² Abi' xin gudidya' ro' ventan guin, nabanx zignë reeman laax, dxel dád nix yu' luxdoo reeman.

Wej Pab Mileto

¹³ Dxel dunujn badxu'n loj barcw baneedan bio'n par luguiedx Asón, lod baya'nan diidx yaca'n Pab, din beenman xgab niej guia'man ni. ¹⁴ Chi badxajg du lasa'n con laaman luguiedx Asón, dxel badxu'në'n laaman loj barcw bio'n lod la Mitilene. ¹⁵ Ni badxoon, chi bareguiaal badüüdan niz lod la Quío. Chi bareguiaal stijb badxinan lod la Samos. Dxel chi bareguiaal stijb badxinan Mileto, per chi gad yagaj guidxin badxu'dxen lod la Trogilio. ¹⁶ Been Pab xgab ad zejtaman Éfeso, ad guyëntaman niaglaaman niz Asia guial nuyënman diob nadxinman Jerusalén, din xixgabaman naj guial bal zajc yadxinman lanij Pentecostés.

Bazaadiidxnë Pab bejn ree Mileto

¹⁷ Chi nadxu'n Mileto, gunabee Pab bi't ree bën rniabee loj ree bën rliladx Jesucrist, bën zojb ree Éfeso. ¹⁸ Chi bidxin reeman dxel rëbaman loj reeman:

—Diizd dxej yaloy ni bialan niz Asia xt yan, lëjt ragbee xhienaag cayünan. ¹⁹ Loj guidib tiamp ni za'në'n lëjt cayünan sirv Jesucrist con pasens, majsi xt ronan abi' gra loj guialzi ma gudëëdan por ni rën ree bën Israel güünnë reeman naj. ²⁰ Per majsi zian ad bacwëëzt rnin lojdi ni naj

ni zagdxe par lëjt, tant delant loj ree bejn në lidxidi balün lëjt. ²¹ Abi' zi'c ree bën Israel në ree bën ad najt bën Israel, ma rën loj reeman din yayüjn reeman xgab por xtol reeman yadxi' tëë loj reeman loj Dios chililadx tëë reeman Dad Jesucrist. ²² Yan ma yaya'n Jerusalén lod caxhaal xSprijt Dios naj, ad ragbeetan xhie cabëz naj ni. ²³ Tijbzi ni ragbeen naj guial guidib lod ran rugojn xSprijt Dios naj guial ladxguuib në zro' da't guialzi naj ni cabëz naj. ²⁴ Per par naj achet güünan por zian, majsi guiëtan per con nix yu' luxdon cayünan ni rayal günan xt lod gactizan, gün tëën mandad ni banee Dad Jesús naj guial gatiechan xtiidxza'caman xhienaag rën Dios dunuj ree.

²⁵ 'Yan naj ragbee guial ni'qui tijbidi bën ma ben diidx loj xhienaag naj xguialrniabee Dios, ad zuguaatrudi naj. ²⁶ Zeel ganin lojdi yan guial ad achetri dol ra'pan bal id nabandi xnejz. ²⁷ Din ma bagojnan lëjt gra xhienaag naj xixgab Dios achetcki baquiechan. ²⁸ Yan, gol gojp lëjt gajc, gol gojp tëë ree bën rliladx Jesucrist, bën ma banee xSprijt Dios lojdi din guiniadi laa reeman zi'c tijb bën rajp xiil ree, din Jesucrist con xrejnman ma gudijxaman por xtol reeman. ²⁹ Naj ragbee guial chi yazaan gui't ree ben ren zi'c gajczi rtie'ch cuyojt xiil ree, zian naj xixgab reeman güünë reeman bën rliladx ree Jesucrist. ³⁰ Loj gajquidi grii ree bën guluü ganax ni rusquiee, din güün reeman gan güüncwent ree bën rliladx Jesucrist xtiidx reeman luar güüncwent reeman xtiidx Dios. ³¹ Zeel gol guzujsin, gol gojp cudad, gol basaaladx, loj choon ijz ad bacwëëzt gunenë'n lëjt xt ronan banen lëjt consejw.

³² 'Yan, compniar raliduladx ree Jesucrist, gusa'nan lëjt con Dios con xtiidxza'caman. Laan rajp guialrniabee par gagnën lëjt, din gusnuu gagbeedi xhienaag rënman guibandi gunee tëëman lojdi ni ma rëbaman gudëëdaman loj ree bën ma naj xbejnman. ³³ Achut xmilia achu tëët xab rzëëbladxan. ³⁴ Lëjt ragbee zagdxe guial con quijb yan benan dxiin persi gudawnë'n bën guzu ree con naj. ³⁵ Abi' balün lëjt guial zian rayal güün bejn dxiin din güünman yudar bën ryaadx ree xhienin. Gol basaaladx xtiidx Dad Jesús chi rëbaman: "Mazri nix yu' luxdoo bën razaladx guial loj bën rtia'."

³⁶ Chi gulox rëb Pab zian, dxel bazuxibaman gurejdx gunabaman Dios con gra reeman. ³⁷ Gra reeman biin, gudiidx reeman Pab abi' gudaw reeman laaman xid. ³⁸ Dád guyunaya reeman por ni rëbaman loj reeman guial ad zuguaatri reeman laaman. Dxel biglu'nejz reeman laaman xt lod za' barcw.

21

Wej Pab Jerusalén

¹ Ni basa'nan laa reeman, abi' badxu'n loj barcw bio'n tibli niz Cos, yuj riga' loj nijsdoo. Chi bareguiaal badxinan niz Rodas nëgajcan riga' loj nijsdoo, abi' ni badxoon bio'n guiedx Pátara. ² Ni badxaaglojn tijb barcw ni ma che niz Fenicia zianz badxu'n lojn. ³ Chi zio'n dxel duxlad ruvejsan baguiaan lod la Chipre, basnuu bio'n niz Siria. Abi' guial naj lat barcw guin luguiedx Tiro dxel badxu'n luguiedx guin. ⁴ Ni badxaaglojn bën rliladx ree Jesucrist abi' badxu'në'n laa reeman gajdx dxej. Bën guin ree por xSprijt Dios rëb reeman loj Pab guial ad bal cheman Jerusalén. ⁵ Per chi baza' gajdx dxej guin, dxel badxoon luguiedx guin, dxel gra reeman con xbégunaa reeman con xi'n reeman, biglu'nejz reeman dunujn xt

ro' nijsdoo. Ro' nijs guin badxu'xiban barejdx banaaban Dios. ⁶ Dxel bazaadiidxnë'n laa reeman abi' badxë'pan loj barcw guiáad laa reeman zia lidx reeman.

⁷ Chi badxoon luguiedx Tiro bio'n luguiedx Tolemaida, ni gulox dux viajn loj barcw, bio' tēen bugneenë'n bēn zobj ree ni, bēn rliladx ree Jesucrist abi' baya'nan con laa reeman tib dxej. ⁸ Chi bareguiaal, dunujn con Pab badxoon Tolemaida bio'n Cesarea lod bio'n lidx Felip, bēn rtie'ch xtiidx Jesucrist. Felip guin naj tijb ree bēn gajdx cwabee din qui's reeman ni rayal tia' ree bēnprob abi' baya'nan lidxaman. ⁹ Yu' tajp xi'ndxa'paman biixtijb ree abi' laa reem rudēēd xtiidx Dios loj ree bejn. ¹⁰ Ma gojc zien dxej nadxu'n lidx Felip, chi bi't tijb bēn la Agabo nēgajcaman rudēēd xtiidx Dios loj ree bejn, zēēdaman niz Judea. ¹¹ Chi bi'taman cwa'man xcinch Pab guxhii guia' gajcaman con yaaman, abi' naman:

—XSprijt Dios na guial Jerusalén ze guixhii ree bēn Israel bēn naj xcinch ni guie, abi' yayü reeman laaman loj ree bēn ad najt bēn Israel.

¹² Chi baguiejnan zian, dunujn con ree bēn rliladx Jesucrist luguiedx guin baguieenan naguiejn loj Pab ad cheman Jerusalén. ¹³ Per badxi'man laan, naman:

—¿Chexc zeel roondi abi' rgu' nayadi naj? Par naj achet güünan majsi guixiin o majsi guiētan Jerusalén por Dad Jesús.

¹⁴ Chi bayagbeen guial ad zaguieentan gan yadxoonan laaman chitēē cheman, achetri baguie'chan lojman, tijbzi ni raguie'chan lojman:

—Gac zi'c rniabee Dios.

¹⁵ Chi gudēd ree dxej guin dxel baguieenan purvinid bio'n Jerusalén. ¹⁶ Bunë'n bēlzi ree bēn Cesarea rliladx ree Jesucrist, laa reeman binē dunujn lod baya'nan lidx tijb bēn Chipre, ma gojc xchej rliladxaman Jesucrist, laman Mnasón.

Bignaj Pab Jacob

¹⁷ Abi' ree bēn Jerusalén rliladx Jesucrist dád nix guyu luxdoo reeman baca' reeman dunujn. ¹⁸ Chi bareguiaal bunë'n Pab bugnajn Jacob, ni riga' gra ree bēn rniabee loj ree bēn rliladx Jesucrist. ¹⁹ Chi gulox bagajp-diozan laa reeman, dxel bagojn Pab laa reeman tijb gaj ni beenman por xguialrniabee Dios delant loj ree bēn ad najt bēn Israel. ²⁰ Chi biguiejn reeman zian, baza't reeman Dios zagdx, zianz rēb reeman loj Pab:

—Lüj ragbee guial entr loj ree bēn Israel zien da't reeman ma bililadx Jesucrist, abi' gra reeman rēb guial rüjn naguiejn güün bejn zi'c rniabee xley Moisejs. ²¹ Ma biguiejn tēē reeman guial lüj culüü bēn Israel ree, bēn ad zobjt ree loj nacion Israel guial ad züjncwentt reeman xley Moisejs, rēb tēēl loj reeman guial ad rüjnt naguiejn chu' xi'n reeman sen ru ree bēn Israel ad zinal tēēt reeman dux costumbr ree. ²² Yan, ¿xhienaag gac? Laa reeman guchajczi lasa' reeman chi gagbee reeman guial ma bi'til. ²³ Zeel mejorli güünl ze: Yu' tajp ree xin no'ch du lojn xin rayal ree güün cumplid ni cwēb reex loj Dios. ²⁴ Binē reex, gol been zi'c rēb loj ley din gaquidi naya, gudijx tēē por laa reex din gac ya guijc reex. Zian gagbee gra bejn guial rüjnquil zi'c rniabee ley, guial ad wali tēēt ni biguiejn reeman xcwentil. ²⁵ Abi' por ree bēn ad najt bēn Israel, bēn ma bililadx ree Jesucrist, ma baxhaalan tijb gui'ch loj reeman zi'c baguieenan xgab guial ad rayalt chu' reeman xgab por xley Moisejs. Per ad rayalt gaw reeman ni rbej loj ni naj ree xdios reeman, ad gaw tēē reeman rejn ni'qui bēēl rberejn, ad sunē tēē reeman ben ren bēn ad najt lacheel reeman.

Gunaaz ree b́en Israel Pab

²⁶ Dxel biné Pab guidap ree b́en guin, abi' chi bareguiaal been reeman zi'c rniabee ley par gac reeman naya. Dxel guyu reeman lén yadooro' Jerusalén din gugojn reeman goc yayaalój dxej güün reeman zi'c rniabee ley, dxej rayal chiné tijb gaj reeman tijb be guiét zi'c tijb gon par Dios.

²⁷ Chi ma yayaalój gajdx dxej ni naj güün reeman zi'c rniabee ley, yu' ree b́en Israel zééd niz Asia, baguiaa reeman Pab lén yadooro' Jerusalén abi' gurixdiaj reeman wajs reeman, gunaaz reeman laaman, ²⁸ rēb reeman:

—¡B́en Israel, gol been yudar! Xin guie naj xin ziza gra lad caneeguidxix b́en Israel ree nē dux yadoo ree, rēb tēex loj ree bejn guial ad güün reeman zi'c rniabee dux ley ree. Abi' ad tijbtzi laan, nē ma badxe'x b́en ad najt ree b́en Israel lén dux yadoo ree ni naj ni nada par dunuj ree ma beenx laan zi'c tijb luar ad rüjnt sirv.

²⁹ Rēb reeman zian guial baguiaa reeman Pab zizaman ni con tijb b́en Éfeso b́en la Tróximo, zeel gunaladx reeman biné Pab laaman lén yadooro' Jerusalén.

³⁰ Dxel been reeman nadxeb guidib luguiedx guin, ruxüün ree bejn bidxin reeman. Abi' gunaaz reeman Pab, guxoobyuj reeman laaman babēē reeman laaman lén yadoo guin laa basiaaw gajc reeman port guin ree. ³¹ Za mer nugüjt reeman laaman, chi bidxin ruson guin loj suldad rniabee ree suldad guial gra ree b́en Jerusalén cayüjn nadxeb. ³² Laa bato'p gajc suldad rniabee guin xsuldadix nē za tio'p choon ree suldad rniabee, baxüün reex wej reex lod riga' ree b́en guin. Chi baguiaa ree b́en guin bidxin suldad rniabee guin con ree xsuldadix, dxel bacwēēz gudijn reeman Pab. ³³ Dxel gubig suldad rniabee guin, gunaazix Pab gunabeex guxhii reex laaman con tio'p caden. Abi' gunabdiidix chu laaman xhie tēē beenman. ³⁴ Per gurixdiaj reeman rēb reeman garent garen, guial rbixdiaj da't reeman achet gojc niagbeex, dxel gunabeex bignē reex Pab lod yu' ree suldad. ³⁵ Chi bidxin reex loj ree scliar lod yu' ree suldad guin, gulejn reex Pab guial dád nadoxh rüjn ree b́en zien nal laa reex, ³⁶ abi' gra reeman rbixdiaj, rēb reeman:

—¡Gol bagüjtix!

Gunee Pab loj ree bejn

³⁷ Chi ma chu'nē reex Pab lod yu' ree suldad guin, gunabdiidxaman loj suldad rniabee guin, rēbaman:

—¿Zajc ganenē'n lüj ya?

Badxi' suldad guinan rēbix:

—¿Rajc rnieel diidx grieg ya? ³⁸ ¿Nid lüj naj xin Egipto guzu contr gobiarn ya, abi' laa bigxüün gajquil niz loj yujbidx con tajp mil ree xbejn, b́en bagüjt ree bejn?

³⁹ Dxel rēb Pab lojx:

—B́en Israel naj. Goolan luguiedx Tarso tijb ree guiedx zobjloj ni riga' niz Cilicia. Baneesii mod ganenē'n b́en guie ree.

⁴⁰ Dxel cwējb suldad guin, abi' guzuli Pab loj ree scliar guin beenman sen loj ree b́en guin con yaaman din yacwēēz ro' reeman. Chi bacwēēz reeman, dxel guneenēman laa reeman diidx hebreo, rēbaman:

22

¹—Lējt bengol nē los demazridi, gol bacaagdiajg ni ganin por naj.

² Chi bigueijn reeman caneenëman laa reeman diidx hebreo, mazri bacwëez reeman. Abi' basnuuman rëbaman loj reeman:

³ —Bén Israel naj. Goolan luguedx Tarso tijb guiedx riga' niz Cilicia, per Jerusalén guie guni'san. Abi' mextr Gamaliel balüü naj gra zi'c naj xley dux Bén gulal ree. Guiáad naj guidib luxdon benan xgab güünan sirv Dios zi'cgajc lëjt yan. ⁴ Dxel guzunaalan Bén rlladx ree Jesucrist, xt bagüjtan laa reeman abi' zi'c ree béngunaa zi'c ree xinguaaaw gunaazan badxe'n ladxguiib. ⁵ Bixhioz mazri zojbloj rniabee graczi ree bixhioz në gra ree guxtis Israel ragbee guial najn ni wali. Din laa reeman banee tijb gui'ch par gulün loj du lasa' Bén Israel ree, Bén zojb ree luguedx Damasco din chile' yaguilan Bén rlladx ree Jesucrist luguedx guin, ganaaz tëen laa reeman guidnë'n laa reeman Jerusalén din téd reeman casti.

Be Pab diidx xhienaag bililadxaman Jesucrist
(Hch. 9:1-19; 26:12-18)

⁶ Per chi za'n lunejz par Damasco, chi ma cadxinan ni cost garol dxej, dxejczy brieri tijb guij xanyabaa balaan bacha' guidibczy lod cazaan, ⁷ abi' breeyujn. Dxel bigueijnan cha' Bén na: “Saulo, Saulo, ¿chexquiza zeel rzunalil naj?” ⁸ Abi' gunabdiidxan rën: “¿Chu lüj Dad?” badxi'man laan naman: “Naj naj Jesús, Bén Nazaret, Bén rzunalil.” ⁹ Bén zinë' reen baguiaa reeman bacha' guin abi' bidxeb reeman, per ad bignia't reeman ni na cha' Bén gunee naj. ¹⁰ Dxel gunabdiidxan rën: “¿Xhie rayal günan Dad?” Abi' na Dad Jesucrist lon: “Bixche, basnuu xnejzil wej Damasco. Ni na reeman gra ni rayal güünl.” ¹¹ Abi' guial bascajy bacha' guin lon, dxel Bén zinë' reen gunaaz reeman yan, binë reeman naj luguedx Damasco.

¹² Ni zojb tijb Bén la Ananías, rüjnman cumplid gra zi'c rniabee xley Moisejs. Abi' gra ree Bén Israel zojb luguedx Damasco nünbee laaman guial nabanman xnejz. ¹³ Ananías guin bidganaj naj, chi bi'taman naman lon: “Saulo, ma zajc yaguaal stijb.” Loj hor guin gajc baguian stijb abi' baguian laaman. ¹⁴ Dxel naman lon: “XDios dux béngulal ree ma bacaabee lüj din gagbeel xhie rënman güünl, abi' guguaal Jesucrist guien tëel cha'man, Bén rüjn zi'c rayal. ¹⁵ Din chigneel xtiidxaman loj gra ree bénguidxliuj, gü tëel diidx loj reeman ni baguiaal ni bigueijn tëel. ¹⁶ Yan, ad rbëzil mazri, guzuli gurobnijs tëe gurejdx gaj Dad Jesucrist din chisüdaman xtolil.”

Be Pab diidx xhienaag wejman loj ree Bén ad najt Bén Israel

¹⁷ Chi baguialan Jerusalén, wan lën yadooro' persi guredx gunaaban Dios, abi' guza'can zi'c rulüü cane'xhchalan. ¹⁸ Baguian Dad Jesús naman: “Baquiejn. Cari barii Jerusalén, din ad züjncwëntt reeman ni guiëbil por naj.” ¹⁹ Abi' rën lojman: “Dad, laa reeman ragbee guial naj wa gra lën ree yadoo gunaazan Bén rlladx ree lüj, badxe'n laa reeman ladxguiib gudin tëen laa reeman. ²⁰ Në chi bagüjt reeman Esteban, Bén gunee xtiidxil, laagajc naj za' ni rën zagdxe naj guiëtaman abi' xt gunan xab ree Bén bagüjt laaman.” ²¹ Per na Dad Jesús lon: “Wej, naj gaxhal lüj zijt loj ree Bén ad najt Bén Israel.”

Badxe' reeman Pab lod yu' ree suldad

²² Xt quintzi naga'loj bacaagdiajg reeman ni rëb Pab dxel guzuloj gurixdiaj reeman rëb reeman:

—¡Ad rayalt guiban xin guin! ¡Gol bagüjtix!

²³ Abi' guial cabixdiajz cabixdiaj reeman, ruzaal xab reeman niz ladia ruzaal tēē reeman yuj niz ladia. ²⁴ Dxel gunabee suldad rniabee guin cu' reeman Pab lod yu' ree suldad abi' gunabeex qui'n reex laaman din yaneero'man chexc zeel rbixdiaj ree bēn guin zian contr laaman. ²⁵ Per chi guxhii reex Pab din quin reex laaman, rēbaman loj tijb ree suldad rniabee za' ni:

—¿Zajc quindi tijb bēn Rom ya, chi gadidi gagbee xhie beenman?

²⁶ Chi bigueijn suldad rniabee guin zian, dxel bicojnx suldad rniabee ree suldad guin, rēbix lojx:

—Gojp cudad ni güünnēl xin guin, din xin Roman.

²⁷ Dxel wej suldad rniabee guin lod za' Pab, abi' gunabdiidxix lojman rēbix:

—¿Walin ya xin Rom lüj?

Badxi' Paban rēbaman:

—Walican.

²⁸ Abi' rēb suldad rniabee guin lojman:

—Naj zro' milia gudixan par gacan xin Rom.

Abi' badxi' Paban rēbaman:

—Per naj diizd goolan najn bēn Rom.

²⁹ Chi bigueijn ree suldad niguin Pab, guial bēn Rom najman, laa bisüd gajc reex. Xt nē suldad rniabee guin bidxeb chi gogbeex guial ben Rom naj Pab guial gunabeex guxhii reex laaman.

Bazuj reeman Pab loj ree guxtis

³⁰ Chi bareguiaa, guyēn suldad rniabee guin niagbeecheawix chexc zeel za' ree bēn Israel contr Pab. Abi' baxhiequix Pab, dxel gunabeex bado'p ree bixhioz rniabee ree bixhioz nē ree guxtis. Abi' babēēx Pab bazujx laaman loj gra reeman.

23

¹ Baguiaa Pab loj ree guxtis guin, abi' rēbaman:

—Compniar Israel, loj guidib ni nabanen xt yan, achet naladxan delant loj Dios din naj ragbee xhienaag nabanen.

² Dxel Ananías, bixhioz mazri zobjloj rniabee graczi ree bixhioz, gunabeeman bēn za' ree gajxh cwē' Pab din ca'p reeman ro'man. ³ Per badxi' Paban rēbaman loj bixhioz guin:

—¿Ziangajc ca'p Dios ro'l, bēn rusquiee! ¿Id zobjil yagaj ya par güünl guialguxtis zi'c rniabee ley? Abi' ¿chexquiza zeel rüjnl zi'c ad rniabeet ley, rniabeel ca'p reeman ro'n?

⁴ Abi' ree bēn za' yagaj rēb reeman lojman:

—¿Zian rusaglojl xbixhioz zobjloj Dios ya?

⁵ Dxel rēb Pab:

—Gol been perdon, ad gogbeetan guial laaman naj bixhioz mazri zobjloj. Din loj xtiidx Dios rēb: “Ad gusaglojl bēn rniabee ladxil.”

⁶ Chi gogbee Pab guial garol reeman naj bēnsaducew za garol reeman naj bēnfarisew, dxel guneeaman rejs rēbaman:

—Naj naj bēnfarisew, xi'n bēnfarisew naj. Abi' guial rliladxan yaban ree bengüt zeel za' ree bejn contr naj.

⁷ Chi rēbaman zian, guzuloj cadildiidx ree bēnfarisew con ree bēnsaducew abi' gojc reeman tio'p lala'. ⁸ Din bēnsaducew ree ad rliladxt reeman guial yaban ree bengüt, ad rliladx tēēt reeman guial yu' ree anjl nē ree sprijt, per ree bēnfarisew rliladx reeman gra ree ni guin. ⁹ Abi' been reeman

naquie' yagaj. Dxel guzuli bëlzi ree bénfarisew naj mextr rulüü ley, rëb reeman:

—Achet ni mal wayüjn bén guie. Wed tijb sprijt o tijb anjl gunee laaman, gol gojp cudad ad niad contr Diosan nadxu' ree.

¹⁰ Chi baguiaa suldad rniabee guin mazri cadildiidx reeman, dxel bidxebix nuroox reeman Pab. Abi' gunabeex bi't ree suldad din yabëë reex laaman galay ree bén guin, chiné tëë reex laaman lod yu' ree suldad stijb.

¹¹ Chi gure guiaal stijb, balüüloj Jesucrist loj Pab, rëbaman lojman:

—Bagu' luxdool Pab, din zi'c guneel por naj luguiedx Jerusalén guie, ziangajc guinieel por naj luguiedx Rom.

Been reeman xgab gugüjt reeman Pab

¹² Chi bareguiaal, garol ree bén Israel baya'n reeman diidx din gugüjt reeman Pab, rëb tëë reeman guial achet gaw reeman achet tëët guië' reeman xt gugüjt reeman laaman. ¹³ Nadëd tiuu naj ree bén rëb zian. ¹⁴ Abi' wej reeman bigneenë reeman bixhioz ree bén rniabee ree bixhioz në ree xbgol ree bén Israel, rëb reeman loj reeman:

—Dunuyn ma raguie'ch guial achetdzi yadaawan xt chi ma bagüjtan Pab. ¹⁵ Yan lëjt con gra ree guxtis, gol gunab loj suldad rniabee guin din guidnëx laax lojdi guixie, con gol badxiib guijc guial rëndi gagbeechaaw-idi xhienaag naj xcwentix. Abi' dunuyn ma yadxu'sinan din yagüjtan laax chi gadix gui't guie.

¹⁶ Per xi'ngaan bizan Pab biguiejnx guial cayëb reeman zian, dxel wejx lod yu' ree suldad bicojnx Pab. ¹⁷ Zianz gunee Pab tijb ree suldad rniabee guin, rëbaman lojx:

—Binësii xin guie loj suldad rniabee din gudëëx tijb ruson lojman.

¹⁸ Binë xin suldad guin laax loj suldad rniabee guin, rëbix lojx:

—Pab, xin yu' ladxguuib guredx naj abi' gunabix guidnë'n xin guie lojl din guneex tijb ruson lojl.

¹⁹ Abi' suldad rniabee guin gunaazix yaa xin guin, binëx laax tibläd, gunabdiidxix lojx rëbix:

—¿Xhie rënl nal lon?

²⁰ Abi' rëb xin guin lojx:

—Bén Israel ree ma baya'n reeman diidx din guiniab reeman lojl guixie din chinël Pab loj ree guxtis, con gudxiib reeman guijc guial rën reeman gagbeechaaw reeman xhienaag naj xcwentaman. ²¹ Per ad bal chililadxil laa reeman, din nadëd tiuu naj ree bén cwëz laaman raguie'chloj reeman lunejz, abi' ma rëb reeman guial achet gaw reeman ache tëët guië' reeman xt gugüjt reeman laaman. Yan za'sin reeman cabëz reeman ni guiëbil.

²² Dxel rëb suldad guin loj xin guin:

—Baguiaj. Achu loj guiëbil ni ma nal lon.

Guxhaal reeman Pab loj gobernador Félix

²³ Dxel gunee suldad rniabee guin tio'p ree xsuldadix, abi' gunabeex laa reex din güün reex porvinid tio'p gayuu suldad che guia', në za gayojnchii ree suldad cwib way, zatio'p gayuu ree suldad tia' lans din che reex Cesarea raca gaa guxin. ²⁴ Abi' gunabee tëëx güün reex porvinid way cwib Pab, rëbix loj reex guial guinia reex Pab din guidxinman zagdx loj gobernador Félix. ²⁵ Abi' guxhaalnëx laa reex tijb gui'ch ni rëb:

²⁶ “Naj Claudio Lisias, rugajpdiozan lűj gobernador Félix, lűj guial najl bėn zobjloj. ²⁷ Bėn Israel ree gunaaz xin guie ma nugűjt reeman laax. Per chi gogbeen guial xin Roman, dxel wan con ree da suldadan buglėėn laax loj reeman. ²⁸ Abi' guial rėnan gagbeen xhie rűjnx zeel rdxe'ch reeman laax, dxel bazun laax loj ree guxtis Israel. ²⁹ Dxel gogbeen guial por xcwent xley reeman zeel rdxe'ch reeman laax, per ad najtan ni rayal guiėtix ni'qui guial chu'x ladxguuib. ³⁰ Nė guial ma gogbeen guial xixgab ree bėn Israel naj gugűjt reeman laax, zeel cayxhalan laax lojl. Abi' ma rėn loj ree bėn rdxe'ch laax guial con lűj gűın reeman reglad ni rajp reeman contr laax. Laanan rugojnan lűj.”

³¹ Been ree suldad guin zi'c gunabee suldad rniabee guin abi' guxhin binė reex Pab luguiedx Antıpatris. ³² Chi bareguiaal suldad zė ree guia' bayejc reex lod yu' ree suldad, guiáad ree suldad dxiib way zinė reex laaman luguiedx Cesarea. ³³ Chi bidxin reex Cesarea, badėėd reex gui'ch guin loj gobernador guin, bayű tėė reex Pab lojman. ³⁴ Chi gulox biil gobernador guin gui'ch guin, gunabdiidxaman loj Pab ban zaman. Dxel chi gogbeeman guial Cilicia zėėdaman, ³⁵ dxel rėbaman lojman:

—Chi gui't ree bėn za' ree contr lűj, dxel gucagdiagan ni nal.

Abi' gunabeeman gap reex Pab lėn xpalas Herodes.

24

Ni gunee Pab loj gobernador Félix

¹ Chi goc gaay dxej, Ananías, bixhioz mazri zobjloj rniabee graczi ree bixhioz, bidxinman Cesarea con tio'p choon ree guxtis Israel nė tijb licenciad laman Tértulo. Abi' wej reeman loj gobernador guin din cwe'c reeman xguialquia Pab. ² Chi bidxinnė reex Pab, guzuloj Tértulo caneeman contr laaman, rėbaman loj gobernador guin:

—Quixtėė lűj dad gobernador, por lűj nadxu'dxen, nė por xguialrajquil zien ree ni rűjn sirv cayajc du ladxan. ³ Gra ladczi za' ree bejn conform por gra ni cayűjn dad gobernador Félix, lűj naj bėn zobjloj, quixtėėczi lűj. ⁴ Per chitėė gűnlaan lűj mazri, rniababan lojl din gucaagdiaguil ni yanan lojl tibrajtoczi. ⁵ Dunujn bayagbeen xin guie naj zi'c tijb guialguijdx loj ree bėn Israel, guidibczi guidxliuj zizax rustijlix laa reeman abi' laax rniabee loj tib cwaa ree bėn rniee reeman nazaren. ⁶ Abi' guyėn tėėx nűjnx dux yadooro'n zi'c tijb luar ad rűjnt sirv, zeel banaazan laax bayėnan naguieenan guialguxtis zi'c naj dux leyan. ⁷ Per laa bi't gajc suldad Lisias con ree xsuldadix, babėėxuu reex laax du lojn. ⁸ Abi' rėb suldad rniabee guin guial lojl gui't ree bėn rbe'c xguialquia Pab, yan lűj gajc zajc guiniabdiidx lojx din gagbeel zagdxo guial walican ni ranan xcwentix.

⁹ Abi' ree bėn Israel za' ni rėb reeman guial waliqui gra ni guin. ¹⁰ Dxel been gobernador guin sen loj Pab din guinieeman, abi' rėb Pab:

—Guial ragbeen diizd gocli rniabeel nacion Israel, zeel ad yu'nawėėgtan yadxi'n ni rudxiib reeman guican. ¹¹ Abi' lűj gajc zajc cwe'quil ruson din gagbeel guial qui gojcri chiptio'p dxej badxinan Jerusalėn din ganajchi'n Dios. ¹² Abi' achut banaaznė reeman naj cadildiidxnė'n, ni'qui guial gabėn wadijl lėn yadooro' Jerusalėn, ni'qui lėn yadoo ren ree ni yu' ree ni, ni'qui luguiedx guin. ¹³ Bėn guie ree ad zajc na reeman lojl guial ni diidxli naj ni rudxiib reeman guican. ¹⁴ Per ni naj diidxli naj guial riladxan Jesucrist, nejzcűb guin naj ni zinaalan,

cayünan sirv loj xDios dux béngulalan, abi' na ree bén guie guial ad xnejzt Diosan, per cayünan zian guial rliadaxan gra ni zëed loj ley në ni bacaa ree bén badëed xtiidx Dios loj ree bejn. ¹⁵ Abi' zi'cgajc rliadax ree bén guie Dios, ziangajc rliadaxan laaman guial yaban ree bengüt stijb, zi'c ree bén goc benza'c në ree bén goc benmal. ¹⁶ Zeel rünan naguiejn gabajnan zagdxe chitëe xhie ganaladaxan delant loj Dios ni'qui delant loj ree bejn.

¹⁷ 'Ma gojc zien ijz nariin, xt yan baye'c ladaxan bidganë'n ni baxhaal ree bejn par ree bénprob, bidganë' tëen gon ni rayal gudëdan loj Dios. ¹⁸ Laan naj ni cayünan lën yadooro' Jerusalén chi bi't ree bén Israel za niz Asia baguiaa reeman naj, per mal benan zi'c rniabee ley din gacan naya. Abi' ad zient bejn riga', ad cabë tëetan wadijl. ¹⁹ Yan, bén gunaaz ree naj, laa reeman naj bén rayal su guie din na reeman xhie rünan xhie pornin rdxe'ch reeman naj. ²⁰ O balguiza, bén za' ree guie na reeman xhie da dolan badxejl reeman chi guzun loj gra ree guxtis Israel. ²¹ Tijbzi ni benan chi za'n galay reeman gurixdiajn rën: "Guial rliadaxan yaban ree bengüt, zeel za' ree bejn contr naj yan."

²² Chi biguiejn gobernador Félix zian, abi' guial ragbeeman xhienaag naj xnejz cüb Jesucrist, dxel basa'nman guialquia guin par stijb dxej, rëbaman loj reeman:

—Chi gui't suldad Lisias, dxel gagbeen zagdxe xhienaag naj xcwentidi.

²³ Dxel gunabee gobernador guin tijb ree suldad rniabee guin din gusnuu guinia reex Pab, per guslaa reex güünman ni rënman ad gudxoon tëe reex chignaj ree xmiwaman laaman.

²⁴ Chi goc tio'p choon dxej, bidxin gobernador Félix stijb con lacheelaman Drusila, laaman naj bén Israel. Dxel gunabee gobernador guin bidxin Pab, abi' bacaagdiajg reeman ni rëbaman xcwent guialrliadax bejn Jesucrist. ²⁵ Per chi guzuloj cayëbaman guial rayal guiban ree bejn xnejz, gucwëez tëe xixgab mal reeman, guial guidxin tëe dxej yadëed ree bejn cwent loj Dios, dxel dád bidxeb gobernador guin abi' rëbaman loj Pab:

—Baguiaj. Ganetan lüj chi chu'n luar stijb.

²⁶ Per Félix në milian rbëzaman gudëed Pab lojman din guslaaman laaman, zeel gurejdxaman laaman zien volt din guinieenëman laaman. ²⁷ Zian gudëd tio'p ijz abi' barii Félix guial gobernador, dxel bayu Porcio Festo xluaraman. Abi' guial guyën Félix naya'nman zagdxe loj ree bén Israel, zeel basa'nman Pab ladxguuib.

25

Gunee Pab loj Festo

¹ Chi goc choon dxej ni bidxin Festo Cesarea par chu'man guial gobernador, dxel wejman Jerusalén. ² Yagaj, bixhioz rniabee ree bixhioz con ree bén Israel mazri zojbloj, wej reeman lojman bile'c reeman xguialquia Pab, ³ abi' gunab reeman lojman din guixhiaalaman Pab Jerusalén. Zian guyën reeman din xixgab reeman naj gugüjt reeman Pab runejz. ⁴ Per badxi' Festo xtiidx reeman rëbaman guial Cesarea nayaaw Pab guiáad laaman nayob yaguiajman ni, ⁵ abi' rëbaman loj reeman:

—Bén rajp ree guialrniabee lojdi, laa reeman sa Cesarea, abi' bal xhie ni mal been xin guin, ni na reeman xhienin beenx.

⁶ Cost xhujn o chii dxej guzuj Festo Jerusalén, dxelri ziaman Cesarea. Chi bareguiaal, gurej loj xyagxhிலaman lod rniabeeman, abi' gunabeeman chica' reex Pab. ⁷ Chi bidxinnë reex laaman, bén Israel

guza ree Jerusalén, gubig reeman abi' zien ree niguijdx badxiib reeman guijcaman, majsi ni'qui tijb ni rëb reeman ad gojct nulüü reeman guial najn ni wali. ⁸ Dxel badxi' Pab xtiidx reeman, rëbaman:

—Naj, achet ni mal wayünan xley ree bën Israel, ni'qui yadooro' Jerusalén, ni'qui rey César.

⁹ Per Festo guyënman naya'nman zagdxe loj ree bën Israel, dxel gunab-diidxaman loj Pab, rëbaman:

—¿Rënl ya chel Jerusalén? Ni yanajn bal rajpil dol o ad rajptil dol ya ni rudxiib reeman guijquil.

¹⁰ Badxi' Paban rëbaman:

—Loj ree guxtis Roman za'n, lod rayal gac reglad xhienin benan. Lüy ragbee zagdxe guial achet ni mal wayünan bën Israel ree. ¹¹ Bal xhie tijb ni mal benan ni rayal guiëtan, ad zabexuutan guiëtan. Per bal id wali ni na reeman benan, achut rajp derejch yayü naj loj reeman. Zagdxeli naj gadëdan loj rey César.

¹² Dxel chi gulox guneenë Festo bën naj ree xbejnman, bën rëb ree ni rayal gac, rëbaman loj Pab:

—Lüy na tädil loj rey César, yan lojman tädil.

Za' Pab loj rey Agripa

¹³ Chi gudëd tio'p choon dxej, rey Agripa con xbéngunaaman Berenice bidxin reeman Cesarea bitixloj reeman gobernador Festo. ¹⁴ Abi' guial zien dxej da't guzuj reeman ni, dxel be Festo diidx loj rey Agripa xcwent Pab, rëbaman:

—Guie yu' tijb xin basa'n Félix ladxguiib. ¹⁵ Chi wan Jerusalén, bixhioz rniabee ree bixhioz con ree bën rniabee loj ree bën Israel gule'c reeman xguialquiix, gunab reeman ganabeen guiëtix. ¹⁶ Per naj rën loj reeman guial guxtis Rom ree ad najt xcostumbr reeman nabee reeman guiët tijb bejn chi gadaman su loj ree bën cabe'c xguialquiiman din guiëbaman walin ya o ad walitan ni rudxiib reeman guijcaman. ¹⁷ Zeel chi bi't ree bën Israel guin guie, achet guial niaglaan, bareguiaal gajc gure loj da yagxhilar, abi' gunabeen bidnë reex xin guin. ¹⁸ Per ree bën bi't gule'c xguialquiix, achet ni nadxeb na reeman zi'c gunaladxan ninia reeman por laax. ¹⁹ Tijbzi xguialquiix ni gule'c reeman naj por xcostumbr reeman në por tijb bën la Jesús, bën ma güjt, per Pab rëb naban Jesús guin. ²⁰ Abi' guial ad ragbeetan xhie günan por zian, dxel gunabdiidxan loj Pab bal rën chex Jerusalén din gac reglad ni guin ree ni. ²¹ Per laax gunab täd loj rey César din gac reglad ni rëb reeman por laax, zeel gunabeen yaawsiix xt chile' yaxhalan laax loj rey César.

²² Dxel rëb rey Agripa loj Festo:

—Bal zian chile'n, nëgajc naj rën gucagdiag laax.

Abi' badxi' Festo laan rëbaman:

—Guixie gucaagdiaguil laax.

²³ Chi bareguiaal, däd zagdxe ca' xab rey Agripa con Berenice bidxin reeman con ree bën rniabee suldad con los demazri ree bën zobjloj luguedx guin, bidxin reeman guyu reeman lënü lod gucaagdiag reeman ni guiëb Pab. Dxel gunabee Festo bica' reex Pab. ²⁴ Abi' rëb Festo:

—Rey Agripa në los demazridi dad za'nëdi dunujn guie. Bën ruguiaadi guie, gra bën Israel, zi'c Jerusalén zi'cgajc guie ma bi't reeman bidganaj reeman naj rniab reeman guiëtix. ²⁵ Naj, achet xfaltix radxejlan guial rayal guiëtix. Guiáad laax gunab täd loj César Augusto lod gac reglad

xcwentix, abi' ma benan xgab yaxhalan laax. ²⁶ Per ad radxejlta ni gucan por laax loj gui'ch ni gaxhalan loj rey César, bèn rniabee naj. Zeel nuzun laax lojdi zi'c naj quijb lojl rey Agripa, din chi ma gulox gunabdiidxidi ni rayal guiniabdiidxidi lojx dxel ma yu' ni gucan por laax. ²⁷ Din naj rulüü ad xnejzt naj yaxhalan tijb bèn yu' ladxguiib loj rey César abi' ad zétan xhie beenman.

26

Ni gunee Pab loj rey Agripa

¹ Dxel rëb rey Agripa loj Pab:

—Ma zajc guinieel por lüj.

Abi' gules yaa Pab guzuloj rëbaman:

²—Dád nix yu' luxdon guial bile' za'n lojl yan rey Agripa, par ganen lojl yadxi' tēen gra ni rudxiib ree bèn Israel guican. ³ Din lüj ragbee zagdxe gra xcostumbr ree bèn Israel, nē conin rüjn persi rdildiidx reeman. Zeel rniaaban lojl gapil pasens gucaagdiajguil ni ganin.

Zi'c guban Pab gocli

⁴ Gra ree bèn Israel ragbee xhienaag gubajnan con laa reeman zi'c ladxan zi'c Jerusalén, diizd xindoon. ⁵ Ragbee tēe reeman abi' zajc na reeman laan bal rēn reeman, guial diizd xindoon najn bēnfarisew, abi' ree bēnfarisew naj bèn mazri zinal xley ree bèn Israel. ⁶ Abi' yan za'n guie, badēd reeman naj loj ree guxtis guial rliladxan yasban Dios bengüt ree zi'c beenman promeys loj ree dux bēngulal ree. ⁷ Gra guidxiptio'p cwa' ree bèn Israel cabēz dxej güün Dios zian, zeel rēn reeman laaman rüjn tēe reeman sirv lojman dxej guiaal. Abi' yan guial rliladxan laan zeel rbe'c ree bèn Israel da guialquian, rey Agripa. ⁸ ¿O naladxidi ya nawēeg yasban Dios bengüt ree?

Be Pab diidx xhienaag guzunalaman bèn rliladx ree Jesucrist

⁹ Guia'xchej benan xgab rayal günan xhienin bèn rliladx ree Jesús, bèn Nazaret, ¹⁰ abi' zian benan Jerusalén. Con xtiidx ree bixhioz rniabee ree bixhioz, zian ree bèn rliladx Jesucrist badxe'n ladxguiib. Abi' chi rugüjt reeman laa reeman, nē naj rē guiëtri reeman. ¹¹ Zien volt benan laa reeman xhienin din günan naguiejn gusa'n reeman guialrliladx reeman Jesucrist. Zian benan lēn gra ree yadoo, abi' guial tant rdxe'chan laa reeman dxel guzunaalan laa reeman xt luguiedx ren ree.

Be Pab diidx stijb xhienaag bililadxaman Jesucrist

(Hch. 9:1-19; 22:6-16)

¹² Abi' par zian za'n Damasco, con quijb xtiidx ree bixhioz rniabee ree bixhioz. ¹³ Per ganin lüj rey Agripa, lunejz baguian tijb xbacha' xanyabaa zi'c garol dxej, per mazri naynin guial loj ni rusni gubijdx, abi' basnin guidib lod za'n con ree bèn zin'é'n. ¹⁴ Abi' dugraczan bareeyuj, dxel biguiejnan cha' bèn gunee naj con diidx hebreo, naman: “Saulo, Saulo, ¿chexc zeel rzunalil naj? Lüj gajc rguuil xguialnaal zi'c go'n rudxegua' loj yag rulaagnē reeman laab.” ¹⁵ Dxel rēn: “¿Chu lüj Dad?” Badxi'man laan naman: “Naj naj Jesús bèn rzunalil. ¹⁶ Per bixche, guzuli, din balülon lojl par güünl naj sirv gü tēel diidx ni baguiaal yan nē ni gulün lojl. ¹⁷ Naj gaxhal lüj loj ree bèn Israel nē loj ree bèn ad najt bèn Israel, abi' naj gagnē' lüj chitēe xhie güün reeman lüj. ¹⁸ Gaxhalan lüj loj reeman din guixhialil loj reeman gusa'n reeman nejz mal, chinal reeman nejz

zagdxe. Ad tiëbri reeman nabee xindxab laa reeman, chinal tëë reeman xnejz Dios. Abi' chililadx reeman naj din gac xtol reeman perdon yayal tëë reeman ni rayal gra ree xbejn Dios, bën ma naya ree delant lojman.”

Bazoob Pab diidx ni balüüloj lojman

¹⁹ 'Zian gojc, rey Agripa, bazoban diidx benan ni na Jesucrist lon chi guneeman naj diidx xanyabaa. ²⁰ Yaloj luguiedx Damasco gutiechan xtiidxaman, dxelri Jerusalén në guidib niz Judea në loj ree bën ad najt bën Israel. Rën loj reeman din yayüjn reeman xgab por xtol reeman, yadxi' loj reeman loj Dios güün tëë reeman ni rayal güün reeman din guiguien guial ma bidxaa mod naban reeman. ²¹ Abi' por zian, gunaaaz ree bën Israel naj lën yadooro' Jerusalén, guyën reeman nugüjt reeman naj. ²² Per con xyudar Dios laa naj guie xt yan cusnuu cayün xtiidxaman loj gra ree bejn, zi'c ree bën zojbloj zi'c ree bën ad zojblojt. Abi' gra ni rën loj reeman naj ganax ni bacaa ree bën badëë xtiidx Dios loj ree bejn në ni bacaa Moisejs xhienaag naj ni gac, ²³ guial Cristo naj guial tédaman guialzi, guiëtaman. Per chi ma güjtaman yaloj laaman naj bën yaban loj ree bengüt, abi' gugojnman bën Israel ree në ree bën ad najt bën Israel xhienaag gap reeman perdon.

Nuyën Pab nililadx Agripa Jesucrist

²⁴ Chi cayëb Pab zian, dxel guidixa' Festo rëbaman:

—¡Rajcguijquil Pab! guial tant rusiidil ma rajc guijquil.

²⁵ Per badxi' Pab laan rëbaman:

—Ad guictan rajc, gobernador Festo. Ni canin najn xnejz në diidxli.

²⁶ Laa rey Agripa za' guie, laaman ragbee ni canin, zeel sin guialrdxeb canen delant lojman. Naj ragbee chaaw guial laaman ragbee gra ni canin, din ad canitan ni goc ralan lod achut zajc gagbee laan. ²⁷ ¿Rliladxil ni rëb ree bën badëëd xtiidx Dios loj ree bejn ya, rey Agripa? Naj ragbee guial rliladxil.

²⁸ Dxel badxi' rey Agripa laan rëbaman:

—Sta'nczi nüjnl naj gan nililadxan Jesús.

²⁹ Abi' rëb Pab:

—Majsi sta'nz o majsi ryaadxri, na Dios guial ad tijbtzi lüj, në gra ree bën cucaagdiajg ni canin yan, guidxin dxej chililadxidi Jesús zi'c naj, majsi ad nët ree caden guie.

³⁰ Dxel bisu rey Agripa con gobernador Festo con Berenice në gra ree bën zojbnë laa reeman ni. ³¹ Chi bariica reeman tiblad guzuloj cayünë lasa' reeman diidx, rëb reeman:

—Achet wayüjn xin guie ni rayal guiëtix, o chu'x ladxguiib.

³² Dxel rëb rey Agripa loj Festo:

—Zile' naslaa reex, balidix niniab tédix loj rey César.

27

Baxhaal reeman Pab Rom

¹ Chi rëb reeman ma yaxhaal reeman dunujn Italia, dxel bayü reeman Pab con sta'n ree bën yu' ladxguiib loj tijb suldad rniabee la Julio, laax rniabee tib cwaa ree suldad la Augusto. ² Abi' Cesarea badxu'n loj tijb xbarcw ree bën Adramitio, barcw ni ma grii chen guiedx riga' ree niz Asia. Në Aristarco bunë'n, bën Tesalónica, guiedx riga' niz Macedonia. ³ Chi bareguiaal, badxinan Sidón, lod goc Julio xinza'c da't con Pab, cwëjbix bitixloj ree xmiw Pab luguiedx guin abi' badëëd reeman

ni ryaadxaman. ⁴ Chi badxoon Sidón badiaawan Chipre yuj riga' loj nijsdoo, basa'nanan dux ladruvejsan chitëë yachaaglojn zro' bi, din niz du lojn rliaj bi guin. ⁵ Badüüdan loj nijsdoo gajxh Cilicia në Panfilia abi' badxinan Mira, tijb guiedx nulen Licia.

⁶ Ni bidxaagloj suldad rniabee guin tijb barcw Alejandría ni che Italia, zianz nax yadxu'n lojn. ⁷ Loj zien dxej bio'n chaawladx, con guidib tarbajw badxinan niz lod la Gnido. Abi' guial sta rliaj bi niz du lojn, dxel zagdxeli badüüdan niz Salmón, badiaawan lod la Creta yuj riga' loj nijsdoo. ⁸ Gadëd ro' yuj guin zio'n loj nijsdoo, per con guidib tarbajw, xt badxinan tijb luar la Buenos Puertos, gajxh niz lod naj guiedx la Lasea.

⁹ Abi' zi'ct ma bayaglaan, ma naj nadxeb yasnuu yo'n loj nijsdoo, din ma zidyob tiamp nayaag. Zeel gunee Pab, ¹⁰ rëbaman loj reeman:

—Dad, ad zagdxet yo' ree bal yasnuu yo' ree, din nadxeb guize'n barcw guin abi' guire'ch gra ni yu' lojn loj nijs guin, xt në dunuj ree nadxeb yayëjt ree.

¹¹ Per suldad rniabee guin mazri beencwentix bën rusa barcw guin në bën naj xbarcw laan, guial loj ni rëb Pab. ¹² Abi' guial ad zagdxe tëët naj yagaj par yadüüdan tiamp nayaag, dxel mazri zien reeman been xgab zagdxeli naj yariin yagaj, yaguieenan naguiejn yadxinan Fenice, tijb guiedx nulen Creta lod ad rbi' tëët bi, ni yadüüdan tiamp nayaag.

Gubi' tijb bidoxh loj nijsdoo

¹³ Dxel guzuloj cabi' tijb bi chaawladx ni zëed lad sur, abi' gunaladx reeman ma bile' zi'c naj xixgab reeman, zeel bariin bio'n loj nijsdoo gadëd ro' yuj Creta. ¹⁴ Per ad wayajct xchej zio'n chi birii tijb bidoxh la Euroclidón loj nijs guin. ¹⁵ Abi' guzuloj bi guin culadxaan barcw guin. Në guial niz du lojn zëed bi guin dxel ad gojctri nusnuu barcw guin niejn niz lod royal niejn, abi' baslaa reeman binë barcw guin dunujn niz lod cucadxaa bi guin laan. ¹⁶ Dxel badüüdan xijch tijb yujdobëz la Claudia riga'n loj nijs, lod ad rbi'tri bidoxh guin, abi' canu naxii xan barcw guin con guidib tarbajw balë'panan loj barcw guin. ¹⁷ Dxel chi gulox balë'pan canu guin loj barcw guin, batiejl reeman duu lad barcw guin chitëë yaze'nan. Abi' guial rdxeb reeman chëëztiej barcw guin lën üx la Sirte, dxel gulet reeman xlon ree barcw guin din cwentzi chinë barcw guin dunujn niz lod rucadxaa bi guin laan. ¹⁸ Chi bareguiaal, ziangajc rbi' bidoxh loj nijs guin, zianz guzuloj cuzaal reeman ni nüü barcw guin loj nijs guin. ¹⁹ Ni bayon dxej, cwa' reeman gra ree ni rüjnnë barcw guin dxiin bazaal reeman loj nijs guin. ²⁰ Zien dxej ad biguient gubijdx ni'qui ree bajl xanyabaa por bidoxh gubi' loj nijs guin, dxel dunujn ad naguieentri du luxdoon yalaan loj nijs guin.

²¹ Abi' guial ma gojc zien dxej ni achetctzi wadaawan, dxel guzuli Pab galay reeman, rëbaman:

—Dad, zagdxeli nucaagdiajguidi da diidxan ad nariit ree Creta, zian ad nadüüdt ree tarbajw guie achet tëët nasëëb ree. ²² Per achet güünan, ad rdxebidi din ni'qui tijbidi ad zëjtt, tijbzi barcw guin yaze'n. ²³ Din Dios rniabee naj, bën cayünan sirv guxhaal tijb xi anjlaman balüüloj lon yan guiaal. ²⁴ Abi' na anjl guin lon: “Pab, ad rdxebil, din royal sul loj rey César, abi' por lüj ni'qui tijb ree bën zëed loj barcw guie ad zuslaat Dios guiët reeman.” ²⁵ Zeel yan dad, gol badxe' luxdoodi zagdxe, din naj riladxan

Dios, ragbee tëën zagdxe guial gac zi'c na anjl guin lon. ²⁶ Per gag barcw guie niz ro' tijb yuj riga' loj nijsdoo.

²⁷ Chi goc chiin gubijdx ni zio'n loj nijs guin, guxhinzii badxinan niz loj nijsdoo la Adriatico, niz ni niz guie zè barcw guin loj nijs guin por bi guin. Abi' ree bèn nulen barcw guin, guxhinzii zi'ct garol guiaal gogbee reeman guial zamer yadxinan loj yuj. ²⁸ Dxel bare'xh reeman plact naxhit nijs guin, najn zi'ctiubitib mejtr naxhit. Mazri delant bare'xh reeman laan zatijb ma najn gajlbiadx mejtr naxhit. ²⁹ Abi' bidxeb reeman laro' barcw guin guiaj ree, dxel niz xijch barcw guin bazaal reeman tajp ganch guuib loj nijs guin din chile' sudxe barcw guin, abi' ma rën nejzdoo reeman yareguiaal. ³⁰ Bèn nulen ree barcw guin, been reeman bèn sta cuzaal ree ganch guuib guin loj nijs guin niz loj barcw guin, naabzi par calet reeman canu chu' reeman par guxüün reeman. ³¹ Per bagojn Pab suldad rniabee con ree xsuldadix, rëbaman loj reex:

—Bal id ree bèn guin yaya'n loj barcw guie, ad zalaatridi.

³² Dxel batüüg ree suldad guin ni naxii canu guin persi zinë nijs canu guin. ³³ Chi ma cayni luyuj, rëb Pab loj reeman din gaw reeman, rëbaman loj reeman:

—Ma gojc chiin gubijdx ni ad raayëjstidi achet tëët wayawidi. ³⁴ Naj rni lëjt, gol gudaw din guibandi, din gradi ni'qui tijb guidxguijquidi ad zusëëbtidi.

³⁵ Chi rëb Pab zian, cwa'man tijb guiadxtil, abi' badëëman quixtëë loj Dios niz loj gra reeman, dxel gula'man guiadxtil guin guzuloj cayawaman. ³⁶ Dxel bayu luxdoo gra reeman, guzuloj nëgajc laa reeman cayaw. ³⁷ Tio'pgayuu gayojnchiibixho'p nayajc dugran zio'pan loj barcw guin. ³⁸ Chi gulox gudaw reeman xt bixienladx reeman, dxel bazaal reeman trigo loj nijs guin persi bacha barcw guin.

Bize'n barcw loj nijsdoo

³⁹ Chi bareguiaal, bèn nulen ree barcw guin, ad bayünbeet reeman yuj badxin reeman. Per baguiaa reeman tibda'n nijsdoo guin riga' üx gadëed ro'n, abi' been reeman xgab badxig reeman barcw guin yagaj. ⁴⁰ Dxel batüüg reeman ni naxiinë ree ganch guuib guin ni rüjn yudar par sudxe barcw guin loj nijs, basa'n reeman ganch guin ree loj nijs guin, abi' baxhiee reeman yag ni rüjn yudar par sa barcw guin din suloj san. Dxel gules reeman lon ni naj niz lucwaj barcw guin din guiniaazan bi, zianz guzuloj cayriica barcw guin niz ro' nijs guin. ⁴¹ Per wëëztiejn loj üx zien lod bigagan. Niz guijcan wëëz lën üx abi' ni'quid rniibtan, guiáad niz xan guin guzuloj cayze'n nan con gojl rliaj nijs guin ladan. ⁴² Dxel nuyën ree suldad guin nugüjt reex bèn prejs guin ree, chitëë nixoojnijs reeman abi' nuxüün reeman. ⁴³ Per suldad rniabee guin ad cwëjbtix niajc zian guial ad rëntix niëjt Pab, dxel gunabeex guial bèn rajc rxoobnijs ree, yaløj laa reeman chu' loj nijs guin güün reeman naguiejn yarii reeman ro' nijs guin. ⁴⁴ Dxelri ma guidnal gra reeman loj ree tabl o loj ree yag ni baze'n barcw guin. Zian balaan, dugran badxin ro' nijs guin.

28

Bidxin Pab Malta

¹ Chi gulox barii dugran lon nijs guin, dxel bayagbeen yuj lod badxinan lan Malta riga'n galay nijs. ² Bèn naj ree bèn ni, dád benza'c gojc reeman con dunujn. Been reeman tijb bajl guial nayaag nëtëë guial cayal guia,

abi' na reeman du lojn din yubiigan cwë' bajl guin. ³ Dxel bato'p Pab ta'n yagbidx, zianz chi cudxe'man laan loj bajl guin briyaal tijb bëel lën yag guin por xi xliaa bajl guin, abi' gudawya'b yaa Pab nalbëztib yaaman. ⁴ Chi baguiaa ree bën Malta guin nalbëz bëel guin yaa Pab, dxel rëb loj lasa' reeman:

—Xin guie bejn bagüjtix, zeel majsi gulaax loj nijsdoo, per guiëtczix por ni beenx.

⁵ Per gudxijp yaa Pab abi' biajb bëel guin loj bajl guin, guiáad laaman achet gocaman. ⁶ Gra reeman cabëz saaguuj yaaman, o dxejlczi yabaman guiëtamán. Per chi gojc xchej, chi baguiaa reeman achet gocaman, bachaa xixgab reeman abi' guzuloj rëb reeman guial tijb dios najman.

⁷ Gajxh lod badxu'n naga' ree xguidxliuj tijb bën zojbloj loj yuj riga' loj nijs guin, laman Publio. Naman du lojn yo'n lidxaman, ni badxu'n choon dxej, dád benza'c tēë gojcaman con dunujn. ⁸ Nadxel naga' xdadaman, ragxuuman, yu'man xliaa rajc tēëman yobrej. Abi' guyu Pab lod naga'man, zianz chi gulox gurejdx gunabaman Dios por laaman, dxel guxhoob yaaman guijcaman abi' bayajcaman. ⁹ Chi gogbee ree bënragxuun zojb ni ni goc, bi't reeman lod za' Pab persi bayüjnman laa reeman. ¹⁰ Dxel dád zien ni bazaladx reeman du lojn por zian. Abi' chi badxu'n loj barcw par yadxoon yagaj, banee reeman gra ni rayaadxan luejz.

Bidxin Pab Rom

¹¹ Choon bëëw badxu'n loj yuj zii, dxelri badxu'n loj tijb barcw Alejandría, ni bitëd ni tiamp nayaag. Niz lucwaj barcw guin ca tio'p ree dxan bën la ree Cástor në Pólux. ¹² Dxel badxinan tijb guiedx la Siracusa, yagaj badxu'n choon dxej. ¹³ Abi' yagaj badxoon bio'n gadëd ro' nijsdoo xt badxinan guiedx la Regio. Chi bareguiaal, chi badxoon yagaj, brii tijb bi lad sur dxel ni barojp dxej badxinan luguiedx la Puteoli. ¹⁴ Yagaj badxaagan tio'p choon ree bën naj ree bën ni në reeman rililadx Jesucrist, dxel na reeman du lojn yaya'nnë'n laa reeman abi' baya'nnë'n laa reeman toxman. Zian gojc, dxelri zio'n Rom. ¹⁵ Guiáad ree dux compniaran bën rililadx ree Jesucrist, bën zojb ree Rom, ma ragbee reeman guial yadxinan yagaj. Dxel brii reeman bidgachaagloj reeman dunujn xt lod la Foro de Apio në luguiedx la Tres Tabernas. Chi baguiaa Pab laa reeman, babaaman abi' badëëman quixtëë loj Dios. ¹⁶ Chi badxinan Rom, dxel bayü suldad rniabee guin bën prejs guin ree loj tijb ree suldad rniabee ni. Per cwëjb reeman gurej Pab stijb yu ren lod gojp tijb suldad laaman.

Gunee Pab xtiidx Jesucrist Rom

¹⁷ Chi goc choon dxej badxinan Rom, gurejdx Pab bën Israel zojbloj ree ni. Chi badxajg lasa' reeman, dxel rëbaman loj reeman:

—Compniar Israel, achet wayünan contr ree bën Israel ni'qui contr xcostumbr ree dux bëngulal ree. Guiáad laa reeman gunaaz reeman naj Jerusalén, bayü reeman naj loj ree guxtis Rom. ¹⁸ Abi' ree bën Rom guin chi gulox badëdan cwent loj reeman, dxel nuyën reeman nuslaa reeman naj, guial gogbee reeman achet benan par guiëtan. ¹⁹ Per ree bën Israel guin badxoon reeman abi' zagdxeli gunaaban gadëëdan loj rey César, per ad guial ra'ptan xhienin contr ree bën Israel. ²⁰ Zeel guredxan léjt, din guidganajdi naj din ganin lojdi guial por ni rililadxan guial yaban ree

bengüt zi'cgajc rililadx gra ree du lasa' bén Israel ree, zeel naxiin con ree caden guie.

²¹ Dxel rëb reeman lojman:

—Dunujn ni'qui tijb xtiidx ree bén Judea ad waca'tan lod na reeman xcwëntil, në ni'qui tijb bén duladx ree bén raza ree Judea achet wana reeman du lojn contr lüj. ²² Per rayënan yaguiejnan xhienaag naj xixgabibil, din dunujn rayagbee guial gra ladczi rniee reeman contr religion cüb guin.

²³ Dxel bazuj reeman tijb dxej ni yadxajg lasa' reeman. Chi bidxin dxej guin, dád zien bejn bido'p lod zojb Pab. Abi' diizd rsil xt wadxe guneenëman laa reeman xhienaag naj xguialrniabee Dios. Beenman nagueijn chililadx reeman Jesús, baza't tëëman lod rniee xcwënt Jesús loj xlibr ley Moisejs në ni bacaa ree bén badëë xtiidx Dios loj ree bejn. ²⁴ Yu' reeman bililadx ni rëb Pab, per yu' reeman ad bililadxt. ²⁵ Abi' guial ad rdxaggt gü reeman diidx, guzuloj bare'ch reeman. Dxel rëb Pab loj reeman:

—Waliqui ni rëb Isaías bén badëëd xtiidx Dios loj ree dux béngulal ree guial rëb xSprijt Dios:

²⁶ Wej, güjdx loj ree bén guin:

Majsi riguejn reeman, per achetczi chignia' reeman,
abi' majsi ruguiaa reeman, per rulüü ad ruguiaat reeman.

²⁷ Din been luxdoo reeman gojl,

abi' rüjn reeman zi'c rulüü ad ruguiaat reeman,
ad riguejn tëët reeman, chitëë guguiaa reeman,
abi' guien reeman chignia' tëë reeman.
Din ad rënt reeman gui't reeman con naj,
abi' günan laa reeman perdon.

²⁸ Zeel gol gogbee guial diizd yan, loj ree bén ad najt bén Israel guire'ch diidx xhienaag gap reeman xperdon Dios, abi' laa reeman zaliladx reeman diidx guin ree.

²⁹ Chi gulox rëb Pab zian, dxel zia ree bén Israel guin, cadildiidxnë lasa' reeman.

³⁰ Tio'p ijz gurej Pab ni, yu lod gudixaman. Ni rnieenëman gra ree bén rtixloj laaman. ³¹ Sin guialrdxeb rëbaman loj reeman xhienaag naj xguialrniabee Dios, abi' guneeman xtiidx Dad Jesucrist loj reeman sin guial chu nudxoon.

Gui'ch ni guxhaal San Pabl loj ree bén Rom rliladx Jesucrist

Rxhiaal San Pabl xtiidx Dios

¹ Naj Pab, cayünan sirv loj Jesucrist, Dios gule naj din gacan xi apóstol Jesucrist, din gatiechan xtiidxza'caman.

² Diizd gocli mal rëb Dios diidxza'c guin ree, ni zëed loj xtiidxaman zi'c bacaa ree bén badëe xtiidx Dios loj ree bejn, ³ diidx guin ree ruza't, dux Dad ree Jesucrist guial zi'c bi'taman loj guidxliuj zi'c bénguidxliuj, loj xdiaa rey Davi zaman. ⁴ Per por xSprijt Dios laaman naj Xi'n Dios guial babanman loj ree bengüt, abi' guidiblagaa rajpaman guialrniabee. ⁵ Abi' par yaza't reeman, zeel bacaabeeman naj din gacan apóstol din guidiblagaa guidxliuj chu' bén chililadx laaman, bén guzoob tëë xtiidxaman. ⁶ Abi' në lëjt ma nayab loj ree bén gule Dios din gaquidi xbejn Jesucrist.

⁷ Zeel caxhalan gui'ch guie lojdi bén rën ree Dios, bén zojb ree Rom, lëjt ma gulej Dios din gaquidi xbejnman. Dux Dad ree Dios në Dad Jesucrist güünle' lëjt yabe'cdxe tëë reeman luxdoodi.

Rën Pab cheman Rom

⁸ Yalojxgaj por Jesucrist rudën quixtëe loj Dios por gradi, guial guidibczi ruza't reeman lëjt xhienaag rliladxidi Jesucrist. ⁹ Abi' zi'c cayünan sirv loj Dios, guidib guic guidib ladxan catiechan xtiidxza'c Xi'nman Jesucrist, abi' laaman ragbee guial ad rucwëëzt rbedx rniaaban laaman por lëjt. ¹⁰ Ad rucwëëz tëët rbedx rniaaban Dios din guneeaman mod guidiganan lëjt, zi'c naj da xgaban diizd gocli. ¹¹ Din yu'czan gan guidiganan lëjt din gūnan lëjt yudar con xtiidx Dios din sudxi'chidi lojn. ¹² Din güün tëëdi naj yudar zian yaguieen du lasa' ree yudar loj guialrliladx ni raya'p ree, din chile' yalu' du luxdoo du lasa' ree.

¹³ Compniar raliduladx ree Jesucrist, rënan gagbeedi guial zien volti da't ma benan xgab guidiganan lëjt, din gacxhiey ree bén chililadx xtiidx Dios, zi'c ma gojc zien ree luar ni ma wan, per xt yan ad wayajct gan guidiganan lëjt. ¹⁴ Par naj naladxan da cwentan naj guial gulūn chutëëz benan xtiidx Dios, bal najman bén ciuda o najman bén guiedxdoo ya, bal rignia'man o ad rignia'taman. ¹⁵ Zeel rënnejzdoon guidiganan lëjt din gatiechan xtiidx Dios Rom.

Xguialrniabee xtiidxza'c Dios

¹⁶ Ad ratunë'tan xtiidxza'c Jesucrist. Din por diidxza'c guin ree zëed xguialrniabee Dios, din gra ree bén chililadx laan laa reeman loj dol, zi'c ree bén Israel zi'c ree bén ad najt bén Israel. ¹⁷ Din por xtiidxza'c Jesucrist ragbee ree bejn guial por guialrliladx reeman laaman ma naj reeman cwent sin dol: achet por stijb ni ren tijbzi por guialrliladx. Zian ca loj xtiidx Dios lod rëb: "Bén naban zi'c rën Dios, guidib tiamp ni nabanman rliladxaman laaman."

Dol ni rajp bejn

¹⁸ Dunuj ree rayagbee guial diizd xanyabaa zëed xcastiro' Dios par ree bén ad ridxga't laaman, bén ad rüjnt ree zi'c rayal, abi' zi'c naban reeman ruquie'ch reeman xtiidxli Dios. ¹⁹ Din ragbeechaaw reeman guial yu' Dios, abi' laagajcaman balüü bejn ree guial yu'caman. ²⁰ Majsi

ad ruguiaat bejn Dios, per diizd chi go'tchaaw guidxliuj raguiaa ree ni beenman, abi' por ni ma beenman rayagbee ree guial ad yu't dxej lox xguialrniabeeman abi' laa tëëman naj Dios. Zeel ad zajct xhie gudxiib bejn guiyc guial achet ragbeeman xcwent Dios. ²¹ Din majsi yu' ree bejn ragbee guial yu' Dios, per ad rajpt reeman laaman respejt zi'c rayal, ad rudëë tëët reeman quixtëë lojman, aal xgab ren ree rüjn reeman ni ad rüjnt sirv abi' gaz ragdxa reeman. ²² Rëb reeman guial rajc da't reeman abi' mazri na tont reeman. ²³ Din luar guiën reeman Dios ni ad yu't dxej guiët, rën reeman ni nit ree yu' dxej, rën reeman ni naj ree zi'c bejn, ni naj ree zi'c biguijn, zi'c ree be yu' tajp guia' në ree bëël.

²⁴ Zeel ma gulëëladx Dios laa reeman loj xixgab mal reeman, abi' rüjn reeman ni natu ree con ree ben ren. ²⁵ Luar chinal reeman xdiidxli Dios, zinal reeman ni rusquiee ree. Abi' rën reeman rajp tëë reeman respejt ni been Dios, luar guiën reeman laaman guial beenman laa reen, abi' laaman rayal gap ree bejn respejt zianczi. Amén.

²⁶ Zeel gulëëladx Dios laa reeman loj ree ni dxuudx rüjn reeman. Abi' zien ree béngunaa ad nabantri ree xnejz, rën lasa' béngunaa gajc reeman. ²⁷ Ziangajc zien ree xinguaaw ad nabantri xnejz, rën gajc lasa' xinguaaw reex, xinguaaw con xinguaaw rüjn reex ni dxuudx, ni natu. Abi' laagajc reex rguuil xcasti reex.

²⁸ Abi' guial ad ridxga't reeman Dios, zeel gulëëladx Dios laa reeman loj xixgab mal reeman, din güün reeman ganax ni ad rayalt güün reeman. ²⁹ Ganax ni ad rayalt güün reeman rüjn reeman, za'në reeman xinguaaw ren o béngunaa ren, zien ree ni mal rüjn reeman, rzëëbladx reeman gap reeman ni rajp ree ben ren. Dád nadëdloj reeman, rugüjt reeman bejn, rguuil reeman wadijl, rusquiee reeman bejn, ganaxczi ni mal yu'guiyc reeman abi' rbëë reeman xtiidxguijdx bejn. ³⁰ Rnieeguijdx tëë reeman bejn, ralen reeman Dios, ad rajpt reeman bejn respejt, rlies xvalor gajc reeman, rüjn reeman benro'. Abi' rbëëguiyc reeman ni mal ree, ad ruzoob tëët xtiidx xdad xnгаа reeman. ³¹ Dád nad reeman, ad rüjnt cumplid xtiidx reeman, ad rënt lasa' reeman, ad raya tëët lasa' reeman. ³² Ragbeechaaw reeman rëb Dios guial chi guiët ree bejn, dxel gra ree bén rüjn gra ree ni guin yayal casti. Per majsi zian, rusnuu gajc rüjn reeman ni mal guin ree abi' xt rabaa reeman chi rüjn ree ben ren zian.

2

Xguialguxtis Dios

¹ Zeel chutëëz lüj guial rëbil xhie casti rayal bejn, ad rajptil derejch guiëbil zian, din lüj gajc rayal casti guin guial cayüjnl zi'cgajc rüjn reeman. ² Per dunuj ree rayagbee guial Dios rüjn guialguxtis zi'c rayal, chi rudëëdaman casti bén rüjn ree ni mal guin. ³ Abi' lüj guial rëbil xhie casti rayal bejn abi' nëgajquiza lüj rüjn zi'c rüjn reeman, ad naladxil laal loj xcasti Dios. ⁴ Ad rëntil guialnaza'c Dios con lüj, ad rëntil guial rdaanman lüj rajp tëëman lüj pacens, ni'quid ragbeetil guial pacens guin rüjn lüj yudar din gapil tiamp par yayüjnl xgab por xtolil. ⁵ Per guial dád nadil, ad rëntil yayejuil loj Dios, zeel lüj gajc cayüjnxhie xtolil par dxej ni gudëëd Dios casti, dxej ni güünman guialguxtis zi'c rayal. ⁶ Par gudëëman ni rayal tijbgaj bejn bal gonin beenman. ⁷ Gudëëdaman guialnaban tiblayaa loj ree bén ad radxagt rüjn naguiejn guiban zagdxe guial rüjn reeman naguiejn yayal reeman guialnaza'c yu' xanyabaa, rüjn

tëe reeman naguiejn yaya'n reeman zagdxe loj Dios din gap reeman cuerp ni ad yu't dxej nit. ⁸ Per ree bén ad ruzoobt diidx, rdxe'ch Dios laa reeman abi' gudëëdaman laa reeman casti, din luar chinal reeman xtiidxliman, zinal reeman nejz mal. ⁹ Gra ree bén zinal nejz mal, naya sac reeman sagdiaj reeman, yaloj ree bén Israel dxel bén ad najt ree bén Israel. ¹⁰ Guiáad ree bén zë loj nejz zagdxe, guilies Dios xvalor reeman, yabaanëman laa reeman, yabe'cdxe tëëman luxdoo reeman, yaloj xgaj ree bén Israel dxelri bén ad najt ree bén Israel.

¹¹ Din Dios tiblojzi rüjnman guialguxtis con gra bejn. ¹² Gra ree bén cayüjn dol sin guial ad nünbeet reeman ley badëëd Dios loj Moisejs, tëd reeman casti sin ley guin. Guiáad ree bén cayüjn dol majsi ragbee reeman ley guin, laa reeman tëd casti zi'c rniabee ley guin. ¹³ Din ad guial guientzi bejn ley guin ma nayaman loj Dios, bén rüjn ree zi'c rniabee ley guin laa reeman naj bén naya loj Dios. ¹⁴ Per chi ad najt bejn bén Israel, abi' cayüjnman ni zagdxe sin guial güünbeeman ley guin, dxel ma cayüjnman zi'c rniabee ley guin majsi ad nünbeetaman laan, guialzi nünbeeman conin naj ni zagdxe con tëë nin naj ni mal, abi' guijc gajc reeman zëëd xley reeman. ¹⁵ Din zi'c naban reeman, rguien guial guijc reeman zëëd conin rayal güün reeman con tëë nin ad rayalt güün reeman luar gap reeman ley guin. Abi' laagajc reeman ragbee chi ma been reeman ni zagdxe o chi ma been reeman ni mal. ¹⁶ Zian gac chi güün Dios guialguxtis por gra ree ni naguie'ch ni rüjn bénguidxliuj. Abi' zi'c culün bejn ree guidibczi, laaman güün guialguxtis por Jesucrist.

Bén Israel ree në xley Moisejs

¹⁷ Yan, lüj guial najl bén Israel yu'guijquil guial rajquil ley badëë Dios loj Moisejs, abi' rüjnl nabë guial najl xbejn Dios, ¹⁸ rëbil guial ragbeel xhienaag rën Dios guibanl, abi' por xleyaman ragbeel conin naj zagdxe güünl. ¹⁹ Abi' naladxil zile' guzuxnejzil bén ad nünbeet ree ley guin në ree bén ad nünbeet xnejz Dios, ²⁰ naladxil zile' gulüül bén ad rajt ree në ree bén rajc ta'nzi, guial por ley guin ragbeel gra, ragbee tëël conin naj diidxli. ²¹ Per zi'c nabanl, ¿chexc zeel ad rulüüt lüj gajc luar gulüül ben ren? Din lüj rëb guial ad laa cwan bejn, abi', ¿chexquiza zeel rbanl? ²² Rëbil guial ad laa sunë bejn bén ad najt lacheelaman, abi' lüj, ¿chexquiza zeel rüjnl zian? Rëb tëël guial rdxe'chil ni naladx bejn naj dios, abi', ¿chexquiza zeel rbanl lën yadoo lod yu' ree Dios guin? ²³ Dád nabë rüjnl guial nünbeel ley, per rusa'nxtul Dios guial ad rüjntil ni rniabee ley guin. ²⁴ Ze'cli rëb loj xtiidx Dios: “Bén ad najt ree bén Israel rniee reeman Dios diidxguijdx por lëjt.”

²⁵ Diidxli rüjnqui sirv guial ru xcuerp bejn sen ni ru ree bén Israel, bal rüjnman zi'c rniabee xley Dios. Per bal id rüjnman zi'c rniabee ley guin, achet sirvan guial yu'man sen guin. ²⁶ Per bal tijb bén ad yu't sen guin nabanman zi'cgajc tijb bén rajc xley Dios majsi ad nünbeetaman laan, dxel ma nayabaman zi'c tijb bén yu' sen, majsi ad yu'taman sen guin. ²⁷ Bén rüjn zi'c naj xley Dios, majsi ad nünbeetaman ley ad yu' tëëtaman sen, gusa'nxtu'man lüj guial nünbeel ley guin yu' tëël sen guin, abi' ad rüjntil zi'c rniabee ley guin. ²⁸ Din ad guial rajlt bejn loj nacion Israel, ad guial yu' tëëtaman sen ni ru ree bén Israel ma najman bén Israel loj Dios, ²⁹ bén wali naj bén Israel loj Dios, guidib luxdooan zinalaman xnejz Dios, ad por guial yu'taman sen ru ree bén Israel, ad por xcostumb rëët reeman,

por guial naban reeman con xSprijt Dios. Abi' bén naban zian, Dios rlies xvaloraman sa'n ad bénguidxliujt.

3

¹ Zeel zanadi lon xhieczy gan naj bejn bén Israel o xhieczy gan chu'man sen ru ree bén Israel. ² Per naj gani lojdi guial gadxagayaa mod lasajc guial naj bejn bén Israel, din yalojxgaj loj ree bén Israel badëéd Dios xtiidxaman. ³ Yan ad naladxidi por guial yu' ree bén ad zinalt xnejz Dios, ad züntraman cumplid ni rëbaman din xo güün Dios ni rëbaman güünman con ree bén zinal xnejzaman. ⁴ Din laaman ad yu't dxej guchaa xtiidxaman, majsi gra bénguidxliuj naj bén rusquiee, per Dios ad nëtaman rusquiee, zi'c rëb tiblajt loj xtiidxaman lod rëb: Gra bejn güünbee lüj guial rüjn cumplid xtiidxil, abi' achet zajc gudxiib reeman guijquil.

⁵ (Per yu' bejn rüjn xgab) guial bal por dol ni cayguieen ree ruluü guial benza'c naj Dios, ¿chexquiza zeel najman benmal rudëédaman bejn casti? ⁶ Per naj rni lojdi guial ad najt Dios benmal, din bal najman benmal xoza güün xguialguxtisaman con bénguidxliuj.

⁷ Din bal yaguie'ch ree guial ad rucaagdiajgt xtiidx Dios, laan naj ni rüjn yudar xtiidxli Dios din gap bejn laaman mazri respejt, dxel ad zajctri guiëb Dios naj bejn béndol. ⁸ Abi' mazri ma yaguieen ree ni mal din gui't ni zagdx, zi'c rëb ree bejn culün bejn ree, per Dios gudëéd casti bén rëb ree zian.

Graczi bejn ma been dol

⁹ Zeel zi'c ma rnin por ree bén Israel, në por ree bén ad najt bén Israel, abi' ma ragbeedi guial ad zajct guiëbidi guial mazri benza'c naj ree bén Israel guial loj ree bén ad najt bén Israel, din tiblojzi nayajc ree béndol. ¹⁰ Zi'c ca tiblajt loj xtiidx Dios lod rëb:

Achutczí naj benza'c,
per ni'qui tijb bejn.

¹¹ Achutczí rignia'.

Achutczí raguuil Dios.

¹² Gra reeman ma basa'n xnejz Dios.

Gra reeman ma zinal nejz mal.

Achutczí cayüjn ni zagdx,
per ni'czi tijb bejn.

¹³ Zi'cgajczi tijb baa ni zojbyal,
zian ganax ni dxuudx ririi ro' reeman.
Ganax diidx rusquiee rniee reeman.

Abi' xtiidx reeman naj zi'c xvenen bëel.

¹⁴ Ganax diidx mal ririi ro' reeman,
diidxguijdx ni rüjnnaa lasa' reeman.

¹⁵ Za'sin reeman din gugüjt reeman bejn.

¹⁶ Bantëez guin zë reeman, rüjn reeman ni dxuudx ree.

Abi' rusagzi reeman bejn ree.

¹⁷ Ad nünbee tëët reeman xhienaag naj guialrbajn bejn zagdx.

¹⁸ Ad yu'guijct reeman guial rayal guidxeb reeman Dios.

¹⁹ Dunuj ree rayagbee guial gra ni zëéd loj xley Dios, naj par ree bén zinal ley guin, chitëé chu guiëb guial achut ragbee xhienin naj dol, laan naj par gagbee bejn guial najman béndol loj Dios. ²⁰ Din ad guial güünt

bejn gra ni rniabee ley guin ma nayaman loj Dios, ley guin rulüü din gagbee bejn guial najman béndol.

Por guialrliladx ma naya bejn loj Dios

²¹ Per yan Dios ma balüü dunuj ree tijb nejz guial xhienaag yayajc ree naya lojman. Ad guial yaguieentzi ree zi'c rniabee ley guin, por ley guin në por ni bacaa ree bén badëë xtiidx Dios loj ree bejn. ²² Rayagbee ree guial rüjn Dios bejn cwent zi'c bén ad yu't xtol por guialrliladxaman Jesucrist, din par Dios tiblojzi naj bejn. ²³ Din gra bejn ma been dol, achutzi naya niz loj Dios. ²⁴ Per guial najman benza'c, ma beenman perdon dux tol ree sin guial yadijx ree, ma nayajc ree perdon por Jesucrist, bén gudix por dux tol ree chi gütaman loj crüjz. ²⁵ Dios guxhaal Jesucrist, din por xrejman chu' perdon par bénguidxliuj. Abi' perdon guin naj par ree bén rliladx Jesucrist. Zian rguien guial graczi rüjn Dios xnejz, abi' bal guia'xchej ad beent xguialguxtisaman por dol ni been ree bejn, laan naj por pacens ni rajpaman con bejn, ²⁶ guial ma ragbeeman goc güün xguialguxtisaman. Zian rusnuu rulüüman guial graczi rüjnman xnejz, zeel rüjnman perdon xtol ree bén rliladx Jesucrist.

²⁷ Yan, ¿xhienaag yaguieen ree nabë? Achet yaguieennë' ree nabë, din ad guial yaguieent ree ley guin cumplid ma nayajc ree perdon, yayajc ree perdon por guial yaliduladx ree Jesucrist. ²⁸ Zeel rayagbee chaaw ree guial Dios rüjn perdon xtol ree bejn guial rliladx reeman Jesucrist, ad guial rüjnt bejn nagaiejn güünman gra ni rniabee ley guin.

²⁹ ¿Wen xDiosi ree bén Israel naj Dios ya, ad nët ree bén ad najt bén Israel naj xDios laaman ya? Naj rni lojdi guial Dios naj par gra bejn, ³⁰ din tijbzi Dios yu', laaman rüjn perdon xtol ree bén rliladx Jesucrist, yu'man o ad yu'taman sen ni rniabee ley chu' ree bén Israel. ³¹ Ad naladxidi cayguieen ree ley guin tiblax guial raliduladx ree Jesucrist, din ad ziantan, guial raliduladx ree laaman rguien guial nadxu'guijx ree ley guin.

4

Xguialrliladx Abraham

¹ Yan, ¿xhie zajc yaguie'ch ree xcwent dux béngulal ree Abraham? ² Bal niyab Abraham zi'c tijb bén gad güün dol por ree ni beenman, guyu mod nüjnman nabë loj ree bejn, per ad lojt Dios. ³ Din rëb loj xtiidx Dios: “Guial bililadx Abraham Dios, zeel been Dios laaman cwent zi'c tijb bén ad beent dol.” ⁴ Chi rüjn bejn dxiin, milia ni rajxaman ad ni razaladxt reeman, rtia'man laan por dxiin ni rüjnman. ⁵ Per guial gac bejn perdon loj Dios, ad zajct guiëb bejn guial rayalaman perdon guin por ni beenman, din achut naya loj Dios. Perdon guin zëëdan guial rliladx bejn Jesucrist, zeel rüjn Dios bejn cwent zi'c bén ad yu't xtol. ⁶ Zi'c gunee rey Davi guial xiquilbaa ree bén been Dios cwent sin dol sin guial güün reeman xhienin par yayal reeman perdon guin. ⁷ Rëbaman: Xiquilbaa ree bén been Dios perdon xtol, bén ma badxi'caman xtol.

⁸ Xiquilbaa ree bén ma been Dios cwent sin dol.

⁹ Ad gunee Davi diidx guie ree naabzi par bén yu' ree sen ni ru ree bén Israel, gunee man diidx guin ree par gra ree bejn. Din zi'c ma raguie'ch ree, Dios been Abraham cwent zi'c bén ad yu't xtol guial bililadxaman laaman. ¹⁰ Abi' chi biyabaman zi'c bén ad yu't xtol, ni'qui gadaman chu'

sen ni ru ree bèn Israel, chi gad Abraham chu' sen guin mal nünj Dios laaman cwent zi'c bèn ad yu't xtol. ¹¹ Chi biabaman zi'c bèn ad yu't xtol, dxel guyuman sen guin din sen guin naj guial ma nünj Dios laaman cwent zi'c bèn ad yu't xtol guial bililadxaman laaman. Zeel naj Abraham dad par ree bèn rliladx Dios, majsi ad yu't reeman sen ni ru ree bèn Israel, per por guialrliladx guin nünj Dios laa reeman cwent zi'c bèn ad yu't xtol. ¹² Naj tēē Abraham dad par ree bèn majsi yu' sen guin per rliladx reeman zi'c bililadx Abraham Dios diizd chi gadaman chu' sen guin.

Promejs ni been Dios loj Abraham

¹³ Chi been Dios promejs loj Abraham nē loj ree xdiaaman, guial gudēedaman guidib guidxliuj loj reeman zi'c tijb ni bayal reeman, ad beent Dios promejs guin loj Abraham guial beenman zi'c rniabee ley, beenman promejs guin guial bililadxaman laaman, zeel beenman laaman cwent zi'c tijb bèn ad yu't xtol. ¹⁴ Yan bal ganaxzi ree bèn zinal ley guin tia' ni gudēē Dios, achet cwent naj guialrliladx ree bejn laaman, ache tēēt cwent naj promejs ni been Dios loj Abraham. ¹⁵ Din ley guin najn par castizi, per lod ad yu't ley, ad yu't mod chu guiēb guial ad cayūjnt bejn ley guin cumplid.

¹⁶ Zeel chi been Dios promejs loj Abraham guial gudēedaman ni rēbaman par gra ree xdiaaman, beenman promejs guin lojman guial bililadx Abraham guin laaman, din guiguien guial najman benza'c abi' ad parzi ree bèn zinalt ley guin naj promejs guin, nēgajc par ree bèn rliladx Dios zi'c bililadx Abraham majsi ad rajpt reeman ley guin. Zeel naj Abraham dad par dugra ree. ¹⁷ Zi'c ca loj xtiidx Dios lod rēbaman loj Abraham: “Lūj gac dad par zien ree bēnguidxliuj.” Zian naj promejs ni been Dios loj Abraham, Dios bèn rusban ree bēngūt abi' rnieeman xcwent ree ni gad chu' loj guidxliuj guie zi'c rulūū ma yu' reen.

¹⁸ Majsi ragbeechaaw Abraham guial ad zajctaman famil, per chi rēb Dios lojman zian, bililadxaman ni rēb Dios, bililadxaman guial gac gra ni rēbaman lojman. Zianan zeel najman dad par gra ree bèn rliladx Dios zi'cgajc laaman. Zi'c rēb Dios lojman, chi rēbaman: “Zian gaquil famil, dād famil narooob gaquil.” ¹⁹ Cost tibgayuu ijz ma yu' Abraham nadxel, ragbeeman guial ma naj reeman bengol nē xbēngunaaman Sara guial chu' xi'n reeman, per ad guyunawēegtaman, bililadxaman ni rēb Dios lojman. ²⁰ Ad yu't dxej ad bililadxtaman ni rēb Dios. Diidxli bililadxaman laaman abi' rudēēman quixtēē lojman, ²¹ din guidiblagaa bililadxaman guial rajp Dios guialrniabee gūnman zi'c ma rēbaman. ²² Zeel been Dios cwent Abraham zi'c tijb bèn ad yu't xtol.

²³ Abi' lod rēb guial been Dios laaman cwent zi'c bèn ad yu't xtol guial bililadxaman laaman, ad tijbtzi Abraham ruza't yagaj, ²⁴ nēgajc dunuj ree din ma raliduladx ree Dios. Abi' nē dunuj ree ma nünjman cwent zi'c bèn ad yu't xtol, Dios bèn hasban Dad Jesucrist loj guialgūjt, ²⁵ Dad Jesucrist bèn gūt por dux tol ree, dxel babanman abi' por laaman ma naya ree loj Dios.

5

Chi ma naya bejn loj Dios

¹ Ma nünj Dios dunuj ree cwent zi'c bèn ad yu't xtol guial raliduladx ree laaman, zeel ma nadxu' ree zagdxe con laaman por xguialgūjt

Dad Jesucrist. ² Din guial raliduladx ree Jesucrist ma zajc yadxin ree loj Dios abi' nadxu'guijc ree ni ma beenman por dunuj ree, zeel dád nix yu' du luxdoo ree din ralëez ree yayal ree xanyabaa lod za'man. ³ Abi' ad ziantzi, në guial yu' du luxdoo ree zagdxe por guialrzagdiaj ni radüüd ree, din rayagbee ree por guialrzagdiaj guin yasiid ree yaya'p ree pasens. ⁴ Abi' por pacens guin yasiid ree yadaan ree ni gui'tzi, abi' guial yadaan ree ma zajc yadxin ree loj Dios. ⁵ Ni ralëez ree por Dios, ad zasa'nxtutan dunuj ree, din rayagbee ree guial rën da'taman dunuj ree por xSprijtaman bèn ma baneeman duloj ree.

⁶ Gocli babajn ree ad bile't naguieen ree xhienin din güün Dios dunuj ree perdon. Per chi bidxin dxej bi't Cristo güjtaman por dunuj ree nayajc ree bëndol. ⁷ Dunuj ree rayagbee guial nawëeg naj chu' bèn tiëb guiët por zatiyb bejn. Ni'czi por tijb bèn naban xnejz, o wed yu' bèn tiëb guiët por tijb benza'c da't. ⁸ Per Dios ma balüüman guial rënman dunuj ree, zeel güjt Jesucrist por dunuj ree majsi nayajc ree bëndol. ⁹ Per yan ma naya ree loj Dios por xguialgüjt Jesucrist, abi' ad ziantzi, në ad zayaltri ree xcasti Dios chi guidxin dxej. ¹⁰ Din chi ad bile't nadxin ree loj Dios, laaman guxhal nejz guin por xguialgüjt Xi'nman Jesucrist, diidxgui yan ad züjntaman dunuj ree perdon ya, guial ma nabajnnë' ree Jesucrist, bèn guxhal nejz par loj Dios. ¹¹ Abi' ad laatzan, në guial yu' du luxdoo ree nix radëed ree quixtëe loj Dios por Dad Jesucrist, din por laaman ma nadxu' ree zagdxe con Dios.

Adán në Cristo

¹² Por tijb xinguaiaaw guzuloj guyu dol loj guidxliuj, abi' por dol guin guzuloj guyu guialgüjt, gra ree bejn bayal guialgüjt guin guial been reeman dol. ¹³ Diizd chi gad ley ni badëed Dios loj Moisejs chu' mal yu' dol, per guial achet ley guyu nadxel, achut zajc guiëb guial cayüjn bejn dol. ¹⁴ Per majsi zian, bidxinczi dxej ni güt reeman, diizd xtiamp Adán xt xtiamp Moisejs, majsi ad beent reeman lasa' dol ni been Adán. Abi' tiampzii Adán gojc tijb sen par tijb bèn naj gui't.

¹⁵ Din garen naj dol ni been Adán guial loj perdon ni zëed por Dios. Por xtol tijb bejn guzuloj guyu guialgüjt par gra bejn, per por tijb bejn zëed xperdon Dios, abi' laaman naj Jesucrist. Por Jesucrist rüjn Dios dunuj ree perdon, abi' ni been Jesucrist naj ni mazri lasajc, në ni mazri zagdxe par zien ree bejn. ¹⁶ Din garen naj dol ni been Adán guial loj perdon ni runee Dios. Por tijb dol bi't xcasti Dios, per por Jesucrist ma zile' gac bejn perdon, majsi ma beenman zien dol. ¹⁷ Por dol ni been Adán bi't guialgüjt par gra ree bejn. Per por ni been Jesucrist bi't perdon par gra ree bèn rliladx guial por Cristo ma naj bejn naya guidiblagaa loj Dios, abi' gap reeman guialnaban tiblyaa con laaman.

¹⁸ Abi' guial bi't guialgüjt zi'c tijb casti par gra ree bejn por dol ni been Adán, ziangajc por ni zagdxe ni been Jesucrist ma zajc gap ree bejn perdon në guialnaban loj Dios. ¹⁹ Din por tijb bèn ad bazoob diidx gra bejn naj bëndol. Per ziangajc por tijb bèn bazoob diidx ma zajc gap bejn perdon loj Dios.

²⁰ Abi' Dios badëe ley loj Moisejs, din por ley guin gagbee ree bejn guial cayüjn reeman dol. Abi' chi ragbee bejn guial cayüjnman zien dol loj Dios, ziangajc mazri benza'c naj Dios par güünman laaman perdon. ²¹ Guia'xchej gunabee dol bejn ree, abi' por dol guin guzuloj guyu guialgüjt. Per yan mazri nadxu'guijc ree guial rën Dios dunuj ree, din

gual rënman dunuj ree nünman dunuj ree cwent sin dol, abi' yaya'p ree gualnaban con laaman por dux Dad ree Jesucrist.

6

Ma bayëjt ree par dol per nabajnnë' ree Jesucrist

¹ Ad naladxidi canin lojdi gual yaguieen ree dol mazri din guiën Dios dunuj ree mazri. ² Din ad ziantan, ma bayëjt ree par dol ad rayaltri yaguieenz yaguieen ree dol. ³ Din gol bignia' gual chi barobnijs ree por Jesucrist, laan naj zi'c rulüü gual në dunuj ree ma bayëjt con laaman. ⁴ Chi barobnijs ree rën guiëban gual ma baxa'tyuj ree con Cristo, ma bayëjt ree con laaman din ziangajc zi'c babanman por xgualrniabee Dios ziangajc zajc guidxaa mod ni nabajn ree, yabajn ree zi'c rën Dios.

⁵ Abi' bal chi barobnijs ree ma nayajc ree tijbzi con Jesucrist loj xgualgüjtaman, zi'c babanman ziangajc yaban ree. ⁶ Din dunuj ree rayagbee gual chi güt Jesucrist loj crüzj, güjtaman por gra ni baguieen ree yaloj chi gad ree yaguieenbee laaman, abi' yagaj gunijt zi'c babajn ree yaloj, din ma naj nawëëg güün dol dunuj ree gan din ad rniabeetri dol guin dunuj ree. ⁷ Din bén ma güjt por dol, ad rniabeetri dol guin laaman. ⁸ Abi' gual güjt Jesucrist por dux tol ree, zeel ma bayëjt ree par dol guin, yabajn tëë ree con laaman. ⁹ Din dunuj ree rayagbee gual chi baban Jesucrist ad yu'tri dxej guiëtaman din ad rniabeet gualgüjt laaman. ¹⁰ Con tivoltizi güjt Jesucrist por xtol ree bejn, yan ma nabanman par Dios. ¹¹ Ziangajc lëjt gol been cwent gual ma güjtidi par dol, abi' ma nabandi par Dios gual ma najdi tijbzi con Dad Jesucrist.

¹² Zeel la'tgaj nabandi loj guidxliuj guie ad tiëbidi nabee dol lëjt, ad tiëb tëëdi güün ree xgabdxuudx lëjt gan. ¹³ Ad cwëëladx lëjt gajc loj dol par güündi ni mal, zagdxeli gol cwëjb nabee Dios lëjt, zi'c tijb bén ma güjt, abi' yabandi par laaman. Gol cwëjb nabeeman lëjt par güündi ni zagdx. ¹⁴ Zian ad zanabeetri dol lëjt, per ad por gual yu'guijctidi ni rëb ley ad güündi, ad zanabeetri dol guin lëjt por gual zinalidi gual rën Dios lëjt.

Ma gulaa ree loj dol

¹⁵ Ad canitan por gual ma zunaal ree gual rën Dios dunuj ree yan, zeel ma zajc yaguieen ree dol gual ad zunaaltri ree ley, din ad ziantan. ¹⁶ Lëjt ragbee bal yu' chu rniabee dunuj ree, yazoob ree xtiidx bén rniabee dunuj ree. Yan bal dol guin rniabee lëjt yayalidi casti, per bal ruzoobidi xtiidx Dios dxel ma rayalidi perdon. ¹⁷ Per quixtëë Dios gual majsi guia'xchej gunabee dol lëjt, per yan con guidib luxdoodi ma zinalidi xtiidx Dios zi'c ma basiididi. ¹⁸ Abi' yan gual ad rniabeetri dol lëjt, ma nabandi din güündi zi'c rën Dios. ¹⁹ (Canenë'n lëjt con ganax diidx ni zajc chignia'di xhie rën guiëb ni canin, din ragbeen gual nawëëg naj chignia'di ni guin ree.) Zi'c gunabee dol lëjt guia'xchej persi beendi ni dxuudx ree në graloj ree ni mal, ziangajc yan guidiblagaa gol cwëjb nabee Dios lëjt din gac güündi ni zagdx guiban tëëdi zi'c rënman.

²⁰ Chi gunabee dol lëjt ni'quid guyutidi xgab nibajndi zi'c rën Dios. ²¹ Per, çhieza gan beendi por ni mal ni beendi nadxel, ni mal ni ratunëdi yan gual ma ragbeedi por laan zëed xcasti Dios? ²² Per yan gual ad rniabeetri dol lëjt ma zinalidi xnejz Dios, abi' laan naj ni zagdx din por zian ma zajc guibandi zi'c rën Dios gap tëëdi gualnaban tiblayaa con laaman. ²³ Din ni rüjn bejn gan por dol laan naj casti, per ni razaladx

Dios naj guialnaban tiblayaa par ree bén ma naj tijbzi con dux Dad ree Jesucrist.

7

Ni naj zi'c guialruxhliaa

¹ Compniar raliduladx ree Jesucrist, lëjt ragbee xhienaag naj tijb ley. Ley guin naj ni rniabee bejn la'tgaj nabanman. ² Laan naj zi'c chi ruxhliaa bejn, ad zajct guxhliaanëman ben ren la'tgaj naban lacheelaman. Per bal guiët lacheelaman dxel ad yu't ley ni gudxoon guial guxhliaanëman ben ren. ³ Zeel bal naban lacheelaman abi' guchajgaman ben ren, dolan cayüjnman. Per bal ma güjt lacheelaman dxel achet ley gudxoon guial guxhliaanëman ben ren ad cayüjn tëëtaman dol.

⁴ Ziangajcan lëjt compniar raliduladx ree Jesucrist, por xguialgüjt Jesucrist ma güjtidi par xley Moisejs. Yan ma najdi xbejn Cristo bén baban zatijb, abi' zian ma zajc yaguieen ree zi'c rën Dios yaguieen ree. ⁵ Din chi babajn ree zi'ctzi bayën ree, mazri baguieen ree ni rudxoon ley guin yaguieen ree abi' bunaal ree ni mal ni rayal casti. ⁶ Per yan guial ma bayëjt ree par ley guin, yan guial ad rniabeetri ley guin dunuj ree guial ma bidxaa tëë mod ni nabajn ree, ma zajc yaguieen ree zi'c rën Dios por xSprijtaman bén nabajnnë' ree, ad guial nadxu'guijct ree ley guin.

Ley con dol

⁷ Ad canitan lojdi guial ni mal naj ley guin, din ad ziantan. Din bal id ley guin ad zagbeetan conin naj dol, ad zagbee tëëtan guial dol naj guialrzëëbladx, bal id rëb loj ley guin: "Ad sëëbladxil." ⁸ Per chi gogbeen guial ni mal naj guialrzëëbladx, mazri gojcxhiey da dolan por gra ni guzëëbladxan. Bal id yu' ley, ad zagbeet bejn xhienin naj dol. ⁹ Chi gadan günbee ley guin, par naj zagdxe nabanman. Per chi benbeen ley guin, gogbeen guial cayünan dol abi' por dol guin rayalan casti. ¹⁰ Bi't ley guin din gagbee bejn xhienaag guibanman, per par naj bi'tzan par gudëëdan naj casti. ¹¹ Din basquiee dol guin naj guial zile' günan gra ni rniabee ley, per por ley guin gajc gogbeen guial castizi rayalan.

¹² Zeel ad ni malt naj ley guin din loj Dios zëëdan abi' gra ni zëëd loj ley guin loj Dios zëëdan, abi' zagdxe xnejz tëë naj ni rëb loj ley guin. ¹³ Ad ley guint rajp dol guial rayalan casti, dol guinan naj ni basquiee naj din günan ni rayal casti. Abi' por ley guin gogbeen guial ni dxuudx da't naj guial güün bejn dol.

¹⁴ Dunuj ree rayagbee guial por Dios zëëd ley guin, per guial najn bénguidxliuj zeel zianczi rüjn dol guin naj gan. ¹⁵ Ad rignia'tan xhienin rajcan, din ad rüntan ni rënan, aal ni ad rëntan rünan. ¹⁶ Abi' chi rünan ni ad rëntan günan, zian ragbeen guial ni zagdxequi naj ley guin, din por ley guin ragbeen xhienin cayünan. ¹⁷ Zeel ad najtczi rün guial rünan ni ad rëntan, rünan laan guial najn bëndol, abi' zianczi rüjn dol guin naj gan. ¹⁸ Din guial najn bénguidxliuj, ragbeen guial ni'czi ta'n ad najtan benza'c, majsi rënan günan ganax ni zagdxe, per ad rajctan. ¹⁹ Ad rüntan ganax ni zagdxe ni rënan günan, aal ganax ni mal rünan ni ad rëntan günan. ²⁰ Yan bal rünan ni ad rëntan günan, ad najtczi rün par günan laan, rünan laan guial najn bëndol abi' zianczi rüjn dol naj gan.

²¹ Ragbeen guial majsi rënan günan ganax ni zagdxe, per laa za' gajc dol guin par güünan naj gan. ²² Dád ruladxan gra zi'c rniabee Dios günan,

²³ per yu' ni rudxoon g nan laan, abi' ni rudxoon guin naj dol, guial sta naban dol guin luxdon abi' zianczi r jnan naj gan.

²⁴  Prob naj!  Chu zajc yab e naj loj casti rayalan por dol ni r nan guial naj naj b nguidxliuj? ²⁵ Per quixt e Dios guial por dux Dad ree Jesucrist ma gulaan loj casti guin. Diidxiczi da xgaban naj guial g nan ganax ni rniabee Dios, per guial najn b nguidxliuj zeel zianczi r jn dol guin naj gan.

8

Guialnaban runee xSprijt Dios

¹ Gra ree b n rliadx Jesucrist ad rayaltri reeman xcasti Dios, b n ad nabantri ree zi'ctzi r n reeman, laa reeman ma r jn reeman naguiejn naban reeman zi'c rniabee xSprijt Dios. ² Din por xguialrniabee xSprijt Dios, b n runee guialnaban duloj ree guial ma nayajc ree tijbzi con Jesucrist, ad rniabeetri dol dunuj ree ad zayal t etri ree xcasti Dios. ³ Guial nayajc ree b nguidxliuj ad bile't n jn ley dunuj ree yudar, ley ni bad ed Dios loj Moisejs. Per yan ma been Dios ni ad bile't n jn ley guin. Laaman guxhaal Xi'n loj guidxliuj zi'cgajczi tijb b nguidxliuj persi g jtaman por dux tol ree chit e nabeeri dol dunuj ree. ⁴ Laaman been zian, din yaguieen ree zi'c r nman zi'cgajc tijb b n cay jn zi'c rniabee ley guial ad nabantri ree zi'ctzi ray n ree, ma nabajn ree zi'c rniabee xSprijt Dios.

⁵ B n naban ree zi'ctzi naj xixgab reeman, mazri yu'guijc reeman g  n reeman zi'ctzi r n reeman. Per ree b n naban zi'c rniabee xSprijt Dios, mazri yu'guijc reeman g  n reeman zi'c rniabee Sprijt guin. ⁶ Guial yu'guijc bejn g  nman zi'ctzi naj xixgabaman zeel z ed casti. Per b n yu'guijc g  n zi'c rniabee xSprijt Dios, zajpaman guialnaban con Dios yabe'cdxe t e Dios luxdooman. ⁷ B n yu'guijc ree guiban zi'ctzi naj xixgab reeman, rdxe'ch Dios laa reeman din ad r nt reeman guzoob reeman xtiidxaman ad rile' t et g  n reeman zi'c r nman. ⁸ Zeel b n naban ree zi'ctzi naj xixgab reeman, ad ruladxt Dios ni r jn reeman.

⁹ Per l jt ad nabantridi zi'ctzi naj xixgabidi, ma nabandi zi'c rniabee xSprijt Dios, bal wali ma nabann di xSprijt Dios. Din b n ad nabann t xSprijt Dios, ad najtaman xbejn Cristo. ¹⁰ Per bal ma nabann di Cristo, r n gui ban guial ma g jtidi par dol, ma nabann di xSprijt Dios din ma n jn Dios l jt cwent sin dol. ¹¹ Abi' bal ma nabann di xSprijt Dios, b n basban Jesucrist loj ree beng t. Majsu gui tidi per zasban Dios l jt din tia'di zatijb guialnaban por xSprijt Dios b n nabann di.

¹² Zeel yan compniar raliduladx ree Jesucrist, ad rayaltri yabajn ree zi'ctzi naj dux xgab ree. ¹³ Din bal nabandi zi'ctzi naj xixgabidi, dxel yayalidi casti, per bal por xSprijt Dios b n nabann di ma basa'ndi dol tiblad dxel ma gapidi guialnaban tiblayaa con Dios.

¹⁴ Gra ree b n rti jb rniabee xSprijt Dios laa reeman, laa reeman naj xi'n Dios. ¹⁵ Din ad nabann t reeman xSprijt Dios par guidxeb reeman, zi'c rdxeb tijb bejn xpatronman, por Sprijt guin ma naj reeman xi'n Dios. Abi' por Sprijt guin raguie'ch ree loj Dios: " Dad!" ¹⁶ Din xSprijt Dios rusni dunuj ree persi rayagbee ree guial ma nayajc ree xi'n Dios. ¹⁷ Abi' guial nayajc ree xi'n Dios dxel ma rayal ree ni guneeman zi'cgajc Jesucrist, bal wali yadaan ree guialzi zi'c laaman din yayal ree xanyabaa lod zojbaman.

18 Ma benan xgab guial achet lasajc guialrzagdiaj ni caydüüd ree yan guial loj guialnaza'c ni yaca' ree xanyabaa. 19 Abi' xt gra ree ni badxe' Dios loj guidxliuj, ma rën nejzdoos reen guidxin dxej guiguien chu ree nin naj xi'n Dios. 20 Din guidxliuj ma guxinan, per ad laatan rajp dol, Dios basa'n gac zian. Yan cabësi guidxliuj guin²¹ yariin loj ree ni dxuudx ni yu', din yayajc nix da't zi'c goc chi gurechaawan, zi'cgajc laa ree xi'n Dios loj ree nidxuudx yu' loj guidxliuj guie. 22 Per la'tgaj cabëz guidxliuj guin guidxin dxej guin, dunuj ree rayagbee guial dád naya cazagdiajn zi'c rzagdiaj tijb béngunaa chi ma gal xi'nman. 23 Abi' ad tijbtizi guidxliuj guin cazajc zian, nëgajc dunuj ree guial nabajnnë' ree xSprijt Dios zi'c tijb sen por ni gunees Dios duloj ree. Abi' cayzaagdiaj ree la'tgaj caylëz ree guidxin dxej ni guiguien guial nayajc ree xi'n Dios, dxej ni guidxaa dux cuerp ree chi yaya'p ree cuerp cüb. 24 Dunuj ree rayagbee guial gac zian, laan naj ni ralëz ree guialraliduladx ree ma nayajc ree perdon. Lëjt ragbee bal ni ralëz ree ma gojcan, ad zalëeztri reen din ad zajctri cwëz bejn ni ma gojc. 25 Per bal gad ni caylëz ree gac, ad rayalt yadxag ree yalëez ree gacan.

26 Abi' xSprijt Dios ragnë dunuj ree chi ad rayagbeet ree xhie yaguieen ree, din yu' dxej loj hor guin ad rilet' yarejdx yanaab ree Dios zi'c rayal. Abi' chi ad rayagbeet ree xhienaag yaguie'ch ree loj Dios, xSprijt Dios mal ragbee dux quiaraguejn ree, dxel laaman rbejdx rniab Dios por dunuj ree. 27 Abi' Dios, bën nünbee luxdoo gra ree bejn ragbeeman xhienin canab Sprijt guin lojman por dunuj ree. Din chi rniab Sprijt guin por ree xbejn Dios, laaman rniab por ree bejn zi'c rën Dios.

Achet zajc güün dunuj ree gan

28 Dunuj ree rayagbee guial gra ni cayza'c ree loj guidxliuj guie naj ni güün sirv par dunuj ree guial rayën ree Dios, dunuj ree guial bazoob ree xtiidxaman par yaguieen ree zi'c rënman. 29 Abi' diizd guia'xchej ma ragbee Dios chu ree nin chililadx laaman abi' gulejman laa reeman din guiban reeman zi'c Xi'nman Jesucrist, din Jesucrist naj bën nabee loj gra ree bën naj Xi'n Dios. 30 Gra ree bën ragbee Dios guial chililadx reeman laaman, rbejdxaman laa reeman din gac reeman xbejnman, rünman laa reeman cwent sin dol abi' rudëeman xanyabaa loj reeman lod zojbaman.

31 Yan, guial ma rayagbee ree gra ree ni guie, achet güünan chutëez güün xcontr dunuj ree, dunuj ree rayagbee guial Dios gagnë dunuj ree. 32 Ad gurexuut Dios nudëe Xi'nman din guiëtaman por dunuj ree. Yan nacli Xi'nman baneeman persi güjtaman por dunuj ree, ¿diidxgui ree ni ren ree nid zuneeman duloj ree ya? 33 ¿Chu zajc cwe'c dux guialquia ree nayajc ree bën ma gulej Dios? Din Dios ma nün dunuj ree cwent sin dol. 34 Achut zajc na guial rayal ree casti, din Jesucrist güjt persi gudijxaman por dunuj ree. Abi' ad ziantzi, babanman abi' yan za'man xladbee Dios lod rnieeman por dunuj ree. 35 Zi'c rën Cristo dunuj ree, achut zajc yala' dunuj ree con laaman. Ni'qui por guialyu'naya, o por guialzi, o por ni rün bejn dunuj ree, o por guialrliaan, o por guialryaadx du xab ree, o por tijb ni nadxeb, o guial yayëjt ree, achet zajc yala' dunuj ree con laaman. 36 Zi'c rëb loj xtiidx Dios:

Guial nayajcan xbejnl, zianczi nadxu'n loj guialgüjt.

Rünne reeman dunujn zi'c ree xil ma naj guiët.

³⁷ Per ni'qui tijb ni guin ad züjnt dunuj ree gan guial ragnë Cristo dunuj ree, bén rën dunuj ree. ³⁸ Ragbeechaawan guial ni'qui guialgüjt, ni'qui guialnaban, ni'qui ree anjl, o xindxab ree, o gra ree ni rajp guialrniabee, o ni cayajc, o ni zëed gac, ³⁹ o ni zëed xanyabaa, o lën liuj, ni'qui tijb ni been Dios, achetzi achut tëet zajc chiquied guialrën Dios dunuj ree por dux Dad ree Jesucrist.

9

Dios gulej bén Israel ree

¹ Lëjt ragbee guial naj naj xbejn Cristo, canin lëjt diidxli ad canitan lëjt ni rusquiee. Abi' naj ragbee guial xSprijt Dios ragbee guial diidxli naj ni canin lëjt, ² guial guixie guixie dád yu'naya luxdoon, xt ni'quid radxejlt xhie günan. ³ Balzianclaa majsi ad zayaltan perdon, majsi güün Cristo naj tibladi, per bal zian chile' günan yudar bén ladx reen chitëë yayal reeman casti. ⁴ Laa reeman naj bén Israel, abi' laa reeman naj bén gule Dios din gac reeman xbejnman. Abi' guzujman con laa reeman zi'c form tijb zaj, baya'nnëman laa reeman diidx conin güünman con tëenin güün reeman, badëë tëë xleyaman loj reeman. Rëbaman loj reeman xhienaag guiën reeman laaman, been tëeman promejs loj reeman. ⁵ Zëed reeman loj xdiaa ree bén been ree sirv loj Dios gulal, loj gajc ree bén zëed Cristo chi bi'taman loj guidxliuj, laaman naj bén nagle' zianczi rajp tëeman guialrniabee loj gra ni yu'. Amën.

⁶ Ad canitan guial ad züntri Dios xpromejsaman cumplid, ni canin naj guial ad grat ree bén Israel naj xbejn Dios. ⁷ Ad guial zëedt reeman loj xdiaa Abraham din gac reeman xdiaaman, din rëb Dios loj Abraham: “Diidz xi'n! Isaac sulox xdiaal.” ⁸ Laan rulüü dunuj ree guial ad por guial najt bejn bén Israel, ma najman xbejn Dios, xbejn Dios naj ree bén naj cwent loj xdiaa Abraham guial riladx reeman xtiidx Dios zi'c Abraham. ⁹ Din Abraham bililadxman Dios chi rëb Dios lojman: “Zatib ijz tiamp guie gajc guialan abi' dxej zii ree ma ca' Sar tijb xindobëz.”

¹⁰ Abi' ad laatzan. Grop ree xi'n Rebeca gojc xdad reex Isaac, bén goc dux béngulal ree, ¹¹⁻¹³ per chi gad reex gal, chi ad wayüjn tëet reex ni zagdxe ni'qui ni mal, rëb Dios loj Rebeca: “Xin yalox guin laax güün sirv loj xinguiag guin.” Zi'c rëb loj xtiidx Dios lod rëb: “Guyënan Jacob, per bidxe'chan Esaú.” Zian rguien guial ma ragbee Dios chu rbeman ad por ni rüjnt bejn, laaman ma ragbee chu rucaabeeman.

¹⁴ Yan, ¿por zian yaguie'ch ree ya, ad rüjnt xguialguxtis Dios zi'c rayal? ¿Per ad ziantan! ¹⁵ Din Dios rëb loj Moisejs: “Yayan bén rënan yayan abi' bén rayal ree casti, bal rënan ad zudëdtan laa reeman casti.” ¹⁶ Zeel ad zile't yaya Dios bejn por xixgabzaman o por ni rüjnman, laaman mal ragbee chu rënman yayaman. ¹⁷ Loj xtiidx Dios rëb guial rëbaman loj rey Egipto: “Naj ben lüj rey din guiguien da guialrniabeen din güünbee gra bénguidxliuj naj.” ¹⁸ Zeel rnin lojdi guial ma ragbee Dios chu yayaman chu tëë güünman luxdoo gojl.

¹⁹ Per wed por zian nadi: “Bal zianan, ¿chexquiza zeel rdxe'ch Dios guial nayajc ree zi'c nayajc ree awa ad zajct yadxoön ree zi'c naj xixgabaman?” ²⁰ Per, ¿chu naj bénguidxliuj din guinieeman Dios zian? Wen zajc guiëb tijb guiajs loj bén been laan ya: “¿Chexc zeel beenl naj zian?” ²¹ ¿Nid bén rüjn guiajs guin rüjnnë bajn guin zi'ctzi rënan ya? Laaman ruguiaa

xhie gүүnnēman bajn guin, bal gүүnman guiajs gүүn dxiin guixie guixie o gүүnman guiajs gүүn dxiin dxej zobjlojzi ree.

²² Yan, ziangajc Dios ma ragbeeman chu rayal casti, abi' xt zajc laa nudēē gajcaman casti din guiguien xguialrniabeeman. Per gudaanman gojp tēeman pacens bèn ad ruzoobt ree diidx, bèn rayal ree nit. ²³ Gudaanman laa reeman din guiguien guial laaman guinia xhienaag gүүnman, guial laaman naj bèn ca' guialrniabee abi' bayaman bèn ragbeeman diidx guia'xchej guial yayal reeman xanyabaa. ²⁴ Abi' laa reeman naj dunuj ree bèn ma gurejdx Dios, loj ree bèn Israel nē loj ree bèn ad najt bèn Israel. ²⁵ Zi'c ca loj libr ni bacaa Oseas bèn badēē xtiidx Dios loj ree bejn, lod rēb:

Bèn ad najt ree da bejnan,
 guiēn loj reeman guial naj reeman da bejnan,
 abi' ree bèn ad yu't bèn rēn laa reeman,
 naj guiēn laa reeman.

²⁶ Abi' lod rēb Dios loj ree bejn: “Ad da bejntan lējt”.

Yagaj gac reeman xbejnman, laaman guial najman bèn naban.

²⁷ Guiāad Isaías bèn badēē xtiidx Dios loj ree bejn, rēbaman por ree bèn Israel: “Majsi zien da't naj ree bèn Israel zi'c üx riga' ro' nijsdoo, per ta'nz naj ree bèn laa loj casti, ²⁸ din Dios nayob gүүn cumplid xtiidxaman loj guidxliuj guie zi'c ma rēbaman.” ²⁹ Abi' diidx gocli rēb Isaías loj ree bejn:

Bal nitiējb dux Dad ree Dios
 bèn rajp gra guialrniabee
 ninijt gra ree dux bēngulal ree,
 diidx gocli mal gunijt dux diaa ree
 zi'c gunit ree bèn Sodoma nē ree bèn Gomorra.

Bèn ad najt ree bèn Israel ma naj reeman perdon loj Dios

³⁰ Yan, ¿xhie yaguie'ch ree? Bèn ad najt ree bèn Israel ni'quid guyut reeman xgab xhienaag gac reeman perdon loj Dios, per yan ma naj reeman perdon guial rliladx reeman Jesucrist. ³¹ Abi' ree bèn Israel majsi dād been reeman naguiejn guiban reeman zi'c rniabee ley din gac reeman perdon loj Dios, per ad gojctan. ³² ¿Chexc zeel ad bile't niajc reeman perdon zian? Guial mazri been reeman naguiejn nibajn reeman zi'c rniabee ley luar nililadx reeman Dios zi'c rayal chililadx reeman din gac reeman perdon. Zian gojc Cristo par laa reeman zi'c tijb “guiaj ni rliadx guia' bejn” ³³ zi'c ca loj xtiidx Dios lod rēb:
 Ma gulen tijb bejn luguiedx Sión, bèn gac zi'c tijb guiaj
 ni ladx guia' ree bejn abi' gusajban laa reeman.
 Abi' bèn chililadx laaman ad yu't dxej yaya'nxtuman.

10

¹ Compniar raliduladx ree Jesucrist, ni rēnan rniaab tēen loj Dios naj guial gac ree bèn Israel perdon. ² Din naj ragbee guial dād cayūjn reeman naguiejn cayūjn reeman sirv loj Dios, per diidxli ad rignia't reeman zagdxe xhienaag rēn Dios gүүn reeman. ³ Din ad rtiējbt reeman chililadx reeman xhienaag rayal gүүn reeman din gac reeman perdon loj Dios, al zinal reeman zi'c naladx reeman gac reeman perdon, luar gүүn reeman zi'c rēn Dios din gac reeman perdon. ⁴ Din por Jesucrist bayaaloj zi'c rniabee ley gүүn bejn, yan bèn rliladx ree laaman, ma naya reeman loj Dios.

⁵ Bèn rën gac naya loj Dios guial zinalaman ley, rëb Moisejs guial bèn güün zi'c tal rëb ley, zajpaman guialnaban la'tgaj cayünman zi'c rniabee ley guin. ⁶ Per guial rajc bejn naya loj Dios por guial riladxaman Jesucrist, naj guial ad züjntaman xgab: “¿Chuczi zajc chë'p xanyabaa?” (Din rën guiëban guial ad riladxtaman, abi' rënman guguaaman guiat Cristo loj guidxliuj.) ⁷ Ad guiëb tēëman: “¿Chu zajc che lod za' ree bengüt?” (Din rën guiëban guial ad riladxtaman, abi' rënman guguaaman yaban Cristo loj ree bengüt.) ⁸ Per loj xtiidx Dios rëb: “Gajxh za' xtiidx Dios con lüj, ryaadxzi güünl xgab guiëb tēël bal chililadxil laan.” Din guialriladx ni ratie'ch ree naj ze. ⁹ Bal yaneero'l guial Jesús naj Dad par lüj abi' guidib luxdool chililadxil guial basban Dios laaman loj ree bengüt, dxel ma najl perdon. ¹⁰ Din chi chililadx bejn Jesucrist con guidib luxdoooman, diizd loj hor zii ma najman cwent sin dol. Abi' chi yaneero'man guial Jesucrist naj Dad par laaman, dxel ma najman perdon.

¹¹ Abi' loj xtiidx Dios rëb: “Gra ree bèn chililadx laaman ad yu't dxej yaya'nxtu reeman.” ¹² Laan rën guiëb guial loj Dios tiblojzi naj bejn, achet güünan chutëëz najman, bal najman bèn Israel o ad najtaman bèn Israel. Din tijbzi Dios naj Dad par dugra ree, abi' dád benza'can con gra ree bèn rbejdx rniab laaman. ¹³ Din loj xtiidx Dios rëb: “Gra bèn yanab perdon loj Dios, gacaman perdon.” ¹⁴ Per, ¿xhieza naag cwedx guiniab reeman laaman awa ad waliladxt reeman laaman? ¿Abi' xhieza naag chililadx reeman laaman awa ad wacaagdiajgt reeman xcwentaman? ¿Xhienaag guiguiejn reeman xcwentaman awa achut bèn guinee xtiidxaman loj reeman? ¹⁵ ¿Xhienaag chu' bèn guitie'ch xtiidxaman awa achut guixhiaal laa reeman? Loj xtiidx Dios rëb: “iNi za'cdxoon naj chi rdin bèn zinë ruson zagdxel!”

¹⁶ Per ad grat bejn ridxga' xtiidxza'c Dios. Zi'c rëb Isaías: “Dad, ¿chu ma riladx ni ranen por lüj?” ¹⁷ Zeel guialriladx zëëd por ni riguiejn bejn, abi' ni riguiejn bejn naj xtiidxza'c Jesucrist.

¹⁸ ¿Wen nid waguiejn ree bejn laan ya? iPer naj rni guial ma bacaagdi-ag reeman laan! Din loj xtiidx Dios rëb:

Guidib guidxliuj ma bire'ch xtiidx Dios

abi' xt luar bigra lod naguie'ch ma biguiejn reeman xtiidxaman.

¹⁹ Yan rünan xgab: ¿Wen id rignia' ree bèn Israel xtiidx Dios ya? Per diizd guia'xchej bacaa Moisejs ni rëb Dios por laa reeman chi rëbaman:

Naj gün din tédlojdi por ni günan

con ree bèn ad najt bèn Israel.

Në por ni günan con laa reeman,

majsi ad ragbeet reeman, abi' zadxe'chidi.

²⁰ Abi' sin guialrdxeb bacaa Isaías ni rëb Dios por ree bèn Israel, chi rëbaman:

Bèn naj ree bèn Israel, majsi ad baguuilt reeman naj,

per badxejl reeman naj.

Abi' ma balülon loj reeman,

majsi ad gunabdiidxt reeman por naj.

²¹ Bacaa tēë Isaías ni rëb Dios por ree bèn Israel, chi rëbaman: “Dëchej za'n rbedxan bejn ree abi' ad rënt reeman guzoob reeman diidx al rusagloj reeman naj.”

11*Xixgab Dios*

¹ Ad canitan lojdi guial ma gulëeladx Dios bén Israel ree, din ad ziantan. Lëjt ragbee guial bén Israel naj abi' loj xdiaa Abraham zialan, guial zialan loj xdiaa Benjamín. ² Diizd guia'xchej, gulej Dios bén Israel ree din gac reeman xbejnman, zeel ad rbëeladxtaman laa reeman. ¿Nid rusaaladxidi tiblajt loj xtiidx Dios ya lod zëed chi gule'c Elías bén badëë xtiidx Dios loj ree bejn xgualquia ree bén Israel loj Dios? Chi rëbaman: ³ “Dad, ma bagüjt reeman gra ree bén badëë xtiidxil loj ree bejn ma bachijl tëë reeman xialtar reel, najzi baya'n abi' nëgajc naj rën reeman gugüjt reeman.” ⁴ Per badxi' Dios xtiidxaman rëbaman: “Ma gulëcan gajdx mil bejn par naj, bén ad wazuxibtcsi ree loj dios la Baal.” ⁵ Yan ziangajc yu' ta'n bén Israel, por guial rayaman laa reeman gulejman laa reeman par laaman. ⁶ Abi' bal guial rayaman laa reeman gulejman laa reeman, ad por ni cayüjnt reeman, din bal nibejman laa reeman por ni cayüjn reeman dxel ad por guial rayatraman laa reeman.

⁷ Zian gojc, bén Israel bén gule Dios, badxejl reeman laaman guial rliladx reeman laaman. Per ree bén Israel ren gad reeman yadxejl laaman, din raguiil reeman laaman zi'c naladx reeman, ad raguiilt reeman laaman zi'c rënman zeel beenman luxdoo reeman gojl, ⁸ zi'c rëb loj xtiidx Dios lod rëb: “Basiaaw Dios xquiarguejn reeman, abi' naj reeman zian xt yandxej, majsi ruguiaa reeman per rulüü ad ruguiaat reeman, abi' majsi rigueijn reeman per rulüü ad rigueijnt reeman.”

⁹ Rëb tëë Davi:

Xgualraw zagdx reeman con gra xgualnaza'c reeman
laan gusquiee laa reeman guial zëqui reeman zagdx.

Laan gusquiee laa reeman din téd reeman casti ni rayal reeman.

¹⁰ Yaya'n reeman zi'c tijb bén ad ruguiaat,
abi' sac reeman zi'c tijb bén ca bëw xijch.

Gac ree bén ad najt bén Israel perdon

¹¹ Ad canitan lojdi por guial ad rtiëjbt ree bén Israel güün reeman zi'c rën Dios zeel ma gunijt reeman loj Dios, din ad ziantan. Guzajc reeman zian din chu' mod gac ree bén ad najt ree bén Israel perdon, din chile' sëëbladx ree bén Israel gap reeman perdon guin. ¹² Yan bal guial ad bazoobt ree bén Israel diidx, beenan sirv par din yayal los demazri ree bénguidxliuj xgualnaza'c Dios, bén ad najt ree bén Israel. Yan, ¿rünjdi xgab ya xhienaag güünle' Dios bejn ree chi tiëb ree bén Israel güün reeman zi'c rën Dios?

¹³ Yu' ni rënan ganin lëjt bén ad najt ree bén Israel, lëjt ragbee guial Dios guxhaal naj din gün xtiidxaman lojdi abi' dád cayünan naguiejn günan zi'c rayal. ¹⁴ Rënan guial ree bén ladx reen bén Israel ree sëëbladx zi'c rünjdi din güün reeman zian din chile' gac reeman perdon. ¹⁵ Walican guial chi ad bazoobt ree bén Israel xtiidx Dios, guyu mod gojc los demazri ree bejn perdon. ¡Per xi nix chi chililadx reeman xtiidx Dios! Laan naj zi'c chi yaban tijb bengüt zatijb. ¹⁶ Abi' zi'c chi beenle' Dios bén Israel ree gulal laan naj tijb sen guial güünle'man los demazri ree bén Israel, ziangajc bal güünle' Dios xliuj tijb yag guidib yag guin ma nagle'.

¹⁷ Bén Israel ree naj reeman zi'c tijb yag olivo, per yu' reeman naj zi'c xidx yag olivo guin ni ma gurug. Abi' lüj guial ad najtil bén Israel najl zi'c tijb xidx yag olivo ni yu' dajn ni rguiid lod biru' xidx yag olivo guin,

zeel rajpil guialnaban por xliuj yag guin. ¹⁸ Zeel ad naladxil guial mazri zagdxé najl guial loj yag oliv ni rnin naj ree bèn Israel. Per bal rüjnl xgab zian, basaaladx guial ad lüjt cudëë guialnaban loj xliuj yag guin, xliuj yag guin cunee guialnaban lojl.

¹⁹ Wed zanal: “Walican, per gurug xidx yag olivo guin persi guyu'n xluaran din gacan tijbzi con yag olivo guin.” ²⁰ Waliquil, per xidx yag olivo ni canin naj ree bèn Israel, gurug reen guial ad bililadxt reen abi' lüj guyul xluar reen guial rliladxil. Zeel ad rüjnl nabë, zagdxeli gojpp cudad. ²¹ Din bal bèn Israel ni canin naj ree xidx yag guin, ad bayat Dios laa reeman, ziangajc zajc saquil. ²² Gogbee guial benza'c naj Dios, per ziangajc diidxli rüjn xguialguxtisaman. Ma been xguialguxtisaman con ree bèn ad bazooft xtiidxaman, abi' ma beenman ni zagdxé con lüj. Per rayal guibanl zi'c rënman, bal id züjnl zian züjn xguialguxtisaman con lüj. ²³ Abi' bal yayejc ree bèn Israel con Dios, abi' chililadx reeman perdon ni zëed por laaman, zünman laa reeman cwent con los demazri ree bèn Israel rliladx. Din laaman rajp guialrniabee par yayünman laa reeman tijbzi con los demazri ree bèn Israel. ²⁴ Din lüj guial ad najtil bèn Israel, lüj guial canin najl zi'c tijb yag olivo ni yu' dajn, zile' niajqul tijbzi con yag olivo zagdxé ni rnin naj ree bèn Israel, jdiixgui ree bèn Israel ni ad ruzooft ree xtiidx Dios, nid zayajc reeman tijbzi ya con los demazri ree bèn Israel bal guzoob reeman xtiidx Dios!

Gac ree bèn Israel perdon

²⁵ Compniar raliduladx ree Jesucrist, yu' ni ad ragbeetidi abi' rënan gagbeedan, chitëë güündi nabë. Bèn Israel rüjn ree nad par guzoob reeman xtiidx Dios, cayajc zian xt chi ma bayaaløj bililadx ree bèn ad najt ree bèn Israel, bèn ma naj ree par chililadx xtiidx Dios. ²⁶ Chi ma gojc zian, dxel graczi ree bèn Israel ma güüncwent xtiidx Dios. Zian gac reeman perdon, zi'c rëb loj xtiidx Dios lod rëb:

Luguedx Sión za bèn gagnë ree bèn zëed loj xdiaa Jacob.

Din yariica reeman loj nejz mal zinal reeman.

²⁷ Dxel gac cumplid da diidxan,

Zi'c ma rën loj reeman guial günan perdon xtol reeman.

²⁸ Per yan guial dád nad ree bèn Israel par chililadx reeman xtiidxza'c Jesucrist, zian yu' mod persi rliladxidi guial ad najtidi bèn Israel. Abi' majsi zian, rën gajc Dios laa reeman zi'c beenman promejs loj ree xbéngulal reeman. ²⁹ Din Dios ad ruchaat xixgabaman, ni ma bazal-adxaman loj bejn, ad rquiedtaman laan, ad rbëeladx tëëtaman bèn ma gulejman par laaman. ³⁰ Gocli ad binaltidi xnejz Dios, per yan por ree bèn Israel ad ruzooft xtiidx Dios, ma balüüman lëjt guial rayaman lëjt. ³¹ Abi' bal yan ad ruzooft ree bèn Israel xtiidx Dios, cayajc zian din yayaman lëjt, per chi guidxin dxej ziangajc yayaman laa reeman. ³² Cwëjb Dios guial zi'c ree bèn Israel në ree bèn ad najt bèn Israel ad ruzooft reeman xtiidxaman, din gac yayaman gra reeman tiblojzi.

³³ ¡Dád zro' naj xguialrignia' Dios, në xguialrajcaman con xguial-naza'caman! Achut zajc gagbeechaaw xhienaag naj xixgab Dios o ni cayünman. ³⁴ Zi'c ca loj xtiidxaman lod rëb: “¿Chu zajc gagbeechaaw xhienaag naj xixgab dux Dad ree Dios? ¿Chu mazri rajc din guiëb lojman xhienaag güünman?” ³⁵ ¿O chu ma badëë xhienin lojman din cwëzaman quixaman laaman?” ³⁶ Xieenman naj gra ni yu', laaman been laa reen

abi' par laaman naj gran. Zeel rayal gap bejn laaman respejt zianczi. Amén.

12

Guialnaban cüb

¹ Zeel compniar raliduladx ree Jesucrist, rniaaban lojdi, zi'c ma baya Dios dunuj ree, gol basa'n lèjt loj Dios zi'c tijb gon ni ma nagle' ni yayuladx tèeman, din guibandi zi'c rënman, abi' zian guiëndi laaman.

² Ad guibanridi zi'c naban los demazri ree bèn yu' ree yan, zagdxeli gol bachaa xixgabidi din gac guidxaa zi'c nabandi abi' zian gagbeedi xhienaag rën Dios guibandi. Zian gagbeedi conin naj zagdxe, conin ruladxaman, con tèenin naj xnejz.

³ Guial naj Dios benza'c baneeman dxiin guie lon din guialan ganen xtiidxaman lojdi. Zeel rnin lojdi ni'qui tijbidi ad rayalt güün nabë guial mazri lasajquidi loj ree bejn. Zagdxeli gol been xgab por lèjt zi'c rayal, segun naj quiarguejn ni banee Dios loj tijbgajdi. ⁴ Din zi'c xcuerp bejn zien la' najn, per ad tijbtzi ni rüjnan. ⁵ Ziangajc dunuj ree guial raliduladx ree Jesucrist, majsi zien nayajc ree, per por guialraliduladx ree zeel nayajc ree tijbzi con Cristo, per tijbgaj dunuj ree con ni rayal yaguieen ree din yaguieen yudar du lasa' ree.

⁶ Din tijbgaj dunuj ree garent garen naj quiarguejn ni baca' ree, zi'c naj ni guyën Dios baneeman dunuj ree. Zeel bal ma baneeman quiarguejn du loj ree par yanee ree xtiidxaman, rayal yanee ree laan loj ree bejn, rayal yanee ree laan por guialraliduladx ree. ⁷ O bal baneeman quiarguejn par yaguieen ree sirv ben ren ree, rayal yaguieen reen zi'c rayal. Bén cwa' quiarguejn par gulüüman bejn ree xtiidx Dios, rayal gulüüman bejn ree. ⁸ O bèn cwa' quiarguejn par gudëeman consejw loj ree bejn, rayal gudëeman consejw. Guiáad bèn cwa' quiarguejn par yazaladxaman xhienin loj ree bejn, rayal yazaladxaman con guidib luxdooan. Abi' bèn cwa' quiarguejn par nabeeman, rayal gapaman cudad nabeeman zi'c rayal, o bèn cwa' quiarguejn par güünman yudar bèn cazagdiaj ree, rayal chu' luxdooan zagdxe güünman laa reeman yudar.

Ni rayal güün ree bèn rliladx Jesús

⁹ Gol guyën lasa'di con guidib luxdoodi, gol basa'n ree ni mal tiblad, gol binal ni zagdxe. ¹⁰ Gol guyën gra ree bejn zi'c tijb bijchidi, ad rüjn lèjt gajc benro', gol gojp respejt lasa'di.

¹¹ Ad gaquidi bèn ploj par güündi ni rayal güündi, con guidib luxdoodi gol been sirv loj Dios.

¹² Gol badxe' luxdoodi zagdxe por ni cabëzidi tia'di, gol gudaan tèe loj ni rzagdiajdi, ad gucwëez cwedx guiniabidi Dios.

¹³ Chi xhie ryaadx xcompniaridi, bèn rliladx ree Jesucrist, gol been reeman yudar. Gol gojc benza'c con ree bèn ri't lidxidi.

¹⁴ Gol gurejdx Dios por ree bèn rzunal lèjt par güün reeman lèjt ni mal, ad guzaalidi diidxmal guijc reeman, gol gurejdx Dios guial gagnëman laa reeman.

¹⁵ Gol badxe' luxdoodi nix con ree bèn yu' luxdoo nix, per con ree bèn yu' luxdoo naya, gol been naguiejn din gagbee reeman guial za'quidi con laa reeman.

¹⁶ Gol gubajn zagdxé con ree lasa'di, ad güündi nabé, gol gojc bén naxanladx. Ad naladxidi mazri rajquidi guial loj ree ben ren.

¹⁷ Ad güündi ni mal bén rüjn lëjt ni mal, gol been naguiejn güündi ni zagdxé loj gra ree bejn. ¹⁸ Gol been naguiejn da't din cwenëdi bejn ree zagdxé. ¹⁹ Compniar raliduladx ree Jesucrist, ad rgu' guialxyajn luxdoodi con ree bén rüjn lëjt xhienin, gol basa'nan loj Dios, laaman güün xguialguxtis, zi'c rëb loj xtiidxaman, lod rëb: “Naj naj bén rayal güün xguialguxtis, gudë tëen ni rayal bejn. Zian rëb dux Dad ree Dios.” ²⁰ Rëb tëëman: “Bal rliaan bén rdxe'ch lüj, badëéd ni gawaman, o bal re'caman nijs, badëéd ni guië'man, zian guguaal yatuman.” ²¹ Ad bal tiëbil güün ni mal lüj gan, been ni zagdxé din güünl ni mal guin gan.

13

Royal yaya'p ree guxtis respejt

¹ Gra bejn rayal gucaagdiajg xtiidx gobiarn në xtiidx gra ree guxtis. Din por Dios yu' ree gobiarn në gra ree guxtis, por laaman zëéd guialrniabee ni rajp reeman. ² Zeel bén ad ruzoobt xtiidx ree bén rniabee guin, rën guiëban guial ad rënt reeman güün reeman zi'c rniabee Dios. Abi' ree bén rüjn zian laagajc reeman rguil xcasti, ³ din bén rajp ree guialrniabee ad za't reeman par guchejb reeman bén rüjn ree ni zagdxé, za' reeman par guchejb reeman bén rüjn ree ni mal. Yan bal rënl guibanl guial ad zadxebtil bén ca' ree guialrniabee, gubajn zagdxé din yaya'n l zagdxé loj reeman. ⁴ Din laa reeman cayüjn reeman sirv loj Dios din yalaj reeman lüj. Per bal cayüjn ni mal, zadxebil bén ca' ree guialrniabee, din ad ca' xlia'tzi reeman guialrniabee guin, laa reeman cayüjn sirv loj Dios din gudëéd reeman casti bén rüjn ree ni mal. ⁵ Zeel rayal guzoobidi xtiidx ree bén ca' ree guialrniabee, ad güündi zian naabzi par ad zayaltidi casti, gol been zian guial ragbeedi zian rayal güündi. ⁶ Gol gudijx tëë impuest, din gusnuu nabee ree bén ca' ree guialrniabee, din laan naj mandad bayal reeman par güün reeman sirv loj Dios.

⁷ Zeel gol badëéd ni rayal gudëédidi, bal rayal cwe'quidi milia, gol gule'can o bal rayal quixidi impuest, gol gudijxan. Gol bazoob xtiidx bén rayal guzoobidi xtiidx, gol gojp respejt bén rayal respejt. ⁸ Gol been naguiejn gol baguijx ni ralidi loj ree bejn, abi' ad rayalt gucwëez guiëndi bejn ree. Din bén rën bejn ree, ma cayüjnman cumplid gra ni rniabee xley Dios. ⁹ Xmandamient Dios rëban: “Ad sunël bén ren bén ad najt lacheelil, ad gugüjtil bejn, ad cwanl, ad sëëbladxil ni rajp ben ren”, per mandamient guie ree, con ree xmandamient ren Dios rajc cumplid con tijb mandamient rëb: “Guyën ben ren ree zi'c rën lüj gajc.” ¹⁰ Din bén rën bejn ree ad zajct güünman laa reeman ni mal guial rënman laa reeman. Zeel con guial rën lasa' bejn rayaal loj rüjnman gra ni rëb loj xley Dios.

¹¹ Gol gogbee xhie tiamp nadxu' ree yan, gol gogbee guial ma gojl yatie'ch dux bacaal ree. Din yan ma zidyob dxej gui't Jesucrist guial loj chi guzuloj qui baliduladxri ree xtiidxza'caman. ¹² Mazri caydop tiamp guin, abi' mazri cabig dxej gui'taman, zeel rayal yasa'n ree ni rinë dunuj ree loj nejz mal, abi' yaguieen ree naguiejn yaguieen ree ganax ni zagdxé din yunaal ree nejz zagdxé. ¹³ Rayal yabajn ree zagdxé zi'c rayal, ad yaguieen ree ni natu. Ad yazüdx ree, o ad rayalt yaguieen ree lanij naabzi par chu' mod yaguieen ree ni dxuudx. Ad rayalt sunë bejn ben ren bén ad najt lacheelaman, o guial gapaman gral loj vijs, o guialrdil o guialrdëdloj.

14 Gol basa'n lëjt gajc loj dux Dad ree Jesucrist, ad rayalt guibandi zi'ctzi rëndi.

14

Ad gusa'nxtudi bén qui rliadxri xtiidx Dios

¹ Zagdx gol guneenë bén qui rliadxri Jesucrist ad gusa'nxtudi laaman guial mazri rajquidi guial lojman. ² Din yu' ree bén rliadx Jesucrist naladx reeman zajc gaw reeman xhietëéz nin, per yu' ree bén qui rliadxri naladx reeman guial zagdxeli naj ad zajwt reeman bëël. ³ Bén rüjn xgab guial zajc gawaman xhietëéz nin, ad rayalt güünman tibladd bén naladx yu' ni ad zajct gaw bejn. Guiáad bén rüjn xgab guial yu' ni ad zajct gaw bejn, ad rayalt guze'man bén naladx zajc gaw bejn xhietëéz nin. Din niz loj Dios tiblojzi ma naj reeman xbejnman. ⁴ Zeel, ¿chu naj bejn din guze' xcompniaraman bén rliadx Jesucrist por niguinzi ree? Diosqui ragbee bal cayünman ni zagdx o cayünman ni mal. Abi' bal ad wayignia'taman xhienaag güünman, dxel dux Dad ree Jesucrist rajp guialrniabee par gagnëman laaman güünman zi'c rayal.

⁵ Ziangajc yu' ree dux compniar ree bén raliduladxnë' ree Jesucrist naladx reeman guial yu' dxej zojbloj, yu'za ree bén naladx guial tiblojzi naj gra dxej, per achet güünan, tijbgaj bejn con ni naladxaman naj zagdx par laaman. ⁶ Din bén rüjn xgab guial yu' dxej zojbloj, rüjnman zian persi rënman Dios. Guiáad bén naladx guial tiblojzi naj gra dxej, rüjnman zian persi rënman Dios. Abi' bén raw graloj, rawaman guial yu'guijcaman guial por Dios zëëdan abi' rudëëman quixtëë lojman. Guiáad bén naladx guial yu' ni ad zajct gaw bejn, rüjnman zian guial naladxaman zian cayajpaman Dios respekt abi' rudëëman quixtëë lojman.

⁷ Ni'qui du tijb ree ad nabant ree por dux xgabzi ree, o ad zayëjtt ree por dux xgabzi ree. ⁸ Bal nabajn ree por dux Dad ree Jesucrist par laa tëëman nabajn ree. Abi' bal yayëjt ree por laaman par laa tëëman yayëjt ree. Zeel bal nabajn ree o yayëjt ree, par dux Dad ree Jesucrist ma nayajc ree. ⁹ Din par zian güjtaman abi' babanman, din gacaman Dad loj ree bén naban në loj ree bén ma güjt.

¹⁰ ¿Chexquiza din guze' lasa'l bén rliadx Jesucrist o güün lasa'l tibladd ya? Awa dugra ree rayal yadxu' loj Dios din yadëëd ree cwent lojman. ¹¹ Zi'c ca loj xtiidxaman lod rëb:

Naj naj Dios naban,

abi' diidxli rnin lojdi guial gra ree bejn guzuxib lon.

Abi' gra ree bejn guiëb guial naj naj Dios.

¹² Abi' tijbgaj dunuj ree rayal yadëëd ree cwent loj Dios, per por dunuj gajc ree.

Ad gusajbidi bejn loj dol

¹³ Zeel ad rayalt yaneeguijdx du lasa' ree bén rliadx ree Jesucrist, zagdxeli yaguieen ree naguiejn yaya'p ree cudad chitëë por dunuj ree güün reeman dol. ¹⁴ Naj najn xbejn Jesús, ragbeen guial ad dolt naj gaw bejn xhietëëznin. Per par bén naladx guial ad zajct gawaman xhietëëznin, par laaman dolan cayünman bal gawaman xhietëëznin. ¹⁵ Yan bal por ni rawil naladx tijb xcompniaril bén rliadx Jesucrist guial dolan cayünj, abi' bal id ridxga'l laaman rën guiëban guial ad rëntil laaman. Gojp cudad chitëë por ni rawzil güün xcompniaril dol, din nëgajc por laaman güjt Jesucrist loj crüzj. ¹⁶ Ad güünl tijb ni guinieeguijdx ree xcompniaril lüj,

majsi lùj ragbee guial ad ni malt naj ni cayüjnl. ¹⁷ Niz loj Dios ad ni rawt bejn o ad ni rë'taman naj ni lasajc, ni lasajc par laaman naj guial guiban bejn xnejz, yabedxe luxdoo bejn, chu' tée luxdoo man nix por xSprijt Dios. ¹⁸ Abi' bèn naban zian guial zinalaman Jesucrist, cayüjnman zi'c rën Dios, zi'c ruladx tée bejn.

¹⁹ Zeel rayal yaguieen ree naguiejn yabajnnè' du lasa' ree zagdxe yabedxe tée du luxdoo ree, din yasnuu yayagbee ree xhienaag yunaal ree xnejz Dios. ²⁰ Gol gojp cudad chitée por ni rawzidi gunijtidi tijb xbejn Dios. Walican graczi zajc gaw bejn. Per ni mal guin naj bal par xcompniaril dolan cayüjnl. ²¹ Zeel zagdxeli naj guial ad zajwtil bëel ad zè' tée'til vin o xhie stijb nin bal por laan güün xcompniaril dol. ²² Majsi lùj ragbee guial achet güünan gaw bejn xhietëeznin, per zagdxeli lùjzi con Dios. Naj rni guial, jixiquilbaa bèn ad yu'nawëëgt luxdoo rawaman xhietëeznin! ²³ Per bèn yu'nawëëg luxdoo par gawaman xhienin, abi' gawaman laan laagajcaman ma cayüjn dol guial ad cayawtraman guidib ladxaman. Bal naladx bejn ad laat naj ni cayüjnman, dxel laagajcaman cayüjn dol.

15

Rayal yaguieen ree ni naladx bejn naj zagdxe

¹ Yan, dunuj ree guial ma nadxu'dxi'ch ree loj ni raliduladx ree Jesucrist, rayal yaguieen ree yudar bèn ad wazudxi'cht loj guialrliladx Jesucrist luar yaguieen ree ni rayentzi ree, ² dugra ree rayal yaguieen ree naguiejn din chu' luxdoo dux compniar ree zagdxe con dunuj ree. Abi' rayal yaguieen ree ni naladx reeman naj zagdxe, din chile' gusnuu güünbee reeman xnejz Dios. ³ Din ni'qui Jesucrist ad beent zi'c naj xixgabaman, gojc zi'c ca loj xtiidx Dios lod rëb: "Naj bayal gra ree diidx mal ni ninia reeman lojl." ⁴ Gra ni ca loj xtiidx Dios, can din yayagbee ree xhienaag yabajn ree, abi' por xtiidx Dios zëed pacens në guialragnë chitëe yalenyä' ree yalëjz ree ni ralëjz ree yaca' ree. ⁵ Dios, bèn razaladx pacens në guialragnë chitëe yalenyä' ree, laaman gagnë lëjt din guibandi nadxag con gra ree xcompniaridi zi'c naj xixgab Jesucrist. ⁶ Din tiblojzi guilies reeman xvalor Dios, xdad dux Dad ree Jesucrist.

Bire'ch xtiidx Dios loj ree bèn ad najt bèn Israel.

⁷ Zeel, zi'c baca' Jesucrist lëjt par gaquidi xbejnman, ziangajc gol guneenë ree xcompniaridi zagdxe, bèn rliladx ree laaman par guiliesidi xvalor Dios. ⁸ Gol basaaladx guial bi't Cristo loj guidxliuj par gultüüman bèn Israel ree xtiidx Dios, zian bidgaguieenman sirv loj reeman, persi gojc cumplid promejs ni been Dios loj ree xbéngulal reeman, abi' zian biguien guial rüjnqui Dios cumplid xtiidxaman. ⁹ Bi't tée Cristo loj guidxliuj din por laaman, bèn ad najt ree bèn Israel guilies reeman xvalor Dios guial rayaman laa reeman, zi'c ca loj xtiidxaman lod rëb: Xt loj ree bèn ad najt bèn Israel guzatan lùj guial najl benza'c.

Gol téen cant ree par lùj.

¹⁰ Ziangajc rëb zatiblajt loj xtiidx Dios:

Lëjt bèn ad najt ree bèn Israel,
gol babaa zi'c rabaa ree bèn Israel.

¹¹ Zatiblajt loj xtiidx Dios rëb:

Gra ree bén ad najt bén Israel.

Në los demazri ree bejn, gol gules xvalor Dios.

¹² Rëb tëë Isaiás:

Loj xdiaa Isai, grii tijb bén nabee bénguidxliuj ree,
xt ree bén ad najt bén Israel, chililadx laaman.

¹³ Dios bén ragnë dunuj ree ralëjz ree ni caylëjz ree, laaman yagu' luxdoodi zagdxe yabe'cdxe tëëman luxdoodi guial rliladxidi laaman, din cwëz da'tidi ni guneeman por xSprijt Dios.

¹⁴ Compniar raliduladx ree Jesucrist, naj ragbeechaaw guial zagdxe nabandi con ree xcompniaridi, ma ragbee tëëdi zagdxe xhienaag chinalidi xnejz Dios, xt rajc rudëëdidi consejw rulüü tëë xcompniaridi.

¹⁵ Per majsi zian, tio'p choon lajt loj gui'ch guie bacan diidx naa, din yasaaladxidi xhienaag guibandi. Rünan zian por guialrniabee ni ma banee Dios naj, ¹⁶ din gūnan sirv loj Jesucrist. Din da dxiinan naj gulün bén ad najt ree bén Israel xtiidxza'c Dios din guiban reeman zi'c rën Dios, din gac reeman naya niz lojman por xSprijtaman. ¹⁷ Ra'pan xhie gūnnë'n nabë, guial ragnë Jesucrist naj por ree dxiin cayūnan por Dios.

¹⁸ Per achetczi zajc guiën bal id zën guial por Cristo cayūnan laan, din laaman cayagnë naj persi cayūnan yudar bén ad najt ree bén Israel din gac chililadx reeman guzoob tëë reeman xtiidx Dios. Yan ma rliladx reeman laaman por ni rën loj reeman në por guial ruguiaa reeman xhienaag naban, ¹⁹ në guial ma baguiaa reeman sen ree con ree milagr ni ma gojc por xguialrniabee xSprijt Dios. Zian ma gutiechan xtiidxza'c Jesucrist guidibczi, diizd Jerusalén xt guidib niz Ilirico. ²⁰ Din zian naj da xgaban gūnan, gatie'chan xtiidxza'c Jesucrist. Per ad lod ma guzulojt ben ren con dxiin guie, gatiechanan lod ad waguiejntczi reeman xcwent Cristo, ²¹ zi'c ca loj xtiidx Dios lod rëb:

Bén ad waguiejnt ree xcwentaman,

gūünbee reeman laaman.

Guiáad ree bén ad wayagbeet xcwentaman,

gagbee reeman laan.

Riijn Pab xgab cheman Roma

²² Abi' guial wan guidibczi lod ma rnin lojdi, zeel ad wayajct gan guidiganan lëjt, majsi zianczi guyënan nidganan lëjt. ²³ Per yan guial ma gulox gutiechan xtiidx Dios guidib niz guie, abi' guial ma gojc zien iiz ni rënan guidiganan lëjt, ²⁴ zeel rünan xgab guidiganan lëjt chi gan España. Abi' chi gadëëdan guguian lëjt, chi ma gojc tio'p choon dxej yu' luxdooon zagdxe guial za'n con lëjt, dxel ma gūündi naj yudar din gan España. ²⁵ Per yan yaloj gan Jerusalén chigsa'n nan tijb yudar par ree dux compniar ree bén rliladx ree Jesucrist. ²⁶ Din bén Macedonia ree con ree bén Acaya bén rliladx gajc ree Jesucrist, been reeman xgab guto'p reeman yudar guin par ree bénprob zobj ree Jerusalén, bén rliladx ree Jesucrist. ²⁷ Abi' por xixgab reeman guixhiaal reeman yudar guin, per zagdxe naj ni cayüjn reeman din mal nuzëëb reeman loj reeman. Din por ree bén Israel bidxin xtiidx Dios loj reeman, dxel yan laa reeman guial ad najt reeman bén Israel, zagdxen guial gūün reeman yudar bén Israel ree zi'ctzi gac reeman. ²⁸ Zeel chi ma balooxan dxiin guie, chi ma bayün yudar guin, dxel gan España, abi' chi gadëëdan ladxidi dxel guidiganan lëjt. ²⁹ Naj ragbee guial chi guidiganan lëjt, zien da't ni gunee Dad Jesucrist par ganin lëjt.

³⁰ Yan por dux Dad ree Jesucrist në guial rën xSprijt Dios dunuj ree, rniaaban lojdi din güündi naj yudar yarejdx yanaab ree Dios por naj. ³¹ Gol gurejdx gunab Dios din gagnëman naj loj ree bén Judea, bén ad rlıladxt ree Jesucrist, bén gurejdx tëë Dios por dux compniar ree bén rlıladx ree Jesucrist, bén zojb ree Jerusalén din tiëb reeman tia' reeman yudar ni chigsa'nan par laa reeman. ³² Dxel bal gagnë Dios ma chu' luxdon zagdx guidganan lëjt dxel ma zajc yaziiladxan la'tgaj za'n con lëjt. ³³ Dux Dad ree Dios bén rabe'cdxe du luxdoo ree, laaman gagnë gradi. Amén.

16

Rugajpdioz Pab bejn ree

¹ Yan ni gui't Febe ladxidi, béngunaa ni naj dux compniar ree guial ralıduladx ree Jesucrist, bén cayüjn tëë sirv lën yadoo ni zojb guiedx Cencrea. ² Gol baca'man zagdx por Dad Jesucrist, zi'c rayal yaguieennë' ree dux compniar ree bén rlıladx ree Jesucrist. Gol beenman yudar bal xhienin ryaadxaman, din dád zien ree bejn ma beenman yudar nëgajc naj ma beenman yudar.

³ Gol bagajpdioz Aquila con xbéngunaaman Priscila, bén cayüjn ree naj yudar cayguieenan sirv loj Jesucrist. ⁴ Abi' laa reeman xt guzuj reeman loj guialgüjt por naj, zeel rudën quixtëë loj reeman. Abi' ad najtzi rudë quixtëë loj reeman në ree dux compniar ree bén rlıladx ree Jesucrist bén ad najt ree bén Israel rudëë quixtëë loj reeman. ⁵ Gol bagajpdioz ree bén rlıladx Jesucrist, bén rado'p ree lidx Priscila con Aquila. Gol bagajpdioz da miwan Epeneto, bén goc bén yaloj bililadx xtiidx Jesucrist niz Acaya. ⁶ Gol bagajpdioz Li, bén ma been da't lëjt yudar. ⁷ Gol bagajpdioz ree bén ladxan Adrónico con Junias, bén guyu'në' reen ladxguiib. Abi' ree xi apóstoles Jesús dád rën reeman laa reeman, abi' yaloj laa reeman bililadx Jesucrist guial lon.

⁸ Gol bagajpdioz Amplias, da miwan bén rën da'tan guial nayajcan xbejn Jesucrist. ⁹ Gol bagajpdioz Urbano, bén cayüjn naj yudar cayguieenan sirv loj Jesucrist. Gol bagajpdioz tëë da miwan Estaquis. ¹⁰ Gol bagajpdioz Apeles, bén ma balüü guial diidxliczi rlıladxaman Jesucrist, gol bagajpdioz tëë xfamil Aristóbulo. ¹¹ Gol bagajpdioz tëë Herodiön ben ladxan, në ree xfamil Narciso, bén ma rlıladx Jesucrist. ¹² Gol bagajpdioz Trifena në Trifosa, bén cayüjn ree sirv loj Jesucrist. Gol bagajpdioz tëë Pérsida, bén naguieenbee ree guial dád cayüjnman sirv loj Jesucrist. ¹³ Gol bagajpdioz Rufo, bén diidxliczi zinal xnejz Dios, gol bagajpdioz tëë xniaaman, bén rënan zi'c da nan. ¹⁴ Gol bagajpdioz Asíncrito, Flegonte, Hermas, Patrobas, Hermes në gra ree bén za' con laa reeman, bén ma rlıladx ree Jesucrist. ¹⁵ Gol bagajpdioz Filólogo, Julia, në Nereo con bizanman, në Olimpas con gra ree bén rlıladx Jesucrist bén za' ree con laa reeman.

¹⁶ Gol bagajpdioz lasa'di zi'c rayal. Dux compniar ree bén ralıduladx ree Jesucrist bén za' ree guie, rugajpdioz reeman lëjt.

¹⁷ Compniar ralıduladx ree Jesucrist, rniaaban lojdi din gapidi cudad con ree bén rlia' lasa' ree bejn, bén rusquiee ree bejn guial rulüü reeman ni ren ree guial loj ni ma basiididi. Ad guidxga'di laa reeman, ¹⁸ din ad lojt Jesucrist cayüjn reeman sirv, rüjn reeman ni rëntzi reeman, abi' con diidxnagüüdx ne con diidxza'c rüjn reeman gan bén ad ragbeetczi ree o

bèn ad ragbeeza'ct ree xtiidx Dios. ¹⁹ Per lèjt, guidibczi ma ragbee ree bejn guial ruzoobquidi diidx zinalidi xtiidx Dios, dád nix yu' luxdon abi' rénan susindi par güündi ni zagdxe ad par güüntidi ni mal. ²⁰ Dios, bèn rabe'cdxe luxdoo bejn, laaman gagnè lèjt nayob chitéè güünri xindxab lèjt gan. Dux Dad ree Jesucrist gagnè lèjt.

²¹ Rugajpdioz Timoteo lèjt, bèn cayüjn naj yudar con xchiin Dios ni cayünan, nè ree bèn ladxan bèn la ree Lucio, Jasón, nè Sosípater, rugajpdioz reeman lèjt.

²² Nè Tercio, bèn cayüjn gui'ch guie rugajpdioz lèjt por dux Dad ree Jesucrist.

²³ Nètèè Gayo rugajpdioz lèjt, lidxaman za'n, runee tée lidxaman rado'p ree dux compniar ree bèn rliladx ree Jesucrist. Nè Erasto, bèn naj tesorer luguiedx guie nè bèn la Cuarto ben rliladx Jesucrist, rugajpdioz reeman lèjt.

²⁴ Dux Dad ree Jesucrist güünle' gradi. Amén.

Diidx bigra bacaa Pab loj gui'ch guie

²⁵ Radèèn quixtèè loj Dios din laaman zile' gagnè lèjt din gusnuu gag-beedi sudxi'ch téeedi loj xtiidxza'c Jesucrist, zi'c ma balüün lèjt xhienaag din gaquidi perdon. Din zian naj xixgab Dios diizd chi gad guidxliuj gacchaaw, xgab ni ad gogbeet ree bejn diizd guia'xchej. ²⁶ Per yan ma rayagbee ree xhienaag naj xixgab Dios, ma rayagbee ree por ree gui'ch ni bacaa ree bèn badèè xtiidx Dios loj ree bejn zi'c gunabee Dios laa reeman, bèn naban goctèèz. Abi' guidibczi care'ch xtiidx Dios din chililadx ree bejn Jesucrist guzoob tée reeman xtiidxaman.

²⁷ ¡Tijbzi Dios, bèn rajc gradooczi, rayal yaya'p reeman respejt zianczi por Dad Jesucrist! Amén.

Gui'ch yaløj ni guxhaal San Pabl loj ree bèn Corinto rliladx Jesucrist

Rxhial Pab xtiidx Dios

¹ Naj Pab, Dios bacaabee naj gacan tijb xi apóstol Jesucrist. Za' Sóstenes guie con naj, bèn rliladx Jesucrist. ² Caxhalan gui'ch guie par lèjt najdi bèn rliladx xtiidx Dios luguiedx Corinto, lèjt guial ma nayadi delant loj Dios por Jesucrist, abi' ma bacaabee Dios lèjt gaquidi xbejnman bacaabee tëëman gra ree bèn gra lad bèn rliladx ree Jesucrist, bèn naj Dad par dunuj ree në par laa reeman. ³ Dux Dad ree Dios në Dad Jesucrist gũnle' lèjt, yabe'cdxe tëë reeman luxdoodi.

Rudëed Pab quixtëe loj Dios

⁴ Gra dxejczy rudëdan quixtëe loj Dios por lèjt zi'c ma gognëman lèjt guial rliladxidi Jesucrist. ⁵ Në guial najdi tijbzi con Jesucrist dád ma gognë Dios lèjt, baneeman lèjt quiarguiejn din guinieedi chignia' tëedi xtiidxaman. ⁶ Zian rguien guial diidxli naj ni ma biguiejndi por Cristo diizd chi guzuloj bililadxidi laaman. ⁷ Abi' zianczy rajpidi xyudar Dios la'tgaj rbëzidi dxej ni gui't Jesucrist zatijb. ⁸ Abi' Dios gagnë lèjt din sudxi'chidi guidiblagaa loj ni rliladxidi laaman, chitëe xhie xtolidi chu' dxej ni gui't dux Dad ree Jesucrist zatijb. ⁹ Din Dios diidxli rüjn xtiidxaman cumplid, abi' laaman naj bèn gule lèjt din gaquidi tijbzi con dux Dad ree Jesucrist.

Ad rayalt la' lasa' ree xbejn Jesucrist

¹⁰ Compniar raliduladx ree Jesucrist, rniaaban lojdi por Jesucrist din guidxag cwedi, ad gaquidi tio'p lala', tijbzi gol gojc, tijbzi xgab gol been. ¹¹ Rnin lojdi zian compniar raliduladx ree Jesucrist, din ma gogbeen guial yu' wadijl entr lèjt, zian bagojn ree xfamil Cloé naj. ¹² Guial garent garen rëb ree bejn, yu' reeman rëb: “Naj naj xbejn Pab”, yu' tëë reeman rëb: “Naj naj xbejn Apolos”, yu' reeman rëb: “Naj naj xbejn Bëd”, yu' tëë reeman rëb: “Naj naj xbejn Cristo.” ¹³ Per naj rni lojdi guial Cristo tijbzi najman, din ad najt güt loj crüjz por lèjt, ad gurobnijs tëëtidi par gaquidi da bejnan. ¹⁴ Quixtëe Dios chi wan ladxidi achut mazri barobnijsan, Crispozi në Gayo. ¹⁵ Chitëe guiebidi guial gurobnijsidi par gaquidi da bejnan. ¹⁶ Barobnijs tëën xfamil Estéfanas, per ad rusaaladxtran chu mazri barobnijsan. ¹⁷ Din ad guxhaalt Cristo naj par gurobnijsan bejn ree, guxhaalaman naj par gatie'chan diidx xhienaag gap bejn perdon loj Dios. Ad cane tëëtan con diidx ni yadxaløj ree bejn naj luar cu'guijc reeman par xhie gũjt Cristo loj crüjz.

Xguialrniabee Dios në xquiarguiejnman

¹⁸ Gra ni raguie'ch ree guial por xhie gũjt Cristo loj crüjz, achet lasajcan par ree bèn zë loj nejz mal. Per par dunuj ree guial ma raya'p ree perdon, dád lasajc xguialgũjtaman din zian rayagbee ree xhienaag naj xguialrniabee Dios. ¹⁹ Abi' loj xtiidx Dios rëb: Gunijtan xquiarguiejn ree bèn ni rëb guial rajc da't reeman, abi' gusajyan xquiarguiejn ree bèn ni rëb guial rignia' da't reeman.

²⁰ Yan, ¿con ree bén rëb guial rajc da't reeman? ¿Con ree mextr rajc ley? ¿Con ree bén rëb guial rajc da't reeman xcwent ree ni yu' loj guidxliuj? Par Dios achet lasajc xquiarguejn bénguidxliuj. ²¹ Abi' por xquiarguejn Dios ragbeechaawaman guial ad zayünbeet bénguidxliuj laaman por xquiarguejn reeman, zeel beenman xgab yabëëman bejn loj casti por xtiidxaman ni caylün bejn ree. Abi' ree bén yarii loj casti guin laa reeman naj bén rliladx laaman, majsi par ree ben ren achet lasajc ni canin por Cristo.

²² Din bén Israel ree rën reeman guguaa reeman milagr din chililadx reeman, abi' ree bén ad najt bén Israel rën reeman guien reeman ni mazri nawëëg din chililadx reeman. ²³ Per dunujn ni caylün bejn ree naj par xhie güjt Cristo loj crüjz, abi' ree bén Israel rdxe'ch reeman, guiaad par ree bén ad najt bén Israel achet sirv rüjn ni caylün. ²⁴ Per par ree bén ma bacaabee Dios, zi'c ree bén Israel zi'c ree bén ad najt bén Israel, por Cristo rguien xguialrniabee Dios në xquiarguejnman. ²⁵ Din ni rulüü achet lasajc guial ni rüjn Dios, laan naj ni mazri lasajc loj xguialrajc bénguidxliuj. Abi' xt ni bigra xguialrniabee Dios laan naj ni mazri lasajc loj xguialrniabee bénguidxliuj. ²⁶ Gol gogbee compniar raliduladx ree Jesucrist guial ta'nzi ree bén rliladx laaman naj bén rignia' zi'c naladx ree bénguidxliuj, ta'nzi ree bén rliladx laaman rajp guialrniabee loj guidxliuj guie, abi' ta'nzi ree bén rliladx laaman naj ree bén za loj ree famil ni naj bén zojbloj. ²⁷ Abi' Dios gulej ree bén ni naladx ree bejn ad rajcza'ct din yaya'nxtu ree bén rajc da't, gulej tëëman bén ad ca't ree guialrniabee din yaya'nxtu ree bén ca' guialrniabee. ²⁸ Dios gule ree bén ni naladx ree bejn guial achet sirv laa reeman, bén ni naladx ree bejn guial achet lasajc reeman, bén ni achut naj loj guidxliuj guie din chiquiedaman xguialdxal ree bén naj ree chunin loj guidxliuj guie. ²⁹ Zianan zeel achut zajc güün benro' delant loj Dios. ³⁰ Yan por Dios ma najdi tijbzi con Jesucrist, dxel por laaman rtia'di xguialrajc Dios. Abi' guial raliduladx ree Jesucrist ad zayaltri ree casti, por laaman ma naya ree, nayajc tëë ree par laaman abi' ma raya'p ree perdon loj Dios. ³¹ Zianan din gac zi'c rëb loj xtiidx Dios lod rëb: “Bal yu' bén rën guilies xvalor gajc, luar güündi zian gol gules xvalor dux Dad ree Jesucrist.”

2

Xtiidx Jesucrist bén cwa loj crüjz

¹ Compniar raliduladx ree Jesucrist lëjt ragbee guial chi wan ladxidi, chi gunen xtiidx Dios lojdi, ad gunetan lojdi con ree diidx nabee o con ree diidx nawëëg par chignia'di. ² La'tgaj guzun con lëjt ad gunetan diidx ren ree lojdi, tijbzi xcwent Jesucrist bén cwa loj crüjz. ³ Abi' chi wan ladxidi zi'c tijb bén ni ad yu't gojl, rniiczán guial rdxeban bialan lojdi. ⁴ Në chi gunenë'n lëjt, chi gunen xtiidx Dios lojdi, ad gunenë'tan lëjt con ree diidx ni günan lëjt gan por da diidxan, benan gan rliladxidi Jesucrist por xyudar xSprijt Dios në xguialrniabeeman. ⁵ Din guiguien guial ni rliladxidi Jesucrist zëëdan por xguialrniabee Dios ad por xguialrajc bénguidxliuj.

Por xSprijt Dios nünbee bejn laaman

⁶ Majsi chi ralüün bén ni ma rajc ree mazri xtiidx Dios, ralüün laa reeman por guialrajc. Per ad por guialrajc ni yu' loj guidxliuj guie, lasa'

gualrajc ni rajp ree bèn rniabee, gualrajc ni yu' dxej nit. ⁷ Ralüün laa reeman por gualrajc ni zëed por Dios, din yanee ree zi'c naj xixgab Dios, xgab ni goc ni naguie'ch par ree bénguidxliuj, abi' xgab guin naj gual chililadx reeman Jesucrist, diizd chi gad guidxliuj gacchaaw been Dios xgab guin din gac yayal ree xanyabaa. ⁸ Laan naj tijb ni ad gogbeet ree bèn rniabee loj guidxliuj guie, din bal niagbee reeman dxel ad nucaat reeman dux Dad ree Jesucrist loj crüzj, bèn ca' gualrniabee. ⁹ Per loj xtiidx Dios rëb:

Achut waguiaa, achu tëet wagueijn
abi' ni'quid wayüjnt bénguidxliuj xgab
por ni nagu'chaaw Dios par ree bèn rën laaman.

¹⁰ Per dunuj ree ma balüü Diosan duloj ree por xSprijtaman bèn naban con dunuj ree, din xSprijt Dios gran ragbeeman, xt ni mazri naguie'ch ni zëed por Dios.

¹¹ Achut ragbee xhie xgab cayüjn tijb bejn. Xsprijtsaman ragbee xhie xgab cayünman. Ziangajc xSprijt Dios tijbzi laaman ragbee xhienaag naj xixgab Dios. ¹² Abi' dunuj ree gual ma zunaal ree xnejz Dios, ad nabajnt ree con tijb sprijt ni zëed loj guidxliuj guie, ma nabajn ree con Sprijt zëed loj Dios, din por xSprijt Dios yayagbee ree gra ni ma bazaladx Dios duloj ree gual najman benza'c. ¹³ Abi' laa reen naj ni caylüün bejn ree, per ad por dux quiarguejntan, xSprijt Dios culüü dunujn xhienaag yanen. Zian ralüün xcwent Dios bèn ma nabannë xSprijtaman.

¹⁴ Per bèn ad nabannët xSprijt Dios ad rliiladxtaman ni zëed ree por Dios ni rulüü xSprijt Dios dunuj ree, din par laaman najn tijb ni ad rüjnt sirv. Zeel ad zajct chignia'man xcwent Dios din con xSprijtzi Dios zajc chignia' bejn ni rën guiëban. ¹⁵ Per bèn ma nabannë xSprijt Dios por Sprijt guin rignia'man ni naj xcwent Dios, abi' ni'qui tijb ree bèn ad nabannët xSprijt Dios ad rignia't chexc zeel rignia'man ni guin ree. ¹⁶ Loj xtiidx Dios rëb: “¿Chu ma bignia' xixgab Dios? ¿Chu zajc gulüü Dios ni güünman?” Per dunuj ree, naj dux xgab ree zi'c xixgab Cristo.

3

Compniar rüjn ree sirv loj Dios

¹ Compniar raliduladx ree Jesucrist, chi guzun con lëjt ad gunenë'tan lëjt zi'c ree bèn ma nabannë xSprijt Dios, gunenë'n lëjt zi'c ree bèn ad nabannët xSprijt Dios, zi'c ree bèn qui guzuløjri rliiladx Jesucrist. ² Diidx ad nawëëgt ree gunenë'n lëjt zi'c rudëe bejn lejch loj tijb xindobëz gual xo gawix ni raw bengol, zian gunenë'n lëjt diidx ad nawëëgt ree. Abi' ni'qui yan ad zile't ganenë'n lëjt zi'c ree bèn ma rignia' mazri xtiidx Dios. ³ Din sta nabandi zi'c naban gra ree bénguidxliuj. Nadëdloj lasa'di rdil tëedi, zian rguien gual sta nabandi zi'c gra ree bénguidxliuj bèn ad zinalt ree xnejz Dios. ⁴ Din chi rëbidi: “Naj naj xbejn Pab”, o chi rëbidi ya: “Naj naj xbejn Apolos”, zian rguien gual sta cayüjndi zi'cgajc chutëez bénguidxliuj.

⁵ Per naj rni lëjt: ¿Chu naj Pab o chu naj Apolos? Gol gogbee gual nayajczan tio'p ree bèn cayüjn sirv loj Dios persi bile' bililadxidi tijb gajc dunujn cayguieen dxiin ni banee Dios dunujn. ⁶ Yaguie'ch ree gual naj naj zi'c bèn rxübin abi' Apolos naj bèn rguuil, per por Dios cayagbeedi mazri xtiidxaman zi'c rusni'saman tijb cwaandoo. ⁷ Abi' zi'c bèn rxübin zi'c bèn caguuil mandadzi cayüjn reeman, Diosan naj

bèn ni rusni's ni rxübin reeman. ⁸ Yan ziangajc naj con Apolos tijbzi mandad cayguieenan, rayagbeen guial zune Dios dunujn ni rayalan bal xhienaag yaguieenan mandad ni baneeman yaguieen tijb gaj dunujn. ⁹ Zeel naj con Apolos nayajcan compniar cayguieenan xmandad Dios.

Yaguie'ch ree lëjt naj xguiniaa Dios lod cayguieenan dxiin o lëjt naj zi'c tijb yu ni cayüjn Dios. ¹⁰ Abi' naj guial catiechan xtiidxaman najn zi'c tijb albanil bèn ni rajp da't cudad din grii xchiinman zagdxe guial bacaabeeman naj gūnan xcimiant yu guin. Abi' ree bèn ni cusnuu culüü xtiidx Dios, laa reeman naj zi'c bèn cusnuu cayüjn yu guin. Per rayal gap reeman cudad xhienaag cales reeman yu guin, ¹¹ din achut zajc guchaa cimiant ni ma benan, abi' cimiant guin naj guial rililadx Jesucrist. ¹² Abi' ree bèn ni cayguie'ch ree naj ree bèn ni cusnuu cales yu loj cimiant ni cayguie'ch ree naj guialrililadx Jesucrist, bal cayüjn reeman laan con or o con plajt o con ree guiaj zagdxe o con yag o con biqui o con balagya'. ¹³ Per chi guidxin dxej ni gūn Dios xguialguxtisaman, dxel guiguien xhienaag naj xchiin reeman. Din dxej guin gac zi'c chi rajc prueb xhienin loj guij din guiguien xchiin tijb gaj bejn. ¹⁴ Abi' bal rüjn sirv ni beenman zi'c tijb bèn ni ruzoob tijb yu ni ad re'ct, zaca'man ni rayalaman por ni beenman. ¹⁵ Per bal che'c ni beenman, sacaman zi'c tijb bèn ni re'c lidx abi' penz rliaaman loj bajl, din zajcaman perdon per gusëebaman gra.

¹⁶ Zeel gol gogbee guial lëjt naj zi'c tijb xyadoo Dios guial nabandi con xSprijt Dios. ¹⁷ Abi' bal chu bèn guitie'chdojn bèn rililadx ree Jesucrist, zunidloj Dios laaman guial ruse'nman xyadoo nagle'man ni canin naj lëjt guial najdi xbejnman.

¹⁸ Ad gusquiee lëjt gajc. Bal yu' tijbidi naladx guial rajc da'tidi guial loj ree bejn, zagdxeli gol been naya din gaquidi diidxli bënrajc da't. ¹⁹ Din delant loj Dios achet lasajc guialrajc bênguidxliuj, tib lajt loj xtiidxaman rëb: “Ad rudëet Dios mod grii zagdxe ni naj xixgab ree bèn naladx guial dád nasin reeman par gūn reeman tijb ni ad najt xnejz.” ²⁰ Rëb tëe loj xtiidxaman: “Dios ragbeechaaw guial xixgab ree bèn rajc da't achet lasajcan.” ²¹ Zeel ad rayalt chu guilies xvalor gajc guial najman xbejn tijb bejn o stijb bejn. Din xieendi ma naj gra. ²² Ma nulendi dunujn, naj Pab, Apolos nè Bëd. Xieendi naj guidxliuj, guialnaban, guialgüjt, ni yu', nè ni qui chu'ri, xieendi naj gra. ²³ Abi' lëjt ma najdi xbejn Cristo abi' Cristo naj Xi'n Dios.

4

Dxiin ni been ree bèn naj ree xi apóstoles Jesús

¹ Gol baguiaa dunujn zi'ctzi xmojs Cristo par yasiidan bejn ree xhien-aag naj xixgab Dios, xgab ni naguie'ch par bejn. ² Per lëjt ragbee guial tijb mojs naj par gūnman gra ni rayal gūnman din gap reeman laaman confianz. ³ Zeel ad rutan xgab bal xhienaag ruguiaadi naj o bal xhienaag ruguiaa ree guxtis naj, din ni'qui naj ad zajct ganin xhienaag najn. ⁴ Din majs bal naladxan guial achet ni mal wayūnan per ad por ziant ma ganin guial achet da faltan niz loj Dios, tijbzi dux Dad ree Jesucrist ragbee xhienaag cayūnan. ⁵ Zeel ad rayalt yadxa lojdi chu cayüjn zagdxe o chu ad cayüjnt zagdxe, gol basa'n ree ni guin par dxej ni gui't Dad Jesucrist. Laaman gusguien conin naj diidxli, o bal wali ree baguieen ree xmandaman guidib du luxdoo ree, dxej guin yayagbee ree xhie diidxza'c guiniee Dios por tijb gaj dunuj ree.

⁶ Compniar raliduladx ree Jesucrist, gra ree ni canin lèjt wen par lèjtan. Abi' Apolos con naj nayajcan tijb ejempl par lèjt, din por dunujn gusiididi ad tèdlaj guiliesidi xvalor bejn chitèè por zian gusa'ndi trajs stijb bejn. ⁷ Din ni'gui tijb bejn ad lasajct mazri loj stijb bejn. ¿O xhie rajpidi ni ad baneet Dios lojdi? Abi' bal por laaman rajpidi ni rajpidi, ¿chexc zeel rlies xvalorgajquidi zi'c ruluü ad por Diost rajpidi laan?

⁸ Lèjt naladxidi achet ryaadxidi, guial ma bayaaløj rignia'di abi' ad ryaadxtridi dunujn. Abi' naladxidi najdi zi'c ree rey. ¡Per xinix niajquidi rey din nanabeen con lèjt! ⁹ Yu' dxej naladxan guial dunujn nayajcan xi apóstoles Jesús, Dios basial dunujn yayajcan zi'c ree bèn ad lasajct, zi'c ree benmal ni rayal guialgüjt, abi' radxaløj ree anjl nè ree bénguidxliuj dunujn. ¹⁰ Abi' la'tgaj nayajcan zi'c ree bèn ad yu't xquiarguejn par bénguidxliuj guial ratie'chan xtiidxza'c Cristo, lèjt rlies xvaloridi guial rignia' da'tidi guial riladxidi laaman. Dunujn nayajc zi'c bèn ad yu't gojl guiáad lèjt naladxidi yu' da'tidi gojl abi' rajp ree bejn lèjt respet guiáad dunujn ad rént reeman dunujn. ¹¹ Xt yandxej sta cayzaagdajjn por guialrliaan, guial re'c nijs nè guial ryaadx du xaban. Cienloj ni rüjnnè ree bejn dunujn, achet du lidxan. ¹² Abi' dád radxagan raguieenan dxiin din guidxel ni yadaawan. Chi ruzaal ree bejn diidxmal du guijcan radxi'nan con diidxza'c, abi' radaanan ni rüjnnètzi reeman dunujn. ¹³ Abi' chi rnieeguijdx reeman dunujn, raneeza'cnè'n laa reeman. Xt yan nayajcan zi'c tijb guix par bénguidxliuj, nayajcan zi'c tijb ni ad rüjnt sirv par laa reeman. ¹⁴ Ad cucatan gui'ch guie par gusa'nxtun lèjt, cucan laan din gunen lèjt consejw zi'cgajc da xi'n reen guial rënan lèjt. ¹⁵ Din majsi gapidi zi'c chii mil ree bèn gusiid lèjt, per najzi naj zi'c tijb Dad par lèjt. Din por naj guzuløj riladxidi Jesucrist chi basidan lèjt xtiidxza'caman. ¹⁶ Zeel rniaaban lojdi din guibandi zi'c nabanán.

¹⁷ Din par zian rxhialan Timoteo guitixlojman lèjt, bèn rënan zi'c da xi'nan laaman diidxli riladxaman Jesucrist. Laaman gusaaladx lèjt xhienaag nabanán guial riladxan Jesucrist, din zi'c nabanán naj ni cusidan bèn riladx ree Jesucrist gra lod ran. ¹⁸ Yu' ree xcompniaridi naladx guial ad zitixlotran lèjt abi' rlies xvalor reeman guial naban reeman zagdxe. ¹⁹ Per Dios gunee permis din diob guitixlon lèjt dxel gag-been wali reeman ya naban reeman zi'c rniee reeman o rnieez reeman. ²⁰ Din guial guiban zi'c rniabee Dios ad najtan diidxzi, rayal güün bejn zi'c rniabee Dios con xguialrniabeeman. ²¹ Yan, ¿conin rëndi günan chi guitixlon lèjt, gadilè'n lèjt ya o guiënan lèjt ganenè'n lèjt diidxza'c?

5

Xhienaag gac con bèn rüjn tijb dol

¹ Ma bacagdiagan guial tijb lèjt bèn riladx ree Jesucrist nabannè xnarojpidi zi'c lacheelidi, ni'quiza ree bèn ad nünbeet Dios ad rüjnt lasa' dol guin. ² Abi' lèjt rüjndi benro', luar rüjndi benro' gol guyunaya gol babèè tèè bèn guin lojdi. ³ Majsi ad za'tan con lèjt, per rünan xgab por lèjt zi'cgajc ruluü za'n con lèjt, abi' ma benchaawan xgab xhie rayal bèn rüjn dol guin. ⁴ Zi'c guialrniabee ni baneé Jesucrist naj, naj rni lèjt: “Gol bachajg lasa'di.” Dxel gol gunaladx guial za'n con lèjt abi' por xguialrniabee Dad Jesucrist, ⁵ gol been bèn guin tiblåd, gol basa'nman loj xindxab din gagnaaman o sagdiajman por ni cayüjnman din gacaman perdon dxej ni gui't dux Dad ree Jesucrist.

⁶ Ad nixtan guial rlies xvalorgajquidi abi' rtiëjbidi rajc lasa' ree dol guin. Gol gogbee guial zi'c rüjn levadur cob par guidaxtil ziangajc con tijb bèn güün dol ma zë gajcan zian con gra ree lasa'di. ⁷ Zeel gol been naguiejn din gaquidi naya zi'c cob harin ni ad yu't levadur guijc. Din zi'c bagüjt ree bejn tijb xiil lanij pascw din yaya xtol reeman, ziangajc dunuj ree por xguialgüjt Jesucrist ma naya ree loj Dios. ⁸ Abi' guial yabaa ree por zian naj guial yabajn ree guidib du luxdoo ree zi'c rayal, zi'c guidaxtil ni ad no'cht levadur, luar yabajn ree con ree ni mal në ree dol zi'c babajn ree yaløj.

⁹ Abi' zi'c ma rnin lojdi loj stijb gui'ch ni ma guxhalan lojdi, ad guchajquidi bèn naban ree nadxuudx. ¹⁰ Ad canenë'tan lëjt zian por ree bèn ad rliladxt Dios, bèn naban ree nadxuudx o rzëëbladx reeman ni ruguiaa'tzi reeman o naj reeman gubaan o rën reeman ni ren luar guiën reeman Dios, din bal zianan dxel ryaadx yariidi loj guidxliuj guie. ¹¹ Bèn ni canin lëjt naj ree bèn ni rëb naj ree xcompniaridi, bèn rliladx ree Jesucrist abi' naban reeman nadxuudx, o rzëëbladx reeman ni ruguiaatzi reeman, o rën reeman ni ren ree luar guiën reeman Dios, o rbëë reeman xtiidx bejn, o naj reeman bengu', o bëngubaan. Xcompniaridi bèn naban ree zian ni'quid rayalt gawnëdi laa reeman. ¹²⁻¹³ Ad da cwenttan naj ganen por ree bèn ni ad najt dux compniar ree loj ni raliduladx ree Jesucrist bal rajp reeman dol o ad rajpt reeman dol, Dios naj bèn güün guialguxtis con laa reeman, per dux cwent ree naj guial yazuxnejz ree bèn naj ree dux compniar ree bèn rliladx ree Jesucrist. Zeel gol babëë bën cayüjn dol entr lojdi.

6

Chi yu' wadijl entr ree bèn rliladx Jesucrist

¹ Zi'c chi xhie rzajcnë tijb xcompniaridi bèn rliladx Jesucrist, ¿chexc zeel rëjdi loj guxtis din yabëëxnejzaman ni rzajquidi luar chedi loj ree xcompniaridi bèn rliladx ree Jesucrist? ² ¿Id rliladxidi ya guial yu' dxej bèn rliladx ree Jesucrist laa reeman naj bèn güün xguialguxtis loj ree bénguidxliuj? Abi' bal yu' dxej güün xguialguxtis reeman loj bénguidxliuj, ¿chexquiza zeel ni ad nawëëgt ni rzajc ree xcompniaridi ad rajct rabëëxnejzidi? ³ ¿Id ragbeedi ya guial xt loj ree xianjl Dios yu' dxej yaya'p ree guialrniabee? ¿Abi' xt mazri zile' yalëëxnejz ree ni cayza'c ree loj guidxliuj guie! ⁴ Zeel zi'c chi xhie rzajcnë lasa'di, ¿chexc zeel zëdi loj ree bèn ad najt xbejn Cristo din yabëëxnejz reeman ni rzajquidi? ⁵ Canin lëjt ni guin ree din yatu lojdi. ¿Wen nid yu'czi tijb lëjt zajc yabëëxnejz ni rzajc lasa'di ya? ⁶ Per lëjt luar güündi zian aal rudëëd lasa'di loj ree bèn ni ad rliladxt Dios.

⁷ Abi' natun guial gudëëd xcompniaridi loj guxtis guial cadilidi, mejorli gol gudaan ni rüjnnë reeman lëjt. Mejrli tiëbidi cuan reeman xieendi. ⁸ Per luar güündi zian, lëjtli cayüjn ree ni mal guin con ree xcompniaridi bèn rliladx ree Jesucrist. Rtia'di xieen reeman abi' rüjnnëdi laa reeman ni ad rayalt güünnëdi laa reeman.

⁹ ¿Id ragbeedi ya guial bèn naj ree benmal ad zut reeman loj xguialrniabee Dios? Gol gogbee guial loj xguialrniabee Dios ad zut ree bèn ni naban ree nadxuudx, në ree bèn rën ree ni ad najt ree Dios, në ree bèn za'në bèn ad najt lacheel reeman, në ree xinguaaaw rüjn zi'c béngunaa në ree xin rën lasa' xinguaaaw zi'c béngunaa. ¹⁰ Në ree béngubaan, në ree bèn

rzëëbladx ni ruguiaatzi reeman, nè ree benguu' con ree bèn rnieeguijdx bejn, nè ree bèn raguiil xhienaag chiquied reeman xieen bejn, ad zut reeman loj xguialrniabee Dios. ¹¹ Yu'di gubajn zian guia'xchej, per yan ma nayadi delant loj Dios, ma najdi par Dios, abi' ma nayabidi zi'c tijb bèn ni ad wayüjnt dol por xguialrniabee Dad Jesucrist nè por xSprijt Dios bèn ma nabannëdi.

Dux cuerp ree naj par Dios

¹² Walican zajc yaguieen ree zi'ctzi rayën ree, per ad gratan naj zagdxe par güün bejn. Zajc günan zi'ctzi rënan, per ad zatiëëbtan xhie nabee naj. ¹³ Yu' ree bejn rëb: “Guialraw naj par lën bejn, abi' lën bejn naj par guialraw.” Walican, per gunidloj Dios grop ree ni guin. Per ad walitan guial xcuerp bejn naj par güünman ni dxuudx ree con bèn ad najt lacheelaman. Din dux cuerp ree naj par Dios, abi' laaman rniabee dux cuerp ree. ¹⁴ Dxel zi'c basban Dios dux Dad ree Jesucrist, ziangajc yasbanman dunuj ree por xguialrniabeeman.

¹⁵ Gol gogbee guial ma najdi tijbzi con Cristo, guial dux cuerp ree ma naj tiblia' xcuerpaman. ¿Wen yaca' ree xcuerp Cristo ya ni cayguie'ch ree naj dux cuerp ree par yunë' ree tijb béngunaa dxuudx? ¿Ad rayalt gac zian! ¹⁶ ¿Nid ragbeedi ya guial chi runë bejn tijb bèn ni ad najt lacheelaman, dxel ma najman tijbzi con bendxuudx guin? Lëjt ragbee guial loj xtiidx Dios rëb: “Grop reeman ma naj tijbzi.” ¹⁷ Per bèn ni ma naj tijbzi con dux Dad ree Jesucrist, najman tijbzi con laaman por xSprijt Dios.

¹⁸ Gol gojp da't cudad ad güündi ni dxuudx ree con bèn ad najt lacheelidi. Xhietëez dol ren ad ruxhiintan xcuerp bejn zi'c rxin xcuerpaman chi rüjnman ni dxuudx con bèn ad najt lacheelaman. ¹⁹ Din gol gogbee guial lëjt naj xyadoo xSprijt Dios bèn ma baneeman lojdi, dxel zian zi'c ma nabandi con xSprijt Dios ad rniabeetri lëjt gajc. ²⁰ Din par zian gudijx Jesucrist por dunuj ree chi gütaman loj crüz. Zeel gol beennë xcuerpidi dxiin par güündi Dios bèn zøjbloj, din laaman naj bèn rniabee lëjt.

7

Consejw xcwent guialruxhliaa

¹ Yan, yadxi'n diidx xcwent ni gunabdiidxidi naj loj gui'ch ni guxhaalidi lon. Naj rni zagdxe naj guial ad zuxhliaat bejn. ² Per chitëë güün bejn dol con stijb bejn, zagdxen guial tijb gaj xinguaaaw chu' lacheel o tijb gaj béngunaa chu' lacheel, ³ din gudëë xinguaaaw guin gust lacheelix abi' béngunaa guin gudëëzaman gust lacheelaman. ⁴ Din chi ma baxhliaa tijb béngunaa ad laatraman rniabee xcuerp, xinguaaaw guin naj xin rniabee laan. Ziangajc chi ma baxhliaa xinguaaaw, ad rniabeetri xcuerpix, béngunaa guin ma rniabee laan. ⁵ Zeel xinguaaaw nè béngunaa ad rayalt gudxoon xcuerpidi loj lacheelidi. Per bal ma bedi diidx con lacheelidi guial ad zugaalt lasa'di tio'p choon dxej din cwedx guiniabidi Dios, zagdxen. Per chi ma gudëd ree dxej guin, gol bachajg lasa'di stijb chitëë güün xindxab lëjt gan con ree xixgabidi.

⁶ Ad canitan lojdi guial najczi guxhliaa bejn, per ad ni maltan guial guxhliaadi. ⁷ Da xgaban naj guial xi nix gra ree bejn gac zi'c naj, per tijb gaj bejn ma bazaladx Dios xquiarguejnman guial xhienaag guibanman, bal guxhliaaman o bal id zuxhliaaman.

⁸ Par ree bèn xtijb nè par ree béngunaa bizëjb, naj rni guial zagdxeli yaya'n reeman zi'c naj. ⁹ Per bal id zadaan reeman guial ad zuxhliaat

reeman, dxel zagdxeli guxhliaa reeman luar gud d xcuerp reeman casti guial taan reeman.

¹⁰ Gui ad ree b n ma baxhliaa, ad da diidxtanan ganin lojdi, xtiidx dux Dad ree Jesucristan guial ad zaro'nt b ngunaa lacheelaman. ¹¹ Per bal tio'n lacheelaman ad rayalt guxhlian man xin ren, zagdxeli naj yachajg lasa' reeman stijb. Ziangajc xinguaaw ad najt yala' lacheelix.

¹² Yan, ni ganin ad ni guneet dux Dad ree Jesucristan, per naj rni lojdi: Bal yu' xinguaaw rliladx Jesucrist abi' lacheelix ad rliladxt, abi' bal par b ngunaa guin achet g n n, dxel ad najt yala' lasa' reex. ¹³ Ziangajc bal rliladx b ngunaa guin abi' lacheelaman ad rliladxt, abi' bal par xinguaaw guin achet g n n, dxel ziangajc ad rayalt yala' reeman. ¹⁴ Din xinguaaw ni ad rliladxt Jesucrist, z jnle' Dios laax guial rliladx lacheelix. Gui ad b ngunaa ni ad rliladxt Jesucrist z jnle' Dios laaman guial rliladx lacheelaman, zian g n nle' Dios xi'n reex. Din bal id naj zian, ad nayabt xi'n reex loj Dios zi'c tijb b n ni ad way jnt dol. ¹⁵ Per bal xinguaaw o b ngunaa ni ad rliladxt Jesucrist r nman yala' lacheelaman guial rliladx lacheelaman Jesucrist, yala'ri reeman. B n rliladx ad zajct g n nman naguiejn guibann  lacheelaman laaman din ad gurejdx Dios dunuj ree par yabajn ree con wadij. ¹⁶ Din b ngunaa guin ad ragbeetaman bal g n nman gan chililadx lacheelaman, o bal xinguaaw guin ma rliladx dxel ni'qui laax ad ragbeet bal g n n gan chililadx lacheelix.

¹⁷ Naj rni guial tijbgaj ree b n ni ma rliladx Jesucrist rayal guiban reeman loj guidxliuj guie zi'c ma bacaabee Dios laa reeman, yaya'n reeman zi'ctzi naj reeman chi guzuloj rliladx reeman Jesucrist. Zianan naj ni cay n loj ree dux compniar ree b n rliladx ree Jesucrist g n n reeman. ¹⁸ Bal tijb bejn chi guzuloj rliladxaman Jesucrist mal yu'man sen ni ru ree b n Israel, yaya'nraman zian. O bal id yu'man sen guin chi guzuloj bililadxaman Jesucrist, ad najt chu'man sen guin. ¹⁹ Din achet g n n bal yu' bejn sen guin o ad yu'taman sen guin, ni mazri lasajc naj guial g n nman zi'c rniabee Dios. ²⁰ Zeel gol baya'n zi'c najdi chi guzuloj bililadxidi Jesucrist. ²¹ Bal najl zi'c b n nado' chi guzuloj bililadxil laaman, ad najtan ni chu'l xgab xhienaag g n n. Per bal zile' ad zajctril zi'c b n nado', mazri zagdx  barii loj ni najl zi'c b n nado' guin. ²² B n ni naj zi'c b n nado' chi guzuloj bililadxaman Cristo ma najman zi'cgajc b n ni ad najt zi'c b n nado' par g n nman sirv loj Cristo. Abi' b n ni ad najt zi'c b n nado' chi guzuloj bililadxaman Cristo, dxel Cristo ma rniabee laaman. ²³ L jt ragbee guial ma gudijx Jesucrist zro' por l jt, yan ma najdi par Dios. Ad rayalt ti bidi nabee ree b nguidxliuj l jt con ree ni rusquiee. ²⁴ Zeel rnin lojdi compniar raliduladx ree Jesucrist, gol baya'n zi'c najdi chi guzuloj bililadxidi Jesucrist.

²⁵ Yan l jt b n ad waxhliaat ree, dux Dad ree Jesucrist achet r baman por zian. Per naj zajc gunen l jt consejw xhienaag g n ndi, abi' da xgaban naj guial zaliladxidi ni ganin lojdi din guial raya Dios naj bacaabeeman naj cay nan mandad ni cay nan. ²⁶ Zeel naladxan guial zi'c naj tarbajw ni cayd d ree yan, zagdxeli naj guial ad zuxhliaatidi. ²⁷ B n ni ma baxhliaa ad najt gusa'n lacheelaman. Gui ad b n ni ad waxhliaat ad rayalt g n nman naguiejn guxhliaaman. ²⁸ Per bal r jnle' xgab guxhliaal, ad dolt naj guxhliaal. Ziangajc ree biinxd b ni r n guxhliaa, ad dolt naj guxhliaa reem. Per rugojnan l jt guial zienloj naj ni rzajc b n ruxhliaa, abi' laan ad r ntan saquidi.

²⁹ Ni rēnan gagbeedi naj guial ma caydop ree dxej ni zio'p ree loj guidxliuj guie par yaguieen ree xmandad Dios. Zeel bèn ni ma baxhliaa ree gol been sirv Dios xt lod guneetzan lējt zi'cgajc ree bèn ni ad waxhliaat. ³⁰ Ni'qui guialrabaa, ni'qui guialrunaya, ni'qui guial rajp bejn xhienin loj guidxliuj guie achet zajc gudxoon guial gūün bejn xmandad Dios. ³¹ Bèn ni ad ryaadxt ree xhienin loj guidxliuj guie, gol gunaladx guial achet rajpidi, din gra ni yu' loj guidxliuj guie najn ni rdēd.

³² Ni rēnan naj guial ad zutidi xgab por ree ni yu' loj guidxliuj guie. Tijb xinguaaaw xtijb mazri rüjnx xgab por xmandad Dios, mazri rüjnx naguiejn gūünx zi'c ruladx Dios. ³³ Per tijb xinguaaaw ni ma baxhliaa mazri rüjnx xgab por ree ni yu' loj guidxliuj guie, par laax mazri rüjn naguiejn yabaanē lacheelix laax. ³⁴ Dxel tio'p ma naj xixgabix, por Cristo nē por xbéngunaax. Ziangajc tijb béngunaa ni ad waxhliaat mazri rüjnman xgab por ree xmandad Dios guidiblagaa rüjnman sirv loj Dios par gūünman zi'c ruladxaman. Per tijb béngunaa ni ma baxhliaa mazri rüjnman xgab por ree ni yu' loj guidxliuj guie, mazri rüjnman naguiejn yabaanē lacheelaman laaman.

³⁵ Gra ni canin lojdi, canin laan par gūnan lējt yudar ad par gudxontan guxhliaadi, caninan din guibandi zi'c rayal xnejz dxel gol been gol gubajn tēē zi'c rēn dux Dad ree Jesucrist sin guial gudxoon xhienin lējt.

³⁶ Chutēēz xinguaaaw rüjn xgab guxhliaanē biin rnieenēx abi' bal ma yu' biingunaa guin iiz par guxhliaam, gūünri reex ni naladx reex naj zagdxe par laa reex. Bal guxhliaa reex, guxhliari reex. Ad doltan guial guxhliaa bejn. ³⁷ Ziangajc chutēēz bèn ni ad rüjnt xgab guxhliaa, ad rayalt gūünman xgab guial rüjn naguiejn guxhliaaman bal ma beenman xgab zagdxe guial ad zuxhliaataman. Din zagdxe gajcan bal id zuxhliaa bejn. ³⁸ Zeel rnin lojdi zagdxen guial chu guxhliaa, per mazri zagdxe bal id zuxhliaa bejn.

³⁹ Tijb béngunaa chi ma baxhliaaman, ad rayalt sunēman xinguaaaw ren chi nabannē lacheelaman. Per bal guiēt lacheelaman ma zajc tia' xin ren laaman per con tijb ree xcompniaraman xin rililadx Jesucrist. ⁴⁰ Per naladxan guial mazri zagdxe guibanman bal id zuxhliaaman stijb. Zian rūnan xgab guial nabannē'n xSprijt Dios zi'cgajc lējt.

8

Guialraw ni rbe'c ree bejn loj ni naladx reeman naj Dios

¹ Yan, ganin lojdi xcwent ree guialraw ni rbe'c ree bejn loj ree ni naladx reeman naj Dios. Dunuj ree rayagbee guial dugra ree rayignia' xhienaag yaguieen ree por ree ni guin, per yu' dxej por guialrignia' rlies bejn xvalor gajcaman. Per guialrēn lasa' bejn lasajc mazri din por guial rēn lasa' bejn zile' yaguieen yudar du lasa' ree din yasnuu yayignia' ree xhienaag rayal yabajn ree. ² Bal yu' bèn naladx guial ma bayaaloj rignia'man gra, cusquiee laagajcaman din ryaadx da'tri chignia'man. ³ Per bèn ni rēn Dios, Dios nūnbee laaman.

⁴ Yan por guial raw bejn guialraw ni ma gule'c reeman loj ree ni naladx reeman naj Dios, dunuj ree rayagbee guial achet guialrniabee rajp ree dios guin loj guidxliuj guie, din tijbzi Dios yu'. ⁵ Majsu yu' ree bejn naladx guial yu' zien ree dios bèn rniabee xanyabaa nē loj guidxliuj, ⁶ per dunuj ree rayagbee guial tijbzi dux Dad ree Dios yu' abi' por laaman yu' gra ni yu' por laa tēēman nadxu' ree loj guidxliuj guie. Tijbzi Jesucrist naj

Dad par dunuj ree abi' por laaman yu' gra por laaman tëë raya'p ree gualnaban.

⁷ Per ad grat ree bejn rüjn xgab zian. Din yu' ree bèn ni guyèn graloj ni naladx reeman naj Dios, abi' yan gual qui bililadxri reeman Jesucrist naladx reeman gual dolan gaw tijb bejn gualraw ni ma gurej loj ree dios guin. ⁸ Dunuj ree rayagbee gual ad ni rawt bejn rüjn guiban bejn mazri zagdxe loj Dios, lasa'gajcanan bal yadaaw ree o ad zadaawt ree lasa' ree gualraw guin. ⁹ Per majsi lëjt ragbee gual zajc gawidi xhietëëznin, rayal gapidi cudad ad güüнди gual ree bèn qui rliladxri Jesucrist güün reeman dol. ¹⁰ Din bal lüj gual achet naladxil rawil xhietëëznin, zøjbil cayawil gualraw ni ma gurej loj ree ni ad najt dios. Dxel guguaa tijb ree bèn qui rliladxri Jesucrist lüj abi' nëgajcaman sëëbladx gaw gualraw guin majsi lën luxdooman naladxaman gual ad zagdxet naj ni cayüjnman. ¹¹ Dxel por xgualrajquil cayüjnl gual güünman dol gual ad nixt yu' luxdooman cayawaman ni guin ree, per badxe'guijc gual në por laaman güjt Jesucrist loj crüjz. ¹² Zeel bal rüjnl tijb ni naj ni mal par ree bèn qui rliladxri ree Jesucrist abi' rüjn reeman dol por lüj, dolan cayüjnl delant loj Cristo. ¹³ Bal por tijb ni rawan rüjn ree da compniran dol, mejorli ad zawtran laan chitëë güünman dol por naj.

9

Ni zajc güün tijb apóstol

¹ Lëjt ragbee gual zajc güünan ni rënan por gualrniabee ni ra'pan gual najn apóstol. Ma baguaan dux Dad ree Jesucrist abi' lëjt naj ree bèn ni ma benan gan par laaman gual ma bililadxidi laaman. ² Bal yu' ree bèn ni ad nünbeet naj zi'c apóstol, per lëjt ragbee gual apóstol najn. Din zi'c ma rliladxidi Jesucrist dxel ma rguien gual diidxli najn apóstol.

³ Abi' par ree bèn ad rliladxt gual najn apóstol, ze naj ni rën loj reeman: ⁴ Ra'pan derejch gunee reeman ni gawan në ni guië'n. ⁵ Abi' zajc tëë guxhlian con tijb bëngunaa naj dulasa' raliduladx ree Jesucrist din chinë'n laaman bantëëz guin gan, zi'c rüjn los demazri ree apóstoles con ree bijch Dad Jesucrist në Bëd. ⁶ ¿O najzi con Bernabé bayal yaguieenan xmandad Dios dux cwentan ya? ⁷ Per ni'qui tijb suldad ad rejt loj wadijl xcwentaman, yu'czi bën rguix xgaxtaman. Ziangajc bën rxübin uv, ¿wen id zajc gawaman laan ya? Laadx bën ni rajp vag ree, ¿wen id zajc guië'man xlejch reeb ya? ⁸ Abi' ad xixgabtzi bënguidxliujn canin lojdi, në loj ley ni badëë Dios loj Moisejs rëb zian. ⁹ Din loj ley guin rëb: “Ad gudxe'di guixh ro' ree be gui'xh la'tgaj cayüjn reeb dxiin.” Ad rëbt Dios zian gualzi yu'man laa reeb xgab, ¹⁰ rëbaman zian por dunuj ree. Din zi'c bën rlia' yuj zi'c bën rusia trigo, grop reeman yu'guijc gual yu' ni yaca' reeman. ¹¹ Yan ma balün lëjt xhienaag chinalidi xnejz Dios, ¿wen zro' da't yanaaban lojdi ya bal güüнди dunujn yudar din gusnuu dux gualnabanan? ¹² Bal stijb ree bèn ni rusiid lëjt rila' rtia' reeman ni rayal gudëëdidi loj reeman, dxel ziangajc dunujn raya'pan mazri derejch güüнди dunujn yudar.

Per majsi zian dunujn achet wanaaban lojdi zi'c naj derejch ni raya'pan, caydaanzan ni raza'can chitëë xhie cwib guijc gual ad zucaag-diajgtri ree bejn xtiidxza'c Jesucrist. ¹³ Lëjt ragbee gual gra ree bixhioz ni rüjn sirv lën xyadoo Dios, rtia' reeman tibda'n ni rinë ree bèn Israel loj Dios persi rila' rbajn reeman. Ziangajc gra ree bixhioz ni rüjn ree sirv

lule' yadoo guin lod rinë ree bejn be ree par Dios, nè reeman rtia' ta'n ni rinë ree bejn persi riele' rbajn reeman. ¹⁴ Yan laagajcan rëb dux Dad ree Jesucrist por ree bèn ni rulüü xtiidxa'caman, guial por ree bèn ni rulüü reeman rayal guiban reeman. ¹⁵ Per naj achet caca'n, ad caxhal tëtëtan gui'ch guie lojdi din guneedi xhienin. Din par naj zagdxeli naj guiëtan luar chu' bèn chiquied guialrabaa guin luxdon guial cusidan bejn ree xtiidxa'c Jesucrist.

¹⁶ Ad rayalt gales da valor gajcan guial cusidan bejn ree xtiidxa'c Jesucrist, din mandad guin naj ni bayalan. ¡Prob naj bal idan gusid bejn ree diidxa'c guin! ¹⁷ Zeel bal cayünan mandad guin guial ruladxan gūnan laan, dxel yu' ni gaca'n. Per ni'qui bal id ruladxan gūnan mandad guin, laan bayal gūnan. ¹⁸ Abi' ni rünan gan naj guialrabaa ni yu' luxdon majsi ad naxtan, majsi ad caca'tan ni rayal tia' bèn ni rulüü xtiidxa'c Jesucrist, per cusnuu culün diidxa'c guin ree bejn ree.

¹⁹ Abi' majsi ad yu't bèn rniabee naj por mandad guin, per laa naj guie par gra ree bejn din gac gūnan sirv xbejn Cristo. ²⁰ Abi' chi za'n con ree bèn Israel, rünan naguiejn persi yu'guijc reeman guial nayajcan bèn Israel din gūnan gan gac reeman xbejn Cristo. Chi za'n con ree bèn Israel bèn rüjn ree naguiejn chinal xley Moisejs dxel rünan zi'c bèn zinal ley guin, din gūnan gan gac reeman xbejn Cristo, majsi ragbeen guial ad rniabeet ley guin naj. ²¹ Abi' chi za'n con ree bèn ad najt bèn Israel, bèn ad zinalt ree ley guin dxel majsi ragbeen guial Dios naj bèn rniabee naj guial nabanen zi'c rniabee Cristo, per rünan naguiejn din guguaiaa reeman naj zi'cgajc tijb lasa' reeman din gac gūnan gan gac reeman xbejn Cristo. ²² Chi za'n con ree bèn yu'nawëëg par güün reeman o gaw reeman xhienin, dxel rünan naguiejn din su reeman zagdxë con naj din gūnan laa reeman yudar gac reeman xbejn Cristo. Bantëëz lod ran rünan naguiejn din guguaiaa reeman naj zi'cgajc tijb lasa' reeman, din günczan gan majsi ta'nzi reeman gūnan gan gap reeman perdon por Cristo.

²³ Gra ree ni guie cayünan guial rënan xtiidxa'c Jesucrist, din tiblojzi güünle' Dios naj con gra ree bèn rliladx diidxa'c guin ree.

²⁴ Lëjt ragbee guial chi yu' tijb carrer zien bejn ruxüün, per tijbzaman naj bèn rtia' prem. Ziangajc lëjt gol been naguiejn tia'di ni gunee Dios. ²⁵ Bèn ni ruxüün ree rajp laagajc reeman cudad chitëë xhie gudxoon guxüün reeman. Rüjn reeman zian din güün reeman gan, abi' ni rüjn reeman gan naj tijbzi coron balag ni rigool cari. Per dunuj ree ni cayguieen ree naguiejn cayca' ree najn tijb prem ni ad yu't dxej nit. ²⁶ Abi' ragbeechaawan xhienin cayünan, ad cayüntan zi'c tijb bèn ni ruxüün sin guial gagbeen chexc, ad rüntan zi'c tijb bèn ni rga'p sin guial gagbeeman ban ca'paman. ²⁷ Zeel cusagdiaj naj gajc din gac ganabee naj gajc gūnan zi'c rayal gūnan, chitëë guial culün bejn ree xtiidxa'c Jesucrist achet yayalan delant loj Dios.

10

Guial rën ni ad najt ree Dios

¹ Compniar raliduladx ree Jesucrist, gol basaaladx guial dux bengol gulal ree bèn binal ree Moisejs, gra reeman guza xan zaj ni guxhaal Dios abi' gra reeman gudëd loj nijsdoo ni la nijsdoo xnia. ² Zian biguien guial xbejn Moisejs naj reeman din gra reeman guzanë laaman xan zaj guin, abi' gudëd reeman con laaman loj nijsdoo guin. Zian gurobnijs reeman

loj zäj guin në loj nijsdoo guin. ³ Gra tëë reeman gudaw guialraw ni bi't diizd xanyabaa. ⁴ Gra tëë reeman gu' nijs ni bazaladx Dios loj reeman, nijs brii lad tijb guiaj. Rën guiëban guial diizd nadxel mal naban Cristo con laa reeman lod zëtzi reeman. ⁵ Per zien reeman ad beent zi'c ruladx Dios, abi' gÿjt reeman niz loj yujbidx niz lod guza reeman.

⁶ Gra nine gojc din yayagbee ree guial ad laa yaguieen ree lasa' ree ni mal ni been reeman. ⁷ Ad rayalt yayën ree ni rëb ree bejn naj ree Dios zi'c been zien ree dux bengol gulal ree, din rëb loj xtiidx Dios xcwent reeman: “Gurej reeman, gudaw reeman dxel bisu reeman been reeman ni dxuudx ree.” ⁸ Ad rayal tëët gÿün bejn ni dxuudx con bën ad najt lacheelaman, zi'c been zien ree dux bengol gulal ree abi' tijb dxej gÿjt gajlbichoon mil reeman. ⁹ Ad zaneeguidx tëët ree Dios zi'c been zien ree bën guin, abi' gudaw bëël laa reeman persi gÿjt reeman. ¹⁰ Ad rayal tëët yaguie'ch ree guial ad cayÿjnt Dios zi'c rayal, din zian been zien ree dux bengol gulal ree abi' guxhaal Dios tijb anjl bagÿjt laa reeman.

¹¹ Gra ni guzac reeman cwan loj xtiidx Dios din yayagbee ree guial ad laa yaguieen ree zi'c been reeman, dunuj ree guial nabajn ree yan guial ma caydop dxej ni yadëed ree bejn cwent loj Dios. ¹² Zeel bën ni naladx za'dxi'ch loj xnejz Dios, mejorli gapaman cudad chitëë gÿün dol laaman gan. ¹³ Gra ni cazajquidi ad najtan ni ad rzajct bejn, din Dios ad zaro'nladxtaman lëjt. Ad zuslaat Dios saquidi tijb ni ad zadaantidi, abi' laaman gÿün lëjt yudar din gagbeedi xhienaag laadi loj ni cayajc.

¹⁴ Zeel compniar raliduladx ree Jesucrist, zi'c rënan lëjt rnin lojdi gapidi cudad ad goc guiëndi ni naladx ree bejn naj dios. ¹⁵ Naj ragbee guial najdi ganax bën rignia', zeel lëjt gajc gol been xgab bal zagdxe naj ni canin lojdi. ¹⁶ Chi raguieen ree zi'c been dux Dad ree Jesucrist chi gudaw reeman guxhin bigra, dxel chi radü' ree vin ni ma gogle' rasaaduladx ree rejn ni ma guxhie'man chi gütaman por dux tol ree. Abi' chi radaaw ree guiadxtil zi'c beenman, laan naj tijb sen guial ma nayajc ree tijbzi con laaman. ¹⁷ Din majsi zien nayajc ree, per zi'c rlia' tijbzi guiadxtil par dugra ree, zian rguien guial ma nayajc ree tijbzi con Cristo.

¹⁸ Lëjt ragbee xhienaag rÿjn ree bën Israel chi rinë reeman tijb gon par Dios, abi' zi'c raw reeman tiblia' gon guin yu'guijc reeman guial ma naj reeman tijbzi con Dios. ¹⁹ Ad canitan lojdi por ree ni naladx ree bejn naj dios guial lasajc reen o guial lasajc guialraw ni gurej loj ree dios guin. ²⁰ Din bën rÿjn ree zian ad lojt Diosan rbe'c reeman guialraw guin ree, loj xinxaban rbe'c reeman laa reen. Abi' ad rëntan gaquidi tijbzi con ree xinxab guin. ²¹ Ad zacjt gÿündi zian par guiguien guial ma najdi tijbzi con ree xinxab guin, abi' gaw tëedi guiadxtil con vin din guiguien guial ma najdi tijbzi con Cristo. ²² ¿O rëndi ya yache'ch ree Dios? ¿Wen mazri raya'p ree guialrniabee guial lojman ya?

Xhie zajc gÿün ree xbejn Dios

²³ Graczi zajc gÿün bejn, per ad gratan naj zagdxe guial gÿünman. Majsi gra zile' gÿün bejn, per ad gratan rÿjn sirv par gÿün lasa'man yudar chinalaman xnejz Dios. ²⁴ Din ad rayalt yaguieen ree xgab por dunujzi ree, rayal yaguieen ree xgab por ree dux compniar ree.

²⁵ Zi'c chi rziidi bëël luguaia', ad guiniabdiidxidi bal ma gurejn loj xdios reeman, chitëë xhie guinialadxidi chi gawidi laan. ²⁶ Din xieen dux Dad ree Dios naj guidxliuj con gra ni yu' lojn.

²⁷ Bal tijb bèn ad waliladxt xtiidx Dios na lojdi guial chitawidi lidxaman, abi' bal rëndi chedi gol chej. Gol gudaw gra ni gunee reeman lojdi ad xhie guiniabdiixidi chitëë xhie naladxidi. ²⁸ Per bal yu' xcompniaridi na guial ni cunee bèn guin cayawidi ma gurejn loj xdiosaman, ad gawidi laan por bèn bagojn lëjt chitëë güünman xgab mal guial ad laa cayüjndi, majsi lëjt ragbee guial xieen dux Dad ree Dios naj guidxliuj në ni yu' loj guidxliuj guin. ²⁹ Ad canitan lëjt xcwent guial xhie naladxidi, ni canin lëjt naj por ree xgab ni zajc güün stijb xcompniaridi por lëjt.

Per wed yu'di rüjn xgab: “Per, ¿chexc zeel ad züntan gra ni ragbeen ad najt ni mal por xixgabzi stijb bejn? ³⁰ Wed rëb tëedi: Naj ragbee guial rudën quixtëë loj Dios por gra ni rawan, ¿chexquiza zeel güün reeman xgab mal por naj?” ³¹ Per naj rni lojdi gra ree ni guin rayal gudxe'guijquidi din zi'c ni rawidi zi'c ni rë'di në gra ree ni rüjndi rayal güündi laan par güündi Dios bèn zojbloj. ³² Gol gojp cudad xhienaag nabandi din zi'c ree bèn Israel zi'c ree bèn ni ad najt bèn Israel con ree xcompniaridi bèn rililadx ree Jesucrist ad züjnt reeman xgab mal por lëjt. ³³ Din zian rünan, rünan naguiejn chitëë xhie naladx bejn con naj. Ad rüntan ni rüjnzi naj yudar, rünan naguiejn din günan ni rüjn yudar zien ree bejn din gac gap reeman perdon loj Dios.

11

¹ Zeel gol binal zi'c rünan, zi'c zinaalan zi'c been Cristo.

Xhie rayal güün ree bejn chi rbejdx rniab reeman Dios

² Naj dád rabaanë'n lëjt guial rusaaladxidi naj, guial yu'guijquidi rüjn tëedi zi'c balün lëjt. ³ Rën tëen gusaaladxidi guial Dios rniabee Cristo abi' Cristo rniabee xinguaaaw abi' xinguaaaw rniabee béngunaa. ⁴ Tijb xinguaaaw chi rgu' xhienin guijquix par cwedx guiniabix Dios o gulüüx xtiidx Dios, natu naj ni cayüjnx. ⁵ Ziangajc chutëëz béngunaa cabejdx canab Dios o culüüman bejn ree xtiidx Dios, abi' achet xoob guijcaman, natu gajc naj ni rüjnman. Güünman cwent guial najman zi'c tijb béngunaa ni biaj guijc xt garej. ⁶ Zeel bal tijb béngunaa ad rëntaman guixhioob xhienin guijcaman, gugajli guijcaman. Per bal ragbeeman, guial natun guiyaj guijcaman xt garej, mejorli guixhioob xhienin guijcaman. ⁷ Per xinguaaaw achet zajc chu' guijquix din Dios beenman laax zi'cgajczi laaman, zian rulüüx respejt ni rajpax Dios. Abi' béngunaa guial rxhioob xhienin guijcaman, zian rulüüman respejt ni rajpaman xinguaaaw. ⁸ Din ad gojct xinguaaaw con guxtil lad béngunaa, béngunaa guin gojc con guxtil lad xinguaaaw. ⁹ Ad gojct xinguaaaw par béngunaa, béngunaa guin gojc par xinguaaaw. ¹⁰ Zeel béngunaa rayal guixhioob xhienin guijcaman din guiguien guial xinguaaaw rniabee laaman zi'c rulüü ree anjl chu rniabee laa reeman. ¹¹ Majsi delant loj Dios tiblojzi naj bejn, din bal id béngunaa niu achut xinguaaaw niu, abi' bal id chu xinguaaaw niu achut béngunaa niu. ¹² Walican, guial con guxtil lad xinguaaaw gojc béngunaa, per yan por béngunaa ri't xinguaaaw loj guidxliuj, zeel zi'c xinguaaaw con béngunaa por Dios yu' reeman loj guidxliuj.

¹³ Naj rni lëjt, lëjt gajc gol been xgab bal zagdxen cwedx guiniab tijb béngunaa Dios abi' achet naxhoob guijcaman. ¹⁴ Bejn gajc ragbee guial natun bal id zugaj guijc xinguaaaw. ¹⁵ Per par béngunaa mazri zagdxen rguienman bal guyool guidxguijcaman, din rajpaman laan par gasiaawan guijcaman. ¹⁶ Bal chu ad za't conform por ni canin lojdi,

per naj rugojn lëjt guial achet stijb costumbr raya'p ree, zian naj dux costumbr ree con los demazri ree bén riladix xtiidix Dios.

Ruxhiin reeman zi'c basa'n Dad Jesucrist gac

¹⁷ Yan xcwent ni ma ganin lëjt, ad zile't ganin guial zagdxé naj ni cayüjndi din chi radxaag lasa'di par cwedix guiniabidi Dios, al ni ad rayalt güündi rüjndi. ¹⁸ Yaløj rnin lojdi biguiejnan guial chi radxaag lasa'di par cwedix guiniabidi Dios ad raya'ntidi diidix, abi' tiblax riladixanan. ¹⁹ Din nawëëg najn guial ad zajct zian, abi' zian rguien chu diidxli zinal xnejz Dios. ²⁰ Per por zianzi, achetri sirv rüjn guial radxajg lasa'di par gawidi xche zi'c been dux Dad ree Jesucrist. ²¹ Din tijbgajdi rüjn naguiejn diob gawidi, ad rhëjzt xcompniaridi. Abi' la'tgaj yu' ree bejn rliaan, yu'di raw da't abi' xt rzüdxidi guial rë'di zi'ctzi rëndi. ²² ¿Id yu' lidixidi ya lod gawidi guië' tëedi zi'ctzi rëndi?, ¿o ad rëntidi xcompniaridi bén riladix ree xtiidix Dios ya, zeel rusa'nxtudi bénprob ree bén achet rajp? Yan, ¿rëndi ya chu' luxdon zagdxé con lëjt por zian? ¿Per zian zi'c cayüjndi, ad zajct ganin lojdi guial zagdxé naj ni cayüjndi!

Ni bigra gudaw Jesucrist xche

(Mt. 26:26-29; Mr. 14:22-25; Lc. 22:14-20)

²³ Abi' ni balün lëjt, basidan laan por dux Dad ree Jesucrist guial guxhin ni bayü reeman laaman chi bigra gudawaman xche, cwa'man tijb guiadxtil. ²⁴ Abi' chi gulox badëëman quixtëë loj Dios dxel gula'man guiadxtil guin, rëb gajman: “Guiadxtil guie naj da cuerpan ni ma bayün par guiëtan por lëjt. Abi' chi güündi zian, gol beenan guial gusaaladixidi naj.” ²⁵ Ziangajc beennëman cojp ni yu' vin chi gulox gudaw reeman xche, dxel rëbaman: “Vin guie naj da rejnan ni gaxhie'n chi guiëtan par gaxhalan tijb nejz cüb guial xhienaag gac ree bejn perdon loj Dios. Abi' chi güündi zian, gol been zian guial rusaaladixidi naj.” ²⁶ Zeel, beegaj chi radxaag lasa'di par gawidi xche zi'c been dux Dad ree Jesucrist, chi rawidi guiadxtil rë' tëedi vin, zian rulüüdi guial güjtaman por lëjt, gol been zian xt chi gui'taman loj guidxliuj guie zatijb.

Xhienaag rayal gac xche

²⁷ Yan bal yu' bén raw guiadxtil rë' tëëman vin xche guin, abi' ad yu' guijctaman ni rën guiëb ni cayünman, dolan cayünman guial ad yu' guijctaman ni rën guiëb xcuerp në xrejndux Dad ree Jesucrist. ²⁸ Zeel rayal güün bejn xgab xhienaag nabanman delant loj Dios dxel ma zajc gawaman guiadxtil guië' tëëman vin xche guin. ²⁹ Din bén raw guiadxtil guin con vin guin abi' ad yu' guijctaman ni rën guiëb xcuerp Jesucrist. Laagajcaman caguüil xcasti. ³⁰ Din guial rüjn ree bejn zian zeel dád ziendi ragxuu, zien tëedi ad yu't gojl abi' zien reeman ma güjt. ³¹ Per bal yaløjxgaj yaguieen ree xgab xhienaag nabajn ree loj Dios dxel ma zajc yadaaw ree xche guin, achetri xcasti Dios yayal ree. ³² Per ziangajc bal yu' xcasti Dios ni yayal ree, laan naj par guzuxnejzaman dunuj ree chitëë yaguieen ree dol, chitëë yayal ree casti ni rayal ree bén ad riladix xtiidixaman.

³³ Zeel compniar raliduladx ree Jesucrist, chi radxaag lasa'di par gawidi, gol gulëjz ree xcompniaridi din gawidi tijbzi. ³⁴ Per bal yu'di ad zajct cwëz guial ma rliaandi, zagdxeli gaw lidixidi chitëë yayalidi xcasti Dios guial ad züjntidi zi'c rayal. Gra ni rayal ganin lojdi, chi gualan guidganan lëjt dxel yanee ree.

12

Quiarguiejn ni runee xSprijt Dios

¹ Yan ganin lèjt, quiarguiejn ni runee Dios loj tijb gaj bejn por xyudar xSprijt Dios, din ad rëntan guibandi sin guial gagbeedi ni guin ree.

² Lèjt ragbee guial chi gadidi güünbee Dios dxel gogdxadi, bidxga'di ni na ree bejn lojdi naj ree dios abi'za ni'quid rnieet reen. ³ Zeel gol gogbee, chutëez bèn rnieeguijdx Jesucrist, rën guiëban guial ad nabannëtaman xSprijt Dios. Achu tëtëet bejn zajc guiëb: “Jesucrist naj bèn rniabee naj!”, bal id nabanman con xSprijt Dios.

⁴ Quiarguiejn ren quiarguiejn ren runee Dios dunuj ree, per Sprijt guin gajc naj bèn ragnë dugra ree. ⁵ Majsi ni rent ni ren naj xmandad Dios ni cayguieen ree, per laagajcaman naj bèn ni cayguieen ree sirv. ⁶ Abi' majsi garent garen cayünj tijbgaj bejn, Dios gajc naj bèn ni cayünj yudar tiblojzi. ⁷ Tijbgaj dunuj ree ruluü Dios ni rayal yaguieen ree con xyudar xSprijt Dios din yaguieen ree yudar dux compniar ree. ⁸ Din con xyudar xSprijt Dios yu' ree bèn ma ca' quiarguiejn par guiniee reeman, yu' tëtëe ree bèn ma ca' quiarguiejn par chignia' reeman diidxli xcwent Dios. ⁹ Abi' por xyudar xSprijt Dios yu' ree bèn ma cwa' guialrliladx ni guidiblagaa. Yu' tëtëe ree bèn ma cwa' guialrniabee par yayünj reeman bënragxuu ree. ¹⁰ Yu' tëtëe ree bèn ma cwa' guialrniabee par güün reeman gadxagayaa ree milagr. Yu' ree bèn ma ca' quiarguiejn par gudëed reeman xtiidx Dios loj ree bejn. Yu' tëtëe ree bèn ma cwa' ree quiarguiejn par gagbee reeman bal wali o ad walit ni canee bèn rëb guial caneeman xtiidx Dios. Yu' tëtëe reeman ma ca' quiarguiejn par guiniee reeman gadxagayaa ree diidx, abi' yu' reeman ma ca' quiarguiejn par yadëed reeman tijb diidx par stijb diidx. ¹¹ Per por xyudar gajc xSprijt Dios rünj bejn ni guin ree, laaman ma ragbee conin rudëëman güün tijb gaj bejn ni naladxaman naj zagdx.

Tijbzi cuerp nayajc dugra ree

¹² Din zi'c dux cuerp ree majsi zien la' najn, per tijbzi nayajc ree. Ziangajc dunuj ree guial raliduladx ree Jesucrist majsi zien nayajc ree per tijbzi nayajc ree con laaman. ¹³ Din dugra ree barobnijs por tijbzi xSprijt Dios par yayajc ree tijbzi con gra ree dux compniar ree majsi nayajc ree bèn Israel o ad nayajct ree bèn Israel, bal nayajc ree zi'c bèn nado' o ad nayajct ree zi'c bèn nado', per tijbzi ma nayajc ree din dugra ree tiblojzi nabajn ree con xSprijt Dios.

¹⁴ Lèjt ragbee guial ad tibia'tzi naj xcuerp bejn, zien la' naj xcuerp bejn. ¹⁵ Yan bal guiëb guia' bejn: “Ad najtan tibia' xcuerp bejn din ad najtan yaa bejn.” Per ad por ziant ad najt guia' bejn tibia'man. ¹⁶ Ziangajc majsi guiëb guidiajg bejn: “Ad najtan tibia' xcuerp bejn din ad najtan guiaaløjman”, ad por ziant ad najtri guidiajgaman tibia' xcuerpaman. ¹⁷ Din bal guidib xcuerp bejn niajc guiaaløjman, ¿xhieza naag niguiejnman?, o bal guidib xcuerp bejn niajc guidiajgaman, ¿xhieza naag niuxi'man? ¹⁸ Per Dios ma ragbeeman banguin rayal guzoobaman tibia'gaj ni naj xcuerp bejn din gacaman zi'c rënman. ¹⁹ Din bal niajc xcuerp bejn tiblojzi, dxel ad najtran cuerp. ²⁰ Per zi'c ma rnin lèjt majsi zien la' naj xcuerp tijb bejn per tijbzi naj guidiban.

²¹ Ad zajct guiëb guiaaløj bejn loj yaaman: “Ad ryaadxtan lüğ.” Ad zajct tëtëet guiëb guijc bejn loj guia'man: “Ad ryaadxtan lèjt.” ²² Din luar lod

rulüü ad rüjnza'ct sirv, laa reen naj ni mazri rüjn sirv. ²³ Abi' ree luar lod ad rguient zagdx, raguieen ree naguiejn din guiguien reen zagdx. Guiáad ree luar naguie'ch, mazri raya'p ree cudad luar guin ree rata'cw reen din guiguien reen zagdx. ²⁴ Ad zro't radxu' ree xgab por ree luar ni rguien, mazri raya'p ree cudad luar naguie'ch ree zeel radojt ree xhienin din guiguien zagdx dux cuerp ree. Zianan been Dios xcuerp bejn ²⁵ din chitëe yaguieen ree xgab guial yu' lod ad rüjnt sirv, guidib dux cuerp ree rüjn yudar lasa'. ²⁶ Chi rdoob tiblajt xcuerp bejn guidib xcuerp bejn rdoob, abi' bal nix yu' tiblajt xcuerp bejn guidib xcuerp bejn yu' nix.

²⁷ Yan ziangajc guial nayajc ree tijbzi con Cristo dugra ree nayajc ree zi'c tijbzi cuerp par laaman, tijb gaj dunuj ree nayajc ree tibia' cuerp guin. ²⁸ Abi' entr gra dux compniar ree bèn rliladx Jesucrist. Dios yaløj bacaabeeman bèn naj ree xi apóstoles Jesús, ni barojp bacaabeeman bèn gudëed ree xtiidxaman loj ree bejn, bayon bacaabeeman bèn gulüü ree xtiidxaman bejn ree, dxel bacaabeeman bèn gap ree gualrniabee par yayüjn reeman bënragxuu ree. Bacaabee tëeman bèn güün ree gadxagayaa milagr. Bacaabee tëeman bèn ni güün ree yudar bejn ree. Bacaabee tëeman bèn ni nabee ree loj ree bèn rliladx xtiidxaman abi' bacaabeeman bèn ni nree ree zien ree diidx. ²⁹ Ad grat ree bejn naj apóstoles ad gra tët ree bejn zajc gudëed xtiidx Dios loj ree bejn, ad grat ree bejn zajc gulüü xtiidx Dios bejn ree. Ad grat ree bejn zajc güün milagr, ³⁰ ad gra tët ree bejn zajc yayüjn ree bënragxuu, abi' ad grat bejn zajc guiniee zienloj diidx ad gra tët bejn zajc yayüjn tijb diidx zatijb diidx. ³¹ Per gol been naguiejn din gunee Dios lëjt quiarguiejn zagdx ree, abi' naj ganin lëjt conin naj nejz mazri zagdx chinalidi.

13

Xcwent guial rën bejn ree

¹ Din bal rajc rnien zienloj diidx ni nree bénguidxliuj në xtiidx ree anjl yu' xanyabaa, per bal id rënan bejn najzan zi'c tijb guiib rzijdx o zi'c tijb plati ni yu' cha'. ² O bal nayalan nudëdan xtiidx Dios loj ree bejn, o nia'pan quiarguiejn par niagbeen gra ni zëed por Dios ni gad gagbee bejn, o nia'pan zienloj gualrignia' o nia'pan tijb gualrliladx Dios ni xt zile' guchan xliajt ree guia', per bal id rënan bejn ree achet lasajcan. ³ Ziangajc majsi gagui'san gra ni ra'pan loj ree bèn ni ryaadx laan abi' yayü da cuerpan din che'can, per bal id rënan bejn ree achet lasajc ni cayünan.

⁴ Guial rën lasa' naj gap pacens lasa' bejn, gac bejn benza'c con lasa'man, ad zadëdlojt lasa' bejn, ad züjnt bejn nabë, ad züjnt bejn benro' loj lasa'man. ⁵ Guial rën lasa' naj gap respejt lasa' bejn, ad gac bejn naxhien, ad yalenyama'n, ad chu'xyajñ tëe lasa' bejn, ⁶ ad rayalt yabaa bejn por ni mal ni cayüjn bejn o ni cazajcaman, rayal yabaaman chi zë bejn xnejz. ⁷ Guial rën lasa' naj güün bejn perdon lasa'man ni güünnëtzï reeman laaman, abi' chililadx lasa'man, ad zadxag tëtëetaman cwëzaman ni cabëzaman, taan tëeman ni rüjnnëtzï reeman laaman. ⁸ Guial rën lasa' ad yu't dxej loxan, per gualrajc yu' dxej loxan, ad zu tëtëtri bèn ni rudëed ree xtiidx Dios loj ree bejn ni'qui ree bèn nree zienloj diidx. ⁹ Din yan bal rayignia' ree, tibda'nzi naj ni rayignia' ree abi' bal radëed ree xtiidx Dios loj ree bejn, tibda'nzi rayagbee ree xcwentaman. ¹⁰ Per chi guidxin dxej yayignia' ree gran, dxel achetri lasajc ni rayagbee ree yan.

¹¹ Chi gocan xindoo gunen zi'c xindoo, benan xgab zi'c xindoo, go'pan xquiarguejn xindoo. Per chi bidxin dxej gojcan bengol basa'nan gra guial xindoo tiblād. ¹² Ziangajc yan ad rayignia't ree gra zi'cgajc chi ad rugient zagdxe loj tijb guiaawajn, per chi guidxin dxej yadxin ree lod zøjb Dios dxel yayignia' ree gra. Yan yu'zi ni rignia'n per chi guidxin dxej guidxinan lod zøjb Dios dxel gūnbeen gra zi'c nūnbeeman naj.

¹³ Choon naj ree ni ad yu't dxej lox, guialrliladx Dios, guialrbēz ni gunee Dios, nē guial rēn Dios dunuj ree. Per loj guiyon ree ni guin mazri lasajc guial rēn Dios dunuj ree.

14

Guialrniee stijb diidx

¹ Gol been naguiejn gol guyēn ree bejn, gol gurejdx gunab tēē Dios dīn guneeaman xquiarguejndi dīn gūūndi xmandadaman, per mazri rūjn naguiejn gapidi quiarguejn par gudēēdi xtiidx Dios loj ree bejn. ² Bēn rniee tijb diidx ni ad rignia't gra bejn, gūūnman cwent guial achut caneenēman. Tijbzi Dios caneenēman guial achut rignia' xtiidxaman, tijbzi laaman ragbee ni caneeaman per bejn ree ad ragbeet reeman ni rēn guiēb ni caneeaman. ³ Per tijb bēn rulūū xtiidx Dios bejn ree cayūjnman yudar xhienaag chinal bejn xtiidx Dios, cudēēdaman consejw loj ree bejn ragu' tēēman luxdoo reeman. ⁴ Abi' bēn rniee tijb diidx ni ad rignia't gra ree bejn, par tijbzi laaman naj ni caneeaman, per bēn rniee xtiidx Dios cayūjnman yudar gra ree xbejn Dios dīn gusnuu chinal reeman xnejzaman.

⁵ Bal zianclaa gradi niajc niniee zienloj ree diidx, per mejorlan bal zajc gulūūdi bejn ree xtiidx Dios. Dīn mazri lasajc guial guiniee bejn xtiidx Dios guial loj guial guinieeman zienloj ree diidx, o bajtēē bal zile' guiēbaman loj ree bejn xhie rēn guiēb ni rnieeman dīn gūūn sirv ni rnieeman gra ree bejn. ⁶ Dīn zi'c naj bal guitixon lējt compniar raliduladx ree Jesucrist, abi' ganen lojdi tijb diidx ni ad zignia'tidi, ¿xhieza sirv gūūnan lējt bal id canin lojdi zagdxe ni balūū Dios naj o ni ragbeen o bal id canen xtiidx Dios lojdi zagdxe o xhietēēz zatijb ni rayal gusiididi?

⁷ Zi'c tijb ni rucwejdx reeman, zi'c tijb bidxa o tijb arp bal id zucwejdx bejn laan zagdxe ad zignia't ree bejn xhienin cucwejdxaman. ⁸ Ziangajc bal id zucwejdx reeman zagdxe trompejt loj wadijl, ¿xhieza naag chignia' reeman guial ma rayal suchaaw reeman par til reeman con ree bēn rayal tilnē reeman? ⁹ Yan ziangajc bal guinieenēdi bejn ree con tijb diidx ni ad rignia't reeman, ¿xhieza naag chignia' reeman ni rēbidi! Xlia'zi caneedi achut rignia' ni rnieedi. ¹⁰ Lējt ragbee guial zienloj diidx yu' loj guidxliuj guie, per graczan yu' ni rēban par bēn rignia' laan. ¹¹ Per bal chu guinieenē naj con tijb diidx ni ad rignia'tan dxel benzit najman par naj abi' za naj benzit najn par laaman. ¹² Zeel zi'c rēndi gapidi quiarguejn por xyudar xSprijt Dios par gūūndi xhietēēz ni naj xchiin Dios, gol gunab loj Dios dīn yazaladxaman quiarguejn lojdi dīn gac gūūndi ni rūjn sirv par gra ree xbejn Cristo.

¹³ Zeel bēn ni rniee tijb diidx ni ad rignia't gra ree bejn, rayal guini-abaman loj Dios dīn gagnēman laaman dīn gac gusignia'man bejn ree ni rēbaman. ¹⁴ Dīn zi'c naj bal gabedx ganaaban Dios con tijb diidx ni ad rignia'tan dxel tijbzi da sprijtan ragbee ni canen, per naj ni'quid ragbeetan xhienin canen. ¹⁵ Zeel ni rayal gūūnan naj, gabedx ganaaban

loj Dios con da sprijtan abi' gagbeen xhie rën guiëb ni canen. Ziàngajc chi rolan cant ree par Dios rayal gagbeen chignia' tēen xhie rën guiëb ni cayolan. ¹⁶ Din bal rnieel diidx zagdx ree loj Dios con diidx ni ad rignia't ni'qui lūj. Dxel bèn za' con lūj, ad zajc guiëbaman “Amén” chi ma gulox badëedil quixtëe loj Dios guial ad rignia'taman ni rnieel. ¹⁷ Majsi nix da't badëedil quixtëe loj Dios, per achetczi yudar beenl bèn za' con lūj par gagbeeman xhienaag chinalaman xnejz Dios guial ad bignia'taman ni rëbil. ¹⁸ Quixtëe Dios naj mazri rajc zien loj diidx guial loj gradi. ¹⁹ Per majsi zian chi za'n lod rado'p ree dux compniar ree bèn rliladx ree Jesucrist par ganenë'n laa reeman, par naj mejorli naj ganenë'n laa reeman con gaay diidx per diidx ni chignia' reeman nē ni güün laa reeman sirv din gulüü reeman ben ren ree luar ganenë'n laa reeman con chiimil diidx ni ad rignia't reeman.

²⁰ Compniar raliduladx ree Jesucrist, ad bal rüjnridi xgab zi'c xindobëz. Gol gojc zi'c xindobëz per guial ad züjntidi ni mal, per par güündi xgab gol been xgab zi'c bengol. ²¹ Loj xtiidx Dios rëb: “Gaxhalan bèn rniee ree diidx ren, bèn ad najt ree bèn niz guie din guinieenë reeman bèn guie ree. Per ni'qui zian ad zuzoobt reeman da diidxan, rëb dux Dad ree Dios.” ²² Zeel guial rniee zienloj diidx, najn tijb sen par ree bèn ad rliladxt xtiidx Dios din chililadx reeman. Per guial rulüü bejn ree ni rën Dios gagbee reeman, laan naj ni güün sirv par ree bèn ma rliladx ad par bèn ad rliladxt. ²³ Per ni'qui zian chi radxaag lasa'di par gucaagdiajguidi xtiidx Dios, abi' bal suløj guiniee tijb gajdi gadxagayaa diidx ni achut rignia' abi' chu' ree bèn qui bililadxri xtiidx Dios o bèn ad waliladxt ree xtiidxaman, ¿wen id zanaladx reeman ya guial guijquidi rajc? ²⁴ Per bal chu' bèn qui bililadxri o bèn ad waliladxt abi' caneedi xtiidx Dios, dxel chi guiguiejnman ni caneedi, gagbeeman xhie dol cayüjn reeman, laagajcaman gagbee chu najman. ²⁵ Zian gagbeeman xhienaag nabanman dxel guzuxibaman cwedx guiniabaman Dios, abi' guiëbaman guial diidxli za' Dios con lëjt.

Gol been gra xnejz

²⁶ Gra ni canin lojdi compniar raliduladx ree Jesucrist, caninan din gagbeedi guial chi rado'pidi par gucaagdiajguidi xtiidx Dios, gradi zajc güün ni chile' güündi, bèn ni gool cant par Dios, bèn ni gulüü ree bejn, bèn gugojn bejn ree conin balüü Dios lojman, bèn guiniee diidx ren ni ad rignia't gra bejn nē bèn gudëed xtiidxaman loj ree bejn. Per gra ni güündi güün sirv par güünan yudar los demazri ree xcompniaridi din gusnuu sudxi'ch reeman loj ni rliladx reeman xtiidx Dios. ²⁷ Bal yu' bèn rniee tijb diidx ni ad rnieet gra bejn, tio'pzaman o choonzaman guiniee diidx ni rajcaman, abi' tijb gaj tijb gaj reeman guiniee, chu' tēë bèn ni guiëb loj ree bejn xhie rën guiëb ni rëb reeman. ²⁸ Per bal id yu' bèn zajc gugojn bejn ree xhienin rëb reeman con diidx ni rajc reeman, mejorli achet guiëb reeman delant loj ree bejn. Zagdxeli laazi reeman cwedx Dios lën luxdoo reeman. ²⁹ Abi' ree bèn gugojn delant loj gra ree bejn conin balüü Dios laa reeman, tio'pzi reeman o choon reeman guiniee. Abi' los demazri reeman gucaagdiajg bal zagdxequi naj ni canee reeman. ³⁰ Per bal tijb bèn zojb gucaagdiajg loj hor guin gulüü Dios laaman xhienin, rayal yacwëëz bèn canee din gac gugojn bèn guin bejn ree xhie nin balüü Dios lojman loj hor guin. ³¹ Gra ree bèn ni bayal gudëed xtiidx Dios loj ree bejn, gradi zajc gugojn bejn ree xhienin balüü Dios lëjt, per tijb gajdi

chi yayalidi din gra ree bèn cucaagdiajg gusiid reeman chu' tää luxdoo reeman. ³² Gol badxe'guijc guial ree bèn rudëë xtiidx Dios loj ree bejn laagajc reeman rniabee laa reeman din guiniee reeman chi rayal guiniee reeman. ³³ Din Dios ad rëntaman tijb ni ad najt xnejz, rënman tijb ni naj xnejz din yabedxe luxdoodi con ree xcompniaridi.

Yan, zi'c rajc gra ree luar lod rado'p ree xbejn Cristo, ³⁴ loj hor ni ma cucaagdiajg reeman xtiidx Dios ad yu't permis guiniee ree béngunaa rayal guzoob reeman xtiidx xixinguaaaw reeman zi'c rëb Dios güün reeman diizd gulal. ³⁵ Bal xhie rën reeman gagbee reeman, mejorli lidx reeman guiniabdiidx loj lacheel reeman, din natun guiniee tijb béngunaa loj hor ni cucaagdiajg reeman xtiidx Dios.

³⁶ Gol basaaladx guial ad lëjt it naj bèn yaløj cwa' xtiidx Dios ad tijb tääti lëjt ragbee xtiidx Dios din güündi zi'c naj xixgabidi. ³⁷ Bal chu bèn naladx guial ma cwa'man quiarguejn par gudëëman xtiidx Dios loj ree bejn o por xSprijt Dios ma cwa'man xhie stijb quiarguejn, dxel laa gagbee gajcaman guial ni cucan loj gui'ch guie najn zi'c rniabee dux Dad ree Dios. ³⁸ Per bal id rliadxaman ni canin lojdi loj gui'ch guie, ziangajc ad chililadxidi xtiidxaman.

³⁹ Yan zi'c ma rnin lojdi compniar raliduladx ree Jesucrist, gol been naguiejn din gapidi quiarguejn din gudëëdi xtiidxaman loj ree bejn, ad bal gudxoondi guiniee tijb ree xcompniaridi bèn rniee tijb diidx ni ad rignia'tidi. ⁴⁰ Per gra ni rüjndi gol beenan xnejz, gol beenan zi'c rayal.

15

Baban Jesucrist loj ree bengüt

¹ Compniar raliduladx ree Jesucrist, rën tään gusaaladxidi xtiidxza'c Jesucrist ni ma rnin lojd, diidxza'c ni ma bililadxidi loj ni za'dxi'chidi.

² Gol basaaladx guial por ree diidxza'c guin ma rajpidi perdon por xtolidi bal walidi zinalidi laan, per bal id zinalidi laan bililadx xlia'zidi laan.

³ Yaløjxgaj balün lëjt ni basidan yaløj. Rnin lojdi guial Cristo güt por dux tol ree zi'c rëb loj xtiidx Dios. ⁴ Abi' biguie'chaman dxel ni goc choon dxej babanman zi'cgajc rëb loj xtiidx Dios. ⁵ Chi ma babanman, dxel balüülojman loj Bëd dxel loj los demazri ree apóstoles. ⁶ Zianz balüülojman në loj ree tijb cwaa ree bèn rliadx laaman, gojc reeman mazri de gaay gayuu bejn. Yu' reeman ma güjt, per mazri zien reeman sta naban. ⁷ Balüü loj tääman loj Santiaaaw dxelri loj ree apóstoles. ⁸ Ni bigra balüülojman lon, naj najn zi'c tijb xindo ni rajl chi ma gudëd tiamp ni rayal galix. ⁹ Din naj ta'nzi lasajcan loj los demazri ree apóstoles, abi' ad rayalt guirii lan apóstol guial basagzin bèn rliadx ree Jesucrist. ¹⁰ Per guial naj Dios bènza'c zeel najn ni najn, abi' ad bayaxlia'tzaman naj din naj mazri ma benan xmandadaman guial loj los demazri ree xbejn Jesús, majsi diidxliczi ad da xtijbt naj cayünan ni cayünan, në con xyudar Dios cayünan laan. ¹¹ Zeel achet güünan bal por chunin biguiejndi xtiidx Dios bal por naj o por stijb ree xbejn Jesús, ni mazri lasajc naj guial ma biguiejndan abi' ma bililadxidan.

Yaban ree bengüt

¹² Yan zi'c ma balüün lëjt xtiidx Dios guial baban Cristo, ¿chexquiza zeel yu'di rëb ad zabant ree bengüt? ¹³ Bal id zaban ree bengüt, rën guiëban guial ad babant Cristo. ¹⁴ Abi' bal id baban Cristo dxel achet sirv ni

cayl n l jt, ache t et sirv ni rliladxidi laaman. ¹⁵ Dxel bal zianan, ganax diidx rusquieen caynan por Dios guial ma ranan ma baban Jesucrist. Abi' bal id walin guial yaban ree beng t, dxel ad walitan guial baban Jesucrist. ¹⁶ Din bal id zaban ree beng t, dxel ni'qui Jesucrist ad babantri. ¹⁷ Abi' bal id babanman, achet sirv guial rliladxidi laaman ache t et perdon yu' por xtolidi. ¹⁸ Bal naj zian, xt ree b n ma g jt achet xperdon reeman majsi bililadx reeman Jesucrist. ¹⁹ Bal lojzi guidxliuj guie g n sirv ni baliladx ree Jesucrist dxel dunujzi ree nayajc ree b n naban mazri naya guial loj chut ez b nan.

²⁰ Per diidxliczi Jesucrist naj b n baban, abi' laaman naj quijb b n yaløj baban. ²¹ Abi' zi'c bidoonloj guialg jt loj guidxliuj guie por tijb bejn, ziangajc por tijb bejn yaban ree beng t. ²² Zi'c bidoonloj guialg jt par gra ree bejn por Ad n, ziangajc yan por Jesucrist ma yu' stijb guialnaban par ree b n rliladx laaman. ²³ Per gra gac zi'c rayal: Yaløj Jesucrist naj b n baban, dxel chi gui'taman stijb dxel ma yaban ree beng t b n bililadx ree laaman. ²⁴ Abi' chi ma beenman gan gunabeeman gra ree b n rdxe'ch laaman, zi'c ree b n rajp guialguxtis n  ree b n rajp graloj guial rniabee, dxel ma yay  xguialrniabeeman loj dux Dad ree Dios. ²⁵ Din rayal nabee Cristo xt chi ma beeman gan canabeeman gra ree b n rdxe'ch laaman. ²⁶ Abi' ni chigra gunidlojman naj guialg jt. ²⁷ Loj xtiidx Dios r b guial Dios bad e guialrniabee loj Jesucrist din nabeeman gra, per ad r nt gui ban guial n  Dios rniabeeman din Dios bad ed guialrniabee lojman. ²⁸ Abi' dxej ni ma rniabee Jesucrist loj gra dxel yay man guialrniabee ni bad ed Dios lojman din ma nabee tijbzi Dios gra.

²⁹ Yan bal id zaban ree beng t,  chexquiza zeel yu' ree b n rirobnijs xcwent ree b n ma g jt, abi'za bal id zaban ree beng t?

³⁰ Achet sirv guial nadxu'n loj ni nadxeb gra hor. ³¹ Din rugojnan l jt, gra dxej za'n loj guialg jt, laan naj ni diidxli ni rnin l jt zi'cgajc walin guial dad nix yu' luxdon con l jt guial najdi xbejn Cristo. ³² Yan bal naabzi loj guidxliuj guie g n sirv ni cay nan dxel achet sirv ni basajc ree b n  feso naj, naj reeman bendoxh zi'c ree bedoxh. Din bal id zaban ree beng t mejorli yaguieen ree zi'c r b ree b n r b: "Yadaaw ree yad  t e ree din guixie ma bay jt ree."

³³ Per naj rni l jt ad ti bidi gusquiee reeman l jt. Din guial ridxga' xtiidx ree b n ni ad z t xnejz, najzan par guxhiinan zi'c nabandi. ³⁴ Zeel gol been xgab zi'c rayal ad bal r jn t eridi dol din yu'di ni'quid n nbeetidi Dios, zeel canin lojdi zian din yaya'nxtudi.

Xhienaagyaban ree beng t

³⁵ Per wed yu'di r jn xgab: " Xhieza naag yaban ree beng t?  Xhienaag naj cuerp ni gap reeman?" ³⁶ Per xgab guin xgab tontzan. Din l jt ragbee guial chi rx bin bejn tijb xhaj xhienin, chi rliejnan dxel rnijt xhaj ni gux binman. ³⁷ Ad cwaan ni rliejn guint rx bin bejn, xhajnan rx binman, zi'c r jn bejn con trigo o xhiet ez stijb xhaj nin. ³⁸ Per chi rliejnan ma najn cwaandoo zi'c rniabee Dios gacan, xhiet ez xhaj nin ni rx bin bejn ma yu' cwaando ni guilianan. ³⁹ Zi'c nadxaa xcuerp bejn con xcuerp ree be, nadxaa t e b jl con xcuerp ree biguijn. ⁴⁰ Nadxaa t e ree ni yu' xanyabaa con ree ni yu' guidxliuj, nadxaa naj gualza'cdxoon ree ni yu' xanyabaa con ree ni yu' loj guidxliuj. ⁴¹ Nadxaa xbacha' gubijdx guial loj

bëew nadxaa tëë xbacha' ree bajl xanyabaa, xt ree bajl xanyabaa garent garen naj xbacha' reen.

⁴² Yan ziangajc gac con guial yaban ree bengüt. Cuerp ni rguie'ch rodxañ, per cuerp ni gap bejn stijb ad yu't dxej godxañ. ⁴³ Cuerp ni rguie'ch rxinan, per chi yaban bejn stijb ma gapaman tijb cuerp za'cdxoon ni achet gac. Cuerp ni rguie'ch guin achet gojl yu'n, per chi yaban bejn stijb ma gapaman cuerp ni yu' gojl. ⁴⁴ Rguie'ch cuerp ni rajp bejn loj guidxliuj guie, per chi yaban bejn stijb ma gapaman tijb cuerp ni güün sirv par xanyabaa. Din zi'c yu' cuerp par loj guidxliuj guie ziangajc yu' cuerp par xanyabaa.

⁴⁵ Loj xtiidx Dios rëb guial yaløj Adán gojp guialnaban loj guidxliuj guie. Dxel bi't Jesucrist, bèn razaladx guialnaban loj ree bejn. ⁴⁶ Ad yalojt rajp bejn guialnaban ni gapaman xanyabaa, yalojxgaj rajpaman guialnaban loj guidxliuj guie dxel guialnaban xanyabaa. ⁴⁷ Adán gojcaman con yuj zeel najman bénguidxliuj, per Jesucrist xanyabaa zëédaman. ⁴⁸ Gra ree bénguidxliuj naj xcuerp reeman zi'c goc xcuerp Adán loj guidxliuj guie, per chi guidxin dxej dxel gap ree bejn tijb cuerp lasa' cuerp ni rajp Jesucrist xanyabaa. ⁴⁹ Din zi'c nayajc ree zi'c goc Adán loj guidxliuj guie, ziangajc yayajc ree zi'c naj Jesucrist xanyabaa.

⁵⁰ Abi' rugojnan lëjt compniar raliduladx ree Jesucrist, cuerp ni raya'p ree loj guidxliuj guie ad zajct yayun xanyabaa lod canabee Dios. Din ni rodxañ ad zajct chu'n lod yu' ni ad rodxt. ⁵¹ Per rënan gagbeedi tijb ni achutczi wayagbee xt yan guial ad dugrat ree yayëjt, per dugra ree guidxaa zi'c nayajc ree, yaya'p ree cuerp ren. ⁵² Laan gac chi yaguiejn ree trompejt ni gugojn dunuj ree guial ma bidxin tiamp ni yarii ree loj guidxliuj guie, dxel tibrajtzi zi'ctzi chi ruchip guiaaløj bejn zian guidxaa zi'c nayajc ree. Chi guibejdx trompejt guin yaban ree bengüt dxel ad yu'tri dxej guiët reeman abi' hor zii ma bidxaa zi'c nayajc ree yan. ⁵³ Din rüjn naguiejn guidxaa cuerp ni rodxañ por stijb cuerp ni ad yu't dxej godxañ guidxaa tëë cuerp ni rëjt por stijb cuerp ni ad yu't dxej guiët. ⁵⁴ Abi' chi ma bidxaa cuerp ni rodxañ por stijb cuerp ni ad yu't dxej godxañ guidxaa tëë cuerp ni rëjt por stijb cuerp ni ad yu't dxej guiët, dxejzii naj dxej ni ma gojc cumplid ni rëb loj xtiidx Dios lod rëb: "Xt guin ma bayaaløj gojc gan loj guialgüjt." ⁵⁵ Nadxel tëë ma gojc cumplid zi'c rëb loj xtiidx Dios lod rëb: "Guialgüjt, ¿conza guial rüjnl gan? ¿Conza guial rusagzil bejn?" ⁵⁶ Guialrusagzi guialgüjt naj por dol, abi' por ley ragbee bejn guial dol guin naj ni rniabee laaman. ⁵⁷ Per quixtëe dux Dad ree Dios, bèn rüjn dunuj ree yudar par yaguieen ree gan por xguialgüjt Dad Jesucrist.

⁵⁸ Zeel compniar raliduladx ree Jesucrist zi'c rënan lëjt rnin lojdi, gol guzudxi'ch ad chu' tëë luxdoodi tio'p. Guixie guixie gol been naguiejn güündi mazri xmandad Dios, din lëjt ragbee guial ad ni xlia'tzi gra ni cayüjndi par Dad Jesucrist.

16

Milia ni rdo'p par ree xbejn Dios

¹ Yan por milia ni naj guto'pιδi par güündi yudar stijb ree dux compniar ree bèn raliduladx ree Jesucrist, gol been zi'c gunabeen güün ree bèn rililadx ree Jesucrist niz Galicia. ² Gazob dumingw tijb gajdi gol gule'c cintabl zi'ctzi beendi gan lën toxman, din chi guialan ad rüjntri naguiejn guido'pιδi milia guin. ³ Abi' chi guialan, bèn ni gucaabeedi par gaxhalan

laa reeman chigsa'n gon guin Jerusalén gaxhalan laa reeman con gui'ch ni guiëb chu naj reeman. ⁴ Abi' bal guguian guial rüjn naguiejn gan dxel chinë'n laa reeman.

Xhienaag naj xixgab Pab

⁵ Yaløj gadëedan niz Macedonia dxel guialan Corinto guidganen lëjt. ⁶ Wed xchej gazun con lëjt. Wed guidib tiamp nayaag gazun con lëjt, dxel güündi naj yudar din gan lod naj gan. ⁷ Ad rëntan gadëedzi nejzan gaguixlon lëjt, rënan gaglaan con lëjt bal gunee Dios permis. ⁸ Per yan naj yaya'nan Éfeso xt lanij pentecostés, ⁹ din guie merczi yan catiëjb ree bejn cucaagdiajg reeman xtiidx Dios, abi' rulüü zien reeman chililadx laan, majsi zien gajc reeman rdxe'ch naj por zian.

¹⁰ Chi gui't Timoteo, gol been naguiejn din suman zagdx con lëjt, din lasa'gajc xmandad Dios ni cayünan cayüjnman. ¹¹ Zeel achu lëjt guiniajgaa lojman, gol beenman yudar din gusnuu xnejzaman sin guial chu'man xgab, din gui'taman guie lod cabëëzan laaman con los demazri ree dux compniar ree.

¹² Abi' Apolos, naj guza'c laaman liaadx din nidnëman laa reeman nitixloj reeman lëjt, per ad guyëntaman ni'taman yan, per zi'tcaman gutixlojman lëjt chi guneen laaman tiamp.

Diidx bigra ni bacaa Pab loj gui'ch guie

¹³ Gol guzujsin gol guzujdxi'ch tëe loj ni rliladxidi Jesucrist. Gol gudaan ni gui'tzi gol guzujdxi'ch tëe. ¹⁴ Gra ni güündi gol beenan guial rëndi bejn ree.

¹⁵ Compniar raliduladx ree Jesucrist, lëjt ragbee guial Estéfanos con xfamilaman laa reeman naj bën yaløj bililadx Jesucrist niz Acaya, ragbee tëedi xhienaag cayüjn reeman yudar dux compniar ree bën rliladx ree Jesucrist. Zeel rnin lojdi: ¹⁶ Lasa' ree bën guin gol bazoob xtiidx reeman con gra ree bën cayüjn xmandad Dios në ree bën cayüjn yudar cayajc mandad guin.

¹⁷ Dád nix guyu luxdon chi baguiaad Estéfanos guie, në Fortunato në Acaico. Din por laa reeman guza'can zi'cgajc chi za'n con gradi. ¹⁸ Laa reeman bagu' luxdon niz guie zi'c ragu' reeman luxdoodi, abi' lasa' ree bën guin gol gojp reeman respejt.

¹⁹ Gra ree compniar rliladx Jesucrist niz Asia guie rugajpdioz reeman lëjt. Abi' Aquila con lacheelaman Priscila con gra ree xbejn Cristo bën rado'p ree lidx reeman, rugajpdioz reeman lëjt, nayajc ree xbejn Cristo. ²⁰ Gra ree dux compniar ree bën rliladx ree Cristo rugajpdioz reeman lëjt, gol bagajpdioz tëe lasa'di zi'c rayal.

²¹ Naj Pab, quijb naj cuca lëjtr guie ree par gugajpdiozan lëjt.

²² Bal yu' bën ad rënt dux Dad ree Jesucrist, laaman ma rayal xcasti Dios. ¡Dux Dad ree Jesucrist nayob gui'taman!

²³ Abi' dux Dad ree Jesucrist güünle' gradi. ²⁴ Zi'c nayajc ree xbejn Cristo tiblojzi rënan gradi. Amén.

Gui'ch barojp ni guxhaal San Pabl loj ree bèn Corinto riladx Jesucrist

Rugajpdioz Pab bèn Corinto riladx ree Jesucrist

¹ Naj Pab, Dios bacaabee naj gacan xi apóstol Jesucrist, nē dux compniar ree Timoteo za' con naj. Naj cuca gui'ch guie par lējt guial ma riladxidi xtiidx Dios luguiedx Corinto nē los demazri ree bèn riga' niz Acaya. ² Dux Dad ree Dios con Dad Jesucrist güünle' lējt yabe'cdxe tēe reeman luxdoodi.

Tarbajw ni gudəd Pab

³ Quixtēē Dios xDad Dad Jesucrist, bèn naj Dad bèn raya dunuj ree naj tēeman Dios bèn ragu' du luxdoo ree. ⁴ Laaman ragu' du luxdoo ree loj xhietēēz guialrzagdiaj ni radüüd ree din gac yalu' ree luxdoo ree bèn cadəd xhietēēz guialzi, yalu' ree luxdoo reeman zi'c ragu' Dios du luxdoo ree. ⁵ Din majsi cayzaagdiaj da't ree guial nayajc ree xbejn Cristo, ziangajc dád ragu'man du luxdoo ree. ⁶ Abi' bal cayzaagdiajn, cayzaagdiajn din yaguieenan lējt yudar din chu' luxdoodi din laa tēēdi loj dol. Abi' bal cu'man du luxdoon, rgu'man du luxdoon din chu' luxdoodi din gac taandi lasa' ree guialzi ni caydüüdan. ⁷ Ad yu' nawēēgt du luxdoon con lējt, din zi'cgajc cazagdiajdi ziangajc cayzaagdiajn dxel ziangajc yagu' Dios luxdoodi zi'cgajc ragu'man du luxdoon.

⁸ Compniar raliduladx ree Jesucrist, rayēnan gagbeedi guial dád zro' naj ni baza'can niz Asia. Naya baza'can niz ni, par dunujn ad zadaantran, ad naguieentran nejz guial yabajnran mazri, ⁹ baguieenan xgab guial ma bayējtan. Per baza'can zian din yadxeguijcan guial achet zajc yaguieen dunujzan sin xyudar Dios, bèn rasban ree bengüt. ¹⁰ Laaman babēē dunujn loj guialgüjt guin abi' gagnēman dunujn loj lasa' ree ni nadxeb guin. Dunuj ree rayagbee guial gusnuu güünman dunujn yudar, ¹¹ mazri bal güündi yudar cwedx guiniabidi Dios por dunujn. Abi' bal zien ree bejn cabejdx canab Dios por dunujn dxel zien gajc reeman gudēēd quixtēē lojman zi'c cayagnēman dunujn.

Chexc ad wejt Pab Corinto

¹² Abi' ni rabaan rnin lojdi guial achetczi naduladxan guial rayagbeen nabajnan naya delant lojdi nē delant loj ree bēnguidxliuj, abi' diidxli cayguieenan ni rayal yaguieenan. Per ad cayguieentan zian por dux quiarguiejnzan, cayguieenan zian por xyudar Dios. ¹³ Loj dux gui'chan ad racaatan ni ad zajct goolidi o ni ad zajct chignia'di. Balzianclaa chignia'di gra ni canin lojdi. ¹⁴ Zi'cgajc ta'ngaj cayagbeedi guial chi gui't Dad Jesucrist zatijb lējt yabaadi con dunujn guiaäd dunujn yabaan con lējt.

¹⁵ Laan naj ni yu'guican, zeel yaloj benan xgab nidganan lējt din nabaadi guial ma barojp volt bidganan lējt. ¹⁶ Benan xgab nidganan lējt chi nialan niz Macedonia, abi' chi nazaan Macedonia nialan nidganan lējt stijb, dxel nagu'nejzidi naj par Judea. ¹⁷ Ad güündi xgab guial chi rnin guidganan lējt rnizan zian. Ad güündi xgab guial rünan zi'c rüjn gra ree bēnguidxliuj, ganin guialan abi' ragbeen guial ad zialtan. ¹⁸ Dios ragbee guial ad raguie'chtan yaguieenan ni rayagbeen ad zaguieentan. ¹⁹ Din

Jesucrist Xi'n Dios, b n ni ma baguien xtiidx lojdi, naj con Silvano con Timoteo, ad najt Jesucrist b n na g nman ni ragbeeman ad z jntaman, laaman ganax diidxli rnieeman. ²⁰ Din por laaman rajc cumplid gra ree xpromejs Dios. Zeel por laaman raguie'ch ree "Am n" chi rad ed ree quixt e loj Dios. ²¹ Abi' Dios laaman cay jn dunuj ree yudar con l jt din yadxu'dxi'ch ree loj ni nayajc ree tijbzi con Cristo, Dios bacaabee dunuj ree din yayajc ree par laaman. ²² Laaman gule dunuj ree par laaman, abi' guxhaal xSprijtaman b n nabajnn ' ree zi'c tijb sen guial yaca' ree ni yaca' ree.

²³ Yan bal gadan ga Corinto zi'c benan xgab, Dios ragbee guial gadan ga guial ad r ntan gadil n l jt, abi' Dios gud ed naj casti bal id wali ni canin. ²⁴ Ad cayguieentan naguiejn yanabeen l jt xhienaag chililadxidi Jesucrist, din dunujn rayagbee guial diidxli za'dxi'chidi loj ni rliiladxidi Jesucrist, ni cayguieenan naj guial yaguieenan l jt yudar din chu' luxdoodi nix guibandi.

2

¹ Zeel benan xgab ad zidganatan l jt yan, chit e chu'naya luxdoodi. ² Din bal gagu'nayan luxdoodi,  chuza cu' luxdon nix bal ma badxe'nayan luxdoodi l jt ragu' luxdon? ³ Zeel bacan zi'c bacan loj gui'ch ni guxhalan lojdi, din chi guialan ad cu'di luxdon naya luar cu'di luxdon nix. Abi' naj ragbee bal yu' luxdon zagdxe gradi yu' luxdoo zagdxe por zian. ⁴ Chi bacan gui'ch guie d d guyun xgab abi' guyunayan xt ronan bacan diidxnaa ni bacan loj gui'ch guie, per ad bacatan gui'ch guin par gagu'nayan l jt, bacanan par gagbeedi guial r n da'tan l jt.

Yu' perdon par b n badxe' falt

⁵ Bal yu' tijbidi ma badxe'naya naj, per ad najtzi guyunaya n gajc l jt guyunaya. Rnin n  l jt chit e gad edlajn guial ganin graczi guyunaya por zian. ⁶ Per naj rni lojdi compniar raliduladx ree Jesucrist, ma gojczy yan con casti ni ma bad edidi loj b n guin. ⁷ Yan gol beenman perdon gol bagu' t e luxdooan chit e chu'naya luxdooan xt ad zadxejlt xhie g nman. ⁸ Zeel rniaaban lojdi, gol been naguiejn din gagbeeman guial r ndi laaman zi'cgajc guy ndi laaman guia'xchej. ⁹ Gui'ch ni guxhalan lojdi gocli, guxhalanan din gagbeen bal ruzoobidi da diidxan guial g ndi gra ni ganin lojdi. ¹⁰ Yan chut ez b n g ndi perdon, n gajc naj g n laaman perdon. Abi' b n ma benan perdon, bal yu' ni g nan perdon, benan laaman perdon delant loj Cristo por l jt ¹¹ chit e g n xindxab dunuj ree gan, din dunuj ree rayagbee xhienaag naj xguialrusquiee xindxab.

Ad nixt guyu luxdoo Pab guzujman Troas

¹² Chi bidxinan guiedx Troas par ganen xtiidxza'c Jesucrist, d d gogn  Dios naj par g nan mandad guin ni. ¹³ Per ad nixt guza'can guial ad bidxaaglojtan dux compniar ree Tito. Zeel basa'nan b n guin ree abi' wan Macedonia.

Ragn  Jesucrist dunujn zianczi

¹⁴ Per quixt e Dios guial por Jesucrist guixie guixie cayagn man dunujn chit e xhie g n dunujn gan abi' por dunujn cayagbee ree bejn xtiidxza'c Jesucrist, diidxza'c guin ree naj zi'c tijb ni rliaa nejxh ni rire'ch cha' guidibczi. ¹⁵ Abi' por Jesucrist dunujn nayajc zi'c tijb go'xh ni rliaa

nejxh delant loj Dios, go'xh ni rdxin loj ree b n rliladx Jesucrist n  loj ree b n ad rliladxt. ¹⁶ Par ree b n ad rliladxt laaman, dunujn nayajc zi'c tijb go'xh ni rug jt, per par ree b n rliladx laaman dunujn nayajc zi'c tijb go'xh ni runeel guialnaban. Per,  chu zajc g  n ree ni guin sin xyudar Dios? ¹⁷ Dunujn ad cayguieentan negojs con xtiidx Dios zi'c r jn garol ree bejn, dunujn raguieenan zi'c rayal, zi'c ma bacaabee Dios dunujn yaguieenan. Abi' Dios ragbee guial por guial nayajcan xbejn Cristo zeel raneen xtiidxaman.

3

Nejz c b ni yu' par yadxin ree loj Dios

¹ Chi ranan zian, ad naladxidi guial dunuj gajcan cayles dux valoran. L jt ragbee guial ad r jnt naguiejn yal  n tijb gui'ch lojdi par gagbeedi chu dunujn o yanaaban gui'ch lojdi ni g  n dunujn yudar par gagbee ree bejn chu nayajcan zi'c r jn ree ben ren. ² Din l jt gajc naj tijb gui'ch par dunujn, gui'ch ni yu' du luxdooon ni rool ree bejn ni n nbee t e reeman. ³ Zi'c rul   yaguie'ch ree l jt naj tijb xtiidx Cristo ni bacaan, per ad bacaatanan con tint, bacaanan con xSprijt Dios b n naban, tijb ni ad cwat loj tijb guiaj nata', cwan luxdoo ree bejn.

⁴ Dunujn raya'p Dios confianz por Jesucrist, ⁵ abi' ad raguieentan xgab guial yu' ni raguieen dunujzan, din gra ni raguieenan, raguieenan laan con xyudar Dios. ⁶ Dios naj b n razaladx dunujn quiarguiejn par yagojnan bejn ree xcwent nejz c b ni ma yu' par yadxin ree loj Dios, nejz c b ni ad ryaadxt chinal bejn tijb ley ni z ed loj gui'ch, per r jn naguiejn chinalaman ni z ed por xSprijt Dios. Din ley castizi naj ni zidn n, per xSprijt Dios guialnaban naj ni rud eman loj ree bejn.

⁷ Abi' majsi castizi naj ni zidn  ley ni bad e Dios loj Moisejs loj tijb guiaj nata', per d d bidiin bacha' loj Moisejs chi cwa'man ley guin, xt ad gojct nuguaiaa ree b n Israel lojman por bacha' guin, bacha' ni ta'ngaj ta'ngaj gunidlojn. ⁸ Bal chi bi't ley guin gojc zian, yan,  mazri ni za'cdxooon naj guial gucaagdiajg ree bejn xcwent nejz c b ni rul   xSprijt Dios ni ma rajp bejn con Dios! ⁹ Din chi bi't ley ni ridn  casti par ree bejn, con bacha' bi'tan, yan,  mazri ni za'cdxooon naj guial guien ree bejn xhienaag gac reeman naya delant loj Dios! ¹⁰ Abi' bal ni za'cdxooon gojc chi bi't xley Dios loj guidxliuj guie, yan achetczi lasajc guialza'cdxooon guin par guialza'cdxooon ni naj por nejz c b ni ma rajp ree bejn con Dios. ¹¹ Abi' bal ni ad r jnt sirv par gra tiamp, bi'tan con tijb ni za'cdxooon, yan mazri ni za'cdxooon naj ni ad yu't dxej nit.

¹² Abi' guial yu'guijc ree zian, zeel sin guialrdxeb cayl  nan bejn ree. ¹³ Ad raguieentan zi'c been Moisejs, basiaaw lajd lojman chit e gagbee ree b n Israel guial ziquied guialrulaa bacha' lojman, bacha' ni laa gunit gajc. ¹⁴ Per ad lojtzi Moisejs biaaw, ne gajc xquiarguiejn ree bejn biaaw. Din xt yandxej chi rool reeman loj xtiidx Dios ni bacaa Moisejs, achet rignia' reeman, tijbzi por Jesucrist zajc chignia' reeman laan. ¹⁵ Per xt yandxej chi rool reeman ni bacaa Moisejs ad rignia't reeman guial sta nayaaw xquiarguiejn reeman. ¹⁶ Per b n rliladx Jesucrist, laaman rxhial xquiarguiejnman. ¹⁷ Din tijbzi naj Jesucrist con xSprijt Dios, abi' lod ma naban bejn con xSprijt Dios achetri rniabee laaman. ¹⁸ Zeel achetri nayaaw duloj ree zi'c been Moisejs, din dunuj ree nayajc ree zi'c guiaawajn lod rguien xbacha' Jesucrist abi' chaawladx cayjag

ree zi'c rënman yayajc ree, abi' guixie guixie cusniman dunuj ree por xSprijtaman.

4

¹ Zeel zi'c ma baya Dios dunujn abi' gulejman dunujn par yaneen xtiidxaman, ad zadxagtan yaguieenan mandad guin. ² Dunujn achet raquie'chan, achet ni ad rünjt sirv cayguieenan, ad caysquieetan bejn ree ad caychaa tëëtan xtiidx Dios. Dunujn cayneen ni naj xtiidxli Dios, abi' bejn gajc ree zajc gagbee guial cayguieenan xnejz delant loj Dios. ³ Per bal yu' bén ni ad rignia't xtiidxza'c Jesucrist ni cayneen, ad rignia'taman laan guial ad zëtaman loj xnejz Dios. ⁴ Abi' xindxab rniabee loj guidxliuj guie ma bascajyix xquiarguejn reeman, guial ad rënt reeman chililadx reeman, chitëë gusni xtiidxza'c Jesucrist laa reeman abi' ad zajct guguiaa reeman xgualrniabeeman, laaman guial najman zi'c gajczi Dios. ⁵ Ad caytie'chtan dux tiidx gajcan, ni caytie'chan naj xtiidxza'c Jesucrist, bén naj Dad par dunuj ree. Abi' ni ranazan lojdi guial cayguieenan sirv lëjt por guial rayënan Jesucrist. ⁶ Abi' laagajc Dios ni gunabee persi bani loj guidxliuj guie chi gule'cchaawaman laan, laagajcaman basni dux quiarguejnan, guxhalaman dux quiarguejnan din yayignia'n xhienaag naj xgualrniabeeman, guialrniabee raguiaa ree por Jesucrist.

Yabajn ree por gualrliladx

⁷ Gulejman dunujn par yaguieenan ni cayguieenan, majsi nayajczan zi'c guiajs bajn din guiguieen guial gra gualrniabee zëed por Dios ad por dunujtan. ⁸ Majsi graloj gualzi caydüüdan per ad ralenya'tan. Majsi rulüü achetri zajc yaguieenan, per radxejl gajc xhienaag yaguieenan. ⁹ Majsi xhietëez rüjnnë bejn dunujn, per ad riro'nladxt Dios dunujn. Rguin reeman dunujn per ad runidlojt reeman dunujn. ¹⁰ Bantëëz guin zio'n nadxu'n loj gualgüjt zi'cgajc guzajc Jesucrist, per zian ralüün guial raya'pan xgualnabanman. ¹¹ Dxel la'tgaj nabanman, guixie guixie nadxu'n loj gualgüjt guial nayajcan xbejn Jesucrist, per zian ralüün guial raya'pan xgualnabanman, majsi guidxin dxej nit dux cuerpan. ¹² Nadxu'n loj gualgüjt guial caytie'chan xtiidx Jesucrist, per por zian ma rajpidi gualnaban delant loj Dios.

¹³ Loj xtiidx Dios rëb: “Guial bililadxan, zeel gunen ni gunen.” Yan ziangajc guial raliduladxan xtiidx Dios zeel cayneen laan. ¹⁴ Din dunujn rayagbee guial Dios, bén basban dux Dad ree Jesucrist loj gualgüjt, ziangajc yasbanman dunuj ree guial ma nayajcan tijbzi con Jesucrist dxel lëjt con dunujn tijbzi chignëman dunuj ree lod zojbaman. ¹⁵ Din gra ni cayguieenan në gra ni cayza'can, cayza'can zian din yaguieenan lëjt yudar din gusnuu gacxhiej ni riladxidi Jesucrist. Zian ma gac ree bejn mazri zien gudëed reeman quixtëë loj Dios, guza't tëë reeman laaman zagdex.

¹⁶ Zeel ad ralenya'tan. Din majsi cayo'xh dux cuerpan por mandad guin, per dux sprijtan guixie guixie caycüb Dios laan. ¹⁷ Achetczi lasajc ree gualzi ni caydüüdan loj guidxliuj guie din najn ni rdëd, per por gualzi guin ree rayalan xgualnaza'c Dios, gualnaza'c ni lasajc mazri abi' ad yu't dxej nitan. ¹⁸ Din dunuj ree ad cayguieent ree naguiejn yaya'p ree ni raguiaa ree loj guidxliuj guie, cayguieen ree naguiejn din yaya'p ree ni ad raguiaat ree. Din ni raguiaa ree loj guidxliuj guie yu' dxej nit reen, per ni ad raguiaat ree yan ad yu't dxej nit reen.

5

¹ Dunuj ree rayagbee guial dux cuerp ree naj zi'c tijb yu cenci par dux sprijt ree loj guidxliuj guie, yu ni yu' dxej nit. Per rayagbee ree guial xanyabaa Dios gunee dunuj ree stijb cuerp, cuerp ni ad gojct por bénguidxliuj zi'c rajc tijb yu, abi' cuerp guin yaya'p ree par tiblayaa. ² La'tgaj raya'p ree cuerp guie loj guidxliuj ralu' ree guialquia, par dunuj ree xi nix diob guidxin dxej yaya'p ree cuerp ni yaya'p ree xanyabaa. ³ Din ad ganaxtizi Sprijt yayajc ree xanyabaa, nêgajc cuerp yaya'p ree. ⁴ La'tgaj raya'p ree cuerp ni raya'p ree loj guidxliuj guie, cayzaagdiajn nadxu'n xgab por ni cayza'can. Ad ranatan guial rayënan yayëjtan, ni rayënan naj guial yaya'pan cuerp cüb ni yaya'pan par tiblayaa din nit dux cuerpan ni rayal nit. ⁵ Dios been dunuj ree zi'c nayajc ree abi' banee xSprijtaman duloj ree zi'c tijb sen guial gac zi'c naman gac.

⁶ Zeel zianczi raya'p ree confians, abi' dunuj ree rayagbee guial la'tgaj nabajn ree loj guidxliuj guie, zijt nadxu' ree guial lod zojb dux Dad ree Jesucrist. ⁷ Per dunuj ree zunaal reeman guial raliduladx ree laaman ad guial raguaa ree xhienaag gac. ⁸ Zeel raya'p ree confians guin, abi' ma rayën ree yasa'n ree cuerp ni raya'p ree loj guidxliuj guie din yo' ree yuchu' ree con Jesucrist. ⁹ Zeel achet güünan bal loj guidxliuj guie o bal xanyabaa, per ni rayën ree naj guial yaguieen ree zi'c rën Cristo. ¹⁰ Din dugra ree rayal yadxin lojman lod güünman guialguxtis din tijbgaj dunuj ree yaca' ni rayal ree, por ni zagdxe o por ni mal ni baguieen ree loj guidxliuj guie.

Xhienaag gap bejn nejz par guidxinman loj Dios

¹¹ Zeel por respejt ni raya'p ree Jesucrist, cayguieen ree naguiejn guidxga' ree bejn xtiidxaman. Abi' Dios ragbee guial dunuj ree cayguieen ree zi'c rayal, balzianclaa nê lëjt güünbee dunujn guial dunujn cayguieencan xnejz. ¹² Ad caylest dux valoran, ni rayënan naj guial yabaadi guial gagbeedi ni naj diidxli por dunujn, din gac yadxi'di diidx loj ree bén rüjn naguiejn yaya'n reeman zagdxe delant loj ree bejn luar güün reeman xgab xhienaag naban reeman delant loj Dios. ¹³ Yan bal par bejn rajc duguijcan por ni cayguieenan, per cayguieenan laan por Dios. Abi' bal par lëjt nadëdguieenan zeel cayguieenan mandad guie, cayguieenan laan par yaguieenan lëjt yudar. ¹⁴ Guial rën Cristo dunujn zeel cayguieenan ni cayguieenan, din dunujn rayagbee guial Cristo güjt par gra bejn abi' gra ree bejn ma naj zi'c bengüt par dol. ¹⁵ Abi' Jesucrist güjtaman por gra bejn din bén chililadx ree laaman ad zabajntri reeman zi'ctzi rën reeman, ma guiban reeman zi'c rënman, laaman guial güjtaman por laa reeman abi' babanman stijb. ¹⁶ Zeel bal guia'xchej baguieen ree xgab guial naj Cristo tijbzi bénguidxliuj, per ad najtri dux xgab ree zian por laaman. Abi' ad rayidxga'tri ree guial chu naj bejn, ¹⁷ din chutëéz bén ma naj tijbzi con Cristo, ma bidxaa mod ni nabanman. Ma nabanman garen guial loj ni gubanman guia'xchej.

¹⁸ Per gra nine naj por xyudar Dios, laaman been persi raya'p ree nejz par yadxin ree lojman por Jesucrist, abi' laaman gule dunujn din yagojnan bejn ree xhienaag din gap reeman nejz par guidxin reeman lojman. ¹⁹ Din tijbzi naj Dios con Jesucrist abi' por Jesucrist rüjn Dios naguiejn gap ree bejn nejz par guidxin reeman lojman, por Jesucrist ma nayab ree bejn sin dol delant loj Dios, zianan naj ni bacaabeeman dunujn yagojnan bejn ree. ²⁰ Zeel dunujn nayajc bén canee por Cristo,

cayd edan xtiidx Dios din gagbee ree bejn xhie rniab Dios g un reeman. Abi' por Jesucrist ranaaban lojdi: Gol guzuj zagdxe con Dios. ²¹ Din Jesucrist achetzi dol beenman, per por dux tol ree baslaa Dios g jtaman zi'c tijb b ndol din por laaman, cuguiaa Dios dunuj ree zi'c tijb b n ni ad way jnt dol.

6

¹ Zeel zi'c cayguieenan xmandad Dios, dunujn ranaab lojdi: Ad g unbee xlia'di guial r n Dios l jt. ² Din loj xtiidxaman r b:

Chi bidxin dxej guidxga'n l j,
bidxga'n l j
abi' chi bidxin dxej gapil perdon
dxel beenan l j yudar.

Abi' dunujn rana lojdi guial ma bidxin dxej guin par l jt, ma bidxin dxej guidxga' Dios l jt n  dxej g unman l jt perdon.

³ Dunujn ad cayguieentan tijb ni g un guial ad zaliladxtri ree bejn Jesucrist, ad cayguieentan tijb ni gui b ree bejn guial ad cayguieentan zi'c bal un bejn ree. ⁴ Par gra cayl un bejn ree guial dunujn nayajc b n cay jn sirv Dios caydaan t en xhiet ez ni raza'can, zi'c guialzi, tarbajw, ni naya, ⁵ n  guial naa ni r jn ree bejn dunujn. N  guial rgu' reeman dunujn ladxguiib, rgu' t e reeman dunujn loj wadijl, ni radxagan guial tant zien ni raguieenan, ni ral en bacaal, ne guialrliaan ni rad udan. ⁶ Cayl u t en bejn ree chu nayajcan guial nabajnan zi'c rayal, guial rayagbeen conin naj diidxli, guial raya'pan pacens nayajc t en benza'c con ree bejn, guial nabajnan con xSprijt Dios, guial diidxli ray enan ben ren ree, ⁷ guial ranen ni naj diidxli, guial cay jn Dios dunujn yudar, n  guial rad en consejw loj ree bejn o radxi'n xtiidx ree bejn con xtiidx Dios. ⁸ Yu' dxej rajp ree bejn dunujn respejt, yu' t e dxej rnieeguijdx reeman dunujn. Yu' dxej rniee reeman diidxza'c ree por dunujn, yu' t e dxej rniee reeman dunujn diidxguijdx. R jnn  reeman dunujn zi'c b n rusquiee majsi diidxli naj ni raneen. ⁹ Yu' dxej r jn reeman zi'c b n ad n nbeet dunujn, majsi n nbee reeman dunujn. Majsi rul u ma yay jtan per ad ray jtan, abi' majsi xhiet ez r jnn  reeman dunujn per ad rug jt reeman dunujn. ¹⁰ Majsi yu' naya du luxdoon, per raguieenan naguiejn din guiguien guial yu' du luxdoon nix. Majsi b nprob dunujn per por dunujn zien ree b n ma naj rijcw niz loj Dios guial ma ragbee reeman xtiidxaman. Majsi achet raya'pan loj guidxliuj guie, per achet rayaadxan.

¹¹ B n Corinto, dunujn ma ranan gra por dunujn, achet ni naguie'ch par dunujn guial diidxli ray enan l jt. ¹² Dunujn ad rlioxt ray enan l jt, l jt bal id r nridi dunujn. ¹³ Per naj rni n  l jt zi'c rnieen  tijb dad gra xi'nman: Gol guy n dunujn zi'c ray enan l jt.

Nayajc ree zi'c xyadoo Dios naban

¹⁴ Gol gojp cudad xhie ree compromis g undi con ree b n ad rliladxt Dios, din garen naj xixgab ree b n ma zinal ree xnejz Dios guial loj xixgab ree b n contzi naban. Garen naj xixgab ree b n ridxga' xtiidx Dios guial loj xixgab ree b n ad ridxga't laan. ¹⁵ L jt ragbee guial ad zajct gac Cristo tijbzi con xindxab, ziangajc garen naj b n rliladx Cristo guial loj b n ad rliladxt laaman. ¹⁶ Garen naj ree b n rliladx dux Dad ree Dios guial loj ree b n rliladx ni naladx reeman naj dios. Din dunuj ree guial

raliduladx ree Dios naban, dunuj ree nayajc xyadoodan zi'c rëb tiblajt loj xtiidxaman lod rëb:

Naj gabajnnë' laa reeman gazu tēen con laa reeman bantēez guin che reeman.

Naj gac xDios reeman

abi' laa reeman gac da bejnan.

¹⁷ Rëb tēe loj xtiidx Dios:

Gol barii loj ree ben mal, gol been tiblax.

Ad güüнди ni dxuudx din yaca'n lëjt,

¹⁸ abi' naj gac tijb Dad par lëjt

guiáad lëjt gaquidi da xi'ngaanan në daxi'ndxa'pan.

Zian rëb dux Dad ree Dios bén ca' gra gualrniabee.

7

¹ Ni guin ree naj ree promejs ni ma been Dios con dunuj ree nayajc ree bén riladax ree Jesucrist. Zeel rayal yaguieen ree naguiejn yabajn ree naya. Yasa'n ree tiblax dol, xgab mal, në gra ree ni dxuudx. Abi' guixie guixie yaguieen ree naguiejn yabajn ree zi'c rën Dios por respejt ni raya'p reeman.

Rabaa Pab guial bayüjn ree bén Corinto xgab por xtol reeman

² Gol gojc benza'c con dunujn! Dunujn achet waguieenan lëjt, achet ni mal waguieenan lëjt ad wasquiee tēetan lëjt. ³ Ad naladxidi caneguidxan lëjt, din zi'c ma rnin lojdi diizd guia'xchej guial dunujn rayënan lëjt, abi' majsi yayëjtan o majsi yabajnan per tijbzi nayajcan con lëjt. ⁴ Dád ra'pan lëjt confianz abi' dád rabaanë'n lëjt. Majsi xhietëez guialzi caydüüdan, per zi'c rgu'di du luxdoon nix zeel dád rabaan, majsi xhietëez cayza'can

⁵ Din diizd chi badxinan niz Macedonia achetzi guial yaziiduladxan por gra ni cayza'can, zi'c ni rüjnnë ree bejn dunujn në guialnadxeb ni caydüüdan. ⁶ Per Dios bén ragu' luxdoo ree bén yu'naya luxdoo, laaman bagu' du luxdoon chi bi't Tito guie. ⁷ Abi' ad guialzi bi'ttaman bayu du luxdoon nix, në guial bagu'di luxdooman zeel bayu du luxdoon. Naman du lojn guial dád rëndi guguaadi naj, yu' tēedi xgab yu'naya tēedi por naj. Laan naj ni rabaanë'n guial yu'quidi xgab por naj.

⁸ Majsi naya guyu luxdoodi por gui'ch ni guxhalan lojdi, per achet naladnan. Majsi dád naya guyu luxdon chi guxhalanan guial ragbeen zunayadi tiblax, ⁹ per yan nix yu' luxdon, ad guial guyu nayatidi, yu' luxdoon nix din por guialguyunaya guin ma bayüjndi xgab zëdi loj xnejz Dios. Guyunayadi abi' gudaandi zi'c rën Dios, abi' achet ni mal baguieenan lëjt. ¹⁰ Din chi runaya luxdoo bejn zi'c rën Dios, guialrunaya guin rüjn yudar persi rayüjn bejn xgab por xtolaman, zian rarii bejn loj casti, abi' ad yu't dxej yayüjn bejn xgab guial gulaaman loj casti guin. Per guial runaya luxdoo bejn abi' ad rüjntaman naguiejn chu'man loj xnejz Dios, dxel ad zajct gapaman guialnaban delant loj Dios. ¹¹ Per lëjt gol baguiaa zi'c ma been yudar guial guyunayadi abi' gudaandi zi'c rën Dios. Por guial guyunayadi nayob beendi naguiejn bazuxnejzidi ni ma rnin cayüjn tijb lëjt, abi' balendi bidxeb tēedi por ni cayüjnx. Dxel ma rënejzdoodi gazun con lëjt, badëe tēedi laax casti zi'c rayal. Por gra ni beendi zian biguien guial achet dol rajpidi por zian. ¹² Gui'ch ni guxhalan lojdi, ad guxhaltanan guialzi rünan xgab por bén cayüjn dol guin o guial rünan xgab por bén cazagdiaj por xtol bén guin. Guxhalan

gui'ch guin lojdi din gulüüdi loj Dios guial yu'guijquidi dunujn. ¹³ Laan naj ni rabaanë'n guial beenquidi zian.

Abi' yan mazri rabaan guial raguiaan Tito yu' luxdooan zagdxe baguiaadaman guial dád naza'c gojquidi con laaman. ¹⁴ Zeel ad basa'nxtutidi naj por gra zi'c bazatan lëjt lojman. Din gra ni rën por lëjt naj diidxli zi'c ragbeedi guial dunujn ganax diidxli raneen, abi' tée diidxli naj ni raguie'chan loj Tito por lëjt. ¹⁵ Yan dad rusaaladxaman lëjt guial rusaaladxaman xhienaag bazoobidi xtiidxaman në gra respejt ni gopidi laaman chi guzuman con lëjt. ¹⁶ Dád nix yu' luxdon guial ra'pan lëjt confianz par gra.

8

Guial rudëed gon con guidib luxdoo

¹ Yan compniar raliduladx ree Jesucrist, rayënan gagbeedi xhienaag cayagnë Dios bén rliladx ree Jesucrist niz Macedonia. ² Majsi xhietëez cazajc reeman, per ad rucwëzt rguien guial dád rabaa reeman. Majsi dád bënprob reen, per dad rabaa reeman rudëed reeman cintabl par gagnë reeman bejn ree. ³ Naj ragbee guial diidxli been reeman yudar bejn ree xt lod baneetzan laa reeman. Laa reeman been yudar mazri guial loj ni baguieenan xgab, sin guial chu güün laa reeman naguiejn. ⁴ Dád been reeman naguiejn du lojn din yatiëjban guial në laa reeman güün yudar bén rliladx ree Jesucrist, ⁵ abi' been reeman yudar mazri guial loj ni baguieenan xgab, laan naj guial diidxli ma basa'n laagajc reeman loj Dios, laan naj ni been reeman yaloj. Zeel yan ma za' reeman par güün reeman ni yaguie'chan loj reeman guial rën reeman güün reeman zi'c rën Dios. ⁶ Zeel yan zi'c ma guzuloj Tito cuto'paman yudar guin, raguie'chan lojman din gulox guto'paman laan entr lëjt. ⁷ Dunujn rayagbee guial par gra zagdxe zëdi: Diidxli rliladxidi Jesucrist, ragbeedi xcwentaman, achet ryaadxidi par guinieedi xtiidxaman, za'sindi par güündi laaman sirv rën tëedi dunujn, yan gol been naguiejn din guiguien guial najdi benza'c par güündi yudar con ni ranan lojdi. ⁸ Ad rüntan lëjt naguiejn guial gudëedi ni rdo'p, per rugojnan lëjt zi'c rabaa ree ben ren guial rüjn reeman yudar, din bal rëndi gulüüdi guial diidxli rëndi xcompniaridi. ⁹ Din lëjt ragbee zi'c naza'c Dad Jesucrist, bén basa'n gra guialnaza'c xanyabaa, abi' bi'taman loj guidxliuj zi'c tijb bén ni achet rajp din por laaman yayal në lëjt xguialnaza'c Dios.

¹⁰ Zeel rnin lojdi guial zagdxen gulooxidi ni guzulojdi gudibijz. Yaloj lëjt been xgabza'c guial güündi yudar, abi' laa guzuloj gajquidi. ¹¹ Yan zi'cgajc yu' luxdoodi nix guzulojdi, ziangajc gol babaa gusnuudi gudëedi ni rdo'p zi'ctzi galguzujdi. ¹² Din chi diidxli rën bejn güünman yudar, xhietëez naag zajc güünman yudar. Ad rayalt gudëedaman xt ni ad rajptaman.

¹³ Ad canitan lojdi guial tëdidi tarbajw cwe'quidi xt ni ad rajptidi par güündi yudar bén ryaadx ree xhienin chitëe xhie guiyaadx reeman, ni rayënan naj guial tibloj yaguieen dulasa' ree yudar. ¹⁴ Yan lëjt zajc güündi yudar bén ryaadx ree xhienin, dxel despuejs güün reeman lëjt yudar con ni ryaadxidi. Zian tibloj yaguieen du lasa' ree yudar. ¹⁵ Loj xtiidx Dios rëb: “Bén bato'p zro' achet been sobr, abi' bén bato'p ta'nzi achet biaadxaman.”

Tito con ree xcompniaraman

¹⁶ Quixtëe Dios badëeman loj Tito lasa'gajc xgab rünan por lëjt. ¹⁷ Yan chi raguie'chan lojman guidganajman lëjt, laa cwëb gajcaman guial ma rënman guguaaman lëjt, ad beent nagueiejn chu niniabee ni'taman.

¹⁸ Abi' con laaman cayxhaalan stijb dux compnarian bén ma nünbee ree dux compniar ree bén rliiladx ree Jesucrist guidibczi, guial rulüman bejn ree xtiidxa'c Dios zagdxe. ¹⁹ Ma bacaabee tée ree dux compniar raliduladx ree Jesucrist laaman din saman con dunujn din güünman dunujn yudar yune'n ni cado'p. Abi' yudar guin cado'pan din guiguien guial rayënan yaguieenan yudar stijb ree dux compniar ree, abi' por yudar guin guza't reeman Dad Jesucrist zagdxe. ²⁰ Zeel cwabee bén guie din saman con dunujn chitëe xhie gucaaquia reeman dunujn por gra yudar ni cado'p ni naca'n par yugsa'nan. ²¹ Din dunujn rayënan yaguieenan gra zi'c rayal, ad naabtizi loj Dad Jesucrist, në loj ree bejn.

²² Yan cayxhaalan Tito con bén guin cayxhaalnë'n laa reeman stijb dux compnarian bén ma balu'been zien volt guial diidxli rënman güünman yudar, abi' mazri yan guial dád rajpaman lëjt confians. ²³ Bal chu guiniabdiidx por Tito, gol güjdx guial da compnarian najman, laaman cayüjn naj yudar par günan lëjt yudar chinalidi xnejz Dios. Guiáad za' tio'p dux compnarian bén zë ree con laaman, dux compniar ree bén rliiladx ree Jesucrist guxhaal laa reeman, abi' ruza't reeman Jesucrist zagdxe. ²⁴ Yan gol balüü loj reeman guial diidxli rëndi bejn ree, din por laa reeman gagbee ree los demazri ree compniar rliiladx Jesucrist xcwentidi, din guguaa tée reeman guial ni diidxli naj ni ma rën loj reeman xcwentidi.

9

Yudar par ree xbejn Jesucrist.

¹ Yan por yudar ni rayal yale'can par yaguieenan yudar dux compniar ree bén rliiladx ree Jesucrist, ad ryaadxt ganin mazri xcwentan, ² din naj ragbee guial ruladxidi güündi yudar. Abi' xt nix yu' luxdon rën loj ree bén Macedonia guial lëjt bén Acaya diidz gudibijz cayüjndi nagueiejn cayüjndi yudar, abi' gra ree bén Macedonia been nagueiejn güün yudar chi biguiejn reeman zian. ³ Zeel caxhalan Tito con za' tio'p ree dux compniar ree din guiguien guial waliqini ma gunen por lëjt xcwent yudar guin, din güündi nagueiejn güündi yudar zi'c ma rën por lëjt. ⁴ Din bal guidné'n tio'p choon ree bén Macedonia ad yadxaaglojn lëjt ad za'tidi porvinid, abi' natun par naj chitëe ganin natun par lëjt por confians ni ra'pan lëjt. ⁵ Zeel benan xgab rën loj Tito con za' tio'p dux compniar ree guial mejorli ned gaj reeman guidganaj reeman lëjt, din güün tée reeman yudar guloox guto'p reeman yudar ni ma nadi din ma najn purvinid chi guialan. Zian guiguien guial diidxli rëndi yazaladxidi ad guialzi canabeetan lëjt.

⁶ Naj rni lojdi bén rxübin ta'n, ta'n gajc raca'man, guiáad bén rxübin zro', zro' gajc raca'man. ⁷ Tijbgaj lëjt gol badëe zi'c naj xixgabidi gudëedi, ad mal gant ad nagueiejn tëet, din Dios rënman bén razaladx guidib luxdoo. ⁸ Abi' Dios rajpaman gra guialrniabee par güünman lëjt yudar gapidi gra ni ryaadxidi chitëe xhie guiyaadxidi din güündi yudar zi'c rayal. ⁹ Loj xtiidx Dios rëb:

Bén ni rgui's ni rajpaman abi'
rudëeman laan loj ree bénprob,
ad yu't dxej yayanladx reeman

ni zagdxe ni r jnman.

¹⁰ Yan Dios b n razaladx bin rx bin bejn, b n razaladx gualraw par ree bejn, laaman gul   l jt xhie g ndi din gapidi gra ni rayal gapidi, din gac g ndi yudar mazri b n ryaadx ree xhienin. ¹¹ Zian mazri naj ni gunee Dios lojdi din gusnuu g ndi yudar yazaladxidi. Abi' por yudar ni guixhiaaln di dunujn par ree compniar rliladx ree Jesucrist, laa reeman gud ed quixt e loj Dios. ¹² Abi' yudar guin ad z jntan sirv naabzi par loj ni ryaadx reeman laan, g unan sirv n  par gud ed reeman mazri quixt e loj Dios. ¹³ Por yudar guin gagbee reeman gual cuzoobquidi xtiidxa'c Jesucrist zi'c rliladxidi laan abi' guza't reeman Dios zagdxe por zian, n  gual najdi benza'c rgui'sidi ni rajpidi par laa reeman n  par gra ree b n ryaadx laan. ¹⁴ Abi' z n reeman l jt, cwedx t e reeman Dios por l jt por xgab za'c ni banee Dios lojdi gual g ndi yudar. ¹⁵ ;Quixt e Dios por ni ma bazaladxaman duloj ree por xi'nman, xt ni'quid radxejl't xhie yagui'e'ch ree por zian!

10

Guialrniabee ni rajp Pab gual najman xi ap stol Jesucrist

¹ Naj Pab, yu' ree b n na gual benza'c naj chi za'n con l jt, abi' chi za'n zijt sin gual rdxeb rdiil n l jt. Per zi'cgajc ninieen  Cristo l jt con respejt n  con diidxa'c, rniaaban lojdi gual ² xi nix chi gualan guidganan l jt ad r jnt naguiejn gadil n b n r b ree por da xgabzan cay nan ni cay nan, din ad rdxebtan ganen n laa reeman. ³ Walican nayajcan b nguidxliuj, per ad raguieentan naguiejn yaguieenan gan por dux xgabzan zi'c r jn ree b n ad zinalt xnejz Dios. ⁴ Ad raguieentan naguiejn yaguieenan bejn ree gan por dux xgabzan, dunujn raguieenan gan por xguialrniabee Dios, gualrniabee ni zajc guse'n xhiet ez ni mal. ⁵ Por gualrniabee guin baguieenan gan loj ni rudxiib ree bejn duguijcan, abi' baguieen t en gan loj gual nadxal reeman ni rudxoon g unbee reeman Dios. Zianan rase'nan xhiet ez xgab din chile' gucaagdiajg reeman xtiidx Jesucrist. ⁶ Abi' l jt chi ma cuzoobidi xtiidx Dios diidxli, dxel dunujn ma nadxu'n par yazuxnejzan gra ree b n ad wazoobt diidx zagdxe.

⁷ L jt mazri ridxga'di zi'c ruguiaadi bejn. Bal yu' b n r jn xgab gual diidxli najman xbejn Cristo, rayal cu'guijcaman gual nayajc ree xbejn Cristo zi'cgajc laaman. ⁸ Abi' majsi ganin lojdi mazri xcwent gualrniabee ni banee Dios lon, ad ratutan din laaman banee gualrniabee par g nan l jt yudar chignia'di mazri xcwent xnejzaman ad par gunijttan l jt. ⁹ Ad naladxidi gual r nzan gucheban l jt con ree da gui'chan. ¹⁰ Din yu' ree b n ni r b gual diidx naa abi' sin gualrdxeb rnien n l jt loj ree da gui'chan, abi' chi za'n con l jt ni'quid rul ut lasajcan par l jt, ni'quid radxat loj ree bejn ni rnien. ¹¹ Per naj rnin lojdi gual b n r b ree zian rayal gagbee reeman gual zi'cgajc raneen n l jt loj dux gui'chan chi nadxu'n zijt, ziangajc zajc yaguieenan chi nadxu'n con l jt.

¹² Din dunujn ad raguieentan zi'c r jn ree b n rlies xvalor gajc, per ni'czi ta'n ad raguieentan xgab yaguieenan zian. Din nitontzi r jn reeman chi rlies xvalor gajc reeman, ruguiaa laagajc reeman xhienaag naj reeman par ree stijb xcompniar reeman. ¹³ Per dunujn ad ralest dux valor gajcan mazri loj ni rayal, din dunujn ranazan ni naj diidxli zi'c gulej Dios dunujn yaguieenan, yan ma cw jbaman badxinan ladxidi. ¹⁴ Zeel ad g ndi xgab gual cad dt  caynabeen l jt, din yaloj

dunuyn bio'p ladxidi par yasiidan l jt xtiidxza'c Jesucrist. ¹⁵ Dunuyn ad ralest dux valor gajcan por tijb ni been stijb bejn. Per ral ezan guial ni's xguialrliladxidi, din yasnuu yaguieenan l jt yudar gusnuu g unbeedi ni ryal gagbeedi xhienaag ryal yaguieen ree. ¹⁶ Zian ma zile' yo'n mazri delant ladxidi par yatie'chan xtiidxza'c Jesucrist, per lod achut wazuloj chit e yales dux valor gajcan con ni ma been ben ren.

¹⁷ Bal yu' b n r n guilies xvalor gajc, mejorli guiliesaman xvalor dux Dad ree Dios. ¹⁸ Din ad b n rliest xvalor gajc naj b n raya'n zagdxe loj Dios, b n raya'n zagdxe naj b n rlies xvalor Dios.

11

Pab con ree ap stoles b n rusquiee ree

¹ Yan,  xi nix taandi naj con tio'p choon ree da xgab tontan! Per naj rni lojdi gol gudaan naj. ² Naj r nan l jt zi'cgajc r n Dios l jt. Zi'cgajc tijb dad rajp xi'ndxa'p biin ni ma naj guxhliaa din chile' guidxinm naya loj xin tia' laam, zian r nan guidxin n l jt loj Cristo naya sin dol. ³ Per rdxeban chu' b n gusquiee l jt zi'c basquiee b el Eva, abi' ad z jntridi xgab guidib luxdoodi xcwent Jesucrist. ⁴ Din chi ri't ben ren r man diidx lojdi xcwent Cristo, per garen guial zi'c ma bal un l jt, o chi ri't b n ren r man diidx lojdi xcwent Sprijt, per ad lasa't xSprijt Dios b n ma nabann di, o chi ri't ben ren lojdi naman xhienaag din gapidi perdon, per garen guial loj ni ma ranan lojdi, l jt laa ridxga' gajquidi laa reeman. ⁵ Per naj rul u achet ryaadxan delant loj ree b n r b laa reeman naj quijb xi ap stoles Jes s. ⁶ Din majsi achet sirv naj par ganen, per ad ryaadxtan guialrignia' abi' l jt ragbee guial diidxlin por gra ni ma baguiaadi baguieenan.

⁷ Per,  chuj ni ni malan benan ya guial ad bentan benro' lojdi persi benan gan gojquidi xbejn Cristo, n  guial ad baquijxtan l jt chi basidan l jt xtiidx Dios? ⁸ Ben renli ree b n naj ree xbejn Cristo cwa'n xmilia reeman persi beenan naj yudar la'tgaj guzun con l jt persi basidan l jt xtiidx Dios. ⁹ Abi' chi guzun con l jt, chi biaadxan xhienin ad gunaabtan lojdi g undi naj yudar, b n Macedonia ree b n rliladx ree Jesucrist laa reeman bidn  ni biaadxan nadxel. Ad goct wanin lojdi guneedi xhienin par naj, ad yu' t et dxej ganin guial r jn naguiejn g undi naj yudar. ¹⁰ Zi'c najn xbejn Cristo rnin lojdi ni naj diidxli, guial niz Acaya Achutczzi zajc gudxoon guial chu' luxdon zagdxe guial gui n ni benan con l jt. ¹¹ Abi'  chexc zeel benan zian con l jt?  Guial ad r ntan l jt ya? Per Dios ragbee guial d d r nan l jt.

¹² Abi' gusnuu g nan zi'c cay nan xt yandxej guial ad zanaabtczan lojdi g undi naj yudar, din chit e xhie guiniee ree b n ruladx guilies xvalor gajc guial naj reeman xbejn Jes s guial zi'cgajc cayguieenan cay jn reeman. ¹³ Din laa reeman r bzi reeman guial naj reeman xi ap stoles Jes s, rusquieezi reeman bejn ree r jnzi reeman zi'c rul u naj reeman xi ap stoles Jes s. ¹⁴ Per xt ni'quid radxat loj bejn por zian, din xt xindxab zile' gul uloj loj bejn zi'c tijb xianjl Dios. ¹⁵ Dxel xt ni'quid radxat loj bejn guial b n ni cay jn ree xmandad xindxab r b reeman guial laa reeman cay jn xmandad Dios. Per laa reeman zayal reeman casti ni ryal reeman por ni cay jn reeman.

Tarbajw ni gud d Pab guial najman xi ap stol Jesucrist

16 Yan canin l jt stijb: Ad naladxidi guial ad nad dguientan, per bal r jn di xgab zian gol basa'n za naj ganen zi'c tijb b n ad nad dguient din n gajc naj gales da valoran majsi t bda'nzi. 17 Ad nat Dios guial gales da valoran zi'c cay nan, per gales da valoran zi'c tijb b n ad nad dguient. 18 Zi'c yu' zien ree b n rlies xvalor gajc por ni r jn reeman loj guidxliuj guie, yan ziangajc naj gales da valor gajcan. 19 Din guial najdi b n rignia' ad naw egt naj taandi b n ad nad dguient ree. 20 Rdaandi b n rniabee ree l jt r jn reeman zi'ctzi r n reeman, rdaandi b n rtia' ree ni rajpidi, b n rusquiee ree l jt, o rniee reeman lojdi ganax ree diidx nab  abi' xt rti jbidi r  z reeman ro'di. 21 Majsi natu'n par naj, per naj rni lojdi guial ad baya'ptan valor guial naguieenn n l jt zian.

Per bal rlies xvalor reeman por xhiedxitzinin, n gajc naj zajc gales da valoran. Canen lojdi zi'c tijb b n ad nad dguient, din ad xnejztan. 22 Per bal na reeman guial naj reeman b n Hebreo, n gajc naj naj b n Hebreo. Bal na reeman guial naj reeman b n Israel, ziangajc naj b n Israel gajc naj. Bal na reeman guial loj xdiaa Abraham z ed reeman, n gajc naj zial loj xdiaa Abraham. 23 Abi' bal na reeman guial xmandad Cristo cay jn reeman, naj mazri cay nan xmandadaman. Majsi zi'c rniee b n ad nad dguient rnien chi rnin zian, per diidxli guial naj mazri ma benan xmandad Cristo guial loj reeman. Abi' por zian mazri ma guyun ladxguib guial loj reeman, mazri ma gudijn ree bejn naj guial loj reeman abi' mazri zien volt ma guzun loj guialg jt. 24 Gaay volt ma gudijn ree b n Israel naj, abi' beegaj gudijn reeman naj zi'ctiubitap volt rugaz reeman duu ladan. 25 Choon volt gudijn reeman naj con yag, abi' tib volt bacaaguiaj reeman naj. Choon volt ma wej barcw lod za'n xan nijsdoo, abi' tibdxej tibguiaal baya'nan loj nijsdoo. 26 Guidibczi lod ma wan, gud edan loj ree ni nadxeb chi gud edan loj ree guiw, loj ree b ngubaan, loj ree b n ladxan b n Israel ree n  loj ree b n ad najt b n Israel. Ma gud ed t en loj ree ni nadxeb luguiedx ree, dajn ree, loj nijsdoo, n  loj ree b n rusquiee na reeman guial naj reeman xbejn Cristo. 27 D d ma guzaagdiajn. D d zien volt ma gul n bacaal, ma gulaanan, ma we'can nijs, abi' ma guyu dxej ni achetcki gudawan. Ma gognajlan, ma biaadx t   da xaban.

28 Abi' ad laatzanan ma guza'can, zien ree ni ma guza'can. Abi' guixie guixie r nan xgab por ree xbejn Cristo b n zojb ree niz lod ma wan. 29 Bal xhie cazajc tijb ree b n rliladx Jesucrist, cay nan xgab por laaman. Abi' bal cusquiee reeman tijb ree b n rliladx Jesucrist par g  nman dol, d d ralenan yu' t en laaman xgab. 30 Bal r jn naguiejn gales da valor gajcan, tijbzi ni ganin por naj, naj por guialrzagdiaj ni ma gud edan. 31 Abi' Dios xDad Dad Jesucrist, laaman b n rayal respekt guidib tiamp, laaman ragbee guial diidxli naj ni canen. 32 Tiamp chi canabee rey Aretas, wan luguiedx Damasco dxel gunabee gobernador luguiedx guin biaaw nejz par guiniaaz reeman naj. 33 Per guyu ree b n ni badxe' naj l n tijb dx m abi' gulet reeman naj niz ro' ventan ni naj ro' ze' ni nayaw guiedx guin, zian gulaan loj gobernador guin.

12

Ni bal  loj lon

1 Achet r jn bejn gan guial guilies xvalor gajcaman, per rayal ganin lojdi por ree ni bal  loj lon n  ree ni bal   Dad Jesucrist naj. 2 Naj n nbee

tijb xinguaaw rliadx Jesucrist, ma gojc chidaj ijz wejx xanyabaa lod zojb Dios. Ad ragbeetan bal binë xcuerpix o xsprijtzix wej, ad ragbeetan, tijbzi Dios ragbee. ³ Bal binë xcuerpix o xsprijtzix wej, ad ragbeetan, tijbzi Dios ragbee. Per naj ragbee ⁴ guial wejx lod zojb Dios, lod bigueijnx diidx ni xt ni'quid radxejlt xhienaag ninieex laan guial ad rayalt gagbee gra bejn laan. ⁵ Bén zii zajc galesan xvalor, per ad rliestan da valor gajcan, ni rnizan por naj por ree guialrzagdiaj ni ma gudëëdan. ⁶ Abi' majsi gales da valoran, ad cayüntan zi'c tijb bèn ad nadëdguient din ganax ni diidxli naj ni ganin. Per ad rüntan zian chitëë yadxaloy bejn naj mazri guial loj ni rayal por ni ruguiaa reeman rünan, o por ni rigueijn reeman rnien.

⁷ Nè par chitëë gales da valoran zro' por gra ni ma balüü Dios naj, cadëëdan tijb guialzi ni naj zi'cgajc zi'c chi yu' tijb guiëjch tiblajt bejn. Laan naj xchiin xindxab par güünnaax naj chitëë gales da valoran. ⁸ Choon volt ma canaabn loj Dios din chiquiedaman guialzi ni cadëëdan, ⁹ per laaman na lon: “Zi'c rënan lüj achet gac, din mazri rguien da guialrniabeen chi cazagdiaj bejn.” Zeel rabaan por ree guialrzagdiaj ni cadëëdan din guiguien guial nabanen con xguialrniabee Cristo. ¹⁰ Rabaan por xhietëëz guialrzagdiaj ni cadëëdan, o nè chi rnieeguijdx bejn naj, o chi ryaadxan xhienin, o chi xhie rüjn bejn naj, nè gra ree tarbajw ni cadëëdan, guial cadëëdan laan guial rënan Cristo. Din chi cazaagdiajn dxel mazri ra'pan xyudar Cristo.

Yu' Pab xgab por ree bèn rliadx Cristo luguiedx Corinto

¹¹ Gunenë'n lëjt por naj gajc zi'c tijb bèn ad nadëdguient, per lëjt rajp dol guial benan zian. Din lëjt naj bèn rayal guilies da valoran delant loj ree bèn ni rëb guial laa reeman naj quijb xi apóstoles Jesucrist. Din majsi tijbzi bèn ad rüjnt sirv naj, per achet ryaadxan delant loj reeman. ¹² Chi guzun con lëjt ad balenya'tan guial günan milagr ree nè gra los demazri ree ni badxaloydi ni benan nè graloy ree ni benan ni been sirv zi'c sen guial diidxli najn xi apóstol Jesucrist. ¹³ Gra zi'c ma benan con gra ree compniar rliadx Jesucrist lod ma wan, ma benan laan con lëjt. Tijbzi ni ad bentan con lëjt naj guial ad rnitn lojdi guial güündi naj yudar con gra ni ryaadxan la'tgaj guzun con lëjt, per bal guneguijdxan lëjt por zian ¡Gol been naj perdon!

¹⁴ Yan ma cayünan xgab guidganan lëjt stijb, laan naj ni yayon volt guidganan lëjt. Abi' ni'qui yan ad zanitan lojdi guial güündi naj yudar, ad ni rajptidi rënan, lëjt naj bèn rënan. Din ad xi'nt bejn rguuil xhienaag guibanman, dad guin ree rguuil xhienaag guiban ree xi'n reeman. ¹⁵ Abi' majsi gra ni ra'pan günan gaxt, o majsi yadib da cuerpan par günan lëjt yudar, per achet güünan. Majsi rulüü chi mazri rënan lëjt, ta'nzi rëndi naj.

¹⁶ Walican guial ad gunaabtan lojdi niagnëdi naj nuneedi xhienin, per yu' ree bèn rëb guial benan zian din nasinan par gusquien lëjt. ¹⁷ ¿Wen basquieen lëjt ya chi guxhalan bèn bidganaj ree lëjt? ¹⁸ Nè chi rën loj Tito guial gui'taman guidganajman lëjt abi' guxhalan laaman con stijb dux compniar ree bèn rliadx Jesucrist, ¿wen yu' ni basquiee Tito lojdi ya? ¿Nid zi'c laaman zi'c naj tiblojzi naj xgab raguieenan ya abi' zi'cgajc rünan rüjnman?

¹⁹ Por gra ni ma ranan lojdi, ad naladxidi guial caylaj dunuj gajcan, din achet waguieenan lëjt. Dios ragbee guial zi'c nayajcan xbejn Cristo cayneenë'n lëjt, abi' gra ni caynan lojdi najn par yaguieenan lëjt yudar

chinalidi xnejz Dios guial ray nan l jt. ²⁰ Din rdxeban guial chi guialan guidganan l jt ad zadxaaglojtan l jt zi'c r nan, abi' l jt ad zuguaatidi naj zi'c r ndi guguaaadi naj. Rdxeban gadxaaglojn l jt con wadijl, guialnad dloj, guialrdxe'ch, guialrlies xvalor gajc, guialrniee guijdx lasa', guial ruza't bejn, guial r jn benro' n  guial ad nadxagtri lasa'di. ²¹ Rdxeb t en guial chi guidganan l jt stijb abi' yaya'nxtun por l jt delant loj Dios. Abi' d d chu' naya luxdon por zien ree lasa'di b n ad rb zt ree r jn dol, b n ad ray jnt ree xgab zi'c naban reeman. Ad rucw  zt rzun  reeman b n ad najt lacheel reeman, ad rucw  z t et reeman vijs ni rajp reeman o stijb ree ni ad r jn sirv ni r jn reeman.

13

Diidx bigra bacaa Pab loj gui'ch guie

¹ Yan ni yayon volt guidganan l jt. Chi guialan, gra ni nadi por stijb ree xcompniaridi, rayal chu' tio'p o choon testiw din guiguien guial diidxli naj ni canadi. ² Abi' zi'c r n loj ree b n ni cay jn dol chi bialan bidganan l jt ni barojp volt zi'cgajc ma rnin loj gradi, laagajcan canin lojdi yan za'n zijt guial chi guialan guidganan l jt stijb, achetcti ni t d zezi par ree b n ni cay jn dol. ³ Zian gagbeedi ni r ndi gagbeedi guial Jesucrist cunee diidx ni rayal ganin lojdi. Abi' Jesucrist achet ryaadxaman par g nman zi'c rayal g nman con l jt abi' con l jt cul   xguialrniabeeman ni rajpaman. ⁴ Walican g jt Jesucrist loj cr jz zi'c tijb b n ad rajpt guialrniabee, per yan nabanman por xguialrniabee Dios. Abi' zi'c g jtaman zi'c tijb b n ad rajpt guialrniabee ziangajc dunuj ree rul   ad raya'pt ree guialrniabee, per zi'c nayajcan xbejn Cristo raya'pan xguialrniabee Dios par yaguieenan ni rayal yaguieenan con l jt.

⁵ L jt gajc gol been xgab bal walidi rliladxidi Jesucrist. L jt gajc gol been xgab xhienaag nabandi. Gol gogbee guial ma nabandi con Jesucrist, bal id rnieezidi guial rliladxidi laaman. ⁶ Balzianclaa gagbeedi guial dunujn diidxli raliduladxan laaman. ⁷ Abi' rarejdxan Dios por l jt chit e g undi ni mal, ad par yaya'ntan zagdxe delant loj ree bejn, cayguieenan zian par g undi ni naj zagdxe, majsı par ree bejn ad cayguieentan zi'c rayal. ⁸ Per ad zajct yaguieenan tıblad ni naj diidxli, dunujn caynazan ni naj diidxli. ⁹ Zeel yu' du luxdoon nix achet g unan ni cayza'ctzan din chile' sudxi'chidi loj ni rliladxidi. Abi' rarejdxan Dios din gagbeedi guidiblagaa xhienaag guibandi xnejz. ¹⁰ Abi' caxhalan gui'ch guie lojdi dxelri guidganan l jt, din chi guialan guidganan l jt ad ryaadxt gadil n l jt por guialrniabee ni banee Dad Jesucrist lon, guialrniabee ni baneeman lon par g nan l jt yudar chignia'di mazri zagdxe xnejz Dios, ad par gunijttan l jt.

¹¹ Yan compniar raliduladx ree Jesucrist par guloxan gui'ch guie, naj rni l jt: Gol badxe' luxdoodi zagdxe, gol been naguiejn gol gubajn zi'c rayal, gol bagu' luxdoodi gol gubajn t e zagdxe, gol babe'cdxe luxdoodi con ree xcompniaridi. Abi' Dios b n r n dunuj ree rabe'cdxe t eman du luxdoo ree laaman gagn  l jt. ¹² Xhiet ez hor ni radxaag ree xcompniaridi, gol bagajpdioz lasa'di zi'c rayal. ¹³ Gra ree dux compniar ree b n rliladx ree Jesucrist niz guie rugajpdioz reeman l jt.

¹⁴ Dad Jesucrist g unle' gradi, guial r n Dios l jt abi' xSprijtaman gagn  l jt zianczi. Am n.

Gui'ch ni guxhaal San Pabl loj ree b́en Galacia rlliladx Jesucrist

Rugajpdioz San Pabl b́en rlliladx ree Jesucrist

¹ Naj Pab najn aṕostol, per ad b́enguidxliujt bacaabee naj ad laa t́eet reeman guxhaal naj, najn aṕostol por Jesucrist ńe por dux Dad ree Dios b́en basban laaman loj guialǵujt. ² Gra ree dux compniar ree b́en za' ree guie con naj ragajpdiozan ĺejt najdi b́en rlliladx Jesucrist niz Galacia. ³ Dux Dad ree Dios ńe Dad Jesucrist ǵuunle' ĺejt yabe'cdxe t́eet reeman luxdoodi. ⁴ Jesucrist ǵujt por dux tol ree persi bab́eeman dunuj ree loj gra ree ni mal ni yu' loj guidxliuj guie zi'c goc xixgab dux Dad ree Dios. ⁵ Zeel rayalczi yaya'p reeman respejt zianczi. Aḿen

Achetri diidx ren ni zajc yab́eet dunuj ree loj dol

⁶ Dád radxalon guial dád cari cab́eeladxidi xtiidx Dios, abi' laaman guial ŕen Jesucrist ĺejt zeel gurejdxaman ĺejt. Per ĺejt diidx ren ma ridxga'di ⁷ abi' ni'quid xtiidx Diosan. Diidxliczi yu' ree b́en ŕen gagdxadi abi' ŕen reeman guchaa reeman zi'c naj xtiidx Cristo. ⁸ Per bal yu' b́en rulúu ĺejt diidx ren ree guial loj ree diidx ni ma balún ĺejt par gaquidi perdon, laaman ma rayal xcasti Dios, majsi chut́eetznin majsi naj gajc o majsi tijb xi anjl Dios. ⁹ Zi'c ma rnin ĺejt abi' yan ma rninan zatijb: Bal chu rulúu ĺejt diidx ren ree guial loj xtiidx Cristo ni ma bililadxidi, laaman ma rayal xcasti Dios.

¹⁰ Ad raguiltan mod guial yaya'n nan zagdx ree loj ree b́enguidxliuj, ŕunan naguiejn din yaya'n nan zagdx ree loj Dios. Din bal ǵunan naguiejn yaya'n nan zagdx ree loj ree b́enguidxliuj dxel ad cuzobtran xtiidx Cristo.

Xhienaag gojc zeel gojc Pab aṕostol

¹¹ Compniar raliduladx ree Jesucrist, ŕenan gagbeedi guial xtiidx Cristo ni ma balún ĺejt ad b́enguidxliujt guĺeeguijc laan. ¹² Abi' ad cwa'tanan ad basid t́eetan laan por b́enguidxliuj, Jesucrist gajc naj b́en balúu laan naj.

¹³ Ĺejt ma biguiejn guial chi guyu'n loj xreligion ree b́en Israel, guzunaalan b́en rlliladx ree xtiidx Dios din ǵunan laa reeman ni mal abi' benan naguiejn din gusa'n ni rlliladx reeman. ¹⁴ Abi' naj mazri guzudxi'chan loj religion guin guial loj ree lasa' zidńe'n tijbzi guial benan naguiejn benan gra ree xcostumbr ree dux b́engulalan. ¹⁵ Per guial ŕen Dios naj, diidx chi gadan guial loj guidxliuj mal gulejman naj. Dxel chi beenman xgab. ¹⁶ Balúuloj xi'nman lon din gatiechan xtiidxza'caman loj ree b́en ad najt b́en Israel. Abi' chi goc zian achut loj bignabdiidxan, ¹⁷ ad watan Jerusalén nignan b́en ma naj ree xi aṕostoles Jesús gocli diidx chi gadan gac xi aṕostol Jesús, laa wa gajcan niz Arabia dxel baye'can niz Damasco stijb.

¹⁸ Chi goc choon ijz dxel wan Jerusalén persi benbeen Béd abi' guzun con laaman chiin gubijdx. ¹⁹ Per achut aṕostol ren baguiaan tijbzi Jacob bijch Dad Jesucrist. ²⁰ Gra ni canin ĺejt naj diidxli abi' Dios ragbeechaaw guial ad rusquieetan.

²¹ Dxelri wan niz Siria ńe niz Silicia. ²² Per ree b́en rlliladx Cristo, b́en zojb ree niz Judea ad wayúnbeet reeman naj nadxel. ²³ Rguiejnzi reeman ŕeb ree bejn: "B́en guzunal dunuj ree yalój par ǵuunman dunuj ree ni mal

yan ma catie'chaman xtiidx Jesucrist, majsi yaløj beenman naguiejn din yasa'n ree ni raliduladx ree Jesucrist.”²⁴ Abi' rudëë reeman quixtëë loj Dios guial në naj ma rliadx Cristo.

2

Bachajg Pab bën naj ree apóstoles

¹ Chi goc chidaj ijz, dxel wan Jerusalén zatijb. Binë'n Bernabé con Tito, ² din Dios na guial gan ni. Abi' Jerusalén guin badxaag dulasa'n tijb luar con ganax ree bën rniabee loj ree xbejn Cristo persi benë'n laa reeman diidx por xtiidx Jesucrist ni culün bën ad najt ree bën Israel. Benan zian dín ad rëntan guial ni ma benan o ni cayünan gacan dxiin xlia'. ³ Per ni'qui Tito bën guzu ni con naj, majsi najman bën grieg ad beent reeman laaman naguiejn chu'man sen ni ru ree bën Israel. ⁴ Din guyu tio'p choon ree bën Israel been reeman zi'c rulüü naj reeman dux compniaran persi gojc bachajg reeman dunujn par gula'ch reeman conin ad raguieentran guial ma raliduladxan Jesucrist din gac nabee reeman dunujn yaguieenan zi'c rniabee ley. ⁵ Per ni'czi tibda'n ad batiëjbtan nüjn reeman dunujn gan, din ad rayëntan cwëëladxidi xtiidxli Jesucrist ni ma zinalidi.

⁶ Abi' ree bën rniabee loj ree xbejn Jesucrist achetri na reeman lon guial rayal gūnan, majsi chutëëz naj reeman din delant loj Dios tiblojzi naj bejn. ⁷ Luar ninia reeman xhie mazri nūnan, laa gogbee gajc reeman guial Dios gulej naj din gatiechan xtiidxza'c Jesucrist loj ree bën ad najt bën Israel, zi'cgajc gulejman Bëd din gutie'chaman diidxza'c guin ree loj ree bën Israel. ⁸ Abi' Dios bën bacaabee gajc Bëd din gacaman apóstol loj ree bën Israel, laagajcaman bacaabee naj din gacan apóstol loj ree bën ad najt bën Israel.

⁹ Zeel Jacob, Bëd con Waj bën rniabee ree mazri loj ree bën rliadx Jesucrist, gogbee gajc reeman guial Dios naj bën banee naj guialrniabee guin. Abi' banee yaa reeman zi'c tijb sen guial ma nayajcan compniar guial ma za' tëë reeman conform guial naj con Bernabé yuglüün bën ad najt ree bën Israel, guíaad laa reeman gulüü reeman bën Israel ree. ¹⁰ Ni gunabzi reeman du lojn din yaguieenan yudar bënprob ree, abi' laan naj ni ruladxan gūnan.

Gudilë Pab Bëd

¹¹ Per chi we Bëd guiedx Antioquía, dxel gudilë'n laaman guial ad cayüjntaman zi'c rayal. ¹² Guial yaløj gudawnëman bën ad najt ree bën Israel. Per chi bidxin ree bën guxhaal Jacob guiedx Antioquía, dxel ad bachajgtraman bën ad najt ree bën Israel guial bidxebaman xhie niëjb ree bën zinal ley. ¹³ Në los demazri ree bën Israel bën rliadx ree Jesucrist bën zobj ree ni në reeman been zi'c been Bëd abi' xt në Bernabé been zian. ¹⁴ Zeel chi baguian guial ad cayüjnt reeman zi'c rëb loj xtiidxza'c Jesucrist, dxel rën loj Bëd delant loj gra reeman: “Lüj najl bën Israel abi' ad nabantil zi'c laa reeman, ¿chexc zeel rüjnl naguiejn guiban ree bën ad najt ree bën Israel zi'c naban ree bën Israel?”

Guialrliadx Jesús rabëë bejn loj dol

¹⁵ Dunuj ree nayajc ree bën Israel diizd chi bayajl ree abi' ad yu't dxej babajn ree sin xley Dios zi'c ree bën ad najt bën Israel. ¹⁶ Per dunuj ree rayagbee guial achut zajc gac naya niz loj Dios por guial zinal bejn

ley, gacaman naya guial rliadxaman Jesucrist. Zeel në dunuj ree ma raliduladx Jesucrist din yayajc ree naya delant lojman guial raliduladx reeman, ad guial cayguieent ree zi'c rniabee ley. Din achut zajc gac naya delant loj Dios guial zinalaman ley.

¹⁷ Yan bal cayguieen ree naguiejn yayajc ree naya delant loj Dios, laan ruluü dunuj ree guial nayajcqui ree bëndol, ¿wen mazri bëndol cayüjn Cristo dunuj ree ya? ¡Dunuj ree rayagbee guial ad ziantan! ¹⁸ Din bal ma basa'nan xley Moisejs, abi' yaye'can con ley guin zatijb dxel naj gajc cayün naj bëndol. ¹⁹ Zeel ma basa'nan ley guin din gabajnan par Dios. ²⁰ Abi' rünan cwent guial në naj güjt chi güt Cristo loj crüjz dxel ad nabantri da xtijban, ma nabannë'n Cristo. Abi' yan zi'c nabanen, ma nabanen zi'c rliadxan Xi'n Dios, bën rën naj güjt tēeman por naj. ²¹ Abi' ad rüntan tiblax guial rën Dios dunuj ree, din bal nile' niajc bejn naya niz loj Dios guial rüjn bejn zi'c rniabee xley Moisejs dxel achetri lasajc guial güjt Cristo.”

3

Guialrliadx Jesucrist rquied dol

¹ ¡Bën Galacia, chexc zeel ad radëdguientidi! ¿Chu bascajy xquiar-guiejndi? Awa chi balün lëjt, delant loj gradi bagojnan lëjt par xhie güjt Cristo loj crüjz. ² Yan rënzax gagbeen: ¿Nabannëdi xSprijt Dios ya guial rüjndi zi'c rniabee xley Moisejs o por guial rliadxidi xtiidx Jesucrist ni ma bacaagdiajguidi? ³ Xixpi nadidi zeel awa ma nabannëdi xSprijt Dios abi' yan naladxidi guial din yayaaloj gaquidi zi'c rën Dios rayal chinalidi ley. ⁴ ¿Wen achet lasajc guialrzagdiaj ni gudëdidi ya, o guzagdiaj xlia'zidi ya? ⁵ Chi runee Dios xSprijtaman lojdi abi' rüjnman milagr ree delant lojdi, ¿wen rüjnman zian ya por guial zinalidi xley Moisejs o por guial ma bililadxidi xtiidx Jesucrist ni ma bacaagdiajguidi?

⁶ Gol basaaladx guial Abraham por guial bililadxaman Dios, been Dios laaman cwent zi'c tijb bën ad wayüjnt dol. ⁷ Zeel gol gogbee guial gra ree bën rliadx Dios, laa reeman naj zi'c xi'n Abraham. ⁸ Diizd gocli mal ragbee Dios guial majsi loj ree bën ad najt bën Israel yu' ree bën güünman cwent zi'c bën ad wayüjnt dol guial rliadx reeman laaman. Din tiblajt loj xtiidxaman rëb guial rëbaman loj Abraham: “Günle'n gra ree bënguidxliuj por lüj.” ⁹ Zeel rüjnle' Dios gra ree bën rliadx laaman zi'cgajc beenle'man Abraham guial bililadxaman laaman.

¹⁰ Gra ree bën zinal xley Moisejs yu' casti par laa reeman din loj gajc libr ley guin rëb: “Bën ad zinalt güün gra zi'cgajczi rëb loj ley guin, yayalaman casti.” ¹¹ Zeel rayagbee ree ad zile't gac bejn naya loj Dios por guial rüjnman zi'c rniabee ley. Din loj xtiidx Dios rëb: “Bën rliadx Dios rajpaman guialnaban delant lojman guial ma nüjnman laaman cwent sin dol.” ¹² Per ley guin ad rniabtan chililadx bejn laan, loj libr ley guin rëb: “Bën güün zi'c gajczi rniabee ley, zajpaman guialnaban.”

¹³ Jesucrist badxi'ca dunuj ree loj xmaldicion ley din laaman bayal casti ni rayal ree por ley guin, din loj libr ley guin rëb: “Ma zë maldicion guijc bën rëjt loj crüjz.” ¹⁴ Zian guzajc Jesucrist par chile' güünle' Dios bën ad najt ree bën Israel, zi'c beenle'man Abraham. Abi' guial rliadx reeman Jesucrist zeel ma naban reeman con xSprijt Dios zi'c tal rëb Dios diizd guia'xchej.

Xley Moisejs në xpromejs Dios

¹⁵ Yan compniar raliduladx ree Jesucrist ganin lëjt xhienaag rüjn ree bénguidxliuj: Chi rajs tijb gui'ch abi' rgu' bejn laan firm, dxel achut zajc guse'n laan o gucaa guijc ree diidx ni ca loj gui'ch guin. ¹⁶ Ziangajc gol gogbee, chi been Dios promejs guial güünle'man Abraham con xdiaaman, ad rëbt loj xtiidx Dios guial güünle'man “bén zëed ree” loj xdiaa Abraham. Ad rëbtan zien bejn, rëban tijbzi bejn, din laaman rëb günl'e'n “Bén zëed” loj xdiaaman. Abi' bèn zëed loj xdiaaman laaman naj Cristo. ¹⁷ Abi' ni canin lëjt naj guial xley Moisejs bi'tan tajpgayuu gajlbichii ijz despuejs ni been Dios promejs con Abraham, zeel ad zajct guse'n ley guin promejs ni ma been Dios. ¹⁸ Din bal par yaca' ree ni rëb Dios loj Abraham rayal yaguieen ree zi'c rniabee ley, dxel ad promejstran. Per Dios bazaladx loj Abraham ni rëbaman por promejs ni beenman lojman.

¹⁹ Wed zanabdiidxidi lon, ¿par xhieza rüjn ley guin sirv? Badëe Dios ley guin din gagbee bejn guial najman bëndol, abi' been ley guin sirv xt dxej ni bi't bèn zëed loj xdiaa Abraham zi'c tal been Dios promejs con laaman diidx guia'xchej. Bén naj ree xianjl Dios badëe ley guin loj Moisejs, abi' Moisejs badëed laan loj ree bejn. ²⁰ Per chi been Dios promejs con Abraham achutdzi badëed xtiidxaman, quijb laaman guneenë Abraham.

Xhie sirv rüjn ley

²¹ Ad naladxidi canin guial ley guin za' contr xpromejs Dios. Canin bal por ley guin zajc gap bejn guialnaban delant loj Dios, dxel ma ragbee bejn guial ma nayaman loj Dios guial zinalaman ley. Per ad ziantan ²² din loj xtiidx Dios rëb guial dol rniabee gra bejn din gra ree bèn chililadx Jesucrist tia' reeman gra ni rëb Dios.

²³ Chi gad guialrliladx Jesucrist guidoonloj, gunabee ley dunuj ree, zi'c chi nayaaw bejn balëez ree guidoonloj guialrliladx Jesucrist. ²⁴ Zeel par dunuj ree ley guin naj ni balüü dunuj ree xhienaag yabajn ree abi' gunabeen dunuj ree xt dxej ni baguieenbee ree Jesucrist din güünman dunuj ree cwent zi'c tijb bèn ni ad wayüjnt dol guial raliduladx ree laaman. ²⁵ Per yan guial ma raliduladx ree Jesucrist ad rüjntri naguiejn gulüü ley guin dunuj ree.

²⁶ Din guial raliduladx ree Jesucrist ma nayajc ree xi'n Dios. ²⁷ Abi' guial barobnijs ree por Jesucrist zeel ma nayajc ree tijbzi con laaman din ma nabajnnë' reeman. ²⁸ Abi' zi'c bèn Israel zi'c bèn ad najt bèn Israel, zi'c bèn naj zi'c bèn nado' zi'c bèn ad najt zi'c bèn nado', zi'c xinguaaaw zi'c béngunaa, par Cristo tiblojzi nayajc ree din ma nayajc ree tijbzi con laaman. ²⁹ Zeel bal ma nayajc ree xbejn Cristo dxel ma nayajc ree zi'cgajc xi'n Abraham abi' yajal ree ni rëb Dios loj Abraham diidx gulal.

4

¹ Ni canin naj: Zi'c tijb xindo rayal ni rajp xdadix, la'tgaj najx xindoo achet guialrniabee rajpax, zi'cgajc tijb mojs, majsi xieenx naj gra ni rajp xdadix. ² Abi' yu' ree bèn rajp laax yu' tëe ree bèn rniabee laax në ree ni rajpax, xt chi guidxin dxej ni rëb xdadix tia'x ni rayalix. ³ Ziangajc dunuj ree, zi'c tijb xindoo bayajc ree yaløj guial bunaaldxi'ch ree gra ree xcostumbr ree bénguidxliuj. ⁴ Abi' chi bidxin dxej gojc zi'c rëb Dios gac, guxhaal xi'nman Jesucrist loj guidxliuj guie, tijb bénguidxliuj gojc xniaaman. Abi' gubajnman zi'c rniabee ley ni basa'n Moisejs duløj ree ⁵ persi bile' babëeman dunuj ree loj ley guin bile' tëe nayajc ree Xi'n Dios.

⁶ Abi' guial nayajc ree xi'n Dios, guxhaalaman xSprijt Jesucrist persi nabajnné' reeman, abi' por Sprijt guin raguie'ch ree: "¡Dux Dad ree Dios!"
⁷ Zeel ad nayajctri ree zi'c mojs, ma nayajc ree xi'n Dios, ma rayal ree ni gunee Dios por Cristo.

Yu' Pab xgab por ree b́en rliladx Jesucrist

⁸ Yalój chí gadidi güünbee quijb Dios, beendi sirv loj ree ni naladxidi naj Dios, per diidxli ad Diost reen. ⁹ Per yan guial ma nünbeedi Dios o guial ma nünbeeman lëjt, ¿chexc zeel rëndi yabi'di güündi gralój ni ad rüjnt sirv ni beendi yalój? ¿Chexc zeel rëndi gaquidi zi'c b́en nado' loj ree ni guin ree zatijb? ¹⁰ Abi' yan guial sta zinédi cwent xhie dxej o xhie bëew o xhie tiamp o xhie ijz naj ni zojbloj par lëjt par güündi xhienin zi'c goc xcostumbridi. ¹¹ Dád rdexban por lëjt, doolgui basid xlia'zan lëjt.

¹² Zeel rniaaban lojdi compniar raliduladx ree Jesucrist, gol gubajn zi'c nabanán, zi'c benan persi gogbeedi guial tiblojzi nayajc ree. Ad canitan lojdi guial xhie ni mal ma beendi naj ¹³ din lëjt ragbee guial yalój chí basidan lëjt xtiidxza'c Jesucrist, ragxuun nadxel. ¹⁴ Per majsi zian, gudaandi naj. Ad beentidi naj tiblax ad gulëeladx tëetidi naj, bidxga'di naj zi'c tijb xianjl Dios o zi'cgajc Jesucrist. ¹⁵ Naj ragbee guial bal zile'n xt guiallojdi zajc cwëedi par guneedan lon. Laadx yan, ¿conzan guial rabaanédi naj? ¹⁶ ¿O al rdxe'chidi naj ya guial rnin ni naj diidxli lojdi?

¹⁷ Rnin lojdi guial ree b́en cayüjn naguiejn guial guidxga'di xtiidx reeman, ad zagdxet rën reeman lëjt, xixgab reeman naj din gusa'ndi ni basidan lëjt abi' mazri guidxga'di xtiidx reeman. ¹⁸ Ad ni malt naj guial guiën bejn lasa' bejnman, per par ni zagdxe në zianczi, ad chí za'tzan con lëjt. ¹⁹ Par naj lëjt naj zi'c da xi'nán. Abi' cazaagdiajn por lëjt zatijb, zi'c rzagdiaj tijb béngunaa chí rajl xi'nman. Abi' gusnuu gazaagdiajn xt chí ma zinalidi Jesucrist diidxli zi'c rayal. ²⁰ ¡Bal zianclaa za'n con lëjt din ganenë'n quijb lëjt, per yan ad ragbeetan xhienaag günnë'n lëjt!

Agar con Sara

²¹ Per gol guna, lëjt b́en rën ree guiban zi'c rniabee ley. ¿Wen id wayignia'di ni rëb loj ley ya? ²² Loj ley rëb guial guyu tio'p xi'n Abraham: Guyu xi'nman con tijb béngunaa brii laj Agar b́en goc xmojsaman, guyu tëë stijb xi'nman con quijb xbéngunaaman b́en brii laj Sara. ²³ Xi'n Abraham con béngunaa goc xmojsaman, guyux guial bagaal Abraham laaman. Per xi'nman xin guyu con quijb xbéngunaaman, në par gac cumplid promejs ni been Dios lojman. ²⁴ Yan, Sara në Agar laa reeman naj ejempl por tio'p nejz ni yu' par chinal bejn. Tijb nejz guin naj guial chinal bejn ley ni badëed Dios loj Moisejs ruguia' Sinaí, abi' b́en zinal ree ley guin naj reeman zi'c b́en nado' loj ley guin zi'c goc Agar loj Abraham. ²⁵ Lëjt ragbee guial niz Arabia naj guia' Sinaí, abi' ree b́en niz ni rníee reeman guia' guin Agar. Per yan Jerusalén naj zi'c guia' guin, din gra ree b́en zëed niz Jerusalén, b́en zinal ree ley, laa reeman naj zi'c b́en nado' loj ley. ²⁶ Per dunuj ree du ladx ree naj Jerusalén ni yu' xanyabaa abi' Jerusalén guin ad najtan zi'c ni nado' loj ley guin zi'c ad gojct Sara loj Abraham. ²⁷ Loj xtiidx Dios rëb:

Babaa béngunaa ni ad zajct chu' xi'n.

Babaa da't guial ad nünbeetil guialrzagdiaj ni rdëd béngunaa ni rajl xi'n.

Din bén ad rut xi'n, mazri zien xi'nman chu' guial loj bén ru xi'n.

²⁸ Rnin lojdi compniar raliduladx ree Jesucrist, zi'c gol Isaac guial bililadx Abraham xtiidx Dios guial gac zian, ziangajc dunuj ree ma nayajc ree xi'n Dios guial raliduladx ree xtiidxaman. ²⁹ Abi' lèn ree dxejzii, xi'n Agar baze'x xi'n quijb xbéngunaa Abraham, ziangajc yan bén zinal ree ley ruze' reeman dunuj ree nabajnné' ree xSprijt Dios, guial ma nayajc ree xi'n Dios, ³⁰ Per, ¿xhie rëb loj xtiidx Dios? Rëban: “Balaagdxa xmojsil con guidib xi'nman, din ad rayalt gac tio'p lala' ni rayal tia' xi'n quijb xbéngunaa.” ³¹ Zeel compniar raliduladx ree Jesucrist, dunuj ree ad nayajct ree zi'c xi'n bén naj zi'c bén nado' guin, nayajc ree zi'c xi'n quijb xbéngunaa Abraham guial ad rniabeet ley dunuj ree.

5

Gol guzujdxi'ch loj ni rliladxidi xtiidx Dios

¹ Cristo naj bén babëë dunuj ree loj ni rniabee ley dunuj ree. Zeel gol guzujdxi'ch, ad bal guibandi zatijb zi'c bén nado' guial güündi zi'c rniabee ley.

² Naj Pab rnin lëjt. Bal rudi sen zi'c rniabee ley, achet lasajc guial rliladxidi Jesucrist. ³ Abi' rnin lëjt zatijb: Chutëëz bén ru sen guin rayal güünman zi'c tal rniabee ley. ⁴ Lëjt guial rüjndi xgab guial güündi zi'c rniabee ley ma najdi naya delant loj Dios, laan rën guiëb guial ad najtridi xbejn Cristo ad yu'guijc tëëtridi guial rën Dios lëjt. ⁵ Per dunuj ree por xSprijt Dios në guial raliduladx ree Jesucrist nadxu'guijc ree guial yadxin ree naya delant loj Dios. ⁶ Din chi ma naj bejn tijbzi con Cristo achet lasajc bal yu'man sen o ad yu'taman sen. Ni mazri lasajc naj guial chililadxaman Cristo. Abi' por gualrliladx guin zajc yabajn ree zagdxe yayën dulasa' ree. ⁷ Lëjt ma zëdi zagdxe. ¿Chu na lojdi guial ad zidxga'tidi ni naj diidxli? ⁸ Din xgab guin ad zëëdtan por Dios, bén gule lëjt. ⁹ Zeel gol gojp cudad “din con ta'nnijt zajc gusquiee reeman gradi.” ¹⁰ Per naj ra'pan Cristo confians guial ad zusa'ntidi ni basidan lëjt. Abi' Dios gudëëd casti bén cusquiee ree lëjt, majsi chutëëznin. ¹¹ Bal rën guial rüjn naguiejn chu' ree bejn sen, ad zazunaltri ree bén Israel naj. Ziangajc bal guiën guial rayal chu' ree bejn sen, rën guiëban guial achet lasajc guial güjt Cristo loj crüzj. ¹² Balzianclaa gra ree bén ruslen lëjt guial rayal chu'di sen, imejorli gutüüg laagajc reeman tiblyaaa!

¹³ Din lëjt ma gulaadi loj ley, per ad guial ad rniabeetri ley lëjt din güündi ni rëntzidi, rayal guiëndi güün tëë yudar lasa'di. ¹⁴ Din con tijbzi mandamient ma been bejn gra zi'c rniabee xley Dios. Mandamient guin rëb: “Guyën ben ren zi'c rën lüj gajc.” ¹⁵ Per bal rdx'e'ch lasa'di abi' rdilidi, gol gojp cudad chitëë zianzi la' lasa'di.

Guialnaban ni runeexSprijt Dios

¹⁶ Zeel rnin lojdi: Gol gubajn zi'c rniabee xSprijt Dios guibandi. Ad guibanridi zi'ctzi naj xixgabidi. ¹⁷ Din guial rbajn bejn zi'ctzi naj xixgabaman, ad najtan zi'c rniabee xSprijt Dios guiban bejn. Abi' zi'c rniabee xSprijt Dios guiban bejn, ad najtan guial guiban bejn zi'ctzi naj xixgabaman. Ni'qui laan ni'qui zi'c rniabee xSprijt Dios ad najtan tibloj. Zeel ad zajct guiban bejn zi'ctzi rënman. ¹⁸ Per bal xSprijt Dios naj bén rniabee lëjt dxel ad rniabeetri ley lëjt. ¹⁹ Yan laa rguien gajc con ree

nin z ed con xixgabzi ree bejn: Guialrzun  xinguaaw ren o b ngunaa ren, guialr jn bejn nidxuudx, guialrajp bejn gadxagayaa vijs, ²⁰ guial r n bejn graloj ni naladxaman naj Dios, guial r jn bejn guialbidxaa, guialrdxe'ch lasa', guialrdil, guialrz  bladx ni rajp bejn, guialralenya', guialrlies xvalor gajc, guialrlia' lasa' bejn, guial ru loj tibcwaa bejn o stib cwaaman, ²¹ guialrd dloj, guialrug jt bejn, guialrz dx, guialnala n  xhiet ez ni mal lasa' ree ni guin. Rugojnan l jt zi'cgajc ma rnin lojdi yaloj, b n cay jn ree lasa' ree ni guin ad zayalt reeman lod rniabee Dios.

²² Per ni z ed por xSprijt Dios naj, guialr n lasa' bejn, guialrabaa, guialrga'dxe luxdoo, guial yu' pacens, guialnaxanladx, guial rajc naza'c, guial r jn cumplid xtiidx, ²³ guial r jn naya, guialrniabee bejn xixgab mal gajcaman. Abi' ad yu't ley ni rudxoon guial g  n bejn ni guin ree. ²⁴ Abi' ree b n ma naj xbejn Cristo ma basa'n reeman gra dol, n  gra ree ni mal ni r n reeman g  n reeman din ma g jt Cristo por gra dol. ²⁵ Yan bal ma nabajn ree con xSprijt Dios rayal yabajn ree zi'c rniabee Sprijt guin yabajn ree.

²⁶ Ad yales dux valor gajc ree, ad yache'ch du lasa' ree, ad yad dloj du lasa' ree.

6

Yaguieen du lasa' ree yudar

¹ Compniar raliduladx ree Jesucrist, rnin l jt, bal chu xcompniaridi r jn dol gan, l jt guial ma rajquidi mazri xtiidx Dios gol guneen man con ganax ree diidxza'c, din rayal cu'guijquidi guial n gajc l jt zajc g  n dol l jt gan. ² Gol gogn  lasa'di loj xhiet ez guialzi ni rd didi, zian ma cay jndi ni rniabee Cristo g  ndi.

³ Bal yu' b n ni naladx guial rajcaman gra abi' achetzi rajcaman, dxel laagajcaman cusquiee laaman. ⁴ Tijbgaj bejn rayal g  n xgab bal nabancaman xnejz. Abi' bal nabanman xnejz, tijbzi laaman rayal yabaa luar g  nman xgab guial nabanman zagdx loj gra ree bejn. ⁵ Din tijbgaj dunuj ree rayal yaya'p ree xhienaag yabajn ree.

⁶ Chut ez b n cusiid xtiidx Dios, rayal g  nman yudar b n cul   laaman con ni ryaadxaman.

⁷ Ad gusquiee l jt gajc, din achut zajc guze' Dios. Ni rx bin bejn laagajcan yato'paman. ⁸ Bal nabanman zi'ctzi naj xixgabaman zadxin dxej yayalaman casti. Per b n naban zi'c rniabee xSprijt Dios, por Sprijt guin yayalaman guialnaban tiblayaa delant loj Dios. ⁹ Ad rayalt yadxag ree guial yaguieen ree ni zagdx, din bal id zadxag ree chi guidxin dxej yaca' ree ni yayal ree. ¹⁰ Zeel beegaj gunen dunuj ree rayal yaguieen ree yudar bejn ree, abi' mazri con dux compniar ree b n rliladx ree Jesucrist.

Xconsejw Pab

¹¹ Gol baguiaa xi narooob ree lejtr ni cucan par l jt con quijb yan. ¹² B n cay jn ree naguiejn chu'di sen, r jn reeman zian par yaya'n reeman zagdx loj ree bejn luar sagdiaj reeman guial rliladx reeman Jesucrist. ¹³ Per ni'qui ree b n yu' sen guin ad r jnt reeman gra zi'c r b ley guin. R nzi reeman chu'di sen guin din g  n reeman nab  guial ma been reeman gan yu'di sen guin. ¹⁴ Per naj achet por ni g nan nab , tijbzi por guialg jt Dad Jesucrist. Abi' guial g jtaman loj cr jz ma basa'nan gra ree ni mal yu' loj guidxliuj guie abi' ma g jtan par ree ni mal guin. ¹⁵ Din chi

ma naj bejn tijbzi con Cristo, achet lasajc bal yu' bejn sen o ad yu'taman sen. Ni mazri lasajc naj guial ma bachaa zi'c nabanman. ¹⁶ Abi' ree bén ma zinal xnejz Cristo, Dios yaya laa reeman yabe'cdxe tääman luxdoo reeman në gra ree bén diidxli naj xbejn Dios.

¹⁷ Diizd yan ad rëntran chu guche'ch naj. Din dib ni ca ree ladan laa reen rulüü guial najn xiapóstol Jesucrist.

¹⁸ Compniar raliduladx ree Jesucrist, dux Dad ree Jesucrist güünle' gradi. Amén.

Gui'ch guxhaal San Pabl loj ree b́en ́Efo rliladx Jesucrist

Rugajpdioz San Pabl b́en ́Efo ree

¹ Naj Pab, najn tijb xi aṕostol Jesucrist por xguialrniabee Dios. Cuan gui'ch guie par ĺejt guial diidxli zinalidi xtiidx Jesucrist, ĺejt guial ma najdi xbejn Dios luguiedx ́Efo. ² Dux Dad ree Dios ńe Dad Jesucrist ǵuunle' ĺejt yabe'cdxe t́e reeman luxdoodi.

Ŕujnle' Dios b́en rliladx ree Jesucrist

³ Quixt́e Dios, xdad Dad Jesucrist, dád benza'c najman, guial yan ma nayajc ree tijbzi con Jesucrist, ma beenle'man dunuj ree diidz xanyabaa con graloj guialnaza'c din gac yunaal ree xtiidxaman. ⁴ Laaman b́acaabee dunuj ree por Dad Jesucrist diidz chi gad guidxliuj gacchaaw din yabajn ree naya sin dol lojman. ⁵ Abi' guial ŕenman dunuj ree, diidz guial'xchej beenman guial yayajc ree xi'nman por Jesucrist zi'c beenman xgab gac. ⁶ Zeel ad racẃezt raza't ree Dios zagdx guial dád benza'c najman, ma beenle'man dunuj ree por Xi'nman Jesucrist, b́en ŕenman, ⁷ b́en ma gudijx por dunuj ree chi guxhie' xrejman, abi' ma gojc perdon dux tol ree guial dád ŕen Dios dunuj ree. ⁸ Zeel dád zro' guialrajc ńe guialrignia' ma bazaladxaman duloj ree, ⁹ abi' ma baĺuuman duloj ree xhienaag naj xixgabaman diidz gocli, zi'cgajczi ma beenman xgab gac. ¹⁰ Guiáad xgab guin gacan cumplid chi guidxin dxej, Dios gusa'n gra loj Jesucrist zi'c ni yu' xanyabaa ńe loj guidxliuj.

¹¹ Ńet́e guial nayajc ree tijbzi con Jesucrist, Dios ma b́acaabee dunuj ree din yayajc ree par laaman zi'c naj xixgabaman diidz guial'xchej, din laaman ŕujn gra zi'c ŕenman gac. ¹² Abi' laaman ma been zian, din dunuj ree nayajc ree b́en yaloj bililadx Jesucrist, yayajc ree b́en guza't laaman zagdx por xguialrniabeeman. ¹³ Ńegajc ĺejt chi biguiejndi diidxli xhienaag par gaquidi perdon dxel bililadxidi Cristo gojquidi tijbzi con laaman. Abi' zi'c ŕeb Dios guial guneman xSprijtaman, dxel yan guial ma nabanńedi laaman, laaman naj zi'c tijb sen ni ruĺu guial ma najdi par Dios. ¹⁴ Guial ma nabanńe xSprijt Dios dunuj ree, yaca' ree ni ŕeb Dios guneman chi ma bara xbejnman za' xanyabaa, din chit́e yacẃe zaya't reeman zagdx por xguialrniabeeman.

Rniab Pab quiarguiejn loj Dios

¹⁵ Abi' guial ragbeen rliladxidi Dad Jesús ŕen t́edi los demazri ree b́en naj xbejn Dios, ¹⁶ zeel ad rucẃe zrud́en quixt́e loj Dios por ĺejt, beegaj rbedx rniaaban laaman. ¹⁷ Laaman naj Dios rniabee diidz xanyabaa, xDad Dad Jesucrist. Rniaaban lojman yazaladxaman quiarguiejn lojdi din chignia'di ni guĺuuman lojdi gusnuu t́e ǵuunbeedi laaman mazri. ¹⁸ Rniaaban lojman din guixhialaman xquiarguiejndi din chignia'di xhie ŕen guiéb ni rb́ezidi diidz chi b́acaabeeman ĺejt, chignia' t́edi guial ni za'cdxoon narooob t́e naj ni nagu'chaaw Dios par ree b́en naj xbejnman. ¹⁹ Rniaab t́en lojman guial gagbeedi guial dád narooob naj xguialrniabeeman ni cayagńe dunuj ree raliduladx reeman. Laagajc guialrniabee narooob guin baĺu Dios ²⁰ chi basbanman Jesucrist abi' gule'caman

laaman xladbeeman xanyabaa ²¹ lod badëëman gualrniabee lojman ni mazri lasajc gual loj gra ree gualrniabee, nè loj gra gualguxtis nè loj gra gobiarn. Abi' mazri lasajc gualrniabee guin gual loj gra ree gualrniabee yu', nè ni qui chu'ri ree loj guidxliuj guie. ²² Dxel basa'n Dios gran loj Jesucrist, bacaabeeman laaman din nabeeman gra ree bèn rliladx laaman. ²³ Guiáad ree bèn rliladx laaman, guidiblagaa nabannëman laa reeman abi' bantëez guin za'man din laaman guidiblagaa rniabee.

2

Nayajc ree perdon gual rën Dios dunuj ree

¹ Gocli gojquidi zi'c bengüt loj Dios por ree ni mal nè por ree dol ² ni beendi gual binalidi nejz mal been tëëdi zi'ctzi rën xindxab güündi, sprijtmal ni nabannë gajc ree bèn ad ruzoobt xtiidx Dios. ³ Du gra ree ziangajc babajn ree guia'xchej. Bagueien ree zi'ctzi bayën ree, zi'ctzi goc dux xgab ree, abi' zi'cgajc rayal ree bèn ad ruzoobt xtiidx Dios casti, ziangajc nayal ree casti. ⁴ Per gual raya da't Dios dunuj ree rën tëëman dunuj ree, ⁵ zeel majsi bayajc ree zi'c bengüt lojman por dux tol ree, per yan ma raya'p ree gualnaban lojman con Jesucrist. Gual tant benza'c naj Dios, zeel nayajc ree perdon. ⁶ Chi basbanman Jesucrist nëgajc dunuj ree basbanman abi' zi'c rulüü ma nadxu'në' ree Jesucrist xanyabaa. ⁷ Dios been zian din dxej zëëd ree guiguien gual dád rënman dunuj ree, abi' benza'c tëë najman con dunuj ree por Jesucrist. ⁸ Gual naj Dios benza'c, zeel ma nayajc ree perdon, ad gual nayajc ree benza'c lojman. Por gual rliladx zëëd xperdon Dios. ⁹ Ni'quid por ni zagdxe ni ma bagueient ree zëëd perdon guin chitëë chu guilies xvalor gajc. ¹⁰ Por Dios nadxu' ree loj guidxliuj guie abi' por Jesucrist bachaaman mod babajn ree yaloj din yagueien ree ni zagdxe zi'c beenman xgab yagueien ree diizd gocli.

Tijbzi nayajc ree por Jesucrist

¹¹ Zeel lëjt bèn ad najt ree bèn Israel, gol basaaladx xhienaag guzajquidi yaloj. Bèn Israel ree gulëëljaj lëjt bèn ad yu't ree sen gual yu' reeman sen zi'c rniabee ley. ¹² Tiamp zii ad beenbeetidi Jesucrist, ad gojctidi cwent loj ree bèn Israel ad gojc tëëtidi cwent gual rayalidi ni rëb Dios gudëëman loj ree xbejnman. Contzi gubajndi achet gulëjzidi ad gubajnnë tëëtidi Dios. ¹³ Per yan gual ma rliladxidi Jesucrist, lëjt gual guzujdi zijt loj Dios, por xrejn Jesucrist ma bibiguide lojman. ¹⁴ Din Jesucrist babe'cdxe du luxdoo ree. Laaman bisüd gualrdxe'ch ni rudxoon gac ree bèn Israel tijbzi con ree bèn ad najt bèn Israel. ¹⁵ Abi' por xgualgüjt Jesucrist gulox gra ree costumbr rniabee xley ree bèn Israel güün ree bejn, laaman been persi gojc ree bèn Israel con ree bèn ad najt bèn Israel zi'c tijbzi guiedx cüb gual ma nayajc ree tijbzi con laaman. Zian babe'cdxeman luxdoo ree bejn. ¹⁶ Din por xgualgüjt Jesucrist loj crüjz ma gulox gualrdxe'ch lasa' ree bèn Israel con ree bèn ad najt bèn Israel, abi' ma nadxu'në' ree Dios zagdxe gual ma nayajc ree tijbzi por Jesucrist. ¹⁷ Abi' laaman bidgagojn dugra ree, zi'c ree bèn Israel zi'c ree bèn ad najt bèn Israel xhienaag yadxu'në' ree Dios zagdxe. ¹⁸ Dxel por Jesucrist grop cwaä ree bejn ma rajp nejz par loj Dios gual tijbzi naj xSprijt Dios nabajnnë' ree. ¹⁹ Zeel ad najtridi zi'c bèn zëëd lod ren, zi'c benzit loj Dios, ma najdi cwent loj ree xbejnman, ma najdi tijbzi con ree xbejnman. ²⁰ Lëjt naj zi'c xze'

tijb yu ni cayajc, guiáad ree xi apóstoles Jesús con ree bèn badëë xtiidx Dios loj ree bejn, naj reeman zi'c xcimiant yu guin, guiáad Jesucrist naj zi'c guiaj zobjloj ni cayajcnë yu guin. ²¹ Abi' guial yagaj guzuloj cayajs yu guin, dxel cayë'pzi cayë'p ze' guin ni cayguie'ch ree najdi din yayajc ree tijbzi xyadoo Dios con Jesucrist. ²² Në yan guial ma najdi tijbzi con Jesucrist ma naj tēedi tijbzi con los demazri compniar raliduladx reeman din yayajc ree tijbzi yadoo lod za' Dios por xSprijtaman.

3

Cwabee Pab din chigneeman xtiidxza'c Jesucrist

¹ Por zianan yu'n ladxguuib, naj Pab guial cayünan sirv loj Jesucrist din gūnan yudar lëjt bèn ad najt ree bèn Israel. ² Lëjt ragbee guial naj Dios benza'c zeel baneeman dxiin guin lon din gūnan lëjt yudar chignia'di xtiidxaman. ³ Abi' laaman balüü naj xhienaag naj xixgabaman diizd gulal, zi'cgajczi ma rnin lojdi diizd guia'xchej. ⁴ Chi goolidi laan, gagbeedi guial ma ragbeen xhienaag naj xixgab Dios par Jesucrist. ⁵ Tiamp gulal achut gojc niagbee xhienaag naj xixgabaman par Jesucrist, gojcan zi'c tijb ni naguie'ch par ree bejn. Per yan por xSprijtaman ma balüüman laan loj ree xi apóstoles Jesús në loj ree bèn badëë xtiidx Dios loj ree bejn. ⁶ Abi' ni goc zi'c tijb ni naguie'ch par ree bejn naj guial por xtiidxza'c Jesucrist, në ree bèn ad najt bèn Israel ma rayal ni gudëë Dios loj ree bèn Israel guial ma naj reeman tijbzi, dxel ziangajc ma nayab reeman loj promejs ni been Dios por Jesucrist.

⁷ Naj cugojn xtiidxza'c Jesucrist loj ree bejn, ad guial rayalt gūnan dxiin guin. Guial naj Dios benza'c, zeel bazaladxaman guialrniabee lon par gūnan laaman sirv. ⁸ Naj naj bèn bigra bèn lasajc ta'nz loj gra ree xbejn Dios, per guial naj Dios benza'c, bacaabeeman naj din gūn diidx loj ree bèn ad najt bèn Israel xcwent xguialnaza'c narooob Jesucrist, ⁹ në par gugojan zagdx gra reeman xhienaag naj xixgab Dios bèn been gra, xgab ni ad balüü gajtaman loj ree bejn. ¹⁰ Din yan zi'c naj ree bèn rliidx Jesucrist, gagbee gra ree bèn rajp guialrniabee xanyabaa guial gra lojczy guialrajc rajp Dios. ¹¹ Abi' diizd chi gad guidxliuj gacchaaw mal been Dios xgab guial gac zian. Yan ma gojcan cumplid por Dad Jesucrist. ¹² Në guial raliduladx ree Jesucrist ma raya'p ree nejz par loj Dios, abi' con confians ma zajc yubiig ree lojman. ¹³ Zeel rnin lojdi ad runayadi por ree guialzi ni cadëëdan por lëjt, din zagdxen par lëjt.

Dád rën Jesucrist dunuj ree

¹⁴ Zeel ruzuxiban loj dux Dad ree Dios; ¹⁵ laaman naj Dad loj gra ni yu' loj guidxliuj në xanyabaa. ¹⁶ Abi' rniaaban lojman por xguialrniabee narooobaman yazaladxaman lëjt gojl në guialrniabee por xSprijtaman din yayu luxdoodi, ¹⁷ guibannë tēedi Jesucrist guial rliidxidi laaman. Din zian zi'c diidxli zinalidi zi'c rën Jesucrist dunuj ree, ¹⁸ dxel ma zajc gagbeedi con los demazri ree compniar raliduladx ree laaman guial gudëdlaj abi' xt banczi naaloj zro' rënman dunuj ree. ¹⁹ Zeel rniaaban loj Dios gagbeedi plact rënman dunuj ree, guial mazri zro' najn guial loj ni raguieen ree xgab, abi' zian guidiblagaa guibannëdi Dios.

²⁰ Laaman, guial rajpaman guialrniabee par gūnman mazri guial loj ni raguieen ree xgab o mazri guial loj ni ranaab ree lojman por xSprijtaman bèn nabajnnë' ree, ²¹ abi' rayal yaza't reeman zagdx gra

dxej në gra tiamp por Jesucrist, dunuj ree guial raliduladx ree Jesucrist. Amén.

4

Nayajc ree tijbzi por xSprijt Dios

¹ Naj, yu'n ladxguiib guial cayünan sirv Jesucrist, rniaaban lojdi zi'c ma najdi xbejn Dios, gol gubajn zi'c rayal guiban ree bén ma naj ree xbejnman. ² Gol gojc benza'c në bén naxanladx, gol gojp pacens gol gudaan tëë lasa'di guial rën lasa'di. ³ Gol been nagueijn gusnuu gaquidi tijbzi con xyudar xSprijt Dios bén rabe'cdxe du luxdoo ree par yayajc ree tijbzi. ⁴ Dunuj ree nayajc zi'c tijbzi cuerp, abi' dugra ree nabajnnë' xSprijt Dios, abi' zi'c ma nayajc ree xbejn Dios, ziangajc ralëjz ree ni guneeman. ⁵ Tijbzi Dad, tijbzi guialrliladx në tijbzi guialrirobnijs raya'p ree. ⁶ Din tijbzi Dios yu', bén naj Dad par dugra ree, rniabeeman dugra ree, nabannëman dugra ree rüjn tëëman ujs dugra ree.

⁷ Per tijb gaj dunuj ree ma naj ni yaguieen ree, zi'ctzi ni banee Jesucrist yaguieen ree. ⁸ Zianan zeel rëb loj xtiidx Dios:

Chi bayë'paman xanyabaa,

beenman gan loj gra guialrniabee,

abi' badëëdaman loj ree bejn ni rayal güün reeman.

⁹ Abi', ¿xhie rën guiëb lod rëb “bayë'paman”? Rën guiëban bi'taman loj guidxliuj. ¹⁰ Guiáad Jesucrist bén bi't loj guidxliuj, laagajcaman naj bén bayë'p xanyabaa persi canabeeman guidib guidxliuj në xanyabaa. ¹¹ Abi' ma badëëman loj ree bejn ni rayal güün reeman, yu' reeman bayal gac apóstoles, yu'za reeman bayal gac bén rudëë xtiidx Dios loj ree bejn, yu' reeman bayal gaitie'ch xtiidxaman, yu' tëë reeman bayal gudëë consejw gulüü tëë reeman bén rliladx ree laaman. ¹² Zian bacaabee Jesucrist bejn ree din gusiid los demazri ree bén rliladx laaman, gac tëë güün reeman laaman sirv, gusnuu tëë güünbee reeman laaman, ¹³ xt yayaaloj yaliduladx ree yaguieenbee tëë ree Xi'n Dios guidiblagaa, din yayaaloj yayignia' ree xhienaag rayal yunaal ree Jesucrist. ¹⁴ Dxel ad zayajctri ree zi'c ree xindoo rliladx xhietëëznin, ad zayajctri ree zi'c tijb ni rnë bi niz ni niz guie por graloj ni rü ree bén raguuil mod gusquiee ree bejn, ¹⁵ rayal yayën du lasa' ree, yadü ree diidx yunaal tëë ree ni diidxli din gusnuu yayignia' ree yaguieen tëë ree zi'c rën Jesucrist bén rniabee dunuj ree. ¹⁶ Din por Jesucrist nayajc ree tibloj gra ree compniar raliduladx ree laaman. Por laaman nadxajg dulasa' ree nayajc ree tijbzi, abi' tijb gaj dunuj ree con ni rayal yaguieen ree par yaguieen du lasa' ree yudar din gusnuu yayën dulasa' ree por Jesucrist.

Guialnaban cüb con Jesucrist

¹⁷ Yan por Jesucrist rnin lëjt: Ad bal guibanridi zi'c naban ree ben ad nünbeet Dios, din laa reeman naban zi'ctzi naj xixgab reeman, ¹⁸ nacay xquiargueijn reeman, ad rajpt reeman guialnaban rën Dios gap reeman, guial ad rignia't reeman ache tëët naladx reeman. ¹⁹ Ma been luxdoo reeman gojl, ma gulëëladx laagajc reeman abi' cusnuu cayüjn reeman graloj nidxuudx. ²⁰ Per lëjt ad beenbeetidi Jesucrist din guibandi zian, ²¹ bal walidi ma biguejndi xcwentaman bal wali tëëdi ma basiididi diidxli zëëd por laaman. ²² Gol basa'n zi'c gubandi yaloj, din ruxhiinzi zi'c gubandi yaloj con xgabmal ni basquiee lëjt guial beendi zi'ctzi

guyëndi. ²³ Gol been naguiejn guidxaa xixgabidi guidiblagaa ²⁴ din gaquidi zi'c tijb bencüb been Dios zi'c rënman, con tijb guialnaban naya në zi'c rayal por xdiidxliman ni ma biguiejndi. ²⁵ Zeel ad bal rnieeridi diidx rusquiee. Gol gunee diidxli con xcompniaridi din tijbzi nayajc dugra ree con Jesucrist. ²⁶ Bal rdxe'chidi, ad güündi dol. Ad gudxe' guialrdxe'ch guin luxdoodi dëchej, ²⁷ chitëë tiëbidi güün xindxab lëjt gan. ²⁸ Bén rban, rayal gucwëez cwanman abi' güünman dxiin, din con dxiin zagdxe güünman dxel ma rajpaman con xhie güünman yudar bén ryaadx ree xhienin. ²⁹ Ad rniee tēedi diidxguijdx, gol gunee ganax diidxzagdxe ni güün yudar chignia' ree ben ren bén gucaagdiajg ree laan din güünan laa reeman sirv. ³⁰ Ad rgu'nayadi xSprijt Dios, bén ma nabannēdi zi'c tijb sen guial ma najdi xbejnman par dxej ni guidxindi lojman. ³¹ Gol basa'n tiblad gra guialralenya', guialrdxe'ch, guialralen lasa', guialrguidxa'nē lasa', guialrniee diidxguijdx loj lasa' nē graloj ni mal. ³² Gol gojc benza'c, gol baya lasa'di gol been tēe lasa'di perdon zi'c been Dios lëjt perdon por Jesucrist.

5

Zi'c rayal guiban ree Xi'n Dios

¹ Zi'c ma najdi xi'n Dios bén rënman, gol been naguiejn güündi zi'c laaman. ² Gol gubajn zagdxe, gol guyën lasa'di zi'c guyën Jesucrist dunuj ree abi' bayü laagajcaman güjtaman por dunuj ree, gojcaman zi'c tijb gon ni rliaa nejxh par Dios.

³ Yan lëjt guial ma najdi xbejn Dios, ad rayalt guiniee loj lasa'di diidx dxuudx, ni'qui graloj ree ni ad rüjnt sirv ad rzëëbladx tēedi gra par lëjt. ⁴ Ad rnieedi diidxguijdx ree, diidx tont ree, diidx ni ad rayalt guinieedi din ad ni zagdxet reen. Mazri zagdxe gol badëë quixtëe loj Dios. ⁵ Din lëjt ma ragbee guial ree bén naban nadxuudx në ree bén rüjn ni ad rüjnt sirv, në ree bén rzëëbladx gap gra (mazri yu'guijc reeman ni guin ree luar guiën reeman Dios), dxel ad zile't chu' reeman lod rniabee Jesucrist con Dios. ⁶ Gol gojp cudad achu gusquiee lëjt con ree diidx ad rüjnt wen, din por ree ni guin zëed xcasti Dios par ree bén ad ruzoobt diidx. ⁷ Zeel ad güündi zi'c rüjn reeman.

⁸ Gocli gubajndi zi'c tijb bén nayaaw xquiarguiejn, per yan guial ma najdi tijbzi con Jesucrist, laaman naj biani par lëjt. Zeel gol gubajn zi'c ree bén ma zinal biani guin, ⁹ din guial chinal bejn biani guin ma zile' güünman ni zagdxe zi'c rayal, në ni naj diidxli. ¹⁰ Gol been naguiejn gol been zi'c ruladx Dios. ¹¹ Ad në lëjt güün ni ad rüjnt ree sirv ni rüjn ree bén nayaaw xquiarguiejn, gol guneenē reeman din gagbee reeman ni rüjn reeman. ¹² Din xt ratu bejn güman ni rüjn reeman ralan. ¹³ Per por xtiidx Jesucrist laa gagbee gajc reeman xhienin rüjn reeman. ¹⁴ Din zianan zeel rëb loj xtiidx Dios:

Batie'ch xbaaalil, lüj guial zinalil nejz mal.

Bariica loj dol din gusni Jesucrist xquiarguiejnl.

¹⁵ Zeel gol gojp cudad xhienaag nabandi, ad gontzi guibandi, gol gubajn zi'c bén yu' xquiarguiejn. ¹⁶ Gol been naguiejn guibandi zi'c rayal naga yu' tiamp, din lën ree dxej guie ad xnejztri naban bejn. ¹⁷ Zeel ad gontzi nabandi zi'c naj xixgabidi, gol beenli naguiejn chignia'di xhienaag rën Dios guibandi. ¹⁸ Ad südxidi, din guialrzüdx guin ruxhiin bejn. Zagdxeli gol cwëjb nabee xSprijt Dios luxdoodi guidiblagaa. ¹⁹ Chi

rünë lasa'di diidx, gol baza't ni ca loj ree salmos, loj ree himno, nê gra loj ree cant ni naj par Dios. Abi' guidib luxdoodi gol biil gol baza't tõe Dios zagdxe. ²⁰ Abi' guixie guixie gol badëed quixtõe loj dux Dad ree Dios por Dad Jesucrist por gra ni rünman par dunuj ree.

Zi'c rayal guibannë lasa' ree bën rliladx Jesucrist

²¹ Gol bazoob xtiidx lasa'di por respejt ni rajpidi Jesucrist. ²² Nê lëjt búngunaa nuxhliaa, gol bazoob xtiidx lacheelidi zi'c ruzoobidi xtiidx Jesucrist. ²³ Din xinguaaw ree rniabee lacheel zi'c rniabee Jesucrist bën rliladx ree laaman, bën babëe laa reeman loj dol abi' naj reeman xbejnman. ²⁴ Abi' zi'c ruzoob ree bën rliladx Jesucrist xtiidxaman, ziangajc ree búngunaa rayal guzoob xtiidx lacheel reeman. ²⁵ Nêgajc lëjt xinguaaw nuxhliaa ree, gol guyën lacheelidi zi'c rën Jesucrist bën rliladx ree laaman, abi' xt güjtaman por laa reeman ²⁶ persi bisüdaman xtol reeman, basiaman laa reeman por xtiidxaman nê por guialrirobnijs, ²⁷ din guidxin reeman lojman nix da't nê ni'qui tijb ni mal, sin falt o dol ren ree, guidxin reeman lojman nayadxuj sin dol. ²⁸ Yan ziangajc ree xinguaaw baxhliaa, rayal guiën lacheel reex zi'c rën laagajc reex. Abi' xin rën lacheel, laa gajquixan rënx. ²⁹ Din ni'qui tijb bejn ad rdxe'cht laagajcaman, ruyaanli laagajcaman rniajchi' tõe laagajcaman zi'c rünne Jesucrist dunuj ree nayajc ree bën rliladx laaman ³⁰ guial nayajc ree tijbzi con laaman. ³¹ Zeel zi'c rëb loj xtiidx Dios: “Xinguaaw gusa'n xdad xniaax din gaquix tijbzi con lacheelix abi' grop reex ma naj tijbzi bejn.” ³² Dád nawëëg naj par chignia' bejn diidx guie ree, per caninan din zian naj Jesucrist con ree xbejnman. ³³ Yan, xinguaaw ree, gol guyën lacheelidi zi'c rën lëjt gajc. Guiáad lëjt búngunaa, gol gojp respejt lacheelidi.

6

¹ Nê lëjt najdi xi'n, guial zinalidi Jesucrist, gol bazoob xtiidx ree xdadidi, din zian rayal güündi. ² Abi' mandamient yaloj ni rëb guial yu' ni yaca' ree bal yaguieen ree ni rëb: “Gojp respejt xdad xnial, ³ din guibanl zagdxe guiban tõe xchej loj guidxliuj guie.” ⁴ Nêgajc lëjt dad na ad gusagdiaj xi'ndi chitõe guidxe'ch reex por zian. Mejorli gol basni's reex zagdxe, gol guneenë reex gol balüü tõe reex zi'c rën Dios. ⁵ Nê lëjt bën rün ree xchiin bejn, gol bazoob xtiidx bën naj xpatrondi loj guidxliuj guie. Con guidib luxdoodi gol gojp respejt gol bazoob tõe xtiidx reeman, gol gunaladx xchiin Jesucristan cayündi. ⁶ Gol been reeman sirv ad chi ruguaatzi reeman lëjt par yaya'ndi zagdxe loj reeman, gol gunaladx guial Jesucristan cayündi sirv guial diidxli cayündi zi'c rën Dios güündi. ⁷ Gol been dxiin con gan, gol gunaladx xchiin Jesucrist cayündi, ad xchiint bênguidxliuj. ⁸ Din lëjt ma ragbee guial tijbgaj bejn majsi bën rün xchiin bejn o bën ad rüjnt xchiin bejn, per gudëe Jesucrist ni rayalaman zi'ctzi naj ni zagdxe beenman. ⁹ Nêgajc lëjt bën naj ree patron, gol gojc benza'c con ree xmojsidi, ma gojczy rusagzidi laa reeman, din lëjt ragbee guial bën rniabee laa reeman nê lëjt yu'man xanyabaa, abi' ad rbetaman loj bejn.

Gol guzudxi'ch loj ni rliladxidi

¹⁰ Rni tően lojdi compniar raliduladx ree Jesucrist, gol guzudxi'ch loj guial ma najdi tijbzi con laaman por xguialrniabee narooberman. ¹¹ Gol

gojp lëjt gajc con xguialrniabee Dios din sudxi'chidi chitëë güün xindxab lëjt gan con ree ni rusquiee. ¹² Din ad cayguieent ree naguiejn yaguieen ree gan loj tijb ni naj bëël në dxijt, caydijl ree con gra loj sprijtmal zi'c ree ni rajp guialrniabee, guialguxtis në gra loj xsprijt xindxab ni yu' ni canabee tëë loj guidxliuj guie. ¹³ Zeel gol gojp lëjt gajc con xguialrniabee Dios din chile' taandi xhietëëz loj guialzi gui't sudxi'ch tëëdi loj xhietëëz ni saquidi.

¹⁴ Gol guzudxi'chcliza por ni diidxli ni ma ragbeedi, gol basnuu tëë zi'c rayal guibandi. ¹⁵ Gol guzusun par guinieedi xtiidzza'c Jesucrist din por laan yadxu' ree zagdx con Dios. ¹⁶ Gol badxe'guijc tëë guial guialrliladx ni rajpidi naj ni ragnë lëjt loj gra ni zëed por xindxab. ¹⁷ Në ni been Dios perdon xtolidi, laan naj ni rutëë lëjt, guiáad xtiidxaman naj zi'c tijb espad ni runee xSprijt Dios lojdi. ¹⁸ Ad gucwëëz cwedx guiniabidi Dios. Gol gudi'n gunab lojman guixie guixie con xyudar xSprijtaman. Gol guzusun par cwedx guiniabidi laaman, ad gucheeladxidi, gol gurejdx tëëman por gra ree xbejnman. ¹⁹ Gol gurejdx gunab tëëman por naj din yazaladxaman naj diidx ni rayal ganen din ganen sin guialrdxeb xtiidzza'c Jesucrist ni zidnë perdon. ²⁰ Dios bacaabee naj par ganen xtiidzza'caman, abi' por zian yu'n ladxguiib. Per gol gurejdx gunab Dios chitëë gadxeban güün xtiidxaman zi'c rayal günan.

Diidx bigra ca ree loj gui'ch guie

²¹ Tíquico, tijb du lasa' ree bén rayën da't ree, abi' diidxli cayünman dunuj ree yudar cayguieen ree sirv Jesucrist, laaman gugojn lëjt gra xhienaag za'n xhie tëë cayünan, ²² din par zianczi caxhalan laaman din gugojnman lëjt xhienaag nadxu'n niz guie yagu' tëëman luxdoodi. ²³ Rniaaban loj Dios guial gra ree bén rliladx Jesucrist, cwe'cdxeman luxdoo reeman guiën tëë lasa' reeman, chililadx tëë reeman laaman në Dad Jesucrist, ²⁴ güünle' tëëman gra ree bén wali rën Dad Jesucrist.

Gui'ch guxhaal San Pabl loj ree bén Filipos rliladx Jesucrist

Rugajpdioz Pab bén rliladx ree Jesucrist

¹ Naj Pab con Timoteo, raguieenan sirv loj Jesucrist. Caycaan gui'ch guie par lëjt najdi bén rliladx Jesucrist luguiedx Filipos, në par ree bén rniabee lojdi rulüü tëë reeman xtiidx Dios në ree bén rüjn yudar bén rliladx ree Jesucrist. ² Dux Dad ree Dios në Dad Jesucrist güünle' lëjt, yabe'cdxe tëë reeman lëjt.

Rbejdx rniab Pab Dios por ree bén rliladx Jesucrist

³ Zianczi chi rasaaladxan lëjt, rudën quixtëë loj da Dadan Dios. ⁴ Abi' zianczi chi rbedx rniaaban laaman dád nix ru luxdon, rbedx rniaaban laaman por gradi. ⁵ Din diizd dxej ni guzuloj rliladxidi Jesucrist dxel guzuloj raguieen ree tijbzi xgab par guire'ch xtiidxaman xt yan. ⁶ Ragbeechaawan guial diizd chi guzuloj rliladxidi xtiidx Dios, laaman cusnuu cayagnë lëjt din gaquidi zi'c rayal xt dxej gui't Jesucrist stijb. ⁷ Najczi guial günan xgab zian por gradi, din rusaaladxan lëjt, zi'c chi yu'n ladxguiib ziangajc chi culün conin naj diidxli xcwent Dios din tibloj cayünle'man dunuj ree. ⁸ Dios ragbee guial dád rusaaladxan lëjt guial rënan lëjt zi'cgajczi rën Jesucrist lëjt. ⁹ Rniaab tëën lojman din mazri guiën lasa'di, abi' guixie guixie gusnuu guixhialaman xquiarguiejndi din gagbeedi ni rayal güündi, ¹⁰ din chile' cwedi ni naj mazri zagdxe. Abi' zian guibandi naya sin dol niz loj Dios, chitëë xhie naman contr lëjt dxej ni gui't Dad Jesucrist stijb. ¹¹ Abi' por laaman zajc guibandi zi'c rën Dios zi'c balüü Jesucrist lëjt din gap ree bejn Dios mazri respejt guilies tëë reeman xvaloraman.

Yabajn ree par Cristo

¹² Compniar raliduladx ree Jesucrist, rënan gagbeedi guial graczi ni guza'can cayün reen yudar persi care'ch xtiidxza'c Jesucrist. ¹³ Abi' yan, gra ree bén yu' lën palas në gra ree bén zojb niz guie ragbee reeman guial yu'n ladxguiib por guial najn xbejn Jesucrist. ¹⁴ Abi' chi baguiaa ree compniar raliladxnë' ree Jesucrist guial yu'n ladxguiib, mazri guzudxi'ch reeman abi' zien da't reeman guyu luxdoo guitie'ch reeman xtiidx Jesucrist sin guialrdxeb.

¹⁵ Per diidxliczi yu' reeman rtie'ch xtiidx Jesucrist guial rdëdloj reeman naj abi' rën reeman gac reeman mazri bén zojbloj. Per yu' reeman rtie'ch xtiidxaman guial naj xixgab reeman zagdxe. ¹⁶ Yu'za reeman guial rën reeman Jesucrist, catie'ch reeman xtiidxaman abi' ragbee reeman guial yu'n ladxguiib guial za'dxi'chnë'n xtiidxaman guial najcan diidxli. ¹⁷ Per yu' reeman ad walit reeman naj xixgab reeman zagdxe catie'ch reeman xtiidx Dios, naabzi par guilies bejn xvalor reeman abi' xixgab reeman naj guial gusagdiaj reeman naj mazri lën ladxguiib guie. ¹⁸ Per achet güünan majsi zagdxe naj xixgab reeman o ad zagdxtet ya, contzi ma catie'ch reeman xtiidx Jesucrist, laan naj ni rabaanë'n abi' mazri yabaan. ¹⁹ Din ragbeen guial yariin loj ni cadëëdan guial cabejdx canabidi Dios por naj në guial cayagnë xSprijt Jesucrist naj. ²⁰ Naj ragbee guial ad yu't dxej guslaa Dios naj yaya'nxtun, sin guialrdxeb gulün bejn ree xhienaag

ra'pan respejt Jesucrist majsi nabanen o majsi guiëtan. ²¹ Din par naj la'tgaj nabanen cayünan laaman sirv, abi' bal guiëtan mazri zagdxen din ma gazun con laaman. ²² Per bal gabajnran loj guidxliuj guie, gusnuu gūnan sirv loj Cristo zi'c rayal, per ad ragbeetan conin naj zagdxe par naj. ²³ Din loj grop ree ni guin dád nawëëgan par gaben conin gūnan, tijb rënan yaca' Dios naj din gazun con Cristo, laan naj mazri zagdxe par naj, ²⁴ per por lëjt rüjn naguiejn gabajnran. ²⁵ Abi' naj ragbeen guial gabajnran din gūnan lëjt yudar gusnuu chinalidi xnejz Dios, din chu' luxdoodi gusnuu chililadxidi Jesucrist. ²⁶ Abi' chi guidganan lëjt stijb, chu' ni yabaanëdi gudëë tëëdi quixtëë loj Jesucrist por ni beenman por naj.

²⁷ Per ganin lëjt, gol been naguiejn gol gubajn zi'c rayal, zi'c rëb loj xtiidx Jesucrist. Din bal guidganan lëjt o bal id zialan, per rënan guiguiejn guial za'dxi'chidi nadxag tëë lasa'di abi' tiblojz cayüjndi naguiejn catie'chidi xtiidx Jesucrist. ²⁸ Ad guidxebidi bën rdxe'ch lëjt. Zian guiguien guial ma canijt reeman loj Dios, per lëjt zian guiguien guial ma rajpidi perdon zëëd loj Dios. ²⁹ Din ad cwabeetidi par chililadxzidi Jesucrist, cwabeedi në par sagdiajdi por laaman. ³⁰ Lëjt con naj tiblojz caydüüd ree tarbajw par yatie'ch ree xtiidx Jesucrist, ma baguiaadi xhienaag rdëëdan tarbajw por xtiidxaman abi' yan caguiejn guial cusnuu cayünan mazran.

2

Nadxagyadxu' ree por Jesucrist

¹ Yan, zi'c ma yu' luxdoodi zagdxe por Cristo, zi'c ma yu' luxdoodi nix guial rusnuu rën lasa'di, në zi'c ma nabannëdi xSprijt Dios në zi'c yu' luxdoodi nix con lasa'di, në zi'c raya lasa'di. ² Gol basnuu gol gubajn zian din yagu'di luxdoon nix. Gol gubajn, gol guyën tëë lasa'di tibloj, gol gojc tijbzi, gol been tëë tijbzi xgab. ³ Ad sëëbladxidi güündi gan loj ree lasa'di o guilies xvalor lëjt gajc, mazri zagdxe gol been naya, gol been tëë xgab guial stijb lasa'di mazri lasajc guial lojdi. ⁴ Ad bal chu'di xgab por lëjtzi, gol guyu xgab por stijb lasa'di.

⁵ Gol been xgab zi'c been Jesucrist xgab. ⁶ Din majsi laaman naj Dios, per ad guzudxi'chtaman guial niëjbaman laaman naj Dios. ⁷ Basa'n xguialrniabeeman persi bi'taman loj guidxliuj guie zi'c tijb mojs abi' gojlanan zi'c tijb bénguidxliuj. ⁸ Abi' chi gocaman zi'c tijb bénguidxliuj beenman naya abi' bazoob xtiidx xDadaman, xt güjtaman loj crüjz, majsi ni natu naj guial rëjt loj crüjz. ⁹ Zeel dád guialrniabee narooob badëë Dios lojman, badëë tëëman lojman laj bejn ni mazri lasajc loj gra laj bejn. ¹⁰ Din chi guiguiejn ree bejn laj Jesucrist, guzuxib gra reeman lojman, zi'c ree ni yu' xanyabaa, në gra ree ni yu' loj guidxliuj, nëtëë ree ni yu' lën liuj. ¹¹ Abi' gra bejn guiëb guial Jesucrist naj Dad, zian guilies reeman xvalor dux Dad ree Dios.

Xbejn ree Jesucrist naj zi'c tijb guij ni rulaa bacha'

¹² Zeel compniar raliduladx ree Jesucrist, zi'c rënan lëjt abi' rnin lëjt guial zi'c bazoobidi da diidxan chi guzun con lëjt, ziangajc gol bazoob da diidxan mazri yan guial za'n zijt. Con guialrdxer në con respejt gol been zi'c rayal güün ree bën ma naj perdon. ¹³ Din por Dios zëëd xgabza'c ni rüjndi, abi' laaman ragnë lëjt din güündi zi'c rënman.

¹⁴ Gol been gra ni rayal g undi, achet guial ad zayuladxtidi achet t et guial tildiidxidi, ¹⁵ chit e xhie guinee bejn l jt o chit e xhie xfaltidi yadxejl reeman. L jt najdi xi'n Dios gol gubajn naya niz loj ree b n ad zinalt xnejz Dios, b n r jn ree ni guijdx. Din gaquidi zi'c tijb guij loj reeman, zi'c tijb guij ni rulaa bacha' lod nacay, ¹⁶ guial za'dxi'chn di xtiidx Dios ni zidn  guialnaban. Abi' zian yabaan por l jt dxex ni gui't Jesucrist stijb guial gagbeen ad bentan dxiin xlia' ad bizaa t etan xlia'. ¹⁷ Din guial rliiladxidi Dios laan naj zi'c tijb gon par laaman, abi' nix yu' luxdon majsi gui tan din yayaaloj gon guin guial rabaan n gradi. ¹⁸ Yan ziangajc gol babaa, gol babaa zi'c rabaan.

Timoteo n  Epafrodito

¹⁹ Dad Jesucrist gagn  naj din diob gaxhalan Timoteo lod zobjidi din xhienladxan chi gagbeen xhienaag riga'di. ²⁰ Din tijbzi Timoteo yu' l jt xgab zi'c yu'n l jt xgab. Achut b n ru l jt xgab zi'c laaman. ²¹ Graczi reeman ru xgab per por laagajc reeman, ad rut reeman xgab por ni r n Jesucrist g un reeman. ²² Per ma ragbeedi xhienaag naj Timoteo, ma ragbeedi xhienaag cay nman naj yudar persi catiechan xtiidx Jesucrist. Cay nman naj yudar zi'c r jn bejn xDadaman yudar. ²³ Zeel r nan gaxhalan laaman din guitixlojman l jt, gagbeezan xhienaag gariican loj cwent guie ²⁴ Dad Jesucrist gagn  naj din diob guidgana quijb naj l jt.

²⁵ Abi' rulu  r jn naguiejn gaxhalan da miwan Epafrodito ladxidi. L jt guxhaal laaman din g unman naj yudar loj ree ni ryaadxan. Abi' zian cay nman naj yudar, tiblojzi cayzaagdiajn. ²⁶ D d r nman guidganajman l jt abi' d d yu'man xgab guial gogbeedi gogxuuman. ²⁷ Abi' walican gogxuuman zamer ni jtaman. Per baya Dios laaman, abi' ad laatzaman, n gajc naj bayaman, chit e chu'naya luxdon mazri zi'c ma guyu nayan. ²⁸ Zeel diob gaxhal gajcan laaman din yabaadi chi guguaadi laaman stijb chit e chu'naya t en mazri. ²⁹ Gol babaa, gol baca'man guial najman tijb du lasa' ree b n rliiladx Jesucrist. Zian gol buy n gra ree b n naj zi'c laaman. ³⁰ Din zamer ni jtaman guial r jnman sirv loj Jesucrist, guzujman loj gualg jt guial beenman naj yudar loj ni ad bile't n jn quijb l jt naj yudar.

3

Ni mazri lasajc

¹ Yan, compniar raliduladx ree Jesucrist, gol badxe' luxdoodi zagdxe por Dad Jesucrist. Par naj achetan guial ganin l jt diidx ni ma rni gajcan tijb, din par l jt lasajc ree diidx guin chit e chu' ni gusquiee l jt. ² Gol gojp cudad con ree bentont, b n ad nad dguient, benmal, b n r jn ree naguiejn din chu' ree bejn xsen b n Israel. ³ Din mazri lasajc sen ni raya'p ree, abi' sen guin naj guial diidxli zunaal ree Dios por xSprijtaman b n nabajnn ' ree, abi' rabaa ree guial ma rayagbee ree nayajc ree xbejn Jesucrist, per ad por guial zunaalt ree costumbr. ⁴ Majsi zajc gales da valoran guial zinaalan gra ree costumbr, per bal yu' b n rlies xvalor gajc, n gajc naj zajc g n zian. ⁵ Din chi goc toxman goolan, badxe' reeman naj sen ni ru ree b n Israel. Abi' b n Israel naj, loj xdiaa Benjam n zialan, nrien diidx Hebreo din xi'n ree b n rniee diidx Hebreo naj. Benan gra ni rniabee ley din b nfarisew gojcan. ⁶ Benan zi'cgajczi r jn ree b nfarisew, zeel xt guzunaan b n rliiladx ree Jesucrist din g nan laa reeman ni

mal, benan gra zi'c tal rniabee ley abi' achut zajc niëjb guial ad cayüntan zi'c rayal. ⁷ Gra ni benan nadxel, par naj dád lasajcan nadxel, per yan achet lasajcan par naj, din yan Cristo mazri lasajc. ⁸ Abi' achet ni mazri lasajc guial loj ni nünbeen Dad Jesucrist, por laaman gra ni benan nadxel ma basa'nan tiblax, naj reen zi'c tijb guix par naj din nabee Cristo naj guidiblagaa, ⁹ abi' gacan tijbzi con laaman. Ad naladxtan por guial rünan zi'c rniabee ley achet dol ra'pan niz loj Dios, naladxtan por guial rliladxtan Jesucrist, din por guialrliladxtan guin ma naya bejn loj Dios. ¹⁰ Zeel rënan günbeecheaawan Cristo, günbee tëen guialrniabee ni basban laaman, rën tëen gadaanaxhietëez loj guialrzagdiaj ni gadëedan zi'c gudaanman, ma guidxin dxej gacan zi'c rayal gacan por xguialgüjtaman. ¹¹ Din yu'guican guial yabanan zi'c baban Jesucrist.

Ni gunee Dios xanyabaa

¹² Ad canitan lojdi guial ma bayaaloj benan gra o guial najn benza'c, per cayünan naguiejn din gacan zi'c rën Cristo gacan diizd chi guzuloj rniabeeman naj. ¹³ Compniar raliduladx ree Jesucrist, naj rni lëjt guial ad wayaaloj günan zi'c rayal, per cayünan naguiejn din yayanladxtan gra ni benan gocli din gac gusnuun par delant, ¹⁴ din yayaaloj günan zi'c rayal din chile' gaca'n ni gunee Dios xanyabaa zi'c gurejdxaman dunuj ree por Jesucrist.

¹⁵ Abi' dunuj ree guial ma rayagbee ree zagdxe ni rën guiëb xtiidx Dios, rayal yaguieen ree xgab zian. Per bal garen naj xixgabidi guial loj ni canin lojdi, Dios gulüü lëjt conin naj diidxli. ¹⁶ Per rüjn naguiejn yabajn ree zi'c ma rayignia' ree.

¹⁷ Compniar raliduladx ree Jesucrist, gol gubajn zi'c naban, gol baguiaa tëë xhienaag naban ree bén naban zi'c naban. ¹⁸ Din zien volt ma rnin lojdi abi' yan caydxi'nax zatijb, xt ronax canin lëjt guial zien ree bejn naban zi'c ree bén ad rliladxt guial güjt Cristo loj crüz por dux xtol ree. ¹⁹ Abi' ree bén guin castizi naj ni rbëz laa reeman din mazri ruladx reeman gün reeman ni dxuudx. Abi' luar yatu reeman por ni rüjn reeman aal mazri rlies xvalor reeman guial mazri rüjn reeman xgab por ree ni yu' loj guidxliuj guie. ²⁰ Per dunuj ree ma nayab ree xanyabaa abi' caylëz ree guial diizd xanyabaa gui't Dad Jesucrist bén gudix por dux tol ree. ²¹ Laaman naj bén guchaa dux cuerp ree ni raya'p ree loj guidxliuj guie din gacan zi'c naj xcuerpaman xanyabaa. Abi' günman zian con guialrniabee ni rajpaman par nabeeman gra.

4

Gol badxe' luxdoodi zagdxe por Dad Jesucrist

¹ Zeel compniar raliduladx ree Jesucrist, rënan lëjt rën tëen guidganax lëjt, lëjt rgu' luxdon zagdxe, abi' najdi zi'c tijb prem par naj, gol guzudxi'ch loj ni rliladxi di Dad Jesucrist.

² Yan, rniaaban loj Evodia në loj Síntique din guidxag cwe reeman guial naj reeman compniar loj ni rliladx reeman Dad Jesucrist. ³ Abi' ziangajc lüj compniar ni cayguieen dxiin tijbzi, rniaaban lojl din günl yudar bëngunaa guin ree din laa reeman been naj yudar bire'ch xtiidx Jesucrist në Clemente con ree ben ren, gra reeman ma yu' laj loj libr ni yu' laj ree bén guiban tiblayaa con Dios.

⁴ Zianczi gol badxe' luxdoodi zagdxé por Dad Jesucrist. Naj rni lèjt ;Gol badxe' luxdoodi zagdxé! ⁵ Gol been naguiejn güünbee gra bejn lèjt guial najdi benza'c. Gol badxe'guijc guial zamer gui't Dad Jesucrist zatijb.

⁶ Ad rayalt chu'di xgab por xhienin, gol gurejdx gunab Dios por gra ni rzajquidi, gol gurejdxaman gol badëë tëë quixtëë lojman. ⁷ Dios yabe'cdxe luxdoodi, zro' rabe'cdxeman luxdoo bejn mazri guial loj ni naladx bejn, abi' laan naj ni gagnë lèjt din yayaalyuj luxdoodi yayaalyuj tëë xquiarguiejndi guial ma najdi tijbzi con Jesucrist.

Gol badxe'guijc ganax ni zagdxé

⁸ Naga gad lox günan gui'ch guie, compniar raliduladx ree Jesucrist, rnin lèjt gol badxe'guijc ganax ni diidxli, ni rayal respejt në ni naj xnejz. Gol badxe'guijc ganax ni rüjn sirv, ni naj zagdxé në ni rayal güün bèn zë xnejz. Gol badxe'guijc gra ni naj zagdxé në ni guilies bejn xvalor.

⁹ Gol been zi'c basidan lèjt, zi'c ma balün lèjt, gol been zi'c rnin lèjt zi'c ma baguiaadi benan, zian gagnë Dios lèjt bèn rabe'cdxe luxdoo ree bejn.

Ni badëëd ree bèn filipos loj Pab

¹⁰ Dád rabaan por Dad Jesucrist guial ma basaaladxidi naj. Ad canitan bayanladxidi naj, canin zian guial ad gojctri nünjndi naj yudar. ¹¹ Ad canitan zian guial cayaadxan xhienin din ma basidan gadëëdan con ni ra'ptzan. ¹² Ragbeen xhienaagan chi naban bejn loj guialprob ragbee tëën xhienaagan chi achet ryaadx bejn, din ma basidan rdaanan ni zëëdtzi, bal rawan o bal id rawan, bal rüjnan naj sobr o bal ryaadxan. ¹³ Rajc rdaanan ni zëëdtzi con xyudar Jesucrist. ¹⁴ Per zagdxé naj ni beendi guial beendi naj yudar loj ni cazaagdiajn.

¹⁵ Ragbee tëëdi guial chi briin niz Macedonia din suloj gatie'chan xtiidxza'c Jesucrist, lèjtzi bazaladx xhienin lon guial loj gra ree guiedx lod ma rliladx reeman xtiidx Jesucrist, zi'c benan lèjt yudar ziangajc beendi naj yudar. ¹⁶ Ziangajc chi guzun luguiedx Tesalónica chi biaadxan xhienin, bëlczi volt beendi naj yudar. ¹⁷ Ad cayguiltan mod din güündi naj yudar mazri, ni rënan naj guial mazri yaya'ndi zagdxé loj Dios. ¹⁸ Ma baca'n gra ni guxhaalidi con Epafrodito, yan xt sobr rüjnan naj, par naj ni guxhaalidi naj zi'c tijb ni nadxoon o tijb gon ni ruree nejxh, ni ruladx Dios. ¹⁹ Zeel Dios gunee lèjt gra ni ryaadxidi por ree ni za'c ni rajpaman xanyabaa con Dad Jesucrist. ²⁰ ;Abi' por gualrniabee ni rajp dux Dad ree Dios, rayalczi yaya'p reeman respejt goctëëz! Amén.

Rugajpdioz ree bèn rliladx Jesucrist bèn Tesalónica ree

²¹ Gol bagajpdioz gra ree bèn ma naj xbejn Jesucrist, guiáad gra ree bèn rliladx Jesucrist bèn za'në' reen guie, rugajpdioz reeman lèjt. ²² Gra ree bèn zojb ree guie, bèn ma naj ree xbejn Jesucrist, në gra ree bèn rüjn sirv loj rey, në reeman rugajpdioz lèjt.

²³ Dux Dad ree Jesucrist güünle' gradi. Amén.

Gui'ch guxhaal San Pabl loj ree bén Colosas rliladx Jesucrist

Rxhiaal Pab xtiidx Dios

¹ Naj Pab, najn tijb xi apóstol Jesucrist, din zian rën Dios. Naj con Timoteo nayajcan compniar raliduladxan Jesucrist, ² caycaan gui'ch guie par lëjt guial diidxli zinalidi xtiidx Jesucrist, lëjt guial najdi xbejn Dios luguiedx Colosas. Dux Dad ree Dios güünle' lëjt cwe'cdxe tëeman luxdoodi.

Rbejdx Pab Dios por ree xbejn Jesucrist

³ Beegaj chi rarejdxan Dios, xDad Dad Jesucrist, radëedan quixtëe lojman por lëjt. ⁴ Din ma baguiejnan xhienaag rliladxidi Jesucrist xhie tëe naag rëndi gra ree bén naj ree xbejnman. ⁵ Guial cabëzidi yayalidi guialnaza'c yu'chaaw xanyabaa. Gogbeedi laan chi biguiejndi xtiidxza'c Jesucrist ni naj diidxli. ⁶ Abi' ree diidxza'c guin ni ma bacaagdiajguidi, gra ladczi ma care'chan. Abi' gra ladczi ma caliladx ree bejn laan zi'cgajc guzaquidi chi biguiejndi guial naza'c Dios abi' diidxli rënman lëjt. ⁷ Lëjt gogbee diidxli guin ree chi balüü Epafra laa reen lëjt. Laaman cayüjn dunujn yudar abi' dád rayënan laaman, din laaman diidxli cayüjn sirv loj Jesucrist delant lojdi. ⁸ Abi' tëe laaman be diidx du lojn xhienaag rën lasa'di guial yu' xSprijt Dios luxdoodi. ⁹ Zeel diizd chi baguiejnan xhienaag nabandi, ad racwëëzt rarejdxan Dios por lëjt din chignia'di zagdxë xhienaag rënman güündi gunee tëeman lëjt gra loj guialrajc guixhial tëeman xquiarguiejndi por xSprijtaman. ¹⁰ Abi' zian guibandí zi'c rayal guiban ree bén rliladx Jesucrist, din güündi zi'c tal ruladxaman abi' gusnuu güündi ganax ree ni zagdxë gusnuu tëe güünbeedi Dios mazri. ¹¹ Abi' ranaaban lojman din con xguialrniabee za'cdxoonman gagnëman lëjt din sudxi'chidi, taan tëedi xhietëëz loj guialzi tëdidi sin guial yaleny'a'di. ¹² Abi' xt nix chu' luxdoodi gudëedi quixtëe loj dux Dad ree Dios guial basiaman lëjt din yayalidi ni rayal ree xbejnman, bén zinal ree xnejzaman. ¹³ Laaman babëë dunuj ree loj xguialrniabee xinxab abi' bagu'man dunuj ree loj xguialrniabee xi'nman Jesucrist bén rënman, ¹⁴abi' gudijxaman por dux tol ree, yan ma raya'p ree perdon loj Dios.

Por xguialgüjt Jesucrist ma nadxu'në' ree Dios zagdxë

¹⁵ Achut zajc guguaa Dios, per Jesucrist naj zi'c gajczi naj Dios. Abi' laaman mal rniabeenëman Dios diizd chi gad guidxliuj gacchaaw. ¹⁶ Por Jesucrist gojc gra ni yu' xanyabaa në loj guidxliuj, zi'c ni ruguaa bejn zi'c ni ad ruguaataman. Abi' por laaman yu' graloj guialrniabee në graloj guialguxtis ni rajp ree ni ad rajct ruguaa ree bejn. Gran gojc por laaman në par laaman. ¹⁷ Mal yu' Jesucrist diizd guia'xchej chi gad guidxliuj gacchaaw, laaman dxiibguijc gra abi' rniabeeman gra. ¹⁸ Abi' laa tëeman rniabee gra ree bén rliladx laaman, bén ma naj ree xbejnman. Laaman naj bén yaloj abi' yaloj laaman baban loj ree bengüt din guiguien guial tijbzi laaman rajp guialrniabee loj gra. ¹⁹ Din bayuladx Dios gac Jesucrist zi'c gajczi naj Dios. ²⁰ Abi' por Jesucrist gra bënguidxliuj ma za' zagdxë con Dios, zi'c ni yu' loj guidxliuj zi'c ni yu' xanyabaa. Za' bejn zagdxë con Dios por xguialgüjt Jesucrist loj crüz. ²¹ Gocli ad gojctidi tijbzi con Dios,

gojquidi zi'c bèn bidxe'ch laaman guial beendi ganax ni mal. ²² Per yan ma za'di zagdxe con Dios por ree gualzi ni gudèd Jesucrist chi gütaman loj crüzj din gac guidxindi lojman naya sin dol chitèè xhie naman lojdi. ²³ Per par zian rayal sudxi'chidi loj gualrliladx ni rajpidi, ad gucwèèz chinalidi xtiidxza'c Jesucrist ni ma biguejndi. Abi' diidxza'c guin gajc ree ma bire'ch guidib guidxliuj. Abi' naj naj tijb ree bèn catie'ch diidxza'c guin ree.

Bacaabee Dios Pab din güünman sirv loj ree xbejn Dios

²⁴ Abi' yan nix yu' luxdon por gualzi ni cadèèdan guial rünan lèjt yudar abi' lasa'gajc gualzi ni gudèd Jesucrist cadèèdan din chile' günan yudar bèn rliladx ree laaman bèn ma naj ree xbejnman. ²⁵ Din Dios bacaabee naj par günan sirv loj ree xbejnman. Abi' laaman baneè dxiin guin naj din gulün lèjt xtiidxaman zi'c tal najn. ²⁶ Diizd tiamp gulal ad bignia't ree bejn zagdxe ni rën guièb xtiidx Dios. Per yan ma balüüman ni rën guièban loj ree xbejnman. ²⁷ Din gugojn reeman bèn ad najt ree bèn Israel xhienaag naj xgualnaza'c za'cdxoonman. Abi' ni ad balüüt Dios loj ree bejn tiamp gulal naj guial nabannè Jesucrist lèjt abi' por laaman ragbeedi zagdxe guial yu' dxej yayalidi xanyabaa. ²⁸ Abi' dunujn batie'ch xtiidx Jesucrist, baneenè'n bejn ree, balüü tèèn laa reeman con gra quiarguejn ni runee Dios din chi guidxin reeman lojman por Jesucrist ma naj reeman zi'c rënman gac reeman. ²⁹ Abi' naj dád cayünan naguiejn cayünan dxiin guie con gualrniabee ni baneeman naj.

2

¹ Rënan gagbeedi guial cayün da'tan naguiejn cayünan lèjt yudar, nè ree bèn zojb guiedx Laodicea nè gra ree bèn ad wayünbeet naj. ² Cayünan naguiejn din yayu luxdoo reeman din gusnuu guiban reeman tijbzi, guièn lasa' reeman chu' tée xquiarguejn reeman din chile' güünbee reeman ni ad balüüt Dios bejn ree gulal abi' laaman naj Jesucrist, ³ por laaman zèèd gra gualrajc nè gualrignia'. ⁴ Canin diidx guie ree lojdi chitèè chu gusquiee lèjt con ree xtiidx zagdxe reeman. ⁵ Majs ad za'tan con lèjt, per yu'guican lèjt abi' rabaan guial cayüjndi zi'c rayal, za'dxi'ch tèèdi loj gualrliladxidi Jesucrist.

⁶ Zeel zi'c ma rliladxidi Dad Jesucrist, ziangajc gol gojc tijbzi con laaman. ⁷ Gol been naguiejn gol binalaman guidiblagaa, gol guzudxi'ch loj guial rliladxidi laaman zi'c ma basiididi ad gucwèèz tée gudèèdi quixtèè loj Dios.

Guialnaban ni rudèèd Jesucrist

⁸ Gol gojp cudad, ad tièbidi güün ree bèn rën gusquiee lèjt gan con ree ni rulüü reeman o con ree diidx ni ad rüjnt sirv ni zèèd por ree costumbr o por ree gualrniabee yu' loj guidxliuj, din ad zèèdt reen por Jesucrist.

⁹ Din zi'cgajczi naj Dios, ziangajczi naj Jesucrist. ¹⁰ Abi' nabannèdi Dios guidiblagaa guial najdi tijbzi con Jesucrist, din laaman rniabee loj gra gualrniabee nè loj gualguxtis. ¹¹ Abi' tée guial ma najdi tijbzi con Jesucrist ma yu'di xsenman, per ad lasa't sen ru ree bèn Israel, sen yu'di por laaman najn guial ma basa'ndi dol tiblax. ¹² Chi gurobnijsidi, laan rën guièb guial güjtidi con Jesucrist abi' babandi con laaman stijb guial rliladxidi Dios rajp gualrniabee persi basbanman Jesucrist loj gualgüjt. ¹³ Gocli gojquidi zi'c bengüt delant loj Dios por xtolidi nè por guial ad

guyutidi sen ni ru ree b n Israel. Per yan por Jesucrist, ma been Dios dux tol ree perdon abi' ma raya'p ree guialnaban con Jesucrist. ¹⁴ Ma badxi'ca Dios dux tol ree ni bayal nadijx ree zi'c rniabee xleyaman, badxi'caman dol guin ree chi g t Jesucrist loj cr jz abi' laaman naj b n gudijx laan por dunuj ree. ¹⁵ Abi' zian beenman gan gra loj ree guialguxtis n  loj gra guialrniabee z ed loj xindxab. Basa'nxtuman laa reeman loj ree bejn, beenman laa reeman gan guial g jtaman loj cr jz.

Gol been xgab ni yu' ree xanyabaa

¹⁶ Zeel achut rayal gula'ch l jt por ni rawidi n  ni r 'di o por guial ad r jntidi cwent dxej lanij o dxej ni yu' b ew c b o dxej raziiladx ree bejn. ¹⁷ Din gra ree ni guin naj zi'c tijb xbala Jesucrist abi' yan laaman naj b n ma bi't. ¹⁸ Ad ti bidi gutiaalguiiw b n r n ree anjl zi'c Dios l jt, par gusa'ndi xnejz Dios, din laa reeman rul   naj reeman b n naxanladx, per ad najt reeman laan r b t e reeman guial yu' ni rul  loj loj reeman. Dxel laagajc reeman rlies xvalor por xixgab gajc reeman. ¹⁹ Per laa reeman ad nabann t reeman Jesucrist, b n rniabee dunuj ree. Abi' por laaman caysnuu cayignia' ree xhienaag yunaal ree xnejzaman din yadxajg du lasa' ree yayajc ree tijbzi con Jesucrist zi'c naj xixgab Dios.

²⁰ Yan bal walidi ma g jtidi con Jesucrist par ree ni rb eguijc ree b nguidxliuj,  chexquiza zeel ruzoobidi xtiidx ree b n r b: ²¹ "Ad rayalt gugaalil ni guin, ad gawil ni guin, ad guiniaazil ni guin"? ²² Gra ree mandamient guin yu' dxej nit reen, din b nguidxliuj gul eguijc laa reen. ²³ Diidxliczi rul   lasajc da't ree mandamient guin guial tant r jn ree bejn naguiejn g  n reeman laa reen cumplid abi' r jn reeman b n naxanladx dxel rusagzi laagajc reeman, per achetczi lasajc ree mandamient guin par gucw ez reen ni mal rz  bladx reeman g  n reeman.

3

¹ Zeel bal ma rajpidi guialnaban c b con Jesucrist, gol been naguiejn gol been xgab ni yu' ree xanyabaa lod za' Jesucrist xladbee Dios. ² Ad g  ndi xgab ganax ree ni yu' loj guidxliuj, gol been xgab mazri ni yu' ree xanyabaa. ³ Gol gunaladx ma g jtidi par ree ni yu' loj guidxliuj abi' ma rajpidi guialnaban delant loj Dios por Jesucrist. ⁴ Abi' chi gui't Jesucrist stijb, b n runee dunuj ree guialnaban, n  l jt yayal guibann  laaman loj xguialrniabee za'cdxoonman.

Zi'c rayal guiban ree b n rliladx Jesucrist

⁵ Yan, gol basa'n gra ree ni mal riga' loj guidxliuj guie. Ad sun di b n ren b n ad najt lacheelidi. Gol basa'n ni ad r jnt ree sirv, n  ree xgabmal n  ree ni mal yu'di gan g  ndi. Ad s  bladx t edi gapidi gra loj ni yu' loj guidxliuj din b n r jn zian laan r nman mazri luar Dios. ⁶ Abi' por ree ni guin z ed xcasti Dios par ree b n ad ruzoobt xtiidxaman. ⁷ Lasa' ree ni mal guin beendi chi gadidi g  nbee Jesucrist. ⁸ Per yan gol basa'n gra ree ni mal guin zi'c guialrdxe'ch, guialralen lasa', guialr jn ni mal lasa', guialrnieeguijdx n  guial rniee diidxguijdx. ⁹ Ad rusquiee loj lasa'di, din ad nabantridi zi'c gubandi gocli chi beendi ni mal ree, ¹⁰ din yan ma bidxaa mod nabandi. Ma najdi zi'c benc b guial chigagaj ma cayajquidi zi'c r n Dios gaquidi din g  nbeedi Dios mazri zagdxe, b n runee l jt guialnaban. ¹¹ Abi' chi ma rliladx bejn Jesucrist, achet g  nan chut ez najman, bal najman b n grieg o b n Israel, bal yu'man sen ru ree b n

Israel o ad yu'taman laan ya, bal najman benzit o najman bèn zobj dajn, bal najman zi'c bèn nado' o ad najtaman zi'c bèn nado' Per ni mazri lasajc naj gualrliladxaman Jesucrist, bèn rniabee za' tēēman con dugra ree.

¹² Abi' Dios rēn lējt, zeel gulejman lējt din gaquidi xbejnman. Zeel gol baya bejn ree, gol gojc benza'c, gol gojc bèn naxanladx, ad gaquidi bendxal, gol gojp pasens lasa'di. ¹³ Ad yalenya'nē lasa'di. Gol been tēē perdon lasa'di bal xhie rüjnnē reeman lējt. Zi'c been Dad Jesucrist lējt perdon ziangajc gol been perdon bejn ree. ¹⁴ Gol badxe'guijc gualrēn lasa' naj ni mazri lasajc. Abi' gualrēn lasa' guin rüjn yudar din guidxaag guiban bejn. ¹⁵ Gol cwējb nabee Jesucrist lējt din yabedxe luxdoodi, din par zian gulej Dios lējt par gaquidi tijbzi por Jesucrist gol badēē tēē quixtēē lojman por zian.

¹⁶ Gol badxe'guijc da'xtiidx Jesucrist, gol balüü gol guneenē tēē lasa'di zi'c rayal. Gol badēē quixtēē loj Dios con ree cant nē ree salmos nē los demazri ree cant ni naj par Dios. ¹⁷ Xhietēēz ni güündi ni guiniee tēēdi, yaløj xgaj gol basaaladx Dad Jesús abi' por laaman gol badēēd quixtēē loj dux Dad ree Dios.

Zi'c rayal guiban tijb famil

¹⁸ Lējt bēngunaa yu' ree lacheel, gol bazoob xtiidx lacheelidi, din zian rayal güün bèn rliladx Jesucrist. ¹⁹ Abi' ziangajc lējt xinguaiaaw yu' ree lacheel, gol guyēn lacheelidi ad gusagzi tēēdi laa reeman.

²⁰ Nē lējt xin naj ree xi'n, gol bazoob gra xtiidx ree xDadidi, din zian ruladx Dios. ²¹ Abi' ziangajc lējt dad na, ad gusagdiaj xi'ndi chitēē guidxe'ch reex abi' yalenya' reex.

²² Lējt bèn rüjn ree xchiin bejn, gol bazoob gra xtiidx xpatrondi loj guidxliuj guie. Ad chi ruguaiaatzi reeman lējt par yaya'ndi zagdxē loj reeman, guidib luxdoodi gol been xchiin reeman por respejt ni rajpidi Dad Jesucrist. ²³ Xhietēēz nin güündi, gol beenan con gan. Gol gunaladx loj Jesucrist cayüjndi sirv, ad lojt bēnguidxliuj. ²⁴ Din lējt ma ragbee gual zian yu' ni tia'di loj Dad Jesucrist gual cayüjndi laaman sirv. ²⁵ Per par ree bèn rüjn ni mal, laa reeman yayal casti por ni mal been reeman, din Dios ad rbetaman loj bejn.

4

¹ Nēgajc lējt bèn naj ree patron, gol been zi'c rayal con ree bèn rüjn xchiindi, gol gojc tēē benza'c con laa reeman, din lējt ragbee gual xanyabaa yu' bèn rniabee lējt.

² Gol guzusin, gol gurejdx Dios ad bal gucheeladxidi, gol badēē quixtēē lojman. ³ Gol gurejdx tēē Dios por dunujn din guixhialaman nejz din gac yatie'chan mazri xtiidx Jesucrist ni ad wayünbeet ree bejn. Abi' por ree diidx guin yu'n ladxguiib. ⁴ Gol gurejdx Dios din gac gatiechan diidx guin ree loj ree bejn zi'c rayal din gac chignia' reeman laan zagdxē.

⁵ Gol gubajñ zagdxē delant loj ree bèn ad waliladxt Jesucrist gol gunee tēē xtiidxaman loj reeman beegaj chi chu' mod. ⁶ Chi rüdi diidx, gol be diidx xnejz din yayuladx bejn ni rnieedi gagbee tēēdi xhienaag yadxi'di ni rniabdiidx reeman lojdi.

Rxhiaal ree xbejn Jesucrist xtiidx Dios

⁷ Tíquico, tijb du lasa' ree, bèn rayēn ree, bèn diidxli cayüjn naj yudar cayünan sirv loj Jesucrist, laaman gugojn lējt gra xhienaag za'n niz

guie. ⁸ Par zian caxhalan laaman din gugojnman lëjt xhienaag nadxu'n niz guie din yagu' tēēman luxdoodi. ⁹ Abi' con laagajcaman caxhalan Onésimo, tijb du lasa' ree bën rayën gajc ree, bën naban zi'c rayal, bën naj bën ladxidi. Laa reeman gugojn lëjt gra ni cayajc niz guie.

¹⁰ Aristarco, bën yu'nē'n ladxguiib, laaman rxhiaal xtiidx Dios lojdi. Nēgajc Marcw, bijchwin Bernabé rugajpdioz lëjt. Abi' ma bagojnman lëjt chunin naj Marcw, bal gui'taman guidganajman lëjt, gol baca'man zagdxe. ¹¹ Abi' nēgajc Jesús, bën la gajc Justo, rxhiaal xtiidx Dios lojdi. Loj gra ree bën Israel rililadx Jesucrist, laaz reeman cayüjn naj yudar caytie'chan xtiidx Dios abi' laaz reeman naj bën cagu' luxdon. ¹² Nē Epafras, bën ladxidi, rxhiaal xtiidx Dios lojdi. Laaman cayüjn sirv loj Jesucrist. Gra dxejczy rbejdxaman Dios por lëjt din sudxi'chidi chinalidi xnejz Dios güün tēēdi gra zi'c rēnman. ¹³ Naj ragbee zagdxe guial dád ruman xgab por lëjt, nē por ree bën Laodicea, nē por ree bën Hierápolis. ¹⁴ Lujc, doctor rayën da't ree, nē Demas, nē reeman rxhiaal xtiidx Dios lojdi.

¹⁵ Gol bagajpdioz ree dux compniar ree bën rililadx ree Jesucrist, bën zojb ree luguiedx Laodicea. Gol bagajpdioz tēē Ninfas con los demazri ree xbejn Jesucrist bën rado'p ree lidxaman. ¹⁶ Chi ma gulox biilidi gui'ch guie, dxel gol guxhaalan loj ree bën rililadx Jesucrist, bën zojb ree luguiedx Laodicea, din nē reeman gool laan. Nē gui'ch ni guxhalan loj reeman rayal yaxhaal reeman lojdi din nēgajc lëjt gool laan. ¹⁷ Abi' gol güjdx loj Arquipo din güünman cumplid ni ma bacaabee Dad Jesucrist güünman. ¹⁸ Naj Pab, quijb naj cuca lejtr guie ree par gugajpdiozan lëjt. Gol basaaladx guial yu'n ladxguiib. Dios güünle' lejt. Amén.

Gui'ch yaloj guxhaal San Pabl loj ree bén Tesalónica rlliladx Jesucrist

¹ Naj, Pab con Silvan në Timoteo, cayxhaalan gui'ch guie par lëjt najdi bén rlliladx Jesucrist luguiedx Tesalónica, dux Dad ree Dios në Dad Jesucrist güünle' lëjt yabe'cdxe tëë reeman luxdoodi.

Rudëë Pab quixtëë loj Dios

² Guixie guixie radëen quixtëë loj dux Dad ree Dios por gradi, rasaaladx tëen lëjt chi rarejdx ranaaban laaman. ³ Në zianczi chi rarejdx ranaaban laaman, nadxe'duguijcan ni ma beendi guial rlliladxidi laaman, në guial rën lasa'di, nadxe'duguijcan tëen guial cadaandi cabëzidi gui't Dad Jesucrist stijb. ⁴ Compniar raliduladx ree Jesucrist, dunujn rayagbee guial Dios rën lëjt, gulej tëëman lëjt. ⁵ Din chi baneen xtiidxza'caman lojdi, ad diidxtizi balüün lëjt, balüün lëjt con xgualrniabee xSprijt Dios abi' rayagbeen guial diidxli naj ni caynan lojdi. Lëjt ragbee xhienaag babajnan chi badxu'në'n lëjt, babajnan zian din yaguieenan lëjt yudar xhienaag guibandi.

⁶ Abi' lëjt nabandi zi'c babajnan lojdi në zi'c balüü Jesucrist, abi' por xSprijt Dios babaadi bililadxidi ni banan lojdi, majsi dád guzagdiajdi. ⁷ Zian najdi tijb ejempl par gra ree bén rlliladx Jesucrist niz Macedonia në niz Acaya. ⁸ Por lëjt bire'ch xtiidxaman ad tijbtizi luarzii ree, gra ladczi ruza't reeman xhienaag rlliladxidi Dios, xt ni'qui chetri ryaadx yaguie'chan. ⁹ Din laagajc reeman rü diidx xhienaag baca'di dunujn chi budganajn lëjt, xhie tëë naag basa'ndi ni naladxidi naj ree dios persi binalidi quijb Dios naban abi' guzuloj cayüjndi laaman sirv. ¹⁰ Rü tëë reeman diidx xhienaag cabëzidi gui't Jesucrist Xi'n Dios diidz xanyabaa, bén basbanman loj ree bengüt, Jesús bén rabëë dunuj ree loj casti ni zëëd.

2

Ni been Pab luguiedx Tesalónica

¹ Lëjt ragbee, compniar raliduladx ree Jesucrist, guial ad budganaj xlia'tzan lëjt, ² majsi lëjt ragbee guial luguiedx Filipos guna ree bejn diidxguijdx du lojn në graloj ree guialzi badëëd reeman dunujn. Per Dios baneen dunujn valor persi badün xtiidxza'caman lojdi, majsi xhietëëz raza'can por ree bén rdxe'ch dunujn. ³ Din ad baneenë'tan lëjt diidx rusquiee, o par yaguieennë'n lëjt zi'ctzi rayënan ya, o par yasquieen lëjt, ⁴ per zi'c bacaabee Dios dunujn din yaneen xtiidxza'caman guial baguiaaman zile' yaguieenan ni rayal yaguieenan, laanan naj ni radün ad par yaya'ntan zagdxe loj ree bejn, par yaya'nan zagdxe loj Dios, bén ragbee gra ni yu' luxdoo bejn. ⁵ Lëjt ragbee guial ad yu't dxej baneenë'n lëjt zagdxe naabzi par guiëndi dunujn, ache tëët guijc badxiiban din yaca'n xmiliadi. Dios ragbee guial laan naj diidxli. ⁶ Ad radiiltan guza't ree bejn dunujn zagdxe, ad radiil tëëtan guza'tidi dunujn zagdxe, o guza't ree ben ren dunujn zagdxe, ⁷ majsi guial nayajcan xiapóstol Jesucrist, raya'pan derejch yanabeen lëjt güündi xhienin par dunujn, per ad raguieentan zian. Lëjt ragbee guial benza'c bayajcan chi badxu'në'n lëjt, zi'cgajczi tijb na rusni's rnijaj tëë xi'n. ⁸ Abi' guial tant rayënan lëjt,

ad tijbtzi xtiidx Dios baneen lojdi, në dux guialnabanan bayënan naneen por lëjt, guial tant rayënan lëjt. ⁹ Abi' lëjt ragbee compniar, guial dád baguieenan dxiin. Dxej guiala baguieenan dxiin, chitëë yalu'n xchiindi guial güündi dunujn yudar yabajnan la'tgaj balüün lëjt xtiidxza'c Dios.

¹⁰ Lëjt në Dios ragbeechaaw guial chi badxu'në'n lëjt, babajnan xnejz zi'c rayal, abi' achet chile' gudxiibidi du guijcan, lëjt bën rililadx ree Jesucrist. ¹¹ Lëjt ragbee xhienaag baneen lëjt consejw, xhie tëë naag balu'n luxdoodi zi'c rüjn tijb dad con ree xi'nman. ¹² Ma banan lojdi din guibandi zi'c rayal guiban bën ma naj ree xbejn Dios, bën rbejdx lëjt din yayalidi xanyabaa lod rniabeeman.

¹³ Zeel në dunujn ad racwëëzt radëen quixtëë loj Dios, guial chi biguiejndi xtiidxaman ni banan lojdi, bidxga'di laan zi'c xtiidx Dios ad zi'ctzi xtiidx bénguixdliuj. Abi' diidx guin ree naj ni rusni xquiarguiejndi, lëjt guial rililadxidi Jesucrist. ¹⁴ Abi' lëjt compniar raliduladx ree laaman, ma guzajquidi zi'c guzac ree xbejn Dios, bën Israel zojb ree niz Judea, bën rililadx ree Jesucrist. Din zi'cgajc basagdiaj ree bën ladxidi lëjt, ziangajc basagdiaj lasa' bën Israel reeman laa reeman. ¹⁵ Abi' tëë ree bën Israel bagüjt reeman Dad Jesús, zi'cgajc bagüjt reeman bën badëed ree xtiidx Dios loj ree bejn, balaagdxa tëë reeman dunujn, ad rüjnt reeman zi'c rën Dios, abi' contzi gra bejn rdxe'ch reeman. ¹⁶ Rudxoon reeman yalüün bën ad najt ree bën Israel xhienaag gac reeman perdon, zian laagajc reeman cutioob guijc xtol reeman, abi' yan ma cadëd reeman xcastiro' Dios.

Guyën Pab nejman Tesalónica stijb

¹⁷ Compniar raliduladx ree Jesucrist, chi basa'nan lëjt tio'p choondxej, majsi ad raguaatan lëjt, per rasaaduladxan lëjt, abi' rayën nejzdoon yaguaan lëjt stijb. ¹⁸ Dád bayënan nudganajn lëjt. Naj Pab, zien volt da't guyënan nidganajn lëjt, per badxoon xindxab niajc zian. ¹⁹ Per yan sta rayënan yudganajn lëjt, din ni ralëjzan naj guial lëjt ragu' du luxdoon zagdxë. Lëjt naj dux chiinan ni rabaanë'n yubiignë'n loj Dad Jesucrist chi gui'taman stijb. ²⁰ Lëjt naj bën rabaanë'n rlies tëëdi dux valoran.

3

¹ Zeel chi badxu'n luguiedx Atenas, ad radaantran, ma rayënan yayagbeen xhienaag za'di, dxel baguieenan xgab baya'n du xtijban ni. ² Abi' baxhaal dux compniaran Timoteo, bën cayguieennë'n xchiin Dios caytie'chan xtiidxza'c Jesucrist, din yagu'man luxdoodi sudxi'chidi loj ni ma rililadxidi, ³ din ni'qui tijbidi ad zalenya't por ree gualzi ni cadëdidi, lëjt ragbee guial zian yaza'c ree. ⁴ Chi badxu'në'n lëjt, banan guial dád zien loj gualzi yadüüd ree, abi' lëjt ragbee guial laan naj ni ma gojc. ⁵ Zeel ad gudaantran, abi' guxhalan Timoteo din gagbeen xhienaag zinalidi ni rililadxidi, din rdxeban gusquiee xindxab lëjt, abi' achetri sirv nüjn ni baguieenan por lëjt.

⁶ Per yan ni ma baguaad Timoteo ni bidganajman lëjt, ma bagojnman dunujn guial zinalidi zagdxë ni rililadxidi Jesucrist në zi'c rën lasa'di. Laaman na guial zianczi yu' luxdoodi zagdxë rasaaladxidi dunujn, abi' dád ma rëndi guguaadi dunujn, zi'cgajc rayënan yaguaan lëjt. ⁷ Zeel, compniar raliduladx ree Jesucrist, majsi graloj tarbajw në gualzi caydüüdan, per dád nix yu' du luxdoon raguiejnan guial zagdxë zinalidi ni rililadxidi. ⁸ Abi' yan mazri nix ma bayu du luxdoon guial ma bayagbeen

za'dxi'chquidi loj ni zinalidi xnejz Dad Jesucrist. ⁹ Dxel xt ni'quid radxejlta xhienaag yadëen quixtëe loj Dios por lëjt, guial dád nix yu' du luxdoon lojman por lëjt. ¹⁰ Dxej guiaal radi'n ranaaban lojman din guneeman mod yudganajn lëjt, abi' lox yanan lojdi ni ryaadx gagbeedi xcwent guial rliladxidi Jesucrist.

¹¹ Dux Dad ree Dios në Dad Jesucrist gagnë dunujn din gac yudganajn lëjt. ¹² Abi' Dad Jesucrist gagnë lëjt din gusnuu guiën lasa'di mazri, guiën tëedi gra lasa' bejn di zi'c rayënan lëjt. ¹³ Laaman gagnë lëjt sudxi'chidi loj xnejz Dios din sudi naya sin dol lojman, dxej ni gui't Dad Jesucrist stijb con gra ree xbejnman.

4

Zi'c rën Dios guiban ree xbejnman

¹ Yan, compniar raliduladx ree Jesucrist, raza'can lëjt liaadx, rana tëen lojdi por laaman, guial zi'c nabandi yan zi'c ma balüün lëjt guibandi, din güündi zi'c rën Dios, gol been naguiejn gol basnuu mazri guibandi zi'c rënman.

² Din lëjt ma ragbee gra ni guxhaal Dad Jesús dunujn yanan ni güündi. ³ Ni rën Dios naj guial guibandi naya lojman, guial ad güündi nidxuudx ree con ree bën ad najt lacheelidi. ⁴ Gol gogbee guial tijbgaj lëjt rayal guibannë lacheelidi zagdxë zi'c rën Dios con respejt, ⁵ ad chu' lacheelidi naabzi par grii xgustidi zi'c rüjn ree bën ad nünbeet Dios. ⁶ Ni'qui tijbidi ad rayalt güünmaladx lasa'di, gusquiee lasa'di güündi xhie nidxuudx con lacheel reeman. Din dux Dad ree Dios zudëedaman casti gra ree bën rüjn zian, zi'c ma banan lojdi zi'c ma bagojnan lëjt. ⁷ Din Dios ad gurejdxaman dunuj ree yayajc ree xbejnman par yabajn ree nadxuudx, gurejdxaman dunuj ree par yabajn ree naya. ⁸ Zeel bën ad ridxga't ni ma banan lojdi, ad bënguidxliujtan ad ridxga'taman, Diosan ad ridxga'taman, bën razaladx xSprijt duloj ree.

⁹ Yan, xcwent guial guiën lasa'di, ad ryaadxt yanan lëjt xhienin xcwentan, din lëjt gajc ma basiid por Dios xhienaag guiën lasa'di, ¹⁰ abi' laan naj ni cayüjndi con gra dux compniar ree bën rliladx ree Jesucrist niz Macedonia. Per raza'can lëjt liaadx din gusnuu guiën lasa'di mazri. ¹¹ Gol been tëe naguiejn guibannë lasa'di zagdxë, gol guyu xgab xchiindi, zi'c ma ranan lojdi güündi dxiin, ¹² din guibandi zagdxë loj ree bën ad rliladxt Jesucrist në chitëe xhie guiyaadxidi.

Ni gac chi gui't Dad Jesucrist

¹³ Yan, compniar raliduladx ree Jesucrist, ad rayëntan guibandi sin guial gagbeedi xcwent ree bengüt, chitëe chu'nayadi zi'c ree bën ad rliladxt Jesucrist. ¹⁴ Din bal raliduladx ree guial güjtaman abi' babanman stijb, ziangajc raliduladx ree guial ree bën ma güjt, bën bililadx ree laaman, yasban Dios laa reeman por Jesucrist.

¹⁵ Zeel zi'c ma rayignia'n xtiidxaman, dunujn rana lojdi guial gra ree xbejnman, bën sta naban ree chi gui'taman stijb, ad zanedt reeman loj ree xbejnman bën ma güjt ree. ¹⁶ Din dxejzii guiguien cha' bën rniabee xhienaag gac, guiguien cha' anjl rniabee ree anjl, guiguien guibejdx xtrompejt Dios. Dxel guiat Dad Jesucrist diiz xanyabaa, abi' yaløj ree xbejnman bën ma güjt ree yaban stijb. ¹⁷ Guiáad dux compniar ree bën sta naban ree dxejzii, yadxaag ree con ree bën baban guin, dxel yo' ree

ladya loj ree zaj lod yadxaag ree Dad Jesucrist. Zian yo' ree yuchu'në' reeman tiblayaa. ¹⁸ Zeel gol bagu' luxdoo lasa'di con ree diidx guin.

5

¹ Yan, compniar raliduladx ree Jesucrist, xhie dxej gac zian o goc gac zian ya, ad rüjnt naguiejn ganinan lëjt. ² Din lëjt ragbeechaaw guial zi'cgajczi ri't tijb béngubaan guxin, chi achut rbëz laaman, zian guidxin dxej gui't Dad Jesucrist stijb. ³ Chi guiëb ree bejn: “Zagdxe zio' ree, achet gac”, dxel dxejczy gui't guialzi par laa reeman ni ad zariit reeman loj, zi'c chi rdxin hor ragnaa lën béngunaa chi ma gal xi'nman. ⁴ Per lëjt compniar, ad zëtridi loj nejzmal din guiniaaz dxej ni gui't Dad Jesucrist lëjt zi'c chi ri't tijb béngubaan. ⁵ Din graczidi ma zinal Dios, zinalidi xnejzaman, nejz nayni. Ad zunaalt ree nejz mal, nejz nacay. ⁶ Zeel ad najt guial yabajn ree zi'c tijb bénnaayëjs, zi'c rüjn los demazri ree bejn, rayal yatie'ch dux bacaal ree, yadxu' ree nadëdguiendxuj. ⁷ Bén zinal ree nejzmal zi'c tijb bénnaayëjs, zi'c tijb bengui', zian zinal reeman nejz guin. ⁸ Per dunuj ree, guial ma zunaal ree xnejz Dios, guidib tiamp naj guial yabajn ree nadëdguien. Yadxu'dxi'ch ree loj guialrliladx ni ma raya'p ree në loj ni rën Dios dunuj ree, abi' yadxu'dxi'ch tée ree në loj ni ma raliduladx ree guial ma raya'p ree perdon. Abi' zi'c tijb xin suldad yu' xcascwix ni rutëe yaya'p tée reen zi'c tijb ni gutëe dunuj ree loj ni mal ⁹ Din ad gurejdx Dios dunuj ree par yayal ree xcastiman, gurejdxaman dunuj ree din yayal ree perdon por Dad Jesucrist, ¹⁰ bén güt por dunuj ree, din majsi nabajn ree o ma bayëjt ree chi gui'taman stijb, per yo' ree yuchu'në' reeman. ¹¹ Zeel gol bagu' luxdoo lasa'di gol been tée yudar lasa'di din gagbeedi mazri xtiidx Dios zi'c ma cayüjndi.

Ni rayal güün ree bén rliladx Jesucrist

¹² Compniar raliduladx ree Jesucrist, raza'can lëjt liaadx, gol gojp respejt Bén rusiid ree lëjt xtiidx Dios, Bén rulüü ree lëjt rnieenë tée reeman lëjt xhienaaag chinalidi Jesucrist. ¹³ Gol gojc benza'c da't con laa reeman, gol guyen da't reeman por dxiin cayüjn reeman. Gol gubajnnë lasa'di zagdxe.

¹⁴ Ranaab téen lojdi compniar, gol guneenë ree Bén ad rënt güün dxiin, gol bagu' luxdoo ree Bén ralenya'në xnejz Dios, gol been tée yudar Bén ad za'dxi'cht ree loj xnejzaman, gol gojp pacens gra reeman.

¹⁵ Gol been naguiejn ad güündi ni mal Bén rüjn ree lëjt ni mal, zagdxeli gol gojc benza'c con lasa'di në con gra ree bejn. ¹⁶ Gol badxe' luxdoodi zagdxe zianczi. ¹⁷ Ad gucwëéz cwedx guiniabidi Dios. ¹⁸ Gol badëe quixtëe lojman por gra, din zian rënman güündi, lëjt najdi xbejn Jesucrist.

¹⁹ Ad rbexuudi nabee xSprijt Dios lëjt. ²⁰ Gol bidxga' ni rniee ree Bén rudëed xtiidxaman. ²¹ Yaloj xgaj gol gogbee zagdxe xhietëznin, dxel gol been ni naj zagdxe. ²² Gol gubi'ca loj gra ree ni mal.

²³ Dios, Bén rabe'cdxe luxdoo bejn, laaman gagnë lëjt din gaquidi lojman naya guidiblagaa. Laaman gagnë xcuerpidi, gagnëman xsprijtidi në guidiblagaaadi din gaquidi nayadxuj lojman dxej gui't Dad Jesucrist. ²⁴ Abi' Dios güün zian, din laaman, Bén rbejdx dunuj ree par güünman dunuj ree xbejnman, rüjn xtiidxaman cumplid.

Diidx bigra ca ree loj gui'ch guie

²⁵ Compniar raliduladx ree Jesucrist, gol gurejdx gunab Dios por dunujn. ²⁶ Gol badëë xtiidx Dios da cwentan loj gra ree compniar rliladx Jesucrist. ²⁷ Abi' por laaman, naj rni lojdi rniabee tëën lëjt: Gol biil gui'ch guie loj gra ree compniar rliladx laaman. ²⁸ Dux Dad ree Jesucrist güünle' lëjt.

Gui'ch barojp guxhaal San Pabl loj ree b́en Tesalónica rliladx Jesucrist

¹ Naj, Pab con Silvan nē Timoteo, cayxhaalan gui'ch guie par lējt rliladxidi Jesucrist luguiedx Tesalónica, lējt najdi xbejn dux Dad ree Dios nē xbejn Dad Jesucrist. ² Dux Dad ree Dios nē Dad Jesucrist güünle' lējt yabe'cdxe tēē reeman luxdoodi.

Rudēēd Pab quixtēē loj Dios

³ Guixie guixie radēēn quixtēē loj Dios por lējt compniar raliduladx ree Jesucrist, din zian rayal yaguieenan guial mazri cusnuu rliladxidi laaman, abi' tijb gajdi mazri ma rēn lasa'di. ⁴ Zeel dád nix yu' du luxdoon raza'tan lējt loj gra ree xbejn Dios, raguie'chan loj reeman pacens ni rajpidi nē guialrliladx ni rajpidi, rdaan tēēdi gra ree ni rüjmnē ree bejn lējt nē gra ree guialzi ni cadēdidi. ⁵ Zian rguien xnejz naj xguialguxtis Dios, guial gulejman lējt din yayalidi lod rniabeeman, din por laan cadēdidi guialzi.

⁶ Abi' guial gra ni rüjn Dios naj xnejz, zeel gudēēdaman casti gra ree b́en cudēēd lējt casti. ⁷ Guiáad lējt cadēdidi guialzi yan, guneeman lējt guialraziiladx con dunujn, dxej ni gulüüloj Dad Jesucrist diizd xanyabaa galay xbianiman ni naj zi'c bajl, con ree xianjlaman b́en ca' ree mazri guialrniabee. ⁸ Dxel gudēēdaman casti b́en ad bayagbeet ree Dios, b́en ad güyēnt ree nuzoob xtiidxza'c Dad Jesucrist. ⁹ Gudēēdaman laa reeman casti tiblayaa, su reeman zijt par Dios nē par xguialrniabee za'cdxoonman. ¹⁰ Zian gac dxej ni gui't Dad Jesucrist, din guza't ree bejn laaman zagdxre por ree xbejnman, yadxa tēē loj gra reeman laaman, abi' nē lējt, din ma bililadxidi xtiidxaman ni badün lojdi.

¹¹ Zeel ad racwēēzt rarejdx ranaaban Dios por lējt din gagnēman lējt guibandi zi'c rayal, zi'c guredxaman lējt guibandi. Ranaab tēēn lojman guial con xguialrniabeeman gac cumplid gra xixgabzagdxedi nē gra ni rüjndi guial rliladxidi laaman. ¹² Abi' zian guiliesidi xvalor Dad Jesucrist, guiáad laaman guilies xvaloridi guial laaman con dux Dad ree Dios rēn reeman dunuj ree.

2

Gulüüloj b́en ca' xguialrniabee xindxab

¹ Yan, compniar raliduladx ree Dad Jesucrist, xcwent guial gui'taman stijb nē guial yadxaag ree con laaman, raza'can lējt liaadx, ² ad bal tiēbidi tibrajtzi gusquiee ree bejn lējt, b́en rēb ree ma bidxin dxej gui't Dad Jesucrist. Ad guidxebidi gucaagdiajguidi zian, o na ree bejn guial tijb sprijt rēb loj reeman zian, o dunujn baxhaal gui'ch loj reeman lod raguie'chan zian. ³ Ad tiēbidi chu gusquiee lējt, din chi gad dxej guin guidxin, yalojxgaj guidxin ree dxej ni ad zuzoobtri bejn xtiidx Dios. Abi' gulüüloj tijb b́en güün ganax ni rēn xindxab, b́en ma naj par gabijl. ⁴ Laagajc laaman guilies xvalor, abi' yalenman gra ni nünbee bejn zi'c Dios nē gra ni rniajchi' bejn zi'c dios, xt cweman lēn xyadoo Dios, abi' guiēbaman guial laaman naj Dios.

⁵ Gol basaaladx guial zian rnin lojdi chi guzunë'n lëjt. ⁶ Abi' yan lëjt ma ragbee chu cutëë chitëë gulüülojman, la'tgaj guidxin dxej rayal gulüülojman. ⁷ Ma cayajc ree xgabmal guin, per yu' bën cutëë gac reen cumplid. Chi ma bisüd bën cutëë guin, ⁸ dxel gulüüloj benmal guin, abi' Dad Jesucrist con tijbzi gulüjbaman gugüjtaman laaman, dxel con xbianiman ni guidnëman gunidlojman laaman. ⁹ Benmal guin por xindxab gui'taman, abi' dád gapaman guialrniabee. Güünman zien ree ni yadxaløj ree bejn, güün tëëman zien ree milagr par gusquieeman. ¹⁰ Con graløj ree ni mal gusquieeman bën canijt ree loj Dios, guial ad guyënt reeman ad cwëjb tëët reeman nililadx reeman ni diidxli zile' nuslaa laa reeman loj dol. ¹¹ Zeel ruslaa Dios gusquiee gra ree ni guin laa reeman, abi' guililadx reeman ni ad najt ni diidxli, ¹² din yayal gra reeman casti, guial ad bililadxt reeman ni diidxli guin, din mazri bayuladx reeman been reeman ni mal.

Sudxi'ch reeman loj ni rliladx reeman

¹³ Compniar, rën Dad Jesucrist lëjt. Zianczi rayal yadëen quixtëë loj Dios por lëjt, din diizd guia'xchej ma bacaabeeman lëjt din laadi loj casti, guial ma nayadi por xSprijt Dios në guial ma bililadxi di ni naj diidxli. ¹⁴ Par zian gurejdx Dios lëjt gaquidi xbejnman chi badün xtiidzxa'c Dad Jesucrist lojdi, din yayalidi xanyabaa lod za'man.

¹⁵ Zeel, compniar raliduladx ree Jesucrist, gol guzujdxi'ch gol binal tëë ni balüün lëjt chi badxu'në'n lëjt, në ni ma banan lojdi loj gui'ch ren. ¹⁶ Abi' Dad Jesucrist gajc në dux Dad ree Dios bën rën dunuj ree, bën ragu' du luxdoo ree zianczi, bën banee tëë ni ralëjz ree guial najman benza'c, ¹⁷ laaman yagu' luxdoodi gagnë tëëman lëjt din sudxi'chidi din gra ni guinieedi güün tëëdi gac zagdxe.

3

Rën Pab cwedx guiniab reeman Dios

¹ Yan, compniar raliduladx ree Jesucrist, gol gurejdx gunab Dios por dunujn din diob guire'ch xtiidx Dad Jesucrist gralad, abi' guza't reeman xtiidxaman zagdxe zi'cgajc beendi. ² Gol gurejdx gunab tëëman din yabëëman dunujn loj ree benmal, loj ree bendxuudx ad nabant xnejz, din ad grat bejn rliladx xtiidx Dad Jesucrist. ³ Per laaman zianczi rüjn xtiidxaman cumplid, abi' laaman gagnë lëjt din sudxi'chidi, guinia tëëman lëjt chitëë güündi ni mal. ⁴ Dunujn rayagbeechaaw guial laaman cayagnë lëjt cayüjndi gusnuu tëë güündi ni banan lojdi. ⁵ Gagnëman lëjt din guiëndi bejn ree zi'c rën Dios laa reeman gap tëëdi pacens zi'c gojpp Dad Jesucrist pacens.

Rüjn naguiejn güün bejn dxiin

⁶ Yan, compniar raliduladx ree Jesucrist, por laaman ranabeen lëjt: Gol bariica loj chutëëz compniar gaz za' ad rënt güün dxiin, bën ad naban tëët zi'c balüün lëjt. ⁷ Din lëjt ragbee xhienaag guibandi din guibandi zi'c nabajnan. Dunujn ad badxu'në'tan lëjt sin guial naguieenan dxiin, ⁸ achu tëët banee xlia' ni badaawan. Lëjt ragbee guial dád baguieenan naguiejn baguieenan dxiin, dxej guiaal baguieenan dxiin chitëë yalu'n xchiindi guial güündi dunujn yudar din gac yabajnan. ⁹ Majsij zajc nanabeen lëjt nüjndi dunujn yudar, per baguieenan dxiin par yalüün xhienaag rayal guibandi güündi zi'c raguieenan. ¹⁰ Chi badxu'në'n lëjt,

ranan lojdi: Bén ad rënt güün dxiin, ad zajw gajctaman. ¹¹ Per yan baguiejnan guial yu'di gaz za' ad rëntidi güüندی dxiin, abi' rudi loj ni ad rayaltidi. ¹² Par bén zii ree dunujn rana ranabee tēēn laa reeman por Dad Jesucrist yabedxe reeman, güün reeman dxiin din guiban reeman.

¹³ Guiáad lējt compniar, ad yalenyá'di güüندی ni naj zagdxe. ¹⁴ Bal yu' tijbidi ad ruzoobt diidx guial güüندی ni ranan loj gui'ch guie, gol baguiaa chu benan, ad guchajg tēēdi laaman din yatu lojman. ¹⁵ Per ad guguaadi laaman zi'c tijb bén rdxe'chidi, gol baguiaaman zi'c tijb bijchidi, gol guneenēman din guibanman zagdxe.

Diidx bigra ca ree loj gui'ch guie

¹⁶ Dad Jesucrist bén rabe'cdxe luxdoo bejn, laaman yabe'cdxe luxdoodi guixie guixie nē loj gra. Laaman sunē lējt.

¹⁷ Naj, Pab, quijb naj cuca ree lejtr guie par gugajpdiozan lējt. Zian rünan con gra ree da gui'chan, zian naj ree da lejtran. ¹⁸ Dad Jesucrist güünle' gradi.

Gui'ch yaløj guxhaal San Pabl loj Timoteo

Rugajpdioz Pab Timoteo

¹ Naj Pab, najn tijb xiapóstol Jesucrist por xguialrniabee Dios bén rüjn perdon dux tol ree në por Jesucrist bén rayagbee ree gui't stijb. ² Cuccan gui'ch guie par lüj Timoteo, din par naj lüj naj zi'cgajc da xi'nan guial tiblojzi raliduladx Jesucrist. Dux Dad ree Dios në Dad Jesucrist güünle' lüj, yayaman lüj yabe'cdxe tëëman luxdool.

Rëb Pab loj Timoteo xcwent ree bén rusquiee

³ Zi'c rnin lojl chi briin za'n niz Macedonia, guial yaya'n'l guiedx Éfeso din nabeel tio'p choon ree bejn ni chitëë ruluü reeman bejn ree ni ad najt diidxli. ⁴ Ad chililadx reeman ni rbëëguicj ree bejn, ad guidxga' tëë reeman ban za reeman, o chu rajc reeman xbengol gual reeman, din ad ni guint ree gagnë laa reeman par gusnuu chililadx reeman xtiidx Dios.

⁵ Canabeen lüj din güün reeman zian din guiguien guial diidxli rën lasa' reeman, achet naladx reeman din guiguien tëë guial guidib luxdoo reeman rililadx reeman xtiidx Dios. ⁶ Din yu' reeman ad rüjntri zian guial ganax ree ni ren ni ad rüjnt ree sirv rü reeman. ⁷ Rën reeman gulüü reeman bejn ree xhienaag naj xley Dios, abi' ni'qui laa reeman ad ragbeet xhie rën guiëb ni rnïee reeman ni'quid rignia't reeman ni naladx reeman naj zagdx culüü reeman bejn ree.

⁸ Dunuj ree rayagbee guial zagdx naj ley guin par bén rignia' xhie sirv rüjnan. ⁹ Abi' rayagbee ree guial ad baneet Dios ley guin par ree bén naban xnejz niz lojman, baneeman ley guin par tëd ree bejn casti, bén naban ree zi'ctzi naj xixgab reeman, bén ad ruzoobt ree diidx, bén ad yu'guijct ree Dios, bén rüjn ree dol, bén ad rajpt ree Dios respejt, bén ad rüjnt ree nagueijn guiën reeman Dios, bén rugüjt xdad xnïaa, në par gra ree bén rugüjt bejn, ¹⁰ rüjn tëën sirv par xcasti ree bén za'në xinguaaaw o béngunaa ren, par ree xin ruladx lasa' xinguaaaw gajc o béngunaa ruladx lasa' béngunaa gajc, në par ree bén rban bejn ree par guto' reeman laa reeman zi'c mojs, nëtëë par ree bén rusquiee në ree bén ruza't Dios par sudxi'chnë xguialrusquiee reeman në par gra ree bén rüjn xcontr ni naj diidxli. ¹¹ Diidxli guie ree naj ni zëed ree loj xtiidxza'cdxoon Jesucrist. Dux Dad ree Dios, bén rayal respejt, laaman naj bén basa'nnë naj diidx guin ree din gatiechan laa reen.

Xhienaag baya Dios Pab

¹² Quixtëë Dad Jesucrist laaman cayagnë naj, rajp tëëman naj confianz abi' bacaabeeman naj par gatiechan xtiidxaman, ¹³ majsi yaløj gunen laaman diidxgujdx abi' guzunaalan bén rililadx ree laaman din günan laa reeman ni mal abi' dád naya bennë'n laa reeman. Per Dios bayaman naj guial ad bignia'tan ni cayünan din gad naj chililadx Jesucrist. ¹⁴ Abi' dád benza'c gojcaman con naj, balüüman naj xhienaag chililadxan balüü tëëman xhienaag guiënan Dad Jesucrist.

¹⁵ Diidxli ni ganin lëjt, rayal chililadx bejn: guial Jesucrist bi't loj guidxliuj par güünman xtol bejn perdon, abi' loj gra ree bejn naj naj mazri bëndol. ¹⁶ Per majsi najn mazri bëndol, baya Dios naj abi' gojcp Jesucrist naj pacens din gagbee ree bén chililadx xhienaag rajp Jesucrist

pacens par chililadx bejn xtiidxaman, abi' zian gap reeman guialnaban tiblayaa con Dios. ¹⁷ Zeel zianczi rayal yaya'p reeman respetj yaza't tēē reeman zagdxē guial najman rey bēn ad yu't dxej guiēt, abi' rajpaman guialrniabee par tiblayaa guial tijbzi laaman naj Dios abi' achut rajc ruguiaa laaman. Amén.

¹⁸ Timoteo, par naj lūj naj zi'c da xi'nān zeel rnin lūj been zi'c guneē reeman xcwentil diidz yaløj, abi' zi'c tijb suldad ni rej loj wadijl ad guidxebil niz loj ree bēn za' ree contr xtiidx Dios. ¹⁹ Guzudxi'ch loj ni rililadxil Jesucrist, been tēē ganaxzi ree xgab zagdxē par gūūnl zi'c rayal. Din yu' ree bejn guial ad rūjnt reeman zian, yan ma banijt reeman ni rililadx reeman Dios. ²⁰ Zian ma guzajc ree Himeneo con Lejandr, zeel ma bayūn laa reeman loj satanās din gusiid reeman guial ad rayalt guinieē reeman Dios diidguijdx.

2

Xhienaag cwedx guiniab bejn Dios

¹ Yaløjdoō ni rnin lojdi naj guial cwedx guiniabidi Dios, cwedx guiniabidi laaman por gra ree bēnguidxliuj, gudēēd tēēdi quixtēē lojman. ² Rayal yarejdx yanaab ree Dios por ree rey nē por gra ree guxtis loj guidxliuj din chile' yabajn ree zagdxē gusnuu tēē yabajn ree zi'c rēn Dios. ³ Din laan naj ni zagdxē ni rayuladx tēē dux Dad ree Dios, bēn rūjn perdon dux tol ree, ⁴ bēn rēn guial gra bejn gac perdon guidxin tēē dxej gagbee bejn xhie rēn guiēb xtiidxliman. ⁵ Din tijbzi laaman naj Dios, abi' por tijbzi Jesucrist zile' yaya'p ree nejz par loj Dios guial bi'taman loj guidxliuj zi'cgajc tijb bēnguidxliuj. ⁶ Gūjtaman loj crūjz persi gudijxaman por xtol gra ree bēnguidxliuj, zian naj ni balūū Dios bejn chi bidxin dxej bacaabeeman gac zian. ⁷ Zeel bacaabeeman naj gacan xi apóstol Jesucrist din gatiechan xtiidxaman, nē par gusidan bēn ad najt ree bēn Israel conin naj diidxli, xhie tēē naag chililadx reeman Jesucrist, walīn ad rusquieetan.

⁸ Yan rēnan guial guidibczi cwedx guiniab ree xinguaaaw Dios, guilies yaa reex con guidib luxdoo reex sin dol, sin guialrdxe'ch nē sin wadijl. ⁹ Rēn tēēn guial ree bēngunaa su reeman zi'c rayal, ad tēdlaj suchaaw reeman con or, nē ree perl nē ree vistid zagdxē o guial tēdlaj gūūnchaaw guidxguijē reeman. ¹⁰ Din mazri zagdxē gūūn reeman ni naj zagdxē, zi'c rayal gūūn ree bēngunaa ni ma zinal xnejz Dios. ¹¹ Abi' rayal gucaagdiajgzi reeman ache guinieē reeman chi rulūū ree xinguaaaw xtiidx Dios. ¹² Din ad zatiēēbtan guial gulūū tijb bēngunaa bejn ree chi radxaag lasa' reeman par gucaagdiajg reeman xtiidx Dios, ad rayalt nabee bēngunaa xinguaaaw, rayal gucaagdiajgzaman. ¹³ Din Dios, yaløj Adán beenchaawaman, dxelri Eva. ¹⁴ Din ad Adánt basquieē reeman, yaløj Eva basquieē reeman, abi' por guialrusquieē guin beenman dol. ¹⁵ Per zajc gac bēngunaa perdon, bal gūūn xchiinman zagdxē guial najman na, bal gusnuu chililadxaman Dios, guiēnman bejn ree guiban tēēman xnejz.

3

Xhienaag guiban ree bēn rniabee

¹ Gol badxe'guijc da diidxan: Bal chu Bén rën gap guialrniabee loj gra ree Bén rliiladx Jesucrist par gulüüman laa reeman xnejz Dios, zagdexequi naj ni rënman güünman. ² Per Bén rajp guialrniabee guin rayal güünman zi'c rayal chitëe chu guinieeguijdx laaman. Rayal chu' tijbzi lacheelaman, guibanman zagdex chu' tée xquiargueijnman din gap ree bejn laaman respejt. Gacaman benza'c con ree Bén rdxin lidxaman, gac téeëman tijb Bén rignia' par gulüüman bejn ree. ³ Ad rayalt gacaman bengu', ni'qui Bén rguuil wadijl ad rayal téeë yaguiilaman mod par tia'man xmilia ree bejn, rayal gacaman benza'c con chutëëz, gac téeëman Bén naxanladx ad zazëëbladx téeëëman milia. ⁴ Rayal nabee lidxaman zi'c rayal ðin gulüü ree xi'nman xhienaag gap reex respejt guzoob téeë reex diidx. ⁵ Din bal id rajc rniabee lidxaman, ¿xhieza naag nabeeman Bén rliiladx ree Jesucrist? ⁶ Zeel tijb Bén qui guzuløjri rliiladx Jesucrist, ad rayalt nabeeman loj ree Bén ma rliiladx chitëë guilies xvalor gajcaman abi' yayalaman lasa' casti ni bayal xindxab. ⁷ Bén rajp guialrniabee guin xt ree Bén ad rliiladxt Jesucrist rayal güünbee laaman guial najcaman benza'c chitëë yaya'nxtuman abi' güün xindxab laaman gan.

Ni güün ree Bén rüjn yudar Bén rniabee ree

⁸ Yan ziangajc ree Bén ma cwabee par güün reeman yudar Bén rniabee ree, rayal güün reeman zi'c rayal ðin gap ree bejn laa reeman respejt, güün cumplid xtiidx reeman, ad guië' téeë reeman, ad yaguiil téeë reeman mod par tia' reeman xmilia ree bejn. ⁹ Con xgabza'c chinal reeman ni ma balüü Dios dunuj ree. ¹⁰ Zeel yaløjxgaj rayal gac reeman prueb abi' bal id xhie xfalt reeman, dxel ma zile' guzuj bejn laa reeman ðin güün reeman yudar Bén rniabee ree. ¹¹ Ziangajc ree Béngunaa ni ma cwabee par güün reeman yudar, rayal güün reeman zi'c rayal ðin gap bejn laa reeman respejt ad zaneeguijdx reeman bejn, rayal guiban reeman zagdex abi' güün cumplid xtiidx reeman. ¹² Abi' ree xinguaaaw cwabee guin par güün reex yudar Bén rniabee loj ree xbejn Cristo, tijbzi lacheel reex rayal chu', nabee téeë lidx reex con xi'n reex zi'c rayal. ¹³ Din Bén rüjn ree sirv zi'c rayal ad respejtzi rajp bejn laa reeman, sin guialrdxeb ma zile' guiëëb reeman xhienaag rliiladx reeman Jesucrist.

Naroob naj Bén raliiduladx ree

¹⁴ Gagnë Dios chile' guialan guidganan lüj. Per cucan gui'ch guie, ¹⁵ ðin bal gaglaan ma ragbeel xhienaag guiban bejn ðelant loj los demasri ree xbejn Dios, Bén ma naj ree xbejn Dios naban, abi' za'dxi'ch reeman rulüü téeë reeman xtiidxliman. ¹⁶ Dunuj ree rayagbee guial ðád Bén naroob najman, Bén raliiduladx ree:
Bi'taman loj guidxliuj zi'c tijb Bénguidxliuj,
rëb xSprijt Dios guial laaman naj Bén naya
abi' baguiaa ree anjl laaman bi'taman loj guidxliuj.
Bre'ch xtiidxaman loj ree Bén ad najt Bén Israel,
guidibczi bililadx bejn laaman abi'
baca' Dios laaman xanyabaa.

4

Bén rusa'n ree guialrliiladx reeman Jesucrist

¹ Ma bagojnchaaw xSprijt Dios guial zëëë ree dxej ni yu' ree bejn gusa'n guialrliiladx reeman Jesucrist, mazri guidxga' reeman xtiidx ree

bénrusquiee në gra ree ni zëed por xindxab. ² Mazri guidxga' reeman bénrusquiee ree, bén wed rüjnz ree, bén achetri ree rzajc guial rüjn reeman dol din ma naya' reeman zian. ³ Guiëb reeman guial ad najt guial guxhliia ree bejn ad zajw tëët reeman graloj. Per Dios badxe' graloj guialraw par gaw ree bén rliladx laaman, bén ma ragbee ree conin naj diidxli abi' gudëed reeman quixtëe lojman. ⁴ Din gra ni badxe' Dios naj zagdxë, achet ni rayal cwexuu bejn tia'man bal gudëëman quixtëe chi cayawaman laan. ⁵ Din chi rarejdx ranaab ree Dios con xtiidxaman rüjnle'man guijc ni yadaaw ree.

Bén rüjn sirv zagdxë loj Jesucrist

⁶ Zeel bal rulüül bén rliladx ree Jesucrist zi'c ma rnin, dxel cayünquil sirv Jesucrist zi'c rayal, abi' zian gusunuu gusiidil mazri guial loj ni ma rajquil xcwent guialrliladx guin në ree diidzxa'c ni zinalil. ⁷ Per ad guidxga'l ni rbëëguijc ree bejn, ni ad najt ree diidxli por Dios, mejorli basnuu basiid sudxi'chil guibanl zi'c rën Dios. ⁸ Zagdxë naj par güün bejn graloj ejercijs par gacaman gojl, per loj gra xhietëëznin mazri lasajc guiban bejn zi'c rën Dios. Din ad lojtzi guidxliuj guie güün sirv guial naban bejn zi'c rën Dios, nëgajc xanyabaa lod gap bejn guialnaban tiblayaa. ⁹ Dunuj ree rayagbee guial ni diidxli naj ree diidx guie, abi' rayal chililadx gra bejn laan. ¹⁰ Zeel majsì cayza'can ni cayza'can, per cayguieenan ni cayguieenan guial raliduladxan Dios naban, bén naban par güünman yudar gra ree bejn, per mazri bén rliladx ree laaman.

¹¹ Zian rayal gusiidil bejn ree güjdx tëë loj reeman din güün reeman zian. ¹² Gojp cudad chitëë guiëb ree bejn guial achet sirv lüj guial ad wayajctil bengol. Mejorli been naguiejn din gaquil tijb ejempl par ree bén rliladx Jesucrist, zi'c xhienaag rül diidx, zi'c nabanl, zi'c rënl ben ren ree, zi'c rliladxil Dios nëtëë por ree xixgabza'quil. ¹³ La'tgaj gualan, basnuu biil xtiidx Dios loj ree bejn, guneenë reeman balüü tëë reeman xhie rën guiëb xtiidx Dios. ¹⁴ Ad yayanladxil güünl zi'c rayal güünl por quiarguiejn ni banee Dios lojl chi badxiib yaa ree bengol guijquil chi gogbee reeman guial lüj naj bén gule Dios.

¹⁵ Badxe'guijc diidx guie ree din gagbee gra ree bejn guial cusnuu zël delant. ¹⁶ Gojp lüj con ni rusiidil bejn ree. Guzujdxi'ch loj ni ma ragbeel, zian yabëë lüj gajc loj casti yabëë tëël bén cucaagdiajg ree xtiidxil.

5

Xhienaag güün Timoteo con ree bén rliladx Jesucrist

¹ Ad tilnël tijb bengol, badëëman consejw zi'cgajc xdadil, abi' xin naj ree xinguiag, badëë reex consejw zi'cgajc bijchil. ² Ziangajc béngunaa bengol ree badëë reeman consejw zi'cgajc xniaal, abi' biinguiag ree, badëë reem consejw zi'cgajc bizanl con xgabza'c.

³ Bidxga' ree béngunaa bizëjb ni diidxli achut rajp. ⁴ Per bal tijb béngunaa bizëjb guin yu' ree xi'n o xiajg, dxel yalaj laa reex gusiid guidxga' xfamil, güün reex yudar din yaguijx reex ni baslaa xdad xniaa reex laa reex. Din zian naj zagdxë, zian tëë ruladx Dios. ⁵ Béngunaa naj diidxli bén bizëjb, bén ad rajptri chunin loj guidxliuj guie, tijbzi Dios naj bén yu'guijcaman güün laaman yudar dxel ad rucwëëzt rbejdx rniabaman laaman dxej guiaal. ⁶ Per tijb béngunaa bizëjb ni rüjn ni rëntzi, laaman naj zi'c tijb bengüt guial ad yu'guijctaman Dios. ⁷ Bagojn gra ree diidx guie bén ma

rliladx ree Jesucrist chitëe chu guinieeguidx laa reeman. ⁸ Din bén ad rüjnt yudar xcompniar, abi' ni'qui xfamilaman bén zobj ree lidxaman ad rüjntaman yudar, laaman ma basa'n ni rliladxaman abi' piorli najman guial loj ree bén ad rliladxt Jesucrist.

⁹ Ad tia'l laj chutëez béngunaa bizëjb par gac reeman yudar, naabzi ree béngunaa bizëjb bén ma nadëd ree gayojn ijz abi' ad guzunëtaman ben ren la'tgaj naban lacheelaman. ¹⁰ Bal nünbee tëe ree bejn laaman guial beenman ganax ree ni rüjn sirv, bal baslaa ree xi'nman zi'c rayal, bal badëe lidxaman baya'n ree bejn bal gojcaman benza'c con ree bén rliladx Jesucrist bén bidxin ree lidxaman, bal beenman yudar bén rzagdiaj ree, bal been tëëman nagueijn beenman ganax ni zagdxë.

¹¹ Per ad tia'l laj ree béngunaa bizëjb benguiag ree, din despuejs rën reeman guxhliaa reeman abi' ad rüjntri reeman ni rayal güün reeman por Cristo guial rën reeman guxhliaa reeman stijb. ¹² Dxel rüjn reeman dol guial ad rüjntri reeman ni ma been reeman compromis con Cristo. ¹³ Abi' tëe ree benguiag guin zë reeman yu yu, zianz rajc reeman costumbr achetzi rüjn reeman. Abi' ad laatzan, rzuloj ruza't reeman bejn, ru reeman loj xhietëeznin abi' rniee reeman ni ad rayalt guiniee reeman. ¹⁴ Zeel rënan guial bén naj ree béngunaa bizëjb benguiag, mejorli guxhliaa reeman stijb, chu' xi'n reeman nabee tëe lidx reeman zi'c rayal, chitëe gudëed reeman mod guinieeguidx ree bén ralen ree dunuj ree laa reeman. ¹⁵ Din yu' ree béngunaa bizëjb ma guro'nladx reeman xnejz Dios abi' ma zinal reeman xnejz xindxab.

¹⁶ Abi' bal tijb bén rliladx Jesucrist naj xfamilaman tijb bén baya'n bizëjb, dxel laaman rayal güün yudar béngunaa bizëjb guin chitëe gacan mazri carg par ree dux compniar ree bén rliladx ree Jesucrist. Zian güün reeman yudar béngunaa bizëjb diidxli achutri rajp loj guidxliuj guie.

¹⁷ Bén rliladx ree Jesucrist rayal gap reeman respejt bén rniabee laa reeman në ree bén rniee rulüü tëe xtiidx Dios zi'c rayal, gudëe tëëdi loj reeman gra ni ryaadx reeman. ¹⁸ Din loj xtiidx Dios rëb: “Ad gudxe'di guijxh ro' ree begui'xh la'tgaj cayüjn reeb dxiin”, rëb tëe loj xtiidx Dios: “Rayal gax bén rüjn dxiin”.

¹⁹ Ad guidxga'di ni rudxiib ree bejn guijc tijb ree bén rniabee ree bén rliladx Jesucrist, bal id yu' tio'p choon ree bejn rëb guial diidxli naj ni rniee reeman por laaman. ²⁰ Per bal tijb bén ma ca' gualrniabee rusnuu rüjnman dol, rayal guinieenël laaman delant loj gra reeman din guidxëb los demazri reeman.

²¹ Yan por Dios, por Jesucrist në por ree anjl ni ma gulejman, naj rni badxe'guijc been tëe zi'c ma rnin ad cwel loj ree bejn, tiblojzi been con gra reeman. ²² Gojp cudad cwel tijb bén ni nabee din ad ragbeetil bal yu' ni mal cayüjnman, dxel güün ree bejn xgab guial nëgajc lüj ruladx ni cayüjnman. Gojp cudad graloj ree dol.

²³ Në guial guië't guië't ragxuu lënl guial ad nadaant lënl, ad rë'l nijs lagajzi mejorli gu' tibda'n vin.

²⁴ Yu' reeman laa rguien gajc xhie dol cayüjn reeman diidz chi gad reeman gudëed cwent loj Dios, per yu' reeman ad rguient xhie dol cayüjn reeman xt chi yadëed reeman cwent loj Dios. ²⁵ Ziangajc yu' ree bén ni laa rguien gajc ni zagdxë ni cayüjn reeman, abi' yu' reeman ni'quid rguient ni zagdxë ni cayüjn reeman, per yu' dxej gagbee ree bejn laan.

6

¹ Gra ree mojs rayal gap reeman respejt xpatron reeman chitëë chu guinee diidxguijdx contr Dios o contr xtiidxaman ni caylүүn. ² Abi' bal rliladx patron guin Jesucrist dxel rayal gap reeman laaman mazri respejt guial nēman rliladx Jesucrist zi'cgajc laa reeman. Abi' tēë rayal güün xchiin reeman zi'c rayal guial cayūjn reeman sirv tijb xcompniar reeman bēn rliladx Jesucrist compniar ni rēn reeman. Zian balүү ree bejn güjdx tēë loj reeman din güün reeman zian.

Guialnaza'c ni naj diidxli

³ Bal yu' bēn rulүү diidx ni ad najt zi'c xtiidxza'c Dad Jesucrist ni'qui zi'c raliduladx ree Jesucrist ad rulүүtaman bejn ree, ⁴ najzaman bendxal. Din ruladxaman tildiidxaman abi' ni'quid xnejzt rnieeman, dxel ni zēëd guialnadēdloj, guial rdxe'ch, guial rniee diidxguijdx abi' ad rliladxtri lasa' reeman, ⁵ ad rucwēēzt rdil reeman por ree ni ad rüjnt sirv ni yu' guijc reeman guial ad ragbeet reeman ni naj diidxli, dxel naladx reeman guial chililadx reeman Jesucrist ma gac reeman ben rijcw. Bēn naj ree zian, biquied loj reeman. ⁶ Dad ben rijcw naj bejn chi ma rliladxaman Jesucrist, per bēn za' conform con ni rajptzaman. ⁷ Din achet budnē' ree loj guidxliuj ache tēët zajc yunē' ree chi yayējt ree. ⁸ Bal raya'p ree ni yadaaw ree nē lajd ni yadojt ree con laan rayal yaya'n ree conform. ⁹ Per ree bēn rzēēbladx gac reeman rijcw loj guidxliuj guie ad rilet' sudxi'ch reeman, laa rüjn gajc xindxab laa reeman gan. Mazri rüjn reeman xgab ni ad rüjnt sirv abi' rüjn reeman ni ad rayalt güün reeman ni rüjn persi rnijt reeman. ¹⁰ Din guial rzēēbladx milia laan naj xliuj gra ni mal. Abi' yu' reeman por guialrzēēbladx guin ma basa'n reeman ni rliladx reeman Dios abi' laagajc reeman cusagdiaj laa reeman.

Ni rayal güün Timoteo

¹¹ Per lüj Timoteo, xbejn Dios, briica loj ree ni mal guin. Been naguiejn guibanl zagdxe, guibanl zi'c rēn Dios, bililadxaman, gojc bēn naxanladx, gojp pacens guyēn tēë ree ben ren. ¹² Been da't naguiejn guzudxi'ch loj ni rliladxil xtiidx Jesucrist. Ad gusēēbil guialnaban ni naj guialnaban tiblayaa, din par zian gulejman lüj abi' rēbil delant loj zien ree bejn xhienaag rliladxil Jesucrist. ¹³ Yan, por Dios bēn razaladx guialnaban loj gra ni yu' loj guidxliuj nē por Jesucrist bēn ni guneen sin guialrdxeb loj Poncio Pilato, naj rniabee lüj ¹⁴ din guzobil diidx güünl ni rnin lojl, sin guial guchaal xhienin chitēë guiēb ree bejn guial ad cayūjntil xnejz. Zian been xt dxej ni gui't Dad Jesucrist stijb. ¹⁵ Gui'taman dxej ni nabee Dios gui'taman, Dios bēn rayal respejt bēn naj tijbzi Dios rajp tēēman gra guialrniabee, bēn naj xrey ree rey naj tēēman xDad ree dad. ¹⁶ Bēn ni ad yu't dxej guiēt, Bēn ni za' lod mazri nayni lod achut zajc chibig. Ni'qui tijb bēnguidxliuj ad waguiaat laaman ad zajc tēët guguaa bejn laaman. ¡Par laaman naj respejt nē guialrniabee par tiblayaa! Amén.

¹⁷ Bēn naj ree benrijcw loj guidxliuj guie, güjdx loj reeman ad güün reeman benro' ad cu'guijc tēë reeman guial ni rajp reeman najn par tiblayaa, din guialnaza'c ni rajp bejn yu' dxej yaran. Mejrli cu'guijc reeman Dios bēn naban din laaman razaladx da't dunuj ree graloj din chu' du luxdoo ree nix. ¹⁸ Güjdx loj reeman din güün reeman ni zagdxe, güün reeman zien ree ni rüjn sirv, cu' tēë luxdoo reeman zagdxe güün reeman yudar bēnprob ree. ¹⁹ Abi' zian guto'p reeman guialnaza'c ni

güün laa reeman yudar loj ree dxej ni zëed din yayal reeman guialnaban tiblayaa xanyabaa.

Xconsejw Pab

²⁰ Timoteo, badxe'guijc ni rayal güünl, Ad guidxga'l diidxdxuudx ree xcwent ree ni ad rüjnt ree sirv, ni'qui ree diidx rusquiee, ni'qui ree diidx ni rü ree bén ni naladx guial rajc da't reeman abi'za ad walit ni rajc reeman. ²¹ Din yu' ree bén rüjn zian yan, abi' ma basa'n reeman guialrliladx reeman Dios.

Dios güünle' lüj Timoteo. Amén.

Gui'ch barojp guxhaal San Pabl loj Timoteo

Rugajpdioz Pab Timoteo

¹ Naj Pab, najn tijb xi apóstol Jesucrist, Dios gule naj din gatiechan diidx por promejs ni beenman guial gudëédaman guialnaban tiblyaa loj ree bén riladx Jesucrist. ² Naj caxhal gui'ch guie par lüj Timoteo bén rënan zi'c da xi'nän. Dux Dad ree Dios con Dad Jesucrist güünle' lüj, yayaman lüj, yabe'cdxe tëëman luxdool.

Guialrulüü xcwent Jesucrist

³ Dxej guiaal chi rbedx rniaaban Dios, rusaaladxan lüj, abi' rudën quixtëe loj Dios, bén rünan sirv con guidib luxdon zi'c been ree da bengol gulalan been reeman laaman sirv. ⁴ Chi rusaaladxan ni biinl, ma rën nejzdoon guguan lüj din yayu luxdon zagdxe. ⁵ Yu'guican guial lüj diidxli riladxil Jesucrist, yaloj xnaxüjsil Loida con xniaal Eunice bililadx laaman zian, zeel ragbeechaawan guial ziangajc riladxil laaman.

⁶ Zeel rnin lojl, been naguiejn din guiguien quiarguiejn ni banee Dios lojl chi badxib yan guijquil. ⁷ Din ad baneet Dios xSprijtaman duloj ree par yadxeb ree, banee xSprijtaman par yadxu'dxi'ch ree, par yayën du lasa' ree, në par yaya'p ree tijb quiarguiejn zagdxe. ⁸ Zeel ad yatul guinieel xtiidx Dad Jesucrist, ad yatu nëtëël naj yu'n ladxguuib por laaman, con xyudar Dios gudaan guialzi ni rayal tédil guial guitie'chil xtiidxza'c Jesucrist. ⁹ Din Dios ma beenman perdon dux tol ree abi' ma gulejman dunuj ree din yabajn ree zi'c rënman, ad por ni baguient ree, diidx chi gad guidxliuj gacchaaw beenman xgab guial por Jesucrist gulüüman dunuj ree xhienaag rënman dunuj ree. ¹⁰ Yan bi't Jesucrist bén güt por dux tol ree, rayagbee ree guial diidxli rën Dios dunuj ree. Abi' Jesucrist naj bén biquied guialrniabee loj guialgüjt abi' zian biguien guial yu' guialnaban, guialnaban tiblyaa par ree bén riladx xtiidxaman.

¹¹ Zeel gulej Dios naj din gacan xi apóstol Jesucrist, din ganen xtiidxaman gulü tëën laan bén ad najt ree bén Israel, ¹² abi' por zian cadëëdan guialzi ni cadëëdan. Per ad ratutan por zian, din naj ragbee chu riladxan, abi' ragbeen guial laaman rajp guialrniabee par cu'chaawaman ni basa'nän lojman xt dxej ni gui'taman stijb.

¹³ Badxe'guijc binal tëë ree diidxza'c ni ma balün lüj, tant zi'c riladxil Dios në zi'c rën ree lasa'l guial ma nayajc ree tijbzi con Jesucrist. ¹⁴ Abi' con xyudar xSprijt Dios bén naban con dunuj ree, gojp ni banee Dios güünl.

¹⁵ Lüj ragbee guial gra ree bén zojb niz Asia ma gulëëladx reeman naj, loj reeman no'ch Figelo con Hermógenes. ¹⁶ Dios gagnë ree xfamil Onesiforo, din laaman dád zien volt bagu'man luxdon. Abi' ad batunëtaman naj yu'n ladxguuib, ¹⁷ naabzi bi'taman Rom baguuilaman naj xt lodzi badxejlaman naj. ¹⁸ Abi' lüj ragbee guial dád beenman dunuj ree yudar chi badxu' ree Éfeso. Xi nix chi gui't Dad Jesucrist stijb, yaya da'taman laaman.

2

Zi'c tijb xsuldad Jesucrist

¹ Guiáad lüj xi'ngaan, guzujdxi'ch loj yudar ni raya'p ree por Jesucrist. ² Abi' ni bigueijnl rën delant loj zien ree bejn, balüün loj ree bén diidxli rliiladx, bén ni zajc gulüü ree ben ren.

³ Zi'c tijb suldadza'c, zian gudaan ree guialzi, zi'c najl xbejn Jesucrist. ⁴ Ni'qui tijb bén naj suldad ad rut loj ni ad najt xcwent ree suldad par chile' yaya'nman zagdxe loj bén rniabee laaman. ⁵ Ziangajc bén ni rguijt xhie tijb nin, rayal quitaman xnejz din chile' tia'man prem. ⁶ Abi' bén rüjn dxiin dajñ, yaloj xgaj rüjn da'taman dxiin din gac yaca'man guialnaza'c. ⁷ Been xgab ni canin lojl, abi' Dad Jesucrist gagnë lüj din chignia'l gra. ⁸ Basaaladx Jesucrist, bén güt abi' babanman, bén zëed loj xdiaa rey Davi, zian naj xtiidxza'caman ni catiechan. ⁹ Abi' por zian cadëedan guialzi, xt naxiin lën ladxguiib zi'c tijb benmal, per xtiidx Dios ad naxiitan. ¹⁰ Zianan zeel rdaanan gra par gūnan yudar bén ni ma naj ree par Dios, din gap reeman perdon por Jesucrist yayal tëe reeman guialnaban za'cdxoon ni naj par tiblyaa.

¹¹ Waliqúi ree diidx ni rëb:

Bal ma bayëjt ree con laaman,
ziangajc yabajn ree con laaman.

¹² Bal radaan ree xhietëez ni raza'c ree,
ziangajc yanabee ree con laaman.

Bal raguie'ch ree guial ad naguieenbeet reeman,
ziangajc guiëbaman guial ad nünbeetaman dunuj ree.

¹³ Bal id raguieen ree cumplid dux tiidx ree,
per laaman rüjn cumplid xtiidxaman
din ad zajct guidxaa zi'c najman.

Tijb bén raya'n zagdxe con xchiin

¹⁴ Gūjdx loj ree bejn din gusaaladx reeman ni guie ree, abi' por Dios gūjdx loj reeman guial ad rdildiidx reeman por ree ni ad rüjnt yudar, ruxhiinzan bén ni rigueijn ree laan. ¹⁵ Been xt lod chile' güünl din yaya'nl zagdxe loj Dios, din chibiguil lojman zi'c tijb bén ni rüjn dxiin abi' achet ni gustu laaman, guial cayüjnl xnejz con xtiidx Dios. ¹⁶ Ad gūl diidx ni ad rüjnt sirv, ni ad rüjnt yudar bejn ree. Din bén rüjn ree zian zi'cri zinal reeman nejz mal, ¹⁷ abi' xtiidx reeman naj zi'c tijb guialguijdx ni rigaa. Lasa' ree bén guin naj Himeneo con Fileto, ¹⁸ din ad zinaltri reeman zi'c naj xtiidx Dios. Rëb reeman guial xcwent guial yaban ree bengüt mal gudëd gojc zian, abi' rüjndxa reeman xguialrliiladx tio'p choon ree bejn. ¹⁹ Per xtiidx Dios ad zajct guidxan zi'c tijb guiaj ni zojbdxi'ch. Abi' loj xtiidx Dios rëb: “Dios nünbee bén naj ree xbejnman”, rëb tëe loj xtiidxaman: “Graczi ree bén rëb guial nünbee reeman Dios rayal gusa'n reeman gra ni mal.”

²⁰ Lën tijb yu narooob, ad ganaxt ree ni or yu' o ni plajt, nëgajc ree ni goc con yag në con bajn yu'. Din yu' reen rüjn sirv guixie guixie, yu' tëe reen ma naj dxej rüjn reen sirv. ²¹ Yan ziangajc bén ni rüjn naguieejn guiban naya, laaman naj zi'c ni rüjn sirv chi rajc xhienin, laaman ma naj xbejn Dad Jesucrist në ni güün sirv par laaman, din za'man par gūnman gra ni naj zagdxe.

²² Zeel basa'n xixgab xinguiag, xgab ni ad rüjnt sirv, gubajn xnejz. Binal guialrliiladx, guialrën lasa' në guial yabedxe luxdoo con los demasri ree bén ni con guidib luxdoo rbejdx rniab Dad Jesucrist. ²³ Ad tildiidxil

por tijb ni ad zÿntil gan, o por tijb ni ad lasajct par tildiidxil, din lÿj ragbee guial por zian rzuloj wadijl. ²⁴ Abi' tijb bn ni rÿjn sirv Dad Jesucrist ad rayalt gacaman bn ruladx wadijl, rayal gacaman benza'c con chutz, rayal gacaman tijb bn ni gac gulÿ ree bejn, gacaman bn pacens ²⁵ guzuxnejz tman con ree diidxzagdxe bn ni rÿjn ree xcontr ni naj diidxli. Abi' rupent zian gÿn Dios guial yayÿjn reeman xgab din gagbee reeman ni naj diidxli. ²⁶ Par laa reeman loj xtramp xindxab ni rniabee laa reeman gÿn reeman ni rnman.

3

Xhienaag gac ree bejn dxej ni bigra ree

¹ Rayal t gagbeel Timoteo guial dxej ni bigra ni zd ree, dd nawg gacan par ree bejn guial guiban reeman. ² Din bejn ree, par laagajc reeman gÿn reeman xgab, ganaxzi milia gÿn reeman xgab, abi' gÿn reeman benro', ganax ree diidxdxal guinee reeman, guinieeguijdx reeman Dios con ree bejn. Ad zuzoobtri xtiidx ree xdad reeman o xniala reeman, achetri yayuladx reeman, ad zidxga'tri reeman ni naj por Dios, ³ ad zntri reeman ad zaya ttri reeman bejn ree. Ganax diidx rusquiee guinee reeman bejn ree, ad zucwzt gÿn reeman ni dxuudx ree, dd bn nayaaladx gac reeman, abi' guidxe'ch reeman ni naj zagdxe. ⁴ Yayÿ reeman laagajc ree bn ni rajp laa reeman confians, sin gualrdxeb guinee reeman xhietz ni gui't guijc reeman, dd guilies xvalor reeman, mazri ma gÿn reeman ni rntzi reeman guial loj zi'c rn Dios. ⁵ Gulÿ guial dd benyadoo naj reeman, per ni'quid zaliladxt reeman xgualrniabee Dios.

Ad guchajguil bn ni naj ree zian. ⁶ Din loj reeman no'ch bn ni ru ree lidx ree bejn, abi' rÿjn reeman gan bngunaa ni naban ree con gadxagayaa ree dol, con gadxagayaa ree xgab ni ad rÿjnt sirv, tibrajtzi rililadx reeman laa reeman ⁷ bngunaa guin ree zianczi rusiid reeman, per ad ragbeetzi reeman ni diidxli. ⁸ Gulal bn ni brii ree laj Janes con Jambres been xcontr reeman Moisejs. Yan ziangajc naj ree bn ni za' ree contr ni naj diidxli, laa reeman ma guxin xquiarguejn reeman, ad zinaltri reeman zi'c rayal chililadx reeman. ⁹ Per ad xchejt gÿn reeman zian, din gra ree bejn gagbee guial rusquiee reeman zi'c goc con Janes n Jambres.

Rniabee Pab sudxi'ch Timoteo loj ni basiidaman

¹⁰ Per lÿj Timoteo, ragbeel zagdxe xhie rulÿn bejn ree, xhienaag nabanen, xhienaag naj da xgaben, xhienaag rililadxan, xhienaag ra'pan pacens, xhienaag rnan bejn ree, xhienaag rdaanan, ¹¹ xhie ma been ree bejn naj, xhie t ree gualzi ma guddan. Lÿj ragbee xhienaag guza'can luguiedx Antioqua, Iconio con Listra. Dd ma guzaagdiajn por gra ni ma been ree bejn naj, per Dios bab naj loj gra ree gualrzagdiaj guin. ¹² Abi' dunuj ree rayagbee guial gra ree bn ni rn guiban zi'c rn Dios gualrlililadx reeman Jesucrist, naj sagdiaj reeman por ni gÿn ree bejn laa reeman. ¹³ Per ree ben mal con ree bn rusquiee, zi'cri zinal reeman nejz mal, rusquiee reeman bejn ree rusquiee t laagajc reeman.

¹⁴ Per lÿj basnuu guzudxi'ch loj ni ma basiidil, n loj ni ma rililadxil, din lÿj ragbee chu ree nin basiid lÿj. ¹⁵ Abi' lÿj diidx xindool nÿnbeel xtiidx Dios, diidx ni zile' gÿn lÿj yudar gagbeel xhienaag naj perdon ni zd

por guialrliladx Jesucrist. ¹⁶ Gra ni zëed loj xtiidx Dios, por Dios zëedan. Abi' rüjnan sirv par gusiid bejn bejn ree, par gudëe bejn consejw, par guzuxnejz bejn bejn ree, në par gagbee bejn xhienaag rayal guibanman, ¹⁷ din gagbee xbejn Dios guidiblagaa din güünman graloj ni naj ni zagdxe.

4

¹ Delant loj Dios në delant loj Jesucrist, bën gui't zi'c tijb rey par güünman guialguxtis loj ree bën naban në loj ree bën ma güjt, naj rni lojl, ² gutie'ch xtiidx Dios. Been naguiejn gunee xtiidxaman ad chi yu'tzi mod. Been naguiejn chililadx ree bejn ni rnieel, gudilë ree bën ad ruzoobt diidx, badëe tëe consejw loj ree bejn, balüü reeman sin guial yalenyal'. ³ Din zadxin dxej ad zatiëjbt ree bejn gucaagdiajg reeman ni naj diidxli, ma güün reeman zi'ctzi rën reeman, zaguuil reeman zien ree bën gulüü laa reeman ganax ni ruladx reeman gucaagdiajg reeman. ⁴ Ad zidxga'tri reeman ni naj diidxli, mazri ma guidxga' reeman ni rbëëgüijc ree bejn. ⁵ Per lüj Timoteo, gubajn nadëdguien, gudaan xhietëez guialrzagdiajg tëdil, gutie'ch xtiidxza'c Jesucrist, been mandad ni banee Dios lojl güünl.

⁶ Din naj zamer gugüjt reeman naj, ma zidbig guialgüjt par naj. ⁷ Ma guzudxi'chan loj xtiidx Dios majsi guza'can ni guza'ctzan, ma gulox benan ni rayal günan abi' ad basa'ntan ni rliladxan. ⁸ Yan prem ni rayalan ma cabëzan naj, prem ni gunee Dad Jesucrist lon chi guidxin dxej, bën rüjn guialguxtis zi'c rayal. Abi' ad lotzan gunee man prem guin, në loj gra ree bën yu' luxdoo nix cabëz reeman laaman.

Ni rayal güün Timoteo

⁹ Been naguiejn diob guidganajl naj, ¹⁰ din Demas ma guro'nladxaman naj guial mazri ruladxaman ni yu' ree loj guidxliuj, zeel zëman niz Tesalónica. Abi' Crescente ma zëman niz Galacia guiáad Tito zëman niz Dalmacia. ¹¹ Tijbzi Lujc za' con naj. Chi gui'til tanë Marcw din zile' güünx yudar gutie'chix xtiidx Dios. ¹² Tíquico ma guxhalan laaman luguiedx Éfeso. ¹³ Chi gui'til tanë da cajpan ni basa'nan luguiedx Troas lidx Carpo, në ree da libran tanë ad yayanladx tëel guidnël da gui'ch reen.

¹⁴ Lejandr bën naj herrer, dád zien ree ni mal ma beenman naj, per con Dios yaguixxaman gra ni beenman. ¹⁵ Gojp cudad con laaman, din laaman dád rüjn xcontraman ni ranee ree.

¹⁶ Yaloj chi guzun loj ree guxtis achutctzi been naj yudar, graczi reeman guro'nladx naj. Gagnë Dios ad zidxga'taman ni been reeman. ¹⁷ Per Dad Jesucrist been naj yudar banee tëëman naj gojl persi baloox gutiechan xtiidxaman, persi biguiejn ree gra ree bën ad najt bën Israel laan. Zian baslaa Dios naj, zi'c rliaa tijb bejn loj beedx. ¹⁸ Abi' Dad Jesucrist, laaman yabëe naj loj gra ni mal, laaman guinia naj xt chi guidxin dxej guidxinan lod canabeeman xanyabaa. ¡Par laaman naj respejt gra tiamp në zianctzi! Amén.

Diidx bigra ca loj gui'ch guie

¹⁹ Bagajpdioz Prisca në Aquila në ree xfamil Onesíforo. ²⁰ Erasto baya'nman Corinto, guiáad Trófimo ragxuuman basa'nan laaman luguiedx Mileto. ²¹ Been naguiejn guda chi gad tiamp nayaag gui't. Eubulo, Pudente, Lino, Claudia në los demasri ree bën rliladx Jesucrist rugajpdioz reeman lüj.

²² Dad Jesucrist gagnë lüj, abi' Dios güünle' gradi. Amén.

Gui'ch guxhaal San Pabl loj Tito

Rxhiaal Pab xtiidx Dios

¹ Naj Pab cayünan Dios sirv, naj najn xiapóstol Jesucrist par günan yudar bën ma naj ree par Dios xhienaag chililadx reeman laaman din gagbee tää reeman diidxli xhienaag guiban reeman delant loj Dios, ² din yu'guijc ree guial zian yaya'p ree guialnaban tiblayaa delant loj Dios. Diisd chi gad guidxliuj gacchaaw, rëbaman guial yazaladxaman guialnaban guin, abi' dunuj ree rayagbee ree zagdxe guial ad rnieet Dios diidx rusquiee. ³ Abi' chi bidxin dxej ni gule Dios guial gogbee ree bejn xtiidxaman laaman balüü xtiidx, abi' naj bayal catiechan xtiidxza'caman laan naj ni guxhaalaman naj günan, bën ni rüjn dux tol ree perdon. ⁴ Cücan gui'ch guie par lüj, Tito, guial najl zi'c da xi'nän guial tiblojzi raliduladx Jesucrist. Dux Dad ree Dios con Jesucrist bën güt por dux tol ree, yaya reeman lüj, güünle' reeman lüj yabe'cdxe tää reeman luxdool.

Dxiin ni been Tito guiedx Creta

⁵ Naj basa'n lüj niz Creta din güünl ni ryaadx günan ni. Abi' tijbgaj luguiedx gucaabeel bën ni nabee ree loj ree xbejn Cristo zi'c ma rnin. ⁶ Chi gucaabeel laa reeman rayal gucaabeel bën ni naban ree zi'c rayal chitää chu guinieeguijdx laaman, bën ni yu' tijbzi lacheel, rililadx tää ree xi'nman Jesucrist, bën ni nünbee ree bejn guial ad nabant ree xi'nman zi'ctzi rën reex ad najt tää reex xin rusagloj. ⁷ Din bën rajp guialrniabee loj ree xbejn Cristo, lojman riga' gra ni naj por Dios, zeel rüjn naguiejn guibanman zi'c rayal. Ad rayalt güünman xgab guial tijbzi ni guiëbaman güün sirv, ad rayalt gacaman bënralenya', ad rayalt gacaman bengü', ni'qui ben ruladx wadijl, ad zagüül täätaman mod xhienaag tia'man xmilia ree bejn. ⁸ Rayal gacaman bën ni gudää lidx yaya'n ree bejn chi rüjnän naguiejn, bën ruladx güün ganax ni zagdxe, gac tää nabee laagajcaman. Rayal gacaman benza'c, guibanman zi'c rayal delant loj Dios nää delant loj ree bejn, ad rayalt guibanman zi'ctzi rënman. ⁹ Rayal chinalaman diidxli ni ma basiidaman, din chile' gusiidaman bejn ree diidxza'c guin ree din guzuxnejz tääman bën ni rnieeguijdx ree xtiidxli Dios.

¹⁰ Din dád zien ree bën ad ruzoobt diidx yu'. Ganax diidx rusquiee rniee reeman abi' rusquiee reeman bejn ree, abi' loj ree bën Israel ni rulüü ley loj reeman no'ch mazri lasa' ree ben guin. ¹¹ Lasa' ree bën guin ad rayaltri yatiëëb ree gulüü reeman bejn ree, din dád zien ree yu ma beendxa reeman gra tijb famil guial rulüü reeman laa reeman ni ad rayalt naabzi par güün reeman gan milia.

¹² Tijb gajc bën ladx reeman bën rëb reeman naj bën badää xtiidx Dios loj ree bejn, laaman rëb guial ree bën Creta ganax diidx rusquiee rniee reeman, dád nadoxh reeman, dád bën nala naj reeman abi' achetctzi rën reeman güün reeman. ¹³ Abi' waliman, zeel gudilë reeman con diidxdoxh din chile' chinal reeman xtiidx Cristo zi'c rayal, ¹⁴ ad guidxga'ri reeman ni rbëëguijc ree bën Israel, ad güün teë reeman ni rniabee ree bën ni ma guro'nladx ree ni naj diidxli.

¹⁵ Bén naya ree xquiargueijn, achet xgab mal rüjn reeman. Per ree bén rüjn ganax xgabdxuudx, bén ad riladxt, achetczi xgab zagdxe rüjn reeman guial ad nayat xquiargueijn reeman, ganax ree xgab mal yu' guijc reeman. ¹⁶ Laa reeman rëb guial nünbee reeman Dios, per rëbzi reeman din ad rüjnt reeman ni rën Dios. Dád bendxuudx naj reeman rusagloj tëe reeman, ni'qui tijb ni rüjn sirv ad rajct rüjn reeman.

2

Ni rayal gulüü Tito

¹ Per lüj Tito, balüü ree bejn gra zi'c tal naj xtiidxa'c Dios. ² Balüü ree bengol din guiban reeman zagdxe, gustëdguien reeman din gap bejn laa reeman respejt, guidib luxdoo reeman chililadx reeman, guiën reeman bejn ree, taan tëe reeman xhietëez ni sac reeman. ³ Ziangajc ree béngunaa bengol rayal guiban reeman zi'c rayal guiban ree xbejn Cristo. Ad rayalt gü reeman xtiidx bejn, ad gac reeman bengu'. Rayal gulüü reeman bejn ree xhienaag naj ni zagdxe, ⁴ rayal gulüü reeman béngunaa guiag ree din guiën lacheel reeman con xi'n reeman, ⁵ din guiban tëe reeman naya delant loj Dios, nadëdguien, guinia lidx reeman, gac reeman benza'c guzooob tëe reeman xtiidx lacheel reeman chitëe chu guinieeguijdx xtiidx Dios.

⁶ Ziangajc lüj Tito, badëe consejw loj ree xinguaiaaw guiag din guiban reex nadëdguien. ⁷ Been naguiejn din güünl gra xnejz din guguaiaa reex xhienaag güün reex ni naj zagdxe. Chi rulüül laa reex, balüü reex zagdxe zi'c rayal, ⁸ con ganax ree diidx zagdxe chitëe xhie gudxiib ree bejn guijquil, din yaya'nxtu ree bén ni rdxe'ch dunuj ree guial achet yadxelj gudxiib reeman duguijc ree.

⁹ Badëe tëe consejw loj ree bén naj ree mojs din guzooob gra xtiidx xpatron reeman, gac reeman benza'c ad yadxi'ro' reeman. ¹⁰ Ad cwan reeman xhie xieen xpatron reeman, gac reeman bén confians din guguaiaa gra ree bejn xhienaag naban reeman guial niza'cdxoon naj xtiidx dux Dad ree Dios bén rüjn dux tol ree perdon.

¹¹ Abi' Dios ma balüüman plact rënman dunuj ree, abi' guial rënman dunuj ree ziele' gac gra ree bejn perdon. ¹² Guial rënman dunuj ree rayagbee ree guial rayal yasa'n ree ni mal con ree ni ad rüjnt sirv ni rayën ree yaguieen ree loj guidxliuj guie, din yabajn ree nadëdguien, zi'c rayal, zi'c rën Dios yabajn ree loj guidxliuj guie ¹³ la'tgaj caylëjz ree dxej za'cdxoon ni gac cumplid xtiidxa'caman zi'c ma naman duloj ree guial gui't dux Dios ree Dad Jesucrist con xguialrniabeeman, bén been perdon dux tol ree. ¹⁴ Laaman gü't por dunuj ree din yabëeman dunuj ree loj gra dol abi' basiaman dunuj ree din yayajc ree xbejn zaman abi' yaguieen ree naguiejn yaguieen ree ganax ni zagdxe.

¹⁵ Gra ni ma rnin lojl balüün laa reeman sin guialrdxeb badëed reeman consejw, bazuxnejz reeman con guialrniabee ni ca'l. Ad tiëbil gusagloj reeman lüj.

3

Ni rayal güün ree bén riladx Jesucrist

¹ Basaaladx reeman din güün reeman ni rëb ree bén rniabee laa reeman në ni rëb ree guxtis, gac reeman bén nacaagdiajg susin tëe reeman par güün reeman ni naj zagdxe. ² Ad guinieeguijdx reeman bejn

ree, ad quuil reeman wadijl, gac reeman benza'c në bënchaawlax con chutëez bēnan.

³ Gocli nëgajc dunujn baguieenan zi'ctzi bayēnan, ad bazoobtan diidx, badxu'n loj nejz mal, baguieenan ni bayēntzan në zi'ctzi naj dux xgaban. Baguieenan ganax ni ad najt zagdxe, bayajcan bēn nadēdloj, bidxe'ch ree bejn dunujn abi' badxe'ch gajcan laa reeman. ⁴ Per chi bidxin dxej dux Dad ree Dios bēn baguijx por dux tol ree, balüüman loj ree bejn guial najman benza'c rēn tēēman bejn. ⁵ Laaman been dux tol ree perdon, per ad guial baguieent ree xhie ni rüjn sirv, guial bayaman dunuj ree. Laaman basia dunuj ree yan ma nayajc ree naya delant lojman, abi' por xSprijtaman ma raya'p ree guialnaban cüb. ⁶ Por Dad Jesucrist bēn baguijx por dux tol ree, Dios bazaladx dunuj ree zro' da't xSprijtaman. ⁷ Dxel zic'gajc laaman ma nulabaman dunuj ree sin dol guial najman benza'c, yayal ree guialnaban tiblyaa ni ralēz ree.

⁸ Laan naj diidxli. Zeel rēnan gusnuu gugojnl diidx guie ree bēn ni rililadx ree Dios din güün reeman naguiejn güün reeman ni naj zagdxe. Abi' nine ree naj ni zojbloj në ni güün sirv par gra ree bejn. ⁹ Per ad guidxga'l diidx ni ad rüjnt ree sirv ni rniee ree bejn, ad guidxga'l xtiidx ree bēn ni ru ree xgab mazri chunin naj diidxli xdiaa gulal ree bejn. Ad guidxga' tēēl bēn ni rdildiidx ree por xley Moisejs, din ad najtan ni zojbloj achet tēēt lasajc ni rniee reeman, achetzi sirv rüjn ree ni guin.

¹⁰ Bal por tijb lējt rzuloj rlia' lasa' ree xbejn Cristo, guneenēman tib volt o tio'p volt, abi' bal id ruzoobaman xtiidxil mejorli babēēman lojdi. ¹¹ Din lüj ragbee guial lasa' ree bēn guie ma guro'nladx reeman ni naj diidxli abi' laagajc reeman cunijt laa reeman por xtol reeman.

Ni rayal güün Tito

¹² Chi gaxhalan Artemas o Tíquico lod zojbil, been da't naguiejn tagnaj naj luguiedx Nicópolis, din ni ma benan xgab gadēēdan tiamp nayaag. ¹³ Been tēē yudar Apolos në licenciad Zena zi'ctzi gaquil. Badēē gra ni ryaadx reeman din chinal xnejz reeman chitēē xhie guiyaadx reeman. ¹⁴ Nē ree dux compniar ree rayal gusiid güün ni naj ni zagdxe, güün reeman yudar chi rüjn naguiejn güün reeman yudar chitēē guiban xlia'zi reeman.

Diidx bigra ca ree loj gui'ch guie

¹⁵ Gra ree bēn za' con naj rugajpdioz reeman lüj. Bagajpdioz sii gra ree bēn rēn dunujn por guialrililadx ni raya'pan. Dux Dad ree Dios güünle' gradi. Amén.

Gui'ch guxhaal San Pabl loj Filemón

¹ Naj Pab, yu'n ladxguuib guial rtiechan xtiidx Jesucrist. Naj, në Timoteo raxhaalan gui'ch guie par lüj Filemón, nayajc ree compniar ratie'ch ree xtiidxaman, lüj ragbee rayën da'tan lüj. ² Raxhaal tëen gui'ch guie par gra ree bën rlliladx Jesucrist bën rado'p ree lidxil, në par Apia nètëe par Arquipo, bën naj dux compniar ree caytie'ch ree xtiidx Jesucrist. ³ Dux Dad ree Dios në Dad Jesucrist güünle' lëjt yabe'cdxe tëe reeman luxdoodi.

Rudëe Pab quixtëe loj Dios por Filemón

⁴ Beegaj chi rbedx rniaaban Dios rudën quixtëe lojman por lüj, ⁵ din ma cwa'n ruson guial dád rën rlliladx tëel Dad Jesús dád rën tëel gra ree bën ma naj xbejn Dios. ⁶ Rniaab tëen lojman guial lüj cayüjnl dunujn yudar par yatie'ch ree mazri xtiidx Jesucrist, gusnuu gagbeel gra ni zagdxë ni raya'p ree guial ma nayajc ree tijbzi con Jesucrist. ⁷ Dád nix yu' luxdon rabaa tëen guial rën dux compniar ree bën rlliladx ree Jesucrist, din por lüj bijch ma bayu luxdoo reeman zagdxë.

Rniee Pab por Onésimo

⁸ Zeel majsi ra'pan guialrniabee par ganin conin rayal güünl guial najn tijb xi apóstol Jesucrist, ⁹ per guial rayën du lasa', zagdxeli rniaaban lojl, naj Pab, ma najn tijb bengol abi' yan yu'n ladxguuib guial rtiechan xtiidx Jesucrist, ¹⁰ rniaaban lojl por Onésimo, bën naj zi'c da xi'nan guial ma bililadxaman xtiidx Jesucrist ni ben lojman lën ladxguuib guie.

¹¹ Gocli achet sirv been Onésimo lüj, per yan zi'c rüjnman naj sirv ziangajc güünman lüj sirv. ¹² Yan caydxi'n laaman lidxil, gunajchi'man zi'c rniajchi'l naj. ¹³ Guyënan nizujman con naj din nünman naj yudar luar lüj, la'tgaj yu'n ladxguuib guial rtiechan xtiidx Jesucrist. ¹⁴ Per ad guyëntan nünan xhienin sin xtiidxbeel din xhietëez favor güünl por naj ad züjntilan naguiejn, güünlan guial guiënl. ¹⁵ Bal brii Onésimo lidxil tiblädëd, per gojc zian din chile' sunëman lüj tiblyaa, ¹⁶ per ad zi'ctri tijb mojs, mazri zagdxë guial loj tijb mojs, zi'c tijb bijchil bën rën. Dád rënan laaman, per lüj rayal guiënl laaman mazri ad zi'ctzi tijb bejn, rayal guiënl laaman zi'c tijb bijchil por Jesucrist.

¹⁷ Yan bal walil nayajc ree compniar por Jesucrist, baca' Onésimo gunaladx naj gajcan. ¹⁸ Bal yu' xhie beenman lüj, o bal yu' xhie ralaman lojl, naj yaguix laan. ¹⁹ Abi' naj Pab, quijb naj cuca diidx guie ree: Naj yaguixan, majsi ruluü ad rüjnt naguiejn ganin lojl din gusaaladxil guial xt xguialnabanl ralil lon. ²⁰ Yan been naj favor guin guial rën l Jesucrist, zian bagu' luxdon guial nayajc xbejn Jesucrist.

²¹ Naj caxhal gui'ch guie lojl abi' ragbeechaawan guial guzoobil da diidxan, ragbee tëen guial mazri naj ni güünl guial loj ni canin lojl. ²² Been tëe porvinid lënu lidxil lod yaya'nan, din zi'c cabejdx canabidi Dios, ragbeen tiëbaman guidganan lëjt.

Diidx bigra ca ree loj gui'ch guie

²³ Epafra, bën yu'në'n ladxguuib guial ratie'chan xtiidx Jesucrist, rugajpdiozaman lüj. ²⁴ Nëgajc Marcw, Aristarco, Demas në Lujc, bën cayüjn

gajc ree naj yudar caytie'chan xtiidx Jesucrist në reeman rugajpdioz lüj.
25 Dad Jesucrist güünle' lëjt.

Gui'ch par ree bén Hebreos

Ma gunee Xi'n Dios xtiidx xDadaman

¹ Tiamp gulal, Dios guneenë ree dux béngulal ree zien volt në gadx-agayaa mod por ree bén badëë xtiidx Dios loj ree bejn, ² per yan ma guneenëman dunuj ree por Xi'nman. Dios been gra ni yu' xanyabaa në loj guidxliuj por Xi'nman. Abi' gra basa'n loj Xi'nman. ³ Laaman naj xbacha' za'cdxoon Dios, laaman naj zi'cgajczi naj Dios. Abi' laaman naaz gra ni yu' por guialrniabee ni rajpaman.

Xi'n Dios naj mazri bén zobjloj guial loj ree anjl

⁴ Zianan zeel laaman naj mazri bén zobjloj loj ree xianjl Dios din laaman naj quijb Xi'n Dios. Chi gulox guzajcaman ni guzacaman par yayajc ree naya por dux tol ree, dxel gurejman xanyabaa xladbee xDadaman Dios bén rajp gra guialrniabee ⁵ Din ad yu't dxej rëb Dios loj ree anjl:

Lüj naj da xi'nan,

abi' diizd yan gulün guial lüj naj da xi'nan.

Achut tëët loj anjl rëbaman:

Naj gac Xdadil, abi' lüj gac da xi'nan.

⁶ Per chi guxhaal Dios Xi'nman loj guidxliuj, Xi'nman bén rajp guialrniabee zi'cgajc laaman, dxel rëbaman:

Gra ree da anjlan,

gol guyën da Xi'nan, gol gojp tëëman respejt.

⁷ Abi' chi gunee Dios por ree anjl, rëbaman:

Naj rün ree da anjlan zi'c bi, rün tëën laa reeman zi'c bajl.

⁸ Per por Xi'nman rëbaman:

Dad Dios, xguialrniabeel naj par tiblayaa,

abi' guidib tiamp nabeel zi'c rayal.

⁹ Lüj ruladxil ni naj zagdex

abi' rdxe'chil ni mal.

Zeel Dios bén naj xDiosil

baneeman lüj mazri guial rabaa guial loj gra ree bén za'nël.

¹⁰ Rëb tëëman:

Dad, diizd yaloj lüj been guidxliuj në xanyabaa

con gra ni yu' loj reen.

¹¹ Gra reen yu' dxej nit reen,

per lüj ma nabanl tiblayaa.

Gra reen yayox zi'c tijb lajd,

¹² gusie'til laa reen zi'c rusie't bejn xabaman,

abi' zuchaal laa reen zi'c ruchaa bejn xabaman,

per lüj ad yu't dxej guidxaa zi'c najl

abi' zianczi gapil guialnaban.

¹³ Ad yu't dxej rëb Dios loj tijb ree xianjlaman:

Gurej da ladbeen xt günan gan nabeel bén rdxe'ch ree lüj.

¹⁴ Din gra ree anjl naj sprijt cayünj ree sirv loj Dios, abi' rxhiaalaman laa reeman din güün reeman yudar bén ni gap ree guialnaban tiblayaa delant loj Dios.

2

Ad yasa'n ree diidx ni yabëë dunuj ree loj dol

¹ Zeel rüjn naguiejn yayidxga' ree xtiidx Dios ni ma bacaagdiajg ree chitëë yasa'n ree xnejzaman ni ma zunaal ree. ² Din zi'c goc cumplid gra xtiidx Dios ni gunee ree anjl diidz gocli, bén ad bazoobt diidx, bén been ree dol, laa reeman bayal casti ni rayal reeman. ³ ¿Xhieza naag laa ree loj casti bal në dunuj ree ad zayidxga't xtiidx Dios ni rugojn dunuj ree par yayajc ree perdon? Awa laagajc Dad Jesucrist bagojn xcwent perdon guin diidz yaloj, abi' ree bén biguiejn laan, laa reeman bagojn dunuj ree. ⁴ Yan zi'c ma cwa' bejn guialrignia' rent guialrignia' ren por xSprijt Dios zi'c naj xixgabaman, abi' por ree sen në ree milagr con los demazri ree ni radxaloj bejn, zian ma balüü Dios guial ni diidxli naj ree diidx guin.

Jesucrist rabëë bejn loj dol

⁵ Dios ad badëëtaman guialrniabee loj ree xianjlaman par nabee reeman lod yaya'p ree guialnaban cüb ni cayza't ree, ⁶ din yu' tiblajt loj xtiidx Dios lod rëb bejn:

Dios, ¿chu naj bénguidxliuj zeel rusaaladxil laaman?

¿Chu naj xi'n bénguidxliuj zeel rüjnl xgab por laaman?

⁷ Guyu tijb tiamp ni baletil xi valoraman guial loj ree anjl.

Per despuejs ma beenl laaman bén zojbloj,

badëël guialrniabee lojman din nabeeman gra ree ni beenchaawil,

⁸ abi' gra basa'nl lojman.

Chi badëë Dios guialrniabee lojman par nabeeman gra, achetczi ni baya'n ni ad zanabeetaman majsi dunuj ree sta ad cayguiaat ree guial nabeeman gra. ⁹ Per dunuj ree rayagbee guial guyu tiamp ni balet Dios xvalor Jesús guial loj ree anjl. Yan ma ca'man guialrniabee abi' rajp bejn laaman respetj por guialzi ni gudëdaman chi gütaman por gra bejn, abi' zian gojc guial rën Dios dunuj ree.

¹⁰ Por Dios yu' gra, abi' laaman rniabee gra ni yu', abi' rënman chu' zien ree xi'nman xanyabaa. Zeel por guialzi ni gudëd Jesucrist bayaaloj bazoobaman xtiidx Dios, abi' tijbzi por laaman ma zajc yaya'p ree perdon. ¹¹ Bén ma naya ree delant loj Dios, por Jesucrist naya reeman. Abi' tant Jesucrist tant ree bén ma naya por laaman, tijbzi Dios naj xdad reeman. Zeel ad ratut Jesucrist rëbaman loj reeman: Da bichan. ¹² Zi'c ca tib lajt loj xtiidx Dios lod rëb:

Gün diidx loj ree da bichan xcwentil,

abi' chi yadxaag lasa' reeman golan

cant ree ni guza't lüj zagdxe.

¹³ Rëb tëëman:

Tijbzi Dios yu'guican gagnë naj;

abi' rëbaman:

Laa naj guie con ree da xi'n nan xin bazaladx Dios naj.

¹⁴ Abi' zi'c bénguidxliuj tibloj najman rejn con bëël, ziangajc gojc Jesucrist chi bi'taman loj guidxliuj persi gojc güjtaman, abi' por xguialgüjtaman beenman gan loj guialrniabee ni gop xindxab loj guialgüjt. ¹⁵ Zian beenman persi babëëman bejn ree loj guialnadxeb xieen guialgüjt, bén ni guidib tiamp ni naban reeman rdxeb reeman guialgüjt zi'c rdxeb bejn xpatronman. ¹⁶ Din laaman ad bi'ttaman loj guidxliuj par gagnëman anjl ree, bi'taman par gagnëman bén naj ree xdiaa Abraham. ¹⁷ Zeel gojcaman zi'cgajczi bénguidxliuj, persi bidxin

dxej gojcaman tijb bixhioz zobjloj delant loj Dios, bixhioz ni raya bejn, bèn rüjn tëë cumplid xtiidx Dios persi gojc gudijxaman por xtol ree bejn. ¹⁸ Abi' guial laagajcaman guzagdiaj been tëë xindxab guial ad zuzoobtaman xtiidx Dios, zeel laaman zajc gagnè ree bèn ni cayüjn xindxab naguiejn güün reeman dol.

3

Jesús naj mazri bèn zobjloj guial loj Moisejs

¹ Zeel compniar, lëjt guial ma najdi xbejn Dios, lëjt guial ma bacaabee-man lëjt par gaquidi xi'nman, gol badxe'guijc Jesucrist guial laaman naj bixhioz zobjloj, bèn raliduladx ree, bèn guxhaal Dios loj guidxliuj. ² Din Jesucrist bazoobaman xtiidx Dios bèn bacaabee laaman zi'c bazoob Moisejs xtiidx Dios delant loj ree bèn Israel. ³ Per mazri rayal Jesucrist respejt guial loj Moisejs guial mazri zobjlojman, zi'c tijb bèn ni rüjn yu mazri ruza't reeman laaman zagdxe guial loj yu guin. ⁴ Gra yu yu'czi tijb bèn rüjn laan, per Dios laaman been gra ni yu'. ⁵ Abi' Moisejs bazoobaman xtiidx Dios, beenman sirv lojman chi badëëdaman xtiidxaman loj ree bèn Israel persi bagojnman laa reeman ni rëb Dios. ⁶ Per Jesucrist guial najman Xi'n Dios, laaman rniabee loj gra ree xbejn Dios. Abi' dunuj ree nayajc ree xbejn Dios bal yasnuu yadxu'dxi'ch ree loj ni raliduladx ree laaman sin guial yaleny'a' ree abi' yalëöz ree xt dxej bigra.

Gol guzujdxi'ch loj xnejz Dios

⁷ Zeel, zi'c rëb xSprijt Dios:

Bal rucaagdiajguidi xtiidx Dios yan dxej,

⁸ ad cwexuudi zi'c been ree bèn ad bacaagdiajgt xtiidxaman chi been reeman laaman prueb chi guzu reeman loj yujbidx.

⁹ Abi' yagaj naj lod ad bacaagdiajgt ree xbëngulalidi xtiidx Dios majsi baguiaa reeman milagr ni beenman delant loj reeman loj tiuu ijz niz loj yujbidx.

¹⁰ Zeel bidxe'ch Dios bèn guin ree, abi' rëbaman:

“Xgab ren rüjn reeman, ni'quid rüjnt reeman naguiejn din gagbee reeman xhienaag rënan güün reeman.”

¹¹ Zianan zeel bidxe'ch Dios abi' rëbaman guial ad yu't dxej gap reeman xguialraziiladx Dios.

¹² Zeel gol gojp cudad compniar raliduladx ree Jesucrist, chitëë chu' tijbidi guial por xixgab malidi ni rudxoon chililadxidi, guibi'cadi loj xnejz Dios bèn naban. ¹³ Mejorli guixie guixie gol guneenë gol badxe' tëë luxdoo ree lasa'di naga yu' tiamp, chitëë ad zuzoobtridi xtiidx Dios guial ma been dol lëjt gan. ¹⁴ Din bal ma nayajc ree xbejn Cristo, zianczi rayal yadxu'dxi'ch ree loj ni raliduladx ree laaman zi'c baliduladx ree laaman diizd guia'xchej.

¹⁵ Abi' zi'c ma rnin lojdi, loj xtiidx Dios rëb:

Bal rucaagdiajguidi xtiidx Dios yan,

ad bal gaquidi nad zi'c goc ree bèn ad bazoobt xtiidx Dios gocli.

¹⁶ Abi', ¿chuzä ree nin ad bazoobt xtiidx Dios majsi biguiejn reeman ni guneeman? ¿Nid bèn Israel ni babëë gajc ree Moisejs Egipton ya?

¹⁷ Abi', ¿nid laagajc reeman bidxe'ch Dios loj tiuu ijz ya por dol ni been reeman abi' zien reeman güjt loj yujbidx? ¹⁸ Abi', ¿nid bèn guin gajc reen rëb Dios loj ya guial ma beenchaawaman xgab guial ad zut reeman lod gap reeman xguialraziiladxaman, guial ad bazoobt reeman xtiidxaman?

¹⁹ Zian rayagbee ree guial ad gojpt reeman gualraziiladx guin guial ad bililadxt reeman ni rëb Dios loj reeman.

4

¹ Zeel yan guial sta raya'p ree promisejs ni been Dios guial yaya'p ree xgualraziiladxaman, rayal yaya'p ree cudad chitëë awa raya'p ree promisejs guin yaya'n tijb dunuj ree guial ad zaya'pt ree gualraziiladx guin. ² Din dunuj ree ma bacaagdiajg ree xtiidxza'c Jesucrist zi'cgajc laa reeman, per laa reeman achet sirv been guial bacaagdiajg reeman diidx guin ree, guial ad bililadxt reeman laan. ³ Per dunuj ree guial ma baliduladx ree xtiidx Dios, ma raya'p ree gualraziiladx guin, sa'n por ree bén ad bililadxt rëb Dios:

Guial bache'ch reeman naj zeel ma benan xgab

guial ad zajpt reeman da gualraziiladxan.

Diizd chi gule'cchaaw Dios guidxliuj baloox xchiinman, ⁴ zi'c rëb loj xtiidxaman por dxej ni raziiladx bejn:

Chi gulox been Dios gra xchiinman

dxel ni goc gajdx dxej baziiladxaman.

⁵ Per par ree bén ad bazoobt xtiidxaman rëbaman:

Ad yu't dxej gap reeman da gualraziiladxan.

⁶ Bén biguejn ree xtiidx Dios yaloj, ad gojpt reeman gualraziiladx guin guial ad bazoobt reeman xtiidxaman, per sta yu' ree bén ryaadx gap gualraziiladx guin. ⁷ Zeel chi gudëd zien ijz, Dios gulëëca zatijb dxej ni naj yandxej. Abi' zi'c ma rnin guial rëb rey Davi tib lajt loj xtiidx Dios:

Bal riguejndi xtiidx Dios yandxej,

gol bazoob xtiidxaman.

⁸ Din bal por Josué niajp ree bén Israel gualraziiladx, ad nuza'tt Dios zatijb dxej. ⁹ Zeel xt yandxej yu' gualraziiladx guin par ree xbejn Dios. ¹⁰ Din bén rajp xgualraziiladx Dios, raziiladxaman xieen gra xchiinman zi'c baziiladx Dios chi gulox been xchiinman. ¹¹ Zeel rayal yagueien ree naguiejn yaya'p ree gualraziiladx guin, chitëë chu güün zi'c been ree bén ad bazoobt xtiidx Dios.

¹² Din xtiidx Dios nabanen rajp tëen gualrniabee. Mazri rëëzan guial loj tijb espad ni nadoxh grop lad, rëëzan lën luxdoo bejn në lën xsprijtaman. Xt lën dxijt në lën yob rëëzan, abi' por laan ragbee bejn bal ni mal o ni zagdxe naj ni rënman güünman. ¹³ Achetczi ni been Dios zajc guiguie'ch lojman, din gradooczan ruguaaman, abi' lojman naj yadëëd ree cwent.

Jesús naj bixhioz mazri zojbloj

¹⁴ Zeel guial ma raya'p ree bixhioz ni mazri zojbloj, abi' laaman naj Jesucrist Xi'n Dios, bén ma zojb xanyabaa, rayal yasnuu yadxu'dxi'ch ree loj ni raliladx ree laaman. ¹⁵ Din Jesucrist bén naj dux bixhioz zojbloj ree laaman zajc gagnë dunuj ree chitëë güün dol dunuj ree gan. Din në laaman guzajc graloj zi'cgajc cayza'c ree, per laaman ad yu't dxej beenman dol. ¹⁶ Zeel con confianz ma zajc yabiig ree loj Dios yarejdx yanaab reeman, bén rën dunuj ree par yayaman dunuj ree. Abi' guial rënman dunuj ree, laaman gagnë dunuj ree loj hor ni yayën ree chu güün dunuj ree yudar.

5

¹ Gra b n rajc bixhioz mazri zobjloj, Dios gulej laaman loj ree bejn persi rbejdx rniabaman Dios por ree bejn. ² Abi' lojman rud   bejn gon par Dios n  ree be ni gui t por ree xtol ree bejn. ³ Abi' guial b nguidxliuj gajc naj bixhioz guin, zeel ragbeeman xhienaag rzajc bejn. Zeel rile' rajpaman pacens b n ni ad ragbeet xhienin r jn, n  ree b n ad zinalt xnejz Dios. ⁴ Abi' guial yu' chi r jn bixhioz guin dol zeel n man rug jt tijb be zi'c gon par Dios por xtolaman, zi'cgajc r jnman por ree bejn.

⁵ Abi' achut zajc gui b guial gacaman bixhioz zobjloj, Dios naj b n rbe laaman zi'c guleman Aar n. ⁶ Ziangajc gojc con Jesucrist, ad laataman r b guial gacaman bixhioz zobjloj par dunuj ree, Dios bacaabee laaman, chi r baman:

L j naj da Xi'nan, abi' diidz yan
gul n guial l j naj da Xi'nan.

⁷ Ziangajc r b zatib lajt loj xtiidx Dios por Jesucrist:

L j naj bixhioz par tiblayaa zi'c goc Melquisedec bixhioz.

⁸ Chi guban Jesucrist loj guidxliuj guie d d biinman gurejdx gunabaman Dios b n zajc yab   laaman loj guialg jt ni gud daman. Dxel bidxga' Dios Jes s bad  man laaman valor guial bazoobaman gra xtiidxaman. ⁹ Majsu Xi'n Dios najman, per basiidaman bazoobaman diidx majsu guzagdiajman. ¹⁰ Abi' guial guidiblagaa beenman gra ni r n Dios g  nman, zeel por laaman tiblayaa ma yu' perdon par gra ree b n guzoob xtiidxaman. ¹¹ Abi' Dios naj b n gule laaman par gacaman bixhioz zobjloj zi'c goc Melquisedec bixhioz.

Royal yasnuu yaguieenbee ree xtiidx Dios

¹² D d zien ni yu' ganin l jt por ree ni guin, per naw  g najn par ganinan zi'c r nan guial d d nen rignia'di. ¹³ Ma gojc xchej da't n nbeedi xtiidx Dios, yan bal zajcan, l jt ma royal gul   ben ren ree, per l jt sta ryaadx chu' b n gul   l jt xtiidx Dios stijb ni basiididi guia'xchej. L jt naj zi'c tijb xindoo ni r ' ganax lejch luar gawix graloj. ¹⁴ Abi' gra ree b n naj zi'c xindoo ad wayajct gaw graloj, ad zile't gagbee reeman conin naj xnejz. ¹⁵ Per ree b n ni cusnuu cayignia' xtiidx Dios, laa reeman naj zi'c b n ma raw graloj guial ma rignia' reeman conin naj zagdx con t  nin naj ni mal.

6

¹ Zeel royal yaguieen ree naguiejn mazri yayignia' ree xtiidx Jesucrist, luar yaye'c ree yasiid ree xtiidxaman ni ma basiid ree guia'xchej. Zagdx-eli naj zian luar yasiid ree naabzi xhienaag yasa'n ree ni mal ni baguieen ree yaloj, o xhienaag yaliduladx ree Dios, ² o xhienaag tiobnijs bejn, o xhienaag yadxiib du yaa ree guijc bejn, o xhienaag yasban Dios beng t ree, o xhienaag g  n Dios xguialguxtisaman chi guidxin dxej yad  d ree cwent lojman, ³ zagdxeli naj guial yasnuu ree yasiid ree xtiidxaman. Abi' Dios gagn  dunuj ree din chile' yaguieen ree zian.

⁴ Din b n ma ragbee ree xcwent Dios, b n ma n nbee ree xcwent ree ni yu' xanyabaa, b n ma gubajn ree con xSprijt Dios, ⁵ abi' bayuladx reeman xtiidzxa'c Dios, ma ragbee t   reeman xhienaag nabee Dios, ⁶ dxel rusa'n reeman guial chinal reeman xtiidzxa'c Jesucrist, par laa reeman d d naw  g naj chu' reeman loj xnejz Dios, din zi'c rul   cucaa reeman Jesucrist Xi'n Dios loj cr jz zatijb din guze' ree bejn laaman.

7 Bénguidxliuj ree naj reeman zi'c tibia' guidxliuj ni rë' guibidx guia ni ryajb, abi' bal rajc da't guiniaa guin par bèn rüjn dxiin lojn dxel rüjnle' Dios laan. ⁸ Per bal ganax guiëjch në ree gui'xh mal rliejn lojn, dxel ad rüjntan sirv, abi' mazri zëéd gajxh casti par guidxliuj guin abi' casti guin naj gual che'can.

Ni nuzujdxi'ch dunuj ree loj xnejz Dios

⁹ Ad caynatan zian por lëjt, din dunujn rayagbee gual zagdxen cayüjndi, gual zinalquidi ni rayal güündi din laadi loj xcasti Dios. ¹⁰ Abi' laaman rüjn xgualguxtisaman zi'c rayal, abi' ad zayanladxtaman ni zagdxen ni beendi në gual ma balüüdi gual rëndi laaman, abi' beendi yudar cusnuu tää cayüjndi yudar dux compniar ree bèn raliduladx ree Jesucrist. ¹¹ Per dunujn rayënan gual gusnuu güündi zian xt dxej chigra, sin gual yalenya'di din yayalidi ni cabëzidi tia'di. ¹² Ad gaquidi bèn ploj, gol been zi'c been ree bèn bililadx Dios sin gualralenya' tia' reeman ni rëb Dios tia' reeman.

¹³ Chi been Dios promejs loj Abraham, baza't laagajcaman din achut bèn mazri lasajc gual lojman, ¹⁴ abi' rëbaman loj Abraham: “Naj diidxli günle' lüj abi' dád zien ree xdiaal chu.” ¹⁵ Abi' Abraham guyuman pacens ad balenya'taman persi cwa'man ni rëb Dios gudëëman lojman. ¹⁶ Chi rüjn bejn jurar, rüjnman jurar por stijb bèn mazri lasajc gual lojman din guigueni gual diidxliqui güünman ni rëbaman. ¹⁷ Ziangajc yan, gual rën Dios gulüüman loj ree bèn ni tia' ni rëbaman gual ad yu't dxej guchaa xixgabaman por promejs ni beenman, zeel beenman jurar. ¹⁸ Tio'p ni ad zaze'nt been Dios, beenman promejs been tääman jurar abi' rayagbee ree gual ad rnieetaman diidx rusquiee. Zianan zeel nadxu' ree valor zubiig ree loj Dios din güünman dunuj ree yudar gual ma raya'p ree confianz gual gac zi'c ma rëbaman. ¹⁹ Abi' gual rayagbee ree gual gac zi'c ma rëb Dios, zeel nadxu'dxi'ch ree loj xtiidxaman zi'c nuzujdxi'ch tijb ganch guiib tijb barcw. Abi' gual nadxu'dxi'ch ree diidz xanyabaa zëëdan, ²⁰ lod ma guyu Jesús par guixhialaman nejz par dunuj ree, bèn ma naj bixhioz zojbloj tiblayaa zi'c goc Melquisedec.

7

Jesús naj bixhioz zi'cgajc gojc Melquisedec

¹ Melquisedec gojc rey Salem gojc tääman xbixhioz Dios bèn yu' xanyabaa. Chi baza Abraham loj wadjl lod beenman gan rey gudilnë ree laaman, dxel bigchaagloj Melquisedec laaman, abi' beenle'man Abraham. ² Dxel loj gra ree ni been Abraham gan, beenman laan chii lala' abi' badëëman tijban loj Melquisedec. Melquisedec rën guiëban “rey ni rüjn xgualguxtisaman zi'c rayal”, Abi' gual gojcaman xrey Salem rën guiëban “rey rabe'cdxe luxdoo ree bejn”, din Salem rën guiëb “ni rabe'cdxe luxdoo ree bejn”. ³ Melquisedec guin achut ragbee chu naj xDadaman, o xniaaman o chu ree nin naj xdiaaman. Achut ragbee goc gojlaman goc tää güjtaman. Laaman goc bixhioz zi'cgajc Jesús Xi'n Dios bèn ma naj bixhioz par tiblayaa.

⁴ Gol been xgab xi bèn lasajc gojc Melquisedec nadxel. Zeel xt dux béngulal ree Abraham badëë tib part loj chii ni beenman gan loj ree rey ni gudilnëman. ⁵ Loj ley rëb gual ree bixhioz Israel ni zëéd loj xdiaa Leví rajp reeman derejch tia' reeman tib part loj chii ni rajp ree bèn Israel, majsi tijbzi loj xdiaa Abraham zëéd gra reeman. ⁶ Melquisedec

majsi ad zëëdtaman loj xdiaa Leví, per cwa'man tib part loj chii ni been Abraham gan. Dxel beenle'man Abraham bën cwa' xpromejs Dios. ⁷ Abi' dunuj ree rayagbee guial bën rüjnle' bejn, mazri lasajcaman guial loj bën rüjnle'man. ⁸ Per gra ree bixhioz ni rtia' tib part loj chii la' ni rajp ree bejn, rêjt gajc reeman zi'cgajc dunuj ree. Sa'n Melquisedec bën cwa' tib lia' ni been Abraham gan, loj xtiidx Dios ruza't laaman zi'c rulüü sta nabanman. ⁹ Yan zi'c rulüü yaguie'ch ree guial Leví con ree bixhioz ni zëëd loj xdiaaman bën ni rtia' ree tib part loj chii ni rajp ree bejn nê reeman badëë tib part guin loj Melquisedec loj hor ni bigchaagloj Melquisedec dux bêngulal ree Abraham. ¹⁰ Din chi bigchaagloj Melquisedec dux bêngulal ree Abraham, ad wayut Leví, per loj xdiaa Abraham zëëd Leví.

¹¹ Bal por ree bixhioz Levitas nile' niajc bejn naya delant loj Dios por ley ni guyu par ree bën Israel, dxel ad rüjntri naguiejn ni't stijb bixhioz bën naj zi'c Melquisedec ad zi'ct Aarón. ¹² Din chi bidxaa bixhioz nêgajc ley bidxaa, ¹³ din dux Dad ree Jesucrist laaman naj bixhioz guin. Per ad lojt xdiaa ree bixhioz zëëdaman, loj diaa ren zëëdaman abi' ni'qui tijb ree xdiaaman ad gojct bixhioz. ¹⁴ Dunuj ree rayagbee guial loj xdiaa Judá zëëd dux Dad ree Jesucrist abi' Moisejs ad baza'ttaman diaa guin chi rëbaman chu reenin gac bixhioz.

¹⁵ Per laa rguien gajc guial Jesucrist naj bixhioz zi'cgajc Melquisedec, ¹⁶ guial ad lojt xdiaa Leví zëëdaman zi'c rëb loj ley par gac bejn bixhioz, najman bixhioz guial rajpaman guialrniabee guibanman tiblayaa. ¹⁷ Din ze rëb loj xtiidx Dios por laaman:

Lüj naj bixhioz par tiblayaa,

lasa' bixhioz ni goc Melquisedec.

¹⁸ Zianan zeel gojc ley guin tiblax guial ad beentan sirv guial nüjn bejn zi'c rniabee ley guin. ¹⁹ Ad bile't nüjn ley guin gan nibajn bejn zagdxe delant loj Dios. Per luar ley guin zagdxe naj guialrliladx ni raya'p ree din por guialrliladx guin ma raya'p ree nejz par yadxin ree loj Dios. ²⁰⁻²¹ Gulal chi ru bejn rajcaman bixhioz, achet promejs been Dios, per chi bacaabee Dios Jesús gacaman bixhioz, Dios been promejs zi'c ca tiblajt loj xtiidxaman lod rëb:

Dux Dad ree Dios ma been promejs abi' ad zuchaat xixgabaman:

“Lüj naj bixhioz par tiblayaa, lasa' bixhioz ni goc Melquisedec.”

²² Zeel zian zagdxe naj nejz cüb ni guxhal Jesús par yadxin ree loj Dios. ²³ Gulal zien gojc ree bixhioz per guial rdxin dxej rêjt reeman ad bile't niajc reeman bixhioz par tiblayaa. ²⁴ Per Jesús ad yu't dxej guiëtaman ad yu' tëët dxej lox guial najman bixhioz. ²⁵ Zianan zeel rile' rabëëman bejn ree loj xcasti Dios, bën rën ree gap nejz par guidxin reeman loj Dios por laaman, din laaman rajpaman guialnaban par tiblayaa par cwedx guiniabaman Dios por laa reeman. ²⁶ Zeel laaman naj bixhioz zobjloj bën rayaadx ree gagnë dunuj ree. Din laaman naj bën naya nali, achet ni mal rüjnman, nayaman loj Dios, garen najman guial loj bëndol, abi' zobjaman xanyabaa cwë' Dios. ²⁷ Laaman ad ryadxt güünman zi'c rüjn ree bixhioz zobjloj guial guixie guixie rugüjt reeman be gui'xh zi'c gon par Dios. Yaloj por xtol gajc reeman dxel por xtol ree ben ren. Per Jesús con tib volt güjtaman por dux tol ree, ad ryaadxtri guiëtaman stijb. ²⁸ Por ley bile' gojc ree bejn bixhioz zobjloj majsi ad nayaalojt naya reeman

niz loj Dios. Per despuejs rëb Dios guial diidxliczi xi'nman gac bixhioz zojbloj, laaman nayaaloj nayaman niz loj Dios zianczi.

8

Jesús naj dux bixhioz zojbloj ree

¹ Loj gra diidx ni caydü ree ni mazri lasajc naj guial Jesucrist naj dux bixhioz zojbloj ree, bën ni ma zojb xanyabaa xladbee Dios bën rniabee. ² Ni ma rünman sirv guialbixhioz, lën yadoo ni bazooob Dios, ad bénguidxliujt. ³ Gra ree bixhioz zojbloj loj guidxliuj guie xchiin reeman naj guial rinë reeman gon rugüjt tée reeman be ree zi'c gon par Dios. Ziangajc Jesucrist bën naj dux bixhioz zojbloj ree yu' ni badëëman loj Dios. ⁴ Abi' bal sta za' Jesucrist loj guidxliuj guie ad niajctaman bixhioz, guial ma yu' ree bixhioz ni rinë ree gon loj Dios zi'c rniabee ley ni basa'nnë Dios Moisejs. ⁵ Per gra ni rün ree bixhioz loj guidxliuj guie, najzi reen zi'c tijb bala, zi'c tijb sen xhienaag naj ree ni yu' xanyabaa. Dunuj ree rayagbee guial najzi reen zi'c tijb sen din chi ma cadxin gajxh güün Moisejs yadoo, dxel rëb Dios lojman: “Baguiaa zagdxe din güünl zi'cgajczi balün lüj ruguia' Sinaí.” ⁶ Per mazri zagdxe naj ni rün Jesucrist, bën bayal naj dux bixhioz zojbloj ree, din mazri zagdxe naj nejz cüb ni guxhalaman din chile' yadxin ree loj Dios. Abi' por nejz cüb guin mazri zagdxe naj ree xpromejs Dios par bejn.

⁷ Bal por ley nile' nibajn bejn zagdxe delant loj Dios, dxel ad rünjt naguiejn niu nejz cüb. ⁸ Per baguiaa Dios guial ad cayüjnt ree bejn zi'c rayal zeel rëbaman:

Naj rni guial guidxin dxej gaxhalan nejz cüb par ree bën Israel në ree bën Judá.

⁹ Per nejz cüb guin ad najtan zi'c ley ni basa'nan

loj xbéngulalidi chi babën laa reeman Egipto.

Abi' guial ad bazooobt reeman da diidxan zeel gulëladxan laa reeman, zian rëb Dios.

¹⁰ Rëb téeëman:

Zian ma baya'n diidx gac con ree bejn chi guidxin dxej

guijc reeman yasa'nan da leyan

abi' lën luxdoo reeman gucanan.

Dxel naj gac xDios reeman, abi' laa reeman gac da bejnan.

¹¹ Dxejzii ree ad rüntri naguiejn gusiid ree bejn lasa' reeman.

Ni'qui bijch reeman par güünbee reeman naj,

din gra reeman güünbee naj,

diizd xindobëz xt bengol.

¹² Abi' naj gün perdon gra ree ni mal ni ma been reeman,

abi' ad yu't dxej gusaaladxan xtol reeman.

¹³ Chi rëb Dios guial guixal nejz cüb guin rën guiëban guial achetri sirv rün nejz gulal guin ni gop ree bejn par guidxin reeman lojman, abi' ni ad rüntri sirv nayob nitan.

9

Yadoo ni yu' loj guidxliuj në yadoo ni yu' xanyabaa

¹ Dunuj ree rayagbee guial chi binal bejn ley ni cayguie'ch ree naj nejz gulal, loj ley guin zëed xhienaag guiën bejn Dios, xhie tée naag rayal güün reeman tijb yadoo loj guidxliuj guie. ² Lën yadoo guin guzëëb tijb lajd

persi gojcan tio'p lèn. Tijb lènan ni naj niz ro' port, lod brier laj lod nada abi' lèn guin guzobj ni ru gandel në tijb mex ni gudxib ree guiadxtil ma gogle'. ³ Dxel stijb lèn guin xijch lajd guin brier laj lod mazcsi nada. ⁴ Lèn guin guyu tijb altar ni or lod rgu' reeman goxyl në tijb caj ni brier laj xcaj xpromes ree Dios. Abi' caj guin nadüüban or zi'c lènan zi'c xijchan. Lèn caj guin yu'chaaw guiaj ni ca ree guidxii xmandamient Dios në xvar Aarón ni бага' con stijb re or ni guyuchaaw mana. ⁵ Dxel guijc caj guin guzobj tio'p xfigur ree anjl bèn la ree querubines abi' con xhiil reeman rusiaaw reeman guijc lod ruroob bixhioz zobjloj xrejn ree be por xtol ree bejn. Per por yan ad rüjnt naguiejn guzatan mazri ree ni guin lojdi.

⁶ Chi gulox been reeman gra zi'c rayal gac lèn tijb yadoo loj guidxliuj guie, dxel guixie guixie guyu ree bixhioz lèn yadoo guin per naabzi lod brier laj lod nada, lod rguieen reeman ni rayal güün reeman par Dios. ⁷ Per stijb lèn guin lod la mazcsi nada, tijbzi bixhioz zobjloj ru ni tib volt lèn tib ijz. Abi' ad zajct chu'man bal id zinèman xrejn ree be din güün Dios perdon xtolaman në xtol ree bejn. ⁸ Por ree ni guin rulüü xSprijt Dios dunuj ree guial la'tgaj rüjn sirv lod brier laj lod nada ad yu't mod chu' bejn lod la mazcsi nada. ⁹ Gra ree ni guin najzi reen tijb ejempl par dunuj ree yan, din gon në ree be ni binè ree bejn par Dios, ad beent reen sirv par nayaaløj ninaladx reeman guial ma naya reeman loj Dios. ¹⁰ Gra ree costumbr ni gop reeman zi'c ree con ni gudaw reeman, në ree ni gu' reeman në gra ree ni rayal güün reeman din naladx reeman guial ma naj reeman naya, laan naj ni gunabee ley güün ree bejn xt dxej ni bachaa Dios gra.

¹¹ Din yan ma bi't Jesucrist, bèn naj bixhioz zobjloj par dunuj ree, abi' por laaman ma raya'p ree yaya'p tée ree ni ma rëb Dios yaya'p ree. Abi' mazri zagdxe naj lèn yadoo lod ma guyuman mazri lasajc yadoo guin guial ad zobjtan loj guidxliuj guie ad gojc tēetan por ree bēnguidxliuj guie. ¹² Jesucrist ma guyuman lèn yadoo lod nada da't, per ad con xrejnt ree go'n dobëz o xrejn ree dxib, guyuman con quijb xrejnman. Laaman con tib volt guyuman, ad rüjnt naguiejn güünman zian stijb abi' por laaman raya'p ree perdon par tiblayaa. ¹³ Tiamp gulal xrejn ree dxib o xrejn ree go'n o cobdëj ni we'c ree vagdobëz ruroob bixhioz guijc ree bejn persi naladx reeman ma naya reeman. Yan bal zian naladx reeman guial raya'n reeman naya, ¹⁴ diidxgui con xrejn Jesucrist nid zanaduladx ree ya guial ma naya ree niz loj Dios xcwent dux tol ree, din chile' yaguieen ree ni rën Dios bèn naban. Din por xguialrniabee xSprijt Dios, Jesucrist bèn ad beentczi dol, badëe laagajcaman zi'c tijb gon par Dios.

¹⁵ Zeel por Jesucrist ma raya'p ree tijb nejz cüb par yadxin ree loj Dios. Din por xguialgüjt Jesucrist ma yu' perdon par dux tol ree në xtol ree bèn ni binal ley, gra ree bèn naj xbejn Dios zian yaca' ree ni rëb Dios yaya'p ree par tiblayaa. ¹⁶ Din zi'cgajc tijb bèn rlies tijb gui'ch guial chu yaya'nnë ree ni rajpaman, ad züjnt gui'ch guin dxiin xt chi ma güjtaman. ¹⁷ La'tgaj naban bèn guin achet sirv rüjn gui'ch guin, rüjnan sirv xt chi ma güjtaman. ¹⁸ Zeel diidz tiamp gulal par guzuløj been sirv ley ni basa'n Dios loj Moisejs, bagüjt reeman tio'p choon ree be gui'xh persi gulëë reeb rejn. ¹⁹ Din chi gulox bagojn Moisejs gra ree bejn gra ni zëed loj xley Dios dxel cwa'man guidxlad xiil ni nayè' culor xnia bacaaman laan guijc tib xidx yag ni la hisopo, dxel badxe'man laan loj nijs ni no'ch xrejn ree go'n dobëz con xrejn ree dxib dxel bacojpaman laan loj libr ley në guijc ree

bejn ²⁰ rëbgajman: “Rejn guie naj tijb sen guial ma banee Dios xleyaman lojdi par güündi laan cumplid.” ²¹ Bacojp tëëman rejn guin lën yadoo në guijc gra ree ni rüjnnë ree bixhioz dxiin lën yadoo. ²² Ley guin gra gunabeen gagle' con rejn din guiguien guial ma naya reen delant loj Dios, din sin rejn achet perdon par dol yu'.

Xrejn Jesucrist rquied dol

²³ Zeel par guiguien guial ma naya ree ni beennë ree bixhioz dxiin lën yadoo guin, gojc naguiejn bagüjt reeman be ree persi beenle' reeman ni guin ree. Per ni guin ree najzi reen zi'c tijb xsen ni yu' ree xanyabaa, din par ree ni yu' xanyabaa ryaadx rejn mazri lasajc guial loj xrejn ree be. ²⁴ Abi' Jesucrist ad lënt yadoo ni been bénguidxliujn guyuman, yadoo ni najzi tijb sen guial xhienaag naj xanyabaa, ma guyuman xanyabaa lod caneeman por dunuj ree loj Dios. ²⁵ Jesucrist ad biaadxt niëjtaman zien volt por dol ree, ad beentaman zi'c been ree bixhioz zojbloj guial gazobijz binë reeman xrejn ree be lën yadoo lod brii laj lod nada da't. ²⁶ Din bal id zian, zien volt niëjtaman diizd chi gocchaaw guidxliuj. Per chi bidxin dxej bi'taman, con tib voltzi badëë laagajcaman par guiëtaman din chiquied dux tol ree. ²⁷ Zi'cgajc gra bejn tib voltzi rëjt reeman, dxel zëed ni yadëed reeman cwent loj Dios. ²⁸ Ziangajc Jesucrist tib voltzi badëë laagajcaman par guiëtaman din quixaman por xtol ree bejn. Abi' chi gui'taman stijb ad zi'ttaman por dol, gui'taman din chignëman bén cabëz ree laaman.

10

Ad leyt riquied dol

¹ Ley ni basa'nnë Dios Moisejs najzan tijb sen xcwent ree ni gac, per ad por ziant gojc ni rayal gac. Din majsi gazobijz güjt ree be par Dios zi'c gunabee ley güün bejn, per ad guyut dxej ni naladx reeman guial ma bayaaloj naya reeman loj Dios. ² Din bal ninialadx reeman guial ma naya reeman con tib volt ni bagüjt reeman be ree par Dios, dxel ad ryaadxtri nüjn reeman zian guial ma ragbee reeman achetri xtol reeman. ³ Per ad gunaladxt reeman zian, gazobijz rusaaladx xtol reeman chi rugüjt reeman be ree par Dios, ⁴ din xrejn ree go'n në xrejn ree dxib ad zajct chiquiedan xtol ree bejn.

⁵ Zeel chi bi't Jesucrist loj guidxliuj, rëbaman loj Dios:

Ad rëntil xrejn ree be

ni'qui los demazri ree ni ridnë bejn par lüj,
zeel baneel naj cuerp ni ra'pan loj guidxliuj guie.

⁶ Ad rëntril guial ruze'c reeman be ree par lüj
ni'qui xrejn ree be ni ridnë reeman por xtol reeman.

⁷ Zianan zeel rën:

“Laa naj guie, Dad Dios,
zialan par günan zi'c rënl,
zi'c ca loj libr por naj.”

⁸ Jesucrist yaloj rëbaman guial ad rënt Dios xrejn ree be, ni'qui los demazri ree ni rinë bejn par laaman, ni'qui guial ruze'c reeman be ree por xtol reeman zi'c rniabee ley güün reeman. ⁹ Chi gulox rëb Jesús zian, dxel rëb tëëman: “Laa naj guie, Dad Dios, zialan par günan zi'c rënl.” Zianan baloox Jesucrist guial rinal ree costumbr ni rëb loj ley abi' guxhalaman tijb nejz cüb par yadxin ree loj Dios. ¹⁰ Yan ma nayajc ree naya delant loj Dios guial ma been Jesucrist zi'c rën Dios, badëed

laagajcaman gÿjtaman por xtol ree bejn, con tib volt par tiblyaa, ad ryaadxt gÿnman zian stijb.

¹¹ Gra ree bixhioz Israel guixie guixie za' reeman cayÿjn reeman gra ni rniabee ley gÿn reeman, abi' guixie guixie rugÿjt reeman be ree par Dios. Abi' majsi zien volt rÿjn reeman zian per ad rquiedt gualrugÿjt be guin ree xtol ree bejn. ¹² Per Jesucrist con tib volt badëed laagajcaman gÿjtaman por xtol ree bejn, ad ryaadxt gÿnman zian stijb. Dxel gurejman xladbee Dios, ¹³ lod cabëzaman guidxin dxej nabeeman loj gra ree bèn rdxe'ch laaman. ¹⁴ Din laaman con tib volt badëe laagajcaman gÿjtaman por xtol ree bejn dxel tiblyaa ma naya ree bèn rliladx laaman. ¹⁵ Abi' dunuj ree rayagbee ree gual walin din por xSprijt Dios zëed ree diidx ni ca loj xtiidx Dios gual rëb Dios:

¹⁶ Zianan ma baya'n diidx gac
con ree bejn chi guidxin dxej:
Guijc reeman gusa'n da leyan
abi' lën luxdoo reeman gucanan

¹⁷ Abi' rëb tëëman:
Ad yu't dxej gusaaladxan xtol reeman
në graløj ree ni mal ni ma been reeman.

¹⁸ Abi' zi'c ma yu' perdon par dol, ad rÿjntri naguiejn guiët ree be por dol.

Royal yubiig ree loj Dios

¹⁹ Zeel compniar raliduladx ree Jesucrist sin gualrdxeb ma zajc yadxin ree lod zojb Dios por xrejñ Jesucrist, ²⁰ din chi badëed xcuerpaman persi gÿjtaman, guxhalaman tijb nejz cÿb ni zidnë gualnaban par dunuj ree. ²¹ Yan zi'c ma rniabee Jesucrist dunuj ree, bèn naj bixhioz zojbloj xanyabaa, ²² con guidib du luxdoo ree ma zajc yubiig ree loj Dios con tijb gualrliladx ni wali ree raliduladx ree laaman, con tijb quiarguiejn naya sin xgab mal, con tijb cuerp ni ma baya loj dol, zi'c chi qui badiibri dux cuerp ree con nijs naya. ²³ Zeel royal yadxu'dxi'ch ree loj ni raliduladx ree Dios, din laaman zÿjn cumplid xtiidxaman zi'c ma rëbaman. ²⁴ Royal yaguieen ree xgab xhienaag yalu' ree luxdoo ree dux compniar ree yayën tëë du lasa' ree yaguieen tëë ree ni naj zagdxe. ²⁵ Ad rayalt yaguieen ree zi'c rÿjn ree bèn ad rejtri ree lod radxaag lasa' ree dux compniar ree par chignia' reeman mazri xtiidx Dios, royal yalu' ree luxdoo du lasa' ree, abi' mazri yan gual ma rayagbee ree gual ma zidyob dxej gui't Jesucrist stijb.

²⁶ Din bal ma rayagbee ree xtiidxli Jesucrist abi' baguieen ree xgab yaguieen ree mazri dol, dxel ad yu'tri por chu zajc yayajc ree perdon. ²⁷ Ni cabësi dunuj ree naj xgualguxtis doxh Dios, tijb bajl lod yayal ree bèn ad ruzoobt xtiidxaman. ²⁸ Chi bal id been tijb bejn zi'c rniabee ley ni basa'nnë Dios Moisejs, abi' yu' tio'p choon testiw gual ad beent bèn guin zi'c rniabee ley guin, dxel ad yu'tri mod laaman loj gualgÿjt ni rayalaman. ²⁹ Yan gol been xgab, jxixpi mazri castiro' yayal bèn rnieeguijdx xSprijt Dios bèn ragnë dunuj ree! Bèn ni naladx gual achet lasajc Xi'n Dios, abi' rÿjnman desprejs xrejñman, rejn ni rulüü gual gac zi'c rëb Dios, rejn ni rusia xtol bejn. ³⁰ Dunuj ree rayagbee gual rëb Dios: "Naj royal gÿn gualguxtis, naj gudë ni rayal bejn." Rëb tëëman: "Dios naj bèn ni yaca' cwent por ni cayÿjn bejn." ³¹ jAbi' nadxeb yayal bejn xcasti Dios bèn naban!

³² Per l jt gol basaaladx xhienaag guzajquidi chi qui beenbeeridi xtiidxli Jesucrist. Gudaandi gra gualzi ni gud didi. ³³ Yu'di zien loj da't gualzi bad ed ree bejn l jt, abi' baze' reeman l jt delant loj ree bejn, yu' t edi ad gul eladxtidi b n guzac ree zian. ³⁴ Ad gul eladxtidi b n ni guyu ree ladxguiib, abi' chi baca' ree bejn gra ni rajpidi, babaagajquidi gual ma ragbeedi mazri lasajc ni rajpidi xanyabaa, n  ree ni rajpidi ni, taan reen tiblayaa. ³⁵ Zeel ad gusa'ndi gualrliladxidi Jesucrist, din por gualrliladx guin d d zagdxe naj ni tia'di. ³⁶ R jn naguiejn gapidi pacens din chile' g undi zi'c r n Dios, zian tia'di ni ma r baman guneeman lojdi. ³⁷ Din loj xtiidx Dios r b:

Nayob, d d nayob gui't b n naj gui't,
ad zaglaataman.

³⁸ Abi' b n naban zi'c r nan,
guidib tiamp ni nabanman rliladxaman naj.
Per bal gusa'nman ni rliladxaman naj,
ad zabaan 'tan laaman.

³⁹ Per dunuj ree ad nayajct ree zi'c ree b n rusa'n ni rliladx reeman Jesucrist abi' rayal reeman casti, dunuj ree nayajc ree b n rliladx Jesucrist diidxli par chit e yayal ree casti.

11

Guialrliladx Dios

¹ Yan,  xhienin naj guialrliladx? Guialrliladx naj gual guidiblagaa yaliduladx ree gac zi'c cayl jz ree gac, n  gual waliqui ni raliduladx ree ni ad raguiaat ree. ² Dux b ngulal ree baya'n reeman zagdxe delant loj Dios gual bililadx reeman laaman.

³ Zi'c raliduladx ree Dios, dunuj ree rayagbee gual con xtiidxaman beenman xanyabaa n  guidxliuj n  gra ni raguiaa ree, achetzi ni beenman con ree ni raguiaa ree yan.

⁴ Gual bililadx Abel Dios, zeel zagdxe naj gon ni bad eman gual loj Ca n, abi' baya'nman zagdxe delant loj Dios abi' cwa' Dios gon ni bazaladx Abel lojman. Zian majsi ma g jt Abel, per sta rguiajt xhienaag bililadxaman Dios.

⁵ Gual bililadx Enoc Dios zeel ad g jttaman, guidib nabanman ziaman xanyabaa abi' ad badxejlt ree bejn laaman gual ma zign  Dios laaman. Per chi gadaman chign  laaman, loj xtiidx Dios r b gual bayuladx Dios zi'c gubanman. ⁶ Abi' achut zajc g n zi'c r n Dios bal id rliladxaman laaman. Chut ez b n r n gap nejz par guidxinman loj Dios rayal chililadxaman gual yu' Dios chililadx t eman gual laaman rud e ni r baman gud eman loj ree b n raguiil laaman.

⁷ Gual bililadx No  Dios dxel chi r b Dios lojman gual gac ree ni gadaman guguaa gac bazoobaman xtiidxaman, beenchaawaman tijb barcw din laaman con ree xfamilaman loj ni r b Dios gac. Dxel por gualrliladx guin biguien gual gra b nguidxliuj rayal casti ni r b Dios, abi' baya'n No  zagdxe delant loj Dios gual bililadxaman xtiidxaman.

⁸ Ziangajc Abraham gual bililadxaman Dios, bazoobaman xtiidxaman chi r baman lojman din grii ladxaman cheman lod tia'man guidxliuj ni gud ed Dios lojman. Abi' brii ladxaman ni'quid ragbeetaman banguin cheman. ⁹ Gual bililadxaman Dios, gubajnman zi'c benzit loj guidxliuj ni r b Dios gud edaman lojman. Gurejman l n ree carp ni naj n  guid, ziangajc Isaac n  Jacob n  laa reeman rayal guidxliuj guin. ¹⁰ Gubajn

Abraham zian guial ragbeeman chisobaman luguiedx ni beenchaaw Dios, guiedx ni ad yu't dxej nit.

¹¹ Ziangajc Sara, por xguialrliladxaman, majsi ma najman bengol par chu' xi'nman, per guyuman gojl par gacaman na abi' guyu tijb xi'nman guial bililadxaman guial r jn Dios cumplid xtiidxaman. ¹² Zian gojc majsi bengol da't ma naj Abraham per gojcaman famil. D d zien ree xdiaaman guyu zi'c ree bajl xanyabaa, zi'c ree  x ni riga' ro' nijsdoo ni ad zile't guiyab.

¹³ Gra ree b n ma bazatan xt bidxin dxej g jt reeman bililadx reeman Dios, majsi ad baguiaat reeman gojc cumplid gra ree promeys ni been Dios loj reeman, per guial rliladx reeman ragbee reeman guial zajc zi'c r b Dios abi' rabaa reeman. Laa reeman ragbee guial tio'p choon dxejzi z ed reeman loj guidxliuj guie ad tiblayaat. ¹⁴ Abi' ree b n rniece zian, zian rguienchaaw guial sta rguuil reeman lod diidxli gac ladx reeman. ¹⁵ Din bal por guidxliuj lod guza reeman cay jn reeman xgab, dxel zile' nayejc reeman ni stijb. ¹⁶ Per laa reeman mazri r jn reeman xgab por tijb luar lod naj mazri zagdxe, mazri r jn reeman xgab por xanyabaa. Zeel Dios ad ratutaman najman xDios reeman abi' ma beenchaawaman luar lod guiban reeman xanyabaa.

¹⁷ Guial bililadx Abraham Dios, dxel chi been Dios laaman prueb din gug jt xi'nman Isaac din gud edaman laaman zi'c gon par Dios, cw jb Abraham majsi tijbzi Isaac guin naj xi'nman, majsi ragbee t eman guial r b Dios lojman: ¹⁸ "Por xi'n Isaac gacxhiey da't xdiaal." ¹⁹ Per Abraham yu'guijcaman guial rajp Dios guialrniabee xt par yasbanman beng t ree, abi' zi'c rul u baban xi'nman stijb chi gud edaman prueb guin.

²⁰ Ziangajc Isaac por guialrliladxaman Dios dxel chi beenle' ree xi'nman Jacob con Esa , r baman xhienaag gac con tijbgaj reeman. ²¹ Abi' ziangajc Jacob guial bililadxaman Dios ziangajc beenle'man grop ree xi'n Xi b chi ma guidxin hor gui taman. Dxel cwa' yagrliadxaman abi' gurejdx gunabaman Dios. ²² Ziangajc Xi b guial bililadxaman Dios, chi ma guidxin hor gui taman, r baman guial grii ree b n Israel Egipto, abi' r baman loj reeman xhienaag g unn  reeman xdxijtaman.

²³ Por guial bililadx ree xdad xniaa Moisejs Dios chi gol Moisejs guin, baquie'ch reeman laax choon b ew guial baguiaa reeman najx xindoza'cdxoon, abi' ad bidxebt reeman guial r b b n naj rey guial gui t gra ree xindob z. ²⁴ Abi' chi goc Moisejs guin bengol, guial bililadxaman Dios, gojc xixgabaman cwexuuman niajcaman xi'n xi'ndxa'p rey Egipto. ²⁵ Par laaman zagdxeli naj sagdiajman con ree xb n Israelaman, luar n jnman dol niro'nladxaman laa reeman din niajpaman ni r nman, ni ad rdaant ree par tiblayaa. ²⁶ Par laaman mazri lasajc sagdiajman zi'c Cristo luar niajpaman gra ree guialnaza'c ni yu' Egipto, din mazri yu'guijcaman guialnaza'c ni yayalaman delant loj Dios. ²⁷ Guial bililadx Moisejs Dios, briiman Egipto, ad bidxebtaman majsi balen rey Egipto. Guzudxi'chaman zi'c rul u ruguiaaman Dios b n ad zajct guguiaa ree bejn.

²⁸ N  guial bililadx Moisejs Dios, beenman lanij pascw, abi' gunabee-man baroob ree b n Israel rejn ro' xport lidx reeman, din chi t d xianjl gualg jt, ad zug jttaman xi'n yaloj ree b n Israel. ²⁹ Guial bililadx ree b n Israel Dios, gud d reeman zi'c loj yujbidx lod bixal loj nijsdoo la nijsdoo

xnia. Per chi guyèn ree bén Egipto nidèd reeman, loj hor guin bayaaw nijs guin dxel gu' reeman nijs abi' güjt reeman.

³⁰ Guial bililadx ree bén Israel Dios, chi baza' gajdx dxej ni biaw reeman guiedx Jericó, dxel bazaj ze' ni nayaw guiedx guin. ³¹ Abi' Rahab bén goc béngunaa dxuudx luguiedx Jericó, guial bililadxaman ad güjttaman chi güt ree los demazri ree bén ladxaman bén ad bazoobt ree diidx, guial baca'man bén Israel ni we ree bigla'ch luguiedx guin.

³² Yan, ¿xhie mazri ganin lojdi? Ad zadaant tiamp guin ganin lojdi xcwent Gedeón, Barac, Sansón, Jefté, Davi, Samuel në xcwent ree bén badëe xtiidx Dios loj ree bejn. ³³ Gra reeman bililadx Dios abi' been reeman gan loj zien ree nacion, been xguialguxtis reeman zi'c rayal, baguiaa reeman gojc cumplid ni rëb Dios loj reeman abi' basiaaw reeman ro' ree beedx. ³⁴ Guzuj reeman loj bajl ro' abi' achet goc reeman, gulaa reeman loj guialgüjt con espad, guyu reeman gojl chi rulüücüzi ad yu't reeman gojl, guzudxi'ch reeman loj wadijl abi' balaagdx reeman benzit ni gudilë reeman. ³⁵ Në ree béngunaa ni güt ree xfamil, por guial bililadx reeman Dios baban ree xfamil reeman stijb.

Per yu' ree bejn majsi güjt reeman, per par laa reeman mazri zagdxe guzagdiaj reeman loj ree bén bagüjt laa reeman, luar nusa'n reeman guialrliladx reeman Dios par gap reeman stijb guialnaban cüb ni mazri lasajc. ³⁶ Yu' tëë reeman guzagdiaj baze' ree bejn laa reeman, gudijn ree bejn laa reeman, xt guxhii ree bejn laa reeman con caden abi' guyu reeman ladxguib. ³⁷ Yu' reeman bagüjt ree bejn con guiaj, yu' tëë reeman bagüjt reeman gulëëxhün reeman laa reeman con sierr, güjt tëë reeman con espad. Yu' tëë reeman biza gra lad najcw reeman guid xab xiil në guid xab dxib, probza laa reeman naya biza reeman, graloj beennë ree bejn laa reeman. ³⁸ Biza reeman niz loj yujbidx, niz ruguia' ree, në graloj lën ree guiajbiliaa. Bén guin ree ad rayal nibajn reeman loj guidxliuj guial dád benza'c gojc reeman. ³⁹ Abi' majsi biguien guial gra reeman diidxli bililadx reeman Dios, per ad cwa't reeman ni rëbaman loj reeman. ⁴⁰ Din laaman beenman xgab tijb ni mazri zagdxe par dunuj ree, abi' ad gojc gajt ni rëbaman loj reeman din tijbzi yaca' ree ni rëbaman con laa reeman.

12

yunaal ree Jesús

¹ Zeel, zi'c ma bacaagdiajg ree por zien ree bejn xhienaag bililadx reeman Dios, rayal yasa'n ree tiblax gra dol në gra ree ni rudxoon yaguieen ree zi'c rayal, ad zalenya' tëët ree yunaal ree nejj ni ma balüü Dios dunuj ree. ² Rayal yadxeguijc ree Jesucrist din por laaman zëëd guialrliladx ni raya'p ree abi' por tijbzi laaman rayaalox guialrliladx ni raya'p ree. Gudaanman guialzi ni gudëdaman loj crüzj, ad batutaman güjtaman zian din ragbeeman guial chi ma gulox guzagdiajman, dxel gui't guialrabaa. Abi' yan ma zojbaman xladbee Dios xanyabaa.

³ Gol been xgab xhienaag guzagdiaj Jesucrist chi basagdiaj ree bëndol laaman, chitëë yadxaguidi, ad yalenya'di por ni cazajquidi. ⁴ Din majsi cusagdiaj ree bejn lëjt guial cayüjndi naguiejn ad cayüjntidi dol, per ad wazujtidi loj guialgüjt por zian. ⁵ ¿Wen ma bayanladxidi ya xhienaag banee Dios lëjt consejw najdi xi'nman? Loj xtiidxaman rëb:

Xi'n, bidxga' zi'c runee dux Dad ree Dios lüj consejw,

ad bal yalenyal chi guzuxnejzaman lüj.

⁶ Din rüjnnamaan bèn ni naj ree xi'nman,

ruzuxnejzaman laa reeman guial rënman laa reeman.

⁷ Zeel gol gudaan gualzi, din zagdxe najn par lëjt. Rüjnnë Dios lëjt zi'c rüjnnë bejn xi'nman, ¿wen yu' dad ad ruzuxnejzt xi'n ya? ⁸ Yan bal id ruzuxnejz Dios lëjt zi'c rüjnnë gra ree xi'nman, rën guiëban guial ad najtidi xi'nman diidxli, ad najtaman xDadidi. ⁹ Lëjt ragbee guial chi bayajc ree xindoo, gudijn dux dad ree dunuj ree din yacaagdiajg ree xtiidxaman abi' raya'p reeman respejt. Yan, ¿chexc di ad ree yazoob xtiidx dux Dad ree Dios bèn yu' xanyabaa, din yaya'p ree guialnaban con laaman? ¹⁰ Dux dad ree ruzuxnejzaman dunuj ree por tio'p choon dxej ni zio'p ree loj guidxliuj din yaguieen ree zi'c ni naladxaman naj zagdxe. Per Dios ruzuxnejzaman dunuj ree par tijb ni mazri zagdxe par dunuj ree, ruzuxnejzaman dunuj ree din yabajn ree naya zi'c laaman. ¹¹ Diidxliczi achet guialnaa naj nix loj hor ni cadëdilan, ragnaalil. Per ree bèn ni rusiid ruzoob diidx zian, laa reeman naban zagdxe, naalyuj delant loj Dios.

Ad cwëëladxidi xtiidx Dios

¹² Zeel gol bagu' luxdoodi, gol badëed valor lëjt gajc zi'c tijb bèn raca'ladx chi ma badxag da'taman. ¹³ Gol been naguiejn gol gubajn xnejz, din ree bèn ragdxa xhie güün reeman, ad gusa'n reeman xnejz Dios, chu' luxdoo reeman zagdxe chinal reeman laan.

¹⁴ Gol been naguiejn guibandi zagdxe con gra ree bejn, gol gubajn naya delant loj Dios din bèn ad nabant naya ad zile't guguaaaman dux Dad ree Dios. ¹⁵ Gol gojp cudad chitëe chu' tijbidi gac zi'c gui'xh nala ni rüjn guialquia abi' guxhiinan gra xcompniaridi. ¹⁶ Ni'qui tijbidi ad rayalt sunëdi bèn ad najt lacheelidi, ad cwe'quidi tibladi ni zagdxe ni zëed ree por Dios chitëe saquidi zi'c guzac Esaú, por tijb guialraw bato'man guialrniabee ni rayalaman guial najman bèn yaloj loj bijchaman. ¹⁷ Abi' lëjt ragbee guial chi guyën Esaú nünle' xdadaman laaman ad beenle'taman laaman zi'c rayalaman. Majsí dád biinman gunabaman laan, per ad bile't nuchaaman ni beenman.

¹⁸ Lëjt gadidi chibig lod ad najt par gugaalidi zi'c gubig ree bèn Israel gual guijc guia' Sinaí lod baguiaa reeman cayajc bajl guijc guia' guin, baguiaa reeman go'xh ya's ni basiaaw guijc guia' guin abi' rbi' gaj tijb bidoxh yagaj zi'c bidojn. ¹⁹ Dxel biguiejn reeman bibejdx tijb trompejt abi' biguiejn reeman cha' Dios guneenëman laa reeman. Per guial tant bidxeb reeman biguiejn reeman cha'man dád guzajc reeman laaman liaadx ad rnieenëman laa reeman. ²⁰ Din ragbee reeman guial nawëëg naj ni gunabee Dios güün reeman chi rëbaman: “Chutëez bejn o be gui'xh ni gugaal guijc guia' guie rayal guiëtaman o guiëtib con guiaj o con lans.” ²¹ Nadxeb naj ni baguiaa reeman xt Moisejs rëb: “Rnijn guial tant rdxeban.”

²² Per lëjt ma bibiguidi loj Dios, ad guzajctidi zian. Ma yu' nejz par guidxindi ruguia' Sión, xanyabaa lod naj Jerusalén ladx Dios bèn naban, lod nadxag lasa' ree zien da't ree anjl, ²³ dád nix yu' luxdoo reeman rën reeman laaman lod yadxajg lasa' ree xbejn Dios bèn ni ma ca ree laj loj libr xanyabaa. Ni zojb Dios, bèn yanab cwent loj gra bejn, ni tëe za' xSprijt ree bèn guban zi'c rayal laa reeman ma naya reeman por Dios.

²⁴ Ni gajc zojb Jesucrist, bèn guxhal nejz cüb ni raya'p ree par yadxin ree loj Dios. Chi güt Abel xrejnman gunab gac guialguxtis, per con Jesucrist ad gojct zian, güjtlaman, guxhie' tēē xrejnman par yayajc ree perdon.

²⁵ Zeel gol gojp cudad gol bidxga' Dios, laaman najman bèn rnieenē dunuj ree. Din bal bèn ni ad bidxga't ree xtiidx Moisejs bèn badēēd xtiidx Dios loj guidxliuj guie ad gulaat reeman loj casti ni rayal reeman, diidxgui dunuj ree nid zayal ree xcasti Dios ya bal id zayidxga' ree xtiidx Jesucrist, bèn guza diidx xanyabaa din guinieenēman dunuj ree.

²⁶ Chi gunee Dios bēngulal ree ruguia' Sinaí, binij guidxliuj. Per yan ma rēbaman: “Gunin guidxliuj zatijb, per ad guidxliujtzi, nē xanyabaa.”

²⁷ Chi rēb Dios guial güünman zian zatijb, rēn guiēban guial gunijman gra ni beenman, din chiquied ni rayal chiquied din yaya'n ni ad rayalt chiquied. ²⁸ Zeel rayal yadēēd ree quixtēē loj Dios guial ma rayal ree lod canabeeman, lod ad yu't dxej nit, abi' con respejt nē guialrdxeb yaguieen ree ni ruladxaman. ²⁹ Din dux Dios ree naj zi'c tijb bajl ni ruze'c gra.

13

Xhienaag güün bejn ni yayuladx Dios

¹ Ad cwēz güiēdi xcompniaridi bèn rililadx ree Jesucrist. ² Ad yayan-ladxidi gudēē lidxidi yaya'n ree bèn ri't, din zian yu' ree bèn baca' ree xianjl Dios sin guial gagbee reeman chunin.

³ Gol basaaladx bèn yu' ree ladxguiib, gol gunaladx guial nē lējt yu' ladxguiib con laa reeman. Gol been tēē xgab por ree bèn ni cazagdiaj, gol gunaladx guial nē lējt cazagdiaj.

⁴ Gol gojp respejt guialruxhliaa, ad gusquiee lacheelidi. Din Dios zudēēdaman casti bèn za'nē xinguiiaaw o bēngunaa ren, nē gra ree bèn ni rüjn ree ni dxuudx con ree bèn ad najt lacheel reeman.

⁵ Ad sēēbladxidi milia, gol baya'n conform con ni rajpidi din Dios ma rēb: “Gra dxej za'n con lüj, abi' ad yu't dxej gabēladxan lüj.” ⁶ Abi' con confianz zajc yaguie'ch ree:

Da Dadan Dios naj bèn ragnē naj

ad rdxebtan majsi xhietēēz güünnē ree bejn naj.

⁷ Gol basaaladx ree bèn ni gunabee ree lojdi, bèn ni balüü ree lējt xtiidx Dios. Gol been xgab xhienaag gubajn reeman gol binal tēē zi'c bililadx reeman Jesucrist.

⁸ Abi' Jesucrist laagajcaman nieey, laagajcaman yan nē zianczi. ⁹ Ad tiēbidi gusquiee graloj ni rulüü ree bejn lējt, din ad najt reen zi'c rayal chinalidi Cristo. Mazri zagdxe gol gojp confianz xyudar Dios din guibandi xnejz luar chinalidi costumbr xcwent guial xhie zajc gawidi o xhie ad zajct gawidi, din costumbr guin ree achet yudar rüjn ree delant loj Dios.

¹⁰ Dunuj ree raya'p ree tijb bèn güt por dunuj ree, laaman naj zi'c tijb xgon bejn por xtolaman, gon ni ad zajct gaw ree bixhioz rüjn ree sirv lēn yadoo guin. ¹¹ Bixhioz zojbloj guin, laaman rinē xrejn ree be ni rudēēd ree bejn zi'c gon por xtol reeman, rinēman rejn guin lēn yadoo lod rayal chinēman laan. Dxel ree begüt guin re'c reeb ro' guiedx lod achut zojb. ¹² Ziangajc gojc con Jesucrist, ro' guiedx Jerusalén güjtaman par gusiaman bejn xtol reeman por xrejnman. ¹³ Zeel yunaal ree Jesucrist majsi gulēē reeman laaman luguiedx Jerusalén, nē majsi xhietēēz guialxto o guialrzagdiaj yadütud ree zi'c laaman. ¹⁴ Din loj guidxliuj guie ad raya'pt ree tijb guiedx lod ma nabajn ree tiblayaa, dunuj ree caylējz ree lod

yabajn ree tiblayaa. ¹⁵ Zeel con xyudar Jesucrist ad yacwëez ree yadëed ree quixtëe loj Dios, laan naj gon yadëed ree lojman, abi' zian raxhoobdol ree guial nayajc ree xbejnman. ¹⁶ Ad yayanladxidi güüdi ni zagdxe güün tée lasa'di yudar con ni gactzidi, din laa reen naj ni ruladx Dios.

¹⁷ Gol bazoob xtiidx ree bën rniabee lojdi, bën rulüü ree lëjt xtiidx Dios. Gol gojp reeman respejt din laa reeman ruguiaa lëjt din chinalidi xtiidx Dios, guial ragbee reeman yadëed reeman cwent loj Dios. Gol been ni yabaanë reeman ad ni cu'nayat laa reeman, din guial ad ruzoobt diidx achet sirv güünan lëjt.

¹⁸ Gol gurejdx gunab Dios por dunujn. Dunujn rayagbee guial achet ni mal cayguieenan, abi' rayënan guial gra ni yaguieenan, yaguieenan laan xnejz. ¹⁹ Rniaaban lojdi din cwedx guiniabidi Dios por naj, din guneeman permis diob guialan din gazun con lëjt zatijb.

Diidx bigra ni bacan loj gui'ch guie

²⁰ Dios bën rabe'cdxe luxdoo ree bejn, bën basban Jesucrist, rajpaman dunuj ree zi'c rajp tijb bejn xiil, por xguialgüjtaman zianczi ma raya'p ree nejz par yadxin ree loj Dios, ²¹ laaman gagnë lëjt par gra ni naj zagdxe din chile' güüdi zi'c rënman. Laaman gagnë dunuj ree din yayajc ree zi'c rënman guial ma nayajc ree tijbzi con Jesucrist. ¡Laaman rayal yaya'p ree respejt zianczi! Amén.

²² Compniar raliduladx ree Jesucrist, ad narooft gui'ch guie, per rniaaban lojdi ad yalenya'di por ree diidx ni canin lëjt cunen lëjt consejw. ²³ Rugojn tēen lëjt guial ma barii dux compniar ree Timoteo ladxguiib abi' bal nayob gui'taman niz guie, dxel du gropan yo'p yudganajn lëjt.

²⁴ Gol bagajpdioz gra ree bën rniabee lojdi bën ni rulüü ree lëjt, nē gra ree dux compniar ree bën rliladx ree Jesucrist. Abi' ree bën Italia rugajpdioz reeman lëjt.

²⁵ Dios güünle' gradi. Amén

Gui'ch bacaa Santiaaw

Rxhiaal Santiaaw xtiidx Dios

¹ Naj naj Santiaaw, cayünan xchiin Dios në xchiin Dad Jesucrist, ruga-jpdiozan gra ree bën naj xdiaa Israel, nare'chidi guidib guidxliuj.

Quiarguejn zëed loj Dios

² Gradi compniar raliduladx ree Jesucrist, rnin lëjt, gol babaa majsi xhietëez loj guialrzagdiaj tädidi. ³ Lëjt ragbee, chi rdëdidi gralojn guial riladixidi Dad Jesucrist, zian rusiididi gapidi pasens. ⁴ Per gol been nagueijn güün pasens guin lëjt yudar din gaquidi zi'c rën Dios, gusnuudi loj xnejzaman, chitëe guiyadixidi xhienin.

⁵ Bal chu lëjt riaadx chu' mazri xquiarguejn, gol gunab xquiarguejndi loj Dios. Laaman gunees gra ni riaadxidi, ad zabexuutaman guneeman laan. ⁶ Per rayal chiladixidi guial guneeman laan, ad rayalt chu' nawëeguidi, din bën ru nawëeg luxdoo naj zi'c xtüj nijsdoo ni rinë bi ni guiezi. ⁷ Bén naj zian ad cwëzidi gunees Dios ni guiniabidi, ⁸ din bën ru nawëeg, ad rüjntaman tijbzi xgab, ad rinal tëtëetaman tijbzi nejz.

⁹ Lëjt guial najdi bënprob gol babaa, din loj Dios najdi bën zobjloj. ¹⁰ Guiáad lëjt benrijcw, gol babaa guial ma ragbeedi achet lasajc guialrijcw loj Dios, din guialrijcw guin najn ni téd zi'c rdëd guiaa rial dajn. ¹¹ Lëjt ragbee chi rbëe loj gubijdx gojl, dxel rucwiidxan gui'xh, rba'y ree xguiaan, dxel ad nixtri rguianan. Ziangajc benrijcw yu' dxej guiëtaman majsi galay gra ree ni rajpaman.

Bën rdaan ree rdëd loj guialrzagdiaj

¹² Chabaa bën rzudxi'ch loj xnejz Dios rdaan tëeman xhietëez rzajcaman guial riladixaman Jesucrist. Chi ma gudaanman loj guialrzagdiaj, tia'man coron rayalaman, laan naj guialnaban tiblayaa ni cwëb Dios yazaladxaman loj ree bën rën laaman.

¹³ Bal chu rüjn xgab güün ni mal, ad najtan ni naladxaman guial Dios rudxe' xgab guin guijcaman. Din ad yu't dxej guiën Dios güünman ni mal, ni'quid rgu' tëtëetaman xgab guijc bejn güünman ni mal. ¹⁴ Xixgabmal gajc bejn rudëe laaman gan güünman ni mal. ¹⁵ Zeel por xgabmal guin rüjn bejn dol, dxel chi ma rniabee dol guin laaman, stijbzi xcasti Dios rayalaman.

¹⁶ Gradi compniar raliduladx ree Jesucrist, diidxli rënan lëjt, ad gusquiee lëjt gajc. ¹⁷ Graczi xgab zagdxë në gra ni za'c zëed loj Dios, bën been gra ree bajl yu' xanyabaa. Ad yu't dxej guidxaman, zianczi rüjnman ni zagdxë.

¹⁸ Guial guyënman, zeel baneeman guialnaban tiblayaa duloj ree, guial ma raliduladx ree xtiidxaman, din yayajc ree zi'c ree bin yaloj yaca'man loj gra ree ni beenman. ¹⁹ Zeel yan ma ragbeedi nine ree.

Rayal yasa'n ree gra ni mal riga' loj guidxliuj

Rënan lëjt, zeel rnin lojdi gradi compniar raliduladx ree Jesucrist: Gol guzujsin din gucaagdiajguidi, ad yoobladixidi guial guinieedi ni'qui guial yalendi, ²⁰ din bën ralen ad zajct güünman ni rën Dios. ²¹ Zeel gol gulëeladx gra ni ad najt zagdxë në gra ni mal riga' loj guidxliuj guie, gol gojc bënchaawladx, gol bazoob xtiidx Dios ni ma bacaagdiajguidi,

din laan yabëë lëjt loj dol. ²² Per gol been zi'c rëb xtiidxaman, ad aal rucaagdiajgzidan, chitëë gusquiee lëjt gajc. ²³ Din bën rucaagdiajgzidi laan abi' ad rüjntaman zi'c ma bacaagdiajgaman, najman zi'c tijb bën ruguiaa loj guiaawajn, ²⁴ per chi ma ziaman, rayanladxaman xhienaag naj lojman. ²⁵ Per bën ad rayanladxt ni bacaagdiajgaman rüjnman naguiejn chignia'man xtiidx Dios mazri, din laan nayaaloj rabëë tëen dunuj ree loj dol. Rzudxi'chaman loj nejz guin, rüjn tëeman ni rën Dios. Bën güün zian chu' luxdooman zagdxe por ni cayüjnman.

²⁶ Bal chudi naladx zinalidi xnejz Dios zagdxe per ad rajptidi cudad xhienin guinieedi, cusquiee lëjt gajc, dxel achet lasajc guial naladxidi zinalidi xnejz Dios. ²⁷ Din par dux Dad ree Dios bën zinal xnejzaman zagdxe naj bën rüjn yudar xindo bizëjb ree në ree béngunaa bizëjb chi rzagdiaj reeman, rajp tëeman cudad chitëë yabaman loj ni mal riga' loj guidxliuj.

2

Ad rayalt yalej ree loj ree bejn

¹ Gradi compniar raliduladx ree Jesucrist bën rniabee, ad rayalt cwedi loj ree bejn. ² Yaguie'ch ree, chu' tijb bejn lod rado'pidi, najcwaman lajd zagdxe yu' tëë guibnil or yaaman, chu' tëë tijb bënprob najcwaman lajd senci, ³ abi' mazri güüncwentidi bën najcw lajd zagdxe guin, guiëbidi lojman: “Gurej guie, laan naj luar zagdxe”, guiáad loj bënprob guin guiëbidi: “Yagaj guzuli o gurej luyuj zii ya.” ⁴ Chi rüjndi zian, ¿nid cabedi bejn loj gajquidi ya?, ¿nid rula'chidi ya chi rüjndi gra ree xgabmal guin? ⁵ Gradi compniar raliduladx ree Jesucrist, rënan lëjt, gol bacaagdiajg nine: Dios gule bën naj ree bënprob loj guidxliuj din chililadx da't reeman laaman, din yayal reeman lod rniabeeman zi'c cwëbaman loj ree bën rën laaman. ⁶ Guiáad lëjt rusa'n xtudi bënprob ree. Wen, ¿id benrijcw guin ree rusagzi lëjt ya rudxig tëë reeman lëjt loj guxtis? ⁷ ¿Id laagajc reeman rnieeguidx Jesucrist ya, bën naj bënlasajc? Zi'c najman Xi'n Dios, ziangajc najdi xi'n Dios, guial nuchajguidi laaman.

⁸ Bal walidi rüjndi ni ca loj xley Dios, zi'c ca loj xtiidxaman ni rëb: “Guyën bejn ree zi'c rën lüj gajc”, dxel zagdxequi cayüjndi. ⁹ Per bal mazri rüjncwentidi tijb bejn guial loj stjibaman, dxel ma cayüjndi dol, ma rajpidi dol guial ad rüjntidi cumplid xley Dios. ¹⁰ Din bal chutëez zinal gra ni ca loj ley guin per ad rüjntaman tijb ni rayal güünman, ma cusaglojman guidib ley guin. ¹¹ Dios gajc rëb: “Ad sunël xinguaaw ren o béngunaa ren”, rëb tëeman: “Ad gugüjtil bejn.” Per bal id za'nël xinguaaw o béngunaa ren ya per rugüjtil, dxel ma cusaglojl xley Dios. ¹² Zeel gol gunee gol been tëë zi'c ree bën yadëed cwent diidxli loj Dios por xtiidxaman ni rabëë dunuj ree loj dol. ¹³ Din bën ad rayat ree lasa', ad zayat Dios laa reeman dxej güün xguialguxtisaman. Per bën raya ree lasa' ad najtan ni guidxeb reeman dxej guin.

Royal yaguieen ree ni rën Dios

¹⁴ Zeel rnin lëjt, ¿xhie sirv güün bal chu guiëb, rliladxan Dios, abi' ad rüjntaman ni rënman? ¿Wen, guialzi rliladxaman ya gacaman perdon? ¹⁵ Yaguie'ch ree, tijb dux compniar ree, bën rliladx Jesucrist, najman xinguaaw o béngunaa ya, guiyaadx xabaman con ni gawaman, ¹⁶ abi' guiëb tijb lëjt loj reeman: “Yaguiajdi zagdxe, gawidi zagdxe ad gagnajl

tëedi.” Per bal id rudëedi ni riaadx reeman, ¿xhieczy gan guiëbidi zian? ¹⁷ Ziangajc rzajc bën rëb rliadx Dios abi' ad rüjntaman ni rënman, achet lasajc guial rëbaman rliadxaman laaman.

¹⁸ Xt zajc chu na lojl: “Lüj na rliadxil Dios, guiáad naj rünan ni rënman.” Yan balüü naj guial rliadxil laaman guial ad rüjntil ni rënman, guiáad naj gulün guial rliadxan guial rünan zi'c rënman. ¹⁹ Zagdxe rüjnl bal rliadxil yu' tijbzi Dios, per nê ree xindxab rliadx zian, abi' xt rnij reex guial rdxeb reex. ²⁰ Zeel ad bal natontil, bignia' achet lasajc guial chililadx bejn Dios bal id rüjnman ni rënman. ²¹ Basaaladx, dux béngulal ree Abraham, bayagbee Dios laaman zi'c bën ad beent dol, guial beenman ni guyën Dios, chi rëbaman lojman din nugüjt xi'nman Isaac nudëë tëëman laax zi'c gon lojman. ²² Ma qui ruguiaal, guial bililadxaman, zeel beenman ni guyën Dios. Guial beenman zian, zeel biguien guial diidxli bililadxaman laaman. ²³ Zian gojc cumplid ni ca loj xtiidx Dios, lod rëb: “Bililadx Abraham Dios, zeel bayagbeeman laaman zi'c bën ad beent dol”, bayagbee tëë ree bejn laaman zi'c tijb xmiw Dios.

²⁴ ¿Ma bignia'di yan ya? Rayagbee Dios bejn zi'c tijb bën ad wayüjnt dol guial rüjnman ni rënman, ad gualzi rëbtaman rliadxaman laaman. ²⁵ Ziangajc gojc con tijb bën brii laj Rahab, bën goc béngunaa dxuudx, bayagbee Dios laaman zi'c bën ad beent dol guial beenman ni rën Dios, chi badëed lidxaman baquie'chloj tio'p ree bën Israel we ladxaman biquiaa reeman xhienaag chu' ree xsuldad reeman, been tëëman laa reeman yudar persi zia reeman nejz ren. ²⁶ Din bën achet xsprijt ad zajct guibanman. Ziangajc rzajc tijb bën rliadx Dios: bal id züjnman zi'c rënman, achet lasajc guial rëbaman rliadxaman laaman.

3

Du lüdx ree naj zi'c tijb luar lod guidxa ni mal

¹ Gradi compniar raliduladx ree Jesucrist, rnin lëjt: Ad bal ziendi guiën gac mextr gulüü xtiidx Dios, din ma ragbeedi, dunujn guial ralüün xtiidxaman, mazri zro' naj gualguxtis ni güün Dios con dunujn bal id zaguieenan zi'c rayal. ² Du graczi ree rüjn xhietëez dolan gan yu' dxej, per bal chu lëjt ad rüjnt dol ni'qui tijb diidxguijdx ad ririi tëët ro'di, najdi bën naya delant loj Dios, rajc tëë rniabee lëjt gajc. ³ Lëjt ragbee, chi ralu' ree fren ro' ree way din che reeb lod rayën ree, zian raguieen ree gan ranabee reeb. ⁴ Ziangajc ree barcw, majsi narooob reen, majsi por mazz rucadxaa bidoxh laa reen, per con tijb guiibdobëz ni la timón, con laan ma zajc chinë bejn laan lod rëntzaman. ⁵ Ziangajc naj du lüdx ree, najn ni dobëz, per narooob gualquia rüjnman. Najn zi'c tijb guij dobëz, per majsi najn ni dobëz, rüjnman gualquia narooob ruze'can dajm narooob. ⁶ Du lüdx ree naj zi'c tijb guiij, zajc yanee nê' reen ganax ni mal yu' loj guidxliuj. Bal id zaya'p ree cudad, du lüdx gajc ree guxhiin dunuj ree, dxel zianczy grii diidx zëed loj xindxab du ro' ree. ⁷ Rayagbee ree guial graloj ree bedoxh zajc gagnadoo, xt nê ree be rzuj nê ree bëel nëtëë ree be yu' loj nijs, yan ma gognadoo reeb por ree bénguidxliuj. ⁸ Per lüdx bejn achut wayüjn gan nabee laan, najn zi'c tijb ni ad zajct gagnadoo, zi'c tijb ni guidxa venen rugüjt. ⁹ Con du lüdx ree ranee ree diidx zagdxe par dux Dad ree Dios, abi' con laagajcan raneeguijdx ree bejn, bën bejn gajc Dios zi'c najman. ¹⁰ Gradi compniar raliduladx ree Jesucrist, du ro' ree ririi diidx zagdxe nê diidxguijdx, per ad rayalt gacan zian. ¹¹ Lëjt ragbee, lod rajch nijs

zagdxe ad zajct grii nijs naxij, ¹² ad zajc tēet tia aceitunas loj yag higo, ad za zajct tia higo loj yag uv, ad zajc tēet grii nijs zagdxe lod ririi nijs naxij.

Ni rüjn bén ca' quiargueijn rudēē Dios

¹³ Bal chu lējt naladx rajc rignia' tēē gra xtiidx Dios, rayal gacaman bēnchaawlaxd guiban tēēman zi'c rayal, zian guiguien guial yu' xquiargueijnman. ¹⁴ Per bal guidxa guialnadēdloj luxdoodi rēn tēēdi gra par lējt gajc din gaquidi mazri bēn zojbloj, ad güüdi benro' guial rajquidi xtiidx Dios, cusqueezidi guial rüjndi zian. ¹⁵ Lasa' quiargueijn guin ad Diost rudēē laan, xquiargueijn gajc bēn riga' loj guidxliuj guien, zēēd tēēn loj xinxab. ¹⁶ Din lod yu' guialnadēdloj lod yu' tēē bēn rēn gra par laagajcaman, ni yu' wadijl nē gra loj ni mal. ¹⁷ Per bēn rajp quiargueijn runeē Dios, yaloj rüjnman naguieijn guibanman zagdxe lojman, gac tēēman bēn ad rüjnt nabē, nē benza'c, gap tēēman bejn ree pasens, yayaman bejn ree, gacaman benza'c con ree bejn, ad zabejtaman loj ree bejn güün tēēman cumplid ni guinieeman. ¹⁸ Bēn rüjn ree naguieijn ribajn sin wadijl, raguuil reeman mod guinieenē reeman bejn zagdxe, zian rbajn reeman zi'c rēn Dios.

4

¹ ¿Ban zēēd guial ralen lasa'di nē guial rdilidi? ¿Id zēēdan por xgabmal ni rüjndi ya? ² Rzēēbladxidi gapidi ni ad rajptidi, zeel xt rugüjt lasa'di din tia'di ni rēndi, rdēdloj tēēdi bejn ree, abi' bal id zajc gapidi ni rajp reeman, dxel ralen lasa'di abi' rdilidi. Per diidxliczi ad rajptidi ni rēndi, din ad rniabtidan loj Dios. ³ Abi' bal rniabidan, ad runeetaman laan, din ad rniabtidan par güüdi ni zagdxe, rēnzidan din guibandi zi'ctzi rēndi. ⁴ Bēn rusquee! ¿Id ragbeedi ya guial chu rinal ni mal yu' loj guidxliuj ad zajct gaquidi xmiw Dios? Zeel bal chu rēn chinal ni mal guin, laagajcaman za' contr Dios. ⁵ Ad ca xlia'tzi loj xtiidxaman lod rēb: “Badxe' xSprijt Dios du luxdoo ree, rēnman Sprijt guin, xt neelojman laaman.” ⁶ Dád zro' naj yudar rüjn Dios dunuj ree, zi'c ca loj xtiidxaman lod rēb: “Dád naza'c Dios con ree bēn rüjn naya lojman, per ad rüjn cwenttaman bēn rüjn ree benro'.” ⁷ Zeel gol bazoob xtiidx Dios, ad gudēēdi mod güün xinxab lējt gan, zian chiquiedix loj xnejzidi. ⁸ Gol gubig loj dux Dad ree Dios din güün cwentaman lējt, guiáad lējt bēndol, gol bariica loj dol, guiáad ree bēn yu' nawēēg luxdoo guial chinalidi xnejz Dios, con guidib luxdoodi gol binalaman. ⁹ Gol guyu xgab, gol guyu naya gol biin tēē por xtolidi, luar guxijdxidi gol biin, luar chu' luxdoodi nix gol guyu naya, ¹⁰ gol been naya loj Dios, din guiliesaman xvaloridi.

Ad rayalt yala'ch du lasa' ree

¹¹ Gradi compniar raliduladx ree Jesucrist, ad bal rnieeguijdx lasa'di, din bēn rnieeguijdx o bēn rula'ch lasa', ma caneeguijdxaman cula'ch tēēman xley Dios. Bal rula'chidan, ad cayüjntridi zi'c rniabeen, lējtli ma canabee laan. ¹² Per tijbzi Dios basa'n ley guin rüjn tēēman guialguxtis, laaman ca' guialrniabee guial yabēēman nē guial gunijtaman. Per lüj, ¿chu najl zeel rula'chil bejn?

Dux guialnaban ree naj ni tibrajtzi

¹³ Yan gol bacaagdiajg nine lējt bēn rēb ree: “Yan o guixie ya yo'n loj tijb ciuda, ni yadxu'n tib ijz, yaguieenan negojs lod yaguieenan gan zro'

da't milia.” ¹⁴ Ni'quid ragbeetidi xhie gac guixie, din dux guialnaban ree naj zi'c tijb bëj rguien tibrajt, stibrajt ma gunidlojn. ¹⁵ Zagdxeli naj guiëbidi: “Bal gunee Dios dunujn guialnaban, yaguieenan nine o ni ni ya.” ¹⁶ Per lëjt mazri zinalidi xtiidx dxalidi, abi' laa reen naj ni mal. ¹⁷ Zeel bën ragbee xhienaag güünman ni zagdxë abi' ad rüjntaman laan, ma cayünman dol.

5

Ni rüjn ree benrijcw

¹ ¡Lëjt, najdi benrijcw! Gol bacaagdiajg nine, gol biin gol gurixdiajg tëë, din ma zëëd lod sagdiajdi, ² tant zien ni rajpidi xt rxin reen, guiáad xabidi xt raw be laa reen. ³ Gra or në plajt ni rajpidi xt rzobëj reen, laagajc reen rulüü ni mal rüjndi, laagajc reen gac zi'c tijb bajl gustib lëjt. Ma zidyob güün Dios xguialguxtisaman, guiáad lëjt gule'cchaaw ni lasajc ree loj guidxliuj guie. ⁴ Gol baguiaa, laa ree bën been xchiindi canab din quixidi laa reeman, xt Dios bën ca' gra guialrniabee ma biguiejn guial caygu' reeman guialquia. ⁵ Nabandi zi'ct rëndi, per cusni'szidi ni ad züjnt lëjt sirv chi guidxin dxej güün xguialguxtis Dios. ⁶ Din xt baguillidi mod persi bagüjtidi bën ad beent ree xhienin, abi' achet gojc nüjn reeman chitëë niëjt reeman.

Royal yarejdx ree Dios yaya'p tëë ree pasens

⁷ Gradi compniar raliduladx ree Jesucrist, gol gojp pasens xt dxej gui't dux Dad ree Jesucrist stijb, zi'c rdaan tijb bën rüjn dxiin dajñ, rbëzaman guia yaloj xt guia bigra din yalesaman ni guxübinman. ⁸ Ziangajc lëjt gol gojp pasens, ad yalenyadi, din ma zidyob dxej gui't dux Dad ree Jesucrist.

⁹ Rni tëën lëjt, ad yalenyadi në lasadi, chitëë xhie casti yayalidi, din ma zidyob dxej güün xguialguxtis Dios. ¹⁰ Gol binal zi'c been ree bën badëë xtiidx Dios loj ree bejn, gojp reeman pasens gudaan tëë reeman graloj guialrzagdiaj gudëd reeman. ¹¹ Rayagbee ree guial xiquilbaa ree bën rdaan loj guialrzagdiaj. Ma biguiejndi xcwent bën brii laj Job, xhienaag gudaanman chi guzagdiajman, ragbee tëëdi xhienaag beennë Dios laaman, chi gulox gudëdaman loj gra guialrzagdiaj guin, din Dios dáad naza'caman raya tëëman bejn ree.

¹² Gol gojp cudad chi rüjndi xhie compromisan loj bejn, ad guza'tidi Dios o xhie stijbnin ya, chitëë gudëëd Dios lëjt casti, zagdxeli naj guinieedi diidxli güün tëë xtiidxidi cumplid.

¹³ Bal chu lëjt cazagdiaj, gol gurejdx Dios, o bal yu' luxdoodi zagdxë, gol biil par laaman. ¹⁴ Guiáad bal ragxuu tijb lëjt, royal guinieedi bën rniabee ree lëjt guial najdi bën riladx Jesucrist, din cwedx reeman Dios por laaman quiëëb tëë reeman laaman sejt por laj Jesucrist. ¹⁵ Bal cwedx reeman Dios con guidib luxdoo reeman, zayajc bënragxuu guin, yales Dios laaman, abi' bal xhie dolan ma beenman, güünman laan perdon. ¹⁶ Zeel gol baxhoobdol loj lasadi gol gurejdx tëë Dios por lasadi din yayajquidi, din tijb bën zinal xnejz Dios, chi rbejdxaman laaman, rüjn cwentaman laaman. ¹⁷ Zi'c bën brii laj Elías bën badëë xtiidx Dios loj ree bejn, gojcaman bënguidxliuj zi'cgajc dunuj ree, abi' chi gudi'n gunabaman loj Dios guial ad zalt guia, dxel ad golt guia choon ijz

garol. ¹⁸ Chi guredxaman Dios zatijb, zianz bazuloj gol guia, dxel bayu guialnaza'c loj guidxliuj.

¹⁹ Gradi compniar raliduladx ree Jesucrist, bal chu lëjt rarii loj xnejz Dios abi' por stijb bejn yayejquidi, ²⁰ gol gogbee guial chutëez Bén rasiejc tijb bëndol loj nejz zagdxe chitëë chinalaman ni mal, laaman rabëë bëndol guin loj casti, abi' majsi ma beenman zien dol, gran gac perdon.

Gui'ch yaløj bacaa San Pedr

Rxhiaal Bëd xtiidx Dios loj ree bejn

¹ Naj Bëd, najn tijb xi apóstol Jesucrist, laaman guxhaal naj, cucan gui'ch guie par lëjt najdi bën bire'ch gra lad abi' zøjbidi guiedx riga' ree niz Ponto, Galacia, Capadocia, Asia Menor nè Bitinia. ² Ma gulej dux Dad ree Dios lëjt diidz gocli, zi'c goc xixgabaman. xSprijtaman gulëca lëjt din guzoobidi diidx gac tëe luxdoodi naya delant lojman por xrejn Jesucrist. Zro' güünle' Dios lëjt yabe'cdxe tëeman luxdoodi.

Ni ralëjz ree gunee Dios

³ Quixtëe Dios xdad Dad Jesucrist, guial rayaman dunuj ree. Laaman bachaa mod nabajn ree guial baban Jesucrist loj ree bengüt, zeel zro' naj ni ralëjz ree gunee Dios. ⁴ Abi' yaca' ree ni nagu'chaawaman xanyabaa par dunuj ree, laan naj ni naya gra tiamp, ad rxintan, ad yu' tëet dxej nitan. ⁵ Guial rliladxidi Dios, laaman rnij lëjt con xguialrniabeeman, din chi guidxin dxej nit guidxliuj, dxel gagbee gra bejn guial ma beenman lëjt perdon.

⁶ Zeel rabaa da'tidi majsi tëdidi graloj guialrzagdiaj tiblädëd, ⁷ din por guialrzagdiaj guin guiguien chu diidxli rliladx Dios, zi'c rüjnnë reeman or, rudëed reeman laan loj bajl din gagbee reeman bal najn ganax or. Or guin najn ni rnidloj, zeel mazri lasajc guialrliladx laaman, bal chu taan xhietëez loj guialrzagdiajn, din ad yu't dxej nit xguialrliladxidi. Abi' dxej gui't Jesucrist stijb, lasa' guialrliladx guin naj ni ruladx Dios, gui'ad ree bejn nè ree anjl gaza't reeman laaman zagdx gap tëe reeman laaman respejt guial rusnuu rliladxidi laaman.

⁸ Ad waguiaatidi Jesucrist per rëndi laaman, abi' yan rliladxidi laaman majsi ad waguiaatidi laaman, dád nix yu' luxdoodi abi' tant nix yu' luxdoodi, xt ad radxejlt xhienaag guiëbidi, ⁹ din lëjt ragbee, guial rliladxidi, ma nüjn Dios lëjt cwent zi'c ree bën achet xtol.

¹⁰ Diidz gocli, bën badëe ree xtiidx Dios loj ree bejn basiid reeman been tëe reeman naguiejn niagbee reeman xhienaag güün Dios bejn ree perdon, abi' rëb reeman xhienin güün Dios par lëjt guial najman benza'c. ¹¹ Por xSprijt Jesucrist gogbee reeman diidz gocli guial sagdiajman zianz qui gapraman guialrniabee, dxel been reeman naguiejn niagbee reeman chu benan sac zian goc tëe gac zian. ¹² Per balüü Dios laa reeman guial ni gunee reeman ad najtan par laagajc reeman, najn par lëjt, abi' yan lëjt ma rignia'di ni guin ree por ree bën catie'ch xtiidxza'c Jesucrist por xguialrniabee Sprijt zëed xanyabaa. Nè ree anjl ma rën nejzdoog gagbee nine ree.

Ze rayal guiban ree xi'n Dios

¹³ Zeel gol guzusin gol bastëdguien tëe, con guidib luxdoodi gol gulëjz ni gunee Dios guial najman benza'c, dxej gui't Jesucrist stijb. ¹⁴ Zi'c ree xi'n Dios nazobdiidx reeman, ad bal guibanridi zi'c gubandi gocli chi gadidi güünbee laaman. ¹⁵ Laaman gule lëjt, zeel gol been naguiejn guibandi naya delant lojman, din laaman naj bën naya nali. ¹⁶ Zi'c rëb loj xtiidxaman: “Gol gubajn naya delant lon, din naj naj bën naya nali.” ¹⁷ Yan bal rnieedi Dios “Dad”, bën rüjn xguialguxtis tibloj, bal conin

rŭjn tijb gaj bejn, rayal gapidi laaman respejt guidib tiamp guibandi loj guidxliuj guie. ¹⁸ Din lĕjt ragbee guial babĕĕman lĕjt loj costumbr ni basa'nnĕ ree xbĕngulalidi lĕjt, costumbr ni ad rŭjnt ree sirv, abi' lĕjt ragbee guial gojx din yariidi loj reen, per ad gojxt con ree ni rnijt, zi'c or o plajt ya, ¹⁹ gojx con xrejn za'cdxoon Jesucrist ni guxie'man loj crŭjz chi gŭtaman zi'c tijb xiil zagdxo be ad naxint, be rugŭjt reeman par Dios por xtol ree bejn. ²⁰ Diizd chi gad guidxliuj gacchaaw, mal gulej Dios laaman din sacaman zian, yan ma guzajcaman zian guial rĕnman lĕjt. ²¹ Zeel por laaman rliladxidi Dios bĕn basban laaman badĕĕ tĕĕman guialrniabee lojman, yan con guidib luxdoodi ma rliladxidi Dios rbĕz tĕĕdi ni guneeman.

²² Yan, guial ma ruzoobidi xtiidxaman ni naj diidxli, ma naya luxdoodi delant lojman din guiĕn lasa'di zi'c rayal, zeel gol guyĕn lasa'di con guidib luxdoodi. ²³ Din ma bidxaa mod nabandi, zi'c rulŭŭ gojlidi stijb, abi' guialnaban zinalidi ad zĕĕdtan por tijb bĕn nit, zĕĕdan por xtiidx Dios, diidx naban, diidx ni ad zanijtt, ²⁴ din loj xtiidxaman rĕb:

Gra bĕnguidxliuj naj zi'c gui'xh dajn,
 guiáad ni rajp reeman naj zi'c xguiaa gui'xh guin.
 Rbidx gui'xh guin, abi' riajb xguiaan,
²⁵ per xtiidx Dios ad yu't dxej nitan.
 Abi' laan naj xtiidxza'c Jesucrist ni ma biguejndi.

2

¹ Zeel gol basa'n gra ni mal, gra ni rusquiee, ad bal rŭjnzidi, gol basa'n guialnadĕdloj nĕ guial rnieeguijdx lasa'di. ² Zi'c re'c ree xindo quigojlnjezri dud, zian gol been naguiejn chignia'di xtiidx Dios, din gusnuu gagbeedi mazri xhienaag rayal guibandi din yabandi loj ree bengŭt con gra ree bĕn nuchajg Jesucrist chi gui'taman stijb, ³ bal walidi ma ragbeedi guial naj Dios benza'c.

Jesucrist naj zi'c guiaj naban

⁴ Gol bibig loj Jesucrist, laaman naj zi'c guiaj naban. Been ree bĕnguidxliuj laaman tibladi, per par Dios najman bĕn lasajc, laaman gule laaman. ⁵ Ziangajc lĕjt, guial ma rliladxidi Jesucrist, najdi zi'c ree guiaj naban ni cayajcnĕ xyadoo Dios. Najdi bixhioz naya luxdoo rŭjn sirv lojman, din nabandi zi'c ruladx Dios, laan naj ni rudĕĕdi lojman zi'c gon por Jesucrist. ⁶ Rĕb loj xtiidx Dios:

Gol baguiaa, guzoban tijb guiaj zagdxo luguiedx Jerusalĕn.
 Laan naj guiaj nabee, guiaj zojbloj, nilasajc tĕĕ.
 Bal chu chililadx laan,
 ad yu't dxej yaya'nxtuman.

⁷ Par lĕjt, guial rliladxidi Jesucrist, laaman naj zi'c guiaj lasajc da't. Per par ree bĕn ad rliladxt rajc cumplid ni rĕb loj xtiidx Dios, lod rĕb:

Guiaj ni gulĕĕgo'n ree bĕn rŭjn yu,
 yan laan naj guiaj zojbloj.

⁸ Rajc tĕĕ cumplid ni rĕb stib lajt loj xtiidxaman, rĕban:

Laaman naj guiaj rirejl guia' ree bejn,
 abi' rureeyujn laa reeman.

Rzajc reeman zian, guial ad ruzoobt reeman xtiidx Dios, zian rajc ni rĕbaman xcwent reeman.

⁹ Per lëjt naj bén guleman, najdi bixhioz rüjn ree sirv lojman, guial najman dux rey ree. Lëjt ma naya luxdoo delant lojman, abi' gulejman lëjt din chigtie'chidi diidx xcwent ree ni zagdex rüjnman. Laaman babëë lëjt loj nejz mal, persi bagu'man lëjt loj xnejz za'cdxoonman. ¹⁰ Gocli achutczí najdi, per yan ma najdi xbejn Dios. Gocli ad ragbeetidi guial raya Dios lëjt, per yan ma ragbeedi.

Zi'c rayal guiban ben rliiladx Dios

¹¹ Gradi compniar raliduladx ree Jesucrist, rniaaban favor lojdi, zi'c zio'p ree loj guidxliuj guie tibrajtzi, ad bal tiëbidi güün ree xgab mal lëjt gan, din xgab mal guin ree rüjn naguiejn zianczi din gusa'n ree bejn xnejz Dios. ¹² Gol gubajn zagdex loj ree bén ad nünbeet laaman, zian majsi rnieeguijdx reeman lëjt yan, rëb reeman najdi benmal, per chi guguaa reeman guial zagdex naj ni cayüjndi, dxel guza't reeman laaman zagdex, dxej ni yadëed reeman cwent lojman.

¹³ Guial rililadxidi Dad Jesucrist, gol bazoob xtiidx gra ree bén rniabee loj guidxliuj guie. Gol bazoob xtiidx pristent rniabee xnaciondi ¹⁴ në xtiidx gobernador bén rxhiaalaman din gudëëdaman casti bén rüjn ree ni mal guilies tëëman xvalor ree bén rüjn ni zagdex. ¹⁵ Din rën Dios güündi ni zagdex ree din gucwëëzidi ro' ree bentont ad rignia't abi' rnieeguijdx reeman lëjt.

¹⁶ Zajc güündi zi'c rëndi, per ad por ziantzi güündi ni naj ni mal, gol been zi'c rayal güün ree xbejn Dios. ¹⁷ Gol gojp respejt gra bejn zi'c rayal, gol guyën ree bén rililadx Jesucrist, gol bidxeb Dios, gol gojp tëë respejt pristent rniabee xnaciondi.

Gol gudaan loj gualrzagdiaj

¹⁸ Lëjt bén naj ree mojs, gol bazoob xtiidx ree xpatrondi, gol gojp tëë reeman respejt, ad bén najtzi ree benza'c raya tëë reeman lëjt, në ree bén naj bendxuudx. ¹⁹ Din zagdex naj guial chu rdaan loj gualrzagdiaj, majsi ad rayaltaman laan, rdaanman laan guial rënman güünman ni ruladx Dios. ²⁰ Bal chu lëjt rzagdiaj por ni mal rüjndi, achet lasajcan, per bal rzagdiajdi por ni zagdex rüjndi abi' rdaandi loj gualrzagdiaj guin, laan lasajc delant loj Dios, ²¹ din par zian gulejman lëjt. Guzagdiaj Jesucrist por lëjt, zian balüüman lëjt xhienaag guibandi din chinalidi xnejzaman. ²² Ad yu'tczi dxej beenman dol abi' ni'qui tijb diidx rusquiee ad briit ro'man. ²³ Chi rëb reeman diidxguijdx lojman, ad badxi'taman laan con diidxguijdx, chi basagzi reeman laaman, ad rëbtaman loj reeman guial yaguijx reeman ni cayüjnnë reeman laaman, graczan basa'nman loj Dios bén rüjn xguialguxtis zi'c rayal. ²⁴ Guzagdiaj Jesucrist loj crüzj por dux tol ree persi babëëman dunuj ree lojn din yabajn ree zi'c rën Dios, abi' por lod bidxeelguijdxaman ma bayünman du luxdoo ree naya. ²⁵ Gocli gubajndi zi'c xiil rzëëb, per yan ma najdi xbejn Jesucrist bén rën lëjt rajp tëëman lëjt zi'c tijb bén rajp xiil.

3

Zi'c rayal guiban ree bén ca' lasa'

¹ Në lëjt béngunaa ma yu' ree lacheel, gol bazoob xtiidx lacheelidi, din bal chu lacheelidi ad rililadxt xtiidx Dios, per chi guguaa reex zi'c nabandi, dxel guililadx reex. Ad rüjnt naguiejn xhie guie'bidi loj reex, ² chililadx reex guial guguaa reex nabandi zi'c rayal rajp tëëdi laa reex

respejt. ³ Chi rzujchaawidi, ad bal rdëdlaj rüjnchaaw guidxguijquidi ni'qui guial güüdi ujs ganax ni or o gacwidi ganax lajd lasajc. ⁴ Mazri zagdxë naj guial güüdi naguiejn gac luxdoodi naya delant loj Dios, gol gojc benza'c në Bén chaawladx, din laan ad yu't dxej nitan, abi' laan mazri lasajc delant lojman. ⁵ Din zian gubajn ree béngunaa binal ree xnejzaman goc da't, bililadx reeman laaman bazoob tëë reeman xtiidx lacheel reeman. ⁶ Zian been Sara, bazoob xtiidx lacheelaman Abraham, abi' guneeman laaman "Dad". Gaquidi zi'c xi'n Sara, bal rüjndi ni zagdxë sin gualrdxëb.

⁷ Ziangajc lëjt xinguaaw, gol gubajnnë lacheelidi zagdxë, gol gojp reeman respejt ad gualzi najt reeman Bén nada, rayal güüdi zian guial në reeman rayal gualnaban tiblayaa razaladx Dios, guial najman benza'c. Zian gol gubajn, chitëë xhie gudxe' nawëëg lëjt chi cwedx guiniabidi laaman.

Xhie rayal güüdi chi xhie güün në reeman lëjt

⁸ Zeel rnin loj gradi: Gol gubajnnë lasa'di zagdxë, gol bachajg lasa'di, gol been xgab tijbzi, gol guyën lasa'di zi'c rayal, gol gojc benza'c në Bén chaawladx. ⁹ Ad yadxi'di ni mal rüjn ree bejn lëjt, ad yadxi'di diidxguijdx ni na reeman lojdi, gol gurejdx Dios din gagnëman laa reeman, din Dios gulej lëjt par gagnëman lëjt. ¹⁰ Din rëb loj xtiidxaman:

Bén rën guiban zagdxë chu' tëë luxdoooman zagdxë, rayal gapaman cudad ad guinieeman diidxguijdx ad guinee tëëman diidx rusquiee.

¹¹ Cwëëladxaman ni mal, güünman ni zagdxë güün tëëman naguiejn guibannë ree lasa'man zagdxë, zian rayal guibanman zianczi.

¹² Din dux Dad ree Dios rniaj Bén rüjn ree ni rënman rüjncwent tëëman xtiidx reeman chi rbejdx reeman laaman, per ralenman Bén rüjn ree ni mal.

¹³ Achut güün lëjt ni mal, bal cayüjndi naguiejn güüdi ni zagdxë. ¹⁴ Per xiquilbaadi bal cusagdiaj bejn lëjt guial cayüjndi ni zagdxë. Ad chu'di xgab ad guidxëb tëëdi por zian, ¹⁵ gol gojp respejt gol badxe'guijc tëë dux Dad ree Jesucrist. Gol guzujsin din yadxi'di xtiidx ree Bén guiniabdiidx lojdi xcwent ni rliladxiidi, per gol badxi' xtiidx reeman zagdxë con diidx zagdxë ree. ¹⁶ Gol gubajn zagdxë din guiguien guial achet ni mal yu'guijquidi din yaya'nxtu ree Bén rnieeguijdx lëjt, guial rüjndi ni zagdxë rliladx tëëdi Jesucrist. ¹⁷ Mazri zagdxë naj sagdiaj bejn guial güünman ni zagdxë, bal zian rën Dios, luar sagdiajman guial güünman ni mal.

¹⁸ Din xt Jesucrist guzagdiaj, güjtaman tib voltzi por dux tol ree majsi ad beentaman dol, per güjtaman duxcwent ree nayajc ree béndol, zian guxhalaman nejt din gac yadxin ree loj Dios, güjtaman zi'c bénguidxliuj per babanman por xSprijtaman. ¹⁹ Chi gadaman yaban, wej xSprijtaman bigneenëman xsprijt ree bengüt lod nayaaw reeman. ²⁰ Sprijt guin ree naj xsprijt ree Bén ad bazoobt diidx tiamp gulal, chi guban Noé loj guidxliuj guie, chi gop Dios laa reeman pasens la'tgaj cayüjn Noé barcw, abi' xhujnzi bejn gulaa loj nijs banijt guidxliuj tiamp zii. ²¹ Nijs guin naj zi'c gualrirobnijs ni rulüü guial ma nayajc ree perdon. Gualrirobnijs guin ad rënt guiëban guial najn par gusian dux cuerp ree, rulüün guial caynaab ree loj Dios din yaya dux quiarguejn ree, guial ma raya'p ree gualnaban cüb guial baban Jesucrist loj ree bengüt, ²² Bén bayè'p xanyabaa abi' za'man xladbee Dios lod canabeeman anjl ree në ree sprijt ca' gualrniabee.

4

Gol beennē quiarguejn ni banee Dios dxiin

¹ Zeel zi'c gudēd Jesucrist loj gualrzagdiaj, nē lējt rayal taan lojn. Din por gualrzagdiaj guin rūjn bejn dol tiblād, ² din gūnman zi'c rēn Dios guidib xgualnabanman luar gūnman zi'c naj xixgabaman. ³ Xchej da't gubajndi zi'c naban ree bēn ad nūnbeet Dios, gubajndi zi'ctzi guyēndi, beendi zi'ctzi gojc xixgab dxuudxidi, gu'di, badxajg lasa'di persi beendi nidxuux ree, guzūdx da'tidi, guyēn tēēdi ni ad najt ree Dios, laan naj ni rbijxhlād Dios. ⁴ Per yan guial ad zinaltridi zi'c naban ree bēn naban zian, zeel radxa loj reeman, rnieeguijdx tēē reeman lējt. ⁵ Per rayal yadēēd reeman cwent loj Dios bēn za' par gūn xgualguxtisaman con ree bēn naban nē ree bēn ma gūjt. ⁶ Din nē ree bēn ma gūjt biguejn xtiidx Dios chi guban reeman loj guidxliuj guie, din guiban reeman loj Dios majsi par ree bēnguidxliuj ma gūjt reeman.

⁷ Ma zidyob dxej nit guidxliuj, zeel gol bastēdguien gol guzujsin tēē din cwedx guiniabidi Dios con guidib luxdoodi. ⁸ Ad yayanladxidi guial guiēn lasa'di zi'c rayal, din bēn rēn lasa' rūjnman perdon majsi xhietēēz rūjnnē reeman laaman. ⁹ Bal yu' tijb xcompniaridi rniab luar lidxidi din yaya'nman, gol badēēdsii lidxidi con guidib luxdoodi ad yalenya'di. ¹⁰ Loj tijb gajdi ma banee Dios quiarguejn din gūūndi ni rayal gūūndi. Zeel gol been lasa'di yudar con ni rajc rūjndi, din guiguien guial cayūjndi zi'c rayal con quiarguejn ni bazaladxaman lojdi. ¹¹ Bal chu lējt ca' quiarguejn par gulūū xcompniaridi, rayal guinieedi ni naj diidxli zi'c tal rēb loj xtiidx Dios, ziangajc bēn ca' quiarguejn par gūnman yudar dux compniar ree, rayal gūūnman laan con gojl razalād Dios lojman. Gra ni cayūjndi, gol beenan din guza't ree bejn Dios zagdxē por Jesucrist, bēn rayal respejt nē gualrniabee zianczi. Amén.

Gol gudaan gra gualrzagdiaj

¹² Gradi compniar ralidulād ree Jesucrist, rēnan lējt, zeel rnin lojdi, ad ru nawēēguidi guial zro' naj loj gualrzagdiaj cadēēdi, din laan naj zi'c prueb par lējt. Ad rudi xgab chexc zeel cazajquidi zian. ¹³ Gol babaali chi cazagdiajdi zi'c guzagdiaj Jesucrist, din ziangajc yabaadi chi guguaadi xbianiman dxej gui'taman stijb. ¹⁴ Xiquilbaadi bal chu na diidxguijdx lojdi guial zinalidi Jesucrist, din gra dxejczī za'nē xSprijt Dios lējt, bēn ca' gualrniabee. ¹⁵ Achet lasajc bal cazagdiajdi guial bagūjtidi bejn, o por gualgubaan, o por guial rūjndi ni mal o guial rudi lod ad rayaltidi. ¹⁶ Per bal chu cazagdiaj guial zinalaman xnejz Jesucrist, ad rayalt yatuman, rayal gudēēman quixtēē loj Dios guial ma najman xbejn Jesucrist.

¹⁷ Gol gogbee, guial rtiējb Dios rzagdiaj ree xbejnman din guzoob reeman diidx, abi' bal dunuj ree nayajc ree xbejnman cayza'c ree zian, xhieczi naag sac ree bēn ad rēnt guzoob xtiidxza'caman. ¹⁸ Nacli ree bēn zinal xnejz Dios nawēēg naj guial yaguaiaj reeman xanyabaa, piorli ree bēndol bēn ad nūnbeet ree Dios, xhieczi naag naj luar lod yaya' reeman. ¹⁹ Zeel bēn cazagdiaj ree zi'c naj xixgab Dios, rayal gusunū gūūn reeman ni zagdxē gusa'n tēē reeman gran loj Dios, laaman gagnē laa reeman. Laaman bazalād guialnaban rūjn tēēman zi'c rayal.

5

Consejw par ree bēn rilād Jesucrist

¹ Yan rēnan gudēdan consejw loj ree bēn rniabee ree lojdi, naj guial ca'n guialrniabee zi'cgajc laa reeman, naj tēen testiw xcwent ni guzagdiaj Jesucrist, zi'cgajc laa reeman guguan xbianiman dxej gui'taman stijb, zeel rēnan guiēn nine ree loj reeman. ² Rnij lojdi, gol gunaj ree xbejn Jesucrist, bēn rayal ree gulūūdi din gusnuu chinal reeman xnejz Dios. Ad gūūndi dxiin guin gualzi ragbeedi rayal gūūndi laan, gol beenan guial yu'di gan gūūndi laan, con guidib luxdoodi gol beenan, ad bal gūūndi laan gualzi rzēēbladxidi milia. ³ Ad guial ca'tidi guialrniabee din nabeedi zi'c tal rēndi, rayal guibandi zagdxe din guguaa ree bēn rliladx Jesucrist din guiban reeman zian, ⁴ din chi gui't bēn rniabee dunuj ree stijb, dxel guneeman tijb niza'cdxoon ni ad yu't dxej nit.

⁵ Ziangajc lējt xinguiag, gol bazoob xtiidx ree bengol. Gradi zi'c xinguiag ree zi'c ree bengol, gol been naya gol bazoob tēē xtiidx ree xcompniaridi, din:

Ralen da't Dios bēn rūjn ree benro',
per dād benza'can con ree bēn rūjn naya.

⁶ Zeel gol been naya loj Dios, bēn ca' gra guialrniabee, din guiliesaman xvaloridi chi guidxin dxej. ⁷ Gol basa'n gra xgab yu'di loj Dios, din laaman rniaj lējt.

⁸ Gol guzujsin, gol gojp cudad, din xinxab xin ralen da't lējt, za'x zi'c tijb beedx rliaan, rguuilix chu gūūnx gan. ⁹ Zeel ad tiēbidi gūūnx lējt gan, gol guzujdxi'ch loj ni rliladxidi, din ragbeedi guial zi'c cazagdiajdi, ziangajc cazagdiaj ree bēn rliladx Jesucrist guidib guidxliuj. ¹⁰ Per chi ma gudēdidi ta'n loj guialrzagdiaj, dxel gagnē Dios din gusnuu gūūndi naguiejn guibandi zi'c rēnman, su tēēdi rejs, sudxi'chidi, gap tēēdi segur guial zinalidi xnejzaman. Laagajcaman naj Dios cayūjn dunuj ree yudar loj gra ni cayza'c ree, abi' ma gulejman dunuj ree din yayal ree tiblayaa lod rniabeeman guial nachajg ree Jesucrist. ¹¹ Laaman rayal respejt, din tijbzi laaman ca' guialrniabee zianczi. Amén.

Diidx bigra ca ree loj gui'ch guie

¹² Silvan, tijb dux compniar ree, bēn ragbeen naban zi'c rēn Dios, laaman been gui'ch guie din ganin lojdi tio'p choon diidx, par gunen lējt consejw nētēē par gugojnan lējt guial diidxli rēn Dios lējt, zeel gol basnuu gol guyēnman gol guyēn tēē lasa'di. ¹³ Bēn rliladx ree Jesucrist, bēn ma gulej Dios zi'cgajc lējt, bēn zojb ree Babilonia, rugajpdioz reeman lējt. Nē Marcw xin nūnan zi'c da xi'nān rugajpdioz lējt. ¹⁴ Guial rēn lasa'di, gol bagajpdioz lasa'di xhietēēz horan radxaaglojdi. Yabe'cdxe Dios luxdoodi guial ma nuchajguidi Jesucrist.

Gui'ch barojp bacaa San Pedr

Rxhiaal Béd xtiidx Dios loj ree bejn

¹ Naj, Simón Béd, najn tijb xi apóstol Jesucrist rün tëen sirv lojman, cucan gui'ch guie par lèjt guial rajpidi lasa'gajc guialrliladx za'cdxoon ni raya'pan, yan guial ma naya du luxdoo ree por ni been Jesucrist, Dios raliduladx ree, bèn rabëë bejn ree loj dol. ² Güünle' Dios lèjt mazri, yabe'cdxe tëëman luxdoodi guial ma nünbeedi laaman nē dux Dad ree Jesucrist.

Zi'c rayal gac ree xbejn Jesucrist

³ Por xguialrniabee Dios ma baneeman gra ni rayaadx ree, din yaya'p ree guialnaban tiblyaa, yabajn tëë ree naya delant lojman, din ma naguieenbee ree Dios bèn gule dunuj ree guial ca'man guialrniabee naj tëëman benza'c. ⁴ Zeel ma beenman promejs du loj ree, promejs narooob ree ni lasajc ree, abi' por laa reen ma yu' xSprijt Dios luxdoodi, ma been tëëdi tiblax gra ree ni ad rüjnt sirv nē ree ni mal riga' loj guidxliuj guie. ⁵ Zeel gol been naguiejn por guialrliladx ni rajpidi gol gubajn zagdx, din guial guibandi zagdx, dxel mazri ma gagbeedi xhienaag guibandi. ⁶ Abi' guial gagbeedi xhienaag guibandi, ma zajc gucwëëz xixgabmalidi, abi' guial gucwëëzidi xgabmal guin ree, ma zajc gapidi pasens, abi' guial gapidi pasens, ma zajc guibandi naya delant loj Dios, ⁷ dxel guial guibandi naya delant lojman, ma zajc guiën lasa'di, abi' guial guiën lasa'di, ma zajc guiëndi gra ree bejn.

⁸ Bal yu'guijquidi nine ree cusnuu tëë cayüjndi naguiejn guibandi zian, dxel ad naban xlia'tzidi, ad beenbee xlia' tëëtidi dux Dad ree Jesucrist. ⁹ Per bèn ad rüjnt naguiejn guiban zian, laaman naj zi'c tijb bën lutia'p o zi'c tijb bèn ad ruguiaat zijt, ma bayanladxaman guial biquied Dios xtolaman ni beenman guia'xchej. ¹⁰ Zeel rnin lojdi, compniar raliduladx ree Jesucrist, zi'c ma bacaabee Dios lèjt ma gulej tëëman lèjt, gol been naguiejn gol guzudxi'ch loj xnejzaman, din bal sudxi'chidi, ad zayajb-tridi loj dol. ¹¹ Zian gapidi nejz nali din chu'di lod rniabee dux Dad ree Jesucrist tiblyaa, bèn babëë dunuj ree loj dol.

¹² Zeel zianczi ganin nine ree lojdi din gusaaladxidi laa reen, majsi ma ragbeedan, majsi ma zinal tëëdi ni diidxli ni ma bacaagdiajguidi. ¹³ La'tgaj naban loj guidxliuj guie, naladxan rayal gunen consejw lojdi con ree diidx guin. ¹⁴ Din por dux Dad ree Jesucrist ma gogbeen guial ma zidyob dxej yazaan loj guidxliuj guie.

¹⁵ Zeel cayün da'tan naguiejn rnienë'n lèjt, din gusaaladxidi da diidxan majsi ma güjtan.

Bén baguiaa ree xguialrniabee Jesucrist

¹⁶ Chi ranan lojdi xhienaag naj xguialrniabee Jesucrist xhie tëë naag gui'taman stijb, ad balëëguijctan ni banan lojdi. Din con quijb du lojn baguiaa xbianiman ¹⁷ chi biguien cha' Dios diizd xanyabaa, gulesaman xvaloraman baza't tëëman laaman zagdx, rëbaman: “Xin guie naj da xi'n'an, rënan laax rabaanë' tëëman laax.” ¹⁸ Abi' dunujn nayajc bèn biguien cha' Dios diizd xanyabaa chi nadxu'në'n Jesús ruguia' zii, lod biguien xbianiman.

¹⁹ Zianan zeel mazri raliduladxan ni rëb ree bën badëed xtiidx Dios loj ree bejn, zeel zagdxë naj bal yu'guijquidi ni rëb reeman, din xtiidx reeman naj zi'c tijb guij rusni lod nacay la'tgaj rareguiaal. Yan ziangajc lëjt chaawladx cusnuu cayagbeedi xcwent Dios xt chi gui't Jesucrist stijb, bën naj bajl rusni par dunuj ree, dxel ma gagbeedi graczan zi'c tal najn. ²⁰ Per gol gogbee guial ni'qui tijb xtiidx Dios ad zajct chignia' bejn por xixgabzaman. ²¹ Din bën badëed ree xtiidx Dios loj ree bejn, ad guneet reeman xtiidxaman zi'c goczi xixgab reeman, gunee reeman ni basajb xSprijt Dios guijc reeman.

2

Bën ruliüü ree diidx rusquiee (Judas 4-13)

¹ Zian zi'c guyu ree bën rusquiee loj ree bën Israel tiamp gulal rëb reeman rudëed reeman xtiidx Dios loj ree bejn, ziangajc chu' ree bën rusquiee gulüü lëjt ni rusquiee ree, yaguuil reeman mod din gulüü reeman lëjt ni ad najt diidxli par gagdxadi. Ad zatiëjbt reeman nabee Jesucrist laa reeman, majsi baguijxaman xtol reeman, zeel ad zaglaat gunijt Dios laa reeman. ² Per zien ree bejn chinal guiban nadxuudx zi'c naban reeman, abi' por laa reeman guinieeguijdx ree bejn xtiidxza'c Dios. ³ Abi' guial rzëëbladx reeman milia, yaguuil reeman xhie ni rusquiee gulüü reeman lëjt din tia' reeman xmiliadi, per ziangajc ad zalaat reeman loj xcasti Dios ni cabëz laa reeman, din diizd gocli mal yu' casti ni yayal ree bën rüjn zian.

⁴ Ad beent Dios perdon anjl ad bazoobt ree xtiidxaman, guxhaalaman laa reeman gabijl, abi' nada'cw reeman lod nacay da't, cabëz reeman dxej güün xguialguxtisaman. ⁵ Ad been tëtëtaman perdon benmal guyu ree tiamp gulal, banijtaman laa reeman con nijs. Tijbzi Noé bën balüü xhienaag chinal ree bejn xnejz Dios, laazaman naj bën gulaa con zagajdx ree bejn. ⁶ Ziangajc chi been xguialguxtis Dios con ree guiedx Sodoma në Gomorra, baze'caman laa reen xt bayajc reen cobdëj, abi' laan naj ejempl par ree bën guiban nadxuudx zi'c ree bën guiedx zii ree. ⁷ Per baslaa Dios bën brii laj Lot, bën guban zi'c rën Dios guyu tëtëman xgab guial baguiaaman zi'c guban ree benmal guin. ⁸ Abi' guial gubajnman zagdxë, zeel guixie guixie guyunaya da'taman por ree nidxuudx biguiejnman baguiaa tëtëman been ree bën guin. ⁹ Rajc rüjn Dios yudar bën ruzoob ree xtiidxaman xhietëez loj prueb cadëd reeman, abi' ma naj xhie güünnëman benmal ree dxej güün xguialguxtisaman.

¹⁰ Laan naj ni yayal ree bën naban zi'ctzi rën reeman, ad rënt reeman nabee Jesucrist laa reeman, dád nad reeman, ad ratut reeman, ad rdxeb tëtë reeman rnieeguijdx reeman bën naj ree xianjl Dios. ¹¹ Abi' ni'qui ree xianjl Dios, majsi rajp reeman mazri gojl në guialrniabee, per achet diidxguijdx rëb reeman lojman contr laa reeman.

¹² Lasa' ree bën guin naban reeman zi'c ree be, ad yu't xquiarguiejn reeman abi' rnieeguijdx reeman ni ad rignia't reeman, guidiblagaa rüjn reeman ni rëntzi reeman sin xgab. Zi'c ree be zëedzi reeb loj guidxliuj guie par guiniaaz reeb din guiët reeb, ziangajc laa reeman por nidxuudx rüjn reeman ma cusëëb laagajc reeman, ¹³ abi' yaguijx reeman gra ni rüjnnë reeman bejn ree. Rabaa da't reeman guial rüjn reeman ni dxuudx ree, ni natu ree.

Naj reeman zi'c tijb manch, ruxhiin reeman lanij rüjndi chi rawidi tijbji, abi' rabaa da't reeman guial rusquiee reeman lëjt.

¹⁴ Ad zajct guguaa reeman tijb béngunaa sin guial ad züjnt reeman xgabdxuudx, ad rucwëëzt rüjn reeman dol rusquiee tëë reeman bén ad rignia'za'ct ree xtiidx Dios din güün reeman dol, abi' dád nasin reeman par güün reeman gan ni rzëëbladx reeman, laa reeman ma naj par yayal reeman xcasti Dios. ¹⁵ Ad zinaltri reeman xnejzaman, ma bidxaa zi'c naban reeman, ma zinal reeman ni been Balaam bén badëëd xtiidx Dios loj ree bejn, xi'n bén brii laj Beor, chi guyënman nüjnman gan milia por ni mal nüjnman. ¹⁶ Per chi zëman ziguienman ni mal guin, bacwëëz Dios laaman, basneeman xburaman zi'c tijb bejn, zian bacwëëz Dios xixgabtontaman.

¹⁷ Yan bén rusquiee cuzat reen lojdi naj reeman zi'c bizë ni ad yu't nijs, zi'c zaj ni ad nët guia, zeel rayal reeman lod nacay da't lod ad yu' tëët dxej yarii reeman. ¹⁸ Ganax ree diidx nabë rü reeman, diidx ad rüjnt ree sirv, rëb reeman guial achet güünan guiban bejn zi'ctzi rënman, abi' zian rusquiee reeman bén qui cusa'nri ree nejzmal. ¹⁹ Rëb reeman guial achut rayal nabee bejn, per ad rignia't reeman guial nidxuudx rüjn reeman rniabee laa reeman, din graczi ni ad rajct rucwëëz rüjn ree bejn, laan naj ni rniabee laa reeman. ²⁰ Chi ma beenbee ree bejn dux Dad ree Jesucrist guial laaman naj bén babëë dunuj ree loj dol ma basa'n tëë reeman nidxuudx yu' ree loj guidxliuj guie, abi' rtiëjb reeman rniabeen laa reeman stijb, dxel piorli guiban reeman guial chi gad reeman güünbee laaman. ²¹ Zagdxeli naj ad nüjnbeet reeman xnejzaman, guial beenbee reeman laan abi' basa'n reeman xtiidxza'caman ni ma biguiejn reeman. ²² Con laa reeman rajc cumplid diidx ni rëb: “Rayaw bë'cw ni bayëbib, guiáad cüch qui gojzri con nijs naya rayub loj nizbajn.”

3

Ni gac chi gui't Jesucrist stijb

¹ Gradi compniar raliduladx ree Jesucrist, rën da'tan lëjt, nine naj gui'ch rarojp rxhialan par lëjt. Loj grop gui'ch guie cayünan naguiejn ganenë'n lëjt din güündi xgab zi'c rayal. ² Gol basaaladx ni rëb ree bén badëëd xtiidx Dios loj ree bejn tiamp gulal, gol basaaladx tëë xtiidx dux Dad ree Jesucrist, bén babëë dunuj ree loj dol, xtiidxaman ni balüü ree apóstoles lëjt.

³ Gol badxe'guijc, chi ma zidyob nit guidxliuj, chu' ree bén guze' lëjt abi' guiban reeman zi'ctzi rën reeman. ⁴ Abi' na reeman lojdi: “¿Gon promejs been Jesucrist guial gui'taman stijb? Ma güjt gra ree dux béngulal ree, abi' graczi ni yu' loj guidxliuj guie sta naj gajc diizd chi gocchaaw guidxliuj.”

⁵ Na reeman zian, guial ad rënt reeman yayagbee reeman guial diizd tiamp gulal mal yu' xanyabaa në guidxliuj abi' por xguialrniabee Dios brii guidxliuj guin loj nijs. ⁶ Gojc xchej, dxel con nijs gajc banijt Dios bén gocli ree. ⁷ Per xanyabaa në guidxliuj raguiaa ree yan, ma naj guial gunijt Dios laa reen con bajl por xguialrniabeeman dxej ni güün xguialguxtisaman con ree bén ad ruzoobt xtiidxaman.

⁸ Zeel rnin lojdi, compniar raliduladx ree Jesucrist, ad bal yayanladx-idi, guial par dux Dad ree Dios tib dxej naj zi'c timil ijz, guiáad timil ijz naj zi'c tib dxej.

⁹ Ad cayaglaataman par güün cumplid xpromesaman, zi'c naladx garol ree bejn, rajpaman pasens, din ad rëntaman guial nit bejn delant lojman, rënman guial gra bejn yayagbee laaman.

¹⁰ Zi'c tal ri't tijb bêngubaaan achut ragbee gui'taman, zian guidxin dxej gui't dux Dad ree Jesucrist stijb, nadxeb da't gac naquie' chi nidloj xanyabaa, guiáad gra ree ni yu' xanyabaa guin, gunijt Dios laa reen con bajl, në guidxliuj con gra ree ni yu' lojn, con bajl gunijt Dios laa reen.

¹¹ Yan, guial ma ragbeedi xhienaag nit guidxliuj, rüjn naguiejn guibandi naya sin dol zi'c rën Dios. ¹² Con gan gol gulëjz dxej ni ma gulejman, dxej ni guze'caman xanyabaa në gra ni yu' xanyabaa, zi'cgajc guidxliuj con gra ni yu' lojn, con bajl gajc nit reen dxej zii. ¹³ Per dunuj ree caylëjz ree xanyabaa cüb në guidxliuj cüb zi'c ma been Dios promejs, ni gac zi'c tal rënman.

¹⁴ Zeel rnin lojdi compniar raliduladx ree Jesucrist, la'tgaj cabëzidi gac ree ni guin, gol been da't naguiejn din guidxaagloj Dios lëjt naya sin dol, riga'dxenë tëë lasa'di. ¹⁵ Gol badxe'guijc, guial dux Dad ree Dios cayajpaman dunuj ree pasens, din yaya'p ree tiamp yasa'n dux tol ree din yaye'c ree lojman. Abi' dux compniar ree Pab, bën rayën da't ree, ziangajc naman lojdi loj ree xtiidxaman, zi'ctzi naj quiarguejn ni bazaladx Dios lojman. ¹⁶ Gra loj ree xtiidxaman naman lojdi ni canin lojdi. Per yu' lajt loj ree gui'ch guin lod naj nawëëg guial chignia' bejn, dxel bën ad rajctczi ree në ree bën ad zinalt xtiidx Dios con guidib luxdoo, ruchaa reeman ni rën guiëb xtiidx Pab, zi'cgajc rüjnnë reeman ni zëëd ree loj xtiidx Dios, zeel laagajc reeman cusëëb laa reeman.

¹⁷ Compniar raliduladx ree Jesucrist, rënan lëjt, zeel yan guial ma ragbeedi nine ree, gol gojp cudad chitëë güün ree bën rën ree gusquiee lëjt gan, chitëë gucwëëz sudxi'chidi loj xnejz Dios. ¹⁸ Zagdxeli gol been naguiejn güünbeedi mazri dux Dad ree Jesucrist, bën baguijx dux tol ree, gol been tëë naguiejn gagbeedi mazri guial rën da'taman dunuj ree. Laaman rayal respejt gra tiampczi.

Gui'ch yaløj bacaa San Juan

Jesucrist runee guialnaban tiblayaa

¹ Gui'ch guie naj par gugojnan lëjt xcwent Jesucrist, bén mal yu' gocli diizd chi gad guidxliuj gacchaaw. Ma bacaagdiajgan, ma baguiaan ni beenman, baguiaan laaman zagdxé, ma baqui' téén laaman con quijb du yaan. Laaman naj bén runee guialnaban, ² ma bi'taman loj guidxliuj, ma baguiaan laaman, dunujn nayajc testiw ragojn téén lëjt xcwentaman. Laaman naj bén runee guialnaban tiblayaa, najman bén guzuné Dios diizd gocli bi't tééman loj guidxliuj. ³ Zeel ragojnan lëjt ni ma baguiaan ni ma baguiejn téén din gaquidi tijbzi con dunujn zi'c nayajcan tijbzi con dux Dad ree Dios con xi'nman Jesucrist. ⁴ Ragojnan lëjt nine ree loj gui'ch guie din chu' luxdoodi zagdxé, zi'c yu' du luxdoon zagdxé.

Royal yanaab ree loj Dios din güünman dux tol ree perdon

⁵ Ni ne naj ni balüü Jesucrist dunujn, yan ragojnan lëjt guial naj Dios biani, achetzi dol nabannëman. ⁶ Bal yaguie'ch ree nadxu'në' reeman abi' zunaal gajc ree nejz mal rasquiee ree ad zunaalt ree diidxli.

⁷ Per bal yunaal ree xbiani Dios zi'c za'man, guial achet xtolaman, dxel ma nayajc ree tijbzi con du lasa' ree. Abi' xrejñ xi'nman Jesucrist chiquied gra dux tol ree.

⁸ Bal yaguie'ch ree achet dux tol ree yu', rasquiee dunuj gajc ree, ad cayguie'ch téët ree diidxli. ⁹ Per bal yaxhoobdol ree loj Dios, rayagbee ree zagdxé guial güünman ni naman, güünman perdon dux tol ree, chiquied tééman gra ni mal yu' du luxdoo ree. ¹⁰ Per bal yaguie'ch ree ad waguieent ree dol, raguieen reeman zi'c bénrusquiee, ad raliduladx téët ree xtiidxaman.

2

Bén rën Dios royal guzoobaman xtiidxaman

¹ Xi'n, rucan nine ree par lëjt chitëë güündi dol. Per bal chu lëjt rüjn dol, raya'p ree bén guiniee por dunuj ree loj Dios, laaman naj Jesucrist bén ad wayüjntczi dol. ² Por xguialgüjtaman naj dux tol ree perdon, abi' ad dux toltzi ree, në gra xtol ree bénguidxliuj.

³ Bal razoob ree xtiidx Dios, zian raya'p ree segur guial ma naguieen-bee reeman zagdxé. ⁴ Per bal chu rëb: “Nünbeen Dios”, abi' ad ru-zoobtaman xtiidxaman, rusquieeman, din ad walit ni rëbaman. ⁵ Per bénruzoob xtiidxaman, diidxli rënman laaman con guidib luxdooman, zian rayagbee ree guial ma nabajnnë' reeman. ⁶ Bén rëb nabannëman Dios, royal guibanman zi'c guban Jesucrist.

Bén zinal ree xnejz Dios rën lasa' reeman

⁷ Gradi compniar raliduladx ree Jesucrist, diidx canin lojdi yan ad diidx cübt reen, xtiidx gajc Jesucristan ni ma biguiejndi diizd yaløj, laagajcanan canin lojdi yan. ⁸ Per canin laa reen zi'c rulüü diidx cüb reen, din por Jesucrist në por lëjt ma rguien guial ma cusa'ndi ni mal abi' zinalidi ni zagdxé.

⁹ Bal chu rëb zinal xnejz Dios abi' ralen lasa'man, sta zinalaman nejz mal. ¹⁰ Bén rën lasa' zinalaman xnejz Dios, abi' ma naj nawëëg guial

güün dol laaman gan. ¹¹ Per bén ralen lasa', nabanman loj nejz mal, ad ragbeetaman ban cheman, din nejz mal guin basa'n laaman zi'c tijb bénlutia'p.

¹² Xi'n, rucan gui'ch guie par lèjt, din ma gojc xtolidi perdon por xguialrniabee Jesucrist. ¹³ Cucan nine ree par lèjt guial najdi bén ma rignia' mazri chunin naj Jesucrist. Bén ma yu' gocli diizd chi gad guidxliuj gacchaaw, cucan ni ne ree par lèjt bén ma rignia' ta'n chunin naj Jesucrist din ma beendi gan ad züjntidi ni zëed loj xindxab, cuca tēen nine ree par lèjt bén qui guzulojri ree cayignia' chunin naj Jesucrist din ma nünbeedi dux Dad ree Dios.

¹⁴ Bacan nine ree par lèjt guial ma rignia'di mazri chunin naj Jesucrist bén ma yu' gocli diizd chi gad guidxliuj gacchaaw, baca tēen nine ree par lèjt guial ma rignia'di ta'n chunin naj Jesucrist, din za'dxi'chidi zinal tēedi diidxli xnejz Dios con guidib luxdoodi, ma been tēedi gan ad züjntidi ni zëed loj xindxab.

¹⁵ Ad sēēbladixidi ni ad najt zagdxē ni rüjn ree bejn loj guidxliuj, bal chu rēn mazri ni riga' loj guidxliuj guie, ad rēntaman dux Dad ree Dios, ¹⁶ din achetczi ni mal yu' loj guidxliuj guie zēed loj Dios, ni rajc gajc loj guidxliuj guien, rüjn reeman zi'c naj xixgab dxuudx reeman, rzēēbladx reeman gap reeman gra ni ruguiaa reeman, rüjn tēē reeman benro' por gra ni rajp reeman. ¹⁷ Per guidxliuj guie yu' dxej nitē con guidib ni mal yu' lojn, per bén naban zi'c rēn Dios rajpaman guialnaban tiblayaa con laaman.

Yunaal ree ni naj diidxli

¹⁸ Xi'n, rnin lojdi ma zidyob dxej nit guidxliuj, din ma biguiejndi guial rayal gui't tijb bén su contr Jesucrist guiēb tēēman laaman naj Jesucrist. Yan zien ree bén ralen laaman ma balüüloj, zeel rayagbee ree guial ma zidyob dxej nit guidxliuj. ¹⁹ Bén ralen ree Jesucrist, duloj gajc ree brii reeman nayajc ree bén rililadx Jesucrist, per diidxliczi ad najt reeman dux bejn ree, din bal niajc reeman dux bejn ree, naya'n reeman duloj ree guial raliladx ree Jesucrist, per gojc nine din guiguien guial ad grat reeman naj dux bejn ree. ²⁰ Jesucrist baneē xSprijt Dios lojdi, abi' por laaman gradi ma ragbee ni naj diidxli. ²¹ Cucan nine par lèjt, ad guial ad ragbeetidi conin naj ni diidxli, cucanan guial ma ragbeedan, abi' lèjt ragbee guial ni'qui tijb ni rusquiee ad zajct gui't loj ni diidxli guin. ²² Yan, ¿chu naj bén rusquiee? Bén rusquiee naj bén rēb guial ad Jesúst naj bén guxhaal Dios loj guidxliuj. Bén rēb zian naj zi'cgajc naj bén za' contr Jesucrist guial ad rililadxtaman Dios ni'qui xi'nman Jesucrist. ²³ Din chutēēz bén rēb guial ad najt Jesucrist Xi'n Dios, laaman ad nünbeet dux Dad ree Dios, per bén rēb Jesucrist naj Xi'n Dios nē dux Dad ree Dios nünbeeman.

²⁴ Zeel gol binal diidx ma biguiejndi diizd guia'xchej chi bililadxidi Jesucrist. Bal chinalidi diidx guin ree, dxel ziz nabannēquidi dux Dad ree Dios con xi'nman Jesucrist. ²⁵ Abi' ni ma rēb Jesucrist guneeman naj guialnaban tiblayaa.

²⁶ Cucan diidx guie ree par lèjt por ree bén rēn gusquiee lèjt. ²⁷ Per nabannēdi xSprijt Dios, bén baneē Jesucrist, ad riaadxtidi bén gulüü lèjt, din Sprijt guin gajc rulüü lèjt gra, abi' ganax diidxli ad ni rusquieet, zeel gol gubajn zi'c rniabeeman din gusnuu gaquidi tijbzi con Jesucrist.

²⁸ Yan rnin lojdi xi'n, gol binal xnejz Jesucrist, chitëe yadxeb ree chi gulüülojman, ad zaya'nxtu tëet ree lojman chi gui'taman. ²⁹ Lëjt ragbee guial rüjn Dios zi'c rayal, ragbee tëedi guial graczi ree bën rüjn zi'c rayal, laa reeman naj xi'n Dios.

3

Bën naj ree xi'n Dios

¹ Gol been xgab, plact rën dux Dad ree Dios dunuj ree, zeel balëe dulaj ree xi'n Dios, abi' waliczan nayajc ree xi'nman. Per bën ad zinalt ree xnejz Dios ad nünbeet reeman dunuj ree zi'c xi'nman, din ad nünbeet reeman laaman. ² Gradi compniar raliduladx ree Jesucrist, rënan lëjt, rnin lojdi: Ma nayajc ree xi'n Dios, majsi ad rayagbeet ree xhienaag yayajc ree chi gui't Jesucrist stijb, per raya'p ree segur guial yayajc ree zi'c najman, din xt nadxel yaguiaa ree diidxiczi xhienaag najman. ³ Graczi ree bën rüladx guial gac zian, rüjn reeman naguiejn guiban reeman naya delant loj Dios zi'c laaman, guial achet xtolaman.

⁴ Per graczi ree bën ad zinalt ni rniabee Dios, cayün reeman dol, din dol naj guial ad rüjnt reeman ni rniabeeman. ⁵ Lëjt ragbee guial bi't Jesucrist loj guidxliuj din chiquiedaman xtol ree bejn, abi' laaman ad guyutczu dxej ad yu' tëet dxej nünman dol. ⁶ Zeel bën naj ree tijbzi con laaman rüjn reeman naguiejn ad rüjnt reeman dol, per graczi bën rüjn dol zianczi ad wayignia't reeman chu najman, ad wayünbee tëet reeman laaman. ⁷ Xi'n, ganin lëjt, ad bal tiëbidi chu gusquiee lëjt, din bën cayün ni rën Dios, laaman naya delant lojman zi'c naya Jesucrist delant lojman. ⁸ Per bën yu' loj dol xbejn xindxaban, din xindxab rüjn dol diizd yaløj, abi' Jesús Xi'n Dios bi'taman loj guidxliuj par zianczi din güünman gan loj xguialrniabee xindxab.

⁹ Zeel ni'qui tijb ree bën ma zinal xnejz Dios ad rusnuutri rüjn dol, din ma nabannëman Dios, ad rayal tëetri güünman dol din ma najman xi'nman. ¹⁰ Laa rguien gajc chu reenin naj xi'n Dios chutëe reenin naj xi'n xindxab, din chutëez ad rüjnt ni rën Dios ad rën tëet lasa'man, dxel ad najtaman xi'n Dios.

Rayal yayën du lasa' ree

¹¹ Abi' lëjt ma biguiejndi xtiidx Dios diizd guia'xchej guial rayal yayën dulasa' ree. ¹² Ad rayalt yaguieen ree zi'c been Caïn, cwëjbaman gunabee xindxab laaman, zeel bagüjt bijchaman. Caïn been zian, din beenman ganax ni mal, guiaad bijchaman been ni zagdxë.

¹³ Zeel gradi compniar raliduladx ree Jesucrist, ad gagdxadi bal yalen ree bënguidxliuj lëjt guial ma zinalidi xnejz Dios. ¹⁴ Dunuj ree rayagbee guial ad nayajct ree zi'c bengüt par laaman, ma raya'p ree guialnaban delant lojman, guial rayën du lasa' ree. Per bën ad rënt lasa', sta najman zi'c bengüt par Dios. ¹⁵ Graczi bën ralen lasa' najman zi'c bën rugüjt bejn, abi' lëjt ragbee, tijb bën rugüjt bejn ad rajptaman guialnaban tiblayaa delant loj Dios. ¹⁶ Ma rayagbee ree conin naj guial rën lasa', guial güjt Jesucrist por dunuj ree, yan ziangajc dunuj ree rayal yayën dulasa' ree xt yayëjt ree por laa reeman. ¹⁷ Per bal chu tijb dunuj ree ad riaadxt xhienin loj guidxliuj guiee abi' ruguiaaman tijb bën cayaadx laan abi' ad rüjntaman laaman yudar, dxel, ¿xhienaag guiëbaman guial rënman Dios? ¹⁸ Xi'n, ganin

lëjt, ad con diidxtizi yaguie'ch ree guial rayën dulasa' ree, rayal guiguien guial rayën dulasa' ree por ni raguieen ree.

Raya'p ree segur guial za' nē Dios dunuj ree

¹⁹ Zian rayagbee ree cayzoob ree xtiidx Dios, abi' raya'p ree segur guial cayguieen ree ni rayal yaguieen ree delant lojman. ²⁰ Per bal cayguieen ree zian abi' sta ragbee du luxdoo ree guial ad cayguieent ree zi'c rayal, rayal yayagbee ree guial Dios naj mazri benro' guial duloj ree, abi' laaman ragbee gra. ²¹ Zeel zi'c rēnan lëjt rnin lojdi, bal ragbee du luxdoo ree guial cayguieen ree ni zagdx, dxel raya'p ree segur guial cayguieen ree ni zagdx delant loj Dios. ²² Laaman guneē graczi ni yanaab ree lojman guial razoob ree xtiidxaman ni rniabeeman, abi' raguieen ree naguejn raguieen ree ni ruladxaman. ²³ Ni ne naj ni rniabeeman yaguieen ree guial yaliduladx ree Jesucrist naj xi'nman yayën tēē dulasa' ree zi'c gunabeeman dunuj ree. ²⁴ Bén rüjn ree ni rniabee Dios, laa reeman nabannē Dios abi' Dios nabannē laa reeman, rayagbee tēē ree guial za'man con dunuj ree por xSprijtaman bén baneeman duloj ree.

4

Bén ad rliladxt Jesucrist ad yu't xSprijt Dios luxdooman

¹ Gradi compniar raliduladx ree Jesucrist, rēnan lëjt, rni tēēn lojdi: ad rliladxidi chutēēz bén rēb rnieeman xtiidx Dios. Yaløj xgaj gol gogbee zagdx bal wali reeman xtiidx Diosan rniee reeman o ad laatanan ya, din loj guidxliuj guie ziza zien ree bén rusquiee, rēb reeman rniee reeman xtiidxaman. ² Yan din gagbeedi chu reenin rniee xtiidx Dios: Laa reeman naj bén rliladx guial Jesucrist bi't zi'c bénguidxliuj. Bén rliladx ree zian yu' xSprijt Dios luxdoo reeman. ³ Per bén ad rliladxt ree zian ad yu't xSprijtaman luxdoo reeman, laa reeman naj bén ralen Jesucrist. Ma biguejndi guial rayal gui't tijb bén su contr laaman. Abi' diizd yan ma za' sprijt guin guidxliuj, zeel zien ree bén ralen Jesucrist ma yu' loj guidxliuj guie.

⁴ Per lëjt xi'n ma najdi xi'n Dios, guiáad ree bén ralen Jesucrist ad zajct güün reeman lëjt gan, din mazri narooob guialrniabee ca' bén nabannē lëjt guial loj bén nabannē bén zinal ree nejj mal loj guidxliuj guie. ⁵ Bén za' ree contr Jesucrist rüjn reeman xgab tijbzi ni riga' loj guidxliuj guie rniee reeman, guiáad ree bén ad rliladxt Jesucrist rüjncwent reeman ni rēb reeman. ⁶ Per dunuj ree ma nayajc ree xbejn Dios, abi' bén ma nünbee ree Dios rucaagdiajg reeman ni ranee ree, guiáad ree bén ad nünbeet Dios ni'quid rüjncwentt reeman ni ranee ree, zian rayagbee ree chu nabannē xSprijt Dios bén rulüü dunuj ree diidxli chutēēnin nabannē sprijt ni rulüü ganax ni rusquiee.

Rēn Dios dunuj ree

⁷ Rēnan lëjt, rnin lojdi rayal yayën dulasa' ree, din guialrēn lasa' zēēd loj Dios. Gra bén rēn lasa' naj xi'n Dios nünbee tēē reeman laaman. ⁸ Abi' bén ad rēnt lasa' ad wayünbeetaman Dios, din guialrēn lasa' zēēd loj Dios. ⁹ Balüü Dios guial rēnman dunuj ree, din majsi tijbzi xi'nman Jesucrist, guxhaalaman laaman guidxliuj din yaya'p ree guialnaban delant loj Dios por laaman. ¹⁰ Rēn Dios dunuj ree. Ad dunujt ree bayën laaman, yaløj laaman guyën dunuj ree, zeel guxhaal xi'nman Jesucrist persi güjtaman por dux tol ree, zeel ma yu' perdon par dunuj ree. ¹¹ Rēnan lëjt, zeel rnin

lojdi, zi'c rën Dios dunuj ree, ziangajc rayal yayën dulasa' ree. ¹² Majsi achut waguiaa laaman, per bal rayën dulasa' ree, nabannë'qui ree Dios, abi' diidxli rayën reeman.

¹³ Dunuj ree rayagbee guial nabannë' reeman abi' laaman za' con dunuj ree, din ma bane xSprijtaman duloj ree. ¹⁴ Abi' dunuj gajcan baguiaa ragojn tëen guial guxhaal Xi'n Dios loj guidxliuj guie persi gÿjtaman por xtol gra ree bejn. ¹⁵ Chutëez rëb guial Jesucrist naj Xi'n Dios nabannëman Dios, abi' Dios nabannë laaman. ¹⁶ Dunuj ree rayagbee raliladx tëe ree guial rën Dios dunuj ree. Por laaman zëed guial rayën dulasa' ree. Abi' bën rën lasa' nabannëman Dios, guiáad Dios nabannë laaman.

¹⁷ Bal wali rayën ree Dios zi'c rënman, ad najtan ni yadxeb ree dxej gÿün xguialguxtisaman, din ma nayajc ree tijbzi con laaman, zi'c naj Jesucrist tijbzi con laaman. Din guidib dux guialnaban ree nabannë' reeman loj guidxliuj guie. ¹⁸ Bën rën Dios, ad rdxebtaman, din bën rën laaman diidxli, ad rdxebtraman, per bën ad rënt laaman rdxebaman, din rÿjnman xgab casti ni yayalaman, zeel bal chu rdxeb, ad walitaman rënman laaman. ¹⁹ Dunuj ree rayën Dios, din yaløj laaman guyën dunuj ree. ²⁰ Bal yu' bën rëb: "Rënan Dios", abi' ralen lasa'man, rusquieeman. Din bal id rën lasa'man bën ruguiaaman, çhienaag guiënman Dios bën ad waguiaataman? ²¹ Laagajcaman na: Bën rën Dios rayal guiën lasa'man.

5

Guial raliduladx ree Jesucrist zeel raguieen ree gan loj ni mal

¹ Gra ree bën rliladx guial Jesús naj bën guxhaal Dios, laa reeman naj xi'nman. Bal chu rën dux Dad ree Dios, në gra ree xi'nman rënman. ² Chi rayën ree Dios raguieen tëe ree ni rniabeeman, dxeel rayagbee ree guial rayën ree gra ree xi'nman. ³ Guial guiën bejn Dios naj guial gÿünman ni rniabeeman. Abi' ad nawëegt naj guial gÿünman ni rniabeeman, ⁴ din gra bën naj xi'nman ma rÿjn gan loj ree ni mal yu' loj guidxliuj guie. Abi' guial raliduladx ree, zeel ma raguieen ree gan loj ree ni mal guin. ⁵ Bën rliladx guial Jesús naj Xi'n Dios, tijbzi laaman zajc gÿün gan loj ree ni mal yu' loj guidxliuj.

Ni rulüü Dios dunuj ree xcwent Jesucrist

⁶ Jesucrist bi't loj guidxliuj, guobnijsaman guxhie' tëe xrejnman loj crÿjz. Ad guobnijstzaman, në guxhie' xrejnman. XSprijt Dios naj testiw, laaman rÿ diidxli xcwent ree nine.

⁷ Choon testiw yu' xanyabaa: xDadaman Dios, Jesucrist në xSprijt Dios, guiyon reeman naj tijbzi Dios.

⁸ Yu' tëe choon testiw loj guidxliuj: XSprijt Dios, në guial guobnijs Jesucrist con ni guxhie' xrejnman loj crÿjz, guiyon reen rÿ diidx tijbzi.

⁹ Bal raliduladx ree ni na ree bejn, mazri rayal yaliduladx ree ni na Dios xcwent xi'nman Jesucrist, din xtiidxaman mazri lasajcan. ¹⁰ Bën rliladx Xi'n Dios, laaman rliladx ni rëb Dios xcwentaman. Per bën ad rliladxt laaman, rÿjnman Dios zi'c bën rusquiee, din ad rliladxtaman ni rëbaman xcwent Xi'nman. ¹¹ Abi' ni rëbaman naj guial ma baneeman guialnaban tiblayaa duloj ree, guialnaban guin zëed por xi'nman. ¹² Bën za'në Xi'n Dios tijbzi, laaman naban tiblayaa delant loj Dios, per bën ad za'në laaman tijbzi, laaman ad ca't guialnaban guin.

Ni bigra ca loj gui'ch guie

¹³ Cuan nine ree par lëjt najdi bën riladx Jesucrist Xi'n Dios din gagbeedi guial ma ca'di guialnaban tiblayaa delant loj Dios.

¹⁴ Rayagbee ree zagdxe: chi yanaab ree xhienin lojman, rüjncwentaman dunuj ree, bal yanaab ree zi'c rënman. ¹⁵ Bal rayagbee ree rüjncwentaman dunuj ree chi ranaab ree xhienin, ziangajc rayagbee ree zagdxe guial guneeman ni ranaab ree.

¹⁶ Bal chu dunuj ree rayagbee guial tijb dunuj ree cayguieen dol ni zajc gac perdon, rayal cwedxaman Dios por laaman zian gudëe Dios guialnaban tiblayaa lojman, bal zajc gac dol guin perdon. Yu' dol ni ad zajct gac perdon, abi' ad canitan guial cwedxidi Dios por bën rüjn dol guin. ¹⁷ Graczi ni mal naj dol, per yu' dol ni zajc gac perdon.

¹⁸ Rayagbee ree guial bën ma naj ree xi'n Dios ad rusnuutri rüjn reeman dol, din Jesucrist Xi'n Dios naj bën rniaj laa reeman, abi' xindxab ad zajctri nabeex laa reeman. ¹⁹ Rayagbee ree guial nayajc ree xbejn Dios, per ree bénguidxliuj, bën ad najt ree xbejn Dios, xindxab rniabee laa reeman. ²⁰ Rayagbee tée ree guial Jesucrist Xi'n Dios ma bi'taman loj guidxliuj guie, guxhalaman dux quiarguejn ree, persi baguieenbee ree bën naj quijb Dios. Yan nadxu'né' reeman tijbzi por Xi'nman Jesucrist. Tijbzi laaman naj Dios, por laa téeëman yu' guialnaban tiblayaa. ²¹ Xi'n, gol gojp cudad chitëe chinalidi ni naladx ree bejn naj Dios.

Gui'ch barojp bacaa San Juan

Rxhial Waj xtiidx Dios loj ree bejn

¹ Naj, bèn rniabee loj ree bèn rliidx Jesucrist, rxhialan gui'ch guie lojdi najdi bèn gulej Dios rliidx tèedi Jesucrist, diidxli rënan lëjt, abi' ad tijbtizi naj, nè gra ree bèn zinal xtiidx Dios. ² Rënan lëjt guial ma nabanné' ree xtiidx Dios abi' laan nabanné dunuj ree zianczi. ³ Dux Dad ree Dios con Xi'nman Jesucrist güünle' lëjt, yaya reeman lëjt, yabe'cdxe tèe reeman luxdoodi guial zinalidi xtiidxaman rën tèe lasa'di.

Rniabee Dios yayën du lasa' ree

⁴ Dád nix guyu luxdon chi gogbeen yu' ree xcompniaridi, diidxli zinal xtiidx Dios naban tèe reeman zi'c rniabee dux Dad ree Dios. ⁵ Yan, zi'c rënan lëjt najdi dux compniar ree, gol been wen gol guyën lasa'di. Ni canin lojdi ad nicübtan, diidx ni bacaagdiajg gajquidi diizd guia'xchejn. ⁶ Guial rën Dios naj guial guiban bejn zi'c rniabee Dios, abi' ni rniabeman ni bacaagdiajguidi diizd guia'xchej naj guial rayal guiban bejn, guiën lasa'man.

Bén rusquiee ree bejn

⁷ Rnin zian, din gra ladczi guidxliuj ziza zien ree bèn rusquiee ree bejn, guial ad rliidx reeman bi't Jesucrist loj guidxliuj zi'c bejn, bèn rüjn zian rusquieeman abi' za'man contr Jesucrist. ⁸ Gol gojp cudad chitëe gusëebidi ni rayalidi por ni cayüjndi, din tia'di gra ni rayalidi delant loj Dios.

⁹ Chutëez bèn racaa gui'c balüü Jesucrist bejn ree ad nabannëtaman Dios, per bèn zinal xtiidx Jesucrist zi'c balüüman bejn ree, laaman nabanné Dios con Xi'nman. ¹⁰ Bal chu gui't lidxidi abi' ad rulüütaman xtiidx Dios zi'c balüü Jesucrist, ad cu'di laaman lënü, ad güüncwent tèedi ni rnieeman. ¹¹ Din bèn rüjncwent xtiidxaman, rën guiëban guial ma za'man conform con ni rusquiee bèn guin.

Diidx bigra ca ree loj gui'ch guie

¹² Zien ree ni rënan ganin lëjt, per ad rëntan gucanan loj gui'ch, din wed ad zaglaat guialan guidganan lëjt din ganené' quijb naj lëjt din chu' du luxdoo ree zagdxe tijbzi. ¹³ Bén naj ree bèn ma gulej Dios, dux compniar raliduladx ree Jesucrist bèn zojb ree niz guie, rugajpdioz reeman lëjt.

Gui'ch bayon bacaa San Juan

Rugajpdioz Waj Gayo

¹ Naj, bën rniabee loj ree bën rliadx Jesucrist, rxhialan gui'ch guie par lüj Gayo najl da miwan diidxli rënan lüj.

² Zi'c rënan lüj rniaaban loj Dios zi'c zël zagdxex loj xnejzaman ziangajc grii zagdxex gra ni cayüjnl gunee tääman lüj guialnadaan. ³ Dád nix guyu luxdon chi guna garol dux compniar ree guial diidxli nabanl zi'c rëb loj xtiidx Dios. ⁴ Achet mazri ni rgu' luxdon zagdxex zi'c chi riguejnan guial diidxli naban ree da compniaran zi'c rëb loj xtiidx Dios.

⁵ Zi'c rënan lüj Gayo, rnin lojl guial zagdxex da't naj ni cayüjnl con dux compniar ree bën rliadx Jesucrist abi' mazczi zagdxex naj ni rüjnl con ree bën zëed lood ren. ⁶ Din laa reeman na delant loj gra ree bën rliadx Jesucrist, bën rado'pnë' reen guie, guial gunajchi'l laa reeman, zeel zagdxex güünl guial güünl laa reeman yudar con ni ryaadx reeman guial cayüjn reeman sirv loj Dios din gusnuu xnejz reeman. ⁷ Din brii reeman zigtië'ch reeman xtiidx Jesucrist abi' ad rtiëjbt reeman tia' reeman ni rudëe ree bën ad rliadx laaman. ⁸ Zeel dunuj ree bën raliduladx ree Jesucrist, rayal yaguieen ree yudar bën catie'ch ree xtiidxaman, zian yaguieen ree yudar guire'ch ni naj diidxli.

Ad ruzoobt Diótrefes diidx

⁹ Ma guxhalan tijb gui'ch loj ree dux compniar ree bën rliadx ree Jesucrist, per Diótrefes guial ruladxaman nabeeman ad rüjncwenttaman dux tiidxan. ¹⁰ Zeel bal guidganan lëjt dxel ganenë'n laaman xcwent guial rnieeguidxaman rniee tääman diidx rusquiee contr dunujn abi' ad tijbtzi laan rüjnman në ad rudëet lidxaman yaya'n dux bejn ree bën zëed ree lood ren, ad rtiëjb tääman gudëed lidx ree ben ren yaya'n reeman, abi' ree bën rudëed lidx ad rtiëjbtaman chu' reeman lën yadoo.

¹¹ Zi'c rënan lüj Gayo rnin lojl ad chinalil nejb mal, been ni naj ni zagdxex din bën rüjn ni zagdxex laaman naj xbejn Dios per bën zinal ni mal ad nünbeetaman Dios.

¹² Graczi reeman ruza't Demetrio zagdxex guial binalaman zi'c rayal, laa nen gajc xhienaag nabanman xt dunujn raza't laaman zagdxex abi' lüj ragbee guial diidxli naj ni raguie'chan.

Diidx bigra ca ree loj gui'ch guie

¹³ Zien ni rënan ganin lojl per ad rëntan gucanan loj gui'ch, ¹⁴ din wed ad zaglaat guialan guidganan lüj, dxel ganenë' quijb naj lüj.

¹⁵ Yabe'cdxex Dios luxdool, dux miw ree bën riga' ree guie rugajpdioz lüj, bagajpdioz tää gra dux miw ree.

Gui'ch bacaa San Judas

Rugajpdioz Judas bén naj ree bén gule Dios

¹ Naj, Judas bijch Santiaaw, cayünan sirv Jesucrist, cucan gui'ch guie par lëjt najdi bén ma gulej dux Dad ree Dios guial rënman lëjt, abi' dux Dad ree Jesucrist canaj lëjt. ² Gusnuu yaya Dios lëjt, yabe'cdxeman luxdoodi guiën täädi laaman.

Bén ad rnieet ree diidxli (2Pe. 2:1-17)

³ Gradi compniar raliduladx ree Jesucrist, rënan lëjt, diizd gocli guyënan nixhialan gui'ch lojdi, din gagbeedi xcwent xhienaag naj perdon ni raya'p ree delant loj Dios, per yan ma bidxin dxej rüjn naguiejn gaxhalan gui'ch guie lojdi din ganin lojdi din guiniadi guialrliladx ni ma raya'p ree, ni nayaaloj, guial nayajc ree xbejn Jesucrist. ⁴ Din yu' ree bén rüjn bén rliladx naabzi par go'ch reeman lojdi. Bén guin ree diizd gocli ma ragbee Dios guial rayal reeman casti, din ad rdxebt reeman laaman, rudxiib reeman guijc naj Dios benza'c, abi' naban reeman zi'ctzi rën reeman. Ad rtiëjbt reeman nabee Jesucrist laa reeman, laaman naj tijbzi dux Dad ree bén rniabee dunuj ree.

⁵ Majsi ma ragbeedi ni ganin lëjt, per ganinan din gusaaladxidi guial majsi babëë Dios bén Israel ree Egipto, per despuejs banijtaman bén ad bililadxt ree laaman. ⁶ Nè ree anjl ad bazoobt xtüidx Dios niniabee reeman lod badëëman loj reeman, basiaawaman laa reeman lod nacay da't xt dxej güün xguialguxtisaman. ⁷ Nëtëë ree bén Sodoma con ree bén Gomorra con ree guiedx gure gajxh, ad laat gubajn reeman, been reeman gra loj nidxuudx zi'ctzi guyën reeman, zeel basagzi Dios laa reeman, banijtaman baze'c tääman laa reeman, laan naj ni rayal yaguaiaa ree chitëë yaguieen ree zian.

⁸ Per ni'czi zian, yan ziangajc rüjn ree bén raguiil mod par go'chzi reeman lojdi, rüjn reeman xgab guial zajc güün reeman zi'ctzi rën reeman, ruxhiin laagajc reeman, ad rtiëjb tää reeman nabee Jesucrist laa reeman, rnieeguijdx tää reeman bén naj ree xianjl Dios. ⁹ Per chi gudildiidx ree arcangel Miguel con xindxab guijc xcuerp Moisejs, ni'quid bayaxt anjl guin niëjbaman diidxguijdx loj xindxab guin, tijbzi ni rëbaman naj: "Ladxaa Dios gusa'nan lüj." ¹⁰ Abi' yan bén raguiil gajc ree mod go'ch reeman lojdi, rnieeguijdx reeman ni ad rignia't reeman, per nidxuudx rüjn reeman, ad rüjnt reeman laan xgab, contzi rüjn reeman laan zi'c ree be guial ad rüjnt reeb xgab. Zian cusëëb laagajc reeman delant loj Dios.

¹¹ ¡Prob laa reeman!, guial zinal reeman ni mal zi'c been Caïn, mazri zinal reeman milia zi'c been Balaam, guiët tää reeman zi'c güt Coré chi guyënman niniabeeman luar Moisejs. ¹² Laagajc reeman ruxhiin lanij rüjndi chi rado'pidi din gawidi tijbzi, guidiblagaa ad ratut reeman raw reeman ad rüjn tää reeman xgab por ree bejn, rüjnz reeman xgab par cha lën reeman. Naj reeman zi'c zaj ni ad nët guia ni rinë bi, zi'c ree yag rbidx abi' ria'xh reen guial ad rtiat reen. ¹³ Naj reeman zi'c xtüjp nijsdoo chi rajsan zro' da't, din zi'c ririi bichijn loj nijs guin, ziangajc sin guialxtu rüjn reeman nidxuudx ree, naj tää reeman zi'c ree bajl xanyabaa ni basëëb xnejz, dxel tiblayaa ma rayal reeman lod nacay da't.

¹⁴ Abi' b́en brii laj Enoc, laaman gojc gajdx loj ree xdiaa Adán, gunee-man xcwent ree b́en guin chi rēbaman: “Naj baguiaa dux Dad Dios zidnē zien da't ree xianjlaman ¹⁵ zidgaguieen xguialguxtisaman con gra ree bejn, din guiēbaman xhie casti rayal ree benmal por gra ni mal been reeman nē por diidxguijdx ni gunee reeman laaman guial naj reeman b́endol.” ¹⁶ Lasa' ree b́en guin achetczi ruladx reeman, abi' graczi rnieeguijdx reeman. Zianczi rŭjn reeman zi'ctzi rēn reeman, abi' zianczi ruza't laagajc reeman zagdx ruza't tēē reeman bejn ree zagdx din cwentzi gŭŭn ree b́en guin ni rēn reeman.

Mod rayal guiban ree xbejn Dios

¹⁷ Per lējt compniar raliduladx ree Jesucrist, rēn da'tan lējt, gol basaal-adx guial b́en goc ree xi apóstoles Dad Jesucrist ¹⁸ rēb reeman: “Chi ma zidyob nit guidxliuj, chu' ree b́en guze' gra ni zēēd loj Dios gŭŭn tēē reeman zi'ctzi naj xixgabdxuudx reeman.” ¹⁹ Lasa' ree b́en guin naj b́en rlia' lasa' ree b́en ma zinal xnejz Dios, abi' naban reeman zi'ctzi rēn reeman, ad yu't xSprijt Dios luxdoo reeman.

²⁰ Per lējt compniar raliduladx ree Jesucrist, gol guzudxi'ch loj ni rliladxidi, din guialrliladx guin zēēd loj Dios. Gol gurejdx gunab Dios con xyudar xSprijtaman. ²¹ Gol basnuu gol binal guial rēn Dios la'tgaj cabēzidi guidxin dxej gunee Jesucrist guialnaban tiblyaa duloj ree guial rayaman dunuj ree.

²² Gol been yudar b́en sta yu' nawēēg ree luxdoo. ²³ Gol been yudar b́en zē ree loj nejzmal, zi'c rŭjn tijb b́en rŭjn yudar b́en cayajb loj bajl, gol guyēn reeman per ad chu'ladxidi zi'c rŭjn reeman, gol gojp cudad chitēē yabidi loj xtol reeman.

Diidx bigra ca ree loj gui'ch guie

²⁴ Yu' tijbzi Dios ca' guialrniabee par guiniaman lējt, chitēē yabidi loj dol, din chu' luxdoodi zagdx sin dol chi guidxindi xanyabaa lod za'man. ²⁵ Laaman naj tijbzi Dios b́en babēē dunuj ree loj dol por dux Dad ree Jesucrist, rayalaman respejt din gra naj xieenman, tijbzi laaman ca' guialrniabee con guialguxtis diizd gocli, yan con gra tiampczi. Amén.

Ni balüü Jesucrist loj San Juan

¹ Ni ne ree naj ni ma balüü Dios loj Jesucrist din në laaman gulüü laan loj ree xbejnman, din gagbee reeman conin ma zidyob gac. Abi' Jesucrist guxhaal xianjlaman din gulüüman ni guin ree lon, naj Waj xbejn Jesucrist, bën cayüjn laaman sirv. ² Abi' canin ni diidxli xcwent xtiidx Dios, xcwent Jesucrist në xcwent gra ree ni baguian.

³ Xiquilbaa ree bën ni rool, në ree bën rucaagdiajg në ree bën ridxga' ni ca loj gui'ch guie ni rugojn xcwent ree ni gac, din ma zidyob gac reen.

Rxhiaal San Juan gui'ch loj guigajdx ree yadoo

⁴ Naj Waj cucan gui'ch guie par lëjt najdi xbejn Cristo, lëjt bën naban ree loj guigajdx ree xguiedx Asia. Dux Dad ree Dios, bën gui't bën naj Dios diidz gocli në yan, në guigajdx ree sprijt za' lod canabeeman, në Jesucrist, laa reeman güünle' lëjt yabe'cdxe tēē reeman luxdoodi. ⁵ Jesucrist been gra ni naj güünman, laa tēēman goc bën yalob baban loj ree bengüt abi' laaman rniabee gra ree bën rniabee loj guidxliuj. Laaman rēn dunuj ree abi' con xrejman basiaman dux tol ree ⁶abi' beenman dunuj ree zi'c bën rniabee, been tēēman dunuj ree bixhioz rüjn sirv xDadaman Dios. Zeel Jesucrist rayalaman respejt në guialrniabee zianczi. Amén.

⁷ iGol gogbee guial gui'taman loj zaj! Gra ree bejn guguaa laaman xt ree bën ni guliiz lans cwē'lēnman, abi' gra ree bēnguidxliuj goon da't chi guguaa reeman laaman. Laan naj diidxli. Zian gac.

⁸ Dux Dad ree Dios bën rajp gra guialrniabee. Laaman gui't, laaman naj Dios diidz guia'xchej, në yan, laaman rēb por laagajcaman: “Naj naj zi'c lejtr A con Z, lejtr ni rzuloj në ni rlixonē alfabeto, naj ca' gra guialrniabee.”

Baguaa San Juan xguialrniabee Cristo

⁹ Naj Waj tijb ree lasa'di bën rliladx Jesucrist. Tijbzi nadxu' ree loj xguialrniabeeman, tijbzi cayzaagdiaj ree abi' caydaan ree por laaman. Naj guyu'n ladxguiib loj yuj riga' loj nijsdoo lod la Patmos guial rtiechan xtiidx Dios në gra ree ni ragbeen xcwent Jesucrist. ¹⁰ Chi yu'n ladxguiib loj yuj riga' loj nijsdoo guin, guyu tijb dumingw chi guza'can zi'c bën rnie'xhchaal por xguialrniabee xSprijt Dios, abi' xichan biguejnan zi'c cha' trompejt abi' biguien rejs da't cha' tijb ¹¹ bën ni rēb:

—Naj naj zi'c lejtr A con Z, lejtr ni rzuloj në ni rlixonē alfabeto, din tijbzi naj naj bēn rniabee. Bacaa loj gui'ch gra ni cuguaal dxel guixhiaalil gui'ch guin loj guigajdx cwaa ree da bejnan bën zobj ree niz Asia, luguedx Éfeso, Esmirna, Pérgamo, Tiatira, Sardis, Filadelfia në Laodicea.

¹² Dxel chi badxi' lon par guguaan chunin rnieenē naj dxel baguian gajdx ree candeler or. ¹³ Abi' galay ree candeler guin baguian tijb ni naj zi'c tijb bejn, najcwaman tijb lajd yool xt guia'man, abi' naxii tijb cinch or luxdooan. ¹⁴ Naquichbēj guijcaman zi'c naj guidxlad xiil, zi'c naj guiajnayaag naquich naj guidxguijcaman abi' zi'c bajl re'criani guiaalojman. ¹⁵ Abi' guia'man rdiinan bacha' zi'c guuib ni la bronze chi yu'n loj guij, abi' cha'man naj rejs zi'c rüjn nijs nauque' chi rguaajtan. ¹⁶ Gui'ad yaaman ladbee ca'man gajdx bajl xanyabaa. Abi' ro'man ririi

tijb Espad ni nadoxh da't grop lad, guiáad lojman rulaa bacha' zi'c chi rusni gubijdx gojl da't.

¹⁷ Dxel chi baguijan laaman biajban guia'man zi'c bengüt. Per laaman guxhoob yaa ladbeeman guican, naman:

—Ad rdxebil, naj naj bén rniabee diizd guia'xchej abi' par tiblayaa. ¹⁸ Ma güjtan, per yan ma babanan, abi' ma nabanán tiblayaa, abi' naj rniabee gualgüjt në gabijl. ¹⁹ Yan bacaa ni ma baguiaal në ni cuguiaal në ni qui gacri. ²⁰ Ni në rën guiëb guigajdx ree bajl xanyabaa ni baguiaal yan ladbee, në guigajdx ree candeler or. Guigajdx ree bajl xanyabaa guin rën guiëban gajdx ree bén rniabee guigajdx cwaa ree da bejnan niz Asia, abi' guigajdx candeler or guin rën guiëban guigajdx cwaa ree da bejnan.

2

Diidx par ree bén Éfeso

¹ 'Yan bacaa ni guixhiaalil loj bén rniabee ree da bejnan luguiedx Éfeso. Bacaa: “Bén ni ziza galay ree candeler or, bén ni ca' gajdx ree bajl xanyabaa con yaa ladbeeman, laaman na lojdi: ² Naj ragbee xhie cayüjndi. Naj ragbee xhie tarbajw cadëdidi, ragbee tëën gual ad ralenya'tidi. Naj ragbee gual ad rdaantidi bén mal ree, abi' ma beendi prueb bén na ree naj xi apóstoles Jesucrist majsi achut naj reeman abi' ma gogbeedi gual ganax diidx rusquiee rniee reeman. ³ Naj ragbee gual rajpidi pacens abi' ma guzagdiajdi gual rëndi naj sin gual yalenya'di. ⁴ Per yu' ni ad ruladxtan rüjndi: gual ad rëntridi naj zi'c guia'xchej. ⁵ Gol basaaladx xhienaag guyëndi naj guia'xchej gual zi'c cayüjndi yan. Gol bayüjn xgab, gol been zi'c beendi guia'xchej, bal id züjndi zian, nayob gaxhalan casti par lëjt abi' ad zajctridi biani par los demazri ree bejn, bal id zayüjndi xgab. ⁶ Per yu' ni cayüjndi zi'c rayal, gual rdx'e'chidi ni rüjn ree ben nicolaítas, zi'cgajc rdx'e'chan por ni rüjn reeman. ⁷ Bén rën ree gucaagdiajg, gol bacaagdiajg ni rniee xSprijt Dios par ree da bejnan: Bén ni güün gan loj dol, naj gudë ni gawaman ni rtia loj yag ni runee gualnaban ni zojb xanyabaa lod zojb Dios.”

Diidx par ree bén Esmirna

⁸ 'Yan bacaa ni guixhiaalil loj bén ni rniabee ree da bejnan luguiedx Esmirna. Bacaa: “Bén rniabee diizd guia'xchej në par tiblayaa, bén ni güt abi' babanman stijb, laaman na lojdi: ⁹ Naj ragbee xhienaag cadëdidi tarbajw por ni rüjn bejn lëjt, ragbee tëën loj gualprob ni nabandi majsi diidxli najdi benrijcw gual ma zinalidi xtiidx Dios, abi' ragbeen xhienaag rnieeguijdx bejn lëjt, bén ni na ree naj reeman bén Israel xbejn Dios majsi laa reeman naj xbejn xindxab. ¹⁰ Ad rdxebtidi gualzi ni tëdidi din xindxab güünx gan din cu' ree bejn tio'p choondi ladxgüiib par guiguien gual diidxli zinalidi xnejz Dios. Chii dxej tëdidi gualzi guin ree, per gol guzujdx'i'ch xt dxej guiëtidi, abi' naj yazaladx lëjt gualnaban tiblayaa. ¹¹ Bén rën ree gucaagdiajg gol bacaagdiajg ni na xSprijt Dios par ree da bejnan: Bén güün gan loj dol, achetri güün gualgüjt ni rarojp laaman.”

Diidx par ree bén Pérgamo

¹² 'Yan bacaa ni guixhiaalil loj bén rniabee ree da bejnan luguiedx Pérgamo. Bacaa: “Bén ca' espad ni nadoxh grop lad ro', laaman na lojdi: ¹³ Naj ragbee gual luguiedx zojbidi xindxab rniabee ni. Per majsi zian

lëjt za'dxi'chidi con naj ad rucwëëzt riladixidi naj ni'qui lën ree dxej ni bagüjt reeman Antipas, tijb ree xcompniaridi bën ad bacwëëzt bililadx naj, bën bagüjt reeman ladxidi lod rniabee xindxab. ¹⁴ Per yu' ree ni ad ruladxtan rüjndi. Tijb ni ad ruladxtan rüjndi naj guial lojdi no'ch ree bën ad rusa'nt ni basiid Balaam bejn ree, bën rëb loj Balac xhienaag guzaalguiiwaman bën Israel ree din gaw reeman guialraw ni ma gurej loj ree xdios Balac guin, në par been reeman graløj ree nidxuudx con ree bën ad najt lacheel reeman. ¹⁵ Stijb ni ad ruladxtan naj guial lojdi no'ch ree bën ad rucwëëzt rüjn zi'c rüjn ree bën nicolaítas. ¹⁶ Zeel gol bayüjn xgab por ni rüjndi, bal id züjndi zian nayob gaxhalan casti din gūnan guialguxtis con laa reeman con espad ni ririi ro'n. ¹⁷ Bën rën ree gucaagdiajg, gol bacaagdiajg ni na xSprijt Dios par ree da bejnan: Bën rüjn gan loj dol, naj gudë mana gawaman, guialraw xanyabaa ni ad nūnbeet ree bejn. Gudë tēen tijb guiaj naquichdoo lod ca laj cūbaman ni achutczī ragbee, tijbzi bën tia' guiaj guin gagbee.”

Diidx par ree bën Tiatira

¹⁸ 'Yan bacaa ni guixhiaalil loj bën rniabee ree da bejnan luguiedx Tiatira. Bacaa: “Xi'n Dios, bën re'criani guiaaløj zi'c bajl, bën rdiin bacha' guia' zi'c guilib ni la bronçe, laaman na lojdi: ¹⁹ Naj ragbee ni cayüjndi, ragbeen xhienaag rëndi naj, xhienaag riladixidi naj, xhie cayüjndi por naj abi' ad ralenya'tidi. Naj ragbee guial mazri zagdxē cayüjndi yan guial loj guia'xchej, ²⁰ Per yu' ni ad ruladxtan cayüjndi: Rdaandi Jezabel, béngunaa ni na rudëed xtiidx Dios. Abi' rtiëjbidi rulüüman da bejn reen dxel ruzaalguiiwaman laa reeman rüjn reeman ni dxuudx ree con ree bën ad najt lacheel reeman, abi' raw reeman guialraw ni ma gurej loj ree xdios ree bénguidxliuj. ²¹ Ma badën tiamp din yayüjnman xgab, din gusa'n xguialdxuudxaman, per ad rëntaman. ²² Zeel yan gaxhalan guialguijdx par laaman, gaaman gagxuuman. Abi' bën rüjn ree zi'c rüjnman, bal id reeman guchaa mod ni naban reeman ziangajc zro' naj guialzi ni tēd reeman, ²³ gugüjtan gra ree bën ma been xgab guiban zi'c naban béngunaa guin. Zian gagbee ree da bejnan guial naj ragbee xhie yu' guijc bejn xhie tēē yu' luxdooan, xhie xgab rüjnman. Naj gune lëjt ni rayalidi bal gonin rüjndi. ²⁴ Par gra ree da bejnan bën zøjb ree luguiedx Tiatira, lëjt bën ad zinalt ree zi'c rusiid Jezabel guin bejn ree, lëjt guial na reeman ad ragbeetidi xt ni bigra xcwēnt xindxab guial ad ridxga'tidi laa reeman, achetri ni ganin lojdi, ²⁵ tijbzi ni rnin lojdi: Gol guzujdxi'ch loj ni ma ragbeedi xt chi guialan stijb. ²⁶ Bën gūn gan loj dol, abi' gusnuu gūnman zi'c rēnan guidib tiamp ni guibanman, naj gudë guialrniabee lojman din nabeeman loj ree nacion. ²⁷ Nabeeman loj ree nacion guin zi'c tijb bën ni ca' tijb var guuib, zi'czi rlia' bejn tijb guiajs zian gūnnēman bën ni ad rënt ree guzooob diidx. Gudën guialrniabee guin lojman zi'c banee da Dadanan lon, ²⁸ gudë tēen lojman bajl xanyabaa ni rliejn rsildoo. ²⁹ Bën rën ree gucaagdiajg, gol bacaagdiajg ni rëb xSprijt Dios par ree da bejnan.”

3

Diidx par ree bën Sardis

¹ 'Yan bacaa ni guixhiaalil loj bën rniabee ree da bejnan luguiedx Sardis. Bacaa: “Bën naban con guigajdx ree xSprijt Dios abi' ca'man

gajdx bajl xanyabaa, laaman na lojdi: Naj ragbee gra ni cayüjndi ragbee tēen guial ma güjtidi, majsi par ree bejn nabandi. ² Zeel gol batie'ch xbacaalidi, gol been naguiejn chitēē nit ni sta cayüjndi, din naj ruguiian guial ad cayüjntidi xnejz delant loj da Dadan Dios. ³ Gol basaaladx ni ma biguiejndi nē ni ma basiididi, abi' gol been zian, gol bayüjn xgab zi'c ni cayüjndi. Din bal id zatie'ch xbacaalidi zi'c cayüjndi, dxel zi'c ri't tijb béngubaaan ziangajc chi gagbeedi ma bi't casti par lējt. ⁴ Per luguiedx Sardis, yu' tio'p choon ree bejn sta naya, laa reeman naj bēn gacw lajd naquich abi' sa reeman con naj, din rayal reeman laan. ⁵ Bén güün gan loj dol, chi guidxin hor, zian gacwaman lajd naquich abi' ad zuse'n tēētan lajman loj xlibr guialnaban. Abi' delant loj Dios nē loj ree anjl guien guial laaman naj da bejnan. ⁶ Bén rēn ree gucaagdiajg, gol bacaadiajg ni rēb xSprijt Dios par ree da bejnan.”

Diidx par ree bēn Filadelfia

⁷ 'Yan bacaa ni guixhiaalil loj bēn rniabee ree da bejnan luguiedx Filadelfia. Bacaa: “Bén naya nali, bēn naj diidxli, bēn rajp guialrniabee loj gra zi'c gojp rey Davi guialrniabee, tijbzi laaman rajp guialrniabee par guixhialaman tijb nejz ni achut zajc gusiaaw o gusiaawaman tijb nejz ni achut zajc guixhial, laaman na lojdi: ⁸ Naj ragbee gra ni cayüjndi. Gol gogbee guial majsi ad rajptidi guialrniabee, per naj ma guxhal tijb nejz din guitie'chidi da diidxan sin guial chu gutēē lojdi, din zinalquidi da diidxan abi' ad goct rēbidi guial ad najtidi da bejnan. ⁹ Lējt guguiaa ni günan con ree xbejn xindxab bēn rēb ree naj reeman bēn Israel xbejn Dios, abi' rusquieezi reeman. Guguiaadi ni günan laa reeman, guidgazuxib reeman lojdi, gagbee tēē reeman xhienaag rēnan lējt. ¹⁰ Abi' zi'c ma bazoobidi diidx gapidi pacens guial chinalidi da diidxan, ziangajc ganan lējt chi guidxin dxej gui't guialzi loj guidib guidxliuj, zi'c tijb prueb par gra ree bénguidxliuj. ¹¹ Nayob guialan loj guidxliuj stijb. Gol guzujdxi'ch loj ni ma ragbeedi chitēē tia' ben ren ni rayalidi. ¹² Bén güün gan loj dol, naj gudē lojman tijb luar zojbloj lēn yadoo zojb xanyabaa lod naban da Dadan Dios, ni guibanman tiblyaa. Dxel tiblyajtaman guca laj da Dadan Dios con lan nicüb, con laj ladx da Dadan Dios ni la Jerusalén cüb ni naj xanyabaa lod zojbaman. ¹³ Bén rēn ree gucaagdiajg, gol bacaagdiajg ni rēb xSprijt Dios par ree da bejnan.”

Diidx par ree bēn Laodicea

¹⁴ 'Yan bacaa ni guixhiaalil loj bēn rniabee ree da bejnan luguiedx Laodicea. Bacaa: “Bén ni rüjn cumplid xtiidx, bēn ni been gra ni rayal güünman, bēn naj diidxli, bēn rniabeenē Dios diizd gocli chi gad guidxliuj gacchaaw, laaman na lojdi: ¹⁵ Naj ragbee gra ni cayüjndi. Ad najtidi zi'c nijs nayaag o zi'c nijs laa. ¡Balzianclaa tiblyaa niajquidi zi'c nijs nayaag o zi'c nijs laa! ¹⁶ Per lējt najdi zi'c nijs nayool, ni'qui nadxa' ni'quidza nayaagt, dxel zi'c laa rabēē gajc ro' bejn nijs nayool guin, zian ma rēnan gabēladxan lējt. ¹⁷ Lējt rēb guial najdi benrijcw, rajpiti gra abi' achet ryaadxidi. Per ad ragbeetidi guial achet rajpiti, najdi bēnprob, bēn zibēēl, achet sirv lējt, najdi bēnlutia'p niz lon guial ad nabantidi xnejz. ¹⁸ Zeel rnin lojdi, zi'c rzii bejn ganax or, zian gol been naguiejn gapidi gra da yudaran, din gaquidi rijcw delant lon. Abi' zi'c chi rzii bejn lajd naquich din guiguienman naya, zian gol bayüjn xgab din guiguie'ch xguialxtudi abi' guiguiendi naya delant lon. Nē chi rzii bejn tijb rumed par guialaloj

bejn din guguaaman zagdxé, zian gol been naguiejn din gapidi da guial rignia'n din guguaadi zagdxé. ¹⁹ Rdilnë'n abi' ruzuxnejzan gra ree bën rënan. Zeel gol bagu' luxdoodi gol bayün tēē xgab xhienaag nabandi. ²⁰ Gol gogbee guial naj cabedx lëjt, zi'c chi rnīee tijb bejn rulidx stijb bejn. Cabëesan chu guidxga' naj, zi'c chi rgu' bejn stijb bejn din gaw reeman tijbzi. Abi' bën guidxga' naj ma nabannë'n laaman abi' laaman nabannëman naj. ²¹ Bën güün gan loj dol naj gudë cwë'n cweman lod canabeen, zi'cgajc naj chi gulox benan gan loj dol, gure cwë' da Dadan Dios lod canabeeman. ²² Bën rën ree gucaagdiajg, gol bacaagdiajg ni na xSprijt Dios par ree da bejnan.”

4

Rlies reeman xvalor Dios xanyabaa

¹ Chi gulox bacan diidx guie ree, baguian niz ladia dxel baguian tijb port naxal xanyabaa. Abi' bën guneenë gajc naj diizd guia'xchej bën naj cha' zi'c trompejt, laaman na lon:

—Wë'p guie din gulün lüj ni gac ree chi ma gojc ree ni rnin lojl.

² Loj hor zii gajc por xguialrniabee xSprijt Dios, chi gogbeen ma za'n xanyabaa yagaj baguian tijb yagxhil zagdxé zi'c xi yagxhil tijb rey, lojn zojb tijb bejn. ³ Abi' bën zojb loj yagxhil guin rulaaman bacha' zi'c ree guiaj zagdxé ni lasajc wayëjx, ni la jaspe në cornalina. Abi' guijc yagxhil guin ca tijb guidgij ni rulaa bacha' zi'c guiaj zagdxé ni la esmeralda. ⁴ Abi' gadëd ro' yagxhil guin baguian zagajlbitap ree yagxhil zagdxé abi' loj ree yagxhil guin zojb ree gajlbitap ree bengol najcw reeman lajd naquich yu' coron or guijc reeman. ⁵ Abi' lod za' yagxhil ni za' galay los demasri ree yagxhil guin, yagaj ririi ree bacha' zi'c chi rë'p nijs në ree naquie' zi'c chi rbidxa' guziaaw. Abi' delant loj yagxhil guin re'c gajdx ree guij ni naj ree guigajdx xSprijt Dios. ⁶ Baguia tēen delant loj yagxhil guin zi'c nijsdoo, per nayadxujn zi'c tijb guiaawajn.

Abi' cwë' yagxhil guin za' tajp ree be, tijb gaj reeb za' tib xquin gaj yagxhil guin abi' guidib niz xijch reeb në niz loj reeb yu' guiaaløj reeb. ⁷ Tijb reeb naj zi'c beedx, be barojp guin naj zi'c go'n, be bayon guin naj lojb zi'c loj bejn, be badajp guin naj zi'c bisia ni cazuj. ⁸ Tijb gaj ree be guin yu' xho'p xhiil reeb, abi' xijch xhiil reeb në lën xhiil reeb yu' zien da't guiaaløj reeb. Abi' dxej guiaal ad rucwëëzt rëb reeb:

Naya nalil, naya nalil naya nalil najl dux Dadan Dios,

lüj guial ca'l gra guialrniabee,

lüj guial najl Dios diizd guia'xchej në yan abi' gui'til.

⁹ Beegaj chi rlies ree be guin xvalor bën ni zojb loj yagxhil guin, bën naban tiblyaaa, beegaj ruza't reeb laaman zagdxé rudëed reeb quixtëe lojman, ¹⁰ guigajlbitap ree bengol zojb yagaj, bazuxib reeman lojman, bën ni zojb loj yagxhil abi' nabanman tiblyaaa, abi' ruzuxib reeman lojman rudxiib xcoron reeman niz lojman, rëbgaj reeman:

¹¹ Dux Dad ree Dios, lüj rayal guiya'p respejt,

diidxza'c në guialrniabee.

Din lüj beenchaaw gra ni yu'

abi' lüj rëb guial chu' gra ni yu',

abi' yu' reen.

5

Tijb gui'ch ni nadiüüb con Bén naj zi'c xi xiil Dios

¹ Dxel baguian guial Bén zojb loj yagxhil zagdxe ni naj zi'c xyagxhil tijb rey, ca'man tijb gui'ch yaaman ladbee. Gui'ch guin zi'c lojn zi'c xijchan ca lejtr abi' nadüüban, abi' naguiidan con gajdx se chitëë chu guixhial laan.

² Loj hor guin baguian tijb anjl Bén gojl da't, rbidxa'man rejs rëbaman:

—¿Chu rayal chiquied ree se guie abi' guixhial loj gui'ch guie?

³ Per ni'qui xanyabaa, ni'qui loj guidxliuj, ni'qui lën liuj ad bidxejlt Bén ni rayal guixhial gui'ch guin, ni'qui par guguaaaman ni ca loj gui'ch guin.

⁴ Abi' naj dád binan chi baguian guial achut rdxejl guixhial loj gui'ch guin në par guguaaaman ni ca loj gui'ch guin. ⁵ Dxel na tijb ree bengol guin lon:

—Ad roonl, baguiaa nial ma yu' tijb Bén ni rayal guixhial loj gui'ch guin abi' chiquiedaman guigajdx se guin din ma beenman gan loj gra, laaman Bén naj zi'c tijb beedx loj xdiaa Judá por guialrniabee ni rajpaman, laaman za loj xdiaa rey Davi.

⁶ Abi' chi baguian, dxel baguian guial galay lod za' yagxhil zagdxe ni naj zi'c xyagxhil tijb rey, lod za' guidap ree be guin galay ree bengol ni riga' yagaj, za' tijb Bén naj zi'c xi xiil Dios rguien xsen lod bidxeelguijdxaman chi gütaman. Abi' yu' gajdx xcajchaman con gajdx guiaalojman, guigajdx guiaalojman naj guigajdx xSprijt Dios Bén rxhiaalaman guidib guidxliuj. ⁷ Bibig Bén naj zi'c xiil guin cwa'man gui'ch guin ladxaa Bén zojb loj yagxhil guin. ⁸ Chi cwa'man gui'ch guin, guidap ree be za' gajxh cwë' yagxhil guin në gra guigajlbitap ree bengol guin bazuxib reeman lojman. Tijb gaj ree bengol guin ca' reeman tijb gaj arp ca' tëë reeman cojp or ni guidxa goxyaal, go'xh guin naj xtiidx ree xbejn Cristo chi rbejdx rniab reeman Dios. ⁹ Bengol guin ree rool reeman tijb cant cüb ni rëb:

Lüj rayal tia' gui'ch guin
abi' guixhialil se ni naguiidnën.
Din lüj güjtil
abi' con xrejn ni guxhie'l gudijxil
por graloj bejn din gac reeman xbejn Dios,
achet güünan xhietëëz diidx rniee reeman,
o xhie loj diaa, o xhie guiedx o xhie nacion zëed reeman.

¹⁰ Beenl laa reeman rey
been tëel laa reeman bixhioz par dux Dad ree Dios,
abi' laa reeman nabee loj guidxliuj.

¹¹ Baguia tëen biguiejn tëen cha' zien ree anjl gadëd ro' yagxhil zagdxe guin con guidap ree be guin në ree bengol guin. Abi' bénguixiujczi naj reeman por mil naj reeman. ¹² Abi' dád rejs rniee reeman rëb reeman:

Bén naj zi'c xi xiil Dios, Bén güt,
laaman rayal tia' guialrniabee,
laaman rayal gap guialnaza'c,
quiarguiejn, në gojl,
respejt, guza't reeman laaman zagdxe,
guilies tëë reeman xvaloraman.

¹³ Dxel biguiejnan cha' gra ree ni been Dios, zi'c ni yu' ree xanyabaa, loj guidxliuj në ni yu' ree lën liuj në ree ni yu' loj nijsdoo, rëb reen: Bén zojb loj xyagxhil guialrniabee në Bén naj zi'c xi xiilaman,

par laa reeman naj
 respejt, diidxa'c, guialrniabee,
 abi' guilies reeman xvalor reeman
 zianczi në par tiblayaa.

¹⁴ Chi gulox rëb reen zian, dxel guidap ree be za' yagaj rëb reeb:

—Amén.

Abi' guigajlbitap ree bengol za' yagaj bazuxib par gap reeman laaman
 respejt, bën ni naban zianczi në par tiblayaa.

6

Guigajdx ree se

¹ Dxel baguian biquied bën naj zi'c xi xiil Dios se yaloj guin, abi' zi'c chi
 rbidxa' guziaaw zian biguiejnan gunee tijb ree be guin, rëbib:

—jGuda!

² Dxel baguian gulentie tijb way naquich, abi' bën dxiib laab ca'man
 tijb xi arcw flejch. Abi' cwa'man tijb coron guial ma beenman gan, dxel
 briiman persi ziguieenman gan mazri.

³ Chi biquied bën naj zi'c xi xiil Dios se barojp guin biguiejnan rëb be
 barojp guin:

—jGuda!

⁴ Dxel gulentie tijb way xnia, abi' bën dxiib laab ca'man tijb espad
 narooob në guialrniabee par gustijlaman bejn ree loj guidxliuj din gugüjt
 lasa' reeman.

⁵ Chi biquied bën naj zi'c xi xiil Dios se bayon, biguiejnan rëb be bayon
 guin:

—jGuda!

Dxel baguian gulentie tijb way ya's, abi' bën dxiib laab ca'man tijb
 xijglibr. ⁶ Abi' galay guidap ree be guin biguiejnan cha' tijb bën rëb:

—Tib quil trigo lasajcan tib dxej dxiin abi' choon quil cebada lasajcan
 tibdxej dxiin, per ache güünl sejt në vin.

⁷ Chi biquied bën naj zi'c xi xiil Dios se badajp guin, biguiejnan rëb be
 badajp guin:

—jGuda!

⁸ Dxel baguian gulentie tijb way naguiëch, abi' bën dxiib laab laman
 guialgüjt, abi' zinal gabijl laaman. Cwa' reeman guialrniabee par gugüjt
 reeman tib part loj tajp lala' ree bénguidxliuj. Yu' reeman guiët por wadijl,
 o por guialrliaan, o por guialguijdx, o por ree be doxh yu' loj guidxliuj.

⁹ Chi biquied bën naj zi'c xi xiil Dios se bagaay guin, baguian xan altar
 za' ree xsprijt ree bën bagüjt reeman guial bililadx reeman guzujdx'i'ch
 tëë reeman loj xtiidx Dios. ¹⁰ Abi' rbidxa' reeman rejs rëb reeman:

—Dios, Dad bën rniabee, lüj naj bën naya nali abi' rüjnl zi'c rayal, ¿za
 plact gaglaal par güün xguialguxtisil con ree bën ni bagüjt dunujn loj
 guidxliuj din yaguijx reeman ni been reeman?

¹¹ Dxel tijb gaj reeman cwa' tijb lajd naquich, abi' bagojn reeman laa
 reeman din cwëz reeman stibda'n yaza' lasa' reeman, din ryaadxri guiët
 ree xcompniar reeman zi'c güt reeman, bën ni cayüjn gajc ree sirv Dios.

¹² Chi baguian biquied bën naj zi'c xi xiil Dios se baxo'p guin, dxel
 guxu rejs da't abi' gubijdx gojcan nagas zi'c tijb lajd ya's. Guiáad bëw
 gojcan naxnia zi'c rejn, ¹³ abi' ree bajl xanyabaa biajb reen loj guidxliuj
 zi'c ryajb ree higo ni ya' loj yag higo chi rbi' bidoxh. ¹⁴ Dxel gunidloj

xanyabaa zi'c tijb gui'ch ni rdüüb, abi' gra ree guia' në ree yuj riga' ree loj nijs bachaa xliajt reen. ¹⁵ Abi' ree rey në gra ree bën rniabee loj guidxliuj, në ree bën rniabee ree suldad në ree bën rijcw, në ree bën yu' gojl par gra, në ree bën naj zi'c bën nado', në ree bën ad najt zi'c bën nado', gra reeman baquie'chloj lën guiajbiliaa në lën ree yalaj. ¹⁶ Abi' rëb reeman loj ree guia' në loj ree yalaj:

—Gol biajb du guijcan, gol baquie'ch tää dunujn loj bën zojb loj xyagxhil gualrniabee në loj xcasti bën naj zi'c xi xiil Dios, ¹⁷ dín ma bidxin dxej doxh ni gudëed reeman casti, abi', ¿chu zajc taan casti guin?

7

Tibgayuu tiubitap mil ree bën Israel

¹ Chi gulox baguian ni guin ree, baguian tajp ree anjl za' reeman guidap xquin guidxliuj par gucwëéz reeman bi ni zëed guidap xquin, chitëë guibi' bi loj guidxliuj, ni'qui loj nijsdoo, ni'qui ree loj yag. ² Dxel baguian stijb anjl zëedaman niz lod rliejn gubijdx, ca'man xse Dios naban. Abi' dád rejs guneenëman guidap ree anjl guin, bën ni ca' ree gualrniabee par güün reeman ni güün reeman con guidxliuj në con nijsdoo, ³ rëbaman loj reeman:

—Ad xhie güündi guidxliuj, ni'qui nijsdoo, ni'qui ree yag, xt chi ma gulox bacaa ree xse dux Dios ree lucwaj ree xbejnman.

⁴ Dxel biguiejnan bël reeman cwa se guin lucwaj. Por gra ree bën Israel, tibgayuutiubitap mil reeman cwa se guin lucwaj. ⁵ Dín chiptio'p mil ree bën zëed loj xdiaa Judá cwa se guin, në chiptio'p mil ree bën zëed loj xdiaa Rubén në chiptio'p mil ree bën zëed loj xdiaa Gad. ⁶ Në chiptio'p mil ree bën zëed loj xdiaa Aser, në chiptio'p mil ree bën zëed loj xdiaa Neftalí, në chiptio'p mil ree bën zëed loj xdiaa Manasés, ⁷ con chiptio'p mil ree bën zëed loj xdiaa Simeón, chiptio'p mil ree bën zëed loj xdiaa Leví, në chiptio'p mil ree bën zëed loj xdiaa Isacar, ⁸ chiptio'p mil ree bën zëed loj xdiaa Zabulón, chiptio'p mil ree bën zëed loj xdiaa José, chiptio'p mil ree bën zëed loj xdiaa Benjamín cwa se guin lucwaj reeman.

bénguixiuj najcw lajd naquich

⁹ Dxel baguian bénguixiuj ree, per bénguixiuj ree ni'qui chut zajc gulab laa reeman, bën ni za ree gadxagayaa guiedx, gadxagayaa diaa, bën rniece ree gadxagayaa diidx bën za ree gra lad në gadxagayaa nacion. Za' reeman delant loj xyagxhil bën rniabee në delant loj bën naj zi'c xi xiilaman. Najcw reeman lajd naquich ca' tää reeman zijn. ¹⁰ Abi' rëb reeman rejs da't:

Dunujn raya'pan perdon por dux Dadan Dios

bën zojb loj xyagxhil gualrniabee

në por bën naj zi'c xi xiilaman.

¹¹ Abi' gadëd ro' yagxhil guin con guidap ree be ni za' yagaj con guigajl-bitap ree bengol, gadëd yagaj za' gra ree anjl abi' bazuxib reeman delant loj xyagxhil Dios xt basajb guijc reeman liuj par gap reeman laaman respejt, ¹² rëb reeman:

¡Amén! gualrniabee, gojl,

gualrajc, respejt, diidxza'c,

gualrlies xvaloraman në quixtëë,

naj reen par dux Dad ree Dios zianczi në par tiblayaa. Amén.

¹³ Loj hor zii tijb ree bengol guin gunabdiidx lon:

—¿Chu ree bén ni najcw lajd naquich guin, ban tēē ree bénan?

¹⁴ Badxi'nán rēn:

—Ad ragbeetan Dad, lüj ragbee.

Dxel naman lon:

—Laa reeman naj bén guzagdiaj da't abi' naquich xab reeman guial ma naya reeman ma biquied xtol reeman con xrejñ bén naj zi'c xi xiil Dios. ¹⁵ Zeel za' reeman delant xi yagxhil Dios, abi' dxej guiaal cayüjn reeman sirv lod zojbaman. Abi' bén zojb loj yagxhil guin ma za'man con laa reeman, abi' laaman gap laa reeman. ¹⁶ Ad yu'tri dxej guiliaan reeman, ad ze'c tēēt reeman nijs, ad zudxüü tēēt gubijdx laa reeman, ad zagnalaa tēēt reeman. ¹⁷ Din bén naj zi'c xi xiil Dios bén za' galay lod za' xi yagxhil Dios, laaman gap laa reeman zi'c tijb bén rajp ree xiil abi' chinēman laa reeman lod rajch nijs ni runee guialnaban. Dxel Dios laaman gutiaa loj reeman gra ree nijs brii loj reeman chi biin reeman.

8

Guigajdx se

¹ Chi biquied bén naj zi'c xi xiil Dios se ni goc gajdx guin, bayajcdxe xanyabaa cost garol hor. ² Dxel baguian gajdx ree anjl za' reeman delant loj Dios, cwa' reeman gajdx trompejt. ³ Dxel bi't stijb anjl con tijb chaabacwi ni or, guzuliman delant lo altar guin abi' yu' bén badēēd zien yaal din cu'man goxyaal guin loj altar or ni za' delant loj yagxhil zagdxe ni naj zi'c xyagxhil tijb rey, din tijbzi chē'pnē goxyaal guin xtiidx gra ree xbejn Dios, diidx ni rnīee reeman chi rbejdx rniab reeman laaman. ⁴ Dxel diizd ladxaa anjl guin brii goxyaal guin con ree xtiidx ree xbejn Dios, diidx ni rnīee reeman chi cabejdx canab reeman laaman, abi' wē'p reen niz loj Dios. ⁵ Dxel bacha anjl guin chaabacwi guin guij ni yu' loj altar guin abi' bazurlojman laan loj guidxliuj. Abi' dád rejs guridxa' guziaaw, gojc naquie', wē'p nijs, abi' bi't xudoxh.

Trompejt ree

⁶ Dxel guigajdx ree anjl ni ca' ree trompejt guin, guzujchaaw reeman par gucwejdx reeman laan.

⁷ Chi bacwejdx anjl yaloj guin trompejt ni ca'man, biajb guiajyabaa loj guidxliuj no'chan bajl nē rejn. Dxel cost gurol guidxliuj we'c con ree yag nē ree gui'xh naga' yu' lojn.

⁸ Chi bacwejdx anjl barojp guin trompejt ni ca'man, dxel zi'c naj guia'ro' ni cacaguīj naj ni biajb loj nijsdoo, abi' cost garol nijsdoo bayajcan rejn loj hor guin. ⁹ Abi' cost garol ree be ni naban loj nijsdoo güjt reeb abi' cost garol ree barcw ni yu' loj nijsdoo gunidloj.

¹⁰ Chi bacwejdx anjl bayon guin trompejt ni ca'man, dxel biajb bajl xanyabaa ni narooob ni cacaguīj zi'c chi rtiaguīj guied, loj cost garol guīiw ni yu' nē cost garol ree lod rajch nijs biajban. ¹¹ Bajl xanyabaa ni biajb lan Ajenjo, abi' cost garol nijs guin ree gojc nala abi' dád zien ree bejn güjt guial bayajc ree nijs guin nala.

¹² Chi bacwejdx anjl badajp guin trompejt ni ca'man, abi' cost garol gubijdx bicajy, cost garol bēēw nē cost garol ree bajl xanyabaa bicajy. Abi' guial bicajy reen, dxel cost garol dxej nē guiaal ad basnit.

¹³ La'tgaj cuguian ni guin ree, biguiejnan zi'c chi rzuj tijb bisia xanyabaa. Dxel biguiejnan cha' tijb anjl rbixdiajman rēbaman:

—iProb, per prob, per probza ree bén ni yu' loj guidxliuj por zachoon trompejt ni ryaadx gucwejdx za choon ree anjl!

9

¹ Chi bacwejdx anjl bagaay guin trompejt ni ca'man, dxel baguian zi'c tijb bajl xanyabaa ni biajb loj guidxliuj, abi' bajl xanyabaa guin cwa'n guibliaw par guixhialan ro' bizë ni ad yu't lod rliox. ² Chi guxhalan ro' bizë guin tijb go'xh yo'xhchab brii lën bizëë guin zi'c chi ririi go'xh lën tijb horn narooob, xt bascajy go'xh guin gubijdx në bi. ³ Abi' lën go'xh guin brii ree bi'tsu abi' bire'ch reeb loj guidxliuj, abi' cwa' reeb guialrniabee par gac reeb bedoxh zi'cgajc nixüb. ⁴ Per gunabee reeman laa reeb chitëë xhie güün reeb guixya' ree, ni'qui ree yag, ni'qui ree gui'xh naga'. Naabzi ree bén ni ad yu't ree xse Dios lucwaj. ⁵ Per ad par gugüjtt reeb bejn, naabzi par sagdiaj reeman gaay bëëw. Abi' lod rudidxa' reeb riyajnan zi'c ryajan lod rudidxa' nixüb. ⁶ Lën ree dxejzii quuil ree bejn guialgüjt, per ad zadxejlt reeman laan. Guiën reeman guiët reeman per ad zëjtt reeman.

⁷ Bi'tsu guin ree naj reeb zi'c naj ree way ni ma za' par che reeb loj wadijl, guiyc reeb yu' zi'c coron or, abi' loj reeb naj zi'c loj bejn. ⁸ Abi' guidxguijc reeb naj zi'c guidxguijc béngunaa, guiáad dxidlay reeb naj zi'c dxidlay beedx. ⁹ Guidib luxdoo reeb nada'cwan zi'c guilib, abi' xhiil reeb rüjnan naquie' zi'c rajc naquie' chi ruxüünnë ree way carrejtt loj wadijl. ¹⁰ Abi' xbaan reeb naj zi'c xbaan ree nixüb, abi' con lupuntan rudidxa' reeb. Con xbaan reeb yu' reeb gojl par gusagdiaj reeb bejn ree loj gaay bëëw. ¹¹ Anjl ni rniabee bizë ni ad yu't lod rliox laaman rniabee ree bi'tsu guin. Anjl guin con diidx Hebreo laaman Abadón, abi' con diidx grieg laaman Apolión, diidx guin ree rën guiëb reen bén ruloox.

¹² Zian rliox guialzi yaloj, dxel gui't zatio'p guialzi.

¹³ Chi bacwejdx anjl baxo'p trompejt ni ca'man, dxel biguiejnan tijb cha' bejn briin galay ree cajch ni za' guidap xquin altar or ni za' delant loj Dios. ¹⁴ Cha' bén biguiejnan rëbaman loj anjl baxo'p bén ca' trompejt guin:

—Baslaa guidap ree anjl ni naxii ro' guiiw ro' ni la Eufrates.

¹⁵ Zian bidxin or, bidxin dxej, bidxin bëëw në ijz ni naj par laa guidap ree anjl guin din gugüjt reeman garol ree bénguidxliuj. ¹⁶ Abi' biguiejnan bël naj xsuldad reeman bén dxiib ree way. Naj reeman tio'pgayuu millon. ¹⁷ Ze baguian way guin ree con ree bén dxiib laa reeb: Bén dxiib ree way guin, guidib luxdoo reeman nada'cw guilib culor xnia, ni sul në ni naguiëch. Abi' guiyc ree way guin naj reen zi'c guiyc ree beedx, abi' ro' reeb ririi bajl, go'xh në azufre. ¹⁸ Abi' garol ree bénguidxliuj güjt por bajl guin, go'xh guin në azufre guin ni ririi ro' reeb. ¹⁹ Con ro' ree way guin rugüjt reeb bejn ree, abi' con xbaan reeb rucheelguijdx reeb din lupunt xbaan reeb najn zi'c guiyc bëël.

²⁰ Per los demasri ree bén ni ad güjtt por ree guialzi guin, ad basa'nt reeman ni mal rüjn reeman. Ad bacwëëzt rën reeman xindxab ree con ree Dios ni naj or, plajt, bronce në ree dios guiaj con ree dios yag, dios ni ad rajct ruguiaa, ad rajct riguiejn ad rajc tëët rza reeman. ²¹ Ad bacwëëz tëët rugüjt reeman bejn ree, ad basa'n tëët reeman guialbidxaa, ad basa'n tëët reeman ni dxuudx ni rüjn reeman con bén ad najt lacheel reeman, ad basa'n tëët reeman guialgubaan.

10

Tijb anjl ca' gui'ch

¹ Dxel baguian stijb anjl bén gojl da't, zidguiajtaman xanyabaa lën tijb zaj abi' guijcaman dxiiib tijb guidgij. Lojman naj zi'c gubijdx, abi' guia'man naj zi'c tio'p bajl ziool. ² Dxel ca'man tijb librdoo naxal lojn. Abi' bazuj guia' ladbeeman loj nijsdoo, abi' guia'man lad ruvejs bazujman laan loj guidxliuj. ³ Dxel guridxa'man rejs da't zi'c rbidxa' beedx, chi guridxa'man guridxa' gajdx ree guziaaw. ⁴ Chi gulox guridxa' gajdx ree guziaaw guin, ma nucan ni rëb guigajdx ree guziaaw guin chi biguejnan cha' tijb Bén na lon diidz xanyabaa:

—Ad gucaal ni gunee guigajdx ree guziaaw guin, din ad rayalt gagbee ree bejn laan.

⁵ Abi' anjl ni baguian za'li loj nijsdoo në loj guidxliuj gules yaa ladbeeman xanyabaa, ⁶ abi' badëë xtiidxaman por Bén naban tiblyaa, Bén been xanyabaa, guidxliuj në nijsdoo, në gra ni yu' xanyabaa, loj guidxliuj në loj nijsdoo guial ad zaglaatri gac ni rayal gac. ⁷ Din chi gucwejdx anjl ni goc gajdx trompejt ni ca'man dxel ma bidxin dxej gac zi'c naj xixgab Dios, zi'c bagojnman loj ree Bén badëë xtiidx Dios loj ree bejn Bén ni rünj ree sirv lojman.

⁸ Dxel zatijb gaj gunee Bén ni guneenë naj diidz xanyabaa, naman:

—Wej bica' librdo ni zojbyal loj ladxaa anjl ni za' loj nijsdoo në loj guidxliuj.

⁹ Dxel wan lod za' anjl guin, rën lojman din gunee man librdo guin lon, dxel naman lon:

—Cwa'n gudawan. Ro'l guiatan nejxh zi'c dxijn, per lën! nala yaban.

¹⁰ Dxel cwa'n librdo guin ladxaa anjl guin, abi' gudawanan. Ro'n biguiajtan nejxh zi'c dxijn, per chi gulox gudawanan nala biguiajtan lënan. ¹¹ Dxel bagojn reeman naj guial gusnuu gugojnman bejn ree ni na Dios gac con zien ree nacion, rey ree në ree guiedx, xhietëëz diidz rniee reeman.

11

Tio'p ree testiw

¹ Abi' baneeman tijb var ni rtia'beenë bejn, naman lon:

—Bisu bica'bee xyadoo Dios në altar, dxel gulabil Bén cayajp ree Dios respejt lën yadoo guin. ² Per ad tia'beel lule' yadoo guin din lule' guin ma badëë Diosan loj ree Bén ad najt ree Bén Israel, laa reeman naj Bén gusagdiaj ree Bén Jerusalén loj choon ijz garol. ³ Abi' naj gaxhalan tio'p ree da bejnman din guza't reeman naj. Grop reeman gacw lajd ya's, abi' laa reeman guinee da diidxan choon ijz garol.

⁴ Grop ree Bén guin naj grop ree yag olivo në grop ree candeler ni za' loj dux Dad ree Dios Bén rniabee loj guidxliuj. ⁵ Bal chu Bén rën güünnë laa reeman xhienin, ro' reeman grii bajl din gugüjt reeman Bén rdxe'ch ree laa reeman. Zian guiët ree Bén rën güün laa reeman xhienin. ⁶ Grop ree Bén guin rajp reeman guialrniabee par gusiaaw reeman xanyabaa chitëë gal guia loj choon ijz garol guin chi guinee reeman da diidxan. Rajp tëë reeman guialrniabee par guchaa reeman nijs gacan rejn, abi' zajc guiniab reeman din gui't galoj guialzi loj guidxliuj bëltëëz volt rën reeman. ⁷ Per chi ma bayaaloj tiamp ni guinee reeman da diidxan, dxel tijb monstroo, tijb be doxh grii lën bizë ni ad rliox, be guin ca'pnë laa

reeman abi' güünb laa reeman gan abi' gugüjtib laa reeman. ⁸ Dxel gaa xcuerp reeman lunejz luguiedx Jerusalén lod güt xdad reeman Jesucrist loj crüjz, luguiedx ni naj yan zi'cgajc Sodoma në Egipto. ⁹ Dxel graloj ree bejn bën rniee ree gadxagayaa diidx, bën gralad ree, bën za graloj ree nacion zuguaa reeman gaa xcuerp ree bën guin lunejz choon dxej garol, per ad zatiëjbt reeman guiguie'ch ree bën guin. ¹⁰ Abi' ree bën naban loj guidxliuj dád yabaa reeman guial ma güjt ree bën guin, abi' guial tant yabaa reeman xt yazaladx reeman xhie renin loj lasa' reeman, din par laa reeman dád basagdiaj ree bën guin laa reeman. ¹¹ Per chi ma bayaaloj choon dxej garol guin, yasban Dios bën guin ree dxel chixche reeman abi' gra ree bën guguaa dád guidxeb reeman. ¹² Dxel dád rejs biguien cha' tijb bën ni guneexanyabaa, rëbaman loj grop ree bën guin:

—Gol wë'p guie.

Abi' wë'p reeman xanyabaa lën tijb zaj delant loj gra ree bën rdxe'ch laa reeman. ¹³ Hor ni bayë'p reeman xanyabaa bi't tijb xudoxh abi' zien ree ni bize'n luguiedx guin abi' gajdx mil bejn güjt. Guiáad gra ree bën ad güjtt dád bidxeb reeman abi' gules reeman xvalor Dios bën yu' xanyabaa. ¹⁴ Zian rliox gualzi raroj, dxel laa zëed gajc gualzi ni rayon.

Trompejt ni goc gajdx

¹⁵ Chi bacwejdx anjl ni goc gajdx guin trompejt ni ca'man, dxel rejs da't biguien cha' ree bejn xanyabaa rëb reeman:

Ma bidxin dxej yaya'n gra xgualrniabee
guidxliuj loj dux Dad ree Dios

në loj Jesucrist abi' nabee reeman zianczi në tiblayaa.

¹⁶ Guigajlbitap ree bengol zojb loj xyagxhil reeman delant loj Dios, bazuxib reeman xt basajb loj reeman liuj gojp reeman laaman respejt, ¹⁷ rëb reeman:

Dux Dadan Dios, lüj rajp gra gualrniabee
abi' najl Dios yan në diízd gocli abi' gui'til.

Quixtéë lüj guial ma culüü xgualrniabee naroo bil ni rajpil
abi' ma guzulojl canabeel.

¹⁸ Bénguidxliuj ree bidxe'ch reeman,
per ma bidxin dxej gulüü xgualrdxe'chil.

Ma bidxin dxej güün xgualguxtisil con ree bengüt
par gudëel ni rayal tia' ree xbejnl

bën badëed ree xtiidxil, në ree bën bililadx lüj.

Në ree bën rajp lüj respejt.

Ma bidxin dxej zi'c ree benzojbloj në ree bën ad zojblojt tia' reeman ni
rayal reeman,

dxel gunidlojl bën ruxhiin ree loj guidxliuj.

¹⁹ Chi gulox rëb reeman zian, bixal xyadoo Dios xanyabaa dxel biguien xcaj promejs ni been Dios diízd gocli. Dxel guzuloj rë'p nijs, rajc naquie', rëez guziaaw, bi't xudo'xh abi' dád zro' biajb guiajyabaa.

12

Tijb béngunaa në tijb dragon

¹ Dxel gojc tijb sen ro' xanyabaa. Balüüloj tijb béngunaa nadüübaman gubijdx, abi' nuzuj guia'man loj bëw abi' guijcaman yu' coron ni gocchaaw con chiptio'p bajl xanyabaa. ² Yu' xi'n béngunaa guin abi' rbixdiajman ragnaa lënman guial ma gal xi'nman. ³ Per gojc stijb sen

xanyabaa. Balüüloj tijb dragon ro', tijb bedoxh najb culor xnia. Yu' gajdx guijquib, chii xcajchib yu' tēē tijb coron tijb gaj guijquib. ⁴Abi' con xbaanb bazaalib cost garol bajl xanyabaa loj guidxliuj. Dxel guzujb loj béngunaa guin din gawib xi'nman naabzi galix. ⁵Gojl xi'n béngunaa guin tijb xindo niguiaaw, abi' laax nabee loj guidxliuj con tijb var guiib. Dxel biquied reeman laax loj xniaax, bidxinx lod zobj Dios lod canabeeman. ⁶Abi' béngunaa guin baxüünman par niz lod naj ganax yujbidx, lod ma beenchaaw Dios par laaman, lod gudēēd reeman ni gawaman choon ijz garol.

⁷Dxel guyu wadijl xanyabaa, anjl ni la Miguel con ree xi anjlaman gudijlnē reeman dragon guin con ree xi anjlib. ⁸Per ad beent be guin gan con ree xi anjlib loj anjl Miguel con ree xi anjlaman, dxel ad gojctri nibajn be guin xanyabaa con ree xi anjlib. ⁹Zianan zeel bazaal reeman dragon guin loj guidxliuj con ree xi anjlib. Dragon guin naj bëēl gulal ni la xindxab nē satanás xin rusquiee gra ree bénguidxliuj.

¹⁰Dxel biguien cha' tijb bejn rejs da't diizd xanyabaa rēbaman:

—Ma bidxin dxej baslaa Dios dunuj ree, ma bidxin xguialrniabeeman chi nabeenēman Jesucrist, din ma biquied bēn rbe'c xguialquia ree dux compniar ree, bēn rdxinnē ree guialquia guin loj dux Dad ree Dios dxej guiaal. ¹¹Abi' dux compniar ree been reeman gan por rejn ni guxhie' bēn naj zi'c xi xiil Dios nē por ni rēb reeman xhienaag rliladx reeman xtiidx Dios, ad bidxebt reeman majsi niējt reeman. ¹²Zeel gol badxe' luxdoodi nix gra ree bēn zobj xanyabaa per, jprobza lējt bēn zobj ree loj guidxliuj nē ree be yu' loj nijsdoo! Din ma biguiajt xindxab lod zobjidi, dád rdxe'chix guial ragbeex sta'nz dxej raya'n par laax.

¹³Chi baguiaa dragon guin guial ma biajbib guidxliuj, dxel briinalib béngunaa naj xniaa xindo guin. ¹⁴Dxel badēē reeman tio'p xiil béngunaa guin zi'c xiil bisiaro' din gac suman loj bëēl guin xt lod naj ganax yujbidx, lod gudēēd reeman ni gawaman choon ijz garol. ¹⁵Abi' gulēē ro' dragon guin tijb guiw nijs din chinēn béngunaa guin. ¹⁶Per bixal loj guidxliuj persi gu'n guibidx nijs gulēē ro' dragon guin. Zian been guidxliuj béngunaa guin yudar. ¹⁷Dxel dád bidxe'ch dragon guin béngunaa guin, abi' zitilnēb sta'n ree bēn ni za loj xdiaaman, bēn ruzoob ree xtiidx Dios zinal tēē reeman xtiidx Jesucrist.

13

Tio'p ree bedoxh

¹Wej dragon guin bisub ro' nijsdoo. Abi' naj baguia guial brii tijb monstroo loj nijsdoo, tijb bedoxh be yu' gajdx guijc, chii xcajchib abi' loj tijb gaj cajch guin yu' tijb gaj coron, abi' loj guigajdx guijquib ca tijb diidx ni rnieeguidx Dios. ²Bedoxh ni baguian naj zi'c tijb tigr, per guia'b najn zi'c naj guia' ojs, abi' ro'b najn zi'c ro' beedx. Dxel dragon ni guzu ro' nijsdoo badēēdib loj monstroo guin xluarib lod rniabeeb abi' guialrniabeero' ca'b par nabeeb. ³Tijb guijc monstroo guin baguian tijb lod nadxeelguidx ni rulüü ad zusbajnt laab, per bayajc lod nadxeelguidx guin abi' gra ree bénguidxliuj badxaløj abi' binal reeman monstroo guin. ⁴Dxel gojp da't reeman respejt dragon guin guial badēēdib guialrniabee loj monstroo guin gojp da't tēē reeman respejt monstroo guin, rēb reeman:

—¿Chu naj zi'c monstroo guin abi' chu zajc til con laab?

⁵ Monstruo guin gojccaaw ro'b par guilies xvalor gajquib, abi' guinieeguijdxib Dios, gojpib guialrniabee par güünb zian loj choon ijz garol. ⁶ Abi' gunieeguijdxib Dios, guneeb diidxmal ree por laaman, por xyadooman në por gra ree bën zojb xanyabaa. ⁷ Gojp monstruo guin permis par sub contr ree xbejn Dios abi' güünb laa reeman gan. Abi' gojpib guialrniabee par nabeeb graløj ree bejn, bën ni rniee ree gadxagayaa diidx, bën gra lad ree, gra ree nacion. ⁸ Gra ree bën ad cat laj loj xlibr guialnaban diidz chi gad guidxliuj gacchaaw, loj xlibr bën naj zi'c xi xiil Dios bën gü't por ree bejn, gra reeman gap da't respejt monstruo guin. ⁹ Bën rën ree gucaagdiajg, gol bacaagdiajg. ¹⁰ Bën naj che ladxguuib, cheman ladxguuib. Bën naj guiët con espad, con espad guiëtaman. Zeel bën naj ree xbejn Dios ad yadxaguidi ad gucwëez tēē chililadxidi Dios.

¹¹ Dxel baguian stijb monstruo ren briib loj guidxliuj, yu' tio'p xcajchib zi'c xcajch xiil, per cha'b naj zi'c cha' dragon. ¹² Abi' lasa'gajc guialrniabee ca' monstruo ni brii loj nijsdoo lasa'gajcan ca'b abi' por laab gojp da't ree bejn respejt monstruo ni brii loj nijsdoo, monstruo ni bayajc lod nadxeelguijdx ni rulüüczü gugüjt laab. ¹³ Abi' monstruo ni brii loj guidxliuj në gajquib rüjn milagr narooob ree, xt rajc rniabeeb rguiajt bajl diidz xanyabaa xt loj guidxliuj delant loj ree bejn. ¹⁴ Zian rusquieeb bénguidxliuj ree por ree milagr ni rüjnb delant loj monstruo ni brii loj nijsdoo, abi' rniabeeb rüjn ree bénguidxliuj tijb xfigur monstruo ni brii loj nijsdoo, monstruo ni bidxeelguijdx con espad abi' gubajnb. ¹⁵ Abi' monstruo ni brii loj guidxliuj xt gojpib guialrniabee par gudēēdib guialnaban loj xfigur monstruo ni brii loj nijsdoo, par guinee figur guin në par gugüjtib gra ree bën ni ad rajpt respejt figur guin. ¹⁶ Gunabee tēē monstruo ni brii loj guidxliuj gra ree bejn, zi'c ree bengol zi'c ree xindoo, benrijcw ree në ree bënprob, bën naj ree zi'c bën nado' në ree bën ad najt zi'c bën nado', din chu' sen yaa reeman ladbee o lucwaj reeman. ¹⁷ Abi' achut zajc sii o guto' ya bal id ca reeman sen guin, abi' sen guin naj laj monstruo guin o xinumbrib.

¹⁸ Guie ryaadx guialrignia'. Bën rajp guialrignia' cwēē xcwentaman con xnumbr monstruo guin, abi' numbr guin naj xho'pgayuu gayojnbixho'p. Con numbr guin ririi laj tijb bénguidxliuj.

14

Cant ni biil tibgayuu tiuubitap mil ree bejn

¹ Bagua tēēn guial za' bën naj zi'c xi xiil Dios guijc dajn ni la Sión. Bën naj zi'c xi xiil Dios za'man con tibgayuu tiuubitap mil ree bejn, graczi reeman ca lucwaj reeman laj bën naj zi'c xi xiil Dios në laj xDadaman. ² Abi' biguiejnan tijb naquie' xanyabaa zi'c naquie' rüjn zil da't nijs, o zi'c rguien rbidxa' guziaaw rejs da't, o zi'c chi rusijdx zien ree bejn arp. ³ Dxel rool reeman tijb cant cüb delant loj yagxhil lod zojb bën rniabee në loj guidap ree be za' yagaj në loj ree bengol guin. Ad zile't chu gusiid cant guin, naabzi ree bën tibgayuu tiuubitap mil guin, laa reeman naj bën gulaa loj ree bénguidxliuj. ⁴ Abi' laa reeman naj ree xinguaaaw ni ad bagaalt béngunaa, gojc reeman naya abi' zinal reeman bën naj zi'c xi xiil Dios bantēēz guin rejman. Laa reeman naj ree bën gulaa loj ree bénguidxliuj abi' zi'c guialnaza'c yaloj ni rinē bejn loj Dios zian naj reeman delant loj Dios në delant loj bën naj zi'c xi xiil Dios. ⁵ Ad goct basquiee reeman, nayadxuj reeman delant loj Dios.

Ruson ni badëë guiyon ree anjl

⁶ Dxel baguian tijb anjl rzujman xanyabaa con tijb ruson ni naj par tiblayaa par gugojnman gra ree bén naban loj guidxliuj, xhietëëz diidx rniee reeman, o xhietëëz loj diaa zëed reeman, o xhietëëz ciuda o nacion zëed reeman. ⁷ Dxel dád rejs gunee anjl guin rëbaman:

—Gol bidxeb Dios, gol gules xvaloraman, din ma bidxin hor yadëed ree bejn cwent lojman. Gol gojp da't respejt bén been xanyabaa, guidxliuj në nijsdoo në lod rajch nijs.

⁸ Dxel rëb stijb anjl:

—Ma biajb, ma biajb Babilonia din zi'c chi rusüdx tijb bejn stijb bejn, zian ma basquiee ciuda narooob guin gra ree bénguidxliuj guial güün reeman graloj ree nidxuudx, graloj ree dol ro'.

⁹ Dxel rejs da't gunee anjl bayon guin rëbaman:

—Bal chu gap da't monstruo guin respejt con xfigurib abi' tiëbaman tia xsenb lucwajman o yaaman, ¹⁰ bén zii yayal xcasti narooob Dios, zro' da't gudëëdaman laaman casti. Abi' sagdiajman loj bajl ni caye'c azufre delant loj ree xianjl Dios në delant loj bén naj zi'c xi xiil Dios. ¹¹ Ad yu' tëët dxej yayü' bajl guin. Ni'qui radxe ni'qui guiaal achet guialraziiladx par ree bén rajp da't respejt monstruo guin con xfigurib, o bén ca ree xsenb. ¹² Zeel bén naj ree xbejn Dios bén ruzooob ree xtiidxaman abi' rliladx reeman Jesucrist, ad rayalt yalenya' reeman.

¹³ Biguiejn tëën cha' bén ni na lon diizd xanyabaa:

—Bacaa ni ganin lojl: “Diizd yan xiquilbaa ree bén rëjt con guialrliladx Jesucrist.”

Dxel rëb xSprijt Dios: “Walican din ma yaziiladx reeman xcwent ree guialzi ni gudëd reeman abi' chinë reeman guialbenza'c reeman.”

Guialnaza'c ni runee guidxliuj

¹⁴ Dxel baguian tijb zaj naquich abi' loj zaj guin zojb zi'c tijb bejn. Yu' tijb coron or guijcaman abi' yaaman ca'man tijb hoz ni nadoxh ro'. ¹⁵ Dxel brii stijb anjl lën yadoo abi' rejs da't guneeman bén ni zojb loj zaj guin rëbaman:

—Badxe' xi hosil, batüüg ree guialnaza'c loj guidxliuj din ma gojl reen ma bidxin tiamp ni yado'p reen.

¹⁶ Abi' bén zojb loj zaj guin badëëd xi hosaman loj guidxliuj abi' bato'paman guialnaza'c loj guidxliuj.

¹⁷ Dxel brii stijb anjl lën yadoo ni naj xanyabaa, ca' gajcaman tijb hoz ni nadoxh ro'. ¹⁸ Dxel niz loj altar brii stijb anjl bén rajp guialrniabee par bajl, abi' dád rejs guneenëman bén ca' hoz ni nadoxh ro' guin, rëbaman lojman:

—Badxe' xi hosil ni nadoxh ro', batü' ree uv ni yu' loj guidxliuj din ma gojl reen ma gojl tiamp ni yado'p reen.

¹⁹ Dxel badëëd anjl guin xi hosaman loj guidxliuj guin, abi' bato'paman uv guin ree loj guidxliuj. Abi' badxe'man uv guin ree lod guixii reen, laan rën guiëb lod yu' xcasti Dios. ²⁰ Dxel xijch ciuda guin bixii ree uv guin abi' lën lod bixii ree uv guin birii rejn. Rejn guin bixie'n loj guidxliuj zi'ct choon gayuu kilometro abi' wë'pan zi'ct xt niz ro' ree way.

15

Bén naj ree xi anjl Dios con guigajdx ree guialzi

¹ Dxel baguian stijb senro' xanyabaa, tijb sen ni diidxli badxaloj bejn: Baguian gajdx ree anjl con gajdx gualzi. Gualzi guin ree naj gajdx ni chigra gac din con gualzi guin ree gusiaaloj Dios xcastiman.

² Baguia tëen zi'c nijsdoo, per najn zi'c tijb vidr xculor bajl. Dxel lojn za' ree bën been ree gan loj monstroo, loj figur con loj xnumbrib, ca' reeman arp ni badëed Dios loj reeman. ³ Abi' cayool reeman xcant Moisejs xbejn Dios në xcant bën ni naj zi'c xi xiil Dios, rëb cant guin:

Naroob në ni diidxli radxaloj bejn naj ree ni rüjnl, dux Dadan Dios Bén rajp gra gualrniabee. Xnejz da't në zi'c rayal rüjnl, lüj gual rniabeel gra ree bénguidxliuj.

⁴ ¿Chu ad zadxebt lüj?

¿Chu ad zuza'tt lüj zagdx, dux Dadan Dios?

Tijbzi lüj naj bën naya nali

abi' bénguidxliuj gui't gap da't reeman lüj respejt gual ma balüül bejn ree gual xnejz rüjnl.

⁵ Chi gulox baguian ni guin ree, dxel baguian bixal luar lod mazri nagle' lën xyadoo Dios xanyabaa. ⁶ Abi' lën yadoo guin brii gajdx ree anjl bën ca' ree gajdx ree gualzi, najcw reeman lajd naquich ni rdiin bacha', abi' naxii tijb cinch or luxdoo reeman. ⁷ Abi' tijb guidap ree be ni za' lod za' Dios, badëeb loj tijbgaj ree anjl guin tijb cojp or ni guidxa xcasti Dios bën naban guidib tiamp në par tiblayaa. ⁸ Abi' lën yadoo guin gudxan xgo'xh xbacha' Dios në xgualrniabeeman. Achut gojc niu lën yadoo guin xt chi ma gulox guigajdx ree gualzi ni zidnë ree anjl guin.

16

Cojp ni guidxa ree xcasti Dios

¹ Dxel biguejnan cha' bejn rejs da't guneeman diizd lën yadoo guin, rëbaman loj guigajdx ree anjl guin:

—Gol chej, gol bigla't xcasti Dios ni yu' loj guigajdx ree cojp guin loj guidxliuj.

² Dxel wej anjl yaloj guin, bala'taman ni yu' loj xcojppaman loj guidxliuj. Abi' gra ree bën ni yu' xsen monstroo guin bën gop da't ree respejt xfigurib, brii guiadxoodx lad reeman, ni rdoob da't.

³ Abi' anjl barojp guin bala'taman ni yu' loj xcojppaman loj nijsdoo. Abi' nijs guin bayajcan rejn zi'c xrejn tijb bengüt abi' gra ree be naban loj nijs guin güjt.

⁴ Anjl bayon guin bala'taman ni yu' loj xcojppaman loj ree guiiw në lod rajch ree nijs abi' nijs guin ree bayajc reen rejn. ⁵ Abi' biguejnan rëb anjl ni rniabee ree nijs guin:

—Xnejz naj ni cayüjnl në zi'c cayüjn xgualguxtil, Dad Dios, lüj naj bën naya nali, najl Dios yan në diizd gocli. ⁶ Din bénguidxliuj ree guxhie' reeman rejn bagüjt reeman xbejn reel në ree bën badëed ree xtiidxil. Zeel ma badëedil rejn guië' reeman, abi' zian rayal reeman.

⁷ Abi' niz loj altar biguejnan cha' stijb bën rëb:

—Walican, Dad Dios bën rajp gra gualrniabee. Xnejz në zi'c rayal cayüjn xgualguxtil.

⁸ Abi' anjl badajp guin bala't ni yu' loj xcojppaman loj gubijdx din guze'can bejn ree zi'c bajl. ⁹ Gra reeman we'c por xgualnalaa da't gubijdx guin. Per ni'qui zian ad bayüjnt reeman xgab por xtol reeman,

ad baza'tt reeman Dios zagdxe guneeguidxli reeman laaman, laaman guial najman bën rniabee ree guialzi guin.

¹⁰ Anjl bagaay guin bala'taman ni yu' loj xcojppaman lod rbej monstuo ni rniabee guin, abi' bicajy loj guidxliuj, abi' xt rawya' lüdx ree bejn por guialzi ni cadéd reeman. ¹¹ Per ni'czi zian ad basa'nt reeman ni mal ni rüjn reeman, al mazri been reeman por guialzi ni gudéd reeman në por guidx ni gudxib lad reeman, guneeguidx reeman Dios bën zojb xanyabaa.

¹² Anjl baxo'p guin bala't ni yu' loj xcojppaman loj guiwro' la Eufates abi' gubidx nijs loj guiw guin. Zian bixal nejz din téd ree rey bën zëéd ree lad lod rliejn gubijdx. ¹³ Dxel baguian ro' dragon guin, con ro' monstuo guin në ro' bën rusquiee rëb rudëé xtiidx Dios loj ree bejn brii choon ree sprijt mal ni naj zi'c bidx. ¹⁴ Guiyon ree sprijt guin naj xsprijt xindxab, abi' rüjn reen milagr abi' rej reen lod za' gra ree rey loj guidxliuj persi rado'p reeman din til reeman con Dios bën rajp gra guialrniabee, dxej ni gui'taman guidguieenman gan loj gra reeman.

¹⁵ Rëb Jesucrist:

—Gol badxe'guijc guial dxejczy guialan zi'c chi ri't tijb xingubaa tijbzi golp. Xiquilbaa ree bën rbëz naj, bën za'sin ree chi guialan din chitéé yaya'nxtu reeman zi'c chi rniaaz bën za' zibëél.

¹⁶ Sprijt mal guin ree bato'p gra ree rey ni yu' loj guidxliuj tijb luar lod la Armagedón con diidx hebreo.

¹⁷ Abi' anjl bagajdx guin bala't ni yu' loj xcojppaman loj bi, abi' diizd lën yadoo ni yu' xanyabaa niz lod za' xyagxhil bën rniabee, biguien rejs da't cha' bën rëb:

—Ma bayaaloj gojc ni rayal gac.

¹⁸ Abi' guzuloj rë'p nijs, rajc naquie', rbidxa' guziaaw dxel bi't xudoxh, tijb xudoxh ni ad goct wayi't diizd guzuloj yu' bejn loj guidxliuj, din xu guin naj ni mazczi ni doxh. ¹⁹ Abi' gula' ciuda naroo guin gojcan choon lala', dxel guidib guidxliuj bize'n ree ciuda në ree guiedx. Abi' Dios ad bayanladxtaman Babilonia par gudëé xcasti ro'man loj ciuda naroo guin. ²⁰ Abi' guniyt ree gra yuj riga' loj nijsdoo në ree guia'. ²¹ Biajb tée guiajyabaa guijc ree gra ree bénguidxliuj, dxel tijbgaj ree guiaj yabaa guin na' reen cost tiuu quil. Abi' ree bejn guneeguidx reeman Dios, por ree guialzi guin, guial dád ni doxh gojc chi biajb ree guiajyabaa guin.

17

Guialguxtis ni güün Dios con béngunaa dxuudx

¹ Abi' tijb guigajdx ree anjl guin bi'taman naman lon:

—Guda din gulün lüj casti ni rayal béngunaa dxuudx ni zojb loj nijsro', ² laaman goc xtuu ree rey ni yu' loj guidxliuj, abi' zi'c rusüdx tijb bejn stijb bejn, zian bazaalguiwaman bejn ree loj guidxliuj con ree ni ad rüjnt sirv ni rüjnman.

³ Abi' por xSprijt Dios binë anjl guin naj lod naj ganax yujbidx. Ni baguian tijb béngunaa dxiibaman tijb monstuo xnia, abi' guidib ladib ca diidxguijdx par Dios, yu' gajdx guijquib con chii xcajchib. ⁴ Abi' béngunaa guin najcwaman lajd murad në ni xnia, najcchaawnën ganax or në ree guiaj zagdxe në ree perl. Abi' ca'man tijb cojp or guidxa ree ni nabixhladx lojn në ree ni dxuudx ni rüjnman. ⁵ Abi' lucwajman ca tijb letrer ni achutczy rignia' ni rën guiëban, rëb loj letrer guin: “Babilonia,

ciuda narooB ni naj xniaa ree béngunaa dxuudx në xniaa ree ni dxuudx ni rajc loj guidxliuj,”⁶ Dxel gogbeen guial rzüdx béngunaa guin con xrejn ree xbejn Dios, con xrejn ree bén ni güt guial gunee reeman xtiidx Jesús. Abi' dád badxalon chi baguian zian.⁷ Dxel na anjl guin lon:

—¿Chexc zeel dád radxaloj? Naj gusignia' lüj ni rën guiëb béngunaa ni baguiaal në monstroo ni dxiibaman, be ni yu' gajdx guijc con chii xcajch.⁸ Monstroo ni baguiaal, laab naj be guban gocli, per yan ad nabantrib. Per gulüülojb lën bizë ni ad yu't lod rlix dxelri nidlojb tiblyaaa. Abi' ree bén naban loj guidxliuj, bén ni ad cat ree laj loj xlibr guialnaban diidz gocli chi gad guidxliuj gacchaaw, laa reeman yadxalój chi guguaiaa reeman monstroo ni guban gocli, be ad nabant yan per gui'tib.

⁹ 'Guie ryaadx quiarguejn. Guigajdx guijc monstroo guin rën guiëban gajdx guia' lod zojb béngunaa guin¹⁰ rën tëë guiëban gajdx ree rey. Gaay ree rey guin ma gudëéd xguialrniabee, abi' bén baxo'p guin naj Bén canabee yan. Dxelri nabee Bén bagajdx guin, per ad xchejt nabeeman.¹¹ Abi' monstroo ni guban gocli, abi' yan ad nabantrib, laab gac rey baxujn, per loj gajc gajdx ree rey guin grii rey gac xhujn dxel yayalib lod rayalib casti par tiblyaaa.

¹² 'Guidxii cajch ni baguiaal rën guiëb chii ree rey ni ad wazulojt nabee. Per chi tia' reeman guialrniabee, ad xchejt nabee reeman con monstroo guin.¹³ Abi' guidxii ree rey guin yaya'n reeman diidx abi' yayü xguialguxtis reeman con xguialrniabee reeman loj monstroo guin,¹⁴ abi' til reeman con Bén naj zi'c xi xiil Dios. Per güün Bén naj zi'c xiil guin laa reeman gan din laaman naj Dad loj gra ree dad, naj tëëman rey loj gra ree rey. Abi' Bén za' ree con Bén naj zi'c xi xiil Dios, laa reeman naj Bén bazoob xtiidx Dios, Bén ma naj ree par laaman abi' diidxli zinal reeman xnejz Dios.

¹⁵ Na tëë anjl guin lon:

—Nijs ni baguiaal lod zojb béngunaa dxuudx guin laan rën guiëb graloj ree Bén rniee graloj ree diidx, Bén gra lad ree, Bén zëéd ree gra loj ree nacion.¹⁶ Abi' monstroo guin con guidxii xcajchib ni baguiaal, guidxe'ch reeman béngunaa dxuudx guin, tio'nladx reeman laaman, gusa'n reeman zibëëlamán, gaw reeman xbëëlamán abi' guze'c reeman laaman.¹⁷ Dios yazaladx loj guidxii ree rey guin quiarguejn din güün reeman zi'c rënman. Yaya'n reeman diidx din yayü xguialrniabee reeman loj monstroo guin, xt gac cumplid ni rëb Dios gac.¹⁸ Abi' béngunaa ni baguiaal, laaman naj ciuda narooB ni rniabee ree rey yu' loj guidxliuj.

18

Biajb guiedx Babilonia

¹ Chi gulox baguian ni guin ree, dxel baguian stijb anjl zidguiajtaman xanyabaa. Rajpaman zro' guialrniabee, abi' xbacha'man basni guidib guidxliuj,² abi' rnieeman rejs da't rëbaman:

—Ma biajb, ma biajb Babilonia ma naj ciuda narooB guin zi'c lidx ree xindxab, zi'c lidx ree graloj ree sprijt mal, zi'c lidx ree graloj ree be ni rzuj, bedxuudx ree be rbijxhladx ree bejn.³ Din zi'c chi rusüdx bejn stijb bejn, zian ma batiaalguiiw ciudaro' guin gra ree bénguidxliuj par güün reeman graloj ree ni dxuudx. Abi' ree rey yu' ree loj guidxliuj ma been reeman ni dxuudx guin ree con ciuda guin, abi' ree Bén rüjn negojs loj guidxliuj ma naj reeman rijcw por graczi ree ni dxuudx rajc ni.

⁴ Dxel biguejnan cha' stijb bén guneé diizd xanyabaa rëbaman:

—Gol brii loj ciuda guin, da bejn reen, chitëë go'chidi loj ree dol ni rajc ni chitëë tëdidi guialzi ni gac ree loj ciuda guin. ⁵ Din dád zien xtol reeman zeel ma bidxinan xt xanyabaa, abi' Dios ad zayanladxtaman ni mal guin ree. ⁶ Gol beennë ciuda guin zi'cgajc beennën ben ren ree, gol been din yaguijxan xcastin tio'p volt mazri guial loj ni beennën bejn ree abi' gol basagdiajn tio'p volt mazri guial loj ni basagdiajn ben ren ree. ⁷ Gol basagdiaj ciuda guin naya zi'c babaan chi beenan ni dxuudx ree, abi' zi'c beenan xgab rëban: “Zooban guie zi'c tijb bén rniabee, ad najtan bén bizëjb ad yu' tëët dxej chu'nayan.” ⁸ Zeel tijbzi dxej guidxajg lasa' ree guialzi par ciuda guin, zi'c guialgüjt, guialrunaya, guialrliaan, dxel che'can con bajl. Din narooob xguialrniabee dux Dad ree Dios bén gudëéd casti ciuda guin.

⁹ Abi' ree rey ni yu' loj guidxliuj, bén babaa ree guial been reeman ni dxuudx con ciuda guin, zoon reeman, naya sagdiaj reeman chi guguaa reeman go'xh ni cayë'can. ¹⁰ Abi' zijt su reeman chi guguaa reeman casti ni cadëdan, dxel guiëb reeman:

—¡Probza lüj, probza lüj Babilonia, ciuda narooob ni guyu gojl par gra! Din tibrajtzi bi't casti par lüj.

¹¹ Abi' ree bén rüjn negojs loj guidxliuj zoon reeman zu tëë luxdoo reeman naya por ciuda guin, din achutri sii ni ruto' reeman, ¹² zi'c or, plajt, guiaj zagdxe ree, perl, lajd zagdxe ree, lajd sed ree culor murad con ni xnia, në graloj ree tabl ruree nejxh në graloj ree ni been reeman con ree tabl zagdxe, bronce, guiib con marmol në marfil. ¹³ Ad zajc tëëtri guto' reeman canel në graloj ree ni ruree nejxh, ad zajctri guto' reeman goxyaal, mirra, perfum, vin, sejt oliv, harin zagdxe, trigo, go'n, xiil, way, carrejt, ad zajc tëëtri ree guto' reeman bejn ree. ¹⁴ Abi' guiëb reeman loj ciuda guin:

—¡Ad rajptril guialnaza'c ni bayuladx da'til, tiblayaa ma banijtil zi'c gubanl con gra ree ni za'c ni gopill!

¹⁵ Gra ree bén been negojs, bén gojc ree rijcw por ciuda guin, zijt su reeman guialrdxeb reeman casti ni cadëd ciuda guin. Zoon reeman, zazagdiaj reeman, zunaya reeman. ¹⁶ Abi' guiëb reeman:

—¡Probza, probza ciuda narooob guin! Laan guial guzujchaawan con ree lajd zagdxe, lajd culor murad con ni xnia, laan guial guzujchaawan con or, con perl në con guiaj zagdxe ¹⁷ din, ¡tibrajtzi gunidloj gra ree guialnaza'c guin!

Gra ree bén zë lën barcw, zi'cgajc xcapitan ree barcw, gra ree mariner në los demazri ree bén rüjn dxiin lën barcw, guzudxe reeman zijt ¹⁸ chi baguaa reeman go'xh ni cayë'c ciuda guin, abi' gurixdiaj reeman rëb reeman:

—¿Goc guyu tijb ciuda lasa' ciuda ro' guie?

¹⁹ Abi' barooob yuj guiyc reeman, roon reeman abi' guyunaya luxdoo reeman rëb reeman:

—¡Probza!, probza ciuda narooob guin por xguialnaza'can gra ree bén been negojs bén rajp ree barcw gojc reeman rijcw, din tibrajtzi gunidlojn.

²⁰ Dxel biguien cha' bén na:

—Per lëjt bén zojb ree xanyabaa, lëjt najdi xi apóstoles Jesucrist, lëjt bén rudëéd ree xtiidx Dios në los demazri ree bén naj xbejn Dios, gol babaa por ni cazajc ciuda guin din zian cayüjn Dios xguialguxtisaman por ni beennë ciuda guin lëjt.

²¹ Abi' tijb anjl gojl da't, gulesaman tijb guiaj narooob, zi'c tijb guiaj mulin abi' bazaalaman laan loj nijsdoo rëbaman:

—Zi'c bazaalin guiaj guie con guidib da gojlan zian nidoxh sac ciuda narooob Babilonia, abi' achutri guguaa Babilonia guin stijb. ²² Ad zaguentri ree cha' arp, ni'qui ree xinrucwejdx, ni'qui ree bidxa, ni'qui ree cha' trompejt ad zaguentri loj ciuda guin. Achutri bejn güün dxiin ni, ni'qui xnaquie' mulin ad zaguentri ni. ²³ Achetri guij che'c loj ciuda guin, achutri guxhliaa. Gra ree bén been negojs loj ciuda guin ganax bén zojbloj gojc reeman loj guidxliuj, abi' ciuda guin basquieen gra ree nacion con ree ni dxuudx ni beenan.

²⁴ Abi' loj ciuda guin bagüjt reeman bén badëed ree xtiidx Dios, në ree bén rliladx Dios, abi' por ciuda guin bagüjt reeman los demasri ree bén ma güjt loj guidxliuj.

19

¹ Chi gulox baguian biguiejn tëen zian, dxel dád rejs biguiejnan cha' zien da't ree bén canee xanyabaa rëb reeman:

¡Quixtëe Dios! Por dux Dad ree Dios
zëed perdon, respejt në guialrniabee,

² din laaman waliman abi' xnejz rüjn xgualguxtisaman,
ma badëedaman casti béngunaa dxuudx ni bazaalguiiw
bénguidxliuj ree con ree xni malaman,

ma been Dios gualguxtis con laaman persi baguijxaman ni bagüjtaman
xbejnman.

³ Abi' biguiejnan rëb reeman stijb:

—¡Quixtëe Dios! Ad yu't dxej yayü' go'xh ni caye'c ciuda guin.

⁴ Abi' guigajlbitap ree bengol con guidap ree be naban guin bazuxib reeman delant loj xyagxhil Dios par gap da't reeman laaman respejt, rëb reeman:

—¡Quixtëe Dios! ¡Diidxza'c guin ree naj par laaman!

⁵ Abi' niz lod za' yagxhil guin biguiejnan cha' bén rëb:
Gradi zi'c bengol zi'c xindoo
gol gules xvalor dux Dad ree Dios,
lëjt rüjndi laaman sirv abi' rajpidi laaman respejt.

Xgualruxhliaa bén naj zi'c xi xiil Dios

⁶ Biguiejn tëen zi'c chi rguien cha' zien da't bejn, o zi'c xnaquie' nijsro', o zi'c chi rbidxa' da't guziaaw, rebaman:
¡Quixtëe Dios! Din ma canabee dux Dad ree Dios,
bén ca' gra guialrniabee.

⁷ Yan yadxé' du luxdoo ree zagdxé, yabaa ree yales tëë ree xvaloraman.
Din ma bidxin dxej guxhliaa bén naj zi'c xi xiilaman
abi' bén gac lacheelaman ma za'chaawaman.

⁸ Najcwaman lajd zagdxé, ni naquich, naya rulaa tëen bacha'.
Din lajd naquich guin rën guiëban ni zagdxé ni been ree xbejn Dios.

⁹ Abi' na anjl guin lon:

—Bacaa: “Xiquilbaa ree bén naj gui't loj xgualruxhliaa bén naj zi'c xi xiil Dios.”

Na tëë anjl guin:

—Ni guie ree naj xtiidxli Dios.

¹⁰ Dxel bazuxiban loj anjl guin par ga'p da'tan laaman respejt, per naman lon:

—Ad güünl zian. Din zi'cgajc lüj xmandadzi Dios cayguieen, zi'cgajc gra ree lasa'l bén wali ree rüjncwent xtiidx Jesucrist. Gojp da't respejt Dios.

Din por Jesús zëed ni rniee ree bén rudëed xtiidx Dios.

Bén dxiib tijb way naquich

¹¹ Dxel baguian zøjbyal xanyabaa baguia tëen tijb way naquich. Bén dxiib laab laman: Bén ruzoob xtiidxaman në bén wali, din xnejz rüjn xguialguxtisaman në xwadijlaman, ¹² guiaaløjman rulaan bacha' zi'c bajl abi' zien ree coron yu' guijcaman, tib lajtaman ca laj tijb bejn ni achut rignia', tijbzi laaman ragbee xhie rën guiëban, ¹³ guidib rejnzi xabaman, abi' laman Xtiidx Dios.

¹⁴ Abi' ree xsuldadaman bén yu' xanyabaa zinal reeman laaman dxiib reeman way naquich, najcw reeman lajd zagdxe ni naquich ni naya tëë. ¹⁵ Ro'man ririi tijb espad ni nadoxo ro', con espad guin gudëedaman casti bénguidxliuj, në con var guiib nabeeman laa reeman. Zi'c rë'p bejn guijc uv par guixiin, zian gudëedaman loj reeman casti narooob ni zëed por Dios bén rajp gra guialrniabee. ¹⁶ Loj xcajpaman con cüdaman ca ree diidx ni rëb: “Rey bén rniabee loj ree rey në Dad bén rniabee loj ree dad.”

¹⁷ Dxel baguian tijb anjl za'liman loj gubijdx, dád rejs rbidxa'man, rbejdxaman gra ree be ni rzuj xanyabaa, rëbaman:

—Gol guda, gol bachajg lasa'di lod gunee Dios ni gawidi zro' da't, ¹⁸ zi'c xbëel ree rey, xbëel ree capitan, xbëel ree bén achut rüjn gan, zi'c xbëel ree way, xbëel ree bén rbib laa reeb, xbëel gra ree bejn, zi'c xbëel ree bén naj zi'c bén nado' në xbëel ree bén ad najt zi'c bén nado', zi'c xi bëel ree bengol në ree xindoo.

¹⁹ Dxel baguian monstroo con ree rey yu' loj guidxliuj në ree xsuldad reeman, nadxag lasa' reeman par til reeman con bén dxiib way naquich guin con ree xsuldadaman. ²⁰ Per laa reeman gunaaz reeman monstroo guin con bén rusquiee rëb rudëe xtiidx Dios loj ree bejn, bén rüjn milagr niz loj monstroo guin. Abi' por ree milagr guin basquieeman bén guyu ree xsen monstroo guin gojp tëë reeman respejt xfigurib. Abi' monstroo guin con bén rusquiee ni rëb rudëe xtiidx Dios loj ree bejn, grop reeman guidib naban reeman bazaal reeman laa reeman loj bajl lod caye'c azufre. ²¹ Abi' los demazri ree xbejn monstroo guin güjt reeman con espad ni ririi ro' bén dxiib way naquich guin, abi' gudaw ree be ni rzuj xanyabaa laa reeman, xt gudxa lën reeb gudaw ree xbëel reeman.

20

Ti mil ijz

¹ Dxel baguian zidguiajt tijb anjl xanyabaa, ca'man xguiibliaw bizë ni ad yu't lod rliox, ca' tëëman tijb caden narooob. ² Abi' gunaazaman dragon, bëel gulal ni la xindxab në satanás, guxhiiman laab con caden guin por timil ijz. ³ Dxel bazaalaman laab lën bizë ni ad yu't lod rliox abi' basiaawdx'i'chaman bizë guin chitëë gusquieeri reeb bejn ree loj guidxliuj xt chi ma bayaaloj timil ijz dxel yariib lën bizë guin tiblädëd.

⁴ Dxel baguian yaxghil zagdxe ree lasa' xyagxhil ree rey, lojn zøjb ree bén ni ma cwa' guialrniabee par güün reeman guialguxtis. Baguia tëen xsprijt ree bén ni biru' yëjn guial gutie'ch reeman xtiidx Dios në gra ni ragbee reeman por Jesús. Laa reeman ad gojpt respejt monstroo guin ni'qui xfigurib abi' ad cwëjbt reeman niu xsenb lucwaj reeman o yaa

reeman. Abi' baguian baban reeman stijb, dxel gunabee reeman con Cristo timil ijz. ⁵ Laan naj ni yaloj ni yaban ree bengüt, per stijb ree bengüt ad zabant reeman xt yaza' timil ijz. ⁶ ¡Xiquilbaa ree bén yaban yaloj! Laa reeman ma naya niz loj Dios abi' ad zayaltri reeman guialgüjt rarojp, laa reeman gac xbixhioz Dios con xbixhioz Cristo abi' nabeenē reeman laaman timil ijz guin.

⁷ Chi ma bayaaloj timil ijz guin, dxel yarii xindxab guin lod nayaawix ⁸ Par gusquieex bejn ree guidib guidxliuj. Gusquieex Gog nē Magog din guchajg lasa' ree xbejn reeman din güün reeman wadijl. Abi' guido'p zien da't reeman zi'c üx ni riga' ro' nijsdoo. ⁹ Gra lad gui't reeman, guido'p reeman gadëd lod za' ree xbejn Dios nē gadëd ro' guiedx lod rënman. Per laaman diizd xanyabaa guixhiaalaman bajl ni guze'c bén guin ree xt yadëj reeman. ¹⁰ Abi' xindxab ni basquiee laa reeman laax chu' loj bajl lod caye'c azufre, lod ma za' monstruo con bén rusquiee rëb rudëe xtiidx Dios loj ree bejn, lod ad yu't dxej yarii reeman lod sagdiaj tēe reeman dxej guiaal.

Yadëed ree bejn cwent loj Dios

¹¹ Dxel baguian tijb yagxhil zi'c xi yagxhil rey, tijb yagxhil narooob ni naquich. Lojn zojb tijb bejn abi' delant lojman biquied guidxliuj nē xanyabaa, gunidloj reen tiblayaa. ¹² Dxel baguian guial delant loj yagxhil guin lod zojb Dios, ni za' ree bengüt, zi'c ree bengol zi'c ree xindobëz. Abi' bixal loj ree libr, dxel bixal loj stijb libr ni la xlibr guialnaban. Dxel been Dios xguialguxtisaman con ree bengüt guin zi'c ca loj ree libr guin xcwent ree ni been reeman. ¹³ Nijsdoo bayü xbengütan, abi' guialgüjt bayü xbengütan, abi' ree bengüt ni za' lod cabëz reeman guidxin dxej ni yadëed reeman cwent loj Dios, bibig reeman yagaj din güün xguialguxtis Dios con laa reeman bal conin been reeman. ¹⁴ Dxel guialgüjt con lod guzu ree bengüt gulëjz reeman guidxin dxej yadëed reeman cwent loj Dios, grop reen bazaal reeman loj bajl, bajl guin naj guialgüjt barojp. ¹⁵ Abi' loj gajc bajl guin bayal ree bén ad cat laj loj xlibr guialnaban.

21

Xanyabaa cüb con guidxliuj cüb

¹ Chi gulox baguian ni guin ree, dxel baguian tijb xanyabaa cüb con tijb guidxliuj cüb, din xanyabaa con guidxliuj ni guyu diizd yaloj ma gunijt reen, ziangajc nijsdoo. ² Dxel baguian Jerusalén cüb, xguiedx narooob Dios zidguiajtan xi xanyabaa Dios. Dád za'chaawan zi'c rzujchaaw tijb biingunaa chi ma guxhliaam con xin gac lacheelim. ³ Abi' dád rejs biguejnan cha' bén gunee lod za' xyagxhil Dios, rëbaman:

—Ma za' Dios con ree bejn, guibannëman laa reeman abi' laa reeman gac xbejnman, guiáad laaman suman con laa reeman abi' gacaman xDios reeman. ⁴ Laaman gutiaa loj reeman nijs biin reeman, dxel achetri guialgüjt chu', guialroon, guialrunaya nē guialzi, din gra ree ni guyu gocli ma gudëd reen.

⁵ Abi' bén zojb loj yagxhil guin, naman:

—Gra cayünan nicüb.

Na tēëman:

—Bacaa ree diidx guie, din laa reen naj diidxli ni rayal chililadx bejn.

⁶ Dxel naman:

—Ma gojc ni rayal gac. Naj naj zi'c A con Z, din tijbzi naj rniabee diidz guia'xchej në par tiblyaa. Bén re'c nijs, naj yazaladx nijs lojman nijs ni ririi lod rajch nijs ni runee gualnaban.

⁷ Bén ni güün gan loj dol, laaman yayal gra ree ni guin. Abi' naj gac xDiosaman guiáad laaman gac da xi'nán. ⁸ Per ree bén rdxeb sudxi'ch loj ni rililadx reeman naj, bén ad rililadxt ree naj, bén ruladx ree güün ganax ni mal, bén rugüjt ree bejn, bén rüjn ree nidxuudx con ree bén ad najt lacheel reeman, bén rüjn ree gualbidxaa, bén rën ree ni naladx reeman naj ree Dios, në gra ree bén rusquiee, laa reeman rayal loj bajl lod caye'c azufre, bajl guin naj gualgüjt rarojp.

Jerusalén cüb

⁹ Dxel tijb guigajdx ree anjl bén ca' ree guigajdx ree cojp ni guidxa guigajdx ree gualzi bigra guin, bi'taman lod za'n, naman lon:

—Guda, din gulün lüj biinxdüb ni gac lacheel bén naj zi'c xi xiil Dios.

¹⁰ Abi' por Sprijt binë anjl guin naj guijc tijb guia' narooob, guijc tijb guia' ya. Ni balüüman naj Jerusalén, xciuda narooob Dios zidguiajtan xi xanyabaa Dios. ¹¹ Rulaan bacha' por xbacha' Dios. Abi' bacha' guin naj zi'c xbacha' tijb guiaj lasajc, guiaj zagdxe ni la Jaspe, nayni zi'c tijb vidr. ¹² Gadëd ro' ciuda guin naj tijb ze' narooob, tijb ze' ya con chiptio'p ree port, abi' tijb gaj ro' ree port guin za' tijb gaj ree anjl. Lad ree port guin ca zi'c la guidxiptio'p cwaa ree Bén Israel, tijb gaj lad port guin ca zi'c la tibcwaa gaj reeman. ¹³ Choon ree port guin naj niz lod rliejn gubijdx, abi' choon reen naj niz lod rëez gubijdx, za choon ree port guin naj niz lad norte, za choonan naj niz lad sur. ¹⁴ Abi' con chiptio'p guiaj naj xcimiant ze' guin, dxel loj ree guiaj guin ca laj ree guidxiptio'p ree xi apóstoles bén naj zi'c xi xiil Dios.

¹⁵ Anjl ni guneenë naj ca'man tijb var or din tia'beenëman ciuda guin con ree port guin con ze' guin.

¹⁶ Ciuda guin najn ni cuadrad, zi'cgajc zioolan ziangajc gulajgan. Cwa'bee anjl guin laan con var or ni ca'man, xi mididan naj tio'p mil tio'p gayuu kilometro, zi'c guyoolan ziangajc yan, ziangajc gulajgan. ¹⁷ Dxel cwa'man midid ze' guin, abi' ze' guin najn gayojnbitap mejtr zi'c naj xmidid bénguidxliuj zi'c bare'xh anjl guinan.

¹⁸ Ze' guin gojcnën guiaj ni la Jaspe, abi' ciuda guin najnën ganax or, zi'cgajczi naj vidr nayni. ¹⁹ Xguiaj cimiant ze' guin najcchaawnën gadx-agayaa ree guiaj zagdxe. Guiaj yaløj guin najcchaawnën con guiaj ni la Jaspe, guiaj barojp guin najcchaawnën guiaj ni la zafiro, guiaj bayon guin najcchaawnën guiaj ni la ágata, guiaj badajp guin najcchaawnën guiaj ni la esmeralda, ²⁰ guiaj ni bagaay guin najcchaawnën guiaj ni la ónice, guiaj ni baxo'p guin najcchaawnën guiaj ni la cornalina, guiaj bagajdx guin najcchaawnën guiaj ni la crisólito, guiaj goc xhujn najcchaawnën con guiaj ni la berilo, guiaj goc gaa najcchaawnën guiaj ni la topacio, guiaj ni goc chii najcchaawnën guiaj ni la crisoprasa, guiaj ni goc chiptib najcchaawnën guiaj ni la jacinto, guiaj ni goc chiptio'p najcchaawnën guiaj ni la amatista. ²¹ Gra guidxiptio'p ree xport ciuda guin gojcnë reen con chiptio'p ree perl, tijb gaj perl guin najnë tijbgaj port. Abi' nejz narooob ni naa galay ciuda guin najn ganax or, zi'c tal naj tijb vidr ni rdëd biani grop xijch.

²² Ni'qui tijb yadoo ad baguiatan loj ciuda guin din dux Dad ree Dios bén ca' gra gualrniabee con bén naj zi'c xi xiilaman, laa reeman naj

xyadoo ciuda guin. ²³ Abi' loj ciuda guin ad rüjnt naguiejn gusni gubijdx ni'qui bëew, din xbacha' Dios rusni ni abi' bén naj zi'c xi xiilaman laaman naj bajl ni. ²⁴ Bén zëéd ree lod rent lod ren sa reeman loj bacha' guin, bén ma naj ree perdon. Abi' ree rey loj guidxliuj guie guidné xguialza'cdxoon reeman loj ciuda guin. ²⁵ Xport ciuda guin ad yu't dxej yaaw reen radxe, abi' ni ad zut guiaal. ²⁶ Gra xguialza'cdxoon con gra xguialzagdxe ree bén zëéd lood rent lood ren, guidxin reen loj ciuda guin. ²⁷ Per ad yu't dxej chu' ni dxuudx loj ciuda guin, ni'qui ree bén rüjn ni dxuudx ni'qui ree bén rusquiee, bén cazi ree laj loj xlibr guialnaban ni ca' bén naj zi'c xi xiil Dios, laaz reeman chu' loj ciuda guin.

22

¹ Balüü tëë anjl guin lon tijb guiiw naya ni razaladx guialnaban, naynidxuj zi'c tijb guiaawaj. Ririi nijs guin lod za' xyagxhil Dios con bén naj zi'c xi xiilaman, ² abi' zën galay loj nejz naroo ni naa galay ciuda guin. Galay nejz guin naa guiiw guin, abi' grop lad guiiw guin zojyb yag ni runee guialnaban ni rtia chiptio'p loj ninejxh, gazobëew ridxaa ninejxh ni rtia lojn. Abi' ree xbalag yag guin rüjn reen sirv par gac bejn nadaan. ³ Achetri ni mal chu' ni, abi' Dios con bén naj zi'c xi xiilaman cwe loj xi yagxhil reeman guiáad ree xbejn reeman gap da't laa reeman respejt. ⁴ Abi' ni guguaal loj reeman Dios, bén ni ca ree lajman lucwaj. ⁵ Achetri guaial chu' ni, ad ryaadxt bajl ni'qui gubijdx din dux Dad ree Dios gusni ni, abi' ma nabee reeman tiblayaa con laaman.

Ma zidyob gui't Jesucrist

⁶ Dxel na anjl guin lon:

—Diidx guie ree naj ni diidxli ni rayal chililadx ree bejn. Abi' Dios bén razaladx diidx loj ree bén rudëéd xtiidxaman loj ree bejn, laaman guxhaal xi anjl din gulüüman bejn ree ni ma zidyob gac. ⁷ Dad Jesucrist rëb guial nayob gui'taman.

¡Xiquilbaa ree bén ridxga' ni ca loj libr guie ni rugojn ni gac!

⁸ Naj Waj, baguian biguiejn tëën ni guin ree. Abi' chi gulox baguian biguiejn tëën ni guin ree, dxel bazuxiban par ga'p da'tan respejt anjl ni balüü ree ni guin lon. ⁹ Per naman lon:

—Ad güünl zian. Din naj zi'cgajc lüj, xmandadzi Dios cayguieen, zi'cgajc ree xcompniaril bén rudëéd ree xtiidx Dios, në ree bén ridxga' ree ni ca loj libr guie. Zeel Dios gojp da't respejt.

¹⁰ Na tëëman lon:

—Ad guquie'chil diidx ni zëéd ree loj libr guie, diidx ni rugojn ree ni gac, din ma zidyob gac reen. ¹¹ Gol basa'n ree ben mal con xni mal reeman, abi' ree bén naban nadxuudx zu naban reeman nadxuudx bal zian ruladx reeman. Per bén rüjn ree zi'c rayal gusnuu güün reeman zi'c rayal abi' ree bén naban zi'c rën Dios gusnuu guiban reeman zi'c rën Dios.

¹² Rëb Jesucrist:

—Gol badxe'guijc guial nayob guialan, abi' guidne'n ni rayal tijbgaj bejn bal gonin been tijbgajman. ¹³ Naj naj zi'c lejtr A con lejtr Z, lejtr ni rzulojnë ni rlioxnë tëë alfabeto, din tijbzi naj rniabee diidx guia'xchej në par tiblayaa.

¹⁴ Xiquilbaa ree bén ni naj zi'c ree bén ma gudiib xab guial ridxga' reeman xtiidx Dios, din gac chu' reeman niz ro' xport ciuda guin din gap tëë reeman derejch gaw reeman ni nejxh ni rtia loj yag runee

guialnaban. ¹⁵ Abi' xijch ciuda guin yaya'n ree benguijdx, bén rüjn ree guialbidxaa, bén rüjn ree ni dxuudx con ree bén ad najt lacheel reeman, bén rugüjt ree bejn, bén ni rajp ree respejt ni naladx reeman naj dios, në ree bén ruladx cwëëguijc ni rusquiee rniece tëë reeman diidx rusquiee ree. ¹⁶—Naj Jesús ma guxhal da anjlan din gugojnman lëjt gra ree ni guie din guiëbidi laan loj gra ree bén rliladx naj. Naj naj quijb xdiaa rey Davi, loj xdiaaman zialan. Naj naj zi'c bajl nayni ni rliejn rsildoo.

¹⁷ XSprijt Dios con biinxdüb ni gac lacheel bén naj zi'c xi xiil Dios rëb reeman:

—Guda.

Abi' bén riguijejn rniece reeman zian, rëb gajcaman:

—Guda.

Chutëëz bén re'c nijs, gol guda, abi' bén rën zajc guië'man nijs runee guialnaban lagajzi.

¹⁸ Gra ree bén riguijejn ree diidx ni zëëd loj libr guie ni gac, naj rni lojdi bal chu bén gucaa guijc ni zëëd loj libr guie, ziangajc zusro' Dios guialzi ni zëëd loj libr guie par laaman. ¹⁹ Ziangajc bal chu chiquied xhie diidx guijc ree diidx ni zëëd loj libr guie ni gac ziangajc chiquied Dios guijc ni rayalaman loj yag runee guialnaban ni ruza't libr guie ad zayu tëëtaman loj xciuda Dios ni ruza't libr guie.

²⁰ Bén ragbee guial diidxli naj gra ree ni guie, rëbaman:

—Walin, nayob guialan.

Zian gacan Dad Jesús, ¡Guda!

²¹ Dad Jesús güünle' gradi. Amén.